

GINITAĀO VARIĀUNA



The New Testament in the Sinaugoro Language of Papua New
Guinea

GINITAŌ VARIŌUNA
The New Testament in the Sinaugoro Language of Papua New Guinea
Nupela Testamen long tokples Sinaugoro long Niugini

Copyright © 1995 The Bible Society of Papua New Guinea

Language: Sinaugoro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 18 Apr 2025 from source files dated 31 Aug 2023
a998e4ce-f2f7-5577-968e-5d2feef358f1

Contents

MATAIO	1
MAREKO	49
LUKA	78
IOANE	127
APOSTOLO	165
ROMA	211
1 KORINTO	234
2 KORINTO	256
GALATIA	272
EFESO	281
FILIPi	289
KOLOSE	295
1 TESALONIKA	301
2 TESALONIKA	305
1 TIMOTEO	308
2 TIMOTEO	314
TITO	319
FILEMONA	322
HEBERU	324
IAKOBO	340
1 PETERO	346
2 PETERO	352
1 IOANE	356
2 IOANE	361
3 IOANE	362
IUDAS	363
APOKALUPO	365

VARI NAMONA MATAIO NA ETOREATO

Mataio vaġa-foforina guruġari

Mataio arana ta tu Levi. Ġia tovotovonai tu takesi gogo tarimana, senaġi Iesu na ekeaiato, benamo ġena mero ai eiaġoto.

Ġia tu Iuda tarimana, ma mai Vari Namona tu Iuda tarimari ġeri etoreato.

Ġia na Iuda tarimari ekirarito, Iesu tu moġoni Barau na ekiraġi-toreato Kerisona o vevaġa-maġuri verena. Ginitaġo Guinena o Old Testament ai Keriso beiaġomani guruġana ġetoreato tu varau bema moġoni. Barau ġena guruġa tauri mabarari tu beġe vetoreni veġata (Mataio 5:17). Mataio na ġena Vari Namona nuġanai Keriso varina Old Testament ai ġekiraġi-toreato guruġari ġutuma ma ema torerito anina tu moġea.

Mataio na mai buka tu laġani 58 ema 70 fakari ai etoreato, mo tu Iesu emaseto murinai. Mataio ġena toretore tu maiġesina eboioġaiato:

1. Iesu aiġesina eiaġomato besena ema ġena maġuri varina - karoa 1-2
2. Ġena vetuġunaġi ġauveina bene sinaia ġana tauġena everovinato varina - karoa 3-4:11
3. Ġena ġauvei esinaiato, evevaġa-ribato, eġobatato, e keve evaġa-namorito variri - karoa 4:12-25:46
4. Ġena midigumidigu varina - karoa 26-27
5. Mase na evariġisi-ġenoġoito ema ġena mero etuġurito variri - karoa 28

Iesu eiaġomato besena

¹ Iesu Keriso emaġurito, tubuna ġatana ġerina eiaġomato varina tu maiġa: Iesu tu Davida garakana, Davida tu Aberahamo garakana.

² Aberahamo tu Isako tamana; Isako tu Iakobo tamana; Iakobo tu Iuda ma kakana ema tarina merori ġesi tamari;

³ Iuda tu Perese e Sera tamari, sinari tu Tamar; Perese tu Hesron tamana; Hesron tu Ram tamana;

⁴ Ram tu Aminadab tamana; Aminadab tu Nasona tamana; Nasona tu Salmon tamana;

⁵ Salmon tu Boas tamana, Boas sinana tu Rahaba; Boas tu Obed tamana, Obed sinana tu Ruta; Obed tu Iese tamana;

⁶ Iese tu Kini Davida tamana.

Davida tu Solomona tamana. Solomona tu Uria ġaraġona ġenana emaġurito, (Uria ġaraġona etava-verariato murinai);

⁷ Solomona tu Rehoboam tamana; Rehoboam tu Abia tamana; Abia tu Asa tamana;

⁸ Asa tu Iehosafat tamana; Iehosafat tu Ioram tamana; Ioram tu Usia tamana;

⁹ Usia tu Iotam tamana; Iotam tu Ahasa tamana; Ahasa tu Hesekia tamana;

¹⁰ Hesekia tu Manase tamana; Manase tu Amon tamana; Amon tu Iosia tamana;

¹¹ Iosia tu Iekonia ma tarina merori ġesi tamari. Mo ġaro ai Babulona tarimari na Isaraela tarimari ġeġabi-iaġorito Babulona ġana.

¹² Babulona ġana ġeġabi-iaġorito murinai, Iesu eiaġomato besena ema ġemaġurito varina tu maiġa: Iekonia tu Sealtiele tamana; Sealtiele tu Serubabele tamana;

¹³ Serubabele tu Abiud tamana; Abiud tu Eliakim tamana; Eliakim tu Asoro tamana;

¹⁴ Asoro tu Sadok tamana; Sadok tu Akim tamana; Akim tu Eliud tamana;

¹⁵ Eliud tu Eleasara tamana; Eleasara tu Matan tamana; Matan tu Iakobo tamana;

¹⁶ Iakobo tu Iosefa tamana, Iosefa ġaraġona tu Maria. Maria ġenana Iesu emaġurito; Iesu arana ġekiraġiani Keriso ġetoni. (Keriso anina tu Barau na ekiraġi-toreato vevaġa-maġuri tauna).

¹⁷ Guru mabarari Aberahamo ġenana eiaġomato mo Kini Davida tu ġuru gabanana vasivasi (14), e Davida ġenana eiaġomato mo Babulona ġana ġeġabi-iaġorito tu ġuru gabanana vasivasi (14), ema Babulona ġana ġeġabi-iaġorito negana na eiaġomato mo Keriso tu ġuru gabanana vasivasi (14).

Iesu eġorato

Luka 2:1-7

¹⁸ Iesu Keriso tu maiġesi eġorato: Ġia sinana Maria tu Iosefa kirakauna, senaġi ġia tauri ruarua tu roġosi roġo beġene veġaraġo nuġanai, Iauka Veaġa na mero evaġa-ġoraiato Maria diana nuġanai.

¹⁹ Iosefa, Maria ġaraġona, tu vei iobukaibuka tarimana, ema asi eurato, tarimarima ġoirari ai Maria bene vaġa-maiakaia. Moġesina naima ġena ura tu, vekure-toġai vau Maria bene dobi-kwanea etato.

²⁰ Ĝia moĝesi etuĝamaĝito-ĝoi nuĝanai, Vereĝauka ĝena aneru ta nuvi ai efororito, benamo ekiraiato, ekirato, "Iosefa, Davida natuna, kirakaumu Maria ĝabiraĝena garina asi bono vei, korana ĝia tu Iauka Veaĝa na mero bevaĝa-ĝoraia ĝia diana nuĝanai.

²¹ Ĝia na mero ta beĝabiani, arana bono vatoa Iesu, (Iesu anina tu vevaĝa-maĝuri tauna); korana ĝia na ĝena tarimarima ĝeri rakava ĝerina bevaĝa-maĝuririni."

²² Maĝeri dagara mabarari ĝeĝorato tu, Vereĝauka na peroveta tarimana muruna na ekiragiŝirito guruĝari bene vaĝa-moĝoniri ĝana, ekirato,

²³ "Goĝitaia, ĝuiato ta bekuĝani, mero ta beĝabiani, mo mero keina arana beĝe vatoani Emanuela."

Emanuela anina tu 'Barau tu ĝita sevisivirai.'

²⁴ Iosefa gena na etataĝato nai tu, Vereĝauka ĝena aneru na ekiraiato veiĝari eveirito. Maria eĝabi-raĝeato, benamo eĝaraĝoato.

²⁵ Senaĝi ĝia ĝesi asi ĝegenasebonato mo, natuna eĝabiato. Benamo mero arana evatoato, Iesu.

2

Iaunega tarimari ĝaro-raĝeraĝena rekena na ĝeiaĝomato

¹ Iesu tu Iudea tanonai vanuĝa ta arana Betelehema ai emagiŝirito. Mo tu Kini Heroda na Iudea tanona eĝitaĝaŭato-ĝoi neganai. Iesu emagiŝirito murinai, iaunega tarimari tu ĝaro eraĝeni rekena na ĝeiaĝomato, Ierusalemaj ĝema-raĝasito.

² Benamo ĝevedanaĝito, ĝekirato, "Iuda tarimari ĝeri kini ta bemaĝuri ĝetoni tu ainai? Ĝia ĝena visiĝu baĝa ĝitaia ĝaro eraĝeni rekenai. Ĝai tu ĝia toma-rakariĝo vinina baĝa iaĝoma."

³ Kini Heroda na mo guruĝa eseĝaĝiato nai, nuĝana eketo-bokoto, ema Ieruselema tarimari mabarari maki.

⁴ Benamo ĝia na Rubu Veaĝa vereri baregori e taravatu vaĝa-riba-iaĝina tarimari mabarari evaĝa-vegogorito, benamo edanaĝirito, ekirato, "Peroveta tarimari tu kara ĝetato, Keriso, (Barau na ekiraĝi-toreato vevaĝa-maĝuri tauna), tu ainai bemaĝurini?"

⁵ Ĝia na ĝevaĝa-veseato, ĝekirato, "Betelehema vanuĝana, mo tu Iudea tanonai, korana peroveta tarimana Mika na maĝesi etoreato,

⁶ "Betelehema o, Iudea tanonai otanuni vanuĝana, Iuda vanuĝari vekaravari ai ĝoi tu dia vanuĝa misina, asi arana vanuĝana ta, korana tu veĝorikau tauna ta ĝoi ĝemuna beiaĝomani, ĝia na au ĝegu Isaraela tarimari beguine-iaĝirini."

⁷ Benamo Heroda na iaunega tarimari vekuretoĝai ekearito, benamo edanaĝi-ginikau ginikaurito, ekirato, kamara ĝaro korikori ai visiĝu efororito.

⁸ Benamo etuĝurito Betelehema ĝana, ekirato, "Goiaĝo, mero misina boĝonoa vetau-ginikaua, boĝo doĝariani neganai, boĝonoma vaĝa-ribagu, be au maki bana iaĝo, bana toma-rakariĝo vinia."

⁹ Heroda gena guruĝa ĝeseĝaĝiato murinai, ma ĝerakato dabara na. Dabara na ĝeiaĝoto-ĝoi nuĝanai, mo visiĝu, ĝaro eraĝeni rekenai ĝeĝitaio visiĝuna, na eguine-iaĝirito mo, mero misina gena gena gabuna iatanai eruĝa-tarito.

¹⁰ Ĝia na mo visiĝu ĝeĝitaio nai, ĝeikau-rakavato.

¹¹ Mo numai ĝeraka-toĝato nai, mero misina ma sinana Maria ĝesi ĝeĝitarito, benamo ĝevetui-tarito, ĝetoma-rakariĝoato. Moĝa murinai ĝeri farefare ĝeĝurito dagarari ĝekeorito, bona ĝevarevare-viniato. Gevarevare-viniato dagarari tu golo, e muramura arana frenkinsens, mai tu goĝuna ma bonana namona muramura, ema vedau muramura arana muro.

¹² Benamo Barau na nuvi ai evaĝa-ribarito, ekirato, "Heroda ĝenai asi boĝono ĝenoĝoi." Moĝa lorinai dabara boruna na ĝeri tanobara e vanuĝa ĝana ĝeĝenoĝoito.

Iesu Aigupito ĝana ĝeĝwa-iaĝoato

¹³ Ĝia ĝerakato murinai, Vereĝauka ĝena aneru nuvi ai Iosefa ĝenai efororito, ekirato, "Novaisiraĝe, mero misina ma sinana ĝesi Aigupito ĝana noraga-ĝori iaĝori. Monai boĝono tanu mo, au na ma bavaĝa-guruĝamuni, korana Heroda na mero misina eve-taŭani, bene vaĝi-masea etoni."

¹⁴ Benamo Iosefa evariĝisito, mero misina ma sinana ĝesi eĝabirito, boĝi nuĝanai Aigupito ĝana ĝeiaĝoto.

¹⁵ Monai ĝetanuto mo, Heroda emaseto. Moĝesina Vereĝauka na peroveta tarimana muruna na ekiraĝiato guruĝana ema moĝonito, ekirato, "Aigupito na natugu akearosiato."

Heroda gena guruĝa lorinai mero misiri ĝutuma ĝevaĝi-maserito

¹⁶ Heroda eriba-maoroto, mo iaunega tarimari na ġia tu ġeġofaiato nai, ebaru-rakava rakavato. Benamo vetari tarimari o soldia etuġurito, Betelehema e rikina tanori ai mero misiri ġeri maġuri laġaniri ruarua e gabivau ma ġemaġurito mabarari ġevaġi-maserito. Mo mero misiri ġeri maġuri laġanina ruarua ma murinai ġevaġi-maserito anina tu, iaunega tarimari na visiġu ġeġitaio to ġarona na, eiaġoto mo, Heroda eribato ġarona tu laġani ruarua kavana.

¹⁷ Mo ġaro ai Barau na peroveta tarimana Ieremia muruna na kara ekiraġiato guruġana tu ema moġonito, ekirato,

¹⁸ “Ġaro ta Rama vanuġanai ġeseġaġiato, taġi-koġokoġo e taġi-vanorovanoro tu barego, Rahela natuna taġiri eveini, e asi eurani beġene vaġa-magoa, korana natuna tu beġe mase.”

Nasareta ġana ġeġenoġoito

¹⁹ Heroda emaseto murinai, Vereġauka ġena aneru Iosefa ġenai nuvi ai ma eforito Aiġupito ai.

²⁰ Benamo mo aneru Iosefa ekiraiato, ekirato, “Novaisiraġe, mero misina ma sinana ġesi noġabiri, Isaraela tanona ġana ġoiaġo. Korana tu mero misina beġene vaġi-masea ġetato-ġoi tarimari tu varau beġe mase.”

²¹ Iosefa evarigisito, benamo mero misina ma sinana ġesi eġoririto, Isaraela tanona ġana ġeiaġoto.

²² Senaġi Iosefa eseġaġito, Akelao na Iudea eġitaġauato-ġoi tamana Heroda gabunai, benamo mo ġana iaġo tu egarito. A Barau na nuvi ai evaġa-ribaiato ilailanai erakavanagito, eiaġoto Galilea tanona rekana ġana.

²³ Galilea tanonai vanuġa ta arana Nasareta etanuto. Monana Barau na peroveta tarimari ġerina Iesu ekiraġiato guruġana emoġonito, ekirato, “Ġia tu Nasareta tarimanai beġe kiragiani.”

3

Ioane Babatiso eġobatato

Ioane 1:19-28

¹ Moġeri ġarori ai Ioane Babatiso eiaġomato, tano fakanai Iudea nuġanai eġobatato-ġoi, ekirato,

² “Ġemi rakava ġerina ġovetuġamaġi-kure, ema ġoraka-kure Barau ġenai, korana Guba Basileiana tu bevotu, (Barau ġena veġitaġau seġukana evaġa-ruġaianai maġa).”

³ Mai Ioane maġa tu Isaia peroveta tarimana na ekiraġiato-ġoi, maġesi ekirato, “Tarima ta tano fakanai ekeani, ekirani, ‘Vereġauka ġena dabara ġoiarevaia, ġena iaġoma dabarana ġovaġa-maoromaoroa.’”

⁴ Ioane ġena dabuġa tu kamela ġuiri na ġeveiato, ġena gabaġau tu nanigosi kefina. Ġana ġaniġani dagarari tu madude e gode nanuri moġo.

⁵ Tarimarima Ierusema na e Iudea mabarana na ema Ioridana douka vanuġari mabarari na maki ġeiaġoto-ġoi Ioane ġenai.

⁶ Ġeri rakava ġekiraġi-foforirito-ġoi vau, ebatatorito-ġoi Ioridana ġarukanai.

⁷ Farisea e Sadukea tarimari ġutuma maki ġia ġenai ġeiaġoto bene babatitori ġana. Ioane na eġitarito nai, ekirarito, ekirato, “Ġomi mota naturi, dei na bekirami, Barau ġena Kota baregona ġarona ġenana boġo raga-maġurini?”

⁸ Ġemi rakava ġerina boġono vetuġamaġi-kure, benamo ġemi maġuri ai ġwaġwa namori boġono vaġa-ġwari.

⁹ Ema nuġami ai asi boġono kira, ‘Aberhamo tu ġai tamama, (be Barau na beġabi-raġemani).’ Korana akiramini, Barau tu ma seġukana, Aberhamo natuna tu mai fore ġerina bevaġa-ġorarini!”

¹⁰ Toma koko tu ġau korari ai varau beġe toreri; moġa lorinai ġwaġwa namori asi ġevaġa-ġorarini ġauri mabarari tu beġe basirini, karavai beġe fiu-raġerini.

¹¹ Deikara ġena rakava ġerina evetuġamaġi-kureni tarimana, au na tu nanu na ababatisoani. Senaġi au murigu na beiaġomani tarimana ġena seġuka tu lelevaġi, au ġegu seġuka maki evanaġiani, ema ġia ġena tamaka maki au na asi baġwa-rakaorakaoani riba. Ġia na tu Iauka Veġa e karava na bebabatisomini.

¹² Ġia ġimanai tu iareva-iareva dagarana, widi momona tu widi tauri ġenana bene iareva-ġitakauri ġana. Benamo widi tu ġena vaġa-vegogo numanai bevaġa-vegogorini, senaġi widi momona beġabuani asi ebuseni karavanai.”

Ioane na Iesu ebatato

Mareko 1:9-11; Luka 3:21-22

¹³ Moġa neganai Iesu tu Galilea vanuġana na Ioridana ġarukana ġana eiaġoto, Ioane na bene babatisoa ġana.

¹⁴ Senaġi Ioane na ekiraġoiato, ekirato, “Bere namo ġoi na au boro babatisogu. Karase nai au ġegu ai boiaġoma?”

¹⁵ A Iesu na evaġa-veaseato, ekirato, “Veigana noveia, korana veigā iobukaiobuka o Barau ġena ura veigari mabarari bitana korana-iaġiri tu namo.” Benamo Ioane na Iesu ġena ura veigana eveiato.

¹⁶ Iesu ebabatisoato, nanu na eraka-raġasito nuġanai, guba evekeo-fakato, benamo ġia na Barau laukana eġitaiato, pune kavana emariġoto ġia iatanai.

¹⁷ Ema garo ta guba na ekea-riġoto, ekirato, “Mai tu au Natugu, aura-viniani; ema ġia ġenai aiaku-rakavani maki.”

4

Diabolo o Satani na Iesu eriba-ġaniato

¹ Moġa murinai lauka Veaġa na Iesu tano fakana ġana eġori-iaġoato, Diabolo na bene riba-ġania ġana.

² Garo e boġi gabana vasivasi (40) nuġari ai asi eġaniġanito, eġani-veaġato; moġa lorinai vito na eġabi-rakavaiato.

³ Benamo Veribaġani Tarimana Diabolo ġia ġenai eiaġoto, ekiraiato, ekirato, “Bema ġoi Barau Natuna nai, mai fore nokirari, be ġaniġani ai ġeiaġo.”

⁴ A Iesu na evaġa-veaseato, ekirato, “Buka Veaġa nuġanai maiġesi ekirani, ‘Tarimarima tu dia ġaniġani na moġo bemaġurini. Senaġi Barau ġena guruġa beġabi-raġġerini e bekorana-iaġirini tarimana tu maġuri beġabiani.’”

⁵ Benamo Diabolo na Ierusalem, siti veaġana, ġana eġori-iaġoato, Rubu Veaġa tuġuna vaniġerenai evaġa-ruġakauato.

⁶ Benamo ekirato, “Bema ġoi Barau Natuna, mainana noburi-firiġo, korana Buka Veaġa nuġanai maiġesi ekirani,

‘Barau na ġena aneru bevaġa-naġirini, benamo ġimari na beġe ġobemuni, beġe ġabi-vaismuni, kwakumu fore ai asi boraraiani.’”

⁷ Iesu na ma evaġa-veaseato, ekirato, “Buka Veaġa nuġanai maki ekirani, ‘Vereġauka goi ġemu Barau asi bono riba-ġania.’”

⁸ Benamo Diabolo na Iesu eġori-raġeato ġoro baregona e maukana ta tuġunai, tanobara basileirai mabarari ma marevari namori e ma seġukari ġesi evaġa-ġitaiato,

⁹ ekirato, “Bema goiragu ai bovetui-tarini e au botoma-rakariego viniguni nai tu, maiġeri mabarari au na bavinimuni.”

¹⁰ Benamo Iesu na ekiraiato, ekirato, “Satani, au ġeguna noraka-vegita. Korana Buka Veaġa nuġanai ekirani, ‘Vereġauka goi ġemu Barau bono toma-rakariego vinia, ġia moġo ġereġana vetuġunaġina bono iaġo-vini!’”

¹¹ Benamo Diabolo na eraga-kwaneato. Aneru kotari Iesu ġenai ġeiaġoto, ġenariato.

Iesu ġena ġauvei esinaiato Galileai

Mareko 1:14-15; Luka 4:14-15

¹² Iesu eseġaġito, Ioane ġe-diburaiato, benamo Galilea tanona ġana ma eġenoġoi-iaġoto.

¹³ Senaġi Nasareta vanuġana ma eragakwaneato, asi etanuto, eiaġoto, Kaperanaumai ea tanuto. Kaperanaumai tu Genesareta kouna sevina vanuġana ta, Sebulun e Naftali tanori nuġanai.

¹⁴ Moġa ġenana Isaia, peroveta tarimana, ġena guruġa emoġonito, ekirato,

¹⁵ “Sebulun e Naftali tanori ai ġotanuni tarimami o, Galilea kouna rikinai ema Ioridana ġarukana mo rekenai, irau bese tarimami, Barau asi ribami tarimami, ġemi Galilea tu moġa, goseġaġi.

¹⁶ Mukunai ġetanuto-goġi tarimari tu mama barana varau ġeġitaiani. E mo dei mukuna furufuru tanonai ġetanuto-goġi tarimari iatari ai mama varau bema fofori.”

¹⁷ Mo negai vau Iesu na ġena vari eġobata-iaġi-foforiato, ekirato, “Ġemi rakava ġerina ġovetuġamaġi-kure, ema ġoraka-kure Barau ġenai, korana Guba Basileiana tu bevotu, (Barau ġena veġitaġau seġukana evaġa-ruġaiani maiġa).”

Iesu na tarima vasivasi (4) ekearito, ġia murinai beġene raka

Mareko 1:16-20; Luka 5:1-11

¹⁸ Iesu Galilea kouna kone rikina na eraka-iaġoto-goġi nuġanai, tarikaka ruarua, Simona, arana ta tu Petero, ma tarina Anduru ġesi eġitarito, ġeri reke kou ai ġefiuato, korana ġia tauri ruarua tu maina tarimari.

¹⁹ Benamo Iesu na evaḡa-guruḡarito, ekirato, “Ḡoiaḡoma, murigu ai ḡoma raka, be au na tu tarimarima maina viniri bana vaḡa-ribami.”

²⁰ Benamo maoromaoro ḡeri reke ḡeraga-kwanerito, Iesu murinai ḡerakato.

²¹ Monana ḡeraka-iaḡoto-ḡoi nai, Iesu na tarikaka ruarua ma eḡitarito, Iakobo (o Iames) Sebedaio ma tarina Ioane ḡesi; ḡeri ḡasi ai tamari Sebedaio ḡesi ḡeri reke ḡwadareri ḡeturirito. Iesu na ekearito,

²² benamo maoromaoro ḡeri ḡasi e tamari ḡeraga-kwanerito, Iesu murinai ḡerakato.

Iesu evevaḡa-ribato ema keve tarimari evaḡa-namorito

Luka 6:17-19

²³ Iesu Galilea tanona mabaranai erakaoto-ḡoi, Iuda tarimari ḡeri rubu nuḡari ai evevaḡa-ribato-ḡoi, e Barau ḡena Basileia, (ḡena veḡitaḡau seḡukana evaḡa-ruḡaiani), varina namona eḡobata-iaḡiato-ḡoi. Ema tarimarima ḡeri keve e midigu irauirau mabarari evaḡa-namorito.

²⁴ Ḡia varina ḡefuato, Siria tanona mabarana eḡabiato, benamo tarimarima na ḡeri keve tarimari mabarari ḡia ḡenai ḡeḡwa-iaḡorito e ḡeḡori-iaḡorito: Midigu irauirau, iauka rakavari na ḡeboroḡirito tarimari, ḡue na evaḡiani kevena, tauḡani ḡeḡoḡoḡoḡoni, e tauḡaniri tavi tari ḡemaseto tarimari, Iesu na mabarari evaḡa-namorito.

²⁵ Tarimarima ḡutuma-bara ḡia murinai ḡerakato, Galilea na, Vanuḡa Gabanana (10) na, Ierusalem na, Iudea na, ema Ioridana ḡarukana mo rekena na maki ḡia ḡekavaiato.

5

Iesu ḡoro tuḡunai eḡobato

¹ Iesu na tarima ḡutuma-bara eḡitarito, benamo ḡoro tai eraḡeto, iatanai etanu-tarito. Ḡena mero ḡia ḡenai ḡeiaḡoto.

² Benamo ḡia na evaḡa-riba matamarito, maiḡesina ekirato:

Iaku e verere korikorina

Luka 6:20-23

³ “Manau tarimari, Barau ḡenai moḡo ḡevetabekauni tarimari, tu beḡene iaku, korana Barau ḡena Basileia tu ḡia ḡeri.

⁴ Deidei toma ḡenuḡa-midigu midiguni tarimari tu beḡene iaku, korana Barau na ḡeri nuḡa-midigumidigu bevaḡa-maḡorini.

⁵ Manau tarimari tu beḡene iaku, korana Barau na tanobara mabarana ḡia bevinirini.

⁶ Veiḡa iobukaiobuka vitona ḡevito-iaḡiani e nanumasena ḡenanumase-iaḡiani tarimari tu beḡene iaku, korana vau beḡe ḡani-maseni.

⁷ Vevetuḡaḡwa tarimari tu beḡene iaku, korana Barau na ḡia maki bevetuḡa-ḡwarini.

⁸ Deidei nuḡari namo vedaurea tarimari tu beḡene iaku, korana ḡia na Barau beḡe ḡitaiani.

⁹ Deidei na toma vevaḡa-maino veiḡari ḡeveirini tarimari tu beḡene iaku, korana Barau na ḡia natunai bekiraḡirini.

¹⁰ Deidei na toma veiḡa iobukaiobukari ḡeveirini ḡaramanai ḡevaḡa-midigu midigurini e ḡevaḡa-rakavarini tarimari tu beḡene iaku, korana Guba Basileia tu ḡia ḡeri.

¹¹ Bema au murigu ai ḡorakani ḡaramanai ḡomi beḡe mugumugu-iaḡimini, beḡe vaḡa-midigu midigumini, e veiḡa rakavari irauirau ḡemi ai beḡe kiraḡirini beḡe ḡofaḡofa-iaḡimini nai, boḡono iaku.

¹² Boḡono iaku, boḡono verere, korana Barau na voimi baregona bevinimini gubai. Maiḡesina veiḡa ilailana, ḡomi murimi tarimari, peroveta tarimari guineri, na maki moḡesi ḡevaḡa-rakavarito.”

Damena e mama

Mareko 9:50; Luka 14:34-35

¹³ “Ḡomi tu tanobara damenana. Bema damena mamina korikorina bekorini nai, kamara dabarai mamina ma beḡenoḡoini? Mai tu varau berakava, asi ḡena namo ta. Moḡa lorinai beḡe fitoḡaiani, benamo tarimarima kwakuri na ma beḡe fanafana-tariani.

¹⁴ Ḡomi tu tanobara mamana. Ḡoro tuḡunai ḡevaḡa-ruḡaiato vanuḡana tu asi bevekure-toḡani riba.

¹⁵ Lamefa beḡe gabuani maki, ḡuro gaburenai asi beḡe toreani, senaḡina lamefa toretorena fatana korikorinai beḡe tore-kauani. Benamo ḡia mamana na numa tarimari mabarari bevinirini.

¹⁶ Ilailana, ḡomi ḡemi mama tarimarima ḡoirari ai moḡesi boḡono vaḡa-foforiri, be ḡemi veiḡa namori beḡene ḡitari, benamo Tamami gubai etanuni tu beḡene vaḡa-raḡea.”

Iesu ema taravatu

¹⁷ “Maigēsina asi boĝono tuĝa-maĝi, au aiaĝomato tu, Mose ĝena taravatu e peroveta tarimari ĝeri guruĝa asi aniri ai bana vaĝa-iaĝori ĝana. Asiĝina. Au tu asi aiaĝomato moĝeri guruĝa asi tauri ai bana vaĝa-iaĝori ĝana, senaĝi bana vaĝa-moĝoniri e bana vaĝa-kori ginikauri uranai aiaĝomato.

¹⁸ Moĝoni akira-mini, guba e tanobara roĝo ĝetanuni nuĝanai, taravatu ĝena leta misina korokorona ta o ĝena koma ta asiĝina ĝinavaĝi berekwa-rekwani, beiaĝoni mo, taravatu mabarari tauri korikori beĝea ĝorani.

¹⁹ Moĝa lorinai, tarima ta na taravatu misina korokorona ta bekira-sirivaĝi viniani, ema ĝena ura veiĝanai tarima kotari mai veiĝa ilailana ma bea vaĝa-ribarini, ĝia tu Guba Basileiai gabi tarimanai beĝe kiraĝiani. Senaĝina tarima ta na taravatu bekorana-iaĝirini ema tarima kotari ma bea vaĝa-riba iaĝirini, ĝia tu guine tarimanai beĝe kiraĝiani Guba Basileia nuĝanai.

²⁰ Akira-korikorimini, bema ĝomi ĝemi vei-iobukaiobuka na Farisea e taravatu ĝevevaĝa-riba iaĝiani tarimari ĝeri vei-iobukaiobuka asi bevanaĝiani nai, ĝomi tu Guba Basileia nuĝanai asi boĝo raka-toĝani, asiĝina ĝinavaĝi.”

Vaĝivaĝi

Luka 12:57-59

²¹ “Ĝomi ma ribami, tarima guineri na taravatu guruĝari ĝeĝabirito, ĝekirato, ‘Asi bono vaĝivaĝi! A deikara na tarima ta bevaĝiani nai, ĝia tu Kota gabuna ĝana beiaĝoni.’

²² Senaĝi toma au na akiramini: Tarima ta tarikakana bebaru-viniani nai, ĝia tu Kota gabunai beĝe danaĝiani. E dei na tarikakana beguruĝa-rakava viniani nai, ĝia tu Kota baranai beĝe vaĝa-ruĝaiani. Ema dei na tarikakana bekiraiani, ‘Ĝoi tu babo korikori’ betoni nai, ĝia tu asi ebuseni karavana ĝana beiaĝoni.

²³ Moĝa lorinai, bema ĝemu varevare dagarana fata veaĝana iatanai bono torekaua, Barau bono vinia otoni nuĝanai, ĝoi tarikamu otuĝamaĝiani, ĝia ma ĝena meto ĝoi ĝemu ai,

²⁴ benamo ĝemu varevare dagarana fata veaĝana ĝoiranai noraga-kwanea, noiaĝo, tarikakamu ĝesi maino boĝono ĝabia roĝo, gabivau bono ĝenoĝoi-iaĝo, ĝemu varevare dagarana fata veaĝanai bono torea Barau ĝena.

²⁵ Ĝoi ebaru-vinimuni tarimana ĝesi maino boĝono raga-ĝabia, Kota gabuna ĝana roĝo mani goraka-vegogoni nuĝanai. Korana ebaru-vinimuni tarimana na Kota eseĝaĝini tarimana ĝimanai bea tore-kaumuni ĝesi, ema Kota eseĝaĝini tarimana na dibura numana ĝitaĝauna tarimana ĝimanai betoremuni, benamo ĝia na dibura numana nujanai bebiri-ĝaumuni garina.

²⁶ Au na akira-korikorimini: Monana asi roĝo boraka-rosini, beiaĝoni mo, ĝemu meto voina bodava-ĝosiani.”

Veĝura-vanaĝi

²⁷ “Ĝomi ma ribami, tarima guineri na taravatu guruĝari ĝeĝabirito, ĝekirato, ‘Asi bono veĝura-vanaĝi!’

²⁸ Senaĝi au na akiramini: Deikara na tarima ta ĝaraĝona beĝita-karakaraiani ma eurani bene ĝabia ĝia ĝena, ĝia tu nuĝana tuĝamaĝina ĝenana varau beveĝura-vanaĝi mo vavine ĝenai.

²⁹ Bema ĝoi matamu aroribana na evaĝa-rakavamuni nai, bono ĝibo-vaĝia, bono fitoĝaia! Korana tauĝanimu rakavana rekena berekwa-rekwani tu namo, a asi namo tauĝanimu mabarana karava asi ebuseni gabunai beĝe fiu-kauani.

³⁰ Ma bema ĝoi ĝimamu aroribana na evaĝa-rakavamuni nai, bono basi-ĝutua, bono fitoĝaia. Veiĝa namona tu, tauĝanimu rakavana rekena bono fitoĝa-guinea, be tauĝanimu mabarana karava eĝara-vanaĝi vanaĝini gabuna ĝana asi bene iaĝo.”

Vavine tuĝuraka

Mataio 19:9; Mareko 10:11-12; Luka 16:18

³¹ “Tarima guineri na taravatu guruĝari ĝeĝabirito, ĝekirato, ‘Tau ta ĝaraĝona betuĝu-rakaiani nai, ĝia na veĝaraĝo ruĝaruĝana fefana bene tore-vinia.’

³² Senaĝina au na akiramini: Bema tarima ta ĝaraĝona betuĝu-dobiani, senaĝi vavine tu veĝura-vanaĝi veiĝari asi eveini, mo tau na ĝaraĝona tu veĝuravanaĝi vavinenai evaĝa-iaĝoani. Ema deikara na etuĝu-rakaiato vavinenana beĝaraĝoani tarimana tu, beveĝura-vanaĝini.”

Guruĝatore

³³ “Ĝita senera ĝevaĝa-ribarito guruĝari ĝomi tu ma ribami: ‘Ĝemi guruĝatore asi boĝono vaĝa-rakavaia, senaĝi Vereĝauka ĝoiranai ĝokiraĝi-toreto dagarari boĝono veiri.’

³⁴ Senaġi au na akiramini: Asi boġono guruġatore veġata! Ġemi guruġa vaġa-gwaġiġiri ġana guba asi boġono kiraġia, guba aranai asi boġono guruġatore, korana ġia tu Barau ġena terona;

³⁵ o tanobara aranai maki asiġina, korana ġia tu Barau kwakuna ġena fanakau dagnarana; o Ieruselema aranai, korana ġia tu Kini baregona ġena siti.

³⁶ Goi debamu, ġemu maġuri, maki asi bono kiraġia ġemu guruġatore vaġa-gwaġiġina ġana, korana ġoi na ġuimu sebona ta asi bovaġa-kurokuroani e asi bovaġa-dubadubaiani riba.

³⁷ Namona tu maiġa: Ġemu guruġa bono kiraġia, 'Oi' bene oi e 'Asiġina' bene asiġina. Moġa moġo, a guruġa tari ma okiraġirini tu Tarima Rakavana, Satani, ġenana eiaġomani."

Evaġa-rakavamuni tarimana voina asi bono veia

Luka 6:29-30

³⁸ "Tarima guineri ġevaġa-ribarito guruġari ġomi tu ma ribami, maiġesi ġekirato: 'Mata voina mata e doġa voina doġa.'

³⁹ Senaġina au na akiramini, veġa rakavana evei-vinimuni tarimana asi bono veġa rakava-vinia. Bema tarima ta na taġomu aroribana beforoani nai, taġomu kaurina ma bono vinia maki.

⁴⁰ E bema tarima ta na Kotai betoremuni ġemu sedi bene ġabia ġana nai, ġemu koudi maki bono vinia.

⁴¹ Ema tarima ta na belau-naġimuni, kilomita sebonai bono kavaia betoni nai, kilomita ruarua ai ma bono raka ġia gesi.

⁴² Ema enoġinoġini tarimana bono vinia, e ġemu ai bene ġabitore etoni tarimana maki asi bono kira-sirivagi vinia."

Ġevaġa-rakavamuni tarimari bono ura-viniri

Luka 6:27-28; 6:32-36

⁴³ "Tarima guineri ġevaġa-ribarito taravaturo ma ribami, ġekirato: 'Goi sevimu tarimana bono ura-vinia, a evaġa-rakavamuni tarimana bono vaġa-rakavaia.'

⁴⁴ Senaġina au na akiramini: Ġebaru-vinimini tarimari boġono ura-viniri, e dei na ġevaġa-rakavamini tarimari maki iatari ai boġono ġauġau.

⁴⁵ Maiġa ġenana boġo vaġa-foforiani, ġomi tu Tamami gubai etanuni na natunai evaġa-iaġomito. Korana ġia na ġaro tu veġa rakava tarimari e veġa namo tarimari iatari ai evaġa-raġekauani, ema ġura maki veġa iobukaiobuka e veġa ġeġeva-ġeġeva tarimari ġeri etuġu-riġoani.

⁴⁶ Bema ġoura-vinirini tarimari tu ġomi ġeura-vinimini tarimari moġo nai, kamara varevare namona boġo ġabiani? Takesi ġegogoni tarimari o ġofaġofa tarimari na maiġesina maki ġeveiani.

⁴⁷ Ema tarikakami moġo boġo vaġa-namorini, ġemi namo tu kara? Barau asi ribari tarimari na maki mai veġa ġeveiani.

⁴⁸ Moġa lorinai ġomi tu asi vetoukaumi boġono tanu, ġomi Tamami gubai etanuni asi vetou-kauna kavana."

6

Vini korikorina rabu tarimari ġeri ai

¹ "Rorimi boġono vetore, ġemi veġa namori tarimarima ġoirari ai asi boġono vaġa-foforiri, ġia na beġene vaġa-raġemi ġana. Maġeri bogo veirini nai, Tamami gubai etanuni ġenana voimi asi boġo ġabini.

² Moġesi nai, ġemu varevare rabu tarimari bovinirini nai, asi bono ġobata-iaġia ma kibimu ġesi, ġofaġofa tarimari rubu ai e vanuġa ġatamanai ġeveini kavana, tarimarima na beġene vevato-iaġiri ġana. Akira-korikorimini, ġia tu tarimarima na ġevaġa-raġerini, be voiri tu varau ġeġabirito.

³ Sena-ġina ġoi ġemu varevare asi ġena-ġana tarimana novinia botoni nai, ġimamu kaurina asi bene riba, ġoi ġimamu aroribana na kara eveiani.

⁴ Be ġemu varevare vekuretoġai bono vini. Ema Tamamu na, kara eġorani vekure-toġai eġitarini, ġia na vau voimu bevinimuni."

Vereġauka ġena ġauġau

Luka 11:2-4

⁵ "Bema boġo ġauġauni nai, ġofaġofa tarimari kavana asi boġono iaġo! Ġia ruġaruġari ai ma iakuri ġesi ġeġuriġurini, rubu nuġari ai e vanuġa ġatamanai ema dabarai maki, tarimarima na beġene ġitari ġana. Au na akira-korikorimini, ġia voiri varau ġeġabito.

⁶ A ғoi ourani bono ғауғау отони nai, ғему numa daiғутuna нуғанai bono rakatoғa, ғатama-boka bono biri-ғауа, monai vau Tamamu bono noғi-vinia, ғia tu vekuretoғai etanuni. Ema Tamamu na, kara eғorani vekuretoғai eғitarini, ғia na vau voimu bevinimuni.

⁷ Ғomi boғo ғауғауni nai, asi boғono kiraғi ғenoғoi-ғenoғoi guruға asi aniri ғeri ai, Barau asi ribari tarimari ғеveini kavana. Ғia ғетуғamaғini, ғeri guruға vovoka ғekiraғirini naima, Barau na beseғaғirini.

⁸ Ғia kavari asi boғono iaғo. Korana ғomi na kara ғoura-vinirini, Tamami na eriba-guineani, gabivau ғomi na ғonoғi-viniani.

⁹ Maiғesina boғono ғuriғuri:

‘Ғai Tamama o, gubai otanuni; ғoi aramu baғana vaға-veaғаa;

¹⁰ ғему Basileia bene iaғoma; ғему ura tanobarai baғana veia, gubai ғеveiani kavana.

¹¹ Gema-ғama toma bono vinima.

¹² Ғema rakava notuғamaғi-fitoғari, ғai ғevaға-rakavamani tarimari ғeri rakava ғатуғamaғi-fitoғarini vaға-ilailana.

¹³ Veribaғani ai asi bono ғori-kauma, a Rakava Tarimana, Satani, ғimana na bono vaға-maғurima. [Korana Basileia tu ғoi ғему, seғuka ғoi ғему, mareva baregona ғoi ғему, toma bene iaғo mo vanaғivanағi, Amen.]’

¹⁴ Bema ғomi na ғevaға-rakavamini tarimari ғeri rakava boғo туғamaғi-fitoғarini nai, Tamami gubai etanuni na ғemi rakava maki betuғamaғi-fitoғarini.

¹⁵ Senaғina, bema ғomi na ғevaға-rakavamini tarimari ғeri rakava asi boғo туғamaғi-fitoғarini nai, Tamami na ғemi rakava maki asi betuғamaғi-fitoғarini.”

Ғaniveaға

¹⁶ “Boғo ғani-veaғani nai, asi boғono boғe-vetuға, ғofaғofa tarimari ғеveini kavari. Goirari ai ғеvevaға-fofori ғofakauni, tarimarima na maboru beғene kira, ‘Geғani-veaғani kika’ beғene si. Akira-korikorimini, ғia voiri tu varau ғeғabirito.

¹⁷ A ғoi, bema bono ғani-veaға botoni nai, debamu ai deoro bono tore e ғoiramu bono ғurija,

¹⁸ be tarimarima na asi beғene ribamu, ғoi tu oғani-veaғani, senaғina Tamamu veғuni ai moғo bene riba. Ema Tamamu na, kara eғorani vekuretoғai eғitarini, ғia na vau voimu bevinimuni.”

Ғemi farefare gubai boғono vaға-vegogo

Luka 12:33-34

¹⁹ “Ғemi farefare tu mai tanobarai asi boғono vaға-vegogo! Korana faro ema lalalala o rasta na beғe vaға-rakavarini ғesi, ema lema tarimari na numa beғe dareani ema beғe lemarini.

²⁰ Ғemi farefare gubai boғono vaға-vegogo, faro e lalalala na asi beғe vaға-rakavarini, ema lema tarimari na maki numa asi beғe dareani ema asi beғe lemarini riba.

²¹ Ғoi ғему farefare ainai etanuni, ғoi нуғamu maki monai etanuni.”

Mata tu tauғani ғena mama

Luka 11:34-36

²² “Mata tu tauғani ғena lamefa kavana. Bema ғoi matamu namo nai, tauғanimu mabarana maki bemamani.

²³ Senaғina bema ғoi matamu tu rakava nai, tauғanimu mabarana maki bemukunani. A bema mama ғoi нуғamu ai tu mukuna nai, mai mukuna tu bebarego-vedaureani!”

Tarima ta vere ruarua vetuғuri asi beiaғo-vinini riba

Luka 16:13

²⁴ “Tarima ta na vere ruarua vetuғunaғiri asi beiaғo-vinirini riba. Korana ғia na ta tu asi beura-viniani, a ta tu beura-viniani; ta bevaға-moғoniani, a ta tu beғofaғofa-iaғiani. Barau ema moni nega sebonai vetuғunaғiri asi boғo iaғo-vinirini riba.”

Asi boғono nuға-vekwaraғi

Luka 12:22-31

²⁵ “Moғesi naima akiramini, ғemi maғuri asi boғono туғamaғiri, kara boғo ғanini o boғo niuni; o tauғanimi kara na boғo dabuғarini. Aйa tu dagara barana, maғuri ba ғaniғani? E aйa tu dagara barana, tauғani ba dabuға?

²⁶ Gubai ғerovoni manuri ғoғitari! Ғia tu asi ғevarovaroni e asi ғekwakwani, ema vamoka numari ai maki ғaniғani asi ғevaға-vegogoni. Senaғi Tamami gubai etanuni na eғuburini. Gomi tu dagara baregomi, a manu tu kei!

²⁷ Ğomi deikara onuġa-vekwaraġini nai, ġemu maġuri kota ma bovaġa-maukaiani riba ba?

²⁸ Karase dabuġa urari ai ġove-tuġamaġi-vekwaraġini? Boġa veraverari ġoġitari, aiġesi ġegarani. Asi ġeġauveini e dabuġa asi ġeturini.

²⁹ Senaġina akiramini, Kini Solomona ġena vedabuġa marevana maki ġevanaġiani.

³⁰ Mai tu Barau na tano ġauġari evaġa-dabuġarini, ġia tu toma ġegarani, a boinani tu karavai beġe fiu-raġerini, Barau tu moġesina evaġa-dabuġarini. ġia na ġomi asi veġatana bevaġa-dabuġamini, ei? Ğomi veġabidadama misimisi tarimami!

³¹ Moġesi nai, asi boġono nuġa-vekwaraġi, asi boġono kira, 'Kara toma taġanini?' O 'Kara toma taniuni?' O 'Kara toma tariġoni?'

³² Barau asi ribari tarimari na maiġeri dagara mabarari ġeraga-vetaurini, a Tamami gubai etanuni tu ribana, ġomi na maiġeri ġoura-vinirini.

³³ Senaġina giniguine ġia ġena Basileia ema ġena vei-iobukaiobuka boġono vetau-ġuineri, benamo manġeri dagara mabarari ġomi bevinimini.

³⁴ Moġesina naima boinani ġaro tuġamaġi-vekwaraġina asi boġono vei; boinani ġaro ġena vekwaraġi tu Barau ġimanai. Toma ġaro ġena vekwaraġi iatanai meto ma boġo torekauani nai, kamasi boġo ġwaiiani?"

7

Tarimarima asi boġono vetau-viniri

¹ "Tarimarima asi boġono vetau-viniri, be Barau na maki asi bene vetau vinimi.

² Korana tu ġomi ġemi vetauvini ilalanai, ġomi maki moġesina moġo Barau na bevetau-vinimini; ema aiġesi ġovevaġa-vetovo vinirini, Barau na maki moġesi bevevaġa-vetovo vinimini.

³ Karase nai tarikakamu matanai libika oġitaiani, senaġi ġau tubina ġoi matamu nuġanai maniġa tu asi otuġamaġiani?

⁴ Kamara dabarai ġoi tarikakamu okiraiani, 'Ġata, au na roġo matamu ai libika nakokia,' senaġina ġoi taugemu matamu ai ġau tubina ta etanuni?

⁵ Ğoi ġofaġofa taumu, guine tu ġoi matamu ai ġau tubina nokoki-vaġia roġo, benamo boboġeboġe-ginikauni vau, tarikakamu matanai libika bono ġabi-vaġia.

⁶ Dagara veaġari kwaiva (o kira-sirivaġi tarimari) asi boġono viniri, ema ġemi aġeva maki asi boġono fiu-rosiri bai goirari ai! Kwakuri na beġe fana-taririni, benamo beġe doġe-kureni, ma beġe dare-misi misimini garina."

Noġinoġi, vetauvetau, sekeseke o fidifidi

Luka 11:9-13

⁷ "Noġinoġi ai Barau na bevini-mini, vetauvetau ai boġo doġarini, sekeseke ai ġemi ġatama boka bekeoani.

⁸ Korana benoġi-noġini tarimana tu beġabini, bevetauni tarimana bedoġarini, ema beseke-sekeni tarimana Barau na ġena ġatama-boka bekeoani.

⁹ Ğomi dei bema natumu merona ġaniġani benoġini nai, ġoi na fore boviniani?

¹⁰ O maġani-kone benoġini nai, mota boviniani?

¹¹ Boġono tuġamaġi, ġomi tu rakava tarimami, senaġi dagara namori natumi viniviniri ma ribami, moġa lorinai ġomi Tamami gubai etanuni, ġia na dagara namori ġenoġi-viniani tarimari bevinirini veġatana!

¹² Ğomi kara ġourani tarimarima na ġemi ai beġene veiri veġari, ġia ġeri ai maki moġeri veġa boġono veiri. Mose ġena taravatu e peroveta ġeri vevaġa-riba guruġari tauna korikorina tu moġa."

Barau ġena Basileia rakatoġana

Luka 13:24

¹³ "Ġatama-boka kibobonai boġono rakatoġa. A mase gabuna ġana eiaġoni dabarana tu baġaka, e ġena ġatama-boka tu barego rakava, ema ġutuma maki monai ġeraka-toġani.

¹⁴ Senaġi maġuri vanaġivanaġi ġana eiaġoni ġatama bokana tu kibobo e dabara maki kei rakava, ema tarimarima viravira na moġo ġedoġariani."

Peroveta tarimari ġofaġofari

Luka 6:43-44

¹⁵ "Rorimi boġono vetore peroveta tarimari ġofaġofari ġerina. ġia ġomi ġemi ai ġeiaġomani tu ma mamoe dabuġari ġesi, senaġina nuġari ai ġeri tuġamaġi tu boġa kwaivari rakavari kavari.

¹⁶ ġia ġwaġwari ai vau boġo ribarini. Vine ġwari (o grapes) tu ġau ma giniri ġerina asi ġebokoni, ema figi ġwari maki ġauġa ġiniġiniri ġeri ai asi ġeġabini.

¹⁷ Gau namona ġenana ġwaġwana namona bevaġa-ġoraiani, a ġau rakavana ġenana maki ġwaġwana rakavana bevaġa-ġoraiani.

¹⁸ Gau namona na ġwaġwa rakavana asi beġwani riba, ilailana ġau rakavana na ġwaġwa namona asi beġwani riba.

¹⁹ Ġwaġwa namori asi ġeġwani ġauri tu beġe basirini, ma karavai beġe fiu-raġerini.

²⁰ Moġesina ilailana peroveta tarimari ġofaġofari tu ġwaġwari ai boġo ribarini.

²¹ Dia 'Vereġauka, Vereġauka,' ġetoguni tarimari mabarari tu Guba Basileiai beġe raka-toġani. Asiġina. Deikara Tamagu gubai etanuni ekorana-iaġiani e ġena ura veiġari eveirini tarimana ġereġana moġo.

²² Kota baregona ġarona beraġasini nai, tarima ġutuma na beġe kiraguni, beġe kirani, 'Vereġauka, Vereġauka, ġoi aramu ai ġaperovetato, e ġoi aramu ai iauka rakavari ġalav-vaġirito, ma ġoi aramu ai nuġa-farevaġi veiġa boruri ġutuma maki ġaveirito.'

²³ Benamo au na bakirarini, bakirani, 'Au asi ribagu ġomi. Ġeguna ġoraka-veġita, ġomi veiġa rakava tarimami!'

Numa ruarua ragaragari tauri

Luka 6:47-49

²⁴ "Moġa lorinai, tarima ta na ġegu guruġa maiġeri eseġaġirini, ma veiġari eveirini tu, tarima iaunegana na ġena numa fore iatari ai evaġa-ruġaiato kavana.

²⁵ Ġura baregona eraguto, ġaruka mabarari ġeġabatarito, iavara asikeikeina eragato nai, mo numa edoriato; senaġina asi eġwa-lauato, korana ġia tu fore iatanai evaġa-ruaġaiato nai.

²⁶ A deikara na ġegu guruġa maiġeri eseġaġirini, senaġi veiġari tu asi eveirini, ġia tu tarima babona noġa, numa eragato nai, miri iatanai moġo evaġa-ruġaiato.

²⁷ Ġura baregona eraguto, ġaruka mabarari ġeġabatarito, iavara asikei eraġasito, mo numa edoriato nai, eġwa-lauato, benamo eġwa-rovorovoto."

²⁸ Iesu na ġena ġobata guruġari maiġeri ekiraġi-ġosirito nai, mai vegogo tarimari ġutuma-bara na ġena vevaġa-riba guruġari ġeġaba-iaġirito.

²⁹ Korana ġena guruġa ma seġukana, dia ġeri taravatu ġevevaġa-riba iaġiato-ġoi tarimari ġeri guruġa kavana.

8

Iesu na lepera tarimana evaġa-namoato

Mareko 1:40-44; Luka 5:12-14

¹ Iesu ġoro tuġuna na ma emariġoto nai, tarima ġutuma-bara ġia murina na ġerakato.

² Benamo tarima ta ma leperana Iesu ġenai eiaġoto, ġoiranai evetui-tarito, ekirato, "Vereġauka, bema ġoi ourani nai, moġoni boiarevaguni, bovaġa-namoguni riba!"

³ Iesu na ġimana eduġi-roroġotoato, keve tarimana eġabi-karaiato, ekirato, "Aurani, be nonamo!" Benamo vaġa-sebo lepera na enamoto.

⁴ Iesu na evaġa-guruġaiato, ekirato, "Tarima ta asi bono kira-varaia. Noiaġo, Rubu Veaġa verena na bene ġitamu, ema veiareva varevare dagarari Mose na ekiraġiato ilailana bono vinia; be tarimarima beġene riba, ġoi tu bonamo."

Roma vetari verena ġena vetuġunaġi merona

Luka 7:1-10

⁵ Iesu Kaperanauma ai eraġasito nai, Roma vetari verena ta ġia ġenai eiaġoto, Iesu enoġiato,

⁶ ekirato, "Vereġauka, ġegu vetuġunaġi merona tauġanina asi eġarevani, be numai eġena-taġoni, ema midigu maki barego eġanini."

⁷ Iesu na ekiraġiato, ekirato, "Au aiaġosini, be asi-vaġa-namoani."

⁸ Vetari verena na evaġa-veseato, ekirato, "Vereġauka, au tu asi ilaila ġoi ġegu numai boraġe-kauni; senaġi ġoi noguruġa moġo, benamo au ġegu vetuġunaġi merona benamoni.

⁹ Au maki tarima kota ġeri veġitaġau gabureri ai, ema vetari tarimari o soldia tu au gabureġu ai. Au na ta bakiraiani, 'Noraka!', benamo berakani, ma ta bakiraiani, 'Noiaġoma!', benamo beiaġomani. Ema au ġegu vetuġunaġi merona bakiraiani, 'Maiġa noveia!', benamo beveiani."

¹⁰ Iesu na ġena guruġa eseġaġiato nai, eġaba-rakavato. Benamo ġia murinai ġerakato tarimari evaġa-guruġarito, ekirato, "Au na akira-korikorimini, Isaraela nuġana mai-ġesina veġabidadama ta roġosi bana doġaria.

¹¹ Au na akiramini maki, tarimarima ġutuma ġaro-raġe e ġaro-riġo rekeri na beġe iaġomani, Aberahamo, Isako, e Iakobo ġesi vereko baregonai beġe ġani-vegogoni Guba Basileiana nuġana.

¹² Senaĝina tovotovonai Barau na eĝabi-viriĝirito tarimari, Basileia nuĝanai beĝene tanu etato tarimari tu, Barau na befiu-rosirini murikai, mukuna furufuru nuĝanai. Monai beĝe taĝini, e gadikari maki beĝe veĝara-tarini.”

¹³ Benamo Iesu na vetari verena ekiraiato, ekirato, “Noiaĝo, ĝemu numa ĝana! Boveĝabidadama lorinai, veĝana beĝorani.” Ĝena vetuĝunaĝi merona mo horai varau enamoto.

Iesu na Simona ĝena taĝama evaĝa-namato

Mareko 1:29-31; Luka 4:38-39

¹⁴ Iesu Petero ĝena numai eraka-toĝato. Monai Petero ĝena taĝama vavinena ekevento, tauĝanina eseĝukato, be egena-taĝoto-ĝoi, Iesu na eĝitaiato;

¹⁵ ĝimanai eĝabito, benamo ĝena keve ekorito, evaisi-raĝeto, benamo ĝia eĝubuatoto.

Iesu na tarimarima ĝutuma evaĝa-namorito

Mareko 1:32-34; Luka 4:40-41

¹⁶ Lavilavi ai iauka rakavari na ĝeboroĝirito tarimari ĝutuma Iesu ĝenai ĝeĝori-iaĝorito. Iesu na moĝeri iauka rakavari ĝena guruĝa seĝukana ĝenana moĝo elai-vaĝirito, e keve tarimari mabarari maki evaĝa-namorito.

¹⁷ Maĝeri veĝa vaĝa-moĝoniri tu Isaia, peroveta tarimana, na ekiraĝiato kavana, ekirato, “Ĝia na ĝera midigumidigu eĝabi-veĝitarito, ema ĝera keve irauirau eĝwarito, evaĝa-namorito.”

Iesu murinai beĝene raka ĝetato tarimari

Luka 9:57-60

¹⁸ Iesu na tarimarima ĝutuma na ĝevegogo-ĝeĝeraĝiato eĝitarito, benamo ĝena mero ekirarito, ekirato, “Siveĝasi-vanaĝi, kou mo rekena ĝana.”

¹⁹ Nuĝanai taravatu evevaĝa-riba iaĝiato-ĝoi tarimana ta Iesu ĝenai eiaĝoto, ekirato, “Vevaĝa-riba tarimamu, ĝoi aigana boiaĝoni nai, au ĝoi murimu ai moĝo bana raka atoni.”

²⁰ Iesu na ekiraiato, ekirato, “Boĝa kwaivari ma ĝeri kouĝa, ema manu ma ĝeri nuĝi, senaĝi Tarimarima Natuna tu asi ĝena ĝena gabuna.”

²¹ Iesu ĝena mero ta na maki evaĝa-guruĝiato, ekirato, “Vereĝauka, mani ĝemu veĝa, naĝenoĝoi, be tamagu roĝo naguria.”

²² Iesu na evaĝa-veseato, ekirato, “Murigu ai noma raka, mani tu noiaĝuiri; mase tarimari (o Barau asi ĝekorana-iaĝiani tarimari) na ĝeri mase tauĝeri na beĝene guriri.”

Iesu na iavara e geta o ureure ekira-ĝoirito

Mareko 4:36-41; Luka 8:22-25

²³ Iesu ĝasi ai eraĝeto nai, ĝena mero maki ĝia ĝesi ĝeraĝe-sebonato.

²⁴ Ĝeiaĝoto-ĝoi nai, asikauna iavara asikei kou ai eraĝasito, benamo ureure tu ĝasi nuĝanai ĝevebubu-gurato. A Iesu tu egenato-ĝoi.

²⁵ Benamo ĝena mero ĝeiaĝoto ma ĝevaĝoato, ĝekirato, “Vereĝauka, novaĝa-maĝurima, ĝita tu mai taburunai, dori tamaseni.

²⁶ Iesu na evaĝa-veserito, ekirato, “Karase nai ĝogarini? Veĝabidadama kei rakava tarimami!” Benamo Iesu evariĝisito, iavara ma ureurena ĝesi ekira-ĝoirito, benamo ĝedokoto, ĝemeĝomeĝo-tarito.

²⁷ Tarimarima mabarari ĝeĝaba-rakavato, ĝekirato, “Mai tu kamara tarima se? Iavara e ureure na maki garona ĝeseĝaĝiani!”

Iesu na tarima ruarua iauka rakavari na ĝeboroĝirito evaĝa-namorito

Mareko 5:1-17; Luka 8:26-37

²⁸ Galilea kouna tavina rekena, Gadara (o Gerasa) tarimari ĝeri tano ai, Iesu eraĝasito, benamo iauka rakavari na ĝeboroĝirito tarimari ruarua gara kouĝari na ĝeiaĝomato-ĝoi Iesu ĝenai. Mai tarima ruarua tu ma gariri, moĝa lorinai tarima ta mo dabara na asi eraka-vanaĝito-ĝoi.

²⁹ Benamo tauri ruarua Iesu ĝeĝaba-viniato, ĝekirato, “Barau Natuna o, kara ĝai ĝemai noveia otoni? Ĝoi boiaĝoma maĝa tu, noma vaĝa-midiguma ĝana, ĝaro korikorina roĝosi roĝo bene raĝasi nuĝanai, ei?”

³⁰ Monai, asi manaĝa lelevaĝi, bai serina ĝedokadokato-ĝoi.

³¹ Moĝesina nai iauka rakavari na Iesu ĝenoĝiato, ĝekirato, “Bema ĝoi na ĝai bolai-vaĝimani nai, notuĝuma bai ĝeri ai, ĝia nuĝari ai ĝaraka-toĝa.”

³² Iesu na ekirarito, ekirato, “Be ĝoiĝo!” Benamo iauka rakavari mo tarima ruarua ĝerina ĝeraka-vaĝito, ĝeiaĝoto, bai ĝeri ai ĝeraka-toĝato. Benamo bai serina mabarana eĝwa-bubu-lausiato, lalaĝa na ĝekokosi-firiĝoto, kou ai ĝeveĝuĝutu-maseto.

³³ Bai ġitaġauri tarimari ġeraga-kwareġato, vanuġa ġana ġeiaġoto, vari mabarana ġekiraġiato, ema iauka rakavari na ġeboroġirito tarimari ġeri ai kara ġeġorato mabarari maki ġevaġa-foforirito.

³⁴ Benamo vanuġa tarimari mabarari ġeġoto-iaġoto, Iesu beġene ġitaia ġana. Iesu ġenai ġeraġasito nai, ġenoġiato, ġeri tano na bene raka-veġita.

9

Iesu na rakava etuġamaġi-fitoġarito

¹ Iesu ġasi tai eraġekauto, ma eġenoġoito, kou na evanaġito, ġena vanuġa korikori ġana eiaġoto.

² Monai tarima kotari na tauġanina tavi ta emaseto tarimana ta gedai genagenanai Iesu ġenai ġeġwa-iaġoato. Iesu na ġeri veġabidadama vetogana aiġa barana eġitaiato, benamo keve rakava tarimana ekiraiato, ekirato, “Natugu, bono kokore, ġemu rakava batuġamaġi-fitoġari.”

³ Benamo taravatu ġevevaġa-riba iaġiato-ġoi tarimari tauġeri maiġesina ġekirato, “Mai tarima na Barau ekira-fitoġaiani.”

⁴ Iesu ma ribana ġia kara ġetuġa-maġirito-ġoi nai evaġa-guruġarito, ekirato, “Karase nai manġesina tuġamaġi rakavari ġoġabini?”

⁵ Aiġesina baguruġani tu meraġa, ‘Ġemu rakava batuġamaġi-fitoġari’ banasi, ba bara kira, ‘Noruġa-vaisi, noraka’ barasi?’

⁶ Au na navaġa-ġitami, Tarimarima Natuna tu ma ġena maoro, rakava betuġamaġi-fitoġarini tanobarai.” Benamo Iesu na keve rakava tarimana evaġa-guruġaiaato, ekirato, “Novariġisi, ġemu geda noġabia, be numa ġana noiaġo!”

⁷ Benamo mo tarima evaisiraġeto, ġena numa ġana eiaġoto.

⁸ Tarimarima na mo veġa ġeġitaiao nai, ġegarito e Barau ġevaġa-raġeato, korana seġuka moġesina tarimarima evinirito nai.

Iesu na Mataio ekeaiato

Mareko 2:13-17; Luka 5:27-32

⁹ Iesu monana eraka-vanaġito nai, ġia na tarima ta arana Mataio eġitaiao, takesi moniri ġeġabito-ġoi numanai etanu-taġoto-ġoi nai eġitaiao. Benamo Iesu na ekiraiato, ekirato, “Murigu ai noma raka.” Benamo Mataio evaisiraġeto, Iesu murina na eiaġoto.

¹⁰ Iesu Mataio ġena numai eġaniġano-ġoi nai, takesi gogo tarimari vovoka e vei-rakava tarimari ġutuma maki ġeiaġomato, Iesu ma ġena mero ġesi ġeġaniġani-vegogoto.

¹¹ Farisea tarimari kotari na ġeġitaiao nai, Iesu ġena mero ġedanaġirito, ġekirato, “Karase nai ġomi ġemi vevaġa-riba tarimana tu takesi gogo e vei-rakava tarimari ġesi ġeġaniġani-vegogoni?”

¹² Iesu na mo guruġa eseġaġiato, benamo evaġa-veserito, ekirato, “Namo tarimari na doketa asi beġe vetaurini, senaġina keve tarimari na moġo.

¹³ Goiġo, tauġemi na Buka Veġa na ekiraġiani guruġana ġoa vetaua, maiġesina ekirani, ‘Au na dia ġomi ġemi ginitaġo o boubou varevareri aura-vinirini. Au aurani ġomi na vevetuġaġwa e veiau-namo boġono vaġa-foforiri.’ Au tu vei-iobukaiobuka tarimari keakeari asi aiġoġomato, senaġi vei-rakava tarimari moġo.”

Ġaniveaġa

Mareko 2:18-22; Luka 5:33-39

¹⁴ Moġa murinai Ioane Babatiso ġena mero Iesu ġenai ġeiaġoto, benamo ġedanaġiato, ġekirato, “Karase nai ġai e Farisea tarimari tu ġaġani-veaġani, a ġoi ġemu mero tu asi ġeġani-veaġani?”

¹⁵ Iesu na evaġa-veserito, ekirato, “Ġomi ġotuġamaġini, veġaraġo varigu tarimana gatana seviri ai etanuni nuġanai beġe taġini ba? Asiġina! Ġarona eiaġomani, veġaraġo varigu tarimana gatana ġerina beġe ġabi-veġitaiani, monai vau beġe ġani-veaġani.

¹⁶ Tarima ta na dabuġa variguna veseana dabuġa guinena ġesi asi bebani-vegogoani. Bema moġesina beveini nai, dabuġa variguna na guinena bedareani, ema vedarena maki bebaregoni.

¹⁷ Tarima ta na maki vine nanuna variguna nanigosi kefina guinenai asi besisiani. Bema moġesina beveini nai, nanigosi kefina guinena bevedareni, vine nanuna bebebubuni, ema kefi maki berakavani. Senaġina vine nanuna variguna nanigosi kefina varigunai bebubu-ġuriaiani tu namo. Benamo ruarua, vine nanuna e kefi, beġe tanuni, asi beġe rakavani.”

Iesu na kekeni ta ema vavine ta evaġa-namorito

Mareko 5:22-43; Luka 8:41-56

¹⁸ Iesu na roĝo ĝena mero evaĝa-ribarito-ĝoi nuĝanai, vere ta eraĝasito, Iesu kwakuna koranai evetui-tarito, ekirato, “Au natugu kekenina inivau moĝo bemase. Si-iaĝo, ĝimamu iatanai bono tore-kaua, benamo natugu bemaĝurini.”

¹⁹ Iesu evaisi-raĝeto, ĝia ĝesi ĝeiaĝoto. Gena mero maki ĝia ĝesi ĝeiaĝo-sebonato.

²⁰ Ĝeiaĝoto-ĝoi nuĝanai, vavine ta, ĝena keve tu rara kevena, laĝani gabanana ruarua (12) ekeve-iaĝiato, eiaĝomato Iesu murina rekena na, ma ĝena dabuĝa dudunai eveĝabikauto.

²¹ Korana tu ĝia evetuĝamaĝito, “Ĝena dabuĝai moĝo haveĝabikauni nai, banamoni.”

²² Iesu eruĝa-kureto, eĝitaiato, ekirato, “Natugu, bono kokore! Ĝemu veĝabidadama na bevaĝa-namomu.” Benamo vaĝa-sebo ĝena keve enamo-ĝosito.

²³ Iesu tu mo vere ĝena numai eraka-toĝato. Ivirikou furufuru tarimari e tagitagi tarimari ma gururi baregori ĝesi eĝitarito,

²⁴ benamo Iesu na evaĝa-gurugaĝito, ekirato, “Ĝoraka-rosi. Kekeni tu asi bemase, ĝia tu egenani moĝo.” Senaĝi tarimarima na ĝerikiriki-iaĝiato.

²⁵ Iesu na mo tarimarima gutuma etuĝu-rosirito murinai, ĝia eraka-toĝato numa nuĝanai, kekeni ĝimanai eĝabito; benamo mo kekeni evaisi-raĝeto.

²⁶ Mai veĝa varina tu mo tano mabaranai ĝevarifu-iaĝiato.

Iesu na mata-bubu tarimari ruarua evaĝa-namorito

²⁷ Iesu na mo gabu ma eraga-kwaneato. Erakato-ĝoi nai, mata-bubu tarimari ruarua murina na ĝeiaĝoto, ĝekea-viniato, ĝekirato, “Davida Natuna o, ĝai novetuĝama!”

²⁸ Iesu numai eraka-toĝato nai, mo mata-bubu tauri ruarua maki ĝerage-kauto. Benamo Iesu na edanaĝirito, ekirato, “Ĝomi na ĝovaĝa-moĝoniguni, au na bavaĝa-namomini riba?” Ĝia ĝevaĝa-veseto, ĝekirato, “Vereĝauka, oi, ĝavaĝa-moĝonimuni.”

²⁹ Benamo Iesu na matari eĝabi-kararito, ekirato, “Ĝemi veĝabidadama lorinai, veĝana tu bana veia ĝemi.”

³⁰ Benamo matari ĝefafato. Iesu na ma nuĝana mabarana ĝesi evaĝa-guruĝa gwaĝiĝi-rito, ekirato, “Mai veĝa beĝora maĝa varina tarima ta asi boĝono kira-varaia!”

³¹ Senaĝina tauri ruarua ĝeraka-rosito, ĝeiaĝoto, Iesu varina mo tano mabaranai ĝea varifu-rovorovoato.

Iesu na muru-bubu tarimana ta evaĝa-namoato

³² Tauri ruarua numa na ĝeraka-rosito-ĝoi nuĝanai, tarima ta, iauka rakavana na eborogaĝiato nai asi eguruĝato-ĝoi, Iesu ĝenai ĝeĝabi-iaĝoato.

³³ Iesu na iauka rakavana elai-vagiato murinai, mo muru-bubu tarimana varau eguruĝato. Tarimarima mabarari na mai eĝorato veĝana ĝeĝaba-iaĝiato, ĝekirato, “Maĝesina veĝana ta Isaraela nuĝanai roĝosi bene ĝora!”

³⁴ A Farisea tarimari ĝekirato, “Mai tu iauka rakavari ĝeri vere ĝena seĝukana na iauka rakavari ĝia na elai-vagirini.”

Iesu na ĝena mero Isaraela tarimari ĝeri ai etuĝurito

³⁵ Iesu na vanuĝa baregori ema keiri mabarari eiaĝo-vinirito: Ĝeri rubu ai evevaĝa-ribato-ĝoi, Barau ĝena Basileia varina namona eĝobata-iaĝiato-ĝoi, ema keve e midigu-midigu tarimari mabarari evaĝa-namorito.

³⁶ Iesu na mo tarimarima gutuma-bara eĝitarito nai evetuĝarito, korana ĝenuĝa-vekwaraĝito e asi ĝeri veduru ĝabi tarimari, vaga-ilailana mamoe asi ĝitaĝauri tarimana ta kavana.

³⁷ Benamo Iesu na ĝena mero ekirarito, ekirato, “Makora ĝitaĝitana tu barego, senaĝina ĝauvei-iaĝina tarimari tu asi ĝutuma.

³⁸ Vamoka ĝaniĝanina vinivinina Vereĝaukana boĝono nogia, be ĝauvei tarimari bene tuĝuri, ĝena ĝaniĝani gogo vamokari ĝana.”

10

Iesu na ĝena apostolo merori gabanana ruarua (12) ekearito

¹ Iesu na ĝena mero gabanana ruarua (12) ekearito, benamo seĝuka evinirito, iauka rakavari beĝene lai-vagiri, e keve ema midigu-midigu mabarari beĝene vaĝa-namori ĝana.

² Mai apostolo tarimari gabanana ruarua (12) arari tu maĝeri: Giniginena tu Simona, arana ta tu Petero, e ĝia tarina Anduru; Iakobo (o Iames), Sebedaio natuna, ma tarina Ioane ĝesi;

³ Filipino e Batolomeo; Tomasi e takesi gogo tarimana Mataio; Iakobo (o Iames), Alfeo natuna, e Tadeo;

⁴ Simona, Selote tarimana, ema Iudas Isakariota, Iesu berevaiani tarimana.

Iesu na apostolo tarimari ġeri ġauvei evinirito

Mareko 6:7-13; Luka 9:1-5

⁵ Mai tarima gabanana ruarua (12) Iesu na etuġu-rosirito ema velaunagi sisibari maġgesina evinirito, ekirato, "Irau bese tarimari ġeri ai asi boġono iaġo, e Samaria vanuġari tai maki asi boġono raka-toġa;

⁶ senagina Isaraela besena ġeri ai boġono iaġo, ġia tu ġerekwa-rekwato mamoeeri kavana.

⁷ Goiago, ma maġgesi boġono ġobata, boġono kira, 'Guba Basileiana tu bevotu, (Barau ġena veġitaġau seġukana evaġa-ruġaiani maġa)!'

⁸ Keve tarimari boġono vaġa-namori, mase tarimari boġono vaġa-maġuriri, lepera tarimari boġono iarevari boġono vaġa-namori, e iauka rakavari boġono lai-vaġiri! Ġomi na ġoġabiato asi voina, boġono vini maki asi voina.

⁹ Ġemi iaġoiaġo ai moni asi boġono ġabikau, golo o silva moniri o kopa moniri maki asi boġono ġwakau.

¹⁰ Dura asi boġono ġabikau, sedi ruarua, tamaka, ema togoi maki asi boġono ġabi. Korana ġauvei tarimana ġena-ġana tu beġene vinia veġata.

¹¹ Vanuġa baregona tai o vanuġa keina tai boġo raka-toġani nai, deikara eurani ġena numai bene ġabi-raġemi etoni tarimana boġono vetaua. Mo numai moġo boġono tanu, bene iaġo mo, vanuġa ma boġono raga-kwaneana.

¹² Numai ġoraka-toġani nai, numa tarimari boġono vaġa-namori, boġono kira, 'Maino ġomi ġemi ai bene tanu!'

¹³ Bema mo numa tarimari na beġe ġabi-raġemini nai, Barau ġena maino ġeri ai betanuni. Senagina bema ġia na asi beġe ġabi-raġemini nai, Barau ġena maino ġeri ai asi betanuni, ġemi ai ma beġenoġoini.

¹⁴ Kamara numai o vanuġa tarimarima na asi beġe ġabi-raġemini e ġemi guruġa asi beġe seġaġirini nai, mo numa o vanuġa boġono iaġuia, kwakumi kauri boġono kwari-ketoketori, (ġia ġeri kira-sirivaġi vaġa-moġoniri ġana).

¹⁵ Au na akira-korikorimini, Barau ġena Kota ġaronai mo numa o vanuġa ġeri rakava voina metona tu barego lelevaġi beġabiani, Sodoma e Gomora ġeri rakava voina maki bevanagiiani."

Vanevane e midigumidigu ġoirai

Mareko 13:9-13; Luka 21:12-17

¹⁶ "Ġoseġaġi, au na mai atuġumini mamoe kavana boġa kwaivari rakavari vefakari ai. Moġa lorinai, mota kavana boġono iaunega ema boġono manau pune kavana.

¹⁷ Lorimi boġono vetore tarimarima ġeri ai! Korana ġia na beġe ġabimini na beġe tuġu-iaġomini Iuda ġeri kanisoro tarimari ġeri ai, ema ġeri rubu nuġari ai beġe kwarimini.

¹⁸ Au ġoġabi-raġeguni dainai, gavana e vere barari o kini ġeri ai roġo beġe ġabi-iaġomini, ġia ġoirari ai au vaġa-moġonigu ai boġono iaġo, korana irau bese tarimari maki Vari Namona beġene ribaia.

¹⁹ Bema Kota tarimari ġoirari ġana beġe ġabi-iaġomini nai, kara toma boġoa kiraġirini o kamaso boġo kiraġirini guruġari asi boġono nuġa-vekwaragi-iaġiri. Korana mo ġaro ai kara boġo kiraġirini guruġari tu, Barau na vau bevinimini.

²⁰ Dia ġomi boġo guruġani, senagina Barau Iaukana ġomi ġemina beguruġani.

²¹ Kakana na tarina berevaiani bene mase ġana, tamana na natuna maki moġesina beveiani. Naturi na tamari sinari beġe segafore-vinirini ema mase ai maki beġe torerini.

²² Tarimarima mabarari na beġe iau-rakavamini, korana au ġoġabi-raġeguni nai. Senagina deikara bevevaġa-gwaġigini mo dokona tu bemaġurini.

²³ Vanuġa tai beġe vaġa-rakavamini e beġe laimini nai, vanuġa ta ġana ma boġono raga-iaġo. Boġono riba-maoro, ġegu ġauvei asi roġo boġo vaġa-koriani Isaraela vanuġari mabarari nuġari ai, beiaġoni mo, Tarimarima Natuna bema-raġasini.

²⁴ Riba evetauani merona na ġena vevaġa-riba tarimana asi bevanagiiani; vetuġunaġi tarimana na guine-iaġina tarimana maki asi bevanagiiani riba.

²⁵ Riba evetauani merona bevevaġa-iaġoni ġena vevaġa-riba tarimana ġesi beġe ilailani, ema vetuġunaġi tarimana guine-iaġina tarimana ġesi maki beġe ilailani tu namo. Boġono tuġamaġia, tarimarima kotari na au tu doġoro debana, Belsebul o Satani ġetoni, be ġomi, ġegu doġoro tarimami, maki moġesi beġe kiramini, ema beġe vaġa-metomini maki."

Barau boġono gari-vinia

Luka 12:2-7

²⁶ "Moġa lorinai, tarimarima gariri asi boġono vei. Vekouġau dagarari mabarari beġea oforini, vekuretoġa guruġari mabarari beġea ribani.

²⁷ Au na kara dagara akira-varamini mukunai tu, ma boĝono kiraĝi-ĝenoĝoiri laĝani matabarai, kara dagara ĝereĝami na boĝo seĝaĝia tu, numa tuĝuri na ma boĝono kiraĝi-foforia, (tarimarima mabarari na beĝene seĝaĝia ĝana).

²⁸ Tauĝanina beĝe vaĝiani tarimari asi boĝono gari-viniri, korana ĝia na iauka asi beĝe vaĝiani. A Barau garina neĝi boĝono gari, korana ĝia na ruarua bevaĝirini riba, tauĝanina e iauka, karava asi ebuseni gabunai.

²⁹ Bisini ruarua maki fene sebona na moĝo ĝevoirini, ene? Senaĝina moĝeri ta maki asi beketo-riĝo kavani tano ai, bema Tamami asi beurani nai.

³⁰ A ĝomi tu debami ĝuiri maki mabarari Barau na eiavi-ginikaurito.

³¹ Be asi boĝono gari; ĝomi voimi tu varaĝe lelevaĝi, bisini ĝutuma voiri maki ĝovanaĝirito.”

Iesu asi boĝono kira-ĝuniĝaua

Luka 12:8-9

³² “Deikara na au tarimarima ĝoirari ai bekiraĝi-foforiguni, ĝia maki au na bakiraĝi-foforiani Tamagu gubai etanuni ĝoiranai.

³³ Senaĝina au deikara na tarimarima ĝoirari ai beruĝaguni e bekira-ĝuniĝauguni, ĝia maki au na baruĝaiani e bakira-ĝuniĝauani Tamagu gubai etanuni ĝoiranai.”

Dia maino, senaĝi vetari

Luka 12:51-53; 14:26-27

³⁴ “Asi boĝono tuĝamaĝi, au tu maino tanobara ĝana aĝwa-iaĝomaiato. Asiĝina, au tu dia maino aĝwa-iaĝomaiato, senaĝi vetari urana na aiaĝomato.

³⁵ Au aiaĝomato tu, maĝeri nama vaĝa-ruĝari ĝana: Natu tauri na tamari beĝe vevaĝi-vinirini, natu vavineri na sinari beĝe vevaĝi-vinirini, taĝama vavine keiri na ĝeri taĝama vavine barari beĝe vevaĝi-vinirini.

³⁶ Numa biaguna tu tauĝena ĝena numa tarimari na moĝo beĝe iau-rakava viniani.

³⁷ Deikara tamana o sinana beuravini-baregoani, a au tu betuĝamaĝi-keiguni nai, ĝia tu asi ilaila au ĝegu tarimai beĝe kiraĝiani. Ema deikara na natuna merona o kekenina beuravini-baregoani, a au beuravini-keiguni nai, ĝia tu asi ilaila au ĝegu tarimai beĝe kiraĝiani.

³⁸ E deikara tauĝena ĝena satauro asi beĝwaiani, ema murigu na asi berakani, ĝia tu asi ilaila au ĝegu tarimai beĝe kiraĝiani.

³⁹ Deikara ĝena maĝuri moĝo lorina etoreani tarimana, ĝena maĝuri befitoĝaiani. A deikara au daigu ai ĝena maĝuri befitoĝaiani tarimana, ĝena maĝuri asi bevei-rekwarekwaiani.”

Iesu ĝena mero beĝe ĝabi-raĝerini tarimari na voiri namori beĝe ĝabirini

Mareko 9:41; Luka 10:16

⁴⁰ “Dei na gomi eĝabi-raĝemini, au maki eĝabi-raĝeguni, ema au eĝabi-raĝeguni tarimana na au etuĝuguto Barauna maki eĝabi-raĝeani.

⁴¹ Dei na peroveta tarimana ta eĝabi-raĝeani, korana ĝia tu Barau ĝena guruĝa vaĝa-foforina tauna ta, ĝia na peroveta tauna davana tu beĝabiani. Ema dei na veĝa iobuka iobuka tarimana eĝabi-raĝeani, korana ĝia tu Barau ĝena ura ekorana-iaĝiani tauna, ĝia na vei-iobukaiobuka tarimana davana beĝabiani.

⁴² E tarima ta na mai ĝegu mero ta nanu faraka kapusi sebona ta beviniani, korana ĝia tu au ĝegu vetuĝunaĝi tarimana, akira-korikori-mini, ĝia voina tu beĝabiani veĝata.”

11

Ioane na ĝena mero Iesu ĝenai etuĝu-iaĝorito

¹ Iesu na moĝeri sisiba guruĝari ĝena mero gabanana ruarua (12) ĝeri ekiraĝi-ĝosirito murinai, ĝia monana Galilea vanuĝari ĝana eiaĝoto, monai Barau ĝena guruĝa bene vevaĝa-riba iaĝia e bene ĝobata-iaĝia ĝana.

² Ioane Babatiso dibura numanai etanuto-ĝoi nai, Keriso ĝena ĝauvei veĝari varina eseĝaĝiato, benamo ĝia na ĝena mero Iesu ĝenai etuĝu-iaĝorito.

³ Iesu ĝedanaĝiato, ĝekirato, “Barau na ekiraĝi-toreato beiaĝomani tarimana tu ĝoi, ba tarima boruna ta baĝana vaĝa-nogaia?”

⁴ Benamo Iesu na evaĝa-veserito, ekirato, “Goĝenoĝoi, ĝomi na boĝo seĝaĝiri e boĝo ĝitari veĝari Ioane boĝono kira-varaia:

⁵ Mata-bubu tarimari ĝeboĝeboĝeni, kwaku rakava tarimari ĝerakani, lepera tarimari ĝenamoni, seĝa-bubu tarimari ĝeseĝaĝini, mase tarimari ĝevariĝisi-ĝenoĝoini, ema Vari Namona gara veĝubu e asi ĝeri-ĝari tarimari ĝeri eĝobata-iaĝiani.

⁶ Au ĝegu ai asi ĝena daradara tarimana tu eiakuni.”

⁷ Ioane ġena mero ġerakato vau, Iesu na ġevegogoto tarimari evaġa-guruġarito, Ioane varina ġeri ekiraġi-ato, ekirato, "Ioane ġenai ġoiaġoto nai, mo tano fakana! tu kara boġono ġitaia ġana? Gobu iavara na ekwari-ġareva ġarevaiani ġitaġitana ġoiaġoto?"

⁸ Bema asiġina nai, kara boġono ġitaia ġana ġoiaġoto? Dabuġa namona eveiani tarimana ġitaġitana ġoiaġoto? Asiġina. Dabuġa namori ġeveirini tarimari tu kini ġeri numai ġetanuni.

⁹ Be, kara boġono ġitaia ġana ġoiaġoto? Peroveta tarimana dainai? Aba! Akiramini, ġoġitaiao tarimana tu peroveta tarimari mabarari evanaġirini.

¹⁰ Ioane varina Buka Veaġai maiġesi etoreato, Barau ekirato,

'Au na ġegu vetuġunaġi tarimana tu batuġu-guineani, ġemu dabara ġoiramu ai vaġa-maġatana.'

¹¹ Moġoni akiramini, mai tanobarai beġe maġuri tarimari mabarari fakari ai Ioane Babatiso tu barego vedaurea, ta na asi bevanaġiani. Senaġina Guba Basileiana nuġanai gabi tarimana na Ioane tu evanaġiani.

¹² Ioane Babatiso ġena ġobata evari-fiurito-ġoi ġenana beiaġoma mo inította, Barau na ġena Basileia o veġitaġau seġukana evaġa-ruġaiani, senaġina tarima tari na ġevevaġi-viniani, ġeri ura tu tauġeri beġene veġitaġau, a deikara Barau ġena Basileia neraka-toġa etoni tarimana, ġia na ġekouani. (Mataio23:13).

¹³ Peroveta tarimari mabarari e Mose ġena taravatu maki na Barau ġena Basileia o veġitaġau ġeġobata-iaġiato-ġoi, eiaġomato mo, Ioane ġena negai.

¹⁴ Ema ġomi na ġeri guruġa boġo ġabi-raġeani ba asiġina, senaġina Ioane tu moġoni peroveta tarimana Elia, ġena iaġoma tu ġekiraġiato-ġoi.

¹⁵ Ma seġana tarimana bene seġaġi.

¹⁶ Toma ġuru tarimari tu deikara ġesi bavaġa-ilalarini? Ġia tu noġa mero keiri kavana, vanuġa ġatamanai ġetanu-taġoni, ġeġereni, tavi ta merori na tavi tai ġekea-vinirini, ġekirani,

¹⁷ 'Ġai tu veġaraġo vererenai gita ġalauto-ġoi ġomi ġemi, senaġi ġomi tu asi ġobarato-ġoi! Ġai tu mase mariri ġaġabito-ġoi, senaġi ġomi tu asi ġotaġito-ġoi!'

¹⁸ Ioane eiaġomato, eġani-veaġato ema vine nanuna asi eniuato. Benamo ġekirani, 'Ġia tu iauka rakavana na eboroġiato,' ġetoni.

¹⁹ A Tarimarima Natuna eiaġomato, ġia tu ġanigani ta asi eruġaiani. Benamo ġekirani, 'Ġia tu boġeka tarimana ema vine nanuna eniu-ġutumani tarimana, takesi gogo tarimari e vei-rakava tarimari ġatarini!' ġetoni. Senaġi Barau ġena iaunega vaġa-foforina e vaġa-moġonina tu ġena vetoga namori ġerina."

Asi veġabidadama vanuġari

Luka 10:13-15

²⁰ Iesu na ġena seġuka ġauveiri vanuġa baregori tari nuġari ai eveirito, senaġi ġeri rakava ġerina asi ġevetuġamaġi-kureto-ġoi, naima Iesu na moġeri vanuġa tarimari evanerito.

²¹ Ekirato, "Korasini o, ġoi ema Betesaida, vetuġami kika! Korana nuga-farevaġi veġa boruri ġemi ai ġefoforito-ġoi tu, Taia e Sidono nuġari ai beġere fofori, benamo ġia tu irau laġani ai ġere vetuġamaġi-kure, fuse rakavari ai e tauġaniri ma gurumari ai ġeri vetuġamaġi-kure ġere vaġa-foforia.

²² Senaġina akiramini, Barau na tarimarima bekota-vinirini ġaronai, ġomi na boġo doġariani metona tu Taia e Sidono ġeri meto bevanaġiani.

²³ Ġoi maki, Kapera-nauma o, ġoi ourani guba ġana bono varaġe otoni? Asiġina, ġoi tu mase gabuna ġana boiaġoni! Bema nuġa-farevaġi veġa boruri ġemi ai ġefoforito-ġoi tu Sodoma nuġanai beġere fofori nai, ġia tu roġo bere tanu mo inította.

²⁴ Senaġina akira-mini, Barau na tarimarima bekota-vinirini ġaronai, ġomi na boġo doġariani metona tu Sodoma ġeri meto bevanaġiani."

Au ġegu ai ġoiaġoma, be ġoiaġaraġi

Luka 10:21-22

²⁵ Mo negai Iesu ekirato, "Tamagu o, guba ema tanobara Verena, avaġa-namomuni, korana ġoi na ma iaunegari e riba tarimari ġeri ai okure-toġarini dagarari tu, asi ġeri riba tarimari ġeri ai ovaġa-foforirini.

²⁶ Aba, Tamagu, ġemu ura tu maiġesina bene vetore veġata.

²⁷ Daġara mabarari Tamagu na eviniguto. Natuna tarima ta asi ribana, senaġina Tamana ġereġana moġo ribana, ema Tamana tarima ta asi ribana, senaġi Natuna ġereġana moġo ribana, ema Natuna na bene vaġa-fofori vinia etoni tarimana.

²⁸ Au ġegu ai ġoiaġoma, ġomi deikara maruna metori ġoġwani e boġo gau tarimami mabarami, au na iaġaraġi banama vinimi.

²⁹ Au ġegu maruna, mai tu ġegu veġitaġau namona, ġoma ġabi-raġea, ma au ġegu ai riba maki ġoma ġabia! Korana au na asi badori-naġinaġimini e asi baġita-fitoġamini. Au ġegu ai iaġaraġi korikorina boġo doġariani.

³⁰ Auna maruna tu meraġa e ġegu ġwaġwa iatami ai batore-kauani maki asi metona.”

12

Iesu tu Sabadi Verena

¹ Mo negai Iesu tu Sabadi ai widi vamokari na eraka-vanaġito. Ġena mero ġevitorito nai, widi ġwaġwari ġebukito-ġoi e ġeġanirito-ġoi.

² Farisea tarimari na ġeġitarito, benamo Iesu ġekiraiato, ġekirato, “Noġitaia, ġemu mero na ġita ġera taravatu asi ġekorana-iaġiani, Sabadi ai widi ġebukini.”

³ Iesu na evaġa-veserito, ekirato, “Davida na veiġa ta eveiato, ġia ma karona ġesi ġevitorito nai, ġomi na mai veiġa eġorato tu roġosi roġo boġono iavia?

⁴ Barau ġena numai eraka-toġato, Barau ġoiranai ġetorerito-ġoi beredi ġia ma karona ġesi ġeġanito. Mo beredi tu veaġa, Rubu Veaġa vereri moġo ġari, taravatu.

⁵ Ema ġomi na Mose ġena taravatu nuġanai mai guruġa maki roġosi roġo boġono iavia, ekirani, Sabadi ai Rubu Veaġa vereri tu Rubu Veaġai ġeġauveini. Moġesina nai Sabadi taravatuna ġevaġa-rakavaiani, senaġi ġia tu asi ġeri kerere?

⁶ Au na akiramini, mainai tarima ta, ġia na Rubu Veaġa evanaġiani.

⁷ Buka Veaġa ekirani, ‘Vevetuġaġwa neġi aurani, a varevare dagarana tu asiġi.’ Bema mai guruġa anina ġoro riba nai, asi ġeri kerere tarimari ġomi na asi ġoro vaġa-bade-iaġiri.

⁸ Korana Tarimarima Natuna tu Sabadi Verena.”

Iesu na ġima boso tarimana evaġa-namoato

Mareko 3:1-6; Luka 6:6-11

⁹ Iesu na mo gabu eiaguaiato, ma eiagoto, Iuda tarimari ġeri rubu ai eraka-toġato,

¹⁰ ġimana ebosoto tarimana ta maki monai. Benamo Farisea tarimari na Iesu beġene ġofaġofa-iaġia ġana ġedanagiato, ġekirato, “Sabadi ai keve bita vaġa-namorini tu ma taravatuna ba?”

¹¹ Benamo Iesu na evaġa-veserito, ekirato, “Ġomi ta ġena mamoe sebona kwarigutu moġo, Sabadi ai guri tai beketo-riġoni nai, vaġa-maġurina ġana ġomi na asi boġo inu-raġeani?”

¹² Boġono tuġamaġi: Tarimarima tuġamaġi-iaġina tu barego vedaurea, a mamoe ġenai tu kei! Moġa lorinai Sabadi ai veiġa namona veiveina tu maoro vedaurea.”

¹³ Benamo Iesu na mo ġima boso tarimana ekiraiato, ekirato, “Ġimamu noduġi-roroġotoa.” Ġia ġimana eduġi-roroġotoato, benamo mabarana enamo-ġosito, ġimana reke ta kavana.

¹⁴ Senaġi Farisea tarimari ġeraka-rosito, benamo ġea boioġa-vegogoto, kamasi Iesu beġene vaġi-masea dabarana ġea vetuato.

Iesu tu Barau na evirigiato tarimana

¹⁵ Farisea ġeri boioġa Iesu na varau eriba-guineato nai, ġia mo gabu na eraka-veġitato. Tarimarima ġutuma ġia murina na ma ġeiaġoto, ema keve tarimari mabarari evaġa-namorito.

¹⁶ Senaġi eguruġa gwaġiġi-vinirito, ġia varina tarima ta maki asi beġene vaġa-ribaia.

¹⁷ Maiġesi eguruġato, korana Isaia peroveta tarimana muruna na eraka-rosito guruġana bene moġoni ġana, ekirato,

¹⁸ “Mai tu au ġegu vetuġunaġi tarimana, avirigiato. Au na ġia aura-viniani, e ġia ġenai maki aiakuni; Au laukagu ġia ġenai batoreani, e ġia na au ġegu guruġa e veiġa iobuka-iobukari beġobata-iaġirini bese mabarari ġeri ai.

¹⁹ Ġia asi bevanevaneni, ma asi befararani; ema ġatamai ġarona maki ta na asi beseġaġiani.

²⁰ Ġia na gobulefa moirana asi betau-koruani, ema irau mo emoreni lamefana maki asi bevei-buseani, beiaġoni mo, ġia na guruġa e veiġa iobukaiobukari bea vaġa-ruġarini, benamo beġe kokoreni.

²¹ Ġia ġenai tarimarima mabarari ġeri vetuġamaġikau beġe toreani.”

Iesu e Belsebul

Mareko 3:20-30; Luka 11:14-23; 12:10

²² Benamo kotari na iauka rakavana na eborogiato tarimana Iesu ġenai ġeġabi-iaġoato. Mo tarima tu matana bubu e muruna bubu. Iesu na evaġa-namoato, benamo ma eguruġato e eboġeboġeto.

²³ Tarimarima mabarari na mai veiġa eġorato ġeġaba-iaġiato, ġekirato, “Mai tu betaġu Davida Natuna banaġu, (Barau na ekiraġi-toreato vevaġa-maġuri tauna)?”

²⁴ Senaġi Farisea tarimari na maiġa ġeseġaġiato nai, ġekirato, “Mai tu Belsebul, iauka rakavari ġeri vere, na seġuka eviniani nai, mai tarima na iauka rakavari elai-vaġirini.”

²⁵ Iesu na ġeri tuġamaġi varau eribarito nai, ekirarito, ekirato, “Gavamani bevetavini, tauġena bevevaġi-vinini nai, ġia tu berakavani; e vanuġa ta o doġoro ta bevetavini, tauġena bevevaġi-vinini nai, asi beruġani riba.

²⁶ E dijabolo ta na dijabolo ta belai-vaġiani nai, Satani tu tauġena bevevaġini, moġa anina tu, doġoro tatai varau bevetavi nai, asi beruġani riba?

²⁷ Gomi ġokirani, au tu Belsebul ġena seġuka na iauka rakavari alai-vaġirini, a ġomi murimi ai ġerakani tarimari na iauka rakavari aiġesi ġelai-vaġirini? Ġia na ġevaġa-moġoniani, ġomi ġemi guruġa tu kerere.

²⁸ Asigina, dia Belsebul, senaġina Barau Iaukana ġena seġukai alai-vaġirini, naima boġono riba, Barau ġena Basileia tu ġomi ġemi ai varau beraġasi.

²⁹ Tarima ta gwada tarimana ġena numa asi bedareani riba, ma ġena farefare beġwa-rakarini, senaġi ġia na gwada tarimana varo na bebarubaruani, monai vau ġia na ġena numa farefareri beġabi-rakarini.

³⁰ Deikara na au asi evaġa-kavaguni, ġia na tu au eruġaguni, e deikara au ġesi asi etore-vegogoni, tarimana tu eveiari-lausilausini.

³¹ Moġa lorinai akiramini, tarimarima rakava beġe veini ema Barau beġe kira-rakava viniani tarimari, ġeri rakava mabarari Barau na betuġamaġi-fitoġarini riba, senaġi tarima ta na Iauka Veaġa bekira-rakava viniani tarimana, ġena rakava asi betuġamaġi-fitoġaiani.

³² Tarima ta na Tarimarima Natuna bekira-rakava viniani nai, ġena rakava tu betuġamaġi-fitoġaiani, senaġi tarima ta na Iauka Veaġa bekira-rakava viniani tarimana, ġena rakava asi betuġamaġi-fitoġaiani, toma mai maġuri ai ema maġuri gabinai maki asi betuġamaġi-fitoġaiani.”

*Ġau e ġia ġwaġwana
Luka 6:43-45*

³³ “Bema ġau namo nai tu, ġwaġwana maki namo, a bema ġau rakava nai, ġwaġwana maki rakava. Gau tu ġwaġwana ġenana boribaiani.

³⁴ Gomi mota naturi, ma rakavami ġesi ġotanuni, be guruġa namona ta tu kamasi boġo kiraġiani? Korana tarima tu nuġana na kara eiagomani, murunai ekiraġirini.

³⁵ Tarima namona na dagara namori nuġanai evaġa-vegogorini dagarari bevaġa-rakarosirini. Tarima rakavana na dagara asi namori nuġanai evaġa-vegogorini dagarari bevaġa-rakarosirini.

³⁶ Senaġi au na akiramini, guruġa taġuitaġui mabarari, tarimarima na beġe kiraġirini tu, Barau ġena Kota baregona ġaronai voiri beġe ġabirini.

³⁷ Gemu guruġa ġenana Barau na vei-iobukaiobuka tarimamu bekiraġi-muni, o vei-rakava tarimamu bekiraġimuni.”

*Farisea tarimari na vetoġa ġevetauani Iesu ġenai
Mareko 8:11-12; Luka 11:29-32*

³⁸ Taravatu vaġa-riba-iaġina tarimari e Farisea tarimari kotari na Iesu ġevaġa-guruġaiato, ġekirato, “Vevaġa-riba tarimamu, ġai ġaurani vetoġa boruna ta ġoi ġemuna baġana ġitaia.”

³⁹ Iesu na evaġa-veserito, ekirato, “Toma ġuru rakavana ma veġura-vanaġina ġesi, (Barau ġenana ġeveġitato ġuruna), seġuka vetoġana ta ġeġita-vetauani, senaġi vetoġa ta asi beġe doġariani, Iona, peroveta tarimana, vetoġana mogo.

⁴⁰ Iona tu ġaro toitoi ema boġi toitoi maġani-kone barana, rakana donodono diana nuġanai etanuto, moġesina kavana Tarimarima Natuna maki ġaro toitoi ema boġi toitoi tano nuġanai betanuni.

⁴¹ Kota baregona ġaronai Nineva tarimari beġe ruġa-vaisini, toma ġuru tarimari beġe samanirini, korana Iona ġena ġobata ġeseġaġiato neganai, ġia ġeri rakava ġerina ġevetuġamaġi-kureto, ema ġeraka-kureto Barau ġenai. Senaġi ġoġitaia, tarima ta na Iona evanaġiani tu maiġa.

⁴² Kota baregona ġaronai maki, Seba vavine baregona o Kwin beruġa-vaisini, mai ġuru tarimari besamanirini, korana ġia tu ġena tanobara manaġana na eiagomato, Solomona ġena iaunega guruġari bene seġaġiri ġana. Senaġi ġoġitaia, tarima ta na Solomona evanaġiani tu maiġa.”

*Iauka rakavana ma eġenoġoito
Luka 11:24-26*

⁴³ “Iauka rakavana ta tarima ta ġenana eraka-vaġito, benamo gabu kaukauri na erakavan-aġito, iaġena bene ġania etato, senaġi iaġaraġi gabuna ta asi edoġariato.

⁴⁴ Benamo ġia tauġena ekirato, ‘Naġenoġoi, araga-kwaneato numana ġana.’ Eġenoġoi-iaġoto, numa edoġariato. Numana tu korina, veiareva ema ġitaġitana namo vedaurea.

⁴⁵ Benamo ġia na iauka rakava kwaikwairi imaima ruarua (7) ma eġori-iaġorito, mabarari ġeraka-toġato, monai ġetanuto. Moġa lorinai mo tarima tu guinenai ġena rakava tu kota misina, senaġi dokonai ġena rakava tu barego vedaurea. Maiġesina toma ġuru rakavana ġenai beġorani.”

Iesu sinana e tarina doġoro

Mareko 3:31-35; Luka 8:19-21

⁴⁶ Iesu tu tarimarima roġo evaġa-guruġarito-ġoi nai, ġia sinana e tarina doġoro ġeraġasito. Numa murikanai ġeruġa-tarito, ġeri ura tu Iesu beġene vaġa-guruġaia.

⁴⁷ Benamo tarima ta na ekiraiato, ekirato, “Ġoi sinamu e tarimu merori tu numa murikanai ġeruġa-taġoni, ġevaġa-guruġamu ġetoni.”

⁴⁸ Iesu na evaġa-veserito, ekirato, “Au sinagu tu dei, e au tarigu merori tu deikarari?”

⁴⁹ Benamo ġia ġimana na ġena mero eduġi-vinirito, ekirato, “Au sinagu e au tarigu merori tu maiġeri!

⁵⁰ Deikara na au Tamagu gubai etanuni ġena ura veiġari eveirini tarimana tu, au tarigu tauna, e au tarigu vavinena, ema au sinagu.”

13

Barabore - Iaraġa tarimana na widi ġueri efiurito

¹ Mo ġaro sebonai moġo Iesu na numa eraga-kwaneato, eiaġoto, Galilea kouna rikinai etanu-tarito.

² Tarimarima ġutuma-bara na ġevegogo-ġeġeraġiato nai, ġia tu ġasi tai eraġekauto, benamo etanu-tarito, a tarima mabarari tu fenu ai ġeruġato.

³ Iesu na dagara ġutuma barabore ai evaġa-ribarito.

Ekirato, “Iaraġa tauna ta ġena widi ġueri varovarori eiaġoto.

⁴ Ġia na widi ġueri efiu-lausilausirito-ġoi nai, gabu irauirau ai ġeketoto. Kotari dabarai ġeketoto, benamo manu ġeiaġomato, ġeġani-ġosirito.

⁵ Kotari forefore gaburi ai ġeketokauto tano maġiġiri ai. Asikauna ġegarato, korana tano iatanai moġo.

⁶ Senaġi ġaro eraġekauto nai, etunurito, ema lamuri asi ġevariġo-ġinikauto nai, asikauna ġemaraito.

⁷ Kotari tu ġauġa ġiniginiri vefakari ai ġeketoto. Mai ġauġa ġiniginiri ġetubu-baregato nai, varovaro dagarari ġetubu-ġaurito.

⁸ A kotari tu tano namonai ġeketoto, ġwaġwari ġetaunato nai, kotari sinau ta (100), ma kotari gabana imaima ma gabanana (60), ema kotari tu gabana toitoi (30).”

⁹ Iesu ġena guruġa dokonai ekirato, “Ma seġana tarimana bene seġaġi!”

Kara dainai Iesu na barabore ekiraġirito

Mareko 4:10-12; Luka 8:9-10

¹⁰ Iesu ġena mero ġia ġenai ġe-iaġoto, benamo ġedan-aġiato, ġekirato, “Kara dainai barabore ai tarimarima ovaġa-guruġarini?”

¹¹ Iesu na evaġa-veserito, ekirato, “Guba Basileia ġena riba vekuretoġari ġomi ġemi ai tu fofori, senaġi ġia ġeri ai tu asiġina.

¹² Ma ġena seġaġi tarimana Barau na tuġamaġi-faka beviniani, barego vedaurea bene doġari ġana. Asi ġena seġaġi tarimana, ġena tuġamaġi-faka misina maki beġabi-vaġiani.

¹³ Moġesi naima au na barabore ai avaġa-guruġarini. Korana matari na ġeboġe-boġeni, senaġi asi ġeġita-maġatani, seġari na ġeseġaġini, senaġi asi ġetuġamaġi-maoroni.

¹⁴ Ġia ġeri ai Isaia ġena peroveta guruġana bema moġoni, maiġesi ekirato,

‘Gomi tu boġo seġaġini,

ma boġo seġaġini,

senagi asi boġo riba-maoroni.

Ġomi tu bogo ġitani,

ma boġo ġitani,

senagi debami asi beġe vekeoni.

¹⁵ Korana mai bese tarimari nuġari tu gwaġiġi foroforo,

seġari maki bubu,

matari maki ġevекouto.

Matari na beġe ġitani garina,

seğari na beğe seğagini,
e nuğari na beğe riba-maoroni garina,
ma au ñegu ai beğe vetuğamaği-kureni ñeri Barau,
benamo bavağa-mağuririni garina.’

¹⁶ A ñomi tu boğono iaku, korana matami tu ñegitani e seğami tu ñeseğagini.

¹⁷ Au na akira-korikorimini: Peroveta tarimari vovoka ma Barau ñena vei-iobukaiobuka tarimari ñutuma kaiveğata na ñeri ura baregona tu, ñomi na inította kara ñogitaiani beğene ñitaia, senaği asi ñegitaiato, e ñomi na kara ini ñoseğagiani beğene seğagia, senaği asi ñeseğagiato.”

Widi ñueri baraborena anina

Mareko 4:13-20; Luka 8:11-15

¹⁸ “Goseğagi, widi fiu-rovorovona tarimana baraborena anina tu maiga:

¹⁹ Tarima kotari na Barau ñena Basileia varina ñeseğagiani, senaği asi ñetuğamaği-fakaiani. Benamo Satani eiağomani, ma mo kara ñia nuğari ai beğe varo dagarari tu, ñia na eğabi-vağirini. Moğeri tarima tu widi ñuturi dabarai ñeketoni kavana.

²⁰ Widi ñueri kotari forefore ai ñeketoto, mai tu tarima kotari na Barau ñena Vari Namona ma iakuri ñesi ñeseğagiani e ñeğabi-rağeani.

²¹ Senağina ñia nuğari ai asi erakatoğa-ğinikauni nai, asi etanu-maukani. Barau ñena guruğa dainai nega rakavari ñeğoițağoni e ñevağa-midigu midigurini ñarori ai, ñia ñenana ñeraka-veğitani.

²² Widi ñueri kotari tu ñauğa ñiniğiniri vekaravari ai ñeketoto, mainana ekirağiani tu, tarima kotari na Barau ñena guruğa ñeseğagiani, senaği tauğeri ñeri mağuri e farefare ñutumari ñetuğamaği-baregorini ñerina, Barau ñena guruğa ñevekouni, e ñwağwana maki asi evetoreni.

²³ A widi ñueri kotari tu tano namonai ñeketoto, mainana ekirarani tu, tarima kotari na Barau ñena guruğa ñeseğagiani, ma ñeğabi-rağeani nuğari mabarari ñesi, ñia ñwağwari ñevetoreni maki, kotari sinau ta (100), ma tari gabana imaima ma gabanana (60), ma kotari gabana toitoi (30).”

Barabore - Widi e ñauğa

²⁴ Iesu na barabore ta ñeri ma ekirağiato, ekirato: Guba Basileia tu tarima ta kavana, ñue ñuturi namori ñena vamokai evarorito.

²⁵ Benamo boğitai, tarimarima mabarari roğo ñegenato-ğoi nai, ebaru-viniato-ğoi tarimana eiağomato, ñauğa ñuturi widi vekaravari ai efiurito, benamo erakato.

²⁶ Widi ñetubu-foforito, ñegara-baregoto e ñwağwari ñeburito nai, ñauğa rakavari maki ñia vefakari na ñefoforito.

²⁷ Benamo vamoka biaguna ñena vetuğunaği merori ñia ñenai ñeiağomato, ñekirato, ‘Vereğauka, ñoi ñemu vamokai ñue ñuturi namori ovarorito, nene? Senaği mai ñauğa rakavari tu ainana beğe iağoma?’

²⁸ Ñia na evağa-veserito, ekirato, ‘Ebaru-vinirani tarimana na mai veiga bema veia.’ Vetuğunaği merori na ñedanağiato, ñekirato, ‘Bema ourani nai, ñaiago, be bağana lauri ba?’

²⁹ Ñia evağa-veseto, ekirato, ‘Asiğina, korana ñomi na ñauğa boğoi laurini nai, widi maki lamuri ñesi boğoi lau-sebonarini garina.

³⁰ Ñia ruarua beğene gara-sebona, ma beğene tanu mo, widi ñwağwana basibasina ñarona bene rağasi. Mo ñaro ai au na basi-basina tarimari mağesina bakirarini, bakirani: Giniguine tu, ñauğa mabarari ñovağa-vegogori, ñobaru-sebonari, be karava na bene ñarari, a widi ma boğono vağa-vegogoa, be ñegu ñaniğani vağa-vegogo gabunai boğono toreri.’”

Barabore - Mastadi ñauna ñutuna

Mareko 4:30-32; Luka 13:18-19

³¹ Iesu na barabore ta ma ekira-vararito, ekirato, “Guba Basileia tu mastadi ñauna ñutuna kavana, tarima ta na eğabiato, ñena vamokai evaroato.

³² Tanobarai varovaro dagarari ñueri mabarari fakari ai ñia ñereğana misina korokoro, senaği etubuni nai, varovaro dagarari mabarari fakari ai ñia moğoi barego vedaurea. Ñia tu ñau ai eiağoni naima, rovo manuri ñeiağomani, ma ñeri nuği ñeveini ñia leganai.”

Barabore - Farao vağa-tubuna muramurana

Luka 13:20-21

³³ Iesu na barabore ta ñeri ma ekirağiato, ekirato, “Guba Basileia tu farao vağa-tubuna muramurana kavana, vavine ta na kotuna ta moğoi eğabiato, benamo farao fuseri toitoi ñesi egiroato, eiağoto mo, muramura na mabarana evağa-tubu baregoato.”

*Barabore aniri
Mareko 4:33-34*

³⁴ Iesu na mai dagara mabarari barabore ai tarimarima evaġa-riba iaġirito-ġoi. Ġena ġobatai barabore asi eraga-kwanerito-ġoi.

³⁵ Mai veġa eveiato ġenana, peroveta tarimana ġena guruġa ema vaġa-moġoniatu, ekirato,
“Au na barabore ġerina
ġia bavaġa-guruġarini;
tanobara evesinato ġarona na
beiaġoma mo initoma
veġuni ġetanuni dagarari,
au na ġia ġeri bakiraġi-foforirini.”

Iesu na widi e ġauġa baraborena anina ekiraġi-foforiatu

³⁶ Iesu na mo tarimarima ġutuma eraga-kwanerito, benamo numai eraka-toġato. Ġena mero ġia ġenai ġeiaġomato, bena ġekiraġato, ġekirato, “Ġauġa rakavari vamoka nuġanai baraborena ġai ġemai nokiraġi-maġataia.”

³⁷ Iesu na evaġa-veserito, ekirato, “Widi ġueri namori evarorini tarimana tu Tarimarima Natuna.

³⁸ Vamoka tu tanobara, ġue ġuturi namori tu Barau ġena Basileia o veġitaġau seġukana gaburenai ġetanuni tarimari; ġauġa rakavari tu Satani ġena tarimarima doġoro.

³⁹ E ġauġa varovarona tarimana tu Diabolo, ġita ebaru-vinirani tarimana; kwakwa tu tanobara magona beraġasini kavana. Ġwaġwana kwakwa e basibasina tu aneru na beġe korana-iaġiani.

⁴⁰ Vaġa-ilailana ġauġa ġevaġa-vegogorini, ma karavai ġegaburini, ġeġara-ġosirini, tanobara bea korini nai, moġesina kavana bevetoreni:

⁴¹ Tarimarima Natuna na ġena aneru tu betuġurini, benamo tarimarima ġeġorikerererini tarimari, ema veġa rakavari ġeveirini tarimari mabarari, Barau ġena Basileia ġenana beġe ġabi-veġitarini,

⁴² e karava seġukana ma moremorena nuġanai beġe fiu-toġarini, ema monai roġo beġe taġini, gadikari maki beġe veġara-tarini.

⁴³ Moġa ġaronai maki Barau ġena vei-iobukaiobuka tarimari tu, ġaro kavana ma mamari ġesi Tamari ġena Basileia nuġanai beġe tanuni. Deikara ma seġana tarimana, bene seġaġi.”

Barabore - Tarima ta na farefare namona ta ekure-toġaiatu

⁴⁴ “Guba Basileia tu farefare vekuretoġana tanobarai kavana. Tarima ta na edoġariato, benamo ma eguriguri-ġauato. E ma iakuna ġesi eiaġoto, ġena dagara mabarari ea voivoi-iaġirito, benamo mo tano evoiatu.”

Barabore - Galasi forena davana barego forena

⁴⁵ “Guba Basileia tu bisnesi tarimana kavana, galasi foreri davari barego dagarari evetaurini.

⁴⁶ Ġia na voina barego lelevaġina forena ta edoġariato, benamo ġena farefare mabarari evoivoi-iaġi fitoġarito roġo, monai vau mo davana forena evoiatu.”

Barabore - Reke

⁴⁷ “Guba Basileia tu reke kavana, davarai ġefiu-riġoani nai, maġani-kone irauirau nuġanai ġetoġani.

⁴⁸ Reke evonuni nai, ġeinu-raġeani tanobara ġana, benamo reke tarimari ġetanu-tarini vau, maġani-kone reke nuġanai moġeri mabarari ġeviriġirini, namori mabarari tu baketi ai ġeġurarini, a rakavari tu ġeftoġarini.

⁴⁹ Moġesi vetoġa bevetoreni, tanobara magona beraġasini nai. Aneru beġe iaġomani nai, veġa rakava tarimari tu beġe tore-veġitarini veġa iobukaiobuka tarimari ġerina;

⁵⁰ e karava more-morena nuġanai beġe fiu-toġarini. Monai beġe taġini, gadikari maki beġe veġara-tarini.”

Guruġa moġoniri variġuri e guineri

⁵¹ Iesu na ġena mero edanaġirito, ekirato, “Mai guruġa mabarari nuġami ai boġo riba-ġitakauri ba?” Ġia na ġekiraġato, “Oi, Vereġauka.”

⁵² Iesu na ma ekirarito, ekirato, “Moġesina nai, bema taravatu vaġa-ribana tarimana ta Guba Basileia ġena vevaġa-riba tarimanai beiaġoni neganai, ġia tu numa biaguna ta kavana, ġena farefare variġuri ema guineri eġabi-rosirini ġena farefare vaġa-vegogo numana na.”

*Nasareta tarimari na Iesu asi ġeġabi-raġeato**Mareko 6:1-6; Luka 4:16-30*

⁵³ Iesu na maġġeri barabore ekiraġi-ġosirito vau, mo gabu eraga-kwaneato.

⁵⁴ Monana vau ebaregato vanuġanai eraġasito. Iuda tarimari ġeri rubu ai evevaġa-ribato-ġoi nai, ġia ġeseġaġiato-ġoi tarimari na ġena ġobata guruġari ġeġaba-iaġirito, ema maġġesi ġevedanaġito, ġekirato, “Mai tarima ġena riba tu ainana eġabito, e mai nuġa-farevaġi veġġari maki kamasi eveirini?”

⁵⁵ Ġia tu kamuda tarimana natuna, ene? Ġia sinana arana Maria ġetoni, ene? E ġia tarina merori arari tu Iakobo (o Iames) e Iosefa, Simona e Iudas, ene?

⁵⁶ Ema ġia tarina vavineri mabarari maki ġita ġesi maġġeri. Senaġi mai riba ema seġuka mabarari ne ainana eġabito?”

⁵⁷ Moġġesi ġetuġamaġi-ġutuma viniato nai, ġia na asi ġeġabi-raġeato. Iesu na maġġesi ekirarito, ekirato, “Peroveta tarimana tu gabu mabarari ai beġe gubakauani, senaġi ġena vanuġa korikoroi ema ġena numa tarimari na moġo asi beġe gubakauani.”

⁵⁸ Monai nuġa-farevaġi veġġa boruri viravira moġo eveirito, korana asi ġeri veġġabidama nai.

14*Ioane Babatise ġena mase*

¹ Mo negai Heroda, Galilea verena, Iesu varina eseġaġiato.

² Benamo ġia na ġena vetuġunaġi tarimari evaġa-guruġarito, ekirato, “Mai tu Ioane Babatise mase na bevaisiraġe-ġenoġoi nai, seġuka veġġari boruri eveirini.”

³ Heroda na Ioane eġabi-tariato ma ebarubaruato, dibura numai ekou-ġuato. Ġia na maġġesina evei-viniato, korana ġia kakana Filipino ġaraġona, Herodia, ġaramanai.

⁴ Ioane Babatise na Heroda evaġa-guruġaiato-ġoi, ekirato, “Ġoi na Herodia boġaraġo-veraria tu asi maoro.”

⁵ Heroda eura-rakavato, Ioane bene vaġia, senaġi tarimarima gariri eveito, korana ġia na Ioane ġetuġamaġiato-ġoi tu peroveta tarimana ta.

⁶ Senaġi Heroda ġena ġora ġaronai o betdei, Herodia natuna ġuiatona tu varivari tarimari ġoirari ai ebarato. Heroda maki mai bara na evaġa-iakuato.

⁷ Moġġesina nai ġia ma nuġana mabarana ġesi guruġa gwaġġinaġi maġġesina bara-ġuiatona ekiraġitore-viniato, ekirato, “Ġoi kara oura-viniani dagarana nokiraġia, benamo bavininuni.”

⁸ Ġuiato tu sinana na varau evaġa-guruġa guineato ema elaunaġiato nai, ġia maġġesina ekirato, “Ioane Babatise debana diġu ai mainai noma vinigu.”

⁹ Heroda nuġana emetoto, senaġi ġena guruġatore ġuiato ġenai varau eveiato e ġena varivari tarimari dairi ai ekirato, beġene vinia.

¹⁰ Benamo tarima debari ebasi-ġuturito-ġoi tarimana ta etuguato dibura numai, Ioane debana ebasi-ġutuato.

¹¹ Ioane debana tu diġu ai ġeġuraiato vau, ġuiato ġeviniato, benamo sinana ġenai eġwa-iaġoato.

¹² Benamo Ioane ġena mero ġeiaġomato, tauġanina ġeġabiato, ġeġuriato. Moġa murinai ġeiaġoto Iesu ġekira-varaiato.

*Iesu na tarimarima daġara imaima (5,000) eġuburito**Mareko 6:31-44; Luka 9:10-17; Ioane 6:1-13*

¹³ Iesu na Ioane ġena mase varina eseġaġiato nai, ġia monana eraka-ġerevaġito ġasi na, asi tarimarima gabuna ġana eiaġoto. Senaġi tarimarima na ġeseġaġiato nai, ġeri vanuġa ġeiaġuirito, tano na kwakuri na ġerakato, Iesu murina na ġeiaġoto.

¹⁴ Iesu fenu ai edarokauto nai, ġia na tarimarima ġutuma-bara eġitarito, benamo evetuġa-rakavarito, ema ġeri keve tarimari evaġa-namorito.

¹⁵ Lavilavi rekenai Iesu ġena mero ġia ġenai ġeiaġoto, bena ġekirato, “Mai tu gabu fakana, asi tarima-rimana, ġaro varau bevariġo naima, mai tarimarima ġutuma-bara notuġuri, be vanuġa ġari ġaniġani beġenea voi.”

¹⁶ A Iesu ekirato, “Ġia asi beġene raka-veġita, ġomi na ġari boġono viniri, be beġene ġaniri.”

¹⁷ Ġia na ġekiraiato, ġekirato, “Ġai ġemai tu beredi imaima (5) e maġani-kone ruarua (2) moġo maġġeri.”

¹⁸ Iesu na ekirarito, ekirato, “Maġana ġoġabi-iaġomari au ġegu ai.”

¹⁹ Benamo ġia na mai ġutuma-bara elaunaġirito, ġauġa iatari ai beġene tanutanu-tari etato, monai vau ġia na beredi imaima e maġani-kone ruarua eġabirito, gubai eboġe-raġeto, Barau evaġa-namoato vau, etavi-kirakirarito, ġena mero evinirito, benamo ġia na vau mai tarimarima ġutuma-bara ġevinirito.

²⁰ Mabarari ġeġani-maseto; ġaniġani kwari ġevaġa-vegogorito, boseġa gabanana ruarua (12) ġevaġa-vonurito.

²¹ ġeġaniġanito, tau moġo, mabarari tu 5,000 kavana, senaġi vavine ma naturi keikeiri ġesi tu asi ġeivirito.

Iesu nanu iatanai erakato

Mareko 6:45-52; Ioane 6:16-21

²² Moġa murinai Iesu na ġena mero evaġa-guruġarito, ġasi ai beġene raġekau, beġene guine, kou reke ta ġana beġene iaġo etato. A ġia tu mo tarimarima ġutuma-bara roġo etuġu-rovorovorito.

²³ Mai tarimarima vovoka etuġu-rakarito vau, ġia ġereġana ġoro ġana evaraġeto, bene ġauġau ġana.

Varau eboġito nai, ġia tu roġo moġa, ġereġana.

²⁴ Ġasi tu kotuna ma fakana tanobara ġenana kou nuġanai, e ureure na edori-ġareva ġarevaiato, korana iavara na ġasi ġena raga ġoirana rekena na etoġato-ġoi nai.

²⁵ Horaġauna 3 ema 6 koloko vekaravari ai boġiboġi rekenai, Iesu ġia ġeri ai eiaġoto.

²⁶ Senaġi ġena mero na nanu iatana na erakato-ġoi ġeġitaio, benamo nuġari maki ġefare-vagiato, ema ġegari-rakavato, ġekirato, “Mo tu murava ta!” Ġegarito nai ġeġabato maki.

²⁷ Iesu na asikauna evaġa-guruġarito, ekirato, “Ġonuġa-gwaġiġi, mai tu au; asi ġogari.”

²⁸ Petero na evaġa-veŋato, ekirato, “Vereġauka, bema moġoni ġoi neganai, bono launaġigu, be nanu iatanai bana raka, ġemu ai bana iaġosi.”

²⁹ Iesu ekirato, “Noiaġoma!” Benamo Petero ġasi na eraka-riġoto, nanu iatanai erakato, Iesu ġenai eiaġoto.

³⁰ Senaġi Petero na iavara (e ureure) eġitaio, benamo egarito, erei-riġoto nai eġabafouto, ekirato, “Vereġauka o, noma vaġa-maġurigu.”

³¹ Iesu asikauna ġimana etuġu-iaġoato, ġenai eveġabikauto, ekirato, “Veġabidadama kei tarimana, karase nai odaradarani?”

³² Tauri ruarua ġasi ai ġeraġekauto vau iavara edokoto.

³³ Ġasi tarimari tu ġia ġoiranai vau ġetoma-rakaririto, ġekirato, “Moġoni veġata, ġoi tu Barau Natuna.”

Iesu na keve tarimari Genesareta ai evaġa-namorito

Mareko 6:53-56

³⁴ Ġia ġasi na ġevanaġito, Genesareta tanonai ġeraġasito.

³⁵ Mo gabu tarimari na Iesu ġea ġita-doġariato, benamo ġia varina mo gabu vanuġari mabarari ġevaġa-ribarito. Benamo keve tarimari ġia ġenai ġeġwa-iaġorito,

³⁶ e ġenoġiato, ġena dabuġa dudunai moġo maki beġene veġabikau. Gabivau, ġeveġabikauto tarimari mabarari varau ġenamoto.

15

Namo e rakava

¹ Farisea tarimari e taravatu ġevevaġa-riba iaġiato-ġoi tarimari kotari Ierusalemna na Iesu ġenai ġeiaġoto, ġekirato,

² “Karase nai ġoi ġemu mero na ġita senera vereri ġeri vevaġa-riba asi ġeseġaġirini? Ġia ġimari maki dabara korikoriri ai asi ġeġuriririni vau ġeġaniġanini!”

³ Iesu na evaġa-veserito, ekirato, “Be karase senemi vereri ġeri vevaġa-naġi boġono korana-iaġiri urari ai, Barau ġena taravatu guruġari ġoruġarini?”

⁴ Barau ekirato, ‘Tamamu e sinamu bono gubakauri,’ ema ‘Deikara ta na tamana o sinana beguruġa-rakava viniani tarimana tu boġono vaġi-mase!’

⁵ Senaġi ġomi ġokirani, tarima ta na tamana o sinana bevaġa-guruġaiani, bekirani, ‘Au na ġomi asi bavaġa-kavamini, korana bara vinimi dagarana tu Barau ġena dagara, naima ġia aviniani.’

⁶ Moġesi veġai ġomi na tarima ġokouani, tamana e sinana asi bene vaġa-kavari e asi bene gubakauri ġana. Ġemi sene maġuriri maiġesiri ġerina Barau ġena taravatu guruġari asi aniri ai ġovaġa-iaġorini.

⁷ Ġofaġofa tarimami, Isaia na eperoveta-iaġimito tu moġoni, ekirato,

⁸ ‘Mai besena tu

mururi koriri ai moĝo
 au ĝegubakauguni ĝeri Barau,
 senaĝina ĝia nuĝari tu
 manaĝa rakava au ĝegu ai.

⁹ Ĝetoma-rakarigo vini-kavaguni,
 ĝeri vevaĝa-riba tu tarimarima ĝeri vevaĝa-naĝi taravaturi,
 a dia au ĝegul! ”

Dagara kotari na tarima ĝevaĝa-rakavarini
Mareko 7:14-23

¹⁰ Iesu na tarimarima ĝutuma ĝia ĝenai ekea-iaĝomarito, benamo ekirarito, ekirato,
 “Ĝoseĝaĝi, ema boĝono riba-maoro:

¹¹ Murika na eraka-toĝani tarima murunai dagarana na ĝia asi evaĝa-rakavaiani,
 senaĝina kara ĝia nugana o loruna gutuna na ma muruna na eraka-rosini dagarana na
 ĝia evaĝa-rakavaiani.”

¹² Ĝena mero ĝia ĝenai ĝeiaĝomato, benamo ĝekiraiato, ĝekirato, “Ĝoi ribamu, Farisea
 tarimari tu ĝoi ĝemu guruĝa beĝe seĝaĝia nai, nuĝari beĝe midigu?”

¹³ Iesu evaĝa-veseto, ekirato, “Tamagu gubai etanuni na ĝau asi evarorito mabarari tu
 beĝe raĝa-vaĝirini.

¹⁴ Ĝotuĝamaĝi-fitoĝari! Ĝia matari bubu, senaĝi ĝeurani mata-bubu tarimari beĝene
 ĝori-kauri. Bema mata-bubu tarimana na mata-bubu tarimana ta beĝori-kauani nai, tauri
 ruarua koufai beĝe keto-riĝoni.”

¹⁵ Petero na ekiraiato, ekirato, “Mai guruĝa veabanaĝina tauna korikori novaĝa-
 ribama.”

¹⁶ Iesu na ekirarito, ekirato, “Ĝomi maki asi ĝotuĝamaĝi-fakani tarima kotari kavana?

¹⁷ Asi ĝoribani maki? Dagara ta tarima muruna na eraka-toĝani, eiaĝoni sinaĝeni,
 monana eiaĝoni tauĝanina ĝenana ea raka-rosini.

¹⁸ Senaĝina muruna na ĝeraka-rosini dagarari tu nugana o loruna na ĝeiaĝomani naima,
 maiĝeri dagara na tarima ĝevaĝa-rakavaiani.

¹⁹ Tarima nugana o loruna ĝenana tugamaĝi rakavari ĝeraĝeni nai, evaĝivaĝini, eveĝura-
 vanaĝini, emata-boraĝani, elemeni, Kota gabunai ĝofaĝofa guruĝari ekiraĝirini, ema
 tarima namori arari ĝofaĝofa veĝari ai evari-fiurini.

²⁰ Maiĝeri dagara na tarima evaĝa-rakavaiani; senaĝina ĝimamu asi oĝuriĝiani vau
 oĝaniganini, monana tarima asi evaĝa-rakavaiani.”

Irau bese vavinena ta ĝena vegabidadama
Mareko 7:24-30

²¹ Iesu na mo gabu eraga-kwaneato, eraka-iaĝoto Taia e Sidono rekeri tanori ai
 eraĝasito.

²² Benamo monai etanuto-ĝoi vau, Kanana vavinena ta Iesu ĝenai eiaĝomato, eĝaba-
 fouto, ekirato, “Vereĝauka, Davida Natuna o, au novetuĝagu! Au natugu ĝuiatona tu iauka
 rakavana na beboroĝia nai, ĝena midigu inatoma tu barego rakava moĝo.”

²³ Senaĝina Iesu na ĝia asi evaĝa-veseato. Benamo ĝena mero ĝia ĝenai ĝeiaĝomato,
 ĝenoĝiato, ĝekirato, “Notuĝu-rakaia! Gita murira na eiaĝomani ema guru baregona
 eveiani.”

²⁴ Iesu evaĝa-veseto, ekirato, “Barau na au etuĝuguto tu, rekwerekwa mamoeiri,
 Israela tarimari, ĝeri moĝo.”

²⁵ Benamo mo vavine Iesu kwakuna koranai evetuitarito, ekirato, “Vereĝauka, novaĝa-
 kavagu!”

²⁶ Iesu evaĝa-veseto, ekirato, “Mero misiri ĝari ĝaniĝani bita ĝabirini, ma kwaiva bita
 fiu-vinirini tu asi maoro.”

²⁷ Vavine na evaĝa-veseato, ekirato, “Vereĝauka, mani tu moĝoni, senaĝina kwaiva na
 ĝaniĝani kwari ĝeketo-firiĝoni, biaguri ĝeri ĝaniĝani fatari na, maki ĝeĝanirini.”

²⁸ Benamo Iesu na evaĝa-veseato, ekirato, “Vegabidadama barego vavinemu! Kara
 oura-viniani veĝana beĝorani.” Mo horai moĝo ĝia natuna ĝuiatona enamoto.

Iesu na keve tarimari vovoka evaĝa-namorito

²⁹ Iesu na mo gabu eiaĝuiato, Galilea kouna sevina na eraka-vanaĝito. Benamo ĝoro tai
 eraĝeto, tuĝunai etanu-tarito.

³⁰ Tarimarima ĝutuma-bara ĝia ĝenai ĝeiaĝomato, keve iraurau tarimari ĝeĝabi-
 iaĝomarito, kotari kwaku rakava, mata-bubu, kobari na ĝedarato-ĝoi tarimari, muru-
 bubu, ema keve iraurau ĝutuma maki. Iesu kwakuna koranai ĝema tore-taririto, benamo
 ĝia na evaĝa-namorito.

³¹ Tarimarima mabarari na mai vetoġa ġeġitaġato nai, ġeġaba-rakavato, korana mururi bubu tarimari ġeguruġato, ġedarato-ġoi tarimari tauġaniri vinuba gaburi ai ġevetoreto, kwaku rakava tarimari ġerakato, mata-bubu tarimari ġeġoġe-boġeto. Benamo ġia na Isaraela ġeri Barau ġevaġa-raġeato.

Iesu na tarimarima daġara vasiġi (4,000) eġuburito
Mareko 8:1-10

³² Iesu ġena mero ġia ġenai ekea-iaġomarito, ekirato, “Au na mai tarimarima ave-tuġarini, korana ġaro toitoi veġatana au ġesi mainai beġe tanu, ma kara ta maki roġosi roġo beġene ġania. ġaniġani ta roġosi roġo beġene ġani nuġanai, au na asi batuġu-rakarini, korana dabarai beġea borimarini ġarina.”

³³ ġena mero na ġedanāġiato, ġekirato, “Mai tano fakanaġi ġaniġani vovoka tu kamasi bita doġarini vau, mai ġutuma-baru bita ġuburini?”

³⁴ Iesu na evaġa-veserito, ekirato, “ġomi ġemi ai beredi tu vira maniġa?” ġia ġekirato, “Beredi imaima ruarua (7) ġai ġemai maġa, ema maġani-kone misiri kotari maki.”

³⁵ Benamo Iesu na mai tarimarima asisebo ekirarito, tano ai ġetanutanu-tari.

³⁶ Benamo beredi imaima ruarua (7) e maġani-kone egabirito, Barau evaġa-namoato, ebuki-ġuturito, ġena mero evinirito, ġia na vegogo tarimari ma ġevinirito.

³⁷ Mabarari ġeġani-maseto murinai, Iesu ġena mero na ġaniġani kwari ġegogorito, boseġa imaima ruarua (7) ġevaġa-vonurito.

³⁸ Mo ġaniġani ġeġaniġato ġenana tau moġo mabarana tu 4,000, senaġina vavine ma naturi ġesi tu asi ġeġavirito.

³⁹ Benamo Iesu na mai ġutuma-bara etuġu-rovo rovrorto, a ġia ġasi ai eraġeto, Magadan tanona ġana eiaġoto.

16

Farisea e Sadukea tarimari ġeri ura vetoġa ta guba na bene mariġo

¹ Farisea e Sadukea tarimari kotari Iesu ġenai ġeġiaġoto, benamo ġedanaġi-ribaġaniato. ġeri ura vetoġa ta guba na bene mariġo, beġene ġitaġa, ġia tu moġoni Barau na etuġuato tarimana.

² Senaġi Iesu na evaġa-veserito, ekirato, “Lavilavi ai ġaro evariġoni nai, ġokirani, ‘Guba bekakakaka, be ġura asi beraguni, ġitaġitana tu nega namo.’

³ A boġi-boġi rekenai ġokirani, ‘Toma tu ġura ma iavarana ġesi eiaġomani, korana guba bekakakaka, ema ġitaġitana maki ma ġarina.’ Guba ġoġitaġiani nai, kara boġo kiraġiani, nega namo o nega rakava ġeri ai tu lorinai, senaġina maitoma ġaro vetoġari tu asi ribami!

⁴ Maitoma ġuru rakavana ma veġura-vanaġina ġesi, (Barau ġenana ġeveġitato ġuruna), vetoġa ma evetauani, senaġina vetoġa ta asi bavinimini, a Iona, peroveta tauna, ġenai eġorato vetoġana moġo.” Benamo Iesu na eraga-kwanerito, ġerina eraka-veġitato.

Iesu ġena mero ġedaradarato
Mareko 8:14-21

⁵ Kou na ġeġasi-vanaġito reke ta kefo ai vau, Iesu ġena mero ġeribato, ġaniġani asi ġeġabikauto.

⁶ Benamo Iesu na ekirarito, ekirato, “Lorimi boġono vetore, boġono boġeboġe, korana Farisea tarimari e Sadukea tarimari ġeri farao vaġa-tubuna mura-murana lorina bogono torea.”

⁷ ġia tauġeri ġeguruġa-guruġa iaġi-vegogo-ato, ġekirato, “ġia maġesi eguruġani, korana beredi asi bita ġabikau nai.”

⁸ Iesu ribana ġia na kara ġekirāġiato naima, edanaġirito, ekirato, “Karase nai ġereġami na beredi asi boġo ġabikau ġoguruġa-guruġa iaġiani? Veġabadadama kei tarimami!

⁹ ġomi roġosi roġo bogono riba-maoro? E asi ġotugamaġiani beredi imaima (5) ġenana tarimarima 5,000 ġeġaniġanito, e beredi kwari ġogogorito tu boseġa vira ġovaġa-vonurito?

¹⁰ Ema ta maki, farao imaima ruarua (7) ġenana tarimarima 4,000 ġeġaniġanito, e beredi kwari ġogogorito tu boseġa vira ġovaġa-vonurito?

¹¹ Kamasi se nuġami asi ġevekeoni, ma asi ġoribani, au na tu dia beredi aguruġa-iaġiani? Ma nakira: Farisea tarimari e Sadukea tarimari ġeri farao vaġa-tubuna dagarana lorina boġono torea!”

¹² Benamo ġia nuġari ġevekeoto, ema ġeribato maki, Iesu na dia farao vaġa-tubuna muramurana eguruġa-iaġiato, senaġina Farisea e Sadukea tarimari ġeri vevaġa-riba guruġari ġoġaġofari rekeri ai eguruġato.

Petero na Iesu ekirāġi-foforiato, Keriso
Mareko 8:27-30; Luka 9:18-21

¹³ Iesu eiaĝoto, Kaisarea Filipi vanuĝana tanona rekenai eraĝasito. Monai vau ĝia na ĝena mero edanaĝirito, ekirato, “Tarimarima tu kara ĝetoni, Tarimarima Natuna tu deikara?”

¹⁴ Ĝia ĝekirato, “Kotari ĝekirani, ĝoi tu Ioane Babatiso, kotari ĝekirani, Elia, ma tari ĝekirani tu, Ieremia o peroveta tarimana ta.”

¹⁵ Iesu na ĝia edanaĝirito, ekirato, “A ĝomi tu kara ĝotoni au tu deikara?”

¹⁶ Simona Petero na evaĝa-veseato, ekirato, “Ĝoi tu Keriso, maĝuri Barauna Natuna.”

¹⁷ Iesu na evaĝa-vese viniato, ekirato, “Simona, Ioane natuna, bono iaku ema vevaĝa-namo iatamu ai bene tanu, korana mai vevaĝa-vese moĝonina bovinia, maĝa tu dia tarima ta ĝenana beiaĝoma, senaĝina mai tu au Tamagu gubai etanuni na ĝoi bevinimu.

¹⁸ Moĝa lorinai akiramuni: Ĝoi tu Petero, (anina tu fore), ema mai fore iatanai au ĝegu ekalesia bavaĝa-ruĝaiani. Mase ĝena seĝuka na maki asi bevaĝa-darereani.

¹⁹ Au na Guba Basileia kiri maki ĝoi bavininuni; tanobarai bobarurini dagarari mabarari gubai maki Barau na bebarurini; e tanobarai boruĝarini dagarari mabarari gubai maki Barau na beruĝarini.”

²⁰ Benamo Iesu na ĝena mero ekirarito, tarima ta asi beĝene vaĝa-ribaia ĝia tu Keriso, (Barau na ekiraĝi-toreato vevaĝa-maĝuri tauna).

*Iesu na ĝena mase e variĝisi-ĝenoĝoi eguruĝa-iaĝirito
Mareko 8:31-9:1; Luka 9:22-27*

²¹ Mo nega na veĝata Iesu na ĝena mero evaĝa-riba guinerito, ekirato, “Au tu Ierusalem a ĝana aiaĝoni, be Iuda vereri, e Rubu Veaĝa vereri baregori, ema taravatu vaĝa-riba-iaĝina tarimari ĝerina roĝo amidigu-lelevaĝini; ema beĝe vaĝi-maseguni maki, senaĝina ĝaro vaĝa-toitoinai vau, mase na ma bavaisiraĝe-ĝenoĝoini.”

²² Petero na eĝori-veĝitaĝato, benamo esisiba-viniato, ekirato, “Vereĝauka, dia manĝesina; manĝesina asi beĝe vei-vininuni, ma asi beĝorani maki.”

²³ Benamo Iesu eboĝe-kureto, Petero ekiraiato, ekirato, “Ĝoi Satani, ĝeguna noraka-ĝerevaĝi! Au ĝegu iaĝoiaĝo ĝoi na odii-ĝauani, korana mai ĝemu tuĝamaĝi guruĝana tu dia Barau ĝenana eiaĝomani, senaĝina tarimarima ĝerina.”

²⁴ Iesu na ĝena mero evaĝa-guruĝarito, ekirato, “Bema tarima ta au murigu ai bene raka etoni nai, tauĝena bene veruĝa, ĝena satauro bene ĝwaia, ma murigu ai bene raka.”

²⁵ Moĝa lorinai deikara tauĝena moĝo ĝena maĝuri lorina etoreani tarimana, ĝena maĝuri befitoĝaiani. A deikara au daigu ai ĝena maĝuri befitoĝaiani tarimana, ĝena maĝuri asi bevei-rekwarekwaiani, senaĝi bedoĝariani.

²⁶ Tarima ta na tanobara mabarana uranai ĝena maĝuri befitoĝaiani, ĝena namo tu kara ĝia ĝenai? Korana tarima ta ĝena maĝuri efitoĝaĝato nai, kara na vau ma bevoi-ĝenoĝoiani?

²⁷ Korana Tarimarima Natuna tu Tamana mamana marevana e seĝuka baregona e ma ĝena aneru mabarari ĝesi beĝe iaĝomani, benamo tarimarima tata ĝeri veĝa ilailanai voiri tu bevinirini.

²⁸ Mogoni akiramini, mai kotari ini ĝeruĝa-taĝoni maĝeri tu asi roĝo beĝe maseni, beiaĝoni mo, Tarimarima Natuna ĝena Basileia nuĝanai beiaĝomani beĝe ĝitaiani.

17

Iesu vetoĝana eirauto

¹ Ĝaro imaima sebona (6) ĝekorito murinai, Iesu na Petero, e Iakobo (o Iames), ema tarina Ioane eĝabrito, ĝoro baregona ta tuĝuna ĝana ĝevaraĝeto, monai ĝia ĝereĝari moĝo.

² Ĝia ĝeboĝe-taĝoto-ĝoi nuĝanai, Iesu ĝitaĝitana varau eirauto: Ĝia ĝoirana ekimore-kimoreato ĝaro noĝa, ma ĝena dabuĝa ekuro-ĝaroĝaroto.

³ Benamo mai mero toitoi na Mose e Elia ĝeĝitarito, Iesu ĝesi ĝeguruĝa guruĝato-ĝoi.

⁴ Monai Petero eguruĝa-fouto, Iesu ekiraiato, ekirato, “Vereĝauka, namo vedaurea ĝita mainai maĝera! Be, ourani nai, fouta toitoi naragari, ta ĝoi ĝemu, ta Mose ĝena, ema ta Elia ĝena.”

⁵ Ĝia roĝo eguruĝato-ĝoi, magube kuro-ĝaroĝarona na ema ĝabi-ĝaurito vau, ĝaro ta mai magube nuĝana na ekea-rosito, ekirato, “Mai tu au Natugu, auravini-baregoani; ĝia ĝenai aiaku-rakavani. Ĝia boĝono seĝaĝi-vinia!”

⁶ Iesu ĝena mero toitoi na mai ĝaro ĝeseĝaĝiato nai, tano ai ĝeketo-tarito ĝoirari maki tano ai, korana ĝegari-rakavato nai.

⁷ Benamo Iesu tu ĝia ĝeri ai eiaĝoto, tauĝaniri eĝabi-kararito, ekirato, “Ĝovaisivaisi-raĝe, asi ĝogari.”

⁸ Ĝia ĝeboĝe-vaisito nai, ĝia na tarima ta asi ĝeĝitaĝato ĝia ĝesi, Iesu moĝo ĝereĝana.

⁹ Mabarari ġoro na ġemariġoto-ġoi nai, Iesu na evaġa-guruġarito, ekirato, “Boġo ġita dagarari tarima ta asi boġono vaġa-ribaia, bene iaġo mo, Tarimarima Natuna mase na bene variġisi-ġenoġoi.”

¹⁰ Benamo Iesu ġena mero na ġedanaġiato, ġekirato, “Kara dainai taravatu vaġa-riba-iaġina tarimari ġekirani, Elia tu beiaġoma-guineni?”

¹¹ Iesu evaġa-veseto, ekirato, “Moġoni veġata, Elia tu beiaġoma-guineni, dagara mabarari bevaġa-variġu ġenoġoirini.

¹² A au na akiramini, Elia tu varau eiaġomato, senaġi tarimarima tu asi ribari ġia tu deikara. Ġeri ura veiġari ai moġo ġevei-viniato-ġoi. Moġa ilailanai Tarimarima Natuna maki beġe vaġa-midigu midiguani.”

¹³ Mai guruga ġerina Iesu ġena mero ġeribato, ġia na tu Ioane Babatiso ekiraġi-kara-viniato.

Iesu na iauka rakavana na eboroġiato merona evaġa-namoato
Mareko 9:14-29; Luka 9:37-42

¹⁴ Ġia ma ġeġenoġoito tarimarima ġutuma ġeri ai nai, tarima ta Iesu ġenai eiaġomato, ġoiranai ema vetui-tarito,

¹⁵ ekirato, “Vereġauka, au natugu merona novetuġaia! Ġia tu ġue na evaġiani, ema tauġanina evaġa-ġoġo-ġogo rakavaiani. Nega ġutuma karavai eburi-raġeni e nanu ai eburi-reini.

¹⁶ Ġemu mero ġeri ai aġabi-iaġoato, senaġina vaġa-namona ġia tu asi ilaila.”

¹⁷ Iesu evaġa-veseto, ekirato, “Asi veġabidadamami e kira-sirivagi ġuruna! Ġaro vira au tu sevimi ai bana tanu? Ġaro vira bana vevaġa-gwaġiġi vinimi? Mero ġegu ai ġoġori-iaġomaia!”

¹⁸ Iesu na mero tauġanina ġenai etanuto iauka rakavana ekira-ġoiato, benamo iauka rakavana eraka-vaġito, ma asikauna mero enamoto.

¹⁹ Gabivau Iesu ġena mero ġenai ġeiaġoto, vekuretoġai ġedanaġiato, ġekirato, “Karase nai ġai na iauka rakavana asi ilaila baġa lai-vaġia?”

²⁰ Iesu na evaġa-veserito, ekirato, “Korana ġemi veġabidadama asi ilaila naima. Akira-korikorimini, bema ġemi veġabidadama mastadi ġutuna misina korokorona kavana nai, mai ġoro boġo kiraiani, boġo kirani, ‘Mainana noveġabi-vaishi, ma iomonai noa vetore!’, benamo beveġabi-vaishini ma beiaġoni. Veġa mabarari maki boġo veirini riba. [²¹ Iauka rakavari maiġesina lailairi tu dabara irauna tai asiġina, senaġina ġauġau e ġaniveaġai ġereġana moġo.]”

Iesu ġena mase ma ekiraġi-ġenoġoiato
Mareko 9:30-32; Luka 9:43-45

²² Ġaro ta, Iesu ma ġena mero ġesi Galileai ġetanuto-ġoi nai, Iesu na ekirarito, ekirato, “Tarimarima Natuna tu beġe revaiani vau tarimarima ġimari ai beġe toreani.

²³ Benamo beġe vaġi-maseani, senaġi ġaro vaġa-toitoinai ma bevaisiraġe-ġenoġoini.” Ġena mero ġeseġaġiato nai, nuġari ġemeto-rakavato.

Rubu Veaġa takesi moniri vinina

²⁴ Iesu ma ġena mero ġesi Kaperanauma vanuġanai ġeraġasito, benamo Rubu Veaġa monina ġegogoato-ġoi tarimari ġeiaġomato, Petero ġedanaġiato, ġekirato, “Ġomi ġemi vevaġa-riba tauna Rubu Veaġa ġena takesi moniri tu evinini ba asiġina?”

²⁵ Petero na evaġa-veseato, ekirato, “Oi, evinini.” Petero numa ġana eġenoġoito nai, Iesu na edanaġiato, ekirato, “Simona, ġoi ġemu tuġamaġi tu kamasi? Tanobara vereri o kini ġeri takesi moniri tu deikara na beġene viniri? Ġia naturi na ba tarima boruri na beġene viniri?”

²⁶ Petero evaġa-veseto, ekirato, “Tarima boruri na.” Iesu na ekiraiato, ekirato, “Moġa anina, ġia naturi tu asi beġe vinini.

²⁷ Senaġina asi bitana vaġa-baruri ġana, naima noiaġo kou ġana. Kimai bono fiu-riġoa, maġani-kone ġinguinena boinu-raġeani nai, bokana bono keo-baġakiaia, silva monina ta bodoġariani nuġanai. Bono ġabia, benamo bono viniri ġita taura ruarua ġera Rubu Veaġa takesi monina.”

18

Deikara tu barego vedaurea Guba Basileia nuġanai?

¹ Mo negai Iesu ġena mero ġenai ġeiaġoto, ġekirato, “Deikara tu barego vedaurea Guba Basileia nuġanai?”

² A Iesu na mero misina ta ekea-iaġomaiaato, benamo vekaravari ai evaġa-ruġa-tariato,

³ ekirato, “Moĝoni veĝata, akiramini, ĝomi asi boĝo vetuĝamaĝi-kureni e mai mero misina kavana asi boĝo iaĝoni nai, ĝomi tu Guba Basileia nuĝanai asi boĝo raka-toĝani.

⁴ Tarima ta tauĝena evevaĝa-manauni mai mero misina kavana, ĝia tu bere namo fore barana ĝaigonai ĝere baru-kaua, ma davara dodokunai bere vebora-mase.

⁵ Ema deikara mero misina maĝesina kavana au aragu ai beĝabi-raĝeani tarimana na au maki eĝabi-raĝeuni.”

*Tarima ta na mero misina ĝena veĝabidadama asi bene vaĝa-rakavaia
Mareko 9:42-48; Luka 17:1-2*

⁶ Senaĝina bema tarima ta na au eĝabidadama-viniguni mero misina ta ĝena veĝabidadama evaĝa-rakavaiani, ĝia tu bere namo fore barana ĝaigonai ĝere baru-kaua, ma davara dodokunai bere vebora-mase.

⁷ Tanobara vetuĝana kekei, korana veribaĝani ĝenana tarima ĝeri veĝabi-dadama evaĝa-rakavaiani. Dagara moĝesina vanaĝivanāĝi beĝe ĝorani veĝata, senaĝina veribaĝani evaĝa-ĝoraiani tarimana neĝi, vetuĝana kekei.

⁸ Bema ĝoi ĝimamu o kwakumu na rakavai etoremuni nai, bono basi-ĝutua, bema bono fitoĝaia! Ĝimamu sebonai o kwakumu sebonai maĝuri vanaĝivanāĝi bono doĝaria tu namo, a asi namo ĝimamu ruarua ma kwakumu ruarua karava eĝara-vanaĝi vanaĝini gabunai beĝe fiu-kaumuni.

⁹ Bema ĝoi matamu na rakavai etoremuni nai, bono ĝibo-vaĝia, bema bono fitoĝa-kwareĝaia. Matamu sebonai maĝuri vanaĝivanāĝi bono doĝaria tu namo, a asi namo matamu ruarua karava eĝara-vanaĝi vanaĝini gabunai beĝe fiu-kaumuni.”

*Barabore - Rekwarekwa mamoenai
Luka 15:3-7*

¹⁰ “Lorimi boĝono vetore, mai mero misiri ta boĝo ruĝaiani ĝesi. Korana akiramini: Ĝia aneruri na au Tamagu gubai etanuni ĝoirana nega vanaĝivanāĝi ĝeĝitaiani. [¹¹ Tarimarima Natuna tu rekwarekwa tarimari vaĝa-maĝuriri ĝana eiaĝomato.]

¹² Kamasi ĝotuĝamaĝiani? Bema tarima ta ma ĝena mamoe sinau ta (100), senaĝina sebona berekwa-rekwani nai, ĝia kara beveini? Ĝia na tu 99 ĝoro gabakanai beraga-kwane-rini, benamo beiaĝoni, rekwa-rekwa mamoenai bea vetauani.

¹³ Bedoĝariani nai, moĝoni akiramini, beiaĝu-rakavani moĝo. A ĝena mamoe 99, asi ĝedobito dagarari, maki bevanaĝirini.

¹⁴ Moĝa ilailanai Tamami gubai etanuni asi ĝena ura, mai mero misiri ta bene rekwarekwa.”

Tarikakamu ta na bevei-rakava vinimuni

¹⁵ “Bema goi tarikakamu ta na bevei-rakava vinimuni nai, bono iaĝo, ĝena veĝa rakavana bono vaĝa-fofori vinia. Senaĝina, vekuretoĝai mai veĝa bono veia, ĝia ma ĝoi ĝesi moĝo. Bema ĝia na goi beseĝaĝimuni ema beĝabi-raĝemuni nai, tarikakamu goi ĝemu ai beĝenoĝoi.

¹⁶ Senaĝina bema asi beĝabi-raĝemuni nai, tarima sebona o ruarua bono ĝabiri, goi ĝesi boĝono iaĝo ĝenai, benamo ‘guruĝa mabarari beĝene vaĝa-moĝoniri, seĝaĝiseĝaĝi tarimari ruarua o toitoi ĝerina,’ Buka Veĝa ekirani kavana.

¹⁷ Bema ĝia asi beseĝaĝirini nai, beĝe ĝora dagarari mabarari tu rubu o ekalesia vegogona bono kira-varaia. Bema ekalesia vegogona garona asi beseĝaĝiani, ĝoi na ĝia tu Barau asi ribana tarimanai ema takesi gogo o vei-rakava tarimanai bono vaĝa-iaĝoa.

¹⁸ Moĝoni akiramini: Tanobarai boĝo barurini dagarari mabarari gubai maki Barau na bebarurini; e tanobarai boĝo ruĝarini dagarari mabarari gubai maki Barau na beruĝarini.

¹⁹ Au na akira-ĝenogimimi: Tano-barai ĝomi tarima ruarua dagara tai nuĝami boĝo tore-sebonaiani ema boĝo ĝauĝau-iaĝiani tu, Tamagu gubai etanuni na bevinimimi.

²⁰ Korana au aragu ai tarima ruarua o toitoi beĝe tanu-vegogoni gaburi ai, au maki ĝia ĝesi monai.”

Barabore - Rakava asi etuĝamaĝi-fitoĝaiani tarimana

²¹ Benamo Petero tu Iesu ĝenai eiaĝoto, ekirato, “Vereĝauka, au tari-kakagu bevaĝa-rakava iaĝoguni nai, ĝena rakava tu nega vira kavana bana tuĝamaĝi-fitoĝaia? Imaima ruarua (7) ba?”

²² Iesu evaĝa-veseto, ekirato, “Asiĝina, dia 7 moĝo, senaĝina 70 ma vaĝa-baregona 7, o 70 taims 7, (moĝa anina tu vanaĝivanāĝi).

²³ Ĝoseĝaĝi, Guba Basileia tu vere ta kavana, ĝia eurato, ĝena vetuĝu-naĝi tarimari ĝeri ĝabitore bene vetauri ema bene vaĝa-maorori.

²⁴ Ĝia na ĝabitore dori evetaurito-ĝoi nuĝanai, vetuĝunaĝi tarimana ta ĝema-ĝabi-toĝaia, ĝia ĝena ĝabitore ĝenai vira milion kina, moni barego vedaurea, eveiato.

²⁵ Mai vetuḡunaḡi tauna ḡena moni asi ilaila ḡena ḡabitore voina vinivinina ḡenai. Moḡesina naima vere na ḡena vetuḡu-naḡi merori ekirarito, mai tarima beḡene voivoi-iaḡia, vere ta ḡena vetuḡunaḡi meronai bene iaḡo, ma ḡaraḡona e ma natuna ema ḡena farefare mabarari ḡesi maki, mo ḡena ḡabitore bene davaia ḡana.

²⁶ Vetuḡu-naḡi tauna vere kwakuna koranai evetui-tarito, enoḡiato, ekirato, 'Au ḡegu ai bono vevaḡa-gwaḡiḡi. A au na ḡemu dagara mabarari voviri baviniḡuni.'

²⁷ Vere na evetuḡaiato nai, vetuḡunaḡi tauna ḡena ḡabitore etuḡamaḡi-fitoḡaiato, benamo etuḡu-rakaiato.

²⁸ Mai vetuḡunaḡi tauna eraka-rosito, ḡia ḡatana vetuḡunaḡi tarimana ta edoḡariato. Mai ḡatana moni kotuna eḡabi-toreato ḡia ḡenai. Eḡabi-tariato, ma ḡaiḡona egigiato, ekirato, 'Au ḡegu ai oḡabi-toreato monina voina noviniḡu!'

²⁹ Gatana vetuḡunaḡi tarimana ḡia kwakuna koranai evetui-tarito, enoḡiato, ekirato, 'Nega kota noviniḡu roḡo, be voina mabarana bana vinimu!'

³⁰ Senaḡina ḡia asi eurato, benamo dibura numai edori-toḡaiato. Monai bene tanu, bene iaḡo mo, ḡena ḡabitore voina bene dava-iaḡia etato.

³¹ Benamo ḡia ḡesi vetuḡunaḡi ḡeiaḡo-vini vegogoato-ḡoi tarimari na mo veiḡa ḡeḡitaiato nai, ḡia nuḡari ḡemetoto, benamo ḡeiaḡoto vere ḡenai, mo kara ḡeḡorato dagarari mabarari ḡevaḡa-ribaiato.

³² Moḡesi nai ḡia na vetuḡunaḡi tauna numai ekea-toḡaiato, ekiraiato, ekirato, 'Ḡoi vetuḡunaḡi tauna rakavana! Au na ḡoi moni vira milion au ḡegu ai oḡabi-toreato dagarari mabarari atuḡamaḡi-fitoḡarito, voina asi oviniḡuto, korana onoḡiguto nai.

³³ Ilailana ḡoi na maki karomu vetuḡunaḡi tauna boro vetuḡa-ḡwaia, au na ḡoi avetuḡa-ḡwamuto kavana.'

³⁴ Mai vere ebaru-rakavato, benamo vetuḡunaḡi tauna dibura numai etoreato, monai metona bene ḡwaia mo, ḡena ḡabitore voina mabarana ma bene vini-ḡenoḡia.

³⁵ Iesu ḡena guruḡa magona rekenai maiḡesina ekirato: Tamagu gubai etanuni na ḡomi mabarari mai veiḡa sebonai moḡo bevei-vinimini, bema ḡoi tarikakamu ḡena rakava nuḡamu mabarana ḡesi asi botuḡamaḡi-fitoḡaiati nai."

19

Veḡaraḡo ruḡaruḡana

¹ Iesu na maiḡeri dagara mabarari eguruḡa-iaḡi ḡosirito murinai, Galilea eiaḡuiato, Iudea tanona ḡana eiaḡoto, Ioridana ḡarukana reke ta kefonai.

² Tarimarima ḡutuma-bara ḡia murinai ḡeiaḡomato, e monai ḡeri keve evaḡa-namorito.

³ Farisea tarimari kotari ḡia ḡenai ḡeiaḡoto, ḡevedanaḡi-veribaḡaniato, ḡekirato, "Tau ta ḡena ura ḡaraḡona bene fitoḡaia etoni nai, taravatu na beḡabiani?"

⁴ Iesu na evaḡa-veserito, ekirato, "Ḡomi na Buka Veḡa asi ḡoiaviani? Maiḡesi ekirani, "Tovotovona na veḡata, Barau na dagara mabarari eveirito nai, ḡia na tarimarima maki eveirito tau e vavine.'

⁵ Benamo Barau ekirato, 'Moḡesina nai tau ta na tamana e sinana beraga-kwanerini, ḡaraḡona ḡesi beḡe tanuni, benamo ḡia tauri ruarua beḡe sebonani.'

⁶ Moḡa lorinai ḡia tu dia ruarua, senaḡi sebona moḡo. Moḡesi nai Barau na etore-sebonarito tarimari tu, tarima ta na asi ma bene tore-kirari."

⁷ Farisea tarimari na ḡekiraiato, ḡekirato, "Karase nai Mose na taravatu eveiato nai, ekirani, tau na veḡaraḡo ruḡaruḡana fefana betoreani vau, ḡaraḡona betuḡu-rakaiani?"

⁸ Iesu evaḡa-veseto, ekirato, "Mose na maoro evinimito, ḡaraḡomi boḡono tuḡu-rakari ḡana, korana ḡomi vaḡa-ribami tu gwaḡiḡi rakava nai. Senaḡina Barau na dagara mabarari eveirito nai, maiḡesina tu asiḡina.

⁹ Akiramini: Deikara na ḡaraḡona, enabe asi eveḡura-vanaḡini, senaḡi efitoḡaiati moḡo, vavine ta ma beḡaraḡoani, ḡia tu beveḡura-vanaḡini."

¹⁰ Iesu ḡena mero na ḡekiraiato, ḡekirato, "Veḡaraḡo dabarana mo-ḡesina nai, tarimarima asi beḡene veḡaraḡo tu namo banaḡu."

¹¹ Iesu evaḡa-veseto, ekirato, "Mai vevaḡa-riba maiḡa tarimarima mabarari na asi beḡe tuḡamaḡi-fakaiani, senaḡi Barau na deikara tuḡamaḡi-faka evinirito tarimari moḡo.

¹² Tarimarima kotari asi ḡeveḡaraḡoni, korana moḡesi veḡatana ḡemaḡurito sinari ḡerina, be asi ilaila beḡe veḡaraḡoni; ma kotari tu eunuko tauri kavari, (tarimarima na seuri ḡefararini); ema kotari tu Guba Basileia o Barau vetuḡunaḡina beḡene iaḡo-vinia uranai asi ḡeveḡaraḡoni."

*Iesu na mero misiri evaḡa-namorito
Mareko 10:13-16; Luka 18:15-17*

¹³ Tarima kotari na naturi Iesu ġenai ġeġwa-iaġorito, ġimana ġia iatari ai bene tore-kauri, ema bene ġauġau ġana. Senaġina ġena mero na ġekira-ġoirito.

¹⁴ Iesu na ekirarito, ekirato, “Mani mero misiri ġeiaġoma au ġegu ai, asi ġokira-ġoiri, korana Guba Basileia tu manġesina kavana tarimari ġeri.”

¹⁵ Benamo Iesu ġimana iatari ai etore-kaurito, evaġa-namorito vau eiaġuirito.

Tarima variġuna ma ġena farefare vovoka

Mareko 10:17-31; Luka 18:18-30

¹⁶ Ġaro tai tau ta Iesu ġenai eiaġoto, ekirato, “Vevaġa-riba tauna, kara dagara namona baveiani vau, maġuri vanaġivanagi baġabiani?”

¹⁷ Iesu na evaġa-veaseato, ekirato, “Karase nai au odanaġiguni, aiġa tu dagara namona? Sebona moġo namo, Barau. Bema ourani maġuri vanaġi-vanaġi bono ġabia nai, Barau ġena taravatu bono korana-iaġiri.”

¹⁸ Ġia na Iesu edanaġiato, ekirato, “Kamara taravatu okiraġirini?” Iesu ekirato, “Asi bono vaviġaġi, asi bono veġura-vanaġi, asi bono lema, asi bono vevaġa-bade ġofaġofa,

¹⁹ tamamu e sinamu bono vubakauri, e sevimu tarimana maki bono ura-vinia, ġoi tauġemu oveura-vinini kavana.”

²⁰ Mai maraġa variġuna ekirato, “Au na mani taravatu mabarari akorana-iaġirini. Kamara dagara tu au na ma bana veia?”

²¹ Iesu na ġia evaġa-veaseato, ekirato, “Bema ġoi ourani bono iobukaiobuka nai, ġiniguine tu noiaġo, ġemu farefare mabarari bono voivoi-iaġiri, be moniri tu asi ġeri-ġari tarimari bono viniri, benamo gubai tu ma ġemu farefare. Gabivau murigu ai bonoma raka.”

²² Maraġa variġuna na maiġa eseġaġiato nai, nuġana ma metona ġesi eiaġuiato, korana ġia tu ma ġena farefare ġutuma tarimana.

²³ Iesu na ġena mero ekirarito, ekirato, “Au na akira-korikorimini: Farefare vovoka tarimari ġeri rakatoġa Guba Basileia nuġanai tu gwaġiġi rakava.

²⁴ Ma akiramini: Kamela tu nila kadarena na bevanaġini kotuna gwaġiġi, senaġi ġena farefare vovoka tarimana Barau ġena Basileiai ġena rakatoġa tu gwaġiġi rakava.”

²⁵ Ġena mero mai guruġa ġeseġaġiato nai, ġeġaba-rakavato moġo. Benamo ġevedanaġito, ġekirato, “Be deikara na maġuri vanaġivanagi bedoġariani?”

²⁶ A Iesu na eġita-karakararito, benamo evaġa-veserito, ekirato, “Tarimarima ġeri ai tu asi ilaila, senaġi Barau ġenai dagara mabarari tu ilaila.”

²⁷ Benamo Petero eguruġa-fouto, ekirato, “Goi ribamu, ġai ġema dagara mabarari tu ġaraga-kwanerito, benamo ġoi murimu ai ġarakani! Be ġai kara baġa ġabini?”

²⁸ Iesu na ekirarito, ekirato, “Moġoni akiramini, tanobara variġuna beforini nai, Tarimarima Natuna ġena terona o vere seana kimorekimorenai betanu-kauni, ma ġomi gabanana ruarua (12) au murigu ai ġorakani tarimami maki vere seari gabanana ruarua (12) ai boġo tanukauni, Isaraela ġena doġoro gabanana ruarua (12) boġo ġita-gaurini, ema boġo ġori-kaurini.

²⁹ Tarima ta na ġena numa, kakana, tarina, tobana, tamana ma sinana e natuna, ema ġena tano, au uragu ai beiaġuirini nai, ġia tu sinau-sinau ai dagara bedoġarini, ema maġuri vanaġivanagi maki beġabiani.

³⁰ Senaġina tarimarima ġutuma toma ġeguineni tu beġe gabini, ema ġutuma maki ininitoma beġabini tu beġe ġuineni.”

20

Barabore - Ġauvei tarimari vine tavoġanai

¹ “Guba Basileia tu maiġesi kavana: Vine tavoġana tarimana ta boġiboġi iamoiamo ai numa na eraka-rosito, ġena vine tavoġanai beġene ġauvei tarimari evetaurito.

² Benamo ġauvei tarimari ġesi ġeguruġa-vegogoto ma ġevaġa-moġoniato, mo ġauvei tarimari ġaro sebona ta beġe ġauveini voiri silva monina sebona bevinirini ġetato. Benamo ġena vine tavoġana nuġanai etuġu-iaġorito.

³ Boġiboġi 9 koloko kavana ġia ma eraka-rosito, maketi gabuna ġana eiaġoto, monai tarima kotari ġeruġa-reko rekoto-ġoi eġita-rito.

⁴ Benamo ekirarito, ekirato, ‘Ġomi maki ġegu vine tavoġana ġana ġoiaġo, ġoa ġauvei, be voimi maorona bana vinimi.’

⁵ Ġia maki ġeiaġoto. Ġaroġota 12 koloko ma 3 koloko kavana ġia numa na ma eraka-rosito, kotari ma edoġaririto, etuġurito.

⁶ Lavilavi rekenai 5 koloko kavana ma erakarosi-ġenoġoito, kotari roġo mo ġeruġa-taġoto-ġoi nai edoġaririto. Benamo edanaġirito, ekirato, ‘Karase nai mainai ġoruġa-kava ruġa-kavani mo, ġaro mo evariġoni?’

⁷ Ĝia na ĝevaĝa-veŝeato, ĝekirato, 'Korana tarima ta na ĝauvei asi evinimani nai.' Benamo ekirarito, 'Gomi maki ĝegu vine tavoĝana ĝana ĝoiaĝo, ĝoa ĝauvei.'

⁸ Ĝaro eboraiato-ĝoi nai, tavoĝa biaguna na ĝauvei tarimari eĝita-ĝaurito-ĝoi tauna ekiraiato, ekirato, 'Ĝauvei tarimari nokeari, be voiri noviniri, vau beĝe ĝauvei tarimari bono vini-guine, bene iaĝo mo, bakea-guineri tarimari bono vini-raĝasi.

⁹ Benamo mo lavilavi 5 koloko etuĝurito tarimari ĝeiaĝoma-guineto, benamo silva moniri sebori-sebori ĝeĝabito.

¹⁰ Ĝeiaĝo-guineto tarimari ĝeiaĝomato nai, ĝia matoru ĝekirato tu, voiri kotari ma betore-kaurini, senaĝi ĝia maki silva moniri sebori-sebori moĝo ĝeĝabito.

¹¹ Ĝeri moni ĝeĝabito nai, ĝemuĝu-muĝuto tavoĝa biaguna ĝenai, ¹² ĝekirato, 'Mai tarimarima ĝabivau ĝeiaĝomato maiĝeri tu, hora sebonai moĝo beĝe ĝauvei ma voiri, a ĝai tu ĝaro vinubana ĝavekwaragi, ma ĝaro ĝena seĝuka na etunu-rakavamani, nuĝanai voima ĝia ĝeri ĝesi bovini-sebonama.'

¹³ Tavoĝa biaguna na ĝia ta ekiraiato, ekirato, 'Ĝatagu, noseĝaĝi, au na ĝoi asi baĝofamu. Taguruĝa-vegogoto nai, ĝaro sebona voina tu silva monina sebona tatato, nene?

¹⁴ Mai moĝo voimu noĝabia, be noraka! Au aurani mai gabi tarimana bana vinia, ĝoi bavinimu ilailanai.

¹⁵ Be, au ma ĝegu maoro, mai ĝegu moni tu ĝegu ura ilailani bana vini. Ba ĝoi obaruni, korana au tu nuĝagu ma iakuna ĝesi avinini nai?'

¹⁶ Iesu ĝena guruĝa evaĝa-magoato nai ekirato, "Guine tarimari tu beĝe gabini, ma gabi tarimari tu beĝe guineni."

Iesu ĝena mase ma ekiraĝi-foforiato

Mareko 10:32-34; Luka 18:31-33

¹⁷ Iesu Ierusalem dabanana na evaraĝeto-ĝoi nai, ĝia na ĝena mero gabanana ruarua (12) eĝabi-ĝere-vaĝirito, veĝuni ai evaĝa-guruĝarito, ekirato,

¹⁸ "Ĝoseĝaĝi, ĝita tu Ierusalem ĝana tavaragi. Monai Tarimarima Natuna tu Rubu Veaĝa vereri baregori ema taravatu vaĝa-riba-iaĝina tarimari ĝimari ai beĝe toreni. Ĝia na ĝena mase guruĝana beĝe vaĝa-moĝoniani,

¹⁹ benamo irau bese (o Roma) tarimari beĝe vinirini, ĝia na beĝe vaseva-vaseva iaĝiani, beĝe kwariani e beĝe vaĝa-satauroani; senaĝi ĝaro vaĝa-toitoinai vau ma bevaisiraĝe-ĝenoĝoini."

Sina ta ĝena noĝinoĝi

Mareko 10:35-45

²⁰ Benamo Sebedao ĝaraĝona ma natuna ruarua Iakobo (o Iames) ema Ioane ĝesi Iesu ĝenai ĝeiaĝoto, ĝoiranai ea vetui-tarito, dagara ta nenoĝia ĝana.

²¹ Benamo Iesu na vavine edanaĝiato, ekirato, "Ĝoi kara ourani?" Ĝia evaĝa-veseto, ekirato, "Nokira-varagu, au natugu tauri ruarua inigeri, ĝoi ĝesi beĝeneasi tanu, ta aroribamu ai, ma ta kaurimu ai ĝemu Basilea nuĝanai."

²² A Iesu na evaĝa-veserito, ekirato, "Ĝomi tu asi ribami kara ĝonoĝiani. Au na midigu bedina baniuani ĝomi maki boĝo niuni riba?" Ĝia ĝevaĝa-veseto, ĝekirato, "Oi, baĝa niuani."

²³ Iesu na ma ekirarito, ekirato, "Moĝoni, au ĝegu bedi na ĝomi maki boĝo niuni, senaĝi au aroribagu rekenai o kaurigu ai boĝono tanu ĝotoni tu, dia au na bavaĝa-moĝoniani; a mai tu au Tamagu na eĝabi-torerito tarimari ĝeri."

²⁴ Mero gabanana (10) na maiĝa ĝeseĝaĝiato nai, tarikaka ruarua Iakobo (o Iames) ema Ioane ĝebaru-vinirito.

²⁵ Benamo Iesu na mabarari ekea-vegogorito, benamo evaĝa-guruĝarito, ekirato, "Ĝomi ribami, irau bese tarimari ĝeri vere na tarimarima ĝedori-naĝinaĝirini, ema ĝeri veguine-iaĝi tarimari baregori na tu ĝeri maoro seĝukari na ĝelaunaĝi-naĝirini.

²⁶ Senaĝi ĝomi fakami ai moĝesina tu asi boĝono vei. Bema ta ĝomi fakami ai bene barego etoni nai, ĝia tu ĝomi mabarami vetuĝunaĝimi bene iaĝovini,

²⁷ ema dei bene guine etoni tarimana, ĝia tu ĝemi vetuĝunaĝi tarimanai bene iaĝo.

²⁸ Tarimarima Natuna kavana, ĝia eiaĝomato tu, dia tarimarima na ĝia vetuĝunaĝina beĝe iaĝovini ĝana, senaĝina ĝia eiaĝomato tu, tarimarima vetuĝunaĝiri bene iaĝovini, ema ĝena maĝuri bene tore-taria, tarimarima ĝutuma bene voi-ĝenoĝoiri e bene vaĝa-maĝuriri ĝana."

Iesu na mata-bubu tarimari ruarua evaĝa-namorito

Mareko 10:46-52; Luka 18:35-43

²⁹ Iesu ma ĝena mero ĝesi Ieriko ĝeraga-kwaneato, tarimarima ĝutuma-bara ĝia murina na ĝeiaĝoto.

³⁰ Mata-bubu tarimari ruarua dabara rikinai ġetanu-taġoto-ġoi, ġeseġaġito Iesu eraka-vanaġito, benamo ġekea-fouto, ġekirato, “Vereġauka o, Davida natuna, ġai novetuġama!”

³¹ Tarimarima na ġekira-ġoirito, asi beġene guruġa ġetato, senaġi ġia ġekea-ġiġiraġe ġiġiraġeto-ġoi, “Vereġauka, Davida Natuna o, ġai novetuġama!”

³² Iesu eruġa-tarito, benamo ekea-iaġomarito, ekirato, “Kara ġemi naveia ġotoni?”

³³ Ġia na ġekiraiato, ġekirato, “Vereġauka, ġai ġaurani tu, matama noma keo-fakari!”

³⁴ Benamo Iesu na evetuġa-ġwarito, matari eġabi-kararito, ma asikauna matari ġenamoto e ġeboġeboġe-ġinikauto, benamo Iesu murina na ġeiaġoto.

21

Iesu ġena rakatoġa Ierusalemaj ġevonevone-raġe viniato

Ioane 12:12-19

¹ Iesu ma ġena mero ġesi ġeraka-iaġoto-ġoi, Ieruselema ġekavinaġiato-ġoi, ma Betefage ai ġeragasio Olive Ġorona rekenai, benamo Iesu na ġena mero ruarua etuġu-guinerito,

² ekirarito, ekirato, “Ġoiaġo, ġoira vanuġana ġana. Monai doniki ta barutari ma natuna ġesi boġo doġaririni, boġono ruġari, benamo au ġegu ai boġono ġori-iaġomari.

³ Bema tarima ta na bedanaġimini nai, boġono kiraia, ‘Vereġauka na eura-vinirini, vau ma betuġu-iaġomarini, asi bekwaiboni.’”

⁴ Maiġa eġorato ġenana, peroveta tauna ġena guruġatore guruġana evaġa-moġoniani, ekirani,

⁵ “Siona natuna, (Ieruselema tarimari), nokirari,

‘Noġitaia, ġemu Vere

mani eiaġomani,

manau tarimana, doniki tuġunai eraġeni,

mai tu doniki natuna doġenai betanukau.’”

⁶ Mai mero ruarua ġeiaġoto, Iesu na ekirarito veġana ilailanai ġeveiato.

⁷ Ġia na doniki ma natuna ġesi Iesu ġenai ġeġori-iaġorito, ġeri dabuġa barari doniki doġeri ai ġeiaiva-kaurito, benamo Iesu etanu-kauto.

⁸ Tarimarima ġutuma-bara ġeri dabuġa barari dabarai ġeiavarito, kotari tu ġau legari ma lauri ġesi ġebasito, benamo dabarai ġeiaurato.

⁹ Tarimarima ġutuma-bara ġia ġoiranai ġerakato e murinai ġerakato, maiġesina ġevone-raġeto-ġoi, ġekirato,

“Hosana, Davida natuna ġena!

Vereġauka aranai eiaġomani tarimana sivaġa-namoa!

Hosana guba tuġuna vanigerenai!”

¹⁰ Iesu Ieruselemai eraka-toġato nai, vanuġa tarimarimari mabarari ġeveraga veragato-ġoi ema ġevedanaġi-vedanaġito-ġoi, ġekirato, “Mai tu deikara?”

¹¹ Iesu ġesi ġeraka-sebonato tarimari ġevaġa-veseto, ġekirato, “Mai tu Iesu, peroveta tauna, Galilea vanuġana Nasareta na eiaġomani.”

Iesu na Rubu Veaġa eiareveiato

Mareko 11:15-19; Luka 19:45-48; Ioane 2:13-22

¹² Iesu Rubu Veaġa nuġanai eraka-toġato, benamo voivoi tarimari mabarari elai-rosirito. Moni ġesenisito-ġoi tarimari ġeri fata e pune ġevoivoi iaġirito-ġoi tarimari ġeri diġoka eġuke-vebuburito,

¹³ ema ekirarito, ekirato, “Buka Veaġa nuġanai tu maiġesi etoreato, Barau ekirato, ‘Au ġegu numa tu bese iraurau ġeri ġuriġuri numanai beġe kiraġiani,’ senaġi ġomi na tu lema tarimari ġeri gumu gabunai boġo vaġa-iaġoa.’”

¹⁴ Mata-bubu e kwaku rakava tarimari Iesu ġenai ġeiaġomato Rubu Veaġa nuġanai, benamo ġia na evaġa-namorito.

¹⁵ Rubu Veaġa vereri baregori e taravatu ġevevaġa-riba iaġiato-ġoi tarimari na ġena nuġa-farevaġi veġari ġeġitarito, ema mero misiri garori ġeseġaġirito, Rubu Veaġa nuġanai ġevone-raġeto-ġoi, ġekirato, “Hosana, Davida natuna ġena,” benamo ġia tu ġebaru-rakavato,

¹⁶ benamo Iesu ġedanaġiato, ġekirato, “Ġia na ini kara ġekiraġirini ne oseġaġirini ba?” Iesu na evaġa-veserito, ekirato, “Oi aseġaġini, senaġi ġomi na Buka Veaġa nuġanai asi ġoiaviani, ‘Mero misiri ema sinari ratari roġo ġeniurini merori na maki ġoi ġevaġa-raġemuni!’?”

¹⁷ Benamo Iesu na eraga-kwanerito, vanuġa barana na eraka-rosito, Betania ġana eiaġoto, monai ea ġenato.

*Iesu na figi ġauna etovoġaiato
Mareko 11:12-14; 11:20-24*

¹⁸ Boġiboġi, Iesu vanuġa barana ġana ma eġenoġoito, eraka-iaġoto-ġoi nuġanai, ġia evitoato.

¹⁹ Ġia na figi ġauna ta dabara rikinai eġitaiato, benamo eiaġo-viniato, senaġi asi ġwaġwana, a launa korina moġo. Benamo Iesu na figi ġauna ekiraiato, ekirato, "Goi ġemuna ġwaġwamu asi ma befori-ġenoġoini!" Asikauna moġo figi ġauna emarai-ġosito.

²⁰ Gena mero na figi ġauna emarai-ġosito ġeġitaiato nai, ġeġaba-rakavato, ġekirato, "Figi ġauna tu kamasi se beraga-mase moġo?"

²¹ Iesu evaġa-veseto, ekirato, "Moġoni akiramini, bema ġomi boġo veġabidadamani, ma asi boġo daradarani nai, ġomi na maki mai figi ġauna ġenai baveia kavana boġo veiani riba; a dia moġa moġo, senaġi mai ġoro boġo kiraiani, 'Noveġabivaisi, be davarai noa vefiu-rei,' benamo mo veġa tu beġorani.

²² Dagara mabarari ġauġau ai boġo kiraġirini ma veġabidadamami ġesi nai tu, boġo doġaririni."

*Iesu gena seġuka korana ġevedanaġi-iaġiatio
Mareko 11:27-33; Luka 20:1-8*

²³ Iesu Rubu Veaġa nuġanai eraka-toġato, evevaġa-ribato-ġoi nai, Rubu Veaġa vereri baregori ema Iuda vereri ġia ġenai ġeiaġomato, benamo ġedananaġiatio, ġekirato, "Kamara seġukai ġoi na mai veġa oveirini? Dei na maoro evinimuto?"

²⁴ Iesu na evaġa-veserito, ekirato, "Au na maki vedanaġi sebona avinimini; bema boġo vaġa-veseani nai, au na kamara maoro ai mai veġa aveirini bakira-varamini.

²⁵ Ioane ġena babatiso veġana tu ainana eiaġomato? Guba na eiaġomato, ba tarimarima ġerina?" Ġia fakari ai ġeverorito, ġekirato, "Bema ġita bita kirani, 'Barau ġenana' bita toni nai, ġia bekirani 'Karase nai Ioane asi ġovaġa-moġoniato?' betoni.

²⁶ Senaġi bema ġita bita kirani, 'Tarimarima ġerina' bita toni nai, tarimarima gariri bitana vei, korana ġia ribari, Ioane tu peroveta tarimana korikori."

²⁷ Moġa lorinai ġia na Iesu ġevaġa-veseato, ġekirato, "Ġai asi ribama." Benamo Iesu na ġia ekirarito, "Au na maki kamara maoro ai mai veġa aveirini tu, asi bakira-varamini."

Barabore - Mero ruarua

²⁸ "Mai barabore tu kamasi ġotuġa-maġiani? Tarima ta ma natuna ruarua. Tau-ġuinena ġenai eiaġoto, ekiraiato, ekirato, 'Natugu, toma noiaġo, vine tavoġana noa ġauvei!'

²⁹ Natuna na evaġa-veseato, ekirato, 'Asi aurani,' senaġina gabivau evetuġa-maġi-kureto, benamo eiaġoto.

³⁰ Ġia ma eiaġoto natuna vaġa-ruaruana ġenai, tau-ġuinena evaġa-guruġaiato ilailanai ekiraiato. Mero evaġa-veseto, ekirato, 'Aiāġoni,' senaġi asi eiaġoto.

³¹ Ġia tauri ruarua vekaravari ai dei na tu tamari ġena ura eveiato?" Ġia ġevaġa-veseto, ġekirato, "Tau-ġuinena." Iesu na ekirarito, "Moġoni veġata akiramini, takesi gogo tarimari e mata-boraġa vavineri na ġeguine-iaġimimi Barau ġena Basileia rakatoġana.

³² Ioane Babatiso ġomi ġemi ai eiaġomato tu, vei-iobuka-iobuka dabarana ġemi ai evaġa-foforiato, senaġi asi ġoseġaġi-viniato. A takesi gogo tarimari e mata-boraġa vavineri na ġevaġa-moġoniato. Ġomi na maki ġoġitarito, senaġi asi ġovetuġamaġi-kureto, asi ġovaġa-moġoniato."

*Barabore - Tavoġa narinarina tarimari rakavari
Mareko 12:1-12; Luka 20:9-19*

³³ Iesu ekirato, "Barabore ta ma ġoseġaġia: Tano biaguna ta na vine tavoġana evaroato, maġuna eġabiato, tano ai vine gigi-gigina gurina ekwaiato, tavoġa narinarina numana maki evaġa-ruġaiato. Moġa murinai tavoġa ġitaġauna tarimari ġeri ai ġena tavoġa eraga-kwaneato, benamo erakato gabu ta ġana.

³⁴ Vine ġwari (o grapes) ġemaġeto, benamo ġia na ġena vetuġunaġi tauri etuġurito tavoġa narinarina tarimari ġeri ai, ġena vine ġwaġwari kota beġenea ġabi ġana.

³⁵ Senaġi tavoġa ġitaġauna tarimari na vetuġunaġi tauri ġeġabi-taririto, benamo ta ġekwariato, ma ta ġevaġiatio, ema ta fore na ġetakiato.

³⁶ Tavoġa biaguna na ġena vetuġunaġi tauri vovoka kotari ma etuġurito, senaġi moġesina ma ġevei-vinirito.

³⁷ Dokonai ġia na natuna korikori ġeri ai etuġu-iaġoato, ekirato, 'Natugu na-tuġua, ġia na beġene gubakaua.'

³⁸ Senaġi tavoġa ġitaġauna tarimari natuna ġeġitaiato nai, tauġeri ġeveguruġa-vevinito, ġekirato, 'Mani tu tavoġa beġaunaiani merona, be siġabia, sivaġi-masea, be ġena tavoġa bitana ġaunaia!'

³⁹ Benamo ġeġabi-tariato, vine tavoġana murikanai ġeinu-iaġoato, ġevaġi-maseato.”

⁴⁰ Iesu evedanaġito, ekirato, “Tavoġa biaguna beiaġomani nai, mo tavoġa ġitaġauna tarimari kamasi beveirini?”

⁴¹ Ġia ġevaġa-veseto, ġekirato, “Mo veiġa rakava tarimari ġia na bevaġirini veġata, ma vine tavoġana tu narinarina tarima boruri tari ma bevinirini, benamo ġeri ġwaġwa negari ai, ġwaġwari ġia ġenai beġene ġwa-iaġori.”

⁴² Iesu na ma ekirarito, ekirato, “Ġomi na mai toretore Buka Veaġai asi ġoiaviani, inġesi ekirani,

‘Fore numari ġeragarini tarimari na asi ġeura-viniato ma ġeftoġaiato forena tu duġu forenai eiaġoto. Mai veiġa maiġa tu Vereġauka na eveiato, matara na taġitaiani, ġitaġitana irau veġata.’

⁴³ Moġesi naima akiramini, Barau ġena Basileia tu ġemina beġabi-vaġiani, ema ġwaġwa evaġa-ġorani besena beviniani. [⁴⁴ Deikara mo fore iatanai beketokauni tarimana tu, beġwa-kirakiraiani; ema mai fore tarima ta iatanai beketokauni nai, bevare-fatafataiani.]”

⁴⁵ Rubu Veaġa vereri baregori e Farisea tarimari na Iesu ġena barabore ġeseġaġirito nai, ġeribato, Iesu na tu ġia ekiraġirini,

⁴⁶ naima ġia ġeri ura tu beġene ġabi-taria. Senaġi tarimarima ġutuma ġevegogo taġoto-ġoi gariri ġeveito, korana ġia na ġetuġamaġiato-ġoi, Iesu tu peroveta tauna ta.

22

Barabore - Veġaraġo verekona

¹ Iesu na Iuda vereri ġeri barabore ta ma ekiraġiato:

² “Guba Basileia tu noġa moġo vere ta, natuna ġena veġaraġo verekona evei-toreato kavana.

³ Benamo ġena vetuġunaġi tarimari etuġurito, ekea-kaurito tarimari keakeari, senaġi asi ġeurato nai, asi ġeiaġomato.

⁴ Moġa lorinai ġia na vetuġunaġi tarimari tari ma etuġurito, ekirarito, ‘Akea-kaurito tarimari ġoa kirari, “Au ġegu vereko tu badabara-ġosia, ġegu boromakau tauri ema boromakau naturi mona mase tu bavaġiri, dagara mabarari havei-toreri, be ġoiġoma vereko ġana.”’

⁵ Senaġi ġia tu ġeġoiġito, ġeri ura ġauveiri moġo ġeveito. Ta vamoka ġana eiaġoto, ma ta tu ġena sitoa ġana eiaġoto.

⁶ O tari tu vetuġunaġi tarimari ġeġabi-taririto, ġekwaririto, ema ġevaġi-maserito.

⁷ Vere tu ebaru-rakavato, ġena vetari doġorori etuġurito, mo vaġivaġi tarimari ġevaġi-maserito, ma ġeri vanuġa barana ġeġabu-kauato.

⁸ Benamo ġia na ġena vetuġunaġi tarimari evaġa-guruġarito, ekirato, ‘Au ġegu veġaraġo verekona tu havei-torea, senaġi au na akea-kaurito tarimari tu asi ilaila beġe iaġomani.

⁹ Moġa lorinai mai moġo ġoiġo, ġatama baregori rakaġutu dabarari ai boġo doġaririni tarimari mabarari boġono kirari, beġene iaġoma vereko ġana.’

¹⁰ Benamo vetuġunaġi tarimari ġeiaġoto, ġatamai ema dabarai ġedoġaririto tarimari mabarari, namori, rakavari, ġegogo-iaġorito, veġaraġo numana maki ġevaġa-vonuato.

¹¹ Benamo vere eraka-toġato, ġeiaġomato tarimari ġitaġitari nuġanai, ġia na tarima ta monai egitaiato, asi ġena veġaraġo dabugana.

¹² Benamo edanaġiato, ekirato, ‘Gata, ġoi tu ainana boraka-toġa, asi ġemu veġaraġo dabugana?’ Senaġi mo tarima asi egurugato.

¹³ Benamo vere na ġena vetuġunaġi tarimari evaġa-guruġarito, ekirato, ‘Ġimana ema kwakuna ġobarubaruri, benamo ġofiu-rosia murika mukunanai. Monai bene taġi, gadikana maki bene vaġa-ġaratariri.’

¹⁴ Korana tarima ġutuma Barau na ekearito, senaġi viravira moġo eġabi-torerito maġuri beġe ġabiani.”

Kaisara, Roma ġeri vere, ġena takesi moniri

Mareko 12:13-17; Luka 20:20-26

¹⁵ Farisea tarimari ġeraka-veġitato, ġeboioġa-vegogoto, Iesu beġene vaġa-vedaġa-raġea vedanaġiri ġea veito.

¹⁶ Benamo ġia na ġeri mero tari ema Heroda murinai ġerakato-ġoi tarimari tari ġetuġu-iaġorito, ġekirato, “Vevaġa-riba tarimamu, ġai ribama ġoi tu moġoni vei-iobukaiohubuka

tarimamu. Ĝoi na moĝoni ai Barau ĝena dabara ovevaĝa-riba iaĝi-ĝitakuani. Tarimarima gariri asi oveini, tarima ĝeri dagi maki asi otuĝamaĝirini.

¹⁷ Moĝa lorinai nokira-varama, kamasi otuĝa-maĝini: Kaisara, Roma ĝeri vere, ĝenai takesi baĝana vini ba asiĝi?"

¹⁸ Senaĝi Iesu ma ribana ĝeri boioĝa rakavari nai, ekirarito, "Ĝomi ĝofaĝofa tarimami! Karase nai au ĝoribaĝaniguni?"

¹⁹ Takesi monina ta ĝovinigu, nama ĝitaia!" Benamo silva monina ta ĝeviniato.

²⁰ Benamo ĝia na edanaĝirito, ekirato, "Mai tu dei laulauna ema dei arana?"

²¹ Ĝia ĝevaĝa-veseto, "Kaisara ĝena." Iesu na evaĝa-guruĝarito, ekirato, "Be, Kaisara ĝena dagara Kaisara boĝono vinia, Barau ĝena dagara Barau boĝono vinia."

²² Mo guruĝa ĝeseĝaĝiato nai, ĝeĝaba-rakavato, benamo ĝeraga-kwaneato, ĝerakato.

Variĝisi-ĝenoĝoi guruĝari

Mareko 12:18-27; Luka 20:27-40

²³ Mo ĝaro sebonai Sadukea tarimari kota Iesu ĝenai ĝeiaĝoto. Ĝia ĝeri tuĝamaĝi tu mase tarimari asi ma beĝe variĝisi-ĝenoĝoini. Benamo Iesu ĝedanĝiato, ĝekirato,

²⁴ "Vevaĝa-riba tarimamu, Mose maĝesi ekirato, 'Bema tau ta asi natuna bemaseni nai, ivana vabuna kakana o tarina ta na bene ĝaraĝoa, naturi beĝene maĝuri mase tauna ĝena.'

²⁵ Mero mabarari tu imaima ruarua (7) mainai ĝetanuto-ĝoi. Mero guinena na eĝaraĝoato, ma emaseto asi natuna, benamo tarina na ma eĝaraĝoato.

²⁶ Mo veĝa sebona tarina vaĝa-ruaruana ĝenai eĝorato, mero vaĝa-toitoina maki moĝesina moĝo mo vaĝa-imaima ruaruana (7).

²⁷ Dokonai mo vavine maki emaseto.

²⁸ Variĝisi-ĝenoĝoi ĝaronai mo vavine tu dei ĝaraĝona? Korana ĝia tu tauri 7 na ĝeĝaraĝoato."

²⁹ Iesu na evaĝa-veserito, ekirato, "Ĝomi tu ĝokerereni, korana Buka Veaĝa anina ema Barau ĝena seĝuka asi ribami.

³⁰ Mase na ma beĝe variĝisi-ĝenoĝoini tarimari tu asi ma beĝe veĝaraĝoni. Ĝia tu aneru kavana gubai.

³¹ A mase na ma beĝe variĝisi-ĝenoĝoini guruĝari Barau ĝena bukai asi ĝoiaviani? Ĝia ekirato,

³² 'Au tu Aberahamo ĝena Barau, Isako ĝena Barau, ema Iakobo ĝena Barau.' Ĝia tu maĝuri tarimari ĝeri Barau, dia mase tarimari ĝeri Barau!"

³³ Tarimarima ĝutuma na mo guruĝa ĝeseĝaĝiato nai, nuĝari ĝefarevaĝito ĝena vevaĝa-riba guruĝari na.

Veuravini tu taravatu mabarari evanaĝirito

Mareko 12:28-31; Luka 10:25-28

³⁴ Farisea tarimari ĝeseĝaĝito, Iesu na Sadukea tarimari ĝeri guruĝa ekou-ĝaurito, benamo ĝeraka-vegogoto.

³⁵ Ĝia fakari ai ta tu taravatu vaĝa-riba-iaĝina tarimana. Ĝia na Iesu edanaĝi-veribaĝaniato, ekirato,

³⁶ "Vevaĝa-riba tarimamu, taravatu nuĝanai kamara taravatu tu barego vedaurea?"

³⁷ Iesu na evaĝa-veseato, ekirato, "Vereĝauka ĝoi ĝemu Barau bono ura-vinia ma nuĝamu mabarana, ma iaukamu mabarana, ma ĝemu tuĝamaĝi mabarana ĝesi.'

³⁸ Maĝa tu taravatu giniguinena ema barego vedaureana.

³⁹ Taravatu barego ĝedaureari vaĝa-ruaruana ĝia ilailana tu maĝa: 'Sevimu tarimana bono ura-vinia, ĝoi tauĝemu oveura-vinini kavana!'

⁴⁰ Maĝeri taravatu ruarua na taravatu mabarari ema peroveta tarimari ĝeri guruĝa mabarari eĝabi-vegogorini."

Keriso tu Davida natuna ba Barau Natuna?

Mareko 12:35-37; Luka 20:41-44

⁴¹ Farisea tarimari ĝevegogoto-ĝoi nai, Iesu na edanaĝirito, ekirato,

⁴² "Ĝomi na Keriso tu aiĝesi ĝotuĝa-maĝiani? Ĝia tu deikara natuna ĝotoni?" Ĝia ĝevaĝa-veseto, ĝekirato, "Ĝia tu Davida natuna."

⁴³ Iesu na ma edanaĝirito, ekirato, "Davida tu kamasi nai Keriso tu 'Vereĝauka' etoni? Korana Davida lauka Veaĝa na tuĝamaĝi-faka e riba eviniato, benamo ekirato,

⁴⁴ 'Barau na au ĝegu Vereĝauka ekiraiato:

Au ĝimagu aroribana rekenai

noma tanu,

bene iaĝo mo, ĝoi ĝebaru-vinimuni tarimari ĝoi kwakumu gaburenai batorerini.'

⁴⁵ Bema Davida na Keriso tu 'Veregāukana' ekiraḡito, kamasi nai Keriso tu Davida natuna?"

⁴⁶ Ġia mabarari ta na maki asi evaḡa-veseato, ema mo nega na eiaḡoto mo, tarima ta na maki asi ma edanaḡiato, korana ḡegarito nai.

23

Iesu na taravatu vaḡa-riba-iaḡina tarimari ema Farisea tarimari evanerito Mareko 12:38-39; Luka 11:43; 11:46; 20:45-46

¹ Iesu na tarimarima ḡutuma-bara e ḡena mero evaḡa-guruḡarito, ekirato,

² "Taravatu vaḡa-riba-iaḡina tarimari e Farisea tarimari na Mose ḡena taravatu ḡevevaḡa-riba iaḡirini.

³ Moḡa lorinai ḡomi ḡevaḡa-ribamini guruḡari mabarari boḡono korana-iaḡiri e boḡono veiri. A ḡeri veiḡa asi boḡono tovotovori, korana kara ḡegobata-iaḡirini, tarimarima na beḡene veiri veigari tu, tauḡeri na asi ḡekorana-iaḡirini.

⁴ Ġia na maruna metori tarimarima ḡevaḡa-faḡarini, senaḡina ḡimari didiri na ta maki ḡeri marunai asi ḡeveḡabikauni, asi ḡevaḡa-kavarini, maruna beḡene ḡwari ḡana.

⁵ Ġeri veiḡa mabarari ḡeveirini tu, tarimarima na beḡene ḡitari ḡana. Ġia bakuri e ḡimari ai tu dagara veaḡari ḡebarubarurini, nuḡari ai Buka Veaḡa siriri ḡeḡurarini, moḡeri dagara ḡevaḡa-baregorini, ema ḡeri dabuḡa geveri maki ḡevaḡa-maukarini.

⁶ Ḡanivegogo gaburi ai e rubu nuḡari ai ḡeri ura tanutanu namori ai beḡene tanu.

⁷ Ġia ḡeurani maketi gaburi ai beḡene rakaorakao, tarimarima na beḡene vaḡa-namori urari ai, ema tarimarima na 'Vevaḡa-riba Tarimari' beḡene kiraḡiri.

⁸ A ḡomi tu 'Vevaḡa-riba Tarimami' ai asi beḡene kiraḡimi, korana Barau ḡereḡana moḡo ḡemi Vevaḡa-riba Tauna, ema ḡomi mabarami tu tarikaka.

⁹ Ema tanobarai tarima ta 'Tama' asi boḡono kiraḡia, korana ḡomi Tamami tu sebona moḡo, ḡia tu gubai etanuni.

¹⁰ Gomi maki 'Veḡori-kau Tarimami' asi beḡene kiraḡimi, korana ḡemi Veḡorikau Tauna tu sebona moḡo, Keriso, (Barau na ekiraḡi-toreato vevaḡa-maḡuri tauna).

¹¹ Deikara barego vedaurea ḡomi fakami ai, ḡia tu ḡomi vetuḡunaḡimi beiaḡo-vinini.

¹² Tauḡena eveḡabi-vaisini tarimana tu Barau na bevaḡa-manauani, a tauḡena evevaḡa-manauani tarimana tu beḡabi-vaisiani."

Iesu na Farisea tarimari e taravatu vaḡa-riba-iaḡina tarimari ḡeri ḡofaḡofa ekiraḡirito Mareko 12:40; Luka 11:39-52; 20:47

¹³ "Taravatu vaḡa-riba-iaḡina tarimami e Farisea tarimami, ḡofaḡofa tarimami, vetuḡami kika! Korana Guba Basileia ḡatama bokana tu tarimarima ḡoirari ai ḡokou-ḡauani. Gomi tauḡemi asi bogo raka-togani, ema ḡeraka-toga ḡetoni tarimari ḡeri dabara maki gomi na ḡokourini. [¹⁴ Taravatu ḡovevaḡa-riba iaḡiani tarimami e Farisea tarimami, ḡofaḡofa tarimami, vetuḡami kika! Gomi na vabu ḡeri numa e ḡeri farefare ḡovaḡa-koririni. Gemi ḡauḡau tu mauka kenene, ḡoḡofaḡofani. Moḡesi nai ḡomi tu meto barego vedaurea boḡo gabiani.]

¹⁵ Taravatu vaḡa-riba-iaḡina tarimami e Farisea tarimami, ḡofa-ḡofa tarimami! Gomi gabu mabarari ḡana goiaḡoni, davarai e tanobarai, tarima sebona kwarigutu ḡemi doḡoro ai bene raka-toḡa uranai. Ḡoḡabiani, benamo karava eḡara-vanaḡi vanaḡini gabuna natunai ḡovaḡa-iaḡoani, ḡemi kira-sirivaḡi e seḡafore maki bevanagi-lelevaḡirini.

¹⁶ Veḡorikau taumi, matami bubuḡau, vetuḡami kika! Gemi vevaḡa-ribai ḡokirani, Rubu Veaḡa aranai bekiraḡi-toreni tarimana ḡena kiraḡitore tu asi anina ḡotoni, a Rubu Veaḡa ḡolona (o gold-na) aranai bekiraḡi-toreni tauna tu, ḡena kiraḡitore roḡo bekorana-iaḡiani.

¹⁷ Babo e mata-bubu tarimami! Aiḡa tu barego, golo ba golo evaḡa-veaḡaiani Rubu Veaḡana?

¹⁸ Ma ḡokirani, fata veaḡana aranai bekiraḡi-toreni tarimana ḡena kiraḡitore tu asi anina, e varevare dagarana fata vevaḡa iatanai ḡetoreato dagarana aranai bekiraḡi-toreni tarimana tu ḡena kiraḡitore roḡo bekorana-iaḡiani.

¹⁹ Mata-bubu taumi. Aiḡa tu barego, varevare dagarana ba varevare dagarana evaḡa-veaḡaiani fata veaḡana?

²⁰ Moḡa lorinai fata veaḡa aranai ekiraḡi-toreni tarimana na fata veaḡa e fata veaḡa iatanai ḡetorerito dagarari mabarari arari ai ekiraḡi-toreni.

²¹ Ema Rubu Veaḡa aranai ekiraḡi-toreni tarimana na Rubu Veaḡa ema nuḡanai etanuni Barauna arari ai ekiraḡi-toreni.

²² Ema guba aranai ekiraḡi-toreni tarimana na Barau ḡena terona e iatanai etanuni Barauna arari ai ekiraḡi-toreni.

²³ Taravatu vaġa-riba-iaġina tarimami e Farisea tarimami, ġofaġofa tarimami, vetuġami kika! Korana ġomi na Barau ġovarevare-viniani dagarari, ġemi ġaniġani ġailauri mis-imisiri maki, karava gabanana (10) ġoveirini, karava sebona boubou dagaranai ġovaġa-iaġoni, senaġina taravatu ġena dagara baregori, vei-iobukaiobuka, vevetuġaġwa ema vetuġamaġikau tu ġolearini. Gomi na tu maiġeri veiġa baregori ġoro veiri ema mo veiġa keiri maki asi boġoro iaġuiri.

²⁴ Veġorikau tarimami, matami bubu! Ġami nanu na nagama ġovei-vaġiani, senaġina kamela tu ġolaubogherini.

²⁵ Taravatu vaġa-riba-iaġina tarimami e Farisea tarimami, ġofaġofa tarimami, vetuġamai kika! Gomi ġemi kapusi e mereki muriri moġo ġoġurigirini, senaġi nuġari tu lema e mata-ġaniġani ġoveini dagarari na beġe vonuvonu-raġe.

²⁶ Farisea tarimami, matami bubu! Kapusi e mereki nuġari ai ġotorerini dagarari boġono iareva-ġuineri, benamo murina rekena maki bene veiareva.

²⁷ Taravatu vaġa-riba-iaġina tarimami e Farisea tarimami, ġofaġofa tarimami, vetuġami kika! Gomi tu gara gaburi ġefeni-kuro-kurorito kavana, murikari ġitaġitari tu namo vedaurea, senaġina nuġari tu mase tarimari turigari ema miro mabarari na ġevonuto.

²⁸ Gomi maki moġesina, tarimarima na ġeġitamini veiġa iobukaiobuka tarimari noġa, senaġina nuġami tu ġofaġofa e vei-rakava na ġevonuvonu-raġeto.”

Iesu na taravatu vaġa-riba-iaġina tarimari e Farisea tarimari ġeri kerere voiri eki-raġirito

²⁹ “Taravatu vaġa-riba-iaġina tarimami e Farisea tarimami, ġofaġofa tarimami, vetuġami kika! Gomi na peroveta tarimari ġeri gara gaburi ġovei-ġinikaurini, tuġamaġi-iaġina foreri ġovaġa-ruġarini, ema vei-iobukaiobuka tarimari ġeri gara gaburi ġovaġa-vera verarini.

³⁰ Ġokirani, “Tubuma ġatama ġeri negai ġara maġuri nai, peroveta tarimari vaġivaġiri ai asi ġara vaġa-kavari.”

³¹ Moġesi ġokirani nai, tauġemi ġovekiragini, ġomi tu peroveta ġevaġirito tarimari naturi.

³² Oba, ġomi maki tubumi ġatami ġeveyto-ġoi kavana ma ġovei-iaġoni, ġeri rakava ġomi na ġovaġa-ġuġururini.

³³ Gomi mota! Mota naturi! Barau ġena Kota baregona ġarona beraġasini nai, karava eġara-vanaġi vanaġini gabuna na kamasi boġo raga-maġurini?

³⁴ Moġa lorinai akiramini, au na peroveta tarimari e iaunega tarimari ema vevaġa-riba tarimari batuġu-iaġorini. Benamo kota tu boġo vaġi-maserini, aba, boġo vaġa-sataurorini; ma kotari tu rubu nuġari ai boġo kwaririni, rarari maki beġe riġoni, ema vanuġa ta na boġo lairini ma vanuġa ta.

³⁵ Moġesina nai vei-iobukaiobuka tarimari ġevaġirito metori tu ġomi iatami ai, Abela ġevaġi-maseato, monana eiaġomato mo Sakaria, Barakia natuna, ġia tu fata veaġana ema numa veaġana fakari ai ġovaġi-maseato.

³⁶ Akira-korikorimini, mabarari metori tu toma ġuru tarimami iatami ai beġe ketokauni.”

Iesu Ierusalemata ġaġina eveito

Luka 13:34-35; 19:41-44

³⁷ “Ierusalemata, Ierusalemata o, ġoi na peroveta tarimari ovaġirini ema Barau na etuġu-iaġosirini tarimari fore na otaki-maserini. Nega ġutuma aurato, natumi bana gana-ġeġeraġiri, kokoroku vavinena na natuna egoru-taririni kavana, senaġi ġomi tu asi ġourato!

³⁸ Moġa lorinai ġemi vanuġa ema Rubu Veaġa tu korina betanuni.

³⁹ Korana au na akiramini, ġomi roġo au asi boġo ġitaġuni, beiaġoni mo, ġaro ta beraġasini, monai vau boġo kirani, ‘Barau aranai eiaġomani tauna sivaġa-namoa.’”

24

Iesu na vau beġea ġorani dagarari ekiraġirito

¹ Iesu Rubu Veaġa na eraka-rosito, eraka-veġitato nuġanai, ġena mero ġia ġenai ġeiaġoto, ġeri ura Rubu Veaġa numari baregori beġene vaġa-ġitaia.

² Senaġi Iesu na evaġa-guruġarito, ekirato, “Mai dagara mabarari ġoġitarini? Au na moġoni akiramini: Mai fore ta fore ta iatanai asi beġe tanuni, mabarari beġe vare-bubu riġorini.”

³ Iesu Olive Ġoronai etanu-taġoto-ġoi, benamo ġena mero ġia ġenai ġeiaġoto, ġedanaġi-ġairiato, ġekirato, “Nokira-varama, mai dagara tu aitoma beġe ġorani? E ġoi boġenoġoi-iaġomani ema tanobara dokona beġabiani maki kamara vetoġa na bevaġa-foforiani?”

⁴ Iesu evaġa-veseto, ekirato, “Ġomi lorimi boġono vetore, tarima ta na asi bene ġofami.

⁵ Korana tarima ġutuma au aragu ai beġe iaġomani, beġe kirani, ‘Keriso tu au maiġegu!’ Tarima vovoka beġe ġofarini.

⁶ Ġomi na vetari gururi e tuari variri boġo seġaġirini nai, nuġami asi beġene raġe. Maniġeri dagara tu beġe ġorani, senaġi dokona tu asi roġo.

⁷ Tanobara ta tanobara ta ġesi beġe vevaġini, gavamani ta gavamani ta ġesi beġe vetarini. Gabu ġutuma nuġari ai doġe beġe ġorani, tano maki beġe iagani.

⁸ Mai tu midigu moġo besinaiani, noġa moġo mero keina emaġurini midiguna kavana.

⁹ Mo negai beġe ġabi-tarimini, beġe vaġa-midigu midigumini, beġe vaġi-masemini. Bese mabarari na beġe baru-vinimini, korana au ġovaġa-moġoniguni dainai.

¹⁰ Benamo tarima ġutuma ġeri veġabidadama beġe raga-kwanerini, tata beġe verevani e beġe vebaru-vevinini.

¹¹ Peroveta ġofaġofa tarimari beġe variġisini, tarima ġutuma beġe ġofarini.

¹² Vei-rakava maki beġora-rovorovoni, benamo ġutuma ġeri veuravini maki beġe farakani.

¹³ Senaġina deikara bevevaġa-gwaġiġini mo magona tu bemaġurini.

¹⁴ Barau ġena Basileia Varina Namona tu tanobara mabararai beġe ġobata-iaġiani, bese mabarari na beġene seġaġia ġana, moġa murinai vau magona beraġasini.”

Vevaġa-gari dagarana beforini

Mareko 13:14-23; Luka 21:20-24

¹⁵ “Ġomi na dagara rakava vedaureana, vevaġa-gari dagarana, peroveta tarimana Daniela na ekiraġiato dagarana, boġo ġitaiani gabu veaġanai beruġani.” Mai guruġa beaviyani tarimana bene riba maoro anina tu kara.

¹⁶ “Benamo deidei Iudeai ġetanuni tarimari ġoro ġana beġene raga-iaġo.

¹⁷ Deikara numa tuġunai etanu-taġoni tu, asi ma bene raka-toġa numa nuġana ġana ġena farefare ġabiġabiri.

¹⁸ Deikara vamoka nuġanai maki asi ma bene ġenoġoi ġena koudi ġabiġabina.

¹⁹ Mo negai vavine ma baniri e ġabi-variġu vavineri kika ma vetuġari!

²⁰ Boġono ġauġau Barau ġenai, be ġura e nagure negari ai o Sabadi ai asi boġono raga-kwareġa!

²¹ Korana mo negai midigumidigu tu asi keikeiri beġe ġorani, Barau na tanobara eveiato beiaġoma maitoma, midigu moġesina asi ġeġorani. Ma maiġa murinai moġesina kavana ta asi ma beġora-ġenoġoini.

²² Bema Barau na mo ġaro rakavari asi bere vaġa-kubiri, tarimarima ta asi bere maġuri riba, senaġi eġabi-hidirito tarimari dairi ai, ġia na ġarori bevaġa-kubirini.

²³ Mo negai, bema tarima ta na bekiramini, ‘Goġitaia, Keriso tu maiġa!’ o ‘Ġia tu iomoġa!’ betoni nai, asi boġono vaġa-moġonia.

²⁴ Korana tu Keriso ġofaġofari e peroveta tarimari ġofaġofari beġe foforini, vetoġa boruri e nuġa-farevaġi veġari baregori beġe veirini, Barau na eġabi-viriġirito tarimari beġene ġofa-veġonuri ġana.

²⁵ Boġono tuġamaġi-taġoa, maiġeri dagara tu akiravara-guinemini, hora roġosi bene raġasi nai.

²⁶ Bema tarima ta na bekiramini, ‘Goġitaia, ġia tu tano fakanai moġa,’ moġana asi boġono iaġo; o bekirani, ‘Goġitaia, ġia tu mo numa nuġanai etanuni,’ asi boġono vaġa-moġonia.

²⁷ Korana Tarimarima Natuna beiaġomani tu fofori-taġo, noġa moġo kiriku ekimoreani gubai ġaro raġeraġena na mo ġaro riġoriġona kavana;

²⁸ ma mase tauġanina etanuni gabunai gaio maki monai beġe vegogoni, (be ġia na beġe vaġa-foforiani).”

Tarimarima Natuna ġena iaġoma

Mareko 13:24-27; Luka 21:25-28

²⁹ “Mo rakava beġe ġorani murinai, ġaro bemukunani e ġue maki asi bemamani, visiġu guba na beġe ketoni e guba seġukari beġe iaġaiagani.

³⁰ Benamo Tarimarima Natuna vetoġana gubai beforini. Mo ġaro ai tanobara beseri mabarari beġe taġi-vanoro vanoroni, korana Tarimarima Natuna beġe ġitaiani, magube iatana na beiaġomani ma seġuka barana e ma marevana ġesi.

³¹ Benamo ġia na ġena aneru betuġurini ma kibi gururi baregori ġesi, eġabi-viriġirito tarimari beġe vaġa-vegogorini tanobara mabarari na.”

Barabore - Vevaġa-riba figi ġauna ġenana

Mareko 13:28-31; Luka 21:29-33

³² “Figi ġauna ġenana mai barabore boġono ribaia: Kabona ġefori-raġeni e launa ġefafani nai, ġoribani, ġaro ġena tora taimina tu bekavinagi gotoni.

³³ Moġa ilailanai, ġomi maki bema mai dagara mabarari beġe ġorani boġo ġitarini nai, boġono riba, Tarimarima Natuna tu bekavinagi ġatama bokai.

³⁴ Moġoni akiramini, mai ġuru asi bekorini, beiaġoni mo, mai dagara mabarari beġe ġorani.

³⁵ Guba e tanobara beġe rekwa-rekwani, senagi au ġegu guruġa tu asi beġe rekwa-rekwani, beġe tanu-vanagi vanagini.”

Ġaro e hora tarima ta asi ribana

Mareko 13:32-37; Luka 17:26-30; 17:34-36

³⁶ “Senagi mo ġaro e hora tu tarima ta asi ribana, aneru gubai asi ribari e Natuna maki asi ribana, senagi Tamana ġereġana moġo ma ribana.

³⁷ Tarimarima Natuna ġena iaġoma tu noġa moġo Noa ġena negai kara ġeġorato kavana.

³⁸ Ġutuġutu roġosi bere raga nai, tarimarima tu ġeveini kavana ġeġaniġanito-ġoi, ġeniuniuto-ġoi, ema tau e vavine ġeveġaraġoto-ġoi, eiaġomato mo, Noa ġena lagato ai eraka-toġato ġaronai.

³⁹ Senagi matari asi ġekanito, asi ġeribato kara beġorani mo, ġutuġutu eraġasito, benamo mabarari eġutu-masemaserito. Tarimarima Natuna beiaġomani maki moġesina beġorani.

⁴⁰ Mo ġaro ai tau ruarua vamokai beġe ġauveini, ta tu Barau na beġabi-vaġiani, a ta tu betanuni.

⁴¹ Vavine ruarua widi giro dagnarana beġe giro-vegogoani, ta tu beġabi-vaġiani, a ta tu betanuni.

⁴² Moġesi nai tataġa-taġo boġono tanu, korana ġomi asi ribami ġemi Vereġauka tu aitoma beiaġomani.

⁴³ Boġono riba-maoro: Bema numa tarimana ma ribana kamara aoanai lema tarimana beiaġomani nai, ġia tu tataġa-taġo betanuni, benamo lema tauna na numa asi bedareani.

⁴⁴ Moġa lorinai ġomi maki boġono verovina-tore, korana Tarimarima Natuna aitoma beraġasini aoanai ġomi asi boġo ribani.”

Vetuġunaġi tarimana namona

Luka 12:42-46

⁴⁵ “Deikara tu mo farefare nari tarimari na guruġa eseġaġini ema veiġa roroġotori eveini, ġena vere na eġabi-hidiato numa ema vetuġunaġi tarimari bene ġita-ġauri, ema ġani-ġani maki nega korikori ai bene viniri?

⁴⁶ Mo vetuġunaġi tarimana, ġena vere na ekiraiato ilailanai eġauveini, bema-ġoitaġoani tu namo.

⁴⁷ Moġoni akiramini, ġia tu ġena vere ġena farefare mabarari ġitaġauri tarimanai betoreani.

⁴⁸ Senaġina bema ġia vetuġunaġi tarimana rakavana, tauġena nuġana bekirani, ‘Au ġegu vere ġena ġenoġoi tu bekwaibo-rakava,’

⁴⁹ benamo ġia na karona bekwaririni, ma ġia tu niuniu tarimari ġesi beġe ġaniġani-vegogoni e beġe niuniu-vegogoni.

⁵⁰ Vetuġu-naġi tarimana ġena vere ġena ġenoġoi ġarona tu asi etuġamaġiani ġaronai, ma asi eribaiani aoanai beraġasini.

⁵¹ Benamo ġena vere na bea basi-ġutuġutuani, ma gofaġofa tarimari ġesi bea toreani. Monai beġe taġini, gadikari maki beġe veġara-tarini.”

25

Barabore - Ġuiato gabanana (10)

¹ “Mo ġaro ai Guba Basileia tu noġa moġo ġuiato gabanana (10) kavana, ġeri lamefa ġeġabirito, ġeraka-rosito, veġaraġo variġu tauna ġesi beġene vedoġari ġetato.

² Ġuiato imaima (5) tu ma iaunegari, a imaima (5) tu babori.

³ Korana ġuiato babori ġeri lamefa moġo ġeġabito, senagi keresini kota ma asi ġeġabikauto.

⁴ A iaunega ġuiatori ġeri lamefa ġeġabito nai, keresini maki kavabu ai ġeġabikauto.

⁵ Veġaraġo variġu tauna ekwaiboto dainai, ġena na matari eġararito, benamo mabarari ġegenato.

⁶ Boġi nuġanai ta ekoġoto, ekirato, ‘Veġaraġo variġu tauna mani eiaġomani, be ġoiaġo, ġia ġesi boġono vedoġari!’

⁷ Benamo ġuiato 10 ġetataġato, ġeri lamefa ġeiarevarito.

⁸ Ĝuiato babori na iaunega ĝuiatori ĝevaĝa-guruĝarito, ĝekirato, ‘Ĝemi keresini kota ĝovinia, korana ĝai ĝema lamefa mai ĝebuseni.’

⁹ Senaĝi iaunega ĝuiatori ĝevaĝa-veseto, ĝekirato, ‘Asiĝina, ĝomi ema ĝai tu asi beilailani. Namona tu sitoa ĝana ĝoiago, tauĝemi ĝemi ĝoa voi.’

¹⁰ Keresini voi ĝeiaĝoto-ĝoi nai, veĝaraĝo variĝu tauna eraĝasito. Benamo ĝerovinatoreto ĝuiatori tu ĝia ĝesi veĝaraĝo verekonai ĝeraka-toĝato. Benamo ĝatama-boka ĝekou-ĝauato.

¹¹ Gabivau ĝuiato tari maki ma ĝevotuto, ĝekirato, ‘Vereĝauka, Vereĝauka o, ĝema ĝatama-boka noma keoa!’

¹² Senaĝi veĝaraĝo variĝu tauna evaĝa-veseto, ekirato, ‘Moĝoni akiramini, au tu asi ribagu ĝomi.’

¹³ Moĝa lorinai, boĝono venari-taĝo, korana ĝemi Vereĝauka beiĝomani ĝarona e horana asi ribami.”

Barabore - Vetuĝunaĝi tarimari moni ĝenarito

Luka 19:11-27

¹⁴ “Guba Basileia tu noĝa moĝo tarimana ta, gabu manaĝana ĝana bene iaĝo etato. Roĝosi bere raka nai, ĝena vetuĝunaĝi tarimari ekea-iaĝomarito, ĝena farefare evinirito, beĝene ĝauvei-iaĝiri ĝana.

¹⁵ Ĝia na golo moniri ĝia tata sebori sebori ĝeri riba e kokore ilailari ai evinirito. (Golo monina ta tu tarima ta davana laĝani toitoi nuĝanai beĝabini kavana). Ta tu golo moniri imaima (5) eviniato, ma ta tu golo moniri ruarua (2), ma ta tu golo monina sebona eviniato. Benamo eraga-kwanerito, ĝena iaĝoiago eiaĝoto.

¹⁶ Golo moniri imaima eĝabirito tarimana maoromaoro eiaĝoto, ĝena moni eĝauvei-iaĝirito, golo moniri boruri imaima ma edogaririto.

¹⁷ Moĝesina kavana golo moniri ruarua eĝabirito tarimana na maki moni boruri ruarua ma edogaririto.

¹⁸ Senaĝi golo monina sebona eĝabiato tarimana eiaĝoto, tano ai guri ekwaiato, biaguna ĝena moni ekure-togaĝato.

¹⁹ Nega varau emanaĝato nuĝanai, mo vetuĝunaĝi tarimari ĝeri vere ma eĝenoĝoi-iaĝomato, ĝena moni kamasi ĝeĝauvei-iaĝirito beĝene vevarifiu-iaĝiri etato.

²⁰ Benamo golo moniri imaima eĝabirito tarimana ema raka-toĝato, moni boruri imaima egabi-kaurito, ekirato, ‘Verebara, ĝoi na golo moniri imaima oviniguto nuganaĝi, au na tu moni boruri imaima ma badoĝariri maĝeri.’

²¹ Ĝia na evaĝa-namoato, ekirato, ‘Namo baregona! Ĝoi tu vetuĝunaĝi taumu namona, ma vetuĝamaĝikaumu! Dagara misiri oĝau-vei-iaĝi ginikaurini nai, au na dagara ĝutuma avinimuni, ĝoi na bogita-gaurini. Noma raka-toga, au ĝesi sima iaku-vegogo!’

²² Benamo golo moniri ruarua eviniato tarimana ma ema raka-toĝato, ekirato, ‘Verebara, ĝoi na golo moniri ruarua oviniguto nuganaĝi, au na tu moni boruri ruarua ma badoĝariri, maĝeri.’

²³ Ĝena vere na evaĝa-namoato, ekirato, ‘Namo vedaurea! Ĝoi tu vetuĝunaĝi taumu namomu, ma vetuĝamaĝikaumu! Dagara misiri oĝauvei-iaĝi ginikaurini nai, au na dagara ĝutuma avinimuni, ĝoi na bogita-gaurini. Noma raka-toga, au ĝesi sima iaku-vegogo!’

²⁴ Benamo golo monina sebona eĝabiato tarimana ema raka-toĝato, ekirato, ‘Verebara, au ribagu ĝoi tu asi vegubakau taumu, dia ĝoi na ovarorito dagarari okwarini, ema dia ĝoi na ĝue-ĝuturi ofiu-rovorovorito dagarari ovaĝa-vegogorini.

²⁵ Moĝesi naima agarito, aiago, ĝemu moni tano nuganaĝi akure-togaĝato. Noĝitaia, dagarana iniga, ĝemu noĝabia.’

²⁶ Ĝena vere na ekiraiato, ekirato, ‘Ĝoi vetuĝunaĝi taumu rakavamu ma ĝubulefimu. Ĝoi ribamu, dia au na avarorito dagarari akwarini, ema dia au na afiu-rovorovorito dagarari avaga-vegogorini.

²⁷ Kamuto, bere namo ĝegu moni tu banikai boro torea, benamo au bara ĝenoĝoi-iaĝoma nai tu, ma toreauna ĝesi bara doĝaria.

²⁸ Bevaitovo, ĝia na vetuĝunaĝi tarimari tari ekirarito, ekirato, ‘Mani moni sebona ĝenai maniga ĝoĝabia, moni gabanana (10) tarimana ĝovinia.

²⁹ Korana ma ĝena-ĝana tarimana tu ĝutumari ma haviniani, be barego lelevaĝi beĝabini, a asi ĝena-ĝana tarimana tu ĝenai misina maki baĝabi-vaĝiani.

³⁰ Ma mai vetuĝunaĝi tarimana rakavana ĝofiu-rosia murika mukunana ĝana. Monai bene taĝi, gadikana maki bene vaĝa-garatari.’ ”

Kota baregona ĝarona

³¹ “Tarimarima Natuna tu ma mamana marevana e seĝuka baregona, ema ma ĝena aneru mabarari ĝesi beĝe iaĝomani, ĝena teronai betanu-kauni.

³² Bese mabarari ġia ġoiranai beġe vaġa-vegogorini, benamo ġia na bevaġa-farararini, noġa moġo mamoe narinariri tarimana na mamoe nanigosi ġerina etore-ġevevaġirini kavana.

³³ Mamoe tu aroribana rekenai, ma nanigosi tu kaurina rekenai betorerini.

³⁴ Benamo Vere na aroribana tarimari bevaġa-guruġarini, bekirani, 'Ġoiaġoma! Tamagu na evaġa-namomini tarimami, ġoiaġoma! Barau ġena Basileia ġoma ġabia, guba tanobara eveirito neganai varau erovina-toreato ġomi ġemi.

³⁵ Korana au evitoguto nai, ġoġubuguto; bokagu ekoketo nai, nanu ġoviniguto; au vanuġa boru tarimagu ġomi fakami ai atanuto, senaġi ġoġabi-raġeguto;

³⁶ au asi ġegu dabuġa, ġovaġa-dabuġaguto; akeveto nai, ġonariguto; dibura numai atanuto nai, ġoraka-ġitaġuto.'

³⁷ Benamo vei-iobukaiobuka tarimari na beġe vaġa-veseani, beġe kirani, 'Vereġauka, aitoma ġaġitamuto ovitoto, ġaġubumuto? O onanu-maseto, nanu ġavinimuto?

³⁸ Aitoma ġoi vanuġa boru tarimamu ai ġaġitamuto, ġaġabi-raġemuto ġai ġema numai, o asi ġemu dabuġa, ġavaġa-dabuġamuto?

³⁹ Kamara ġaro ai ġaġitamuto ġoi okeveto, o diburai otanuto, ġaraka-ġitamuto?'

⁴⁰ Benamo Vere na bevaġa-veserini, bekirani, 'Moġoni akiramini, tarikakagu asi ġeivirini tarimari maiġeri ta ġovei-viniato ilailanai, au maki moġesi ġovei-viniguto.'

⁴¹ Benamo kaurina rekena tarimari bevaġa-guruġarini, bekirani, 'Au ġegu na ġoraka-veġita, meto barego lele-vaġina iatami ai etanuni tarimami, ġoiaġo, eġara-vanaġi vanaġini karavana ġana, Satani ma ġena aneru ġeri Barau na varau evei-toreato.

⁴² Korana evitoguto, senaġi asi ġoġubuguto; nanu na emaseguto, senaġi nanu asi ġoviniguto;

⁴³ au tu vanuġa boru tarimagu ġomi fakami ai atanuto, senaġi asi ġoġabi-raġeguto ġemi numai; asi ġegu dabuġa, senaġi asi ġovaġa-dabuġaguto; akeveto ema dibura numai atanuto, senaġi asi ġoraka-ġitaġuto.'

⁴⁴ Benamo ġia maki beġe vaġa-veseani, beġe kirani, 'Vereġauka, kamara ġaro ai ġaġitamuto, ovitoto o onanu-maseto, o vanuġa boru tarimamu, o asi ġemu dabuġa, o okeveto, o diburai otanuto, ġai na asi ġavaġa-kavamuto?'

⁴⁵ Benamo Vere na bevaġa-veserini, bekirani, 'Moġoni akiramini, ġomi na mai tarikaka asi ġeivirini tarimari maiġeri, ta asi ġovaġa-kavaiato nai, au maki moġesi ġovei-viniguto, asi ġovaġa-kavaguto.'

⁴⁶ Tauna moġa, ġia tu midigu vanaġivanaġi gabuna ġana beġe iaġoni, a vei-iobukaiobuka tarimari tu maġuri vanaġivanaġi gabuna ġana beġe iaġoni."

26

Iesu beġene vaġi-masea dabarana ġevetauato

Ioane 11:45-53

¹ Iesu na maiġeri dagara mabarari evevaġa-riba iaġi-ġosirito nai, ġena mero evaġa-gurugarito, ekirato,

² "Ġomi ma ribami, ġaro ruarua moġo, benamo Pasova beġe veiani. (Moġa tu Iuda tarimari mase aneruna na evanaġirito moġo, asi evaġirito verekona). Mo ġaro ai Tarimarima Natuna tarima tari ġimari ai beġe toreani, beġene vaġa-satauroa ġana."

³ Benamo Rubu Veaġa vereri baregori ema Iuda ġeri vere baregori ġesi ġevegogoto, Kaiafas, Rubu Veaġa verena barana, ġena numai.

⁴ Ġeboioġato, Iesu beġene gabi-lemmaia, benamo beġene vaġi-masea.

⁵ Senaġi ġekirato, "Dia vereko nuġanai bene ġora, korana vereko beġe iaġomani tarimari ġia iatana na beġe burini garina."

Vavine ta na Iesu ediġaiato Betania ai

Mareko 14:3-9; Ioane 12:1-8

⁶ Iesu tu Betania ai, Simona, lepera tarimana, ġena numai.

⁷ Ġeġaniġanito-ġoi nuġanai, vavine ta ġia ġenai eiaġoto; kavabu namona ta, alabasta forena na ġeveiatio kavabuna, eġabi-kauato, nuġanai tu muramura ma bonana namona, voina barego vedaurea; Iesu ġaniġani gabunai etanu-taġoto-ġoi nai, mo vavine na Iesu debanai ebbuato.

⁸ Ġena mero na ġeġitaio, benamo ġebaruto, ġekirato, "Karase nai mai muramura efitoġa-kavaiani?

⁹ Mai muramura bere voivoi-iaġia, be moni baregona bere ġabia, benamo asi ġeri-ġari tarimari bere viniri!

¹⁰ Iesu ribana ġia tu kara ġekiraġiato, moġesina nai evaġa-guruġa-rito, ekirato, "Karase nai mai vavine ġomugumuġu-iaġiani? Mai vavine na veġa namona au ġegu ai beveia.

¹¹ Asi ġeri-ġari tarimari tu ġomi ġesi boġo tanu-vanaġi vanaġini. Senaġi au tu dia ġaro mabarari ġomi ġesi batanuni.

¹² Mai vavine na muramura au tauġanigu ai bebubu-guinea, gurigurigu ġana.

¹³ Moġoni akiramini, Vari Namona beġe ġobata-iaġiani tanobara mabarari nuġari ai, mai vavine na veiġa beveia veigana maki beġea kiragiani, ġia tuġamaġi-iaġina.”

Iudas na Iesu erevaiao

Mareko 14:10-11; Luka 22:3-6

¹⁴ Benamo gabanana ruarua (12) tarimari ta, arana Iudas Isakariota, Rubu Veaġa vereri baregori ġeri ai eiaġoto,

¹⁵ edanaġirito, ekirato, “Kara boġo viniguni, bema Iesu ġimami ai batore-kauani nai? Ġia na silva moniri gabana toitoi (30) ġeivirito, benamo ġeviniao.

¹⁶ Mo nega monana Iudas na ġimari ai betore-kauani dabarana evetauato-ġoi.

Iesu ma ġena mero ġesi ginitaġo mamoena ġeġaniato

Mareko 14:12-21; Luka 22:7-14; 22:21-23; Ioane 13:21-30

¹⁷ Asi etubuni faraona verekona ġarona giniguinenai ġena mero Iesu ġenai ġeiaġoto, ġedanaġiato, ġekirato, “Ġai tu ainai Rubu Veaġa verekona baġana vei-torea, bono ġania?”

¹⁸ Benamo Iesu na evaġa-veserito, ekirato, “Goiaġo vanuġa barana nuġanai, mo bakiraġia tarimana ġenai, boġono vaġa-guruġaia, boġono kira, ‘Vevaġa-riba tauna ekirani: Gegu hora varau beragasi. Gegu mero ġesi ġoi ġemu numai ginitaġo mamoena baġa ġaniani.’”

¹⁹ Benamo mero Iesu na ekirarito ilailanai vereko ġevei-toreato.

²⁰ Lavilavi ai Iesu ma ġena mero gabanana ruarua (12) ġesi ġetanu-tarito, vereko ġeġania ġana.

²¹ Benamo ġeġaniġanito-ġoi nai, ekirarito, ekirato, “Moġoni akiramini, ġomi ta na au borevaguni.”

²² Ġia mabarari nuġari ma metori ġesi irau sebori irau sebori na ġedanaġiato, ġekirato, “Vereġauka, moġoni dia au, ene?”

²³ Iesu evaġa-veseto, ekirato, “Au ġesi diġu sebonai ġanaba-riġoni tarimana na au berevaguni.

²⁴ Tarimarima Natuna bemaseni Buka Veaġai ġetoreato ilailanai. Senaġi Tarimarima Natuna berevaiani tarimana ġenai tu vetuġana kekei; asi bere maġuri tu namo.”

²⁵ Benamo Iudas, reva tarimana, ekirato, “Vevaġa-riba taumu, moġoni dia au, ene?” Iesu evaġa-veseto, ekirato, “Dagarana maniġa, mani okiraġiani.”

Vereġauka ġena ġanivegogo veaġana

Mareko 14:22-26; Luka 22:15-20; 1Korinto 11:23-25

²⁶ Ġeġaniġanito-ġoi nuġanai, Iesu na beredi eġabiato, Barau evaġa-namoato, etaviato, evinirito, benamo ekirato, “Gogabia, ġoġania, mai tu au tauġanigu.”

²⁷ Ġia na kapusi ma eġabiato, evaġa-namoato murinai, evinirito, ekirato, “Goniuva, ġomi mabarami.

²⁸ Korana mai tu au raragu, Ginitaġo Variġuna evaġa-moġoniani, bebebubuni, tarimarima ġutuma ġeri rakava tuġamaġi-fitogari ġana.

²⁹ Akiramini, mai vine nanuna asi ma banju-ġenoġoiani, beiaġoni mo, ġaro beraġasini vau, au ġomi ġesi ma bita niu-vegogoani au Tamagu ġena Basileia nuġanai.”

³⁰ Benamo mari ta ġemariato murinai, ġeraka-rosito, Olive Ġorona ġana ġeiaġoto.

Iesu na Petero ġena vekira-ġuniġau ekiraġi-toreato

Mareko 14:27-31; Luka 22:31-34; Ioane 13:36-38

³¹ Benamo Iesu na evaġa-guruġarito, ekirato, “Toma boġi ġomi mabarami ġemi veġabidadama au ġegu ai boġo raga-kwaneani, korana Buka Veaġai maġesi ekirani,

‘Au na mamoe ġitaġauri

tarimana bavaġiani,

benamo mamoe mabarari

beġe raga-lausini.’

³² Senaġi au mase na ma bavariġisi-ġenoġoini murinai, baraka-guineni Galilea ġana. Monai vau bitana vedoġari.”

³³ Petero eguruġa-fouto, Iesu ekiraiato, ekirato, “Bema mabarari na ġeri veġabidadama ġoi ġemu ai beġe raga-kwaneani, senaġi au na tu asiġina.”

³⁴ Iesu na Petero evaġa-guruġaiato, ekirato, “Moġoni akiramuni, toma boġi kokoroku roġosi bene goġi nuġanai, ġoi na au vaġa-toitoi bokira-ġuniġauguni.”

³⁵ Senaġi Petero eguruġa-ġiġiraġeto, ekirato, “Bema ġoi ġesi bita mase-vegogoni maki, au na ġoi tu asi veġata bakira-ġuniġaumuni.” Gena mero mabarari maki moġesi ġekirato.

*Iesu eḡauḡauto Getesemane ai
Mareko 14:32-42; Luka 22:39-46*

³⁶ Iesu ma ḡena mero ḡesi ḡeiḡoto gabu ta arana Getesemane, benamo ḡia na evaḡa-guruḡarito, ekirato, “Mainai ḡotanutaḡo, au tu iomo ḡana aiḡoni, naḡauḡau.”

³⁷ Benamo Petero ema Sebedaiο natuna ruarua moḡo eḡoririto, ḡia ḡesi ḡeiḡoto. Moḡa nuḡanai Iesu tau-ḡanina efarakaiato, eḡarito, nuḡana maki evekwarḡito-ḡoi.

³⁸ Benamo ekirarito, ekirato, “Au nuḡagu na meto asikei eḡwaiani, dori evaḡiguni. Mainai ḡotanu, boḡono vevaḡa-gwaḡiḡi au ḡesi.”

³⁹ Iesu kota ma eraka-naḡito, ḡoirana tano ai ekokofa-tarito, benamo eḡuriḡurito, ekirato, “Tamagu o, bema ma dabara ta, mai midigu bedina ḡeguna noma ḡabi-vaḡia. Senaḡi dia au ḡegu ura, ḡoi ḡemu ura moḡo.”

⁴⁰ Ḗena mero toitoi ḡeri ai eḡenoḡoito nuḡanai, ḡia tu gena-maseri ai eḡoitaḡorito, benamo Petero ekiraiato, ekirato, “Kamasi nai ḡomi taumi toitoi au ḡesi aοa sebona ta kavana maki asi boḡo vevaḡa-gwaḡiḡini?

⁴¹ Boḡono vevaḡa-gwaḡiḡi, boḡono ḡauḡau, be veribaḡani beiaḡomani nai tu, asi boḡono moira. Iauka tu moḡoni eurani, senaḡi tau-ḡani tu emoirani.”

⁴² Iesu nega vaḡa-ruarua eraka-veḡitato, ea ḡuriḡurito, ekirato, “Tamagu o, bema asi dabara ta mai midigu bedina ḡeguna boḡabi-vaḡiani nai, ḡoi ḡemu ura bono veia moḡo.”

⁴³ Ma eḡenoḡoi-iaḡomato nuḡanai tu, ḡia asi ḡeri vevaḡa-gwaḡiḡi nai, genamaseri ai ma edoḡaririto, korana matari tu gena na eḡabi-rakavarito.

⁴⁴ Iesu na ma eiaḡuirito, ma eiaḡoto, vaḡa-toitoi ma eḡauḡauto, ḡena ḡuriḡuri guruḡari guineri ma ekiraḡi-ḡenoḡoirito.

⁴⁵ Benamo ḡena mero ḡeri ai ma eḡenoḡoi-iaḡomato, ekirarito, “Ḗomi tu roḡo ḡogenani e ḡoiḡaraḡini? Goḡitaia! Aοana varau berḡasi! Tarimarima Natuna tu beḡe revaia, rakava tarimari ḡimari ai beḡe torea.

⁴⁶ Govariḡisi, be si-iaḡosi! Goḡitaia, au revarevagu tarimana mai berḡasi!”

*Iesu tuari tarimari na ḡegabiato
Mareko 14:43-50; Luka 22:47-53; Ioane 18:3-12*

⁴⁷ Iesu roḡo eguruḡato-ḡoi nuḡanai, Iudas, mero gabanana ruarua (12) tauna ta, erasaito. Tarimarima ḡutuma maki ḡia ḡesi ma ḡeri vetari baḡari e vevaḡi kwariri. Ḗia tu Rubu Veaḡa vereri bareḡori ema Iuda vereri na ḡetuḡurito.

⁴⁸ Reva tarimana na vetoḡa ta ekiravara-torerito, ekirato, “Baverauani tarimana tu moḡa, boḡono ḡabi-taria.”

⁴⁹ Iudas erasaito nai, maoromaoro eiaḡoto Iesu ḡenai, benamo ekirato, “Vevaḡa-riba tarimamu, boḡi namona!” benamo everuato.

⁵⁰ Iesu na evaḡa-veḡeato, ekirato, “Ḗata, veiveina uranai boiaḡoma veḡiana noraga-veia!” Benamo ḡeiḡomato, ḡimari na Iesu ḡeḡabi-tariato, ḡedegodegoato.

⁵¹ A Iesu ḡena mero ta ḡena vetari baḡana einu-vaḡiato, edaveato, benamo Rubu Veaḡa verena baregona ḡena vetuḡunaḡi tarimana seḡana ebasi-vaḡiato.

⁵² Benamo Iesu na ekiraiato, ekirato, “Ḗemu baḡa tu ḡuragurana gabunai noḡura-ḡenoḡoia. Korana vetari baḡari ḡeḡabini tarimari mabarari tu vetari baḡari na beḡe maseni.

⁵³ Ḗoi asi ribamu, Tamagu ḡena vevaḡa-kava banoḡiani, benamo ḡia na aneru vaḡa-sebo au ḡegu ai betuḡurini, aneru doḡorori gabanana ruarua (12) o 70,000 ema tari maki betuḡurini au vaḡa-kavaḡu?

⁵⁴ Moḡesi bere vei, senaḡi Buka Veaḡai varau ḡetoreato guruḡana tu kamasi bemoḡonini? Be, maiḡesi moḡo beḡene vetore!”

⁵⁵ Iesu na monai mo tarima ḡutuma evaḡa-guruḡarito, ekirato, “Au tu seḡafore doḡorona ta aḡori-kauani, be ḡomi boḡo iaḡoma au ḡabiḡabigu tu ma ḡemi vetari baḡari e vevaḡi kwariri ḡesi? Garo mabarari ai au tu ḡomi sevimi ai, Rubu Veaḡa nuḡanai avevaḡa-ribato-ḡoi, senaḡi asi ḡoḡabi-tariguto.

⁵⁶ A mai dagara mabarari ḡeḡorani tu, peroveta tarimari na Buka Veaḡai ḡetore-guinerito guruḡari vaḡa-moḡoniri ḡana.” Benamo Iesu ḡena mero mabarari na ḡeraga-kwaneato, ḡeraga-rovorovoto.

*Iesu kanisoro tarimari ḡoirari ai
Mareko 14:53-65; Luka 22:54-55; 22:63-71; Ioane 18:13-14; 18:19-24*

⁵⁷ Mo ḡeḡabi-tariato tarimari na Iesu ḡeḡori-iaḡoato, Kaiafas, Rubu Veaḡa verena baregona, ḡena numa ḡana. Monai taravatu ḡevevaḡa-riba iaḡiato-ḡoi tarimari ema Iuda vereri varau ḡeraka-vegogoto.

⁵⁸ Petero na Iesu eraka-tuġuato-ġoi, ma fakana eiaġoto mo, Rubu Veaġa verena baregona ġena numa ġana. Eraka-toġato maġu nuġanai, benamo veġitaġau tarimari fakari ai ea tanu-tarito, bene ġita, mo veġa magonai kara befoforini.

⁵⁹ Rubu Veaġa vereri baregori e Iuda ġeri kanisoro tarimari mabarari na vevaġa-bade ġofaġofa tarimari ġevetaurito, Iesu beġene ġofaġofa-iaġia, be beġene vaġia ġana.

⁶⁰ Vevaġa-bade ġofaġofa tarimari ġutuma ġevariġisito, ġeġofaġofa-iaġiato, senaġi ġeri guruġa tu asi ġesebonato-ġoi. Magonai vau ġofaġofa tarimari ruarua ġevaisi-raġeto,

⁶¹ ġekirato, “Mai tarima ekirato, ‘Au tu ma seġukagu mai Barau ġena Rubu Veaġa barovoani, ema ġaro toitoi nuġanai ma bavaga-ruġa ġenoġoiani.’”

⁶² Benamo Rubu Veaġa verena baregona eruġa-vaisito, Iesu edanaġiato, ekirato, “Ġoi tu asi bovava-veseni? Maġeri na ġoi ġevarifiu-iaġimuni guruġari tu kamasi?”

⁶³ Senaġi Iesu asi eguruġato. Rubu Veaġa verena baregona na ma edanaġi-ġenoġoiato, ekirato, “Maġuri Barauna aranai au na ġoi akiramuni, nokira-varama: Ġoi tu Keriso, Barau Natuna?”

⁶⁴ Iesu na evaġa-veveato, ekirato, “Dagarana okiraġiani maniga! Ma au na ġomi mabarami akiramini: Mai ġaro maiga, mo beiaġoni ġoirai, ġomi na Tarimarima Natuna roġo boġo ġitaiani, seġuka Barauna ġimana aroribanai betanuni, e guba maguberi iatari na beiaġomani!”

⁶⁵ Benamo Rubu Veaġa verena baregona tauġena ġena dabuġa edareato, ekirato, “Barau vaġa-rakavana guruġana tu ekiraġi-ġosiatu! Karase vevaġa-ġita tarimari roġo tavetaurini? Barau vaġa-rakavana guruġana bekiraġia, varau boġo seġaġia.

⁶⁶ Kara mani ġotoni?” Ġia mabarari ġekirato, “Bene mase moġo.”

⁶⁷ Benamo ġoirana ġekanunuato, ġefaisiato. Kotari na ġeforoato,

⁶⁸ ġekirato, “Keriso, ġoi tu peroveta tarimana, be nokira-varama, deikara na bebotamu?”

Petero na Iesu ekira-ġuniġauto

⁶⁹ Petero roġo numa maġuna nuġanai etanu-taġoto-ġoi, benamo vetuġunaġi ġuiatona ta ġia ġenai eiaġomato, ekirato, “Ġoi maki Iesu, Galilea tauna, ġesi orakaoto-ġoi, okavaiato-ġoi.”

⁷⁰ Senaġi Petero evekira-ġuniġauto mabarari ġoirari ai, ekirato, “Au asi ribagu ġoi kara okiraġiani.”

⁷¹ Benamo eraka-rosito, maġu ġatama bokana sevina ġana eiaġoto. Ma vetuġunaġi ġuiatona ta na eġitaato, benamo sevina tarimari evaġa-guruġarito, ekirato, “Ġia maki Iesu, Nasareta tarimana, ekavaiato tarimana.”

⁷² Petero ma evekira-ġuniġauto, eguruġa-gwaġiġito, ekirato, “Au asi ribagu mani tarima.”

⁷³ Nega kotuna evanaġito nuġanai, monai ġeruġa-taġoto-ġoi tarimari Petero ġenai ġeiaġomato, ġevaġa-guruġaiato, ġekirato, “Moġoni, ġoi maki ġia ġesi tarimamu ta, korana garomu na evaġa-foforimuni.”

⁷⁴ Benamo Petero na ekirarito, “Asiġina ġinavaġi, akira-korikorimini, mani tarima au asi ribagu!”

Asikauna kokoroku egogito.

⁷⁵ Benamo Petero na Iesu ġena guruġa etuġamaġi-doġariato, ekiraiato, “Kokoroku roġosi bene goġi nai, ġoi na au vaġa-toitoi bokira-ġuniġauguni.” Benamo eraka-rosito murikai, etaġi-rakava rakavato.

27

Iesu ġeġori-iaġoato Pilato ġenai

¹ Boġibogġi ekini-mama mamaiato-ġoi, Rubu Veaġa vereri baregori mabarari ema Iuda vereri ġeboioġa-vegogoto, Iesu beġene vaġia ġana.

² Seini na ġebarubaruato, ġeġori-iaġoato, Pilato, Roma gavana, ġimanai ġetore-kauato.

Iudas Isakariota emaseto

Apostolo 1:18-19

³ Iudas, reva tauna, na Iesu eġitaato, vaġa-masena guruġana varau ġeveiato, benamo evetuġamaġi-kureto. Benamo silva moniri gabana toitoi (30) eġwa-ġenoġoirito Rubu Veaġa vereri barari e Iuda vereri ġeri ai.

⁴ Ekirato, “Au tu bavei-rakava, korana asi ġena rakava tarimana barevaia, bemaseni.” Ġevaġa-veseto, ġekirato, “Mani tu dia ġai ġema nuġa-vekwaragġi, mani tu ġoi tauġemu ġemu ġauvei moġo.”

⁵ Iudas na silva moniri Rubu Veāga nuḡanai efu-toḡarito, eraka-veḡitato. Benamo eiāḡoto, tauḡena ea veborato.

⁶ Benamo Rubu Veāga vereri baregori na mo silva moniri ḡeḡabirito, ḡekirato, “Mai tu rara voina monina, be boubou mauḡanai asi veḡata bita ḡuriani, taravatu.”

⁷ ḡeguruḡa-iaḡiato, ḡevaḡa-moḡoniatato murinai, mo moni ḡeḡabiato, ḡuro eveini tarimana ḡena tano ḡevoiato, tanobara boru tarimari ḡeri gara gabunai ḡevaḡa-iaḡoato.

⁸ Moḡesina nai mo tano arana ḡevatoani “Rara Tanona” beiaḡoma mo maitoma.

⁹ Monana Ieremia peroveta tarimana ḡena guruḡa ema moḡonito, ekirato, “Mo silva moniri gabanana toitoi (30) ḡeḡabirito, mo tu Isaraela tarimari na ḡevaḡa-moḡoniatato voina misina, mo tau beḡene voia ḡana.

¹⁰ Ma mo moni na guro eveini tarimana ḡena tano ḡevoiato, Vereḡauka ekirato ilailanai.”

Iesu Pilato ḡoiranai

Mareko 15:2-5; Luka 23:3-5; Ioane 18:33-38

¹¹ Iesu Roma gavanana ḡoiranai eruḡato, ḡia na edanaḡiato, ekirato, “ḡoi tu Iuda tarimari ḡeri kini ba?” Iesu evaḡa-veseto, ekirato, “Oi, okiraḡiani maniḡa.”

¹² Benamo Rubu Veāga vereri baregori ema Iuda vereri na Iesu ḡeḡofaḡofa-iaḡiato, senaḡi guruḡa ta asi ekiraḡiato.

¹³ Moḡa lorinai Pilato na evaḡa-guruḡaiaḡoato, ekirato, “ḡoi asi oseḡaḡini, iatamu ai tu meto ḡutuma ḡekiraḡirini?”

¹⁴ Senaḡi Iesu asi eḡoiaḡito, guruḡa sebona tai maki asi evaḡa-veserito. Monana gavana nuḡana efarevaḡi-rakavato.

Pilato na Iesu ḡena mase ekiraḡiato

Mareko 15:6-15; Luka 23:13-25; Ioane 18:38-19:16

¹⁵ Vanaḡivanaḡi Pasova verekona ḡaronai tu gavana na ḡia ḡeri dibura numai etanuni beḡe kiraḡiani tarimana ta etuḡu-rosiatato-ḡoi.

¹⁶ Mo laḡani ai tarima rakava kwaikwaina ta dibura numai etanuto, arana tu Barabas.

¹⁷ Moḡa lorinai tarima ḡutuma ḡevegogoto nuḡanai, Pilato na edanaḡirito, ekirato, “Deikara ḡoura-viniani natuḡu-rosia: Barabas ba Iesu, ḡekiraḡiani Keriso?”

¹⁸ Korana Pilato ribana ginikau, Iuda tarimari baregori ḡeri mama dainai, Iesu ḡia ḡimanai ḡetoreato.

¹⁹ Pilato na Kota eḡorikauato-ḡoi nuḡanai, Pilato ḡaraḡona na ḡena keakau ta etuḡu-raḡasiato, ekirato, “Mani vei-iobuka-iobuka tarimana ḡenai dagara ta asi bono veia, korana au tu boḡi ai banuvi, ḡegu nuvi ai midigumidigu baregona na beḡabigu ḡia dainai.”

²⁰ Senaḡi Rubu Veāga vereri baregori ema Iuda vereri na vegogo tarimari nuḡari ḡeḡanirito, Pilato beḡene kiraia, Barabas bene tuḡu-rosia, a Iesu bene mase.

²¹ Senaḡi gavana na vegogo tarimari ma edanaḡirito, ekirato, “ḡia tauri ruarua dei tu ḡomi ḡemi natuḡu-rosia?” Vegogo tarimari ḡefararato, ḡekirato, “Barabas!”

²² Benamo Pilato na edanaḡirito, ekirato, “O mai Iesu, ḡekiraḡiani Keriso, tu kamasi bana veia?” ḡia mabarari ḡevaḡa-veve vegogoto, ḡekirato, “Novaḡa-satauroa!”

²³ Senaḡi Pilato na ma edanaḡirito, ekirato, “Kara dainai? Kamara veia rakavana eveiato nai?” Senaḡi mabarari ḡefarara-gigitarito, ḡekirato, “Novaḡa-satauroa!”

²⁴ Pilato etuḡamaḡi-fakato, ḡia ḡena riba guruḡari tu asi beḡe ḡabi-raḡerini, ma tarimarima ḡia iatana na beḡe burini garina, benamo ḡia tu nanu eḡabito, ḡimana eḡurigiato mo tarimarima ḡutuma ḡoirari ai, ema maiḡesi ekirato: “Au tu asi ḡegu kerere mai vei-iobuka-iobuka tarimana rarana ḡenai; mai tu ḡomi ḡemi ḡauvei moḡo!”

²⁵ Vegogo tarimari mabarari ḡevaḡa-veseto, ḡekirato, “Mai tarima rarana o ḡena mase metona tu ḡai iatamai bene tanu ema ḡai natuma iatari ai.”

²⁶ Benamo Pilato na Barabas etuḡu-rosiatato ḡia ḡeri, a Iesu tu ḡekwaria etato vau soldia evinirito, beḡene vaḡa-satauroa ḡana.

Iesu ḡevaseva-vaseva iaḡiato

Mareko 15:16-20; Ioane 19:2-3

²⁷ Benamo Pilato ḡena vetari tarimari na Iesu ḡeḡori-iaḡoato gavana ḡena numa nuḡanai, benamo karori mabarari ḡekea-vegogorito, bena ḡeruḡa-ḡeḡeraḡiato.

²⁸ ḡena dabuḡa ḡeruḡa-vaḡirito, dabuḡa kakakakana ḡevaḡa-veiato,

²⁹ debana dagarana ḡau ma giniginina na ḡevatoato, korona noḡa ḡeveiato, benamo Iesu debanai ḡetore-kauato. Oro ta maki ḡimana aroribanai ḡevaḡa-ḡabiato, benamo ḡoiranai ḡevetui-tarito, ḡevaseva-vaseva iaḡiato, ḡekirato, “Iuda ḡeri Kini o, ḡaro namona!”

³⁰ Benamo ḡekanunu-kanunuato, mo oro ḡeḡabi-rariato, debana ḡekwari-ḡenoḡoi ḡenoḡoiato-ḡoi.

³¹ Ĝevaseva-vaseva iaĝi-ĝosiato murinai, dabuĝa kakakakana ĝeĝabi-vaĝiato, ĝena dabuĝa korikorina ma ĝevaĝa-veiato. Benamo ĝeĝori-rosiato, beĝenea vaĝa-satauroa ĝana.

Iesu ĝevaĝa-satauroato

Mareko 15:21-32; Luka 23:26-43; Ioane 19:17-27

³² Ĝeraka-rosito-ĝoi nai, Kurene tarimana ta ĝeĝoitaĝoato arana Simona. Vetari tarimari o soldia na ĝelaunaĝi-naĝiato, Iesu ĝena satauro neĝwaia.

³³ Benamo vanuĝa na ĝeraka-rosito, gabu tai ĝeraĝasito arana tu Golgota, anina tu 'Deba Ĝavana Gabuna'.

³⁴ Monai vine nanuna midigu vaĝa-keina muramurana arana gal ĝesi ĝebubu-vegogoato dagarana, Iesu ĝeviniato; eiamuse-tovoato, senaĝi asi eniuato.

³⁵ Ĝevaĝa-satauroato murinai, ĝena dabuĝa ĝia fakarai ai ĝevarerito kasi ai.

³⁶ Moĝa murinai ĝetanutanu-tarito, benamo ĝenariato.

³⁷ Ĝia debana iatanai kara koranai ĝevaĝa-satauroato guruĝana ĝekafa-kauato, maĝesi ĝetoreato, "MAI TU IESU, IUDA GERI VERE."

³⁸ Seĝafore tarimari ruarua maki Iesu ĝesi ĝevaĝa-sataurorito, ta aroribana rekenai, ma ta kaurina rekenai.

³⁹ Ĝeraka-vanaĝito-ĝoi tarimari debari ĝekorakorarito-ĝoi, guruĝa rakavari Iesu ĝeviniato-ĝoi,

⁴⁰ ĝekirato-ĝoi, "O ĝoi okirato, Rubu Veaĝa borovoani, ĝaro toitoi nuĝanai ma bovaĝa-ruĝa ĝenogoiyani otato, tauĝemu novevaĝa-maĝuri! Bema ĝoi Barau Natuna, satauro tuĝuna na noraka-riĝo."

⁴¹ Rubu Veaĝa vereri baregori e taravatu ĝevevaĝa-riba iaĝiato-ĝoi tarimari ema Iuda vereri na maki maĝesi ĝevaseva-vaseva iaĝiato-ĝoi, ĝekirato,

⁴² "Ĝia na tarima boruri evaĝa-maĝuririto-ĝoi, kamuto ĝia tauĝena tu asi evevaĝa-maĝurini! Bema ĝia moĝoni Isaraela tarimari ĝeri vere nai, satauro na inimoĝo neraka-riĝo, be baĝana vaĝa-moĝonia.

⁴³ Ĝia na Barau eĝabidadama viniato-ĝoi, be siĝitaia, Barau na maki betuĝamaĝi-kauani, bevaĝa-maĝuriani ba? Evekiragiĝo-ĝoi, 'Au tu Barau Natuna, nene?'"

⁴⁴ Iesu ĝesi ĝevaĝa-satauro vegogorito seĝafore tarimari ruarua na maki moĝesi ĝeguruĝa-rakava viniato.

Iesu ĝena mase

Mareko 15:33-41; Luka 23:44-49; Ioane 19:28-30

⁴⁵ Horaĝauna 12 koloko ea ĝabiato nai, tanobara mabarana mukuna na eĝabi-ĝaŭato, mukuna etanuto eiaĝoto mo horaĝauna 3 koloko.

⁴⁶ Horaĝauna 3 koloko rekenai Iesu eĝabato, ekirato, "Eloi, eloi, lama sabaktani?" anina tu, "Au ĝegu Barau, au ĝegu Barau, kara dainai au boraga-kwanegu?"

⁴⁷ Tarimarima tari monai ĝeruĝa-taĝoto-ĝoi nai, ĝeseĝaĝiato, benamo ĝekirato, "Ĝia tu Elia ekeaiani."

⁴⁸ Benamo ĝeri tarima ta eraga-iaĝoto, nanu erimaiani dagarana ta eĝabiato, vine nanuna mamakina nuĝanai eduĝi-fereiato, gobu lefai egwanu-kauato, benamo eduĝi-raĝeato, Iesu na neniua ĝana.

⁴⁹ Senaĝi kotari ĝekirato, "Sivaĝa-noga roĝo, siĝitaia, Elia beiaĝomani, bevaĝa-maĝuriani ba asiĝina."

⁵⁰ Iesu ma eĝaba-fouto murinai emaseto.

⁵¹ Benamo mo negai moĝo Rubu Veaga nuĝanai veaga lelevaĝi daigutunai, kouĝau dabuĝana o ketin evedare-kikimato, eruaruato, tuĝuna na mo gabigabina. Tano eiaga-iaĝato, fore barari ĝegwa-kirarito.

⁵² Mase guriri ĝevekeo-fakato, ma tarima ĝutuma, Barau ĝena ura ĝeveirito-ĝoi tarimari, mase na ma ĝevaisiraĝe-ĝenoĝoito,

⁵³ ĝeri guri gaburi ĝeiaĝuirito. Iesu ĝena variĝisi-ĝenoĝoi murinai, Siti Veaĝana ĝana ĝeiaĝoto, monai tarimarima ĝutuma goirari ai ĝefoforito.

⁵⁴ Vetari verena ma ĝena vetari tarimari ĝesi, Iesu ĝenariĝaŭato-ĝoi tarimari, na tano-iaĝa ema ĝeĝorato dagarari mabarari ĝeĝitarito nai, ĝegari-rakavato, ĝekirato, "Mai tarima tu moĝoni Barau Natuna!"

⁵⁵ Vavine ĝutuma maki monai, kotuna manaĝai ĝeruĝato, ĝemarereĝo-ĝoi. Moĝeri vavine Iesu murinai ĝerakato Galilea na eiaĝoto mo Ieruselema ĝana, ema ĝia vetuĝunaĝina ĝeiaĝo-vinito-ĝoi.

⁵⁶ Ĝia fakari ai tu Maria, Magadala vavinena; Maria, Iakobo (o Iames) e Ioane sinari; ema Iakobo e Ioane Sebedaio sinari.

*Iesu ġeguriato**Mareko 15:42-47; Luka 23:50-55; Ioane 19:38-42*

⁵⁷ Mo lavilavi ai farefare ġutuma tarimana Arimatea vanuġa na eraġasito, arana tu Iosefa; ġia maki Iesu ġena mero ta.

⁵⁸ Ġia tu Pilato ġenai eiaġoto, benamo enoġiato, Iesu tauġanina bene ġabia etato. Benamo Pilato na ġena vetari tarimari ekirarito, Iesu tauġanina Iosefa beġene vinya.

⁵⁹ Moġa lorinai Iesu tauġanina eġabiato, dabuġa kurokurona namona na ekumuato,

⁶⁰ gara gabuna fore kouġanai ea tore-toġaiato. Mo gara tu fore gwagiġinai kouġa ta ġekoroato, ġia tauġena ġena guri gabuna variguna ta. Fore baregona na ġatama-boka ekure-ġauato, benamo eraga-kwaneato.

⁶¹ Maria, Magadala vavinena, ema Maria ta tu monai ġetanu-taġoto-ġoi, guri ġetanu-ġoiraiato.

Vetari tarimari na gara gabuna ġenari-ġauato

⁶² Vereko ġevei-toreani ġarona ekorito vau, Sabadi varau beġabia, Rubu Veaġa vereri baregori e Farisea tarimari Pilato ġenai ġeiaġoto,

⁶³ ġekirato, “Verebara, ġai ġatuġa-maġini, mo ġofaġofa tarimana roġo maġuri nai, ekirato, ‘Ġaro toitoi murinai au tu mase na ma bavariġisi-ġenoġoini.’

⁶⁴ Moġa lorinai gadi tauri bono kirari, be guri gabuna beġene nari-ginikaua, bene iaġo mo, moġo toitoi murinai. Irau ġena mero beġe iaġoni, ma tauġanina beġe lemaiiani, benamo tarimarima beġe ġofarini, beġe kirani, ‘Ġia tu mase na bevariġisi-ġenoġoi,’ beġe toni garina. Mai ġofaġofa maġa na ġofaġofa guinena bevanagiiani.”

⁶⁵ Pilato na ekirarito, ekirato, “Gadi tarimari ġoġabiri, ġeiaġo, be guri gabuna beġene ruġaġau-ginikaua.”

⁶⁶ Benamo gara ġana ġeiaġoto, guri kouġana ekou-ġauato forena ġekada-ġauato, tabu vetoġana ta ġeveiato, benamo gadi tarimari ġetorerito, beġene rivigaua.

28*Iesu evariġisi-ġenoġoito Ioane 20:1-18*

¹ Sabadi ekorito murinai, fura ġarona giniguenai, boġiboġi iamoiamo, Maria, Magadala vavinena, Maria ta ġesi ġeiaġoto, gara gabuna ġea ġitaiao.

² Asikauna tu tano-iaga baregona egorato, korana Vereġauka ġena aneru ta guba na emariġoto, fore ekure-veġitaiao, benamo iatanai etanukauto.

³ Ġia vetoġana tu noġa moġo kiriku ekimoreani kavana, ema ġena dabuġa tu kuro-ġaroġaro kaufa o snou noġa.

⁴ Guri gabuna ġeġitaġauato tarimari tu ġegari-rakavato nai ġeġoġo-ġoġorito, benamo tano ai ġeketo-tarito mase tarimari kavana.

⁵ Aneru na mo vavine evaġa-guruġarito, ekirato, “Asi ġogari, au ribagu ġomi tu Iesu, ġevaġa-satauroato tauna, ġovetauani.

⁶ Ġia mainai tu asiġina; ġia tu bevariġisi-ġenoġoi, evaġa-guruġamito ilailanai. Ġetoreato gabuna ġoma ġitaia.

⁷ Be ġoiāo-ġariġari, ġena mero boġonoa kira-varari, boġono kira, ‘Iesu tu mase na bevariġisi-ġenoġoi, ema beguineni Galilea ġana. Monai vau boġoa ġitaiani.’ Mai guruġa nakira-varami ġana baiaġoma.”

⁸ Benamo mo vavine na guri gabuna ġeragakwane-ġariġariato, ma gariri e ma verereri ġesi ġeragato ġena mero ġeri ai, mo aneru ġena guruġa ġea vaġa-ribari ġana.

⁹ Ġeragato-ġoi nai, asikauna Iesu tu ġia ġoirari ai eruġato, ekirato, “Maino ġomi ġesi bene tanu!” Benamo ġoiranai ġevetui-tarito, kwakuna ġregorito, ġetoma-rakariġo viniato.

¹⁰ Iesu na evaġa-guruġarito, ekirato, “Asi ġogari, ġoiāo, au tarikakagu ġoa kirari, Galilea ġana beġene iaġo; monai vau au beġene ġitagu.”

Guri gabuna ġenari-ġauato vetari tarimari ġeri ġofaġofa guruġana

¹¹ Vavine ruarua dabara na ġeiaġoto-ġoi nuġanai, tuari tarimari tari, guri gabuna ġenari-ġauato tarimari, ġeġenoġoito vanuġa barana ġana, karakara ġeġorato dagarari mabarari Rubu Veaġa vereri baregori ġekira-vararito.

¹² Benamo mo Rubu Veaġa vereri barari tu Iuda vereri ġesi ġeboioġa-vegogoto, gadi tarimari moni baregona ġevinirito.

¹³ Maiġesi ġekirarito, ġekirato, “Ġomi tu boġono kira, ‘Ġena mero boġi nuġanai beġe iaġoma, ġai tu genamai beġe lemaia.’

¹⁴ Bema mai vari gavana na beseġagiiani nai tu, ġai na ġia nuġana baġa vei-magomagoani, be ġomi veiġa rakavana ta asi bevei-vinimini.”

¹⁵ Gadi tarimari na moni ġeġabiato, ġevaġa-guruġarito ilailanai ġeguruġato. Mai vari tu Iuda tarimari fakari ai ġekiraġi-rakaorakaoato, ma maitoma maki roġo ġekiraġiani.

Iesu ġena mero ġeri ai efoforito

Mareko 16:14-18; Luka 24:36-49; Ioane 20:19-23

¹⁶ Ġena mero gabanana sebana (11) tu Galilea ġana ġeiaġoto, Iesu na ekiraġi-guineato ġorona ġana.

¹⁷ Monai ġeġitaiato nai, ġetoma-rakariġo viniato; senaġi tari tu ġedaradarato: 'Mai tu mogoni Iesu ba?'

¹⁸ Benamo Iesu eraka-kavito, evaġa-guruġarito, ekirato, "Barau na seġuka mabarana gubai ema tanobarai au varau bevinigu.

¹⁹ Moġa lorinai ġoiāġo tanobara mabarari ġana, bese mabarari ġegu mero ai boġono vaġa-iaġori. Ema Tamana, Natuna, Iauka Veāġa aranai boġono babatisori.

²⁰ Boġono vaġa-ribari maki, avinimito vevaġa-naġiri mabarari beġene korana-iaġiri. Boġono riba, au tu ġaro mabarari ai ġomi ġesi bita tanuni, beiaġoni mo, tanobara magona!"

VARI NAMONA MAREKO NA ETOREATO

Mareko vaġa-foforina guruġari

Mareko arana ta tu Ioane. Ġia tu dia mo Iesu ġena mero gabanana (12) vekaravari ai tarimana ta. Mai Vari Namona tu laġani 64 beiaġo 68 fakari ai ta etoreato, mo tu Iesu emaseto murinai. Mai fefa tu Roma siti ai Petero ġesi ġeġauvei-vegogoto nuġanai etoreato. Iesu ġekorana-iaġiato-ġoi tarimari Roma nuġanai ġetanuto-ġoi tarimari Iesu Varina Namona ekiravara-ġinikaurito.

Mareko na ġia guruġana baregona ekira-vararito tu ekirarito, Iesu tu Barau ġena vetuġunaġi-iaġovinina tarimana namo vedaureana e ma ġena vetuġamaġikau (Mareko 10:45). Korana Iesu tu Barau ġena maoro baregona gaburenai eġauveito-ġoi ema ġena guruġa mabarari ekorana-iaġirito-ġoi. Moġeri tu Iesu na ġauvei e nuġa-farevaġi veigari eveirito-ġoi moġerina ġeri ai evaġa-foforirito ġeri.

Mareko ġena toretore tu maigēsina eboloġaiato:

1. Vetuġunaġi tarimana Iesu ġena iaġoma ema everovinato veigana - karoa 1:1-13
2. Vetuġunaġi tarimana ġena ġauvei - karoa 1:14-13:37
3. Vetuġunaġi tarimana ġena mase - karoa 14-15
4. Vetuġunaġi tarimana ġena varigēsi-ġenoġoi ema guba vanuġana ġana ma evaraġeto - karoa 16

Ioane Babatiso ġena ġobata

¹ Iesu Keriso Barau Natuna Varina Namona maigēsina evesinato.

² Peroveta tarimana arana Isaia na etoreato,

“Barau ekirato,

‘Au na ġegu vetuġunaġi tarimana tu batuġu-guineani, ġemu dabara vaġa-maġatana.’

³ Tarima ta tano fakanaġi ekeani, ekirani,

‘Vereġauka ġena dabara ġoiarevaia,

ġena iaġoma dabarana ġovaġa-maoromaoroa!’ ”

⁴ Moġa lorinai Ioane eiaġomato, tano fakanaġi tarimarima ebatisorito-ġoi e eġobatato-ġoi, tarimarima ġeri rakava ġerina beġene vetuġamaġi-kure e beġene raka-kure, ema babatiso beġene ġobia, Barau na ġeri rakava bene tuġamaġi-fitoġari ġana.

⁵ Tarimarima mabarari Iudea vanuġari na e Ierusalem na ġeiaġoto-ġoi Ioane ġenai. Ġeri rakava ġekiraġi-foforirito-ġoi vau, ebatisorito-ġoi Ioridana ġarukanai.

⁶ Ioane ġena dabuġa tu kamela ġwiri na ġeveiato, ġena gabaġau tu nanigosi kefina, ġana ġaniġani dagarari tu madudu e gode nanuri moġo.

⁷ Eġobatato-ġoi, ekirato, “Tarima ta au murigu na beiaġomani, ġia ġena seġuka na au ġegu seġuka tu evanġiani. Au maki asi ilaila ġia ġena tamaka varona baruġaiani.

⁸ Au na ġomi tu nanu na ababatisomini, a ġia na tu Iauka Veaġa na bebatisomini.”

Ioane na Iesu ebatisoato

Mataio 3:13-17; Luka 3:21-22

⁹ Mo negai Iesu tu Nasareta, Galilea vanuġana ta, na eiaġomato, benamo Ioane na Ioridana ġarukanai ebatisoato.

¹⁰ Iesu nanu na eraka-raġasito nuġanai, guba eġitaiato, evekeo-fakato, benamo Iauka Veaġa pune kavana emariġoto ġia ġenai.

¹¹ Benamo garo ta guba na ekea-riġoto, ekirato, “Ġoi tu au Natugu, aura-vinimuni; ema ġemu ai aiaku-rakavani maki.”

Satani na Iesu eribaġaniato

Mataio 4:1-11; Luka 4:1-13

¹² Moġa murinai Iauka Veaġa na Iesu tano fakana ġana etuġu-iaġoato.

¹³ Monai ġaro e boġi gabana vasivasi (40) etanuto, Satani na eriba ġaniato-ġoi. Ġia tu boġa bairi ġesi ġetanuto-ġoi, aneru na ġenariato-ġoi.

Iesu ġena ġauvei esinaiato Galileai

Mataio 4:12-17; Luka 4:14-15

¹⁴ Ioane ġediburaiato murinai, Iesu Galilea ġana eiaġoto, Barau Varina Namona ea ġobata iaġiato-ġoi.

¹⁵ Eġobatato, ekirato, “Barau ġena ġaro tu varau beraġasi, ġena Basileia bevotu, (ġena veġitaġau seġukana evaġa-ruġaiani maigā)! Ġemi rakava ġerina ġovetuġamaġi-kure, Vari Namona nuġami na ġovaġa-moġonia!”

Iesu na tarima vasivasi (4) ekearito, ġia murinai beġene raka

Mataio 4:18-22; Luka 5:1-11

¹⁶ Iesu Galilea kou rikina na eraka-iaġoto-ġoi nuġanai, Simona ma tarina Anduru ġesi eġitarito, ġeri reke kou ai ġefuato, korana ġia tu maina tarimari.

¹⁷ Benamo Iesu na evaġa-guruġarito, ekirato, “Ġoiaġoma, murigu ai ġoma raka, be au na tu tarimarima maina viniri bana vaġa-ribami.”

¹⁸ Benamo maoromaoro ġeri reke ġeraga-kwanerito, Iesu murinai ġerakato.

¹⁹ Asi ġeraka-manaġato, benamo Iesu na Iakobo (o Iames) Sebedaio, tarina Ioane ġesi eġitarito, ġasi ai ġeri reke gwadareri geturirito-ġoi;

²⁰ ekearito, benamo ġia na tamaru Sebedaio ma ġena ġauvei tarimari ġesi ġasi ai ġeraga-kwanerito, Iesu murinai ġerakato.

Iauka rakavana na eboroġiato tarimana

Luka 4:31-37

²¹ Ġeraka-iaġoto, Kaperanaumai ġevotuto. Monai Sabadi ai Iesu Iuda tarimari ġeri rubu ai eraka-togato, benamo evevaġa-ribato.

²² Ġia ġena vevaġa-riba guruġari tarimarima na ġeseġaġirito nai, ġeġaba-rakavato, korana tu ġena guruġa ma seġukana, dia taravatu ġevevaġa-riba iaġiato-ġoi tarimari ġeri guruġa kavana.

²³ Mo rubu ai tarima ta tu iauka rakavana na eboroġiato tarimana. Ġia ekeato, ekirato,

²⁴ “Iesu, Nasareta tarimamu o, kara ġemai noveia otoni? Ġoi tu ġai vaġa-rakavama uranai boiaġoma? Au ribaġu ġoi tu deikara, ġoi tu Barau ġena Veaġa Tarimamu!”

²⁵ Iesu na ekira-ġoiato, “Gurumu! Ġia ġenana noraka-vaġi!”

²⁶ Benamo iauka rakavana na mo tarima evaġa-ġoġo-ġoġoato, benamo ma ġabana ġesi eraka-vaġito.

²⁷ Tarimarima mabarari ġeġaba-rakava rakavato, benamo tauġeri ġevedanaġi-vedanaġito, ġekirato, “Mai tu kara? Vevaġa-riba variguna? Ġia tu ma seġukana na iauka rakavari evaġa-guruġarini, ema garona maki ġeseġaġiani!”

²⁸ Benamo Iesu varina asikauna eraga-rovorovoto Galilea vanuġari mabarari ai.

Iesu na keve tarimari vovoka evaġa-namorito

Mataio 8:14-15; Luka 4:38-39

²⁹ Rubu na ġeraka-rosito murinai, Iakobo (o Iames) ema Ioane ġesi ġeiaġoto, Simona ema Anduru ġeri numai ġea raġekauto.

³⁰ Simona ġena taġama vavinena tu ekeveto, tauġanina eseġukato, be egena-taġoto-ġoi, benamo Iesu ġekira-varaiato.

³¹ Iesu eiaġoto ġenai, ġimanai eġabito, benamo evaġa-tanu vaisiatio. Mo keve ekorito, benamo ġia eġuburito.

³² Lavilavi, ġaro eketoto murinai, tarimarima na keve tarimari e iauka rakavari na ġeboroġirito tarimari Iesu ġenai ġeġori-iaġorito.

³³ Vanuġa tarimari mabarari numa ġoiranai ġevevogoto.

³⁴ Iesu na keve iraurau tarimari vovoka evaġa-namorito e iauka rakavari ġutuma elai-vaġirito. Iauka rakavari mururi ekourito asi beġene guruġa, korana ġia ribari Iesu.

Iesu Galilea vanuġari ai eġobatato

Luka 4:42-44

³⁵ Boġiboġi rekenai, roġosi bene laġani nai, Iesu evariġisito, tano fakana ġana eiaġoto, ea ġuriġurito.

³⁶ Benamo Simona ma karona ġesi Iesu ġea vetauato,

³⁷ ġea doġariato nai, ġekiraiato, ġekirato, “Tarimarima na tu ġoi ġevetaumuni!”

³⁸ Iesu evaġa-veseto, ekirato, “Vanuġa kavinaġiri ġana si-iaġo. Moġeri ai maki bana ġobata, au ġegu iaġoma korana tu moġa.”

³⁹ Benamo ġia eiaġoto Galilea vanuġari mabarari ġana. Rubu ai eġobatato-ġoi e iauka rakavari elai vaġirito-ġoi.

Lepera tarimana Iesu na evaġa-namoato

Mataio 8:1-4; Luka 5:12-16

⁴⁰ Lepera tarimana ta Iesu ġenai eiaġoto, evetui-tarito, benamo enoġiato, ekirato, “Bema ġoi ourani nai, moġoni boiarevaguni, bovaga-namoguni riba.”

⁴¹ Iesu na evetuġaiato, ġimana etuġu-iaġoato, eġabi-karaiato, benamo ekirato, “Aurani, be nonamo!”

⁴² Benamo vaġa-sebo lepera na eraga-kwaneato, enamoto.

⁴³ Iesu na evaġa-guruġa gwaġiġiato, ekirato,

⁴⁴ “Mai veĩga tarima ta asi bono kira-varaia. Noiaĩo, Rubu Veaĩga verena na bene ġitamu, ema veiareva varevare dagarari Mose na ekiraĩgiato ilailanai bono vinya. Be tarimarima beĩene riba, ġoi tu bonamo.”

⁴⁵ Senaĩ ġia tu eiaĩoto, mo veĩga varina efiuato. Moĩesi nai Iesu tu vanuĩa tai asi ma eraka-togato, a tano fakari ai mogo etanuto-ĩoi. Senaĩna tarimarima gabu irauirauri na Iesu tu roĩo ġeiaĩo-viniato-ĩoi.

2

Iesu na rakava etuĩamaĩi-fitoĩarito

¹ Ġaro kotari ġevanaĩto vau, Iesu Kaperanauma ġana eĩenoĩoto. Tarimarima na varina ġeseĩaĩgiato Iesu tu numai.

² Moĩa lorinai tarimarima ġutuma ġeĩaru-vegogoto, numa nuĩana ġevaĩa-vonuato, eiaĩoto ġatama-boka korana maki asi faka ta. Monai vau Iesu na Vari Namona eĩobata-vinirito,

³ nuanai tarima vasivasi (4) na tauĩanina tavi ta emaseto tarimana ta Iesu ġenai ġeĩwa-iaĩoto.

⁴ Tarimarima ġutuma nai, asi ġeri dabara Iesu sevina ġana beĩe raka-kavi iaĩoni. Naima ġia na Iesu eruĩato iatana ġuduĩuna ġeĩu-vaĩgiato vau, keve rakava tarimana ma gedana ġesi ġetuĩu-rĩgoato Iesu goirana ġana.

⁵ Iesu na ġeri veĩabidadama eĩtaiato nai, ġia na keve rakava tarimana evaĩa-guruĩaiato, ekirato, “Natugu, ġemu rakava batuĩamaĩi-fitoĩari.”

⁶ Taravatu ġevevaĩa-riba iaĩgiato-ĩoi tarimari kotari monai tanutaĩori ai, nuĩari ai maiĩesi ġetuĩamaĩi,

⁷ “Karase nai mai tarima moĩesina ekirani? Ġia na Barau ekira-fitoĩaiani. Dei na rakava betuĩamaĩi-fitoĩarini? Barau moĩo ġereĩana!”

⁸ Iesu ma ribana ġia kara ġetuĩamaĩirito-ĩoi nai edanaĩirito, ekirato, “Karase nai manĩesi ġotuĩamaĩi?”

⁹ Aiĩesina baguruĩani tu meraĩa, keve rakava tarimana bavaĩa-guruĩaia, bakira, ‘Ġemu rakava batuĩamaĩi-fitoĩari’ banasi, ba bara kiraia, ‘Noruĩa-vaisi, ġemu geda noĩabia, be noraka’ barasi?

¹⁰ Au na navaĩa-ĩitami, Tarimarima Natuna tu ma ġena maoro, rakava betuĩa-maĩi-fitoĩarini mai tanobarai.” Ġia na keve rakava tarimana evaĩa-guruĩaiato, ekirato,

¹¹ “Akiramuni, noruĩa-vaisi, ġemu geda noĩabia, be numa ġana noiaĩo!”

¹² Maoromaoro eruĩa-vaisito, ġena geda eĩabiato, tarimarima goirari ai erakoro. Moĩa lorinai mabarari ġeĩgaba-rakava rakavato, Barau ġevaĩa-raĩeato, ġekirato, “Maĩesina kavana ta roĩosi tara ġitaia.”

Iesu takesi gogo tarimari ġesi ġeĩaniĩani-vegogoto

Mataio 9:9-13; Luka 5:27-32

¹³ Iesu ma eiaĩoto kou rikinai. Tarimarima ġutuma ġia ġenai ġeiaĩoto, benamo ġia na evaĩa-ribarito.

¹⁴ Iesu eraka-iaĩoto-ĩoi nuĩanai, ġia na Alfeo natuna arana Levi takesi moniri ġeĩabito-ĩoi numanai tanutaĩo eĩtaiato, benamo ekiraiato, ekirato, “Murigu ai noma raka.” Benamo Levi evarĩisito, Iesu murinai erakato.

¹⁵ Iesu Levi ġena numai eĩani-ĩanito-ĩoi nai, takesi gogo tarimari e vei-rakava tarimari ġutuma maki Iesu ma ġena mero ġesi ġeĩaniĩani-vegogoto, korana tarimarima vovoka ġia murinai ġerakato-ĩoi.

¹⁶ Taravatu ġevevaĩa-riba iaĩgiato-ĩoi tarimari, Farisea ġeri doĩoro tarimari, na Iesu ġeĩtaiato, takesi gogo tarimari e vei-rakava tarimari ġesi ġeĩaniĩani-vegogoto-ĩoi, benamo ġia na Iesu ġena mero ġedanaĩirito, ġekirato, “Ġia tu karase nai takesi gogo e vei-rakava tarimari ġesi ġeĩaniĩani-vegogoni?”

¹⁷ Iesu eseĩaĩto, benamo evaĩa-guruĩarito, ekirato, “Namo tarimari na doketa asi beĩe vetaurini, senaĩna keve tarimari na moĩo. Au aiaĩomato maki dia vei-iobukaiobuka tarimari keakeari, senaĩ vei-rakava tarimari.”

Ġaniveaĩa

Mataio 9:14-17; Luka 5:33-39

¹⁸ Ġaro ta Ioane Babatiso ġena mero e Farisea tarimari ġeĩani-veaĩato-ĩoi nai, tarima kotari Iesu ġenai ġeiaĩoto, benamo ġedanaĩgiato, ġekirato, “Kara dainai Ioane Babatiso ġena mero e Farisea tarimari ġeri mero tu ġeĩani-veaĩani, senaĩ ġoi ġemu mero tu asiĩ?”

¹⁹ Iesu na evaġa-veserito, ekirato, “Ġomi ġotuġamaġini, veġaraġo variġu tauna ġatana seviri ai etanuni nuġanai beġe ġani-veaġani ba? Asiġina! Veġaraġo variġu tauna ġatana seviri ai neganai, asi beġe ġani-veaġani.

²⁰ Ġarona eiaġomani veġaraġo tauna ġatana ġerina beġe ġabi-veġitaiani, monai vau beġe ġani-veaġani.

²¹ Tarima ta na dabuġa variġuna veseana dabuġa guinena ġesi asi bebani-vegogoani. Bema moġesina beveiani nai, dabuġa variġuna na guinena bedareani, ema vedarena maki bebaregoni.

²² Tarima ta na vine nanuna variġuna nanigosi kefina guinenai asi besisiani. Bema moġesina beveiani nai, vine nanuna variġuna na nanigosi kefina guinena bevei-fakaiani. Vine nanuna e kefi beġe rakavani. Senaġi vine nanuna variġuna nanigosi kefina variġunai besisiani tu namo.”

Iesu tu Sabadi Verena

Mataio 12:1-8; Luka 6:1-5

²³ Sabadi tai Iesu ma ġena mero ġesi widi vamokari na ġeraka-vanaġito-ġoi nai, ġena mero tu rakarakari ai widi ġebukito-ġoi.

²⁴ Farisea tarimari na Iesu ġekiraito, ġekirato, “Noġitari, ġia kara ġeveini! Maniġesi asi beġene vei Sabadi ai, taravatu.”

²⁵ Iesu na evaġa-veserito, ekirato, “Davida na kara eveiato guruġari ġoiaviato ba asiġina, ġia ma karona ġesi ġevitorito nai?”

²⁶ Barau ġena numai eraka-toġato, Barau ġoiranai ġetorerito-ġoi beredi eġabito, eġanito, karona maki evinirito. Mo beredi tu veaġa veġata, Rubu Veaġa vereri ġereġari moġo ġari. Mo veġa tu Abiata Rubu Veaġa verena baregona ġena negai eġorato.”

²⁷ Benamo Iesu na ma ekirarito, ekirato, “Barau na Sabadi eveiato tu tarimarima ġeri, dia tarimarima eveirito Sabadi ġena.

²⁸ Moġesi nai Tarimarima Natuna tu Sabadi Verena.”

3

Ġima boso tarimana

¹ Ġaro tai Iesu rubu ai ma eraka-toġato. Ġima boso tarimana ta tu monai.

² Tarima kotari maki monai, Iesu ġeġita-taġoato-ġoi, Sabadi ai mo tarima bevaġa-namoani ba, beġene ġita-kaua, be beġene vaġa-bade-iaġia ġetato-ġoi nai.

³ Iesu na ġima boso tarimana evaġa-guruġaiato, ekirato, “Noruġa-vaisi, tarima mabarari ġoirari ai noma ruġa.”

⁴ Benamo Iesu na edanaġirito, ekirato, “Aiġa tu maoro, Sabadi ai veġa namori veiveiri namo ba veġa rakavari sini veiri? Tana vevaġa-maġuri ba tana vaġivaġi?”

Senāġi ġia asi ġeguruġato.

⁵ Iesu ma baruna e ma nuġa-metona ġesi eġita-ġeġeraġirito, korana tarimarima ġenuġa-bubuto nai. Benamo ġima boso tarimana ekiraiato, ekirato, “Ġimamu notuġu-roroġotoa.” Ġimana etuġu-roroġotoato, benamo enamoto.

⁶ Moġa murinai Farisea tarimari rubu na ġeraka-rosito, Heroda murinai ġerakato-ġoi tarimari ġesi ġeboioġa-vegogoto, Iesu kamas i beġe vaġiani dabarana ġevetauato.

Tarimarima ġutuma Galilea kouna rikinai

Luka 6:17-19

⁷ Iesu ma ġena mero ġesi ġeraka-veġitato, Galilea kouna ġana ġeiaġoto. Tarimarima ġutuma lelevaġi Galilea na ġia murina na ġeiaġoto, ema vovoka lelevaġi maki Iudea na,

⁸ Ierusalem na, Idumea na, Ioridana ġaruka mo reke na, Taia e Sidono rekeri na ġeiaġoto, korana Iesu varina ġeseġaġiatio nai.

⁹ Tarimarima ġutuma nai, Iesu na ġena mero ekirarito, ġasi misina ta beġene ġabi-torea, tarimarima ġutuma be beġe ruġaruġa-ġauani garina.

¹⁰ Iesu na keve tarimari ġutuma evaġa-namorito dainai, keve tarimari mabarari maki ġeġoto-iaġoto, Iesu ġenai beġene veġabi-kau ġana.

¹¹ Iauka rakavari na ġeborogirito tarimari na ġia ġeġitaio tu, ġoiranai ġeketo-tarito, ġekoġoto, ġekirato, “Ġoi tu Barau Natuna!”

¹² Iesu na evaġa-guruġa gwaġiġirito, asi beġene vaġa-foforia ġia tu deikara.

Iesu na tarima gabanana ruarua (12) eġabi-viriġirito

Mataio 10:1-4; Luka 6:12-16

¹³ Moġa murinai Iesu ġoro ġana evaraġeto, benamo eura-vinirito tauri ea kearito, benamo ġia ġenai ġeiaġoto.

¹⁴ Iesu na tarima gabanana ruarua (12) eġabi-viriġirito, arari apostolo evatorito, ġia beġene kavaia. Benamo ma bene tuġuri, beġene gobata,

¹⁵ ema seġuka beġene ġabi, iauka rakavari beġene lai-vaġiri.

¹⁶ Eġabi-viriġirito tarimari tu maiġeri; Simona, arana variguna evatoato Petero;

¹⁷ Iakobo (o Iames), Sebedαιο natuna, ma tarina Ioane ġesi, arari variguna evatoato, Boanere, anina tu guba eguruani natuna;

¹⁸ Anduru; Filippo; Batolomeo; Mataio; Tomasi; Iakobo (o Iames), Alfeo natuna; Tadeo; Simona, Selote tarimana;

¹⁹ ema Iudas Isakariota, ġia tu Iesu berevaiani tarimana.

Iesu ema Belsebul

Mataio 12:24-32; Luka 11:14-23; 12:10

²⁰ Iesu tu numai ma eraġekauto. Tarimarima ġutuma lelevaġi ma ġevegogo-ġenoġoito nai, ġia ma ġena mero ġesi asi ġeri ġaniġani dabarana.

²¹ Iesu garagarana na varina ġeseġaġiato, benamo ġabigoina ġeiaġoto, korana tarimarima ġekirato, “Ġia tu bebabo!” ġetato nai.

²² Taravatu ġevevaġa-riba iaġiato-ġoi tarimari Ierusalemna na ġemariġoto, ġekirato, “Belsebul, (mai tu Satani), iauka rakavari ġeri vere, na ġia eboroġiato nai, iauka rakavari elai-vaġirini.”

²³ Benamo Iesu na ekea-iaġoma-rito, barabore ai evaġa-guruġarito, ekirato, “Satani na Satani kamasi belai-veġitaiani?”

²⁴ Bema gavamani ta bevetavini, tauġena bevevaġi-vinini nai, mo gavamani asi beruġani riba.

²⁵ Bema doġoro ta bevetavini, tauġena bevevaġi-vinini, mo doġoro maki asi beruġani riba.

²⁶ Bema Satani bevetavini, tauġena bevevaġi-vinini, ġia asi beruġani, senaġi bekorini.

²⁷ Tarima ta na gwada tarimana ġena numai asi beraka-toġani riba, ġena farefare asi beverariani riba, senaġi mo gwada tarimana bebarubaru-guineani vau, ġena numa farefareri beverariani.

²⁸ Moġoni akiramini, tarimarima rakava beġe veini ema Barau beġe kira-fitoġaiani tarimari ġeri rakava mabarari Barau na betuġamaġi-fitoġarini riba.

²⁹ Senaġi tarima ta na Iauka Veaġa bekira-fitoġaiani tarimana, ġena rakava asi betuġamaġi-fitoġaiani, mo rakava tu betanu-vanaġi vanaġini.”

³⁰ Iesu moġesi ekirato, korana tarima kota ġekirato, “Ġia tu iauka rakavana ġia nuġanai” ġetato nai.

Iesu sinana ema tarina

Mataio 12:46-50; Luka 8:19-21

³¹ Benamo Iesu sinana ma tarina ġeraġasito. Numa murikanai ġeruġa-tarito, ġevetuġoto, Iesu ġea kiraia, ġema vaġa-guruġaia ġana.

³² Ġia tu tarimarima ġutuma na ġetanu-ġeġeraġiato, benamo ġekiraiaito, ġekirato, “Ġoi sinamu e tarimu tu murikai, ġoi ġevetaumuni.”

³³ Iesu na evaġa-veserito, ekirato, “Au sinagu e au tarigu tu deiri?”

³⁴ Benamo ġetanu-ġeġeraġiato tarimari eġitarito, ekirato, “Au sinagu e au tarigu tu maiġeri!”

³⁵ Barau ġena ura ġeveirini tarimari tu au tarigu, e au tobagu, ema au sinagu.”

4

Barabore - Iaraġa tarimana na widi ġueri efiurito

¹ Iesu ma ea vevaġa-riba ġenoġoito Galilea kouna rikina. Tarimarima ġutuma lelevaġi na ma ġea vegogo-ġeġeraġiato nai, ġasi ai ma eraġekauto, benamo etanu-tarito. Ġasi kota ġelei-veġitato, a tarimarima tu kou rikina na moġo ġevegogo-iaġoto.

² Iesu na dagara vovoka evaġa-ribarito barabore ai. Ġia ġena vevaġa-riba nuġanai ekirato,

³ “Goseġaġi! Iaraġa tarimana ta eiaġoto, ġena widi ġueri benea fiuri ġana.

⁴ Efiurito-ġoi nai, kota tu dabarai ġeketoto. Benamo manu ġeiaġomato, ġeġanirito.

⁵ Kotari tu forefore gaburi ai ġeketokauto tano maġiġiri ai. Asikauna ġetubu-raġeto, korana tano iatanai moġo.

⁶ Benamo ġaro eraġekauto nai, ġia ġemaġuġuto, korana lamuri asi ġevariġo-ġitakauto lorina, asikauna ġemaseto.

⁷ Kotari tu ġauġa ġiniġiniri nuġari ai ġeketoto. Benamo ġauġa ġiniġiniri ġetubu-baregato, varovaro dagarari ġetubu-ġaurito e ġetuturarito nai, asi ġeġwato.

⁸ Kotari tu tano namonai ġeketoto, benamo ġetubu-ġinikauto, ġegara-baregato, ġeġwato kotari ġwari tu gabana toitoi (30), kotari tu gabana imaima ma gabanana (60), kotari tu sinau sebona (100).”

⁹ Benamo Iesu ekirato, “Ma seġana tarimana bene seġaġi!”

Kara dainai Iesu na barabore ekiraġirito

Mataio 13:10-17; Luka 8:9-10

¹⁰ Iesu ġereġana moġo ġaronai, ġena mero gabanana ruarua (12) ma ġia murinai ġerakato-ġoi tarimari kotari tu ġia sevinai ruġa-ġeġeraġi, benamo mo barabore anina ġevedanaġi-iaġiato.

¹¹ Iesu na evaġa-guruġarito, ekirato, “Barau ġena Basileia guruġari vekuretoġari ġomi ġemi ai tu foroi, senaġi murika tarimari tu barabore ai avaġa-guruġarini, korana tu,

¹² ‘beġene ġitaia,

senāġi anina asi beġene ribaia,

beġene seġaġia,

senāġi asi beġene tuġamaġi-maoroa,

beġe vetuġamaġi-kureni Barau ġenai,

benamo ġeri rakava betuġamaġi-fitoġarini garina.’ ”

Widi ġueri baraborena anina

Mataio 13:18-23; Luka 8:11-15

¹³ Benamo Iesu na ma evaġa-guruġarito, ekirato, “Mai barabore anina asi ġoribaiani nai, barabore tari tu kamasi boġo ribarini?

¹⁴ Iaraġa tarimana na Barau ġena guruġa efiuani.

¹⁵ Tarima kotari tu widi ġueri dabarai ġeketoni kavana. Guruġa ġeseġaġini nai, Satani na eġabivaġi-ġariġaririni.

¹⁶ Tarima kotari tu widi ġueri forefore ai ġeketoni kavana. Guruġa ġeseġaġini nai, ma iakuri ġesi ġeġabi-raġeani.

¹⁷ Senaġi guruġa tarima nuġari ai asi ġevetoreni nai, asi ġetanu-maukani. Barau ġena guruġa dainai, nega rakavari ġeġoitaġoni, e ġevanerini, o ġevaġa-midigu midigurini ġarori ai ġia ġenana ġeraka-veġitani.

¹⁸ Tarima kotari tu widi ġueri ġauġa ġiniginiri nuġari ai ġefiurini kavana. Barau ġena guruġa ġeseġaġiani,

¹⁹ senaġi tanobara dagarari tuġamaġiri na, tanobara farefareri ġetuġamaġi-gogogorini, ema ġeri ura dagarari kotari na Barau ġena guruġa ġelautariani, naima Barau ġena guruġa ġia ġeri ai asi ġwaġwari.

²⁰ Tarima kotari tu widi ġueri tano namonai ġefiurini kavana. Guruġa ġeseġaġiani, ġeġabi-raġeani, tauri ġevetoreni kotari tu gabana toitoi (30), kotari tu gabana imaima ma gabanana (60), kotari tu sinau sebona (100).”

Lamefa betore-kauani

Luka 8:16-18

²¹ Iesu na ma evaġa-guruġarito, ekirato, “Tarima ta lamefa begabuani nai, ġuro na beġoġoi-tariani o fata gaburenai betoreani? Asiġina, toretorena fatanai betore-kauani.

²² Vekuretoġa dagarari mabarari beġe foroforini, ġeseġo-ġaurito dagarari mabarari beġe ġabi-fakarini.

²³ Ma seġana tarimana bene seġaġi!”

²⁴ Iesu na ma ekirarito, ekirato, “Boġo seġaġirini guruġari boġono tuġamaġi-ġinikauri. Ġemi seġaġi ilailari ai Barau na riba e tuġamaġi-faka bevinimini. Tuġamaġi-faka kotari ma betore-kaurini.

²⁵ Ma ġena seġaġi tarimana tu tuġamaġi-faka beviniani, asi ġena seġaġi tarimana, ġena tuġamaġi-faka misina maki beġabi-vaġiani.”

Barabore - Widi ġueri tauġeri ġetubuni

²⁶ Iesu ma ekirato, “Barau ġena Basileia tu noġa moġo tarima ta, widi ġueri tano ai efiurini kavana.

²⁷ Ġia tu boġi ai egenani, laġani ai evariġisini nuġanai, mo widi ġueri ġetubuni, ġegarani, senaġina ġia tu asi ribana kamasi ġegarani.

²⁸ Tano tauġena na tauna evaġa-ġoraiiani. Guine tu gwabena etoreani, gabivau fekana, moġa murinai tauna etoreani feka nuġanai.

²⁹ Tauna bekirini nai, bebasiani, korana basibasi ġarona bevotu.”

Barabore - Mastadi ġauna ġutuna

Mataio 13:31-32; Luka 13:18-19

³⁰ Iesu evedanaĝito, ekirato, “Barau ĝena Basileia tu kara ĝesi bita vaĝa-ilailaiani? Kamara barabore na bevaĝa-foforiani?”

³¹ Ĝia tu mastadi ĝauna ĝutuna ta noĝa, tanobarai varovaro dagarari ĝueri mabarari fakari ai ĝia ĝereĝana misina korokoro, tano ai ĝevaroani.

³² Senaĝi tano ai ĝevaroani nai, egara-varaĝeni, varovaro dagarari mabarari fakari ai ĝia moĝo barego vedaurea. Ĝia legana maki baregori ĝetubuni. Monai rovo manuri ĝia legana iauĝanai ĝenuĝini.”

³³ Moĝesina kavana baraboreri asisebo ai Iesu na Barau ĝena guruĝa eĝobata-vinirito-ĝoi, ĝia ĝeri riba e tuĝamaĝi-faka ilailari ai.

³⁴ Ĝena ĝobatai barabore asi eraga-kwanerito-ĝoi, senaĝi ĝena mero moĝo ĝereĝari ai vau, guruĝa aniri mabarari evaĝa-foforirito-ĝoi.

Iesu na iavara e geta o ureure ekira-ĝoirito

Mataio 8:23-27; Luka 8:22-25

³⁵ Mo lailavi ai Iesu na ĝena mero ekirarito, ekirato, “Siveĝasi-vanaĝi, kou mo rekena ĝana.”

³⁶ Benamo mo tarimarima ĝutuma ĝeraĝa-kwanerito, ĝena mero na ĝekavaiato Iesu etanu-taĝoto-ĝoi ĝasinai, benamo ĝeĝura-rakaiato. Ĝasi kotari maki ĝia ĝesi.

³⁷ Iavara asi keikeina ta eraĝasito e ureure barego maki ĝasi ai evebubu-ĝurato-ĝoi, ĝasi maki dori evonuto-ĝoi.

³⁸ Iesu tu ĝasi gabinai fila iatanai egenato-ĝoi. Ĝena mero na ĝevaĝoato, ĝekirato, “Vevaĝa-riba tarimamu o, ĝoi tu asi ogarini? Ĝita tu mai taburuni!”

³⁹ Benamo Iesu evarigisito, iavara ekira-ĝoiato e ureure ekiraiato, “Nodoko, asi noĝareva.” Benamo iavara edokoto e emeĝomeĝo-tarito, asi eĝareva-ĝarevato.

⁴⁰ Iesu na ĝena mero ekirarito, ekirato, “Karase nai ĝogarini? Gomi tu roĝo asi ĝemi veĝabidadama?”

⁴¹ Ĝia ĝegari-rakava rakavato, benamo tauĝeri ĝevedanaĝi-vedanaĝito, ĝekirato, “Mai tu kamara tarima? Iavara e ureure na maki garona ĝeseĝaĝiani!”

5

Iesu na iauka rakavari na ĝeboroĝiato tarimana evaĝa-namoato

¹ Kou tavi tai ĝea vanaĝito Gerasa (o Gadara) tarimari ĝeri gabu ai.

² Iesu ĝasi na eraka-riĝoto-ĝoi nai, iauka rakavana na ebororoĝiato tarimana ta gara gabuna na eiaĝomato-ĝoi Iesu ĝenai.

³ Ĝia tu gara kouĝari ai etanuto-ĝoi. Tarimarima ĝia barutarinai ĝeferauto, seini maki ĝia ĝenai asi gwaĝiĝi.

⁴ Nega ĝutuma kwakuna e ĝimana seini na ĝebarurito-ĝoi, senaĝi seini edabu-ĝuturito-ĝoi, ema kwakunai auri dagarari maki elau-kirarito-ĝoi. Ĝia tu gwada rakava, tarima ta na maki asi bevaĝa-maranaiani riba.

⁵ Boĝi e laĝani ai ĝia tu garai e ĝoro tuĝuri ai ekoĝoto-ĝoi ema tauĝena maki fore na everamato-ĝoi.

⁶ Ĝia na Iesu manaĝai eĝitaiato, eraga-iaĝoto, ĝoiranai eketo-tarito,

⁷ ekoĝoto edueto, ekirato, “Iesu o, Iaru-korokoro Barauna Natuna, kara au ĝegu ai noveia otoni? Barau aranai anoĝimuni, asi bono vaĝa-midigu midigugu.”

⁸ Ĝia moĝesi ekirato, korana Iesu na evaĝa-guruĝaiato, ekirato, “Iauka rakavamu, mani tarima ĝenana noraka-vaĝi!”

⁹ Benamo Iesu na edanaĝiato, ekirato, “Ĝoi aramu tu deikara?” Ĝia evaĝa-veseto, ekirato, “Au aragu tu ‘Vetari Tarimari Ĝutuma,’ korana ĝai tu vovoka.”

¹⁰ Ĝia na Iesu enoĝi-ĝiĝiraĝeato, mo gabu na asi bene lai-rosiri.

¹¹ Monai bai serina ĝoro gabakanai ĝedokadokato-ĝoi.

¹² Moĝesina nai iauka rakavari na Iesu ĝenoĝiato, ĝekirato, “Notuĝuma bai ĝeri ai, ĝia nugari ai ĝaraka-toĝa.”

¹³ Iesu na etuĝu-iaĝorito. Benamo iauka rakavari mo tarima ĝenana ĝeraka-vaĝito, bai nugari ai ĝeraka-toĝato. Benamo lalaĝa na ĝekokosi-firiĝoto, kou ai ĝevebora-ĝuĝututo. Mo bai serina nuĝanai bai mabarari 2,000 kavana.

¹⁴ Bai ĝitaĝauri tarimari ĝeraĝato, mo vari ĝea fiuato vanuĝa barana nuĝanai e vanuĝa keiri ai. Tarimarima ĝeraka-rosito, ĝeiaĝoto mo kara eĝorato dagarana ĝitaĝitana.

¹⁵ Iesu ĝenai ĝeraĝasito nai, ĝia na mo tarima iauka rakavari vovoka na ĝeboroĝiato tarimana ĝeĝitaiato, ma dabuĝana e ĝena tuĝamaĝi maki maoro etanu-taĝoto-ĝoi, benamo ĝia mabarari ĝegarito.

¹⁶ Mo veĝa ĝeĝorato, ĝeĝitarito tarimari na iauka rakavari na ĝeboroĝiato tarimana varina, ema bai variri, tarimarima ĝekira-vararito.

¹⁷ Benamo ġia na Iesu ġenoġiato, ġeri tano na bene raka-veġita.

¹⁸ Iesu ġasi ai eraġekauto-ġoi nai, iauka rakavari ġenana ġeraka-vaġito tarimana na enoġiato, Iesu ġesi bene iaġo etato.

¹⁹ Senaġi Iesu na ekiraiato, ekirato, “Noġenoġoi numa ġana e ġemu numa tarimari ġeri ai. Benamo bonoa kira-varvari, Barau na ġemu ai kara beveia ema ġena vevetuġaġwa ġemu ai beġora dagarana.”

²⁰ Benamo ġia eiaġoto Vanuġa Gabanana (10) tanori ai, ea vevari-fiuto, kara Iesu na ġia ġenai eveiato. Benamo tarimarima mabarari ġeġaba-rakavato.

Iesu na kekeni ta ema vavine ta evaġa-namorito

Mataio 9:18-26; Luka 8:40-56

²¹ Iesu ġasi na ma eġenoġito kou tavi ta ġana maia. Mo kou rikinai tarimarima ġutuma lelevaġi na ma ġea ġaru-ġeġeraġiato.

²² Rubu ġitaġauna tarimana ta arana Iairo eiaġoto, Iesu eġitaiato nai, kwakuna koranai evetui-tarito,

²³ ma nuġana mabarana ġesi enoġiato, ekirato, “Au natugu kekenina bekeve-rakava, dori emaseni. Mani ġemu veiġa, noiaġoma, ġimamu iatanai bono tore-kaua, be natugu bene namo!”

²⁴ Benamo Iesu ġia ġesi ġeiaġoto-ġoi nai, tarimarima ġutuma lelevaġi maki ġeġotokauto, ġia na ġeraka-vebibi vebibiato-ġoi.

²⁵ Monai vavine ta, ġena keve tu rara kevena, laġani gabanana ruarua (12) ekeve-iaġiato.

²⁶ Doketa vovoka na muramura ġeviniato-ġoi, senaġi asi enamoto-ġoi. ġena moni mabarari evaġa-koririto, nenamo ġana, senaġi asi enamoto-ġoi, ġena keve moġo emeto-iaġoto-ġoi.

²⁷ ġia na Iesu varina eseġaġiato naima eiaġomato, tarimarima ġutuma nuġari na erakarokokato mo Iesu murinai ea raġasito, benamo ġena dabuġai eveġabikauto.

²⁸ Korana tu ġia evetuġamaġito, “ġena dabuġai moġo baveġabikauni nai banamoni.”

²⁹ Benamo rara kevena edokoto, tauġaninai emami-raġiato ġena keve varau ekorito.

³⁰ Mo negai Iesu eribato, ġia ġenana seġuka eraka-vaġito. Benamo tarimarima ġutuma nuġari na eruġa-kureto, evedanaġito, ekirato, “Deikara na au ġegu dabuġa beġabikaraia?”

³¹ ġena mero ġevaġa-veseto, ġekirato, “Noboġeboġe, mai tarimarima tu ġutuma na ġebebesikaramuni, kamasi tu ma ovedanaġini, okirani, ‘Deikara na beġabikaragu?’ ”

³² Senaġi Iesu tu roġo eboġeboġeto-ġoi, eġabi-karaiato tarimana eġita-vetauato-ġoi.

³³ Mo vavine eriba-maoroto kara ġenai eġorato, benamo ma garina e ma goġo-ġoġona ġesi Iesu kwakuna koranai ea vetui-tarito, benamo kara eġorato mabarana ekiraġi-foforirito.

³⁴ Iesu na mo vavine evaġa-guruġaiato, ekirato, “Natugu, ġemu veġabidadama na bevaga-namomu. Be, ma lakumu ġesi noiaġo, ġemu keve bekorimogovagi.”

³⁵ Iesu roġo eguruġato-ġoi nuġanai, rubu ġitaġauna tauna Iairo ġena numa na tarima kotari ġeiaġomato, Iairo ġekiraiato, ġekirato, “Natumu tu bemase. Vevaġa-riba tarimana asi novaġa-vekvaraġia.”

³⁶ Iesu na mo guruġa tu eseġaġi-ġuiragiato moġo, benamo rubu ġitaġauna tarimana evaġa-guruġaiato, ekirato, “Asi bono gari, bono veġabidadama moġo.”

³⁷ Benamo Iesu na mabarari ekira-goirito, murina na asi beġene iaġo, senaġi Petero, e Iakobo (o Iames), ema tarina Ioane moġo ġia ġesi beġene iaġo.

³⁸ Iairo ġena numai ġeraġasito, benamo Iesu na tarimarima eġitarito, ġeguru-raġeto-ġoi e ġetaġi-guruġa guruġato-ġoi.

³⁹ Benamo Iesu numai eraka-toġato, evaġa-guruġarito, ekirato, “Karase nai goguru-raġeni e ġotaġini? Kekeni tu asi bemase, ġia tu egenani moġo.”

⁴⁰ Senaġina tarimarima na ġerikiriki-iaġiato. Benamo Iesu na etuġu-rosirito, bena kekeni tamana sinana e ġia ġekavaiato tarimari toitoi ġesi moġo kekeni ġevaġa-ġenaiato gabunai ġeraka-toġato.

⁴¹ Benamo Iesu na kekeni ġimanai eġabito, evaġa-guruġaiato, ekirato, “Talita kumi!” Mo guruġa anina tu “Kekeni, au na goi akiramuni, novariġisi!”

⁴² Benamo kekeni vaġa-sebo evariġisito, erakaorakaoto. ġia ġena laġani tu gabanana ruarua (12). Mai veġa eġorato nai, tarimarima ġeġaba-rakava rakavato.

⁴³ Iesu na evaġa-guruġarito, mai veġa varina asiġina ġinavaġi beġene kiraġia etato, ema ekirarito, mo kekeni beġene gubua.

6

Iesu Nasareta tarimari na asi ġeġubakauato

¹ Iesu na mo gabu eraga-kwaneato, benamo ġena vanuġa ġana eiaġoto; ġia ġena mero maki murina na ġeiaġoto.

² Sabadi ġaronai Iesu tu rubu ai ma ea vevaġa-ribato, tarimarima ġutuma na ġeseġaġiato tu, ġeġaba-rakavato, ġekirato, "Mai tarima mai riba tu ainana eġabito? Ġena iaunega maki dei na eviniato? Mai nuġa-farevaġi veġa boruri tu kamasi eveirini ġimana na?"

³ Ġia tu kamuda tarimana, ene? Maria natuna; Iakobo (o James), e Iosefa, e Iudas, e Simona kakari, ema tobana maki sevira iniġeri." Benamo asi ma ġevaġa-moġoniato-ġoi.

⁴ Iesu na ekirarito, ekirato, "Peroveta tarimana tu gabu mabarari ai beġe gubakauani, senaġi ġena vanuġa korikori, garagarana, ema ġena numa tarimari, na moġo asi beġe gubakauani."

⁵ Monai ġia na seġuka veġari boruri asi eveito, a keve tarimari tu sebosebo moġo iatari ai ġimana etore-kauato, evaġa-namorito.

⁶ Iesu edaradara-rakavato, korana asi ġeri veġabidadama nai.

Iesu ġena mero gabanana ruarua (12) etuġurito

Mataio 10:5-15; Luka 9:1-6

Benamo Iesu ma erakato, eiaġoto vanuġa kotari ai ma ea vevaġa-ribato-ġoi.

⁷ Benamo Iesu na ġena mero gabanana ruarua (12) ekearito, benamo ruari ruari etuġurito, ema seġuka evinirito, iauka rakavari beġene lai-vaġiri ġana.

⁸ Iesu na evaġa-naġirito, ekirato, "Kara ta asi boġono ġabi-kaua ġemi iaġoiġo ai, togoi moġo. Dura, ġanigani dagarari e moni maki asi boġono ġwakau.

⁹ Tamaka boġono vei, senaġi sedi ruarua asi boġono vei."

¹⁰ Ma evaġa-gurugaarito, ekirato, "Numa tai boġo raġekauni nai, mo numai moġo boġono tanu, bene iaġo mo, vanuġa boġono raga-kwaneana.

¹¹ Bema vanuġa tai asi beġe ġabi-raġemini e garomi asi beġe seġaġirini nai, boġono raga-kwaneana, kwakumi kauri moġo boġono kwari-ketoketori ġia ġeri kira-sirivaġi vaġa-mogoniri ġana."

¹² Benamo ġeiaġoto, ġea ġobatato, tarimarima ġeri rakava na beġene vetuġamaġi-kure e beġene raka-kure ġana.

¹³ Iauka rakavari vovoka tarimarima ġerina ġelai-vaġirito, keve tarimari ġutuma maki diga na ġedaurito, ġevaġa-namorito.

Ioane Babatiso ġena mase

Mataio 14:1-12; Luka 3:19-20; 9:7-9

¹⁴ Heroda, Galilea verena, na mai veġa variri ea seġaġirito, korana Iesu arana gabu mabarana eraga-rovorovoto. Tarima kotari ġekirato, "Ioane Babatiso mase na ma bevariġisi-ġenoġoi. Moġa lorinai mai veġa baregori mabarari evaġa-foforirini."

¹⁵ Ma kota ġekirato, "Mai tu Elia," ma kota ġekirato, "Mai tu Peroveta tarimana ta, peroveta tarimari guineri kavana."

¹⁶ Senaġi Heroda eseġaġito nai, ekirato, "Mai tu Ioane Babatiso, au na debana abasi-ġutuato tarimana, mase na ma bevariġisi-ġenoġoi!"

¹⁷ Korana Heroda tauġena evetuġuto, Ioane ġea ġabi-tariato, benamo dibura numai ġebarubaruato, ġebiri-ġuato. Mo veġa eveiato, korana tu etava-rariato vavinena Herodia, ġia kakana Filipino ġaraġona, bene vaġa-iakua ġana.

¹⁸ Ioane na Heroda evaġa-guruġaiato-ġoi, ekirato, "Goi na kakamu ġaraġona boġaraġo-veraria tu asi maoro!"

¹⁹ Moġesina nai Herodia na Ioane ebaru-viniato, ġena ura bene vaġia, senaġina asi ġena dabara,

²⁰ korana Heroda na Ioane egari-viniato-ġoi e eġita-ġuato-ġoi. Heroda ribana Ioane tu vei-iobukaiobuka ema veaġa tarimana. Ioane garona eseġaġiato nai, edaradarato-ġoi, senaġi eurato bene seġaġi-vinia.

²¹ Herodia ġena ġaro namona ta eraġasito. Heroda ġena ġora ġarona vetuġamaġi-iaġina verekona o betdei pati eveiato, ġena veġuine-iaġi tarimari baregori, e vetari ġorikauri tarimari, ema Galilea vanuġari ai veġuine-iaġi tarimari ekearito.

²² Herodia natuna ġuatonu ema raka-toġato, benamo ebarato nai, Heroda ma ġena varivari tarimari mabarari ġesi evaġa-iakurito. Benamo Heroda na mo ġuiato ekiraiato, ekirato, "Goi kara oura-viniani dagarana nokiraġia, benamo bavinimuni."

²³ Benamo ekiraiato, ekirato, "Kara bonoġiguni dagarana bavinimuni, ġegu Basileia tavina bonoġiguni maki bavinimuni."

²⁴ Benamo eraka-rosito, sinana edanaġiato, ekirato, "Kara banasi?" Sinana na evaġa-veseato, ekirato, "Ioane Babatiso debana, bonosi!"

²⁵ Benamo mo ġuiato ma eraga-ġenoġoito, benamo vere barana Heroda enoġiato, ekirato, "Au aurani inimoġo Ioane Babatiso debana diġu ai novinigu."

²⁶ Vere barana ma evetuḡamaḡi-ḡenoḡoito, senaḡi asi eurato bene kira-sirivaḡi, korana ḡena varivari tarimari ḡoirari ai ekiraḡi-toreato bene.

²⁷ Maoromaoro vere barana Heroda na tarima debari ebasi-ḡuturito-ḡoi tarimana ta etuḡuato, Ioane debana bene ḡwa-iaḡomaia ḡana. Benamo ḡia eiaḡoto, Ioane Babatiso dibura numanai debana ebasi-ḡutuato.

²⁸ Benamo diḡu ai eḡwa-ḡenoḡoiato, benamo mo ḡuiato ema viniato. ḡia na sinana eviniato.

²⁹ Ioane ḡena mero na mo vari ḡeseḡaḡiato, benamo ḡeiaḡoto, tauḡanina ḡea ḡabiato, benamo gara gabunai ḡea guriato.

Iesu na tarima daḡara imaima (5,000) eḡuburito

Mataio 14:13-21; Luka 9:10-17; Ioane 6:1-13

³⁰ Apostolo tarimari ma ḡeḡenoḡoito Iesu ḡenai, benamo kara ḡeveito e ḡevevaḡa-riba iaḡirito dagarari mabarari ḡekira-varaiato.

³¹ Iesu na evaḡa-guruḡarito, ekirato, “Gabu fakana ta ḡana si-iaḡosi, goa iaḡaraḡi kotuna.” Korana tarimarima vovoka ḡeiaḡomato-ḡoi ema mainana ḡeiaḡoto-ḡoi, be ḡia maki asi ilaila beḡene iaḡaraḡi o beḡene ḡaniḡani.

³² Benamo mabarari ḡasi tai ḡeraḡeto, gabu fakana ta ḡana ḡeiaḡoto.

³³ Senaḡi tarimarima ḡutuma na ḡeḡitarito, ḡeribato aiḡana ḡeiaḡoni. Benamo vanuḡa tata tarimarimari mabarari kwakuri na ḡeraka-ragaraga-iaḡoto, mo gabu ai ḡea raḡasi-guineto.

³⁴ Iesu ḡasi na eraka-riḡoto nai, tarimarima vovoka lelevaḡi eḡitarito, benamo eve-tuḡarito, korana ḡia tu noḡa moḡo mamoe asi ḡitaḡauri tarimana ta noḡa. Benamo ḡia na dagara vovoka evaḡa-ribarito.

³⁵ Elavilavito-ḡoi nai, Iesu ḡena mero ḡia ḡenai ḡeiaḡoto, benamo ḡekirato, “Mai tu gabu fakana e ḡaro maki mo evariḡoni.

³⁶ Notuḡu-rakari, vamoka vei tarimari ḡeri tanu gaburi e vanuḡa kavinaḡiri ḡana ḡeiaḡo, be ḡari ḡaniḡani ḡea voi.”

³⁷ Senaḡi Iesu na evaḡa-veserito, ekirato, “Ḗomi na ḡaniḡani tari ḡoviniri.” Benamo ḡia na ḡedanāḡiato, ḡekirato, “Ḗoi ourani tu ḡaiāḡo, beredi silva moniri sinau ruarua (200) na ḡavoiri, benamo ḡama-ḡuburi otoni?” (Mai tu tarima ta davana ḡue imaima toitoi (8) nuḡanai begabini kavana).

³⁸ Iesu na ekirarito, ekirato, “Ḗomi ḡemi ai beredi tu vira maniḡeri? Ḗoiāḡo, ḡoa ḡitari.” Ḗea ḡitarito, benamo ḡekirato, “Beredi imaima, maḡani-kone ruarua maki.”

³⁹ Iesu na ḡena mero evaḡa-guruḡarito, tarimarima beḡene vareri, doḡoro doḡoro ai ḡauḡa iatari ai beḡene tanutanu-tari.

⁴⁰ Benamo doḡoro loriri ai ḡetanuto, tari sinau sebori (100), tari gabana imaimari (50).

⁴¹ Benamo Iesu na mo beredi imaima e maḡani-kone ruarua eḡabirito, eboḡe-raḡeto, gubai eḡitaiato, Barau evaḡa-namoato vau, beredi etavi-kirakirarito, benamo ḡena mero evinirito beḡene vareri ḡana. Maḡani-kone ruarua maki moḡesina edudu-ḡutuḡuturito.

⁴² Tarimarima mabarari ḡeḡani-maseto.

⁴³ Murinai vau Iesu ḡena mero na beredi kwari e maḡani-kone kwari mabarari ḡevaḡa-vegogo-rito, boseḡa gabanana ruarua (12) ḡevaḡa-vonurito.

⁴⁴ Ḗeḡaniḡanito tauri mabarari tu 5,000.

Iesu nanu iatanai erakato

Mataio 14:22-33; Ioane 6:16-21

⁴⁵ Maoromaoro Iesu na ḡena mero ḡasi ai evaḡa-raḡerito, benamo etuḡu-guinerito kou tavi tai Betesaida ḡana, ma ḡia tu mo tarimarima ḡutuma roḡo etuḡu-lausirito.

⁴⁶ Benamo etuḡu-lausirito murinai, ḡoro ḡana evarāḡeto ḡuriḡuri.

⁴⁷ Emukuna-mukunato-ḡoi nai, ḡasi tu kou nuḡanai, a Iesu tu ḡereḡana tano ai.

⁴⁸ Benamo ḡena mero eḡitarito, ḡevewaraḡi rakavato-ḡoi levai, korana iavara tu ḡoirari na eiaḡomato-ḡoi. Benamo Iesu ḡeri ai eraka-iaḡoto nanu iatana na, ḡasi bene raka-vanaḡia etato. Mo tu horaḡauna 3 ema 6 koloko vefakanai boḡiboḡi rekenai.

⁴⁹ Senaḡi ḡena mero na ḡeḡitaiato, nanu iatanai erakato-ḡoi, ḡetuḡamaḡito, ḡekirato, “Murava ta!” ḡetato. Benamo ḡeḡaba-fouto,

⁵⁰ korana mabarari na ḡeḡitaiato e ḡeḡari-rakavato.

Senaḡina Iesu na eraga-vaḡa-guruḡarito, ekirato, “Ḗokokore, mai tu au, asi ḡogari!”

⁵¹ Benamo ḡasi ai eraḡekauto, ema iavara maki edokoto. Ḗena mero ḡeḡaba-rakavato,

⁵² korana tu mo beredi evaḡa-ḡutumarito nuḡa-farevaḡi veiḡana anina roḡosi ḡere tuḡamaḡi-doḡaria, nuḡari roḡo bubu nai.

Iesu na keve tarimari evaḡa-namorito e evaḡa-maḡuririto Genesareta ai

Mataio 14:34-36

⁵³ Benamo ḡasi ai kou na ḡevanaḡito, Genesareta tanonai ḡeraḡasito. Ḣeri ḡasi monai ḡebaru-tariato.

⁵⁴ Benamo ḡasi na ḡeraka-vaḡito nai, maoromaoro tarimarima na ḡeḡita-leaiato, ḡeribato mo tu Iesu.

⁵⁵ Benamo mo tano mabarana ḡeraga-ḡauato, benamo ḡeri keve tarimari ma gedari ḡesi Iesu ainai ḡeseḡaḡiato-ḡoi gaburi ḡana ḡeḡwa-iaḡorito-ḡoi.

⁵⁶ Iesu na eiaḡo-vinirito-ḡoi gaburi mabarari ai, vanuḡa barari ai, vanuḡa keiri ai, vamoka vei tarimari ḡeri tanu gaburi ai, ḡeri keve tarimari maketi gaburi ai ḡetorerito-ḡoi, benamo ḡenoḡiato-ḡoi, ḡena dabuḡa rikinai moḡo maki beḡene veḡabikau. Ḣeveḡabikauto-ḡoi tarimari tu ḡenamoto-ḡoi e ḡemaḡurito-ḡoi.

7

Namo e rakava

¹ Farisea tarimari e taravatu ḡevevaḡa-riba iaḡiato-ḡoi tarimari kota Ierusalemata na ḡeiaḡomato, Iesu ḡevegogo-ḡeḡeraḡiato.

² Benamo ḡena mero ḡeḡitarito, ḡeḡaniḡanito-ḡoi kota ḡimari ma “mirori” ḡesi, ḡimari asi ḡeḡuriririto ḡia seneri vereri ḡeri vevaḡa-naḡi ilallanai.

³ Boḡono riba, Farisea tarimari e Iuda tarimari mabarari tu asi roḡo beḡe ḡaniḡanini, senaḡi ḡimari roḡo beḡe ḡurigirini murinai vau beḡe ḡaniḡanini. Mai tu ḡia seneri vereri na ḡevaḡa-moḡoniato ema ḡevei-iaḡomaiato-ḡoi veigana.

⁴ Maketi gaburi na beḡe iaḡomani maki asi roḡo beḡe ḡaniḡanini, senaḡi beḡe veḡurigi-guineni vau. Seneri ḡeri vevaḡa-naḡi vovoka kotari maki ḡekorana-iaḡirito-ḡoi, kapusi ḡurigi, ḡuro, ketolo [e geda maki] ḡeḡuriririto-ḡoi.

⁵ Moḡesi nai Farisea tarimari e taravatu ḡevevaḡa-riba iaḡiato-ḡoi tarimari na Iesu ḡedanḡiato, ḡekirato, “Karase nai ḡemu mero na senera vereri ḡeri vevaḡa-naḡi asi ḡekorana-iaḡirini, ḡimari ma ‘mirori’ ḡesi ḡeḡaniḡanini?”

⁶ Iesu na evaḡa-veserito, ekirato, “Isaia na eperoveta-iaḡimito ḡofaḡofa tarimami tu moḡoni, maigesi etoreato,

‘Mai besena tu

mururi koriri ai moḡo

au ḡegubakauḡuni ḡeri Barau,

senaḡina ḡia nuḡari tu manaḡa rakava.

⁷ Ḣetoma-rakarigo vini-kavaguni,

ḡeri vevaḡa-riba tu tarimarima ḡeri vevaḡa-naḡi taravaturi,

a dia au ḡegu!’

⁸ Gomi na Barau ḡena taravatu tu ḡoraga-kwanerini, benamo tarimarima ḡeri vevaḡa-naḡi ḡokorana-iaḡirini.”

⁹ Iesu na ma ekirarito, “Moḡoni, ḡomi na Barau ḡena taravatu ḡotuḡamaḡi-fitoḡarini, tauḡemi ḡemi vevaḡa-naḡi boḡono korana-iaḡiri ḡana.

¹⁰ Mose ekirato, “Tamami sinami boḡono gubakauri. Dei na tamana o sinana guruḡa rakavari eviniani tarimana tu boḡono vaḡi-masea.’

¹¹ Senaḡi ḡomi ḡokirani, tarima ta na tamana o sinana bevaḡa-guruḡaiani, bekirani, ‘Au na ḡomi asi bavaḡa-kavamini, korana bara vinimi dagarana tu au na Koban aviniani nai.’ Koban anina tu Barau ḡena.

¹² Moḡesi veigai ḡomi na tarima ḡokouani, tamana e sinana asi bene vaḡa-kavari ḡana.

¹³ Gomi na senemi ḡeri vevaḡa-naḡi ḡerina Barau ḡena guruḡa asi tauri ai moḡo ḡovaḡa-iaḡorini. Dagara vovoka moḡesi ḡoveirini.”

Tarimarima ḡevaḡa-rakavarini dagarari

Mataio 15:10-20

¹⁴ Benamo Iesu na tarimarima ḡutuma ma ekea-vegogorito ḡenai, benamo ekirarito, ekirato, “Mabarami ḡoseḡaḡi ema boḡono riba-maoro.

¹⁵ Tarimarima murika na ḡeḡanirini, ḡevariḡoni tarima nuḡari ḡana, dagarari na tarima asi ḡevaḡa-rakavarini, senaḡi tarimarima nuḡari o loruri ḡuturi na ḡemaraḡeni dagarari na vau tarimarima ḡevaḡa-rakavarini. [¹⁶ Ma seḡana tarimana bene seḡaḡi!]”

¹⁷ Iesu na mai tarimarima ḡutuma eraga-kwanerito, numai eraḡekauto; benamo ḡena mero na mo barabore anina ḡevedanaḡi-iaḡiato.

¹⁸ Iesu na evaḡa-guruḡarito, ekirato, “Ḣomi maki asi ḡotuḡamaḡi-fakani? Asi ḡoribani, murika na ḡevariḡoni dagarari na tarimarima asi ḡevaḡa-rakavarini?”

¹⁹ Korana mo tu dia loruna na ġevariġoni, senaġina sinaġena na ġevariġoni, be ġeiaġoni moġo.” Moġa anina tu, ġia na ġaniġani mabarari evaġa-moġonirito, asi ġeri rakava.

²⁰ Benamo ma ekirato, “Kara tarimarima loruna na emaraġeni, monana tarimarima evaġa-rakavaiani,

²¹ korana tarima loruna na tuġamaġi rakavari, kima veiġari, lema, vaġivaġi,

²² veġura-vanaġi, mata-ġaniġani, veiġa rakavari mabarari, ġofaġofa, mata-boraġa, mama, vevaġa-bade, veiavi, vei-babobabo ġeiaġomani.

²³ Mabarari dagara rakavari, maġeri loruna na ġemaraġeni, tarima ġevaġa-rakavarini.”

Vavine ta ġena veġabidadama

Mataio 15:21-28

²⁴ Iesu monana evariġisito, Taia e Sidono tanori ġana eiaġoto. Benamo numa tai ea raġekau-ġairito, ġia asi eurato tarima ta na bene ribaia ġia tu monai, senaġi asi ġena vekuretoġa dabarana.

²⁵ Vavine ta, natuna ġuiatona iauka rakavana na eboroġiato, Iesu varina eseġaġiato nai, eiaġoto, kwakuna koranai evetui-tarito.

²⁶ Mo vavine tu Grik vavine, Siriafonisia ai emaġurito. Benamo ġia na Iesu enoġiato, mo iauka rakavana natuna ġuiatona ġenana bene lai-vaġia.

²⁷ Benamo Iesu na ekiraiato, ekirato, “Mero misiri roġo beġene ġani-mase guine, korana asi maoro, mero misiri ġari ġaniġani bita ġabirini, kwaiva bita fiu-vinirini.”

²⁸ Vavine na ma evaġa-veiseato, ekirato, “Vereġauka, mani tu moġoni, senaġi kwaiva maki fata gaburenai mero misiri ġeġaniġanini momori tu ġeġanirini.”

²⁹ Benamo ġia na mo vavine ma evaġa-guruġaiato, ekirato, “Maniġesi bovaġa-veise dainai, noġenoġoi, iauka rakavana tu natumu ġenana beraka-vaġi.”

³⁰ Benamo mo vavine eġenoġoito ġena numa ġana nuġanai, natuna ġuiatona ea doġariato, ġena gedai eġena-taġoto-ġoi eġitaiato, iauka rakavana tu moġoni eraka-vaġito.

Iesu na seġa-bubu e muru-bubu tarimana evaġa-namoato

³¹ Benamo Iesu Taia tanona eraga-kwaneato, Sidono e Vanuġa Gabanana (10) tanori eraka-vanaġirito, Galilea kou ai eraġasito.

³² Benamo tarima kotari na seġa-bubu e asi eguruġa-ginikauto-ġoi tarimana ta ġeġabi-iaġoato, benamo ġenoġiato, ġimana iatanai bene tore-kausa.

³³ Benamo Iesu na tarimarima ġutuma nuġari na eġori-veġitaiato, didina seġana kouġanai eduġi-toġarito, ekanunuto, benamo meana eġabi-karaiato.

³⁴ Gubai eboġe-raġeto, eiaġa-raġeto ma ġabana ġesi, ekirato, “Efata!” anina tu “Noġwa-faka!”

³⁵ Benamo seġana ġeġwa-fakarito, meana everuġato, eroroġototo, benamo eguruġa-ġitakauto.

³⁶ Iesu na ekirarito, tarima ta asi beġene kira-varaia, senaġi ekirarito-ġoi guruġari tu asi ġeseġaġiato-ġoi, ġia varina tu ġefiu-rovorovoato-ġoi.

³⁷ Tarimarima nuġari ġefarevaġi-rakavato, ġekirato, “Ġia na dagara mabarari evei-ġitakaurini, seġa-bubu tarimari evaġa-seġaġirini, muru-bubu tarimari evaġa-guruġarini.”

8

Iesu na tarimarima daġara vasivasi (4,000) eġuburito

¹ Mo negai tarimarima ġutuma lelevaġi ma ġevegogo-ġenoġoito. Ġia asi ġari ġaniġani nai, Iesu na ġena mero ekea-kavirito sevina ġana, benamo evaġa-guruġarito, ekirato,

² “Au na mai tarimarima avetuġarini, korana mai tu ġaro toitoi veġata au ġesi maġeri, nuġanai tu asi ġari ġaniġani.

³ Bema au na batuġu-ġenoġoirini ġeri vanuġa ġana ma vitori ġesi nai, dabara beġe borimarini, korana kotari tu gabu manaġa na ġeiaġomato nai.”

⁴ Benamo ġena mero na ġevaġa-veiseato, ġekirato, “Kamara dabara tarima ta na mai tarimarima beredi na beġuburini mai tano fakanai?”

⁵ Benamo Iesu na edanaġirito, ekirato, “Gomi ġemi ai beredi tu vira?” Ġia ġevaġa-veseto, ġekirato, “Imaima ruarua (7).”

⁶ Iesu na vegogo tarimari evaġa-guruġarito, tano ai ġetanutanu-tari. Benamo beredi imaima ruarua (7) eġabirito, Barau evaġa-namoato, ebuki-ġuturito, ġena mero evinirito, mo tarimarima ġoirari ai beġene toretore-tariri ġana. Benamo moġesi ġeverito.

⁷ Ġia ġeri ai maki maġani-kone misiri kotari. Iesu na Barau ma evaġa-namoato, ġena mero ekirarito, moġeri maki ġevareri.

⁸ Benamo tarimarima ġeġani-maseto murinai, Iesu ġena mero na ġaniġani kwari ġeġogorito, boseġa mabarari imaima ruarua (7) ġevaġa-vonurito.

⁹ Tarimarima mabarari tu 4,000 kavana. Benamo Iesu na etuġu-rovorovorito,

¹⁰ ma ġia ema ġena mero ġesi ġasi ai ġeraġeto, Dalmanuta tanona ġana ġeiaġoto.

Farisea tarimari ġeri ura vetoġa ta guba na bene mariġo

Mataio 16:1-4

¹¹ Farisea tarimari kota Iesu ġenai ġeiaġoto, benamo ġedanagi-ribaġaniato. Ġeri ura vetoġa ta guba na bene mariġo.

¹² Iesu iaġana eġaniato ma nuġa metona ġesi, benamo ekirato, “Karase nai toma ġuru tarimari na vetoġa ġeġita-vetaurini? Moġoni akiramini, vetoġa ta asiġina ġinavaġi bavinimini!”

¹³ Benamo eraga-kwanerito, ġasi ai ma eraġeto, kou tavi ta ġana ea vanaġito.

Farisea tarimari e Heroda

Mataio 16:5-12

¹⁴ Iesu ġena mero ġevetuġa-rekwato, ġaniġani asi ġeġabikauto, beredi sebona moġo ġasi ai.

¹⁵ Benamo Iesu na esisiba-vinirito, ekirato, “Lorimi boġono vetore, Farisea tarimari e Heroda ġari farao evaġa-tubuani muramurana garina.”

¹⁶ Benamo mo guruġa tauġeri fakari ai ġeverori-iaġiato, ġekirato, “Moġesina bekira, korana ġita tu asi ġara beredi nai.”

¹⁷ Iesu na eribarito, benamo evaġa-guruġarito, ekirato, “Karase nai beredi ta sevimi ai asiġi guruġana ġoveini? Gomi roġosi boġono riba, roġosi boġono tuġamaġi-faka? Nuġami maki roġo bubu?”

¹⁸ Ma matami, senaġi asi ġoġitani? Ma seġami, senaġi asi ġoseġaġini? Asi ġovetuġamaġi-taġoni maki?

¹⁹ Au na beredi imaima abuki-ġutuġuturito tarimarima 5,000 ġari nai, beredi kwari ġogogorito tu, boseġa vira ġovaġa-vonurito?” Ġia ġevaġa-veseto, ġekirato, “Gabanana ruarua (12).”

²⁰ “Au na beredi imaima ruarua (7) abuki-ġutuġuturito tarimarima 4,000 ġari nai, beredi kwari ġogogorito tu boseġa vira ġovaġa-vonurito?” Ġia ġevaga-veseto, ġekirato, “Imaima ruarua (7).”

²¹ Benamo Iesu na ekirarito, “Ġomi roġosi boġono tuġamaġi-faka?”

Iesu na mata-bubu tauna matana evaġa-iaġaiato Betesaida ai

²² Ġia Betesaida ġana ġeiaġoto, benamo tarima kotari na mata-bubu tauna ta Iesu ġenai ġeġori-iaġoato, benamo ġenoġiato, bene ġabi-karaia.

²³ Benamo Iesu na mata-bubu tauna ġimanai eġabito, eġori-rosiato vanuġa na, benamo matana ekanunuato, ma ġimana ġenai etore-kaurito, edanaġiato, “Dagara tari oġitarini ba?”

²⁴ Mo tarima eboġe-vaisito, ekirato, “Oi, tarima tari aġitani, senaġina noġa moġo ġau noġa ġerakao-rakaoni.”

²⁵ Benamo Iesu ġimana matanai ma etore-kaurito, benamo eboġeboġe-ginikauto, dagara mabarari egita-ginikaurito.

²⁶ Benamo Iesu na numa ġana etuġu-iaġoato, evaġa-guruġaiato, ekirato, “Vanuġa nugana na asi bono iaġo.”

Petero na Iesu tu Kerisona ekiraġito

Mataio 16:13-20; Luka 9:18-21

²⁷ Iesu ma ġena mero ġesi Kaisarea Filipi tanona vanuġari ġana ġeiaġoto-ġoi nuġanai, dabarai Iesu na ġena mero edanaġirito, ekirato, “Tarimarima tu kara ġetoni au tu dei?”

²⁸ Ġia ġevaġa-veseto, ġekirato, “Kotari ġekirani tu Ioane Babatiso, ma kotari tu Elia, ma kotari tu peroveta tarimana ta.”

²⁹ Iesu na edanaġirito, ekirato, “Senaġi ġomi tu kara ġotoni au tu dei?” Petero na evaġa-veseato, ekirato, “Ġoi tu Keriso, (Barau na ekiraġi-toreato vevaġa-maġuri tauna).”

³⁰ Benamo Iesu na evaġa-guruġarito, tarima ta asi beġene kira-varaia.

Iesu ġena mase e varigiġi-ġenoġoi guruġari

Mataio 16:21-28; Luka 9:22-27

³¹ Benamo Iesu na ġena mero ma evaġa-ribarito, ekirato, “Tarimarima Natuna tu midigu vovoka roġo beġanini. Iuda vereri, e Rubu Veaġa vereri baregori, e taravatu ġevevaġa-riba iaġiani tarimari na beġe ruġaiani; ema beġe vaġi-maseani maki, senaġina ġaro toitoi murinai mase na ma bevarigiġi-ġenoġoini.”

³² Mai guruġa ekiraġi-foforiato, benamo Petero na eġori-veġitaiato, ekira-ġoiato.

³³ Senaĝi Iesu eruĝa-kureto, ĝena mero eĝitarito, ĝia na Petero ekira-ĝoiato, ekirato, “Satani, noraka-vegita, korana ĝemu tuĝamaĝi tu dia Barau ĝena, senaĝi tarimarima ĝeri moĝo.”

³⁴ Iesu na tarimarima ĝutuma ma ĝena mero ĝesi ekea-vegogorito, benamo evaĝa-guruĝarito, ekirato, “Bema tarima ta eurani au murigu ai bene raka etoni tarimana, tauĝena bene veruĝa, ĝena satauro bene ĝwaia, au murigu ai bene raka.

³⁵ Korana deikara ĝena maĝuri moĝo lorina etoreani tarimana, ĝena maĝuri befitoĝaiani. A deikara au daigu ai e Vari Namona dainai ĝena maĝuri befitoĝaiani tarimana, ĝena maĝuri asi bevei-rekwarekwaiani.

³⁶ Bema tarima ta na tanobara mabarana uranai ĝena maĝuri befitoĝaiani, ĝena namo tu kara ĝia ĝenai?

³⁷ Korana tarima ta ĝena maĝuri efitoĝaiato nai tu, kara na vau ma bevoi-ĝenoĝoiani?

³⁸ Deikara na au bemaiake-viniguni ema ĝegu guruĝa bemaiake-viniani mai veĝuravanaĝi e vei-rakava tarimari ĝoirari ai, ĝia maki Tarimarima Natuna na bemaiake-viniani ĝena iaĝomai, ĝia Tamana mamana marevana e seĝuka baregona e ma ĝena aneru veaĝari ĝesi beĝe iaĝomani ĝaronai.”

9

¹ Benamo ekirarito, ekirato, “Moĝoni akiramini: Tarima kotari mai ĝeruĝa-taĝoni tu asi roĝo beĝe maseni, beiaĝoni mo, Barau ĝena Basileia ma seĝukana ĝesi beiaĝomani beĝe ĝitaiani.”

Iesu vetoĝana eirauto

Mataio 17:1-13; Luka 9:28-36

² Ĝaro imaima sebona (6) ĝevanaĝito murinai, Iesu na Petero, e Iakobo (o Iames), ema Ioane eĝabirito, benamo ĝoro baregona tai eĝori-raĝerito. Monai ĝia ĝereĝari moĝo nuĝanai Iesu ĝeĝitaiato, vetoĝana eirauto,

³ ema ĝena dabuĝa ekuro-ĝaroĝaroto, tanobarai tarima ta na asi ilaila moĝesina bevaĝa-kurokuroani.

⁴ Benamo ĝia ĝoirari ai Elia ma Mose ĝefoforito, Iesu ĝesi ĝeguruĝa guruĝato-ĝoi.

⁵ Benamo Petero na Iesu evaĝa-guruĝaiato, ekirato, “Vevaĝa-riba tarimamu o, namo vedaurea ĝita tu maiĝera, be fouta toitoi ĝaragari. Ta ĝoi ĝemu, ta Mose ĝena, ta Elia ĝena.”

⁶ Petero asi ribana kara bekiraĝiani, korana ĝia tu ĝegari-rakavato.

⁷ Benamo magube na ema iauka-taririto, ekumu-ĝaurito nuĝanai, garo ta magube nuĝana na ekea-rosito, ekirato, “Mai tu au Natugu, aura-viniani; ĝia boĝono seĝaĝi-vinia!”

⁸ Ĝia na mo gabu ĝeraga-ĝita-ĝeĝeraĝiato, senaĝi ta asi ĝeĝitaiato ĝia ĝesi, Iesu moĝo ĝereĝana.

⁹ Ĝoro na ĝemariĝoto-ĝoi nuĝanai, Iesu na evaĝa-guruĝarito, kara ĝeĝitaiato dagarana tarima ta asi beĝene kira-varaia, bene iaĝo mo, Tarimarima Natuna mase na ma bene variĝisi-ĝenoĝoi.

¹⁰ Moĝa lorinai ĝena guruĝa fakari ai moĝo etanuto, senaĝi ĝia fakari ai ĝeverorito, mai mase na variĝisi-ĝenoĝoi anina tu kara.

¹¹ Benamo ĝia na Iesu ĝedanaĝiato, ĝekirato, “Karase nai taravatu ĝevevaĝa-riba iaĝiani tarimari ĝekirani, Elia tu beiaĝoma-guineni?”

¹² Iesu evaĝa-veseto, ekirato, “Moĝoni, Elia tu beiaĝoma-guineni, dagara mabarari bevaĝa-variĝurini. A Tarimarima Natuna guruĝana kamasi ĝetoreato midigu vovoka beĝanini e beĝe ĝita-fitoĝaiani?

¹³ Senaĝi akiramini, Elia tu varau eiĝomato, ema ĝeri ura veaĝari ĝia ĝenai varau ĝeveirito, ĝia guruĝana Buka Veaĝai ĝetore-guineato ilailanai.”

Iesu na iauka rakavana na eboroĝiato merona evaĝa-namoato

Mataio 17:14-21; Luka 9:37-43

¹⁴ Gena mero ĝeri ai ĝevotuto tu, tarimarima ĝutuma lelevaĝi na ĝeruĝa-ĝeĝeraĝirito, ĝeĝitarito, taravatu ĝevevaĝa-riba iaĝiato-ĝoi tarimari maki ĝia ĝesi ĝeveĝare veĝareto-ĝoi.

¹⁵ Tarimarima na Iesu ĝeĝitaiato nai, nuĝari ĝefarevaĝito, benamo ĝenai ĝeraga-iaĝoto, ĝea vaĝa-namoato.

¹⁶ Iesu na edanaĝirito, ekirato, “Mai tarima ĝesi tu kara veĝare-veĝarena ĝoveini?”

¹⁷ Benamo tarima ta ĝutuma nuĝari na evaga-veseto, ekirato, “Vevaĝa-riba tarimamu, au natugu ĝoi ĝemu ai baĝori-iaĝomaia. Ĝia tu muru-bubu iaukana na eboroĝiato nai, asi eguruĝani.

¹⁸ Ma mai iauka na eḡabiani ḡarori ai, tano ekwarāḡi-iaḡiani. Bokana na kaburoburo ḡeraka-rosini, gadikana eveḡara-tarini, tauḡanina egwaḡiḡini. Moḡa lorinai ḡoi ḡemu mero banogiri, mai iauka rakavana ḡelai-vaḡia basi, senaḡi beḡe lai-kavaia.”

¹⁹ Benamo Iesu ekirato, “Asi veḡabidadama tarimami! ḡaro vira au ḡomi sevimi ai bana tanu? ḡaro vira bana vevaga-gwaḡiḡi vinimi? ḡogori-iaḡomaia!”

²⁰ Benamo mo mero Iesu sevina ḡana ḡeḡori-iaḡoato. Iauka rakavana na Iesu eḡitaiao nai, vaḡa-sebo mero evaḡa-ḡoḡo-ḡoḡoato, tano ai eketoto, egena-vebiro vebiroto, bokana na kaburoburo ḡeraka-rosito.

²¹ Iesu na mero tamana edanaḡiato, ekirato, “Aitoma mai keve edogaḡiato?” Tamana evaḡa-veseto, ekirato, “Mai tu keina na veḡata!”

²² Nega vovoka iauka rakavana na karavai efu-kauani, ema nanu ai efu-reiani bene vaḡia ḡana. Bema dagara ta boveiani riba nai, mani ḡemu veḡa, boro vetuḡa-ḡwama, boro vaḡa-kavama.”

²³ Benamo Iesu ekirato, “Bema dagara ta boveiani riba otoni? Barau ḡenai eveḡabidadamani tarimana dagara mabarari beveirini riba.”

²⁴ Benamo mero tamana asikauna eḡaba-fouto, ekirato, “Au aveḡabidadamani, senaḡi ḡegu tuḡamaḡi iauvoiauvo noma borogia.”

²⁵ Iesu na tarimarima ḡutuma ḡeraga-vegogoto-ḡoi eḡitarito nai, ḡia na mo iauka rakavana ekira-ḡoato, ekirato, “Muru-bubu e seḡa-bubu iaukana, akiramuni, noraka-vaḡi, ma nuḡanai asi ma bono raka-toḡa ḡenoḡoi!”

²⁶ Benamo iauka rakavana eḡaba-fouto, ḡia na mero evaḡa-ḡoḡoḡo rakavaiao, benamo eraka-vaḡito. Mero tu ḡitaḡitana noḡa emaseto, moḡa lorinai tarimarima ḡutuma ḡekirato, “Mai tu bemase.”

²⁷ Senaḡi Iesu na ḡimanai eḡabito, einu-vaisiato, benamo eruḡa-vaisito.

²⁸ Moḡa murinai Iesu numai eraḡekauto, ḡena mero na vekuretoḡai ḡedanaḡiato, ḡekirato, “Karase nai ḡai na iauka rakavana asi ilaila baḡa lai-vaḡia?”

²⁹ Benamo Iesu na evaḡa-veserito, ekirato, “Iauka maiḡesina lailairi tu kara ta asiḡina, senaḡina ḡauḡau [e ḡaniveaḡa] ḡereḡana moḡo.”

Iesu ḡena mase ma ekiraḡi-ḡenoḡoiao

Mataio 17:22-23; Luka 9:43-45

³⁰ Mo gabu ḡeraga-kwaneato, Galilea tanona na ḡevanaḡito. Iesu asi ḡena ura tarima ta bene riba ḡia tu ainai,

³¹ korana ḡena mero evaḡa-ribarito, ekirato, “Tarimarima Natuna tu beḡe revaiani vau, tarimarima ḡimari ai beḡe toreani, benamo beḡe vaḡi-maseani, senaḡi beḡe vaḡiani nai, ḡaro toitoi murinai tu ma bevariḡisi-ḡenoḡoini.”

³² Senaḡi ḡia tu asi ḡeriba-maoroto Iesu tu kara ekiraḡiato, senaḡi asi ma ḡedanaḡiato, korana ḡegarito nai.

Deikara tu barego vedaurea

Mataio 18:1-5; Luka 9:46-48

³³ Kaperanaumai ḡeraḡasito, benamo Iesu na numa nuḡanai vau edanaḡirito, ekirato, “ḡomi dabarai tu kara ḡokiraḡiani-ḡoi?”

³⁴ Senaḡi ḡia tu asi ḡevaḡa-veseto, korana dabarai tu, deikara barego vedaurea ḡekiraḡiato-ḡoi.

³⁵ Iesu etanu-tarito, ḡena mero gabanana ruarua (12) ekearito, benamo ekirarito, ekirato, “Dei bene guine etoni tarimana tu gabi taunai bene iaḡo, ema tarimarima mabarari vetuḡunaḡiri bene iaḡo-vini.”

³⁶ Benamo ḡia na mero keina ta eḡabiato, ḡia fakari ai evaḡa-ruḡa-tariato, efani-vaisiato, benamo ekirarito, ekirato,

³⁷ “Dei na mero keina maiḡesina kavana beḡabi-raḡeani au aragu ai, ḡia na tu au beḡabi-raḡeguni. Bema tarima ta na au beḡabi-raḡeguni tu, dia au ḡereḡagu moḡo beḡabi-raḡeguni, senaḡi etuḡuguto Barauna maki beḡabi-raḡeani.”

Deikara na ḡita asi bevaḡa-rakavarani tarimana tu ḡita ḡesi

Luka 9:49-50

³⁸ Ioane na Iesu ekiraiao, ekirato, “Vevaḡa-riba tarimamu, tarima ta ḡaḡitaiao, ḡoi aramu ai iauka rakavari elai-vaḡirito-ḡoi, senaḡi ḡai na ḡakira-ḡoiao, korana ḡia tu dia ḡita ḡesi taraka-vegogoni.”

³⁹ Iesu na ekirarito, ekirato, “Asi boḡono kira-ḡoia, korana tarima ta au aragu ai nuḡa-farevaḡi veḡa boruri eveirini tarimana tu, au murigu ai au asi ma bekira-rakavaguni.

⁴⁰ Korana deikara na ḡita asi evaḡa-rakavarani tarimana tu ḡita ḡesi.

⁴¹ Moḡoni akiramini, tarima ta na nanu kapusina au aragu ai bevinimini, korana ḡomi tu Keriso ḡena tarima nai, ḡia voina tu beḡabiani veḡata.”

Tarima ta na mero misina ḡena veḡabidadama asi bene vaḡa-rakavaia
Mataio 18:6-9; Luka 17:1-2

⁴² “Bema tarima ta na au eḡabidadama-viniguni mero misina ta ḡena veḡabidadama evaḡa-rakavaiani, ḡia tu bere namo fore baregona ta ḡaiḡonai ḡere baru-kaua, davarai ḡere fiu-reia.

⁴³ Bema ḡoi ḡimamu na evaḡa-rakavamuni nai, bono basi-ḡutua. ḡimamu sebonai maḡuri vanaḡivanaḡi bono doḡaria tu namo, a asi namo ḡimamu ruarua karava eḡara-vanaḡi vanaḡini asi ebuseri gabuna ḡana boiaḡoni. [⁴⁴ Monai ‘dimu na beḡe ḡani-vanaḡi vanaḡimini, ema karava asi ebuseri.]

⁴⁵ Bema ḡoi kwakumu na evaḡa-rakavamuni nai, bono basi-ḡutua. Kwakumu sebonai maḡuri vanaḡivanaḡi bono doḡaria tu namo, a asi namo kwakumu ruarua karava eḡara-vanaḡi vanaḡini gabunai beḡe fiu-kaumuni. [⁴⁶ Monai ‘dimu na beḡe ḡani-vanaḡi vanaḡimini, ema karava asi ebuseri.]

⁴⁷ Bema ḡoi matamu na evaḡa-rakavamuni nai, bono ḡibo-vaḡia. Matamu sebonai Barau ḡena Basileiai bono raka-toḡa tu namo, a asi namo matamu ruarua karava eḡara-vanaḡi vanaḡini gabunai beḡe fiu-kaumuni.

⁴⁸ Monai ‘dimu na beḡe ḡani-vanaḡi vanaḡimini, ema karava asi ebuseri.’

⁴⁹ Mabarari karava na bedamenarini, beiarevarini.

⁵⁰ Damena tu namo, senaḡi bema damena mamina bekorini nai, mamina kamasi ma bovaḡa-mamina ḡenoḡoiani? Nuḡami ai damena bene tanu, e ḡomi tata karomi ḡesi maino nuḡanai boḡono tanu.”

10

Veḡaraḡo ruḡaruḡana

¹ Iesu mo gabu eraga-kwaneato, benamo Iudea tanona ḡana eiaḡoto, Ioridana ḡarukana tavi tai evanaḡito. Tarimarima ḡutuma lelevaḡi ḡia ḡenai ma ḡeiaḡoto, benamo eveito-ḡoi kavana ma evaḡa-ribarito.

² Benamo Farisea tarimari ma ḡeiaḡoto, benamo ḡea danaḡi-ḡofakauato, ḡekirato, “Tau ta ḡaraḡona befitoḡaiani nai, taravatu na beḡabiani?”

³ Iesu na ma evaḡa-veserito, ekirato, “Mose ḡena taravatu nuḡanai kara etoni?”

⁴ Gekirato, “Mose ḡena taravatu tu maiḡesi ekirani, veḡaraḡo ruḡaruḡana fefana betoreani vau, ḡaraḡona betuḡu-rakaiani.”

⁵ Iesu na ekirarito, ekirato, “Mose na mai taravatu etoreato, korana ḡomi nuḡami tu roḡo bubu.

⁶ Senaḡina Barau na dagara mabarari eveirito nai, ḡia na tarimarima maki eveirito tau e vavine.

⁷ Moḡesina nai tau ta na tamana e sinana beraga-kwanerini, ḡaraḡona ḡesi beḡe tanuni.

⁸ Benamo ḡia tauri ruarua beḡe sebonani, moḡa lorinai ḡia tu dia ruarua, senaḡi sebona moḡo.

⁹ Moḡesi nai dei Barau na evaḡa-sebonarito tu, tarima ta na asi ma bene tore-kirari.”

¹⁰ Ma ḡeḡenoḡoito numai, ḡena mero na ma ḡedanagaḡato mo guruḡa anina tu kara.

¹¹ Iesu na evaḡa-veserito, ekirato, “Deikara na ḡaraḡona betuḡu-rakaiani, vavine ta ma beḡaraḡoani, ḡia tu beveḡura-vanaḡini.

¹² Vavine maki moḡesina, ḡia ḡaraḡona beraga-kwaneani, tau ta na ma beḡaraḡoani, ḡia maki beveḡura-vanaḡini.”

Iesu na mero misiri evaḡa-namorito

Mataio 19:13-15; Luka 18:15-17

¹³ Tarima kotari na natiri ḡeḡwa-iaḡorito-ḡoi Iesu ḡenai bene ḡabi-karari ḡana, senaḡi ḡena mero na gekira-ḡoirito.

¹⁴ Iesu na eḡitarito nai tu ebaruto. Benamo ḡena mero ekirarito, ekirato, “Mani mero misiri ḡeiaḡoma au geḡu ai, asi golai-ḡoiri, korana Barau ḡena Basileia tu manigesina kavana tarimari ḡeri.

¹⁵ Moḡoni akiramini, dei na Barau ḡena Basileia asi beḡabi-raḡeani mero misina na kavana, ḡia Basileiai tu asi beraka-toḡani.”

¹⁶ Benamo Iesu na mero misiri efaḡa-vaisirito, benamo ḡimana iatari ai etore-kaurito, evaḡa-namorito.

Farefare vovoka tarimana

Mataio 19:16-30; Luka 18:18-30

¹⁷ Iesu monana ma evaisi-raġeto, benamo erakato nuġanai, tarima ta ġenai eraga-iaġoto, benamo ġoiranai ea vetui-tarito, edanaġiato, ekirato, “Vevaġa-riba tarimamu namona, au tu kara baveini vau maġuri vanaġivanaġi baġabiani?”

¹⁸ Iesu na evaġa-veseato, ekirato, “Goi tu karase nai au namogu okiraġini? Tarima ta asi namo, Barau moġo ġereġana.

¹⁹ Taravatu mabarari akorana-iaġirini. ‘Asi bono vaġivaġi, asi bono veġura-vanaġi, asi bono lema, asi bono vevaġa-daġa ġofaġofa, asi bono ġabi-kuretoġa, tamamu sinamu bono gubakauri.’”

²⁰ Benamo mo tarima ekirato, “Vevaġa-riba tarimamu, au tu keigu na beiġoma toma, mani taravatu mabarari akorana-iaġirini.”

²¹ Iesu na eġitaiato ma veuravinina ġesi ekirato, “Dagara sebona moġo orabuni, noiaġo, ġemu farefare mabarari noa voivoi-iaġiri, rabu tarimari bono viniri, benamo gubai tu ma ġemu farefare; ma bono iaġoma, murigu ai bonoma raka.”

²² Mo tarima na mai guruġa eseġaġiato nai, ġoirana evaġa-gwaġiġiato, nuġana ma metona ġesi eraka-veġitato, korana ġia ġena farefare tu ġutuma lelevaġi.

²³ Benamo Iesu na ġena mero eġita-ġeġeraġirito, benamo evaġa-guruġarito, ekirato, “Ġeri farefare vovoka tarimari Barau ġena Basileiai ġeri rakatoġa tu gwaġiġi rakava.”

²⁴ Benamo Iesu mero na mo guruġa ġeseġaġiato nai, nuġari ġefarevaġito, senaġi Iesu na ma evaġa-guruġa ġenoġoirito, ekirato, “Natuġore, Barau ġena Basileia rakatoġana tu gwaġiġi rakava.

²⁵ Kamela nila kadarena na bevanaġini tu kotuna gwaġiġi, senaġi ġena farefare vovoka tarimana Barau ġena Basileiai ġena rakatoġa tu gwaġiġi rakava.”

²⁶ Benamo ġena mero nuġari ġefarevaġi-rakavato, benamo ġevaġa-guruġaiato, ġekirato, “Be deikarari vau maġuri beġe ġabiani?”

²⁷ Iesu na eġitarito, benamo ekirato, “Tarimarima ġeri ai tu asi ilaila, senaġi Barau ġenai tu ilaila, korana Barau ġenai dagara mabarari tu ilaila.”

²⁸ Petero na ekiraiato, ekirato, “Goi ribamu, ġai ġema dagara mabarari tu ġaraga-kwanerito, benamo ġoi murimu ai ġarakani.”

²⁹ Iesu evaġa-veseto, ekirato, “Moġoni akiramini, tarima ta ġena numa eraga-kwaneato, o tarikakana merori, tobana, sinana, tamana, natuna e ġena tano au daigu ai ema Vari Namona dainai,

³⁰ ġia mai maġuri nuġanai ġena numa, tarikakana merori, tobana, sinana, natuna e tano sinau-sinau beġoitaġoni, ema midigumidigu maki; ema ġaro beiaġomani nai, maġuri vanaġivanaġi bedoġariani.

³¹ Senaġi tarimarima ġutuma toma ġeguineni tu beġe gabini, gabi tarimari tu beġe guineni.”

Iesu ġena mase ma ekiraġi-foforiato

Mataio 20:17-19; Luka 18:31-34

³² Iesu ma ġena mero ġesi Ierusalemata ġana ġevaraġeto-ġoi, dabara na ġeraka-iaġoto-ġoi, Iesu tu ġoirari ai erakato, benamo ġia ġeġaba-rakavato, ema muriri na ġerakato tarimari maki ġegarito. Benamo Iesu na ġena mero gabanana ruarua (12) ma eġori-veġitarito, benamo ġenai kara beġe ġorani dagarari ekira-vararito,

³³ ekirato, “Ġeseġaġi, ġita tu Ierusalemata ġana tavarageeni. Monai Tarimarima Natuna tu Rubu Veaġa vereri baregori e taravatu ġevaġa-riba iaġiani tarimari ġimari ai beġe toreani. Ġia na ġena mase guruġana beġe vaġa-moġoniani, benamo irau bese (o Roma) tarimari ġimari ai beġe toreani.

³⁴ Ġia na beġe vaseva-vaseva iaġiani, beġe kanunuani, beġe kwariani e beġe vaġi-maseani. Senaġi ġaro toitoi murinai ma bevariġisi-ġenoġoini.”

Iakobo (o James) ma Ioane ġeri noġinoġi

Mataio 20:20-28

³⁵ Benamo Sebedaiato natuna, Iakobo ma Ioane, Iesu ġenai ġeiaġoto, benamo ġekirato, “Vevaġa-riba tarimamu, ġai ġaurani kara baġa noġimuni dagarana bono vinima.”

³⁶ Iesu na ekirarito, ekirato, “Kara ġemi ai bana veia ġotoni?”

³⁷ Benamo ġia na ġevaġa-guruġaiato, ġekirato, “Ġai ġaurani, ġai ta aroribamu rekenai, ma ta tu kaurimu rekenai baġana tanu ġoi ġemu Basileia marevana nuġanai.”

³⁸ Senaġi Iesu na ekirarito, ekirato, “Gomi tu asi ribami kara ġonoġiani. Au na midigu bedina banuani ġomi maki boġo niuni riba? Au beġe babatisoguni babatisona ġomi na maki boġo ġabiani riba?”

³⁹ Ma ġevaġa-veseto, ġekirato, “Oi.” Iesu na ekirarito, ekirato, “Moġoni, au banuani bedinai gomi maki boġo niuni, ema au beġe babatisoguni babatisona ġomi maki beġe babatisomini.

⁴⁰ Senaĝi aroribagu rekenai o kaurigu ai boĝono tanu ĝotoni tu, dia au na bavaĝa-moĝoniani, a mai tu Barau na eĝabi-torerito tarimari ĝeri.”

⁴¹ Mai guruĝa mero gabanana (10) ĝeseĝaĝiato nai, Iakobo e Ioane ĝebaru-vinirito.

⁴² Benamo Iesu na mabarari ekea-vegogorito, benamo evaĝa-guruĝarito, ekirato, “Gomi ribami, irau bese tarimari ĝeri vere na tarimarima ĝedori-naĝinaĝirini, ema ĝeri veguine-iaĝi tarimari baregori na tu ĝeri maoro seĝukari na ĝelaunaĝi-naĝirini.

⁴³ Senaĝi ĝomi fakami ai moĝesina tu asi boĝono vei. Bema ta gomi fakami ai bene vere etoni nai tu, ĝomi mabarami vetuĝunaĝimi bene iaĝo-vini,

⁴⁴ ema dei bene guine etoni tarimana, ĝia tu mabarari ĝeri vetuĝunaĝi tarimanai bene iaĝo.

⁴⁵ Korana Tarimarima Natuna eiaĝomato tu, dia tarimarima na ĝia vetuĝunaĝina beĝene iaĝo-vini ĝana, senaĝina ĝia eiaĝomato tu, tarimarima vetuĝunaĝiri bene iaĝo-vini, ema ĝena maĝuri bene tore-taria, tarimarima ĝutuma bene voi-ĝenoĝoiri e bene vaĝa-maĝuriri ĝana.”

Iesu na mata-bubu tarimana Batimeo matana evaĝa-namoato

Mataio 20:29-34; Luka 18:35-43

⁴⁶ Ieriko ai ĝeraĝasito, monana Iesu ma ĝena mero e tarimarima ĝutuma lelevaĝi ĝesi Ieriko ma ĝeraga-kwaneato nuĝanai, Batimeo, mata-bubu e noĝivegame tarimana, Timeo natuna, dabara rikinai etanu-taĝoto-ĝoi.

⁴⁷ Ĝia eseĝaĝito Iesu, Nasareta tarimana, tu ĝia sevinai, benamo ekea-fouto, ekirato, “Iesu o, Davida natuna, au novetuĝa-ĝwagu!”

⁴⁸ Tarimarima ĝutuma na ĝekira-ĝoiato, asi bene guruĝa ĝetato, senaĝi ĝia ekea-ĝigiraĝe ĝigiraĝeto-ĝoi, “Davida Natuna o, au novetuĝa-ĝwagu!”

⁴⁹ Iesu eruĝa-tarito, benamo ekirato, “Gokeaia.” Benamo ĝia na mata-bubu tarimana ĝekeaĝo, ĝekirato, “Asi bono gari, novariĝisi, Iesu na ekeamuni bene.”

⁵⁰ Benamo ĝena koudi fitoĝaĝo, eburi-vaisito, Iesu sevina ĝana eiaĝoto.

⁵¹ Benamo Iesu na edanaĝiato, ekirato, “Kara ĝemu naveia otoni?” Mata-bubu tarimana evaĝa-veseto, ekirato, “Vevaĝa-riba tarimamu, matagu noma keo-fakaia.”

⁵² Benamo Iesu ekirato, “Noiaĝo, ĝemu vegabidadama na bevaĝa-namomu.” Benamo asikauna matana enamoto e eboĝeboĝe-ginikauto, benamo Iesu murina na dabara na eraka-iaĝoto.

11

Iesu ĝena rakatoĝa Ieruselema ai ĝevonevone-raĝe viniato

Ioane 12:12-19

¹ Ĝeraka-iaĝoto-ĝoi, Ieruselema ĝekavinaĝiato-ĝoi, ma Betefage e Betania ai ĝeraĝasito Olive Gorona rekenai, benamo Iesu na ĝena mero ruarua etuĝu-ĝuinerito,

² ekirarito, ekirato, “Ĝoiĝo, ĝoira vanuĝana ĝana. Boĝo raĝasini nai, doniki natuna ta barutarinai boĝo ĝitaiani, iatanai tarima ta roĝosi bene raĝe. Boĝono ruĝaia, benamo boĝono ĝori-iaĝomaia.

³ Bema tarima ta na bedanaĝimini, bekirani, ‘Ĝomi tu karase nai maniĝesi goveiani?’ betoni nai, boĝono kiraia, ‘Vereĝauka na eura-viniani, vau ma betuĝu-ĝenoĝoiani.’”

⁴ Benamo ĝerakato, ĝeiaĝoto, doniki natuna ĝea ĝoitagoato numa ta ĝoiranai barutari. Geruĝaĝiato-ĝoi nuĝanai,

⁵ monai ĝeruĝa-taĝoto-ĝoi tarimari na ĝedanaĝirito, ĝekirato, “Ĝomi tu karase nai mani doniki natuna ĝoruĝaiani?”

⁶ Benamo ĝevaĝa-veserito Iesu na ekirarito kavana, vau ĝetuĝu-rakarito.

⁷⁻⁸ Benamo doniki natuna Iesu ĝenai ĝeĝori-iaĝoato, ĝeri dabuĝa barari doniki doĝenai ĝeiava-kaurito, benamo Iesu etanukauto. ⁸ Tarimarima ĝutuma ĝeri dabuĝa barari dabarai ĝeiavarito. Kota tu ĝau lauri boĝai ĝebasito, benamo dabarai ĝetorerito.

⁹ Ĝoirai e gabi ai ĝerakato tarimari mabarari na ĝevone-raĝeato-ĝoi, ĝekirato, “Hosana, Vereĝauka aranai

eiaĝomani tarimana sivaĝa-namoa!

¹⁰ Davida ĝita Tamara

ĝena Basileia eiaĝomani,

sivaĝa-namoa!

Hosana guba tuĝunai!”

¹¹ Iesu Ieruselemai eraĝasito nai, Rubu Veaĝa nuĝanai eraka-toĝato, dagara mabarari eĝita-vaĝa-ĝaurito. Senaĝi elavilavito nai, ĝia ma ĝena mero gabanana ruarua (12) ĝesi ĝeraka-rosito, Betania ĝana ma ĝeĝenoĝoito.

Iesu na figi ġauna etovogaiato

Mataio 21:18-19

¹² Ma elaġanito, ġia na Betania ġeraga-kwaneato, ġeraka-iaġoto-ġoi nuġanai, Iesu evitoato.

¹³ Eboġeto, figi ġauna ma launa ta eġitaiato fakana kota manaġai, benamo eiagoto, nea ġitaia ma tauna ba asiġina. Monai ea raġasito tu, ġwana ta asi edoġariato, launa korina moġo, korana ġena ġwa ġarona roġo nai.

¹⁴ Benamo Iesu na figi ġauna ekiraiato, ekirato, “Ġoi ġwaġwamu tarima ta na asi ma beġaniani, toma beiagōni vanaġivanagi!” Mai guruġa ġena mero na ġeseġaġiato.

Iesu na Rubu Veaġa eiarevaiato

Mataio 21:12-17; Luka 19:45-48; Ioane 2:13-22

¹⁵ Ierusalemaj ġevotuto, Iesu Rubu Veaġa nuġanai eraka-toġato, benamo voivoi tari-mari elai-rosirito. Moni ġesenisito-ġoi tarimari ġeri fata e pune ġevoivoi-iaġirito-ġoi tarimari ġeri diġoka eġuke-vevuburito.

¹⁶ Rubu Veaġa nuġana na ġeri farefare ġeġwa-iaġorito-ġoi tarimari maki ekira-ġoirito.

¹⁷ Benamo tarimarima evaġa-ribarito, ekirato, “Buka Veaġa nuġanai tu maiġesi etore-ato, Barau ekirato, ‘Au ġegu numa tu bese irauirau ġeri ġurigiuri numanai beġe kiragiani,’ senaġi ġomi na tu lema tarimari ġeri gumu gabunai boġo vaġa-iaġoa.”

¹⁸ Rubu Veaġa vereri baregori e taravatu ġevevaġa-riba iaġiato-ġoi tarimari na ġeseġaġiato nai, Iesu beġene vaġia dabarana ġevetauato. Iesu garina ġeveito-ġoi, korana tarimarima mabarari na ġena vevaġa-riba guruġari ai ġegaba-rakavato-ġoi.

¹⁹ Elavilavito, benamo Iesu ma ġena mero ġesi vanuġa barana ġeraga-kwaneato.

Figi ġauna emaseto

Mataio 21:20-22

²⁰ Boġibogġi ai dabara na ma ġeraka-vanaġito nuġanai, mo figi ġauna ġeġitaiato, emarai-ġosito, ġokana maki ġemaseto.

²¹ Petero na etuġamaġi-taġoato, benamo Iesu ekiraiato, ekirato, “Vevaġa-riba tari-mamu, noġitaia, ġoi na mo figi ġauna otovogaiato dagarana tu varau bemase.”

²² Benamo Iesu na evaġa-veserito, ekirato, “Barau boġono ġabidadama-vinia.

²³ Moġoni akiramini, tarima ta na mai ġoro bekiraiani, ‘Noveraġa-raġe, be davarai noa vefiu-rei,’ benamo nuġana asi ma bedaradarani, senaġi bevaġa-moġoniani, kara bekiraġiani dagarana bemoġonini nai, mo veġa tu beġorani.

²⁴ Moġa lorinai akiramini, kara boġo noġini ġauġau ai nai, boġo vaġa-moġonia, boġo doġaria, benamo boġo ġabiani.

²⁵ Bema ġoruġa-tarini, benamo ġoġauġauni nai, rakava boġono tuġamaġi-fitoġari, bema tarima ta ġenai ma ġemi nuġa meto nai, benamo ġomi Tamami gubai etanuni na maki ġemi rakava betuġamaġi-fitoġarini. [²⁶ Senaġi bema ġomi na tarima ġeri rakava asi boġo tuġamaġi-fitoġarini nai, ġomi Tamami gubai etanuni na maki ġemi rakava asi betuġamaġi-fitoġarini.]”

Iesu ġena seġuka korana ġedanaġiato

Mataio 21:23-27; Luka 20:1-8

²⁷ Benamo ġia Ierusalemaj ma ġeraġasito. Monai Iesu Rubu Veaġa nuġanai erakato-ġoi nuġanai, Rubu Veaġa vereri baregori, e taravatu ġevevaġa-riba iaġiato-ġoi tarimari, ema Iuda vereri ġia ġenai ġeiaġoto.

²⁸ Benamo ġedanaġiato, ġekirato, “Kamara maoro ai ġoi na mai veġa oveirini? Dei na maoro evinimuto?”

²⁹ Iesu na evaġa-veserito, ekirato, “Au na vedanaġi sebona avinimini, boġo vaġa-veseani nai, au na kamara maoro ai mai veġa aveirini bakira-varamini.

³⁰ Ioane ġena babatiso veġana tu guba na eiagomato, ba tarimarima ġerina?”

³¹ Ġia fakari ai ġeverorito, ġekirato, “Bema ġita bita kirani, ‘Barau ġenana’ bita toni nai, ġia bekirani, ‘Karase nai Ioane asi ġovaġa-moġoniato?’ betoni.

³² Senaġi bema ġita bita kirani, ‘Tarimarima ġerina’ bita toni nai maki asi ilaila.” Ġia tu tarimarima gariri ġegarito, korana ġia ribari, Ioane tu peroveta tarimana korikori.

³³ Moġa lorinai ġia na Iesu ġevaġa-veseato, ġekirato, “Ġai asi ribama.” Benamo Iesu na ġia maki ekirarito, ekirato, “Au na maki kamara maoro ai mai veġa aveirini asi bakira-varamini.”

¹ Iesu na barabore ai ma evaġa-guruġarito, ekirato, “Tarima ta vine tavoġana evaroato, maġuna eġabiato, tano ai vine gigi-gigina gurina ekwaiato, tavoġa ġitaġauna numana maki evaġa-ruġaiato. Moġa murinai tavoġa ġitaġauna tarimari ġeri ai ġena tavoġa eraga-kwaneato, benamo erakato gabu ta ġana.

² Vine ġwari (o grapes) ġemaġeto, benamo ġia na ġena vetuġunaġi tauna ta etuġuato tavoġa narinarina tarimari ġeri ai, vine ġwari kota benea ġabi ġana.

³ Senaġi ġeġabi-tariato, benamo ġekwariato vau, ġimana kori ġetuġu-ġenoġoiato.

⁴ Tavoġa biaguna na ġena vetuġunaġi tauna ta ma etuġuato, senaġi ġia tu debana ġekodo-fakaiato e ġevei-maiaka maiakiaiato.

⁵ Benamo ta ma etuġuato, senaġi ġevaġi-maseato; ema vetuġunaġi tarimari ġutuma etuġurito, kota tu ġekwaririto, kota tu ġevaġirito.

⁶ Tarima sebona ta tu roġo ġia sevinai, ġia natuna korikori, ġena lalokau merona. Dokonai ġia etuġuato, ekirato, ‘Natugu natuġua, ġia na beġene gubakaua.’

⁷ Senaġi tavoġa ġitaġauna tarimari tauġeri ġevaguruġa-vevinito, ġekirato, ‘Mani tu tavoġa beġaunaiani merona, be siġabia, sivaġia, benamo tavoġa tu ġita ġera.’

⁸ Benamo ġeġabi-tariato, ġevaġiato, vine tavoġana murikanai ġefiu-rosiato.”

⁹ Iesu evedanaġito, ekirato, “Tavoġa biaguna na tu kara beveiani? Ġia beiaġomani, tavoġa narinarina tarimari bevaġi-ġosirini, benamo vine tavoġana tarima irauri tari ma bevinirini.

¹⁰ Gomi na mai toretore Buka Veaġai asi ġoiaviani, iniġesi ekirani,

‘Fore numari ġeragarini tarimari na asi ġeura-viniato ma ġefitoġaiato forena tu duġu forenai eiaġoto.

¹¹ Mai veġa maġa tu Vereġauka na eveiato,

matarana taġitaiani, ġitaġitana irau veġata.”

¹² Benamo Iuda vereri na Iesu beġene ġabia dabarana ġevetauato, korana ġia ribari, Iesu na mai barabore tu ġia ekiraġirito-ġoi nai. Senaġi tarimarima ġutuma ġevagoga-taġoto-ġoi gariri ġeveito naima ġeraga-kwaneato, ġerakato.

Kaisara, Roma ġeri vere, ġena takesi moniri

Mataio 22:15-22; Luka 20:20-26

¹³ Gabivau Farisea tarimari e Heroda murinai ġerakato-ġoi tarimari kotari Iesu ġenai ġetuġu-iaġorito, ġena guruġai beġene vaġa-vedaġa-raġea e beġene ġabia ġana.

¹⁴ Ġeiaġomato, benamo Iesu ġema ribaġaniato, ġekirato, “Vevaġa-riba tarimamu, ġai ribama ġoi tu moġoni vei-iobukaiobuka tarimamu, tarimarima gariri asi oveini. Tarima ġeri dagi maki asi otuġamaġirini, senaġi ġoi na mogoni ai Barau ġena dabara ovevaġa-riba iaġi-ġitakuani. Novaġa-ribama, Kaisara, Roma ġeri vere, ġenai takesi baġana dava ba asiġi? Baġana vinia ba asi baġana vinia?”

¹⁵ Senaġi Iesu na ġeri ġofaġofa eribaiato nai, ekirarito, ekirato, “Karase nai au ġoribaġaniguni? Silva monina ta ġoġwa-iaġomaia, nama ġitaia.”

¹⁶ Benamo ta ġeġwa-iaġomaiato, Iesu na edanaġirito, ekirato, “Mai tu dei laulauna e dei arana?” Ġia ġevaġa-veseto, ġekirato, “Kaisara ġena.”

¹⁷ Iesu na ekirarito, “Kaisara ġena dagara Kaisara boġono vinia, Barau ġena dagara Barau boġono vinia.” Benamo ġegaba-rakavato ġia ġenai.

Varġisi-ġenoġoi guruġari

Mataio 22:23-33; Luka 20:27-40

¹⁸ Sadukea tarimari kota Iesu ġenai ġeiaġoto. Ġia ġeri tuġamaġi tu, mase tarimari asi ma beġe varġisi-ġenoġoini. Benamo Iesu ġedanaġiato, ġekirato,

¹⁹ “Vevaġa-riba tarimamu, Mose na taravatu ġai ġema maġesina etoreato, ‘Bema tau ta kakana bemaseni, vabuna bemase-kwaneani, ma asi naturi nai, mo tau na kakana vabuna bene ġaraġoa, naturi beġene maġuri mase tauna ġena.’

²⁰ Mero mabarari tu imaima ruarua (7). Mero guinena na eġaraġoato, ma emaseto asi natuna.

²¹ Mero vaġa-ruaruana na vabuna ma eġaraġoato, senaġi ġia maki emaseto asi natuna. Mero vaġa-toitoina maki moġesina moġo.

²² Moġa nuġanai ġia mabarari tu imaima ruarua (7), naturi ta asi ġevaġa-ġoraiato. Dokonai mo vavine maki emaseto.

²³ Varġisi-ġenoġoi ġaronai mo vavine tu dei ġaraġona? Korana ġia tu tauri 7 na ġeġaraġoato.”

²⁴ Iesu na evaḡa-veserito, ekirato, “Ĝomi tu ḡokerereni, korana Buka Veaḡa anina ema Barau ḡena seḡuka asi ribami.

²⁵ Mase na ma beḡe variḡisi-ḡenoḡoini tarimari tu asi ma beḡe veḡaraḡoni. Ĝia tu aneru kavana gubai.

²⁶ Mase na ma beḡe variḡisi-ḡenoḡoini guruḡari Mose ḡena bukai asi ḡoiaviani? Ĝau eḡaraiato varina nuḡanai Barau na Mose ekiraiato, ekirato, ‘Au tu Aberahamo ḡena Barau, Isako ḡena Barau, ema Iakobo ḡena Barau.’

²⁷ Ĝia tu dia mase tarimari ḡeri Barau, senaḡi maḡuri tarimari ḡeri Barau. Ĝomi tu ḡokerere-rakava rakavani!”

Veuravini tu taravatu mabarari evanagiritu

Mataio 22:34-40; Luka 10:25-28

²⁸ Taravatu ḡevevaḡa-riba iaḡiato-ḡoi tarimana ta eiaḡomato, ḡeri guruḡa-guruḡa eseḡaḡiato, benamo eḡitaiato, Iesu na evaḡa-vese ginikaurito nai, edanaḡiato, ekirato, “Taravatu mabarari nugari ai aḡa tu barego vedaureana?”

²⁹ Iesu na evaḡa-veseato, ekirato, “Barego vedaureana tu maiḡa: ‘Isaraela tarimami o, ḡosegaḡi, Vereḡauka gita gera Barau tu Vereḡauka sebona kwarigutu.

³⁰ Vereḡauka ḡoi ḡemu Barau bono ura-vinia ma nuḡamu mabarana, ma iaukamu mabarana, ma ḡemu tuḡamaḡi mabarana, ma kokoremu mabarana gesi.’

³¹ Vaḡa-ruaruana tu maiḡa: ‘Sevimu tarimana bono ura-vinia, ḡoi tauḡemu oveura-vinini kavana.’ Taravatu ta na mai taravatu ruaruasi bevanagirinini.”

³² Taravatu evevaḡa-riba iaḡiato-ḡoi tarimana ma evaḡa-veseto, ekirato, “Vevaḡa-riba tarimamu, ḡoi ḡemu guruḡa tu moḡoni, Barau tu sebona moḡo, asi ta maia.

³³ Bono ura-vinia ma nuḡamu mabarana, ma ḡemu tuḡamaḡi mabarana, ma gwadamu mabarana, ema sevimu ai etanuni tarimana maki bono ura-vinia, ḡoi tauḡemu oveura-vinini kavana. Maiḡa tu barego vedaurea, ginitaḡo dagarari e boubou dagarari mabarari evanagiritu.”

³⁴ Benamo Iesu na mo tarima ḡena vevaḡa-vese eḡitaiato ma iaunegana e ma tuḡamaḡi-fakana gesi, benamo ekiraiato, ekirato, “Ḣoi e Barau ḡena Basileia fakami tu asi managa.”

Moḡa murinai tarima ta na asi ma edanaḡiato, korana ḡegarito nai.

Keriso tu Davida natuna ba Davida ḡena Vereḡauka?

Mataio 22:41-46; Luka 20:41-44

³⁵ Iesu Rubu Veaḡa nuḡanai evevaḡa-ribato-ḡoi nuḡanai, ekirato, “Taravatu ḡevevaḡa-riba iaḡiani tarimari tu kamasi nai Keriso tu Davida natuna ḡetoni?”

³⁶ Davida Iauka Veaḡa na riba e tuḡamaḡi-faka eviniato, benamo eguruḡa-foforito, ekirato,

‘Barau na au ḡegu Vereḡauka ekiraiato:

Au ḡimagu aroribana rekenai

noma tanu,

bene iaḡo mo, ḡoi ḡebaru-vinimuni tarimari ḡoi kwakumu gaburenai batorerini.’

³⁷ Davida na Keriso tu ‘Vereḡaukana’ ekiraḡito; kamasi nai Keriso tu Davida natuna?”

Taravatu ḡevevaḡa-riba iaḡiato-ḡoi tarimari ḡeri ḡofaḡofa veigari

Mataio 23:1-36; Luka 11:37-54; 20:45-47

Tarimarima ḡutuma lelevaḡi Iesu ḡena guruḡa ma iakuri gesi ḡeseḡaḡiato.

³⁸ Gena vevaḡa-riba nuḡanai ekirato, “Taravatu ḡevevaḡa-riba iaḡiani tarimari boḡono gita-ginikauri. Ĝia ḡeurani dabuḡa maukari beḡene rigo, maketi gaburi ai beḡene rakao-rakao, tarimarima na beḡene vaḡa-namori urari ai.

³⁹ Rubu nugari ai e ḡanivegogo gaburi ai ḡeri ura sea namori ai beḡene tanu.

⁴⁰ Ĝia na vabu ḡeri numa e farefare ḡevaḡa-koririnini. Ĝeri ḡauḡau tu mauka kenene, ḡeḡofaḡofani. Ĝia tu meto barego vedaurea beḡe gabini.”

Vabu ḡena boubou monina

Luka 21:1-4

⁴¹ Iesu moni-tore mauḡana ḡoiranai etanu-tarito, benamo tarimarima moni ḡeḡurato-ḡoi eḡitarito. Farefare e moni vovoka tarimari ḡutuma moni barari ḡeḡurato-ḡoi.

⁴² Senaḡi asi-ḡena e asi-ḡana vabuna ta eiaḡomato, ḡena moni misiri ruaruasi moḡo eḡura-rigorito, mai tu noḡa moḡo toea sebona kavana.

⁴³ Benamo Iesu na ḡena mero ekearito ḡia ḡenai, benamo ekirarito, ekirato, “Moḡoni akiramini, mai vabu na beḡuraia monina na mabarari ḡeri vini bevanagiri.

⁴⁴ Korana ḡia mabarari ḡeri moni vovoka ḡerina koturi moḡo beḡe vini, senaḡi mai vabu tu asi ḡena-ḡana na nuḡanai ḡenai kara ḡetanuni ḡena maḡuri ai bere vevaḡa-kava-iaḡiri dagarari mabarari beḡurari.”

13

Iesu na vau beġea ġorani dagarari ekiraġirito

¹ Iesu Rubu Veaġa na eraka-rosito-ġoi nai, ġena mero ta na ekiraiato, ekirato, “Vevaġa-riba tarimamu, mai fore asikeikeiri noġitari e mai numa baregori ma marevari maki noġitari.”

² Iesu na evaġa-veseato, ekirato, “Mai numa baregori oġitarini? Mai fore ta fore ta iatanai asi beġe tanuni, mabarari beġe vare-bubu-riġorini.”

³ Iesu Olive Ġorona tuġunai etanu-taġoto-ġoi, Rubu Veaġa Ierusalemaj eġita-iaġoato-ġoi nuġanai, Petero, e Iakobo (o Iames), e Ioane, ema Anduru na ġedanagi-ġairiato, ġekirato,

⁴ “Nokira-varama, mai dagara tu aitoma beġe ġorani, ema beġe ġorani nai, kamara vetoġa na bevaġa-foforiani, maniġeri mabarari beġe ġorani?”

⁵ Benamo Iesu na evaġa-veserito, ekirato, “Ġomi lorimi boġono vetore, tarima ta na asi bene ġofami.

⁶ Tarima vovoka au aragu ai beġe iaġomani, beġe kirani, ‘Tarimana tu au maiġegu!’ Tarima ġutuma beġe ġofarini.

⁷ Bema ġomi na vetari o tuari gururi e tuari variri boġo seġaġirini nai, nuġami asi beġene raġe. Maniġeri dagara tu beġe ġorani, senaġi dokona tu asi roġo.

⁸ Tanobara ta tanobara ta ġesi beġe vevaġini, gavamani ta gavamani ta ġesi beġe vetarini. Gabu ġutuma nuġari ai tano beġe iaġani, doġe maki beġe ġorani. Mai tu midigu moġo besinaiani, noġa moġo mero keina emaġurini midiguna kavana.

⁹ Tauġemi boġono venari-ginikau, korana beġe ġabimini, Iuda ġeri kanisoro tarimari ġeri ai beġe ġori-iaġomini e rubu nuġari ai beġe kwarimini. Au ġoġabi-raġeguni dainai, gavana e vere barari o kini ġoirari ai roġo boġo ruġani, au vaġa-moġonigu ai boġono iaġo.

¹⁰ Vari Namona tu tanobara mabarari nuġari ai beġe ġobata-iaġi guineani.

¹¹ Bema Kota tarimari ġoirari ġana beġe ġori-iaġomini nai, kara toma boġoa kiraġirini gurugari asi boġono nuġa-vekwaraġi-iaġiri. Garona beragaġini vau, Barau na kara bevaġa-ribamini gurugari boġono kiraġiri, korana dia ġomi boġo gurugani, senaġi Iauka Vevaġa beguruġani.

¹² Kakana na tarina berevaiani bene mase ġana, tamana na natuna maki moġesina beveiani. Natuni na tamari sinari beġe segafore-vinirini ema beġe vagirini.

¹³ Tarimarima mabarari na beġe iau-rakavamini, korana au ġoġabi-raġeguni nai. Senaġina deikara bevevaġa-gwaġigini mo dokona tu bemaġurini.”

Vevaġa-gari dagarana befoforini

Mataio 24:15-28; Luka 21:20-24

¹⁴ “Bema ġomi na dagara rakava vedaureana, vevaġa-gari dagarana, boġo ġitaiani, asi bene ruġa gabunai beruġani.” Mai guruġa beiaviani tarimana bene riba maoro anina tu kara. “Benamo deidei Iudeai ġetanuni tarimari ġoro ġana beġene raga-iaġo.

¹⁵ Deikara numa tuġunai etanu-taġoni tu, asi ma bene raka-toġa numa nuġana ġana ġena farefare ġabiġabiri.

¹⁶ Deikara vamoka nuġanai maki asi ma bene ġenoġoi ġena koudi ġabi-ġabiri.

¹⁷ Mo negai vavine ma baniri e ġabi-variġu vavineri kika ma vetuġari!

¹⁸ Boġono ġauġau, mai dagara asi bene ġora ġura e nagure ġarori ai!

¹⁹ Korana mo negai rakava e midigu barego beġe raġasini, Barau na tanobara eveiato beiaġoma maitoma, rakava e midigu moġesina asi ġeġorani. Ma maiġa murinai moġesina kavana ta asi ma beġorani.

²⁰ Bema Vereġauka na mo ġaro rakavari asi bere vaġa-kubiri, tarima ta asi bere maġuri riba, senaġi eġabi-hidirito tarimari dairi ai, ġia na ġarori evaġa-kubirito.

²¹ Mo negai, bema tarima ta na bekiramini, ‘Goġitaia, Keriso tu maiġa!’ o ‘Goġitaia, ġia tu iomoga!’ betoni nai, asi boġono vaġa-moġonia.

²² Korana tu Keriso ġofaġofari e peroveta tarimari ġofaġofari beġe foforini, vetoġa boruri e nuġa-farevaġi veġari beġe veirini, Barau na eġabi-viriġirito tarimari beġene ġofa-veġonuri ġana.

²³ Moġesi nai tauġemi boġono venari; dagara mabarari tu akiravara-guinemini, aoa roġosi bene raġasi nai.”

Tarimarima Natuna ġena iaġoma

Mataio 24:29-31; Luka 21:25-28

²⁴ “Senaġi mo negai, rakava beġe ġorani murinai, ġaro bemukunani e ġue maki asi bemamani,

²⁵ visiġu guba na beġe ketoni e guba seġukari beġe iaġaiaġani.

²⁶ Benamo tarima na Tarimarima Natuna beḡe ḡitaiani, magube na beiaḡomani ma seḡuka barana e ma marevana ḡesi.

²⁷ Benamo ḡia na aneru betuḡurini, eḡabi-virigirito tarimari beḡe vaḡa-vegogorini tanobara mabarari na.”

Barabore - Vevaḡa-riba figi ḡauna ḡenana

Mataio 24:32-35; Luka 21:29-33

²⁸ “Figi ḡauna ḡenana mai barabore boḡono ribaia: Kabona ḡefori-raḡeni e launa ḡefafani nai, ḡoribani, ḡaro ḡena tora taimina tu bekavināḡi gotoni.

²⁹ Moḡa ilailanai, ḡomi maki bema mai dagara beḡe ḡorani boḡo ḡitarini nai, boḡono riba, Tarimarima Natuna tu bekavināḡi ḡatama bokai.

³⁰ Moḡoni akiramini, mai ḡuru asi bekorini, beiaḡoni mo, mai dagara mabarari beḡe ḡorani.

³¹ Guba e tanobara beḡe rekwa-rekwani, senaḡi au ḡegu guruḡa tu asi beḡe rekwa-rekwani, beḡe tanu-vanaḡi vanaḡini.”

ḡaro ema hora tarima ta asi ribana

Mataio 24:36-44

³² “Senaḡi mo ḡaro ema aoa tu tarima ta asi ribana, e aneru gubai asi ribari, ema Natuna maki asi ribana, senaḡi Tamana ḡereḡana moḡo ma ribana.

³³ Lorimi boḡono vetore, boḡono venari-ginikau, korana asi ribami, aitoma mo aoa beragāsini.

³⁴ ḡia tu maigēsina kavana, tarima ta eraka-ḡerevaḡito, ḡena numa eraga-kwaneato, benamo ḡena vetuḡunaḡi tarimari maoro evinirito, tata ḡeri ḡauvei beḡene vei. Gatama-boka narinarina tarimana maki ekiraiato, bene rivigāua.

³⁵ Moḡesi nai ḡomi maki tataḡa-taḡo boḡono tanu, korana numa biaguna beḡenoḡoini aona tu asi ribami, lavilavi ai, ba boḡi nuḡanai, ba kokoroku beḡoḡini ai, ba boḡiboḡi ai.

³⁶ Irau mai moḡo beragāsini, benamo genami ai beḡoitaḡomini ḡesi.

³⁷ Au na kara ḡomi akira-varamini guruḡana tu tarimarima mabarari maki akiravararini, akirani, “Tataḡa-taḡo boḡono tanu e boḡono venari-ginikau!”

14

Iesu beḡene vaḡia dabarana ḡevetauato Ioane 11:45-53

¹ ḡaro ruarua moḡo, benamo Pasova verekona o Iuda tarimari mase aneruna na evanaḡirito asi evaḡirito verekona e asi etubuni faraona verekona beḡe veiani nuḡanai, Rubu Veaga vereri baregore e taravatu ḡevevaḡa-riba iaḡiato-ḡoi tarimari na Iesu beḡene ḡabi-lemaia, benamo beḡene vaḡi-masea dabarana ḡevetauato-ḡoi.

² Senaḡi ḡekirato, “Dia vereko nuḡanai bene gora, korana vereko beḡe iaḡoma tarimari ḡia iatana na beḡe burini garina.”

Vavine ta ḡena veiḡa namona

Mataio 26:6-13; Ioane 12:1-8

³ Iesu Betania ai Simona lepera tarimana ḡena numai eḡaniganito-ḡoi nuḡanai, vavine ta eraka-toḡato, kavabu namona ta, alabasta forena na ḡeveiato kavabuna, eḡabi-kauato, nuḡanai tu muramura ma bonana namona. Mo muramura tu ḡauḡa arana nad ḡokana na ḡeveito-ḡoi dagarana, ma voina tu varaḡe rakava. Mo vavine na mo kavabu bokana ebota-fakaiaato, benamo muramura Iesu debanai ebuuato.

⁴ ḡia sevinai tarimari kota tu na nuḡa-metori ḡesi ḡeveguruḡa-vevinito, ḡekirato, “Karase nai mai muramura bonana namona efitoḡa-kavaiani?”

⁵ Bere voivoi-iaḡia, benamo silva moniri sinau toitoi (300) bere ḡoitaḡoa, (mai tu tarima ta davana laḡani ta nuḡanai kavana), benamo asi ḡeri-ḡari tarimari bere viniri.” Benamo ḡia na mo vavine ḡevaneato.

⁶ Senaḡi Iesu ekirato, “ḡoraga-kwane! Kara dainai ḡomi na meto ḡoviniani? Mai vavine na tu veiḡa namona au ḡegu ai beveia.

⁷ Asi ḡeri-ḡari tarimari tu ḡomi ḡesi boḡo tanu-vanaḡi vanaḡini, be boḡo urani nai, boḡono vaḡa-kavari. Senaḡi au tu dia ḡaro mabarari ḡomi ḡesi batanuni.

⁸ Mai vavine na tu kara bere veia dagarana beveia, ḡia na au tauḡanigu ai muramura bebubu-guinea gurigurigu ḡana.

⁹ Moḡoni akiramini, Vari Namona beḡe ḡobata-iaḡiani tanobara mabarari nuḡari ai, mai vavine na veiḡa beveia veiḡana maki beḡea kiraḡiani, ḡia tuḡamaḡi-iaḡina.”

Iudas na Iesu erevaiato

Mataio 26:14-16; Luka 22:3-6

¹⁰ Benamo Iudas Isakariota, gabanana ruarua (12) tarimana ta, Rubu Veāga vereri baregori ġeri ai eiagoto, Iesu benea revaia ġia ġeri ai ġana.

¹¹ Benamo ġia na ġeseġaġiato nai, ġeiaku-rakavato, benamo ġekira-toreato, moni beġe viniani. Benamo Iudas na ġimari ai betore-kauani dabarana ma evetauato-ġoi.

Iesu ma ġena mero ġesi ginitaġo mamoea ġeġaniato

Mataio 26:17-25; Luka 22:7-14; 22:21-23; Ioane 13:21-30

¹² Ġaro ġiniguinenai, asi etubuni faraona verekona veiveina e ginitaġo mamoea vaġivaġina ġaronai, Iesu ġena mero ġevedanaġito, ġekirato, “Ġai tu ainai Pasova verekona baġana vei-torea, bono ġania?”

¹³ Benamo Iesu na ġena mero ruarua etuġurito, ekirarito, ekirato, “Vanuġa baregonai boġono raka-toġa, benamo tarima ta nanu gwaġutuna befaġaiani boġo ġoitaġoani. Murina na boġono iaġo.

¹⁴ Benamo beaġekauni numanai numa biaguna boġono vaġa-guruġaia, boġono kira, ‘Vevaġa-riba tarimana ekirani: Au ġegu varivari daġutuna tu aġa, ġegu mero ġesi monai ginitaġo mamoea baġana ġania?’

¹⁵ Benamo ġia na daġutu baregona ta numa tuġunai bevaġa-ġitamini iarevatore. Monai boġono dabaraia ġita ġara.”

¹⁶ Benamo mero ġeiagoto, vanuġa barana nuġanai ġeraka-toġato, Iesu na ekiraġirito ilailari ai ġedoġaririto. Monai vereko ġeveiato.

¹⁷ Elavilavito, Iesu ma ġena mero gabanana ruarua (12) ġesi ma ġeraġasito.

¹⁸ Ġeġaniġanito-ġoi nuġanai Iesu ekirato, “Moġoni akiramini, ġomi ta na au borevaguni, ta au ġesi ini taġaniġani-vegogoni tarimamu ta na.”

¹⁹ Ġia mabarari nuġari ma metori ġesi irau sebori irau sebori na ġedanaġiato, ġekirato, “Moġoni dia au, ene?”

²⁰ Iesu na ekirarito, ekirato, “Mai tu ġomi gabanana ruarua (12) fakami ai ta dei au ġesi diġu sebonai ġanaba-riġoni tarimana.

²¹ Tarimarima Natuna bemaseni, Buka Veāgai ġetoreato ilailanai. Senaġi Tarimarima Natuna berevaiani tarimana vetuġana kekei, asi bere maġuri tu namo.”

Vereġauka ġena ġanivegogo veaġana

Mataio 26:26-30; Luka 22:15-20; 1 Korinto 11:23-25

²² Ġia ġeġaniġanito-ġoi nuġanai, Iesu na beredi eġabiato, Barau evaġa-namoato, etavirato, evinirito, benamo ekirato, “Ġoġabia, mai tu au tauġanigu.”

²³ Ġia na kapusi ma eġabiato, evaġa-namoato murinai evinirito, benamo mabarari na ġenuato.

²⁴ Benamo Iesu na ekirarito, ekirato, “Mai tu au raragu, Ginitaġo Variġuna evaġa-moġoniani, bevebubuni, tarimarima ġutuma vaġa-maġuriri.

²⁵ Moġoni akiramini, vine nanuna asi ma banu-ġenogoi, beiaġoni mo, Barau ġena Basileiai vau ma banu-ġenogoi.”

²⁶ Benamo mari ta ġemariato murinai, ġeraka-rosito, Olive Ġorona ġana ġeiagoto.

Iesu na Petero ġena vekira-ġuniġau ekiraġi-toreato

Mataio 26:31-35; Luka 22:31-34; Ioane 13:36-38

²⁷ Benamo Iesu na evaġa-guruġarito, ekirato, “Ġomi mabarami ġemi veġabidadama au ġegu ai boġo raga-kwaneani, korana Buka Veāgai maiġesi etoreato,

‘Au na mamoe ġitaġauri tarimana bavagiani, benamo mamoe mabarari beġe raga-lausini.’

²⁸ Senaġi au mase na ma bavariġisi-ġenogoini murinai, baraka-guineni Galilea ġana. Monai vau bitana vedoġari.”

²⁹ Petero ekirato, “Mabarari na ġeri veġabidadama ġoi ġemu ai beġe raga-kwaneani, senaġi au na tu asiġina.”

³⁰ Iesu na evaġa-veseato, ekirato, “Moġoni akiramuni, toma boġi kokoroku vaġa-ruarua roġosi bene goġi nuġanai, ġoi na au vaġa-toitoi bokira-ġuniġauguni.”

³¹ Senaġi Petero eguruġa-ġiġiraġeto, ekirato, “Bema ġoi ġesi bita mase-vegogoni maki, au na ġoi tu asi veġata bakira-ġuniġaumuni.” Mabarari moġesi moġo ġekirato.

Iesu eġauġauto Getesemane ai

Mataio 26:36-46; Luka 22:39-46

³² Ġia gabu arana Getesemane ai ġea raġasito, benamo Iesu na ġena mero evaġa-guruġarito, ekirato, “Mainai ġotanu, au tu naiġo, naġuriguri roġo.”

³³ Benamo Petero, e Iakobo (o Iames), ema Ioane moĝo eĝoririto, ĝia ĝesi ĝeiaĝoto. Moĝa nuĝanai Iesu tauĝanina efarakaiato, egarito, nuĝana maki evekwaragiĝo.

³⁴ Benamo ekirarito, ekirato, "Au nuĝagu na meto asikei eĝwaliani, dori evaĝiguni; mainai ĝotanu, boĝono venari."

³⁵ Iesu kota ma eraka-naĝito, tano ai eketo-tarito, benamo Barau enoĝiato, ekirato, bema ma dabara ta moĝa neganai, mai aoa metona ĝenana bene vanaĝi.

³⁶ Ekirato, "Tama, Tamagai o, dagara mabarari ĝoi ĝemu ai veiveiri tu ilaila. Mai midigu bedina ĝeguna noma ĝabi-vaĝia. Senaĝi dia au ĝegu ura, ĝoi ĝemu ura moĝo."

³⁷ Benamo eĝenoĝoito nuĝanai tu, ĝena mero genamaseri ai eĝoitaĝo-rito, benamo Petero ekiraiato, ekirato, "Simona, ĝoi tu ogenani? Aoa sebona ta kavana maki asi bovevaĝa-gwaĝigini?"

³⁸ Boĝono venari, boĝono ĝauĝau, be veribaĝani beiaĝomani nai, asi boĝono moira. Iauka tu moĝoni eurani, senaĝi tauĝani tu emoirani."

³⁹ Benamo ma eraka-veĝitato, ea ĝurigiurito, mo ĝauĝau guruĝari guineri ma ea kiraĝirito.

⁴⁰ Ma eĝenoĝoi-iaĝomato nuĝanai tu, genamaseri ai ma edoĝaririto, korana matari tu gena na eĝabi-rakavarito. Ĝia asi ribari kamasi beĝe vaĝa-veaseani.

⁴¹ Vaĝa-toitoina ma eĝenoĝoito, benamo ekirarito, ekirato, "Ĝomi tu roĝo ĝogenani e ĝoiaĝaraĝini? Bevaitovo! Aoana varau beraĝasi! Ĝoĝitaia, Tarimarima Natuna tu beĝe revaia, rakava tarimari ĝimari ai beĝe torea.

⁴² Ĝovariĝisi, be si-iaĝosi! Ĝoĝitaia, au revarevagu tarimana mai beraĝasi!"

Iesu tuari tarimari o soldia na ĝeĝabiato

Mataio 26:47-56; Luka 22:47-53; Ioane 18:3-12

⁴³ Iesu roĝo egurugato-ĝoi nuĝanai, ludas, mero gabanana ruarua (12) tauna ta, eraĝasito. Tarimarima ĝutuma maki ĝia ĝesi ma ĝeri vetari baĝari e vevaĝi kwariri. Ĝia tu Rubu Veaga vereri baregori, e taravatu ĝevevaĝa-riba iaĝiato-ĝoi tarimari, ema Iuda vereri na ĝetuĝurito.

⁴⁴ Reva tarimana na vetoga ta ekiravara-torerito, ekirato, "Baverauani tarimana tu moĝa. Boĝono ĝabi-taria, boĝono ĝori-iaĝoa ĝomi ĝemi veĝitaĝau gaburenai."

⁴⁵ Iudas eraĝasito nai, maoromaoro eiaĝoto Iesu genai, benamo ekirato, "Vevaĝa-riba tarimamu o!" benamo everauato.

⁴⁶ Benamo tuari tarimari na ĝeĝabi-tariato, ĝedegodegoato.

⁴⁷ Senaĝi monai eruĝa-taĝoto-ĝoi tarimana ta, ĝena vetari baĝana einu-vaĝiato, edav-eato, benamo Rubu Veaga verena baregona gena vetuĝunaĝi tarimana seĝana ebasivaĝiato.

⁴⁸ Iesu na ekirarito, ekirato, "Au tu seĝafore dogorona ta aĝori-kauani? Be ĝomi boĝo iaĝoma au ĝabiĝabigu tu, ma ĝemi vetari baĝari e vevaĝi kwariri ĝesi?"

⁴⁹ Ĝaro mabarari ai au tu ĝomi sevimi ai Rubu Veaga nuĝanai avevaĝa-ribato-ĝoi, senaĝi asi ĝoĝabiguto. A mai tu Buka Veagai ĝetore-guineato guruĝana vaĝa-moĝonina ĝana."

⁵⁰ Gena mero mabarari na ĝeraga-kwaneato, ĝeraka-rovorovoto.

⁵¹ Mero variĝuna ta tu kefina korina, senaĝi dabuĝa ta na moĝo tauĝanina eriĝo-ĝauato, Iesu murinai erakato. Ĝia maki ĝeĝabi-tariato,

⁵² senaĝi ĝena dabuĝa ĝimari ai eraga-kwaneato, kefina kori moĝo eraga-kwaraĝato.

Iesu kanisoro tarimari ĝoirari ai

Mataio 26:57-68; Luka 22:54-55; 22:63-71; Ioane 18:13-14; 18:19-24

⁵³ Ĝia na Iesu ĝeĝori-iaĝoato Rubu Veaga verena baregona ĝenai, ema Rubu Veaga vereri baregori, e Iuda vereri, ema taravatu ĝevevaĝa-riba iaĝiato-ĝoi tarimari mabarari ĝeraka-vegogoto.

⁵⁴ Petero na Iesu eraka-ĝiuato, senaĝi ma fakana eiaĝoto mo, Rubu Veaga verena baregona ĝena numa maĝuna nuĝanai eraka-toĝato. Monai gadi tarimari fakari ai ea tanuto, benamo karava na etunuato-ĝoi.

⁵⁵ Rubu Veaga vereri baregori e Iuda ĝeri kanisoro tarimari mabarari na tu Iesu vaĝa-masena korana ta ĝevetauato, senaĝi ta tu asi ĝedoĝari-ato.

⁵⁶ Tarimarima ĝutuma ĝeri ĝofaĝofa guruĝari na ĝevaĝa-badeato-ĝoi, senaĝi ĝeri guruĝa tu asi ĝesebonato-ĝoi.

⁵⁷ Benamo tarima kota ĝeruĝa-vaisito, benamo mai ĝofaĝofa guruĝari ĝekiraĝirito, ĝekirato,

⁵⁸ "Ĝai tu ĝia ĝena guruĝa baĝa seĝaĝia, bekira, 'Au na mai tarimarima ĝimari na ĝeragaĝato Rubu Veaga barovoani, ema ĝaro toitoi nuĝanai ta ma baragaiani dia ĝima veiveina rubuna.'"

⁵⁹ Senaĝi ĝia ĝeri vevaĝa-bade guruĝari maki asi sebona.

⁶⁰ Benamo Rubu Veāga verena baregona ġoirari ai eruġa-vaisito, benamo Iesu edanaġiato, ekirato, “Goi tu asi bovaġa-veseni? Maiġeri na ġoi ġevarifju-iaġimuni guruġari tu kamasi?”

⁶¹ Senaġi Iesu asi eguruġato, ma asi evaġa-veserito. Benamo Rubu Veāga verena baregona na ma edanaġi-ġenoġoiato, ekirato, “Ġoi tu Keriso, ġevaġa-namoani Barauna Natuna?”

⁶² Iesu na evaġa-veseato, ekirato, “Tarimana au maiġegu! Ġomi na Tarimarima Natuna roġo boġo ġitaiani, Seguka Barauna ġimana aroribanaġi betanuni, e guba maguberi iatari na beiaġomani!”

⁶³ Benamo Rubu Veāga verena baregona na ġena dabuġa edareato, ekirato, “Karase vevaġa-ġita tarimari roġo tavetaurini?”

⁶⁴ Barau vaġa-rakavana guruġana boġo seġaġia. Ġomi kara ġotoni?” Ġia mabarari ġekirato, “Bene mase moġo.”

⁶⁵ Benamo kota na ġekanunuato, matana ġekumu-ġauato, ġefaisiato, ġekiraiato, ġekirato, “Ġoi tu peroveta tarimana, be nokiraġia, deikara na bekwarimu?” Benamo gadi tarimari na ġeġabiato, ġimari na ġeforoato.

Petero na Iesu ekira-ġuniġauato

Mataio 26:69-75; Luka 22:56-62; Ioane 18:15-18; 18:25-27

⁶⁶ Petero roġo numa maġuna nuġanai, Rubu Veāga verena baregona ġena vetuġunaġi ġuiatori ta eiaġoto.

⁶⁷ Ġia na Petero karava na etunuato-ġoi eġitaiato, benamo eġita-ġinikauato, ekiraiato, ekirato, “Goi maki Iesu, Nasareta tauna, ġesi orakaoto-ġoi, okavaiato-ġoi.”

⁶⁸ Senaġi ġia evekira-ġuniġauto, ekirato, “Au asi ribaġu ġoi kara okiraġiani,” benamo eraka-rosito maġu ġatama bokana ġena, benamo kokoroku egoġito.

⁶⁹ Mo vetuġunaġi ġuiatona na ma eġitaiato, benamo monai ġeruġa-taġoto tarimari ekirarito, ekirato, “Tarimana ta tu maniġa.”

⁷⁰ Petero ma evekira-ġuniġauto. Nega kotuna evanaġito nuġanai, ġia sevinaġi ġeruġa-taġoto-ġoi tarimari na ġekiraiato, ġekirato, “Moġoni, ġoi maki ġia ġesi ġorakaoto-ġoi tarimamu ta, korana ġoi tu Galilea taumu.”

⁷¹ Benamo Petero na ekirarito, ekirato, “Asiġina ġinavaġi, akira-korikorimini, ġomi na ġokiraġiani tarimana au tu asi ribaġu.”

⁷² Kokoroku vaġa-ruaruana ma egoġito, benamo Petero na Iesu ġena guruġa etuġamaġi-doġariato, ekiraiato, “Kokoroku vaġa-ruaruana roġosi bene goġi nai, ġoi na au vaġa-toitoi bokira-ġuniġauguni.” Benamo etaġi-rakava rakavato.

15

Iesu Pilato ġoiranai

¹ Bogiboġi iamoiamo, Rubu Veāga vereri baregori, e Iuda vereri, e taravatu ġevevaġa-riba iaġiato-ġoi tarimari, ema kanisoro tarimari mabarari na ġevaġa-moġoniato. Benamo Iesu ġebarubaruato, ġeġori-iaġoato, Roma Gavana Pilato ġea viniato.

² Pilato na edanaġiato, ekirato, “Goi tu Iuda tarimari ġeri vere o kini?” Iesu na evaġa-veseato, ekirato, “Oi, okiraġiani maniġa.”

³ Benamo Rubu Veāga vereri baregori na Iesu ġevaġa-badeato, guruġa ġutuma ġekiraġirito.

⁴ Pilato na ma edanaġi-ġenoġoiato, ekirato, “Ġoi tu asi bovaġa-veseni? Noġitaia, ġoi iatamu ai tu meto ġutuma ġekiraġirini.”

⁵ Senaġi Iesu asi eguruġato, benamo Pilato tu edaradarato.

Pilato na Iesu ġena mase ekiraġiato

Mataio 27:15-26; Luka 23:13-25; Ioane 18:38-19:16

⁶ Vanaġivanaġi Pasova verekona ġaronai tu Pilato na ġia ġeri dibura numanai etanuni, beġe kiraġiani tarimana ta, etuġu-rosiato-ġoi.

⁷ Mo laġani ai tarima ta arana Barabas, ġia tu dibura numai etanuto tarima kota ġesi, korana ġevevaġito nai, tarima ta ġevaġi-maseato.

⁸ Benamo ġutuma monai ġevegoġoto tarimari Pilato ġenoġiato, eveini kavana ma bene vei ġana.

⁹ Pilato na edanaġirito, ekirato, “Ġomi ġourani au na Iuda tarimami ġemi vere natuġu-rosia ba?”

¹⁰ Ġia ribana, Rubu Veāga vereri baregori ġeri mama dainai, Iesu ġia ġimaniġi ġetoreato.

¹¹ Senaġi Rubu Veāga vereri baregori na tarimarima nuġari ġeġanirito, Pilato na Barabas bene tuġu-rosia.

¹² Benamo Pilato na ma edanaḡirito, ekirato, “O mai Iuda tarimami ḡemi vere ḡotoni tu kamasi bana veia?”

¹³ Ġia ḡefararato, ḡekirato, “Novaḡa-satauroa!”

¹⁴ Pilato na edanaḡirito, ekirato, “Karase nai, kamara veiḡa rakavana eveiato nai?” Senaḡi mabarari ḡefarara-gigitarito, ḡekirato, “Novaḡa-satauroa!”

¹⁵ Pilato ḡena ura mo tarimarima ḡutuma nuḡari bene vaḡa-namori ḡana, ḡia na Barabas etuḡu-rosiato, senaḡi Iesu tu ḡekwariato murinai, evinirito beḡene vaḡa-satauroa ḡana.

Iesu ḡevaseva-vaseva iaḡiato

Mataio 27:27-31; Ioane 19:2-3

¹⁶ Vetari tarimari na Iesu ḡeḡori-iaḡoato gavana ḡena numa nuḡanai, benamo karori mabarari ḡekea-vegogorito.

¹⁷ Benamo dabuḡa kakakakana ḡevaḡa-veiato, debana dagarana ḡau ma giniginina na ḡevatoato, korona noḡa ḡeveiato, benamo Iesu debanai ḡetore-kauato.

¹⁸ Benamo ḡevaḡa-namoato, ḡekirato, “Iuda ḡeri Kini o, ḡaro namona!”

¹⁹ Benamo oro kwarina na debana ḡekwari-ḡenoḡoi ḡenoḡoiato-ḡoi, ḡekanunu-kanunuato, ḡevetui-tari viniato, ḡetoma-rakarigiḡo ḡofakau-viniato.

²⁰ ḡevaseva-vaseva iaḡi-ḡosiatu murinai, dabuḡa kakakakana ḡekoki-vaḡiato, ḡena dabuḡa korikorina ma ḡevaḡa-veiato. Benamo ḡeḡori-rosiato beḡenea vaḡa-satauroa ḡana.

Iesu ḡevaḡa-satauroato

Mataio 27:32-44; Luka 23:26-43; Ioane 19:17-27

²¹ Kurene tarimana ta arana Simona, Alesanda e Rufo tamari, gunika vanuḡana ta na eiaḡomato-ḡoi, vetari tarimari na ḡelaunaḡi-naḡiato Iesu ḡena satauro neḡwaia.

²² Benamo Iesu ḡeḡori-iaḡoato gabu ta arana Golgota ḡana, anina tu “Deba ḡavana Gabuna.”

²³ Benamo ḡia na vine nanuna, midigu vaḡa-keina muramurana arana muro ḡesi ḡebubu-vegogoato, ḡeviniato, senaḡi asi eniuato.

²⁴ Benamo ḡevaḡa-satauroato; ḡena dabuḡa dainai laki ḡerena ta ḡeveiato, benamo ḡevaverito fakari ai.

²⁵ Boḡibogi ai horaḡauna 9 koloko rekenai ḡevaḡa-satauroato.

²⁶ Kara koranai ḡevaḡa-satauroato guruḡana satauro iatanai maiḡesi ḡetoreato, “IUDA TARIMARI GERI VERE.”

²⁷ Lema tarimari ruarua maki Iesu ḡesi ḡevaḡa-sataurorito, ta araribana rekenai, ma ta kaurina rekenai. [²⁸ Monana Buka Veaḡai ḡetore-guineato guruḡana evaḡa-moḡoniatu, ekirato, “ḡia vei-rakava tarimari ḡesi ḡeiavi-vegogoato.”]

²⁹ Geraka vanaḡito-ḡoi tarimari na guruḡa rakavari Iesu ḡeviniato-ḡoi, debari ḡekorakorarito, ḡekirato, “Aha, be ḡoi okirato Rubu Veaḡa borovoani, ḡaro toitoi nuḡanai ma bovaḡa-ruḡa ḡenoḡoiati otato!

³⁰ Satauro tuḡuna na noraka-riḡo, tauḡemu novevaḡa-maḡuri!”

³¹ Rubu Veaḡa vereri baregori e taravatu ḡevevaḡa-riba iaḡiato-ḡoi tarimari na maki fakari ai maiḡesi ḡevaseva-vaseva iaḡiato, ḡekirato, “ḡia na tarima boruri evaḡa-maḡuririto, senaḡi tauḡena tu asi evevaḡa-maḡurini!

³² Keriso, Isaraela tarimari ḡeri vere, satauro na inimoḡo noraka-riḡo ḡai ḡoiramai, be baḡana vaḡa-moḡonimu!” Iesu ḡesi ḡevaḡa-satauro vegogorito tarimari ruarua na maki ḡeguruḡa-rakava viniato.

Iesu ḡena mase

Mataio 27:45-56; Luka 23:44-49; Ioane 19:28-30

³³ Horaḡauna 12 koloko ea ḡabiato nai, tanobara mabarana mukuna na eḡabi-ḡauato; mukuna etanuto, eiaḡoto mo, horaḡauna 3 koloko.

³⁴ Horaḡauna 3 koloko rekenai Iesu eḡabato, ekirato, “Eloi, eloi, lama sabaktani?” anina tu, “Au ḡegu Barau, au ḡegu Barau, kara dainai au boraga-kwanegu?”

³⁵ Iesu sevinai ḡeruḡa-taḡoto-ḡoi tarimari kota ḡeseḡaḡito, benamo ḡekirato, “ḡeseḡaḡi, Elia ekeaiani.”

³⁶ Benamo tarima ta eragato, nanu erimaiani dagarana ta eḡabiato, vine nanuna mamakina nuḡanai efereiatu, gobu lefai egwanu-kauato, benamo eduḡi-raḡeato Iesu na neniua ḡana, ekirato, “Siḡitaia, Elia beiaḡomani, bema ḡabi-riḡoani ba?”

³⁷ Benamo Iesu eḡaba-fouto murinai emaseto.

³⁸ Benamo Rubu Veaḡa nuḡanai veaḡa lelevaḡi daiḡutuna kouḡauna dabuḡana o ketin evedare-kikimato, eruaruato, tuḡuna na mo gabigabina.

³⁹ Roma vetari verena Iesu ġoiranai eruġa-taġoto-ġoi, ġena ġaba eseġaġiato e kamasi emaseto eġitaiato, benamo ekirato, “Moġoni veġata, mai tarima tu Barau Natuna!”

⁴⁰ Vavine kotari maki ġemarere-to-ġoi, kotuna manaġai ġeruġato, fakari ai tu Maria, Magadala vavinena; e Maria, mai tu Iakobo (o Iames) keina e Iosefa ġesi sinari; ema Salome.

⁴¹ Galileai mai vavine tu Iesu murina na ġerakato-ġoi e ġia vetuġunaġina ġeiaġo-vinito-ġoi. Vavine vovoka ġia ġesi Ierusalemna ġana ġemaraġeto vavineri maki monai.

Iesu ġeguriato

Mataio 27:57-61; Luka 23:50-55; Ioane 19:38-42

⁴² Mo lavilavi ai vereko beġe vei-toreani, Sabadi ġarona roġosi bere ġabia nai.

⁴³ Iosefa, Arimatea vanuġa tarimana, ġematauraiato-ġoi kanisoro fakari ai tarimana ta, Barau ġena Basileia evaġa-nogaiao-ġoi tarimana, Pilato ġenai eiaġoto, benamo enoġi-ginikaunto, Iesu tauġanina bene ġabia etato.

⁴⁴ Pilato eseġaġiato Iesu tu varau emaseto nai, nuġana efarevaġito, benamo vetari verena ekeaiato, edanaġiato, ekirato, “Moġoni, Iesu tu bemase ba?”

⁴⁵ Benamo vetari verena na Iesu ġena mase evaġa-moġoniato vau, Iesu tauġanina Iosefa eviniato.

⁴⁶ Moġa murinai Iosefa na dabuġa kurokurona namona ta evoiato, benamo Iesu eġabi-rigoato, dabuġa na ekumuato. Gara gabuna fore kouġanai ea tore-toġaiato murinai, fore baregona na ġatama-boka ekure-ġaunto.

⁴⁷ Maria, Magadala vavinena, e Maria, Iosefa sinana, na etoreato gabuna ġeġita-kauato.

16

Iesu evariġisi-ġenoġoito

Ioane 20:1-10

¹ Iuda tarimari ġeri Sabadi ekorito murinai, Maria, Magadala vavinena, e Maria, Iakobo (o Iames) sinana, ema Salome muramura ma bonana namona ġevoito, beġene iaġo, Iesu tauġanina beġene daua ġana.

² Fura ġarona giniguenena o Sandei ai, boġiboġi ġaro eraġekauto nai, gara ġana ġeiaġoto.

³ Benamo tauġeri moġo ġeverorito-ġoi, ġekirato, “Deikara na mo fore barana gara ġekouġau-iaġiato tu, dei na toma ea kure-veġitaiani?”

⁴ Senaġi ġeboġe-iaġoto nuġanai, mo fore baregona tu irau ai vetore.

⁵ Ġia gara kouġana nuġanai ġeraka-toġato nai tu, mero variġuna ta ġeġitaiato, aroriba rekenai etanuto, ġena dabuġa tu kurokuro e mauka kenene, benamo nuġari ġefarevaġi-rakavato.

⁶ Ġia na ekirarito, ekirato, “Asi ġogari, au ribagu ġomi tu Iesu, Nasareta tauna, ġevaġa-satauroato tarimana govetauani. Ġia tu bevariġisi-ġenoġoi! Ġia mainai tu asiġina, ġetoreato gabuna ġoma ġitaia.

⁷ Be goiġo, ġena mero e Petero boġonoa kira-varari, boġono kira, ‘Iesu tu beguneni Galilea ġana. Monai vau boġoa ġitaiani evaġa-guruġamito ilailanai.’”

⁸ Benamo mo vavine ġeraka-rosito gara nuġana na, korana nuġari ġefarevaġito e tauġaniri ġeġoġo-ġoġorito-ġoi nai. Tarima ta maki asi ġevaġa-guruġaiato, korana ġegarito nai.

Maria, Magadala vavinena, na Iesu eġitaiato

Mataio 28:9-10; Ioane 20:11-18

[⁹ Fura ġarona giniguenenai, boġi-boġi iamoiamonai, Iesu evariġisi-ġenoġoito, benamo Maria, Magadala vavinena, ġenai efofori-guineto. Ġia ġenana tu iauka rakavari imaima ruarua (7) elai-vaġirito.

¹⁰ Ġia eiaġoto, benamo Iesu murina na ġerakato-ġoi tarimari ġeri nuġaraġe e taġitaġi nuġanai ekira-vararito.

¹¹ Geseġaġiato Iesu tu maġuri, Maria na eġitaiato, senaġi ġena guruġa asi ġevaġa-moġoniato.

Dabarai tarima ruarua na Iesu ġeġitaiato

Luka 24:13-35

¹² Moġa murinai ġia tauri ruarua gabu ta ġana ġeraka-iaġoto-ġoi nuġanai, Iesu ġeri ai efoforito, senaġi vetoġana tu eirauto.

¹³ Benamo tauri ruarua ġeġenoġoito, karori ġekira-vararito, senaġi ġeri guruġa asi ġevaġa-moġonirito.

Iesu ġena mero ġeri ai efoforito e ġia na seġuka evinirito

Mataio 28:16-20; Luka 24:36-49; Ioane 20:19-23

¹⁴ Moġa murinai ġena mero gabanana sebona (11) ġeġaniġanito-ġoi nuġanai, ġeri ai efoforito, evanerito, korana asi ġeri veġabidadama e ġeri nuġa-gwaġiġi dainai, korana mase na evariġisi-ġenoġoito murinai, ġeġitaiato tarimari ġeri guruġa asi ġevaġa-moġonirito.

¹⁵ Benamo ekirarito, ekirato, "Goiaġo, tanobara mabarari ai Vari Namona tarimarima mabarari ġoirari ai boġono ġobata-iaġia.

¹⁶ Deikara na mai Vari Namona bevaġa-moġoniani ema babatiso begabiani tarimana tu bemaġurini, senaġi asi bevaġa-moġoniani tarimana Barau na rakava voina beviniani.

¹⁷ Geveġabi-dadamani tarimari ġesi mai vetoġa beġe iaġo-sebonani: Iauka rakavari au aragu ai beġe lai-vaġirini. Garo variġuri irauirau ai beġe guruġani.

¹⁸ Mota rakavari beġe ġabi-vaisini, mase ġarikiri beġe niurini, senaġi asi beġe vaġa-rakavari. Ġimari keve tarimari iatari ai beġe tore-kaurini, benamo keve tarimari beġe namoni."

Iesu tu Barau na eġabi-varaġeato guba ġana

Luka 24:50-53; Apostolo 1:9-11

¹⁹ Iesu Vereġauka na evaġa-guruġarito murinai, Barau na eġabi-vaisiatio, guba ġana evaraġeto, benamo Barau aroribana rekenai etanu-tarito.

²⁰ Benamo Iesu ġena mero ġeraka-lausito, gabu mabarari ai ġea ġobatato. Vereġauka maki ġia ġesi ġeġauvei-vegogoto-ġoi, ema ġeri guruġa evaġa-moġonirito-ġoi nuġa-farevaġi veġa boruri ai.]

VARI NAMONA LUKA NA ETOREATO

Luka vaġa-foforina guruġari

Luka tu doketa tarimana, ma ġia tu irau bese tarimana. Ġia tu dia mo Iesu ġena mero 12 vekaravari ai tarimana ta, senaġi ġia tu Paulo ġesi erakaorakaoto-ġoi tauna.

Luka na mai Vari Namona tu Teofilo ġena etoreato. Etoreato laġanina tu 60 beiaġo 65 fakanai ta, mo tu Iesu emaseto murinai.

Luka ġena ura baregona Teofilo e Grik tarimari ema tarimarima mabarari maki beġene riba, Iesu tu Barau na evaġa-moġoniato, e tarima namo vedaureana, e tarimarima na Barau ġena vevaġa-maġuri beġene ġabia ġana uranai eruga-boroġirito, benamo ġeri rakava eġwaiato, satauro ai emaseto, ema Iesu ġereġana ġenana moġo Barau ġena vevaġa-maġuri tarimarima na beġe ġabiani.

Luka ġena toretore tu maiġesina ebioġaiato:

1. Iesu keina na beiaġo mo etarimato varina - karoa 1:1-4:13
2. Iesu ġena vetuġunaġi ġauveiri eveirito variri - karoa 4:14-21:38
3. Iesu ġena midigumidigu ema ġena mase variri - karoa 22-23
4. Iesu ġena varigisi-ġenoġoi, e ġena tarimarima ġeri ai efororito, ema guba vanuġana evaraġeto variri - karoa 24

Luka na Vari Namona etoreato Teofilo ġena

¹ Vere taumu Teofilo, ġoi atore-vinimuni. Tarimarima ġutuma Iesu na eveirito veigari ġita fakarai variri varau ġetorerito.

² Tovotovona na tarimarima na matari na ġeġitarito dagarari ema ġeġobata-iaġirito variri ilailari ġevaġa-ribarato.

³ Moġa lorinai au maki atuġamaġini, namona maiġa, Vere o, karakara ġeġorato dagarari sigana toġana na bavetau-ġitakauri, benamo ġeġorato ilailari ai ama torerini ġoi ġemu.

⁴ Benamo vau bono riba, ġevaġa-ribamuto-ġoi guruġari tu moġoni veġata.

Ioane Babatiso ġena ġora ġekiraġi-foforiato

⁵ Heroda, vere barana o kini, na Iudea tanona eġitaġauato-ġoi nuġanai, Rubu Veaġa verena ta etanuto-ġoi arana Sakaria, Abia ġena doġoro tarimana. Garaġona arana tu Elisabeta. Ġia maki Arona senena, Rubu Veaġa vereri doġorori vavinena.

⁶ Ġia tauri ruarua tu vei-iobukaiobuka tarimari Barau ġoiranai. Vereġauka ġena taravatu ema vevaġa-naġi mabarabarari ġekorana-iaġirito-ġoi ma nuġari mabarari ġesi.

⁷ Senaġi tauri ruarua asi naturi, korana Elisabeta tu gabani, ema ġia tauri ruarua tu varau ġeġaukato.

⁸ Ġaro ta Sakaria ġena vevaġa-veaġa ġauveiri eveirito Rubu Veaġi Barau ġoiranai, korana ġena doġoro ġeri nega dainai.

⁹ Benamo Rubu Veaġa vereri ġeri veġa ilailanai Sakaria ġeġabi-hidiato, muramura ma bonana namona bene gabu ġana. Moġa lorinai eraka-toġato Vereġauka ġena Rubu Veaġa nuġanai,

¹⁰ a tarimarima mabarari tu murikai ġeġuriġurito-ġoi muramura egabuto-ġoi nuġanai.

¹¹ Benamo Vereġauka ġena aneru ta ġia ġenai efororito, muramura goġuna ma bonana fatana vevaġana aroriba rekenai eruġataġoto-ġoi.

¹² Sakaria na eġitaiato nai, nuġana efarevaġito ema egarito.

¹³ Senaġi aneru na ekiraiato, ekirato, "Sakaria, asi nogari, korana ġemu ġauġau Barau na beseġaġia. Garaġomu Elisabeta na natumu ta beġabiani, arana bono vatoa Ioane.

¹⁴ Goi boiakuni, boverereni, tarimarima gutuma maki ġia bemaġurini nai, beġe iakuni.

¹⁵ Korana Vereġauka ġoiranai ġia tu vere baregonai beiaġoni. Ġia tu vine nanuna asi bene niua ema niuniu dagarari gwaġigiri maki asiġina mogo. Ġia roġo sinana dianai, Iauka Veaġa na bevaġa-vonuani.

¹⁶ Ġia na Isaraela tarimari vovoka beġori-kurerini Vereġauka, ġeri Barau, ġenai.

¹⁷ Vereġauka ġoiranai berakani Elia peroveta tarimana ġena kokore ema ġena seġuka kavana. Tama e natu ġia na ma bevaġa-tanu vegogorini. Kira-sirivaġi tarimari maki bevaġa-tanu kurerini, vei-iobukaiobuka tarimari ai beġe iaġoni; benamo ġia na tarimarima beġabi-torerini Vereġauka ġena."

¹⁸ Sakaria na aneru ekiraiato, ekirato, "Au tu kamasi baribaiani? Au tu ġauka, ġaraġogu maki beġauka."

¹⁹ Aneru evaġa-veseto, ekirato, "Au tu Gabriela, Barau ġoiranai aruġani. Barau na au betuġugu, bana vaġa-guruġamu ema mai vari namona bana kira-varamu.

²⁰ Senaġi au ġegu guruġa asi ovaġa-moġoniani nai, ġoi murumu bebubuni, asi bogu-ruġani, beiaġoni mo, mai guruġa anina bea ġorani ġaronai. Akiraġirini dagarari ġeri nega korikori ai beġe ġorani.”

²¹ Mai veġa eġorato-ġoi nuġanai, tarimarima na ġenari-kavaiato nai, ġeverorito karase nai Sakaria Rubu Veaġa nuġanai ea kwaibo-rakavato.

²² Eraka-rosito nai, asi evaġa-guruġarito, benamo ġeribato, ġia tu emata-vanaġito, kara ta eġitaiato Rubu Veaġa nuġanai. Benamo ġia na vetoġai moġo evaġa-ribarito, asi eguruġato, korana muruna ebubuto nai.

²³ Sakaria ġena ġauvei ġarori Rubu Veaġai evaġa-koririto murinai, eġenoġoito ġena vanuġa ġana.

²⁴ Moġa murinai ġia ġaraġona Elisabeta varau ekuġato, benamo ġue imaima (5) etanu-vekuretoġato numai.

²⁵ Ekirato, “Vereġauka na bevetuġagu, maiġesina au ġegu ai beveia. Ġegu maiiaka tarimarima ġoirari ai beġabi-vaġia.”

Iesu ġena ġora aneru na ekiraġiato

²⁶ Elisabeta ma banina ġue imaima sebona (6) nuġanai, Barau na aneru ta arana Gabriela etuġuato vanuġa ta Galilea nuġanai arana Nasareta ġana.

²⁷ Ġuiato ta monai. Ġia tu ma kirakauna arana Iosefa, Davida ġena doġoro tarimana. Mo ġuiato arana tu Maria.

²⁸ Aneru ġia ġenai eiaġoto, ekirato, “Ġaro namona, Vereġauka tu ġoi ġesi ema ġena vevaġa-namo bara ġoi ġemu ai.”

²⁹ Maria na mai guruġa eseġaġiato nai, nuġana evekwarajġi-rakavato, etuġamaġito mai vevaġa-namo anina tu kara.

³⁰ Benamo aneru na ma ekiraiato, ekirato, “Maria, asi nogari, Barau na ġena namo e varevare-bara ġoi iatamu ai betorea.

³¹ Goi tu bokuġani ema mero ta boġabiani, arana bono vatoa Iesu.

³² Ġia arana bevaraġeni ema beġe kiraġiani Iaru-korokoro Barauna Natuna. Barau tuġutuġu na kini ai bevaġa-iaġoani, ġia senena Davida kavana.

³³ Ġia tu vere tuġutuġu ai beiaġoni, vere betanu-vanaġi vanaġini Iakobo besena ġeri, ġena Basileia asi bekorini.”

³⁴ Maria na aneru ekiraiato, ekirato, “Mai tu kamasi beġorani? Au tau ta ġesi tu roġosi baġana gena-vegogo.”

³⁵ Aneru na evaġa-veseato, ekirato, “Iauka Veaġa ġoi iatamu ai befoforini, Barau ġena seġka na beboroġimuni. Moġesina nai ġoi ġemuna bemaġurini merona vevaġana tu Barau Natunai beġe kiraġiani.

³⁶ Bono riba, ġoi garagaramu Elisabeta, ġia varau beġauka, senaġi ma banina. Ribamu, tarimarima na ġekiraġiato-ġoi, ġia tu gabani vavinena ġetato-ġoi, senaġi toma ġena ġue imaima sebona (6) maiġa.

³⁷ Korana Barau tu dagara mabarari veiveiri ma ribana.”

³⁸ Maria ekirato, “Au tu Vereġauka ġena vetuġunaġi vavinegu, be bokira kavana au ġegu ai bene ġora.” Benamo aneru na eraga-kwaneato, erakato.

Maria Elisabeta ġenai eiaġoto

³⁹ Mo negai Maria evarigisito, Iudea ġorori vanuġana ta ġana eraga-iaġoto.

⁴⁰ Monai Sakaria ġena numai eragekauto, Elisabeta evaġa-namoato.

⁴¹ Elisabeta na Maria ġena vevaġa-namo guruġana eseġaġiato nai, natuna tu diana nuġanai eġarevato, benamo Elisabeta Iauka Veaġa na evaġa-vonuato, mamina eġabiato.

⁴² Benamo eguruġa-baregoto, ekirato, “Vavine vefakari ai Barau ġena vevaġa-namo ġoi iatamu ai tu barego vedaurea, ema boġabiani merona iatanai maki!

⁴³ Senaġi au ġegu namo tu kara Vereġauka sinana ġegu ai beiaġoma?

⁴⁴ Ġemu vevaġa-namo guruġana baseġaġia nai, natugu tu nuġagu ai eiakuni nai eġarevani.

⁴⁵ Goi overereni, korana oveġabi-dadamato, Vereġauka ġena guruġa bemoġonini otato nai.”

Maria ġena iaku marina

⁴⁶ Benamo Maria ekirato,

“Au nuġagu na Vereġauka evaġa-raġeani.

⁴⁷ Au iaukagu na maki au vaġa-maġurigu Barauna eiaku-viniani,

⁴⁸ korana tu au,

ġena vetuġunaġi vavinena,

ġegu tanu lealeai roġo

etuḡamaḡi-taḡoguni!
 Mainana, beiaḡoni mo,
 ḡuru mabarari beḡe kirani,
 Barau ḡena vevaḡa-namo tu
 au iatagu ai beḡe toni,
⁴⁹ korana tu veiḡa baregori
 Seḡuka Barauna na au ḡegu ai beveiri.

Ḡia arana tu veaḡa.

⁵⁰ Ḡena vetuḡaḡwa tu
 ḡia ḡegari-viniani tarimari
 iatari ai betoreani,
 ḡuru ta beiaḡoni ḡuru ta
 iatari ai betanuni.

⁵¹ Ḡia ḡimana eḡabi-vaisirito seḡukana na ḡeveiavini tarimari elai-karovorito.

⁵² Ḡia na vere baregori
 ḡeri tanutanu gaburi na
 edori-firiḡorito,
 a tanu lealea tarimari
 ḡia na eḡabi-vaisirito.

⁵³ Vito tarimari maki dagara namori ai evaḡa-vonurito,

a fafare vovoka tarimari

ḡia na ḡimari kori
 evaḡa-ḡenoḡoirito.

⁵⁴ Ḡena kiraḡitore ḡita tubura ḡatara Isaraela tarimari ḡesi asi etuḡa-rekwarito,
 ema ḡia eiaḡomato

ḡena vetuḡunaḡi tarimari Isaraela bene vaḡa-kavari ḡana,

⁵⁵ senera ekiraḡitore-vinirito ilailana.

Aberahamo ma besena ḡesi roḡo bevetuḡa-ḡwa vanaḡi-vanaḡirini, etato.”

⁵⁶ Maria monai tu Elisabeta ḡesi ḡetanuto ḡue toitoi (3). Moḡa murinai ḡena vanuḡa ḡana ma eḡenoḡoi-iaḡoto.

Ioane Babatiso emaḡurito

⁵⁷ Elisabeta ḡena ḡabi ḡarona varau eraḡasito nai, mero ta eḡabiato.

⁵⁸ Benamo sevinai ḡetanuto tarimari ema garagarana na varina ḡeseḡaḡiato nai, ḡia ḡesi ḡeikaku-vegogoto, korana Vereḡauka ḡena namo e varevare-bara ḡia ḡenai egorato nai.

⁵⁹ Garo vaḡa-imaima toitoinai (8) mero tauḡanina kфина beḡene lama-vaḡia ḡana ḡevevegogoto. Mai ḡaro sebonai maki arana beḡene vatoga Sakaria, tamana beḡene turaia ḡetato.

⁶⁰ Senaḡi sinana asi eurato nai ekirato, “Asiḡina! Ḡia arana tu Ioane.”

⁶¹ Ḡia ḡekirato, “Senaḡi ḡoi ḡemu bese nuḡanai mai ara tu asiḡina!”

⁶² Benamo ḡia na mero tamana ḡimari ai mogo ḡedanagiato, mero arana tu deikara beḡene si.

⁶³ Sakaria na toretore vetuḡuna ta ekiraḡiato, benamo maḡesi etoreato, “Ḡia arana tu Ioane.” Benamo mabarari nuḡari ḡefarevaḡito.

⁶⁴ Monai vau muruna evekeoto, meana maki erorogototo, benamo eguruḡato, Barau evaḡa-namoato.

⁶⁵ Moḡa lorinai seviri ai ḡetanuto tarimari mabarari ḡegaba-rakavato ema mo veiḡa varina Iudea ḡoro vanuḡari mabarari nuḡari ai ḡevari-fiuato.

⁶⁶ Varina ḡeseḡaḡiato tarimari mabarari na ḡetuḡamaḡi-iaḡiato, ḡekirato, “Mai mero tu kamasi beveini?” Korana tu Vereḡauka ḡimana seḡukana tu ḡia iatanai.

Sakaria ḡena mari

⁶⁷ Ioane tamana Sakaria Iauka Veḡa na evaḡa-vonuato, benamo Barau ḡena guruḡa evaḡa-foforiato, ekirato,

⁶⁸ “Vereḡauka,

Isaraela tarimari ḡeri Barau,
 sivaḡa-namoa,

korana tu ḡia ḡena bese
 tarimari eiaḡoma-vinirito
 bene voi-ḡenoḡoiri ema
 bene vaḡa-maḡuriri ḡana.

⁶⁹ Vevaḡa-maḡuri tauna ma seḡukana ḡesi etuḡuato ḡita ḡera,
 ḡia tu ḡena vetuḡunaḡi tauna

Davida garakana.

⁷⁰ Mai kirağitore tu

ğena peroveta tarimari veağari na irau lağani ai ġekiraği-foforiato:

⁷¹ Ġita tu ġia na ekira-ğarato,

ğevetari-vinirani ema ġebaru-vinirani tarimari ġimari na ġia na bevağa-mağurirani etato.

⁷² Ekirato maki, ġita tubura ġatara bevetuğa-ğwarini,

ema ġena kirağitore veağana

asi betuğa-rekwaiani.

⁷³ Ġia na ġita senera Aberahamo ekirağitore-viniato,

⁷⁴ benamo ekirato, ġevetari-vinirani tarimari ġimari na beğabi-mağurirani.

Benamo vetuğunağina bisini iağo-vini asi garira ġesi.

⁷⁵ Goiranai bisini raka ma veağara e ma iobukaiobukara ġesi

ğera mağuri ġarori mabarari ai.

⁷⁶ Natugu o, ġoi tu Iaru-korokoro Barauna ġena peroveta tarimana beğe kirağimuni,

korana tu boraka-guineni Vereğauka ġena dabara bono vağa-mağataia ġana.

⁷⁷ Ġena bese tarimari

bono vağa-ribari,

ğia na ġeri rakava bene tuğamaği-fitoğari ema bene vağa-mağuriri.

⁷⁸ Korana ġita ġera Barau ġena vetuğagwa tu barego ġita ġerai.

Garu erağekauni mamana kavana vevağa-mağuri ġita iatarai betanuni.

⁷⁹ Benamo mukunai e mase gari nuğanai ġetanuni tarimari bevağa-mamarini,

ema maino dabaranai beğori-kaurini.”

⁸⁰ Ioane ebaregoto ema iaukana egwadato. Tano fakanai etanuto-ğoi, eiağomato mo, Israela tarimari ġeri ai efoforito ġarona.

2

Iesu ġena ġora

¹ Mo negai Kaisara Augusto, Roma ġeri vere, na ġena vevağa-naği etuğwato, tanobara tarimari mabarari arari beğene toreri, sensisi beğene ġabia.

² Mai tu sensisi giniguinena, Kwirinio na Siria evereato-ğoi neganai ġeğabiato.

³ Moğa lorinai tarimarima mabarari arari toretoreri uranai tata ġeri vanuğa korikori ġana ġeğenoğoi.

⁴ Iosefa maki erakato. Nasareta, Galilea rekena vanuğa ta na, Betelehema ġana eiağoto, Iudea rekena vanuğa ta, Davida ġena vanuğa. Mo ġana eiağoto, korana ġia tu Davida ġena doğoro tarimana.

⁵ Monai arana beğene torea ġana, ġia kirakauna Maria ġia ġesi ġeiağoto. Ġia tu ma banina.

⁶ Tauri ruarua monai ġetanuto-ğoi nuğanai, ġena ġabi ġarona varau evotuto.

⁷ Ġia eğabito, mero guinena eğabiato, dabuğai eseğoato, boromakau ġeri ġaniğani fatanai evağa-ğenakawato, korana varivari tarimari ġeri numa asi faka ta dainai.

Mamoe narinari tarimari ma aneru ġesi

⁸ Mo tano monai mamoe ġenaririto-ğoi tarimari kota tu boğai ġetanuto-ğoi, boğai ai ġeri mamoe ġeğitağaurito-ğoi.

⁹ Benamo Vereğauka ġena aneru ta ġia ġeri ai efoforito, Vereğauka mamana na emamataririto; ġegari-rakavato,

¹⁰ senaği aneru na ekirarito, ekirato, “Asi ġogari! Vari Namona au na bağwa-iağomaia ġomi ġemi, tarimarima mabarari vağa-iakuri ema vağa-verereri ġana.

¹¹ Maitoma Davida ġena vanuğai ġemi vevağa-mağuri tarimana bemağuri, Keriso Vereğauka!

¹² Vetoğana tu maiğa, mero raraka-raraka boğo doğariani boromakau ġeri ġaniğani fatanai ġenakau, dabuğa na beseğoa.”

¹³ Benamo asikauna guba aneruri ġutuma mai aneru sebona ġesi ġefofori-barato, Barau ġevağa-namoato, ġekirato,

¹⁴ “Guba tuğuna vanigerenai

Barau beğene vonevone-rağe vinia,

ema tanobarai maino

ğia na eiaunamo-vinirini

tarimari na beğene ġabia!”

¹⁵ Aneru mabarari na ġeraga-kwanerito, guba ġana ġeğenoğoi murinai, mamoe ġitağauri tarimari ġeguruğa-vegogoto, ġekirato, “Ġita tu Betelehema ġana si-iağo, Vereğauka na bevağa-ribara dagarana sia ġitaia.”

¹⁶ Benamo ġeraga-iaġoto, Maria e Iosefa ġedoġaririto, mero keina maki boromakau ġeri ġaniġani fatanai ġenataġonai ġeġoitaġoato.

¹⁷ Mero ġeġitaliato, benamo aneru na ġevaġa-ribarito mero varina ġekiraġi-foforiato.

¹⁸ Benamo ġeseġaġito tarimari mabarari mamoe ġitataġori tarimari ġeri guruġa na nuġari ġefarevaġito.

¹⁹ Maria na mo guruġa mabarari nuġanai etorerito ema etuġamaġirito-ġoi.

²⁰ Mamoe ġeġitaġauto-ġoi tarimari ġeġenoġoito, Barau ġevavato-iaġiato, ġevaġa-raġeato, korana ġeseġaġirito ema ġeġitarito dagarari tu moġoni, aneru na ġia evaġa-ribarito ilailana.

Iesu arana ġevatoato

²¹ Ġaro vaġa-imaima toitoinei (8), mero tauġanina kefina beġe lama-vaġiani ġaronai, ġia arana ġevatoato, Iesu. Sinana na roġosi bene ġoitaġoa nuġanai, aneru na ekiraġiato arana ġeviniato.

Iesu Rubu Veaġi ġea vaġa-foforiato

²² Mero eġorato ġaro gabana vasivasi (40) murinai, ġia ġeri veiareva ġarona eraġasito, Mose ġena taravatu ekirani ilailanai. Benamo Iosefa e Maria na Iesu Ierusalemā ġana ġeġwa-iaġoato, Vereġauka ġoiranai ġea vaġa-foforia ġana.

²³ Korana Vereġauka ġena taravatu ekirani, “Ġora guine merori mabarari tu veaġa Vereġauka ġena.”

²⁴ Vere-ġauka ġena taravatu ilailana varevare dagarana beġene vinia ġetato, pune ruarua o pune variġuri ruarua.

²⁵ Tau ta Ierusalemāi etanuto-ġoi, arana tu Simeona. Ġia tu vei-iobukaiobuka tarimana ema Barau ġena taravatu ekorana-iaġiato-ġoi tarimana. Ġia na Isaraela ġeri vevaġa-maġuri enariato-ġoi ema lauka Veaġa na evaġa-vonuato.

²⁶ Iauka Veaġa na maki evaġa-guruġiato, ekirato, ġia asi roġo bemaseni mo, Keriso, (Barau na ekiraġi-toreato vevaġa-maġuri tauna), roġo beġitaiani.

²⁷ Iauka Veaġa na Rubu Veaġa nuġanai Simeona eġori-toġaiato vau, Iesu tamana ema sinana na ġeġwa-toġaiato, taravatu ekirani veigana beġene veia ġana.

²⁸ Benamo Simeona na mero eġabiato, efaniato, Barau evaġa-namoato, ekirato,

²⁹ “Vereġauka, ġemu vetuġunaġi tauna mai vau bono tuġu-fitoġagu,

ma mainogu ġesi mai baiaġoni

ġemu kiraġitore vaġa-ilailana.

³⁰ Varau ġemu vevaġa-maġuri

matagu na bama ġitaia,

³¹ ġoi na ovei-toreato tarimarima mabarari ġoirari ai.

³² Mamana maiġa,

bese irauirau vaġa-mama-iaġiri,

ma ġoi ġemu bese Isaraela

vevato-iaġiri ġana.”

³³ Mero tamana e sinana na Simeona ġena guruġa ġeseġaġito nai, ġeġaba-rakavato.

³⁴ Benamo Simeona na tauri ruarua evaġa-namorito, Maria ekiraiato, ekirato, “Mai mero na Isaraela tarimari ġutuma vaġa-ketori ema ġutuma vaġa-vaisiraġeri ai beiaġoni. Ġia tu vetoġa ta Barau ġenana, tarimarima ġutuma na beġe kiraġi-fitoġaiani,

³⁵ moġesi tarimarima nuġari vekuretoġari dagarari mabarari beġea foforini. Ġoi, Maria, maki midigumidigu asikei boġoitaġoni, noġa moġo lorumu kaia na beġe gwanu-toġaiani midiguna kavana.”

³⁶ Monai peroveta vavinena ta arana Ana. Ġia tu Fanuela natuna, Asere ġena doġoro vavinena. Ġia tu eveġaraġoto, laġani imaima ruarua (7) ġaraġona ġesi ġetanuto,

³⁷ benamo evabuto, laġani gabana imaima ma gabana toitoi vasivasi (84) etanuto, varau eġaukato. Rubu Veaġa asi eraga-kwaneato, laġani e boġi ai Barau etoma-rakariġo viniato-ġoi, eġuririto-ġoi ema eġaniveaġato-ġoi.

³⁸ Mo hora sebonai ġia maki eraġasito, benamo Barau evaġa-namoato, Ierusalemā vaġa-maġurina ġenariato-ġoi tarimari ġoirari ai mai mero varina ekiraġiato.

Nasareta ġana ma ġeġenoġoito

³⁹ Iosefa ema Maria na Vereġauka ġena taravatu ekirani veigari mabarari ġevairito murinai, Galilea ġana ġeġenoġoito, ġeri vanuġa Nasareta ġana.

⁴⁰ Mai mero ebareġoto ma gwadana ġesi; Barau ġena iaunega na evonuvonu-raġeto ema ġena namo e varevare-bara tu ġia iatanai.

Iesu Rubu Veaġa nuġanai

⁴¹ Laḡani mabarari nuḡari ai Iesu tamana ema sinana tu Ierusalemā ḡana ḡeiaḡoto-ḡoi, Pasova verekona dainai. (Moḡa tu Iuda tarimari mase aneruna na evanaḡirito moḡo, asi evaḡirito verekona).

⁴² Iesu ḡena laḡani gabanana ruarua (12) eḡabiato nai, ḡia maki tamana ema sinana ḡesi vereko urana ḡeiaḡoto, ḡeveito-ḡoi kavana.

⁴³ Vereko ekirito murinai, ḡeḡenoḡoito ḡeri vanuḡa ḡana, senaḡi ḡia asi ribari, Iesu tu Ierusalemāi ḡeraga-kwaneato.

⁴⁴ ḡia ḡeri tuḡamaḡi Iesu tu ḡia ḡesi. ḡaro sebona ḡerakato murinai, garagarari ema ḡatari fakari ai ḡevetauato.

⁴⁵ ḡevetauto nuḡanai asi ḡeḡoitaḡoato, moḡa lorinai ma ḡeḡenoḡoito Ierusalemā ḡana Iesu vetauvetauna.

⁴⁶ ḡaro toitoi murinai ḡeḡoitaḡoato, Iesu tu Rubu Veaḡa nuḡanai Iuda tarimari ḡeri vevaḡa-riba tarimari ḡesi. Barau ḡena guruḡa ḡekiraḡirito-ḡoi eseḡaḡirito-ḡoi ema ḡia na maki edanaḡirito-ḡoi mai guruḡa aniri tu kara.

⁴⁷ Mabarari na Iesu ḡena vedanaḡi ema evaḡa-veseto guruḡari ḡeseḡaḡito nai, ḡeḡabarakavato.

⁴⁸ Iesu tamana ema sinana mainai ḡeḡoitaḡoato nai, nuḡari ḡefarevaḡi-rakavato, benamo sinana na ekiraḡato, ekirato, “Natugu, karase nai ḡoi na ḡai maiḡesi boveima? Goi tamamū ema au tu ḡoi daimu ai dabarama maki beḡe doko, kamasi ta mai bovei baḡasi.”

⁴⁹ Iesu ekirato, “Karase nai au ḡovetauguni? Gomi asi ribami au tu Tamagu ḡena numai?”

⁵⁰ Senaḡi ḡia asi ribari, Iesu karase maiḡesina evevaḡa-veseto.

⁵¹ Moḡa murinai Iesu tamana ma sinana ḡesi ḡeḡenoḡoito Nasareta ḡana. ḡeri guruḡa mabarari eiaḡo-vinirito-ḡoi. Maiḡeri dagara ḡeḡorato mabarari Maria na nuḡanai etorerito ema etuḡamaḡi taḡorito-ḡoi.

⁵² Iesu efutuato ma iaunegana ḡesi, Barau ema tarimarima na maki ḡeuraviniato-ḡoi.

3

Ioane Babatise eḡobatato

Ioane 1:19-28

¹ Tiberio Kaisara, Roma ḡeri vere, evereto laḡani gabanana imaima (15) nuḡanai, Pontio Pilato tu Iudea ḡeri gavana, Heroda tu Galilea verena, tarina Filipo tu Iturea ma Trakoniti tanori ḡeri vere, Lisania tu Abilene verena.

² Anas ma Kaiafas tu Rubu Veaḡa vereri baregori. Mo negai Barau na Ioane Sakaria evaḡa-guruḡaiato tano fakana.

³ Benamo Ioane na Ioridana ḡarukana tanona mabarana eraka-vaḡa-ḡauato, eḡobatato-ḡoi, tarimarima ḡeri rakava ḡerina beḡene vetuḡamaḡi-kure e beḡene raka-kure, ema babatise beḡene ḡabia, Barau na ḡeri rakava bene tuḡamaḡi-fitoḡari ḡana.

⁴ Isaia, peroveta tarimana, ḡena bukai etoreato ilailanai, ekirato,

“Tarima ta tano fakana ekeani, ekirani,

‘Vereḡauka ḡena dabara ḡoiarevaia,

ḡena iaḡoma dabarana ḡovaḡa-maoromaoroa.

⁵ Douka gaburi mabarari

boḡono vaḡa-vonuri,

ḡoro baregori e ḡoro keiri mabarari boḡono vaḡa-faiarari.

Dabara ḡeḡeva-ḡeḡevari

boḡono vaḡa-maoromaorori,

ema dabara koufakoufari maki boḡono vaḡa-vonuri.

⁶ Benamo tarimarima mabarari na Barau ḡena vevaḡa-maḡuri beḡe ḡitaiani!”

⁷ Tarimarima ḡutuma Ioane ḡenai ḡeiaḡoto, bene babatise ḡana. Benamo Ioane na eḡobatarito, ekirarito, “Gomi mota naturi, dei na bekirami, Barau ḡena vevaḡa-maoro ḡenana boḡo raga-maḡurini?”

⁸ Gemi rakava ḡerina boḡono vetuḡamaḡi-kure, ema boḡono raka-kure Barau ḡenai, benamo ḡemi maḡuri ai ḡwaḡwa namori boḡono buri. Asi boḡono kira, ‘Aberahamo tu ḡai tamama, (be Barau na beḡabi-raḡemani).’ Korana boḡono riba, Barau tu ma seḡukana Aberahamo natuna tu mai fore ḡerina bevaḡa-ḡorarini!

⁹ Koko tu ḡau korari ai varau beḡe toreri. Benamo ḡwaḡwa namori asi beḡe ḡwani ḡauri mabarari tu beḡe basirini, karava beḡe fiu-raḡerini.”

¹⁰ Vegogo tarimari na Ioane ḡedanaḡiatio, ḡekirato, “Be, ḡai tu kara baḡana vei?”

¹¹ ḡia na evaḡa-veserito, ekirato, “Gomi deidei ḡemi sedi ruarua nai, ta tu asi ḡena sedi tarimana bono vinia, e ma ḡana ḡaniḡani tarimana na maki moḡesi bene vei.”

¹² Takesi gogo tarimari maki babatiso beġene ġabi ġana Ioane ġenai ġeiaġoto, ġedanaġiato, ġekirato, “Vevaġa-riba taumu, ġai tu kamasi baġana vei?”

¹³ Ġia evaġa-veseto, ekirato, “Taravatu ekirani lorinai moġo boġono gogo.”

¹⁴ Vetari tarimari o soldia na maki ġedanaġiato, ġekirato, “Ġai maki kamasi baġana vei? Ġia evaġa-veseto, ekirato, “Tarima ġeri moni asi boġono verariri ema asi boġono kira-rakavari. Gomi davami dainai maki asi boġono mugumugu.”

¹⁵ Tarimarima nuġari ai maiġesi ġetuġamaġito, “Mai tarima tu Keriso, (Barau na ekiraġi-toreato vevaġa-maġuri tauna), banaġu,” ġetato.

¹⁶ Benamo Ioane na mabarari evaġa-guruġarito, ekirato, “Au tu nanu na ababatisomini, senaġi tarima ta beiaġomani, ġia ġena seġuka na au ġegu seġuka tu evanaġiani. Au tu asi ilaila ġia ġena tamaka varona baruġaiani. Ġia na Iauka Veaġa ema karava na bebabatisomini.

¹⁷ Ġia ġimanai tu iareva-iareva dagarana, widi momona tu widi tauri ġenana bene iareva-ġitakauri ġana. Benamo widi tu ġena vaġa-vegogo numanai bevaġa-vegogorini, senaġi widi momona tu begabuani asi ebuseni karavanai.”

¹⁸ Ioane na mo guruġai ema guruġa ġutumai maki Barau ġena Vari Namona tarimarima eġobata-vinirito, ema enoġirito, ġeri rakava ġerina beġene vetuġamaġi-kure.

¹⁹ Ioane na maki Heroda, Galilea verena, evaneato, korana tu ġia kakana Filipino ġaraġona eġaraġoato nai, ema veiġa rakavari ġutuma eveirito nai.

²⁰ Heroda na mo rakava mabarari iatari ai ta ma etore-kauato, ġia na Ioane dibura numanai ma ekou-ġauato.

Ioane na Iesu ebatatsoato

Mataio 3:13-17; Mareko 1:9-11

²¹ Tarimarima mabarari Ioane na ebatatsoarito-ġoi nai, Iesu maki ebatatsoato. Benamo Iesu eġauġauto-ġoi nuġanai, guba evekeo-fakato,

²² Iauka Veaġa emariġoto ġia iatanai, vetoġana noġa pune kavana. Garo ta guba na ekeariġoto, ekirato, “Ġoi tu au Natugu, aura-vinimuni; ema ġemu ai aiaku-rakavani maki.”

Iesu tubuna ġatana arari

Mataio 1:1-17

²³ Iesu na ġena ġauvei esinaiato nai, ġena laġani tu gabana toitoi (30) kavana. Tarimarima ġekirato-ġoi, ġia tu Iosefa natuna. Besena tu maġeri: Iosefa tu Heli natuna,

²⁴ Heli tu Matat natuna, Matat tu Levi natuna. Levi tu Melki natuna. Melki tu Ianai natuna. Ianai tu Iosefa natuna.

²⁵ Iosefa tu Matatia natuna. Matatia tu Amosa natuna. Amosa tu Nahum natuna. Nahum tu Eseli natuna. Eseli tu Nagai natuna.

²⁶ Nagai tu Mahat natuna. Mahat tu Matatia natuna. Matatia tu Semein natuna. Semein tu Ioseka natuna. Ioseka tu Ioda natuna.

²⁷ Ioda tu Ioanan natuna. Ioanan tu Resa natuna. Resa tu Serubabele natuna. Serubabele tu Sealtiele natuna. Sealtiele tu Neri natuna.

²⁸ Neri tu Melki natuna. Melki tu Adi natuna. Adi tu Kosam natuna. Kosam tu Elmadam natuna. Elmadam tu Ere natuna.

²⁹ Ere tu Iosua natuna. Iosua tu Eliesere natuna. Eliesere tu Iorim natuna. Iorim tu Matat natuna. Matat tu Levi natuna.

³⁰ Levi tu Simeona natuna. Simeona tu Iuda natuna. Iuda tu Iosefa natuna. Iosefa tu Ionam natuna. Ionam tu Eliakim natuna.

³¹ Eliakim tu Melea natuna. Melea tu Mena natuna. Mena tu Matata natuna. Matata tu Natan natuna. Natan tu Davida natuna.

³² Davida tu Iese natuna. Iese tu Obed natuna. Obed tu Boas natuna. Boas tu Salmone natuna. Salmone tu Nasona natuna.

³³ Nasona tu Aminadab natuna. Aminadab tu Admin natuna. Admin tu Areni natuna. Areni tu Hesron natuna. Hesron tu Perese natuna. Perese tu Iuda natuna.

³⁴ Iuda tu Iakobo natuna. Iakobo tu Isako natuna. Isako tu Aberahamo natuna. Aberahamo tu Tera natuna. Tera tu Nahoro natuna.

³⁵ Nahoro tu Serug natuna. Serug tu Reu natuna. Reu tu Peleg natuna. Peleg tu Ebere natuna. Ebere tu Sela natuna.

³⁶ Sela tu Kainana natuna. Kainana tu Afasada natuna. Afasada tu Sem natuna. Sem tu Noa natuna. Noa tu Lameka natuna.

³⁷ Lameka tu Metusela natuna. Metusela tu Enoka natuna. Enoka tu Iared natuna. Iared tu Mahalalel natuna. Mahalalel tu Kainana natuna.

³⁸ Kainana tu Enos natuna. Enos tu Seta natuna. Seta tu Adamu natuna. Adamu tu Barau natuna.

4

Satani na Iesu eriba-ġaniato

¹ Iesu Ioridana ġarukanai Iauka Veaġa na evaġa-vonuato vau, ea ġenoġoito, benamo Iauka na tano fakana ġana eġori-iaġoato.

² Monai ġaro e boġi gabana vasivasi (40) Diabolo na eribaġaniato-ġoi. Mo ġaro mabarari nuġari ai asi eġaniġanito-ġoi, moġa lorinai mo ġaro ġekorito murinai, ġia evito-rakavaiaito.

³ Diabolo na ekiraiato, ekirato, “Bema ġoi Barau Natuna nai, mai fore nokiraia, be ġaniġani ai neiago.”

⁴ A Iesu na evaġa-veaseato, ekirato, “Buka Veaġa nuġanai maiġesi ekirani, ‘Tarimarima tu dia ġaniġani na moġo bemaġurini.’”

⁵ Benamo Diabolo na Iesu eġori-raġeato gabu ta tuġunai, tanobara basileiari mabarari vaġa-sebo evaġa-ġitaiaito.

⁶ Benamo Diabolo ekirato, “Au na seġuka bavinimuni, maiġeri dagara mabarari boġita-ġaurini, aramu maki bebaregoni. Mai dagara mabarari tu au ġegu, benamo aura-viniani tarimana baviniani.

⁷ Moġa lorinai bema au botoma-rakariġo viniguni nai, maiġeri dagara mabarari boġabirini ġoi ġemu.”

⁸ Senaġi Iesu evaġa-veseto, ekirato, “Buka Veaġi tu maiġesi ġetoreato, ‘Vereġauka, ġoi ġemu Barau bono toma-rakariġo vinia, ġia moġo ġereġana vetuġunaġina bono iaġo-vini!’”

⁹ Benamo Satani na Ierusalemna ġana eġori-iaġoato, Rubu Veaġa tuġunai evaġa-ruġakauato, ekiraiato, “Bema ġoi Barau Natuna, mainana noburi-firiġo,

¹⁰ korana Buka Veaġa nuġanai maiġesi ekirani, ‘Barau na ġena aneru bekirarini, ġoi beġe narimuni.’

¹¹ Ekirani maki, ‘Aneru na ġimari na beġe ġobemuni, beġe ġabi-vaisimuni, kwakumu fore ai asi boraraiani.’”

¹² Iesu evaġa-veseto, ekirato, “Buka Veaġa nuġanai maki ekirani, ‘Vereġauka ġoi ġemu Barau asi bono riba-ġania.’”

¹³ Satani ġena veribaġani mabarari evaġa-koririto, benamo eraga-kwaneato, eiaġoto mo, ġaro ta.

Iesu ġena ġauvei esinaiaito Galileai

Mataio 4:12-17; Mareko 1:14-15

¹⁴ Iesu ma eġenoġoito Galileia ġana, Iauka Veaġa seġukana maki ġia ġesi. Ġia varina Galilea tano nuġanai ġefiu-rovorovoato.

¹⁵ Iesu tu ġeri rubu nuġari ai evevaġa-ribato-ġoi, mabarari na ġevaġa-raġeato.

Nasareta tarimari na Iesu asi ġeġabi-raġeato

Mataio 13:53-58; Mareko 6:1-6

¹⁶ Benamo Iesu Nasareta ġana eiaġoto. Mai tu ġia ebaregato vanuġana. Vanaġivanagi eveito-ġoi kavana Sabadi ai ġia rubu ai eraka-toġato. Benamo Buka Veaġa bene iavia ġana evariġisito nai,

¹⁷ Isaia peroveta tarimana ġena buka rubu ġitaġauna tarimana na Iesu eviniato, benamo ġia na ereraiaito, ġena iavi-iavi gabuna eġoitaġoato, maiġesi ekirani,

¹⁸ “Vereġauka Iaukana tu

au ġegu ai maiġa,

korana ġia na tu

au eborogiguto,

ema eviriġiguto,

Vari Namona gara veġubu tarimari bana ġobata-viniri ġana.

Etuguguto, dibura tarimari ġeri ai Barau na dibura na varau eġabi-vaġirato varina bana varifua ġana,

ema mata-bubu tarimari

matari maki beġene fafa.

Ġevaġa-rakavarini tarimari

bana vaġa-maġurini,

¹⁹ ema Vereġauka na tarimarima bevaġa-maġuririni laġanina bana ġobata-iaġia.”

²⁰ Benamo Iesu na buka ma eiokuato, rubu ġitaġauna tarimana ma evini-ġenoġoito, benamo etanu-tarito. Mabarari rubu nuġanai tarimari na ġeġita-karakaraiato.

²¹ Benamo Iesu na eġobata-vinirito, ekirato, “Mai boġo seġaġia guruġana tu toma ġaro ai bemoġoni.”

²² Benamo mabarari na ġevaġa-namoato e ġeġabato, korana guruġa namori ekiraġirito nai. Gekirato, “Mai tu Iosefa natuna ba?”

²³ Benamo Iesu na ekirarito, ekirato, “Au ribagu ġomi na mai sisiba guruġana au ġegu ai boġo kira-varaguni, boġo kirani, ‘Doketa tarimamu, tauġemu bono vevaġa-maġuri! Kaperanaumai oveirito veġari variri ġama seġaġirito, be mainai ġemu vanuġa korikori ai maki bono vei.’ ”

²⁴ Moġoni akiramini, peroveta tarimana tu ġena vanuġa korikori ai asi beġe ġabi-raġeani.

²⁵ Maġa maki boġono seġaġi: Moġoni, Elia ġena negai vabu ġutuma Isaraelai ġetanuto-ġoi. Laġani toitoi (3) ma ġue imaima sebona (6) nuġanai ġura asi eraguto-ġoi, tanobara mabarana doġe na eġabi-ġauato.

²⁶ Senaġi mo Isaraela vaburi ġeri ai Barau na Elia asi etuġu-iaġoato. Irau gabu vanuġana ta arana Sarefata, Sidono tanonai, vabu ta ġenai etuġu-iaġoato.

²⁷ Elisa, peroveta tarimana, ġena negai lepera tarimari ġutuma Isaraelai ġetanuto-ġoi, senaġi sebona ta asi evaġa-namoato, Naman, Siria tarimana, moġo ġereġana.

²⁸ Rubu ai ġevegogoto tarimari mabarari mo guruġa ġeseġaġiato nai, ġebaru-rakavato.

²⁹ Benamo ġevariġisito, Iesu vanuġa na ġeinu-rosiato, ġeri vanuġa ġevaġa-ruġaiato ġorona tavi ta reke lofa asikeina na beġene fiu-riġoa ġetato.

³⁰ Senaġi Iesu tu ġia fakari na moġo eraka-vaġito, mo eiaġoto.

Iesu na iauka rakavana elai-vaġiato

Mareko 1:21-28

³¹ Iesu tu Kaperanauma, Galilea vanuġana ta, ġana evariġoto. Benamo Sabadi ai evevaġa-ribato.

³² Ġia ġena vevaġa-riba guruġari tarimarima na ġeseġaġiato nai, ġeġaba-rakavato, korana ġena guruġa ma seġkana.

³³ Rubu nuġanai iauka rakavana na eboroġiato tarimana ta etanu-taġoto-ġoi. Ġia ekoġo-gigitarito, ekirato,

³⁴ “Iesu, Nasareta taumu o, kara ġemai noveia otoni? Ġoi ġai vaġa-rakavama uranai boiaġoma, ene? Au ribagu, ġoi tu Barau ġena Veaġa Tarimamu.”

³⁵ Iesu na ekira-ġoiato, ekirato, “Gurumu, ġia ġenana noraka-vaġi!” Benamo mo iauka rakavana na tano eġidara-iaġiato tarimarima ġoirari ai, ġia ġenana eraka-vaġito, fau ta maki asi eforito ġia ġenai.

³⁶ Benamo tarimarima mabarari nuġari ġefarevaġi-rakavato, ġeveguruġa-vevinito, ġekirato, “Mainai kamasi eguruġani? Be, ma seġkana e ma gwadana ġesi iauka rakavari evaġa-guruġarini, benamo ġeraka-vaġini!”

³⁷ Benamo Iesu varina mo gabu mabaranaġi ġefiu-rovorovoato.

Iesu na Simona ġena taġama evaġa-namoato

Mataio 8:14-15; Mareko 1:29-31

³⁸ Iesu rubu eraga-kwaneato, benamo Simona ġena numa ġana eiaġoto. Simona ġena taġama vavinena ekeveto, tauġanina eseġuka-rakavato; benamo Iesu ġenoġiato bene vaġa-kavaia.

³⁹ Benamo Iesu eiaġoto mo vavine sevinai eruġato, keve ekira-ġoiato, benamo keve ekorito. Vavine maoromaoro evariġisito, benamo eġuburito.

Keve tarimari ġutuma Iesu na evaġa-namorito

Mataio 8:16-17; Mareko 1:32-34

⁴⁰ Ġaro ea keto-friġoto-ġoi nai, tarimarima na keve irauirau tarimari mabarari Iesu ġenai ġeġori-iaġorito. Ġia ġimana tarima tata iatari ai etore-kaurito evaġa-namorito.

⁴¹ Iauka rakavari maki tarimarima ġutuma ġerina ġeraka-vaġito, benamo iauka rakavari ġekoġoto, ġekirato, “Ġoi tu Barau Natuna!” Senaġi Iesu na evaġa-guruġarito asi beġene guruġa, korana ġia ribari Iesu tu Keriso, (Barau na ekiraġi-toreato vevaġa-maġuri tauna).

Iesu rubu nuġari ai eġobatato-ġoi

Mareko 1:35-39

⁴² Elaġanito, Iesu evariġisito, tano fakana ġana eiaġoto. Tarimarima na ġea vetuato, ġedoġariato, ġeġabi-tariato asi ġeri ura ġia na bene raga-kwaneri ġetato.

⁴³ Senaġi Iesu na evaġa-guruġarito, ekirato, “Au tu vanuġa irauri ai maki bana ġobata, Barau ġena Basileia varina namona bana fiua, Barau na etuġuguto korana tu moġa.”

⁴⁴ Benamo Iudea tanona ruburi nuġari ai eġobatato-ġoi.

¹ Ĝaro ta Iesu tu Genesareta kouna rikinai eruĝa-taĝoto-ĝoi, tarimarima na ĝeraga-ĝeĝeragiato, Barau ĝena guruĝa beĝene seĝaĝia ĝana.

² Ĝia tu ĝasi ruarua eĝitarito, kou rikinai ĝeinu-raĝerito; maina tarimari na ĝeraga-kwanerito, ĝeri reke ĝeĝurigiĝerito-ĝoi.

³ Benamo Iesu tu mo ĝasi tai eraĝeto, Simona ĝena ĝasi. Ĝia na Simona ekiraiato, kota negini-rosia nanu ĝana. Benamo ĝasi ai etanu-tarito, tarimarima ĝutuma evaĝa-ribarito.

⁴ Eguruĝa-ĝosito vau, ĝia na Simona ekiraiato, ekirato, “Ĝemi ĝasi dodoku rekena ĝana ĝogini-rosia, be ĝemi reke boĝono toreri, maĝani-kone boĝono vaĝi ĝana.”

⁵ Simona evaĝa-veseto, ekirato, “Vevaĝa-riba taumu, ĝai tu baĝa vekwaraĝi-laĝani, maĝani-kone ta maki asi baĝa doĝaria, senaĝi ĝoi ĝemu guruĝa dainai reke atorerini.”

⁶ Benamo ĝetorerito, maĝani-kone asisebo ĝetogato, ĝeri reke maki dori ĝevedareto.

⁷ Moĝesi nai karori ĝasi tai ĝelau-iaverito, beĝene iaĝoma, be ĝia beĝenema vaĝa-kavari ĝetato. Ĝeiaĝomato, ĝasi ruarua maĝani-kone na ĝevaga-vonurito, dori ĝeburuto-ĝoi.

⁸ Simona Petero na mo veĝa eĝorato dagarana eĝitaiato, benamo Iesu kwakuna koranai eketo-tarito vau ekiraiato, ekirato, “Vereĝauka, noraka-veĝita au ĝeguna, au tu vei-rakava tarimagu!”

⁹ Korana tu ĝia ma karona mabarana ĝesi nuĝari ĝefarevaĝi-rakavato, mo maĝani-kone asisebo ĝevaĝirito nai.

¹⁰ Simona ĝesi ĝemaina-vegogoto-ĝoi tarimari maki Iakobo (o Iames) e Ioane, Sebedαιο natuna, ĝeĝaba-rakavato. Iesu na Simona ekiraiato, ekirato, “Asi nogari; maitoma bevesina beiaĝoni, ĝoi tu tarimarima bomaina-vinirini.”

¹¹ Benamo ĝasi ruarua tu kou rikinai ĝeinu-raĝerito, ĝeri dagara mabarari ĝeraga-kwanerito, Iesu murinai ĝerakato.

Iesu na lepera tarimana evaĝa-namoato

Mataio 8:1-4; Mareko 1:40-45

¹² Ĝaro ta Iesu tu vanuĝa ta nuĝanai, tarima ta monai kefina mabarana lepera moĝo. Ĝia na Iesu eĝitaiato nai, ĝoiranai evetui-tarito, enoĝiato, ekirato, “Vereĝauka, bema ĝoi ourani nai, moĝoni boiarevaguni, bovaĝa-namoguni riba!”

¹³ Iesu ĝimana etuĝu-iaĝoato, eĝabi-karaiato, ekirato, “Aurani, be nonamo!” Benamo vaĝa-sebo lepera na eraga-kwaneato.

¹⁴ Iesu na evaĝa-guruĝaiato, ekirato, “Tarima ta asi bono kira-varaia.” Ma ekirato, “Noiaĝo, Rubu Veaĝa verena na bene ĝitam, ema veiareva varevare dagarari Mose na ekiragiato ilailanai bono vinia, be tarimarima beĝene riba, ĝoi tu bonamo.”

¹⁵ Senaĝi Iesu varina tarimarima na ĝefiu-rovorovoato-ĝoi vau, tarimarima ĝutumabara ĝevegogoto-ĝoi, ĝia ĝena guruĝa seĝaĝi-seĝaĝiri e ĝeri keve vaĝa-namori uranai.

¹⁶ Senaĝi Iesu tu eraka-veĝitato-ĝoi tano fakana ĝana, ea ĝuriĝurito-ĝoi.

Iesu na rakava etuĝamaĝi-fitoĝarito

Mataio 9:1-8; Mareko 2:1-12

¹⁷ Ĝaro tai Iesu evevaĝa-ribato-ĝoi nuĝanai, Farisea tarimari e taravatu vaĝa-riba-iaĝina tarimari Galilea e Iudea vanuĝari mabarari na, ema Ierusalemna na ĝeiaĝomato, ĝia sevinai ĝema tanu-tarito. Barau ĝena seĝuka Iesu ĝenai evaĝa-foforiato, keve tarimari bene vaĝa-namori ĝana.

¹⁸ Tarima kotari na tauĝanina tavi ta emaseto tarimana ta gedai genagenanai ĝeĝwa-iaĝoato. Numa nuĝanai beĝene raka-toĝa dabarana ĝevetauato, Iesu ĝoiranai beĝene toretaria ĝetato.

¹⁹ Senaĝi tarimarima ĝutuma naima, rakatoga dabara ta asi ĝedogariato. Moga lorinai keve rakava tarimana ma gedana ĝesi ĝeĝwa-raĝeato numa tuĝanai, ĝuduĝu ĝeĝiu-fakaiato vau, ĝetuĝu-rigoato tarimarima fakari ai Iesu ĝoiranai.

²⁰ Iesu na ĝeri veĝabidadama eĝitaiato, benamo keve rakava tarimana ekiraiato, ekirato, “Ĝata, ĝoi ĝemu rakava batuĝamaĝi-fitoĝari.”

²¹ Farisea tarimari e taravatu ĝevevaĝa-riba iaĝiato-ĝoi tarimari maiĝesi ĝetuĝamaĝito, “Mai tu deikara, ĝia na Barau ekira-fitoĝaianai? Barau ĝereĝana na moĝo rakava etuĝamaĝi-fitoĝarini!”

²² Iesu ma ribana ĝia kara ĝetuĝamaĝirito-ĝoi, benamo evaĝa-guruĝarito, ekirato, “Karase nai nuĝami ai maniĝesi ĝotuĝamaĝini?”

²³ Aiĝesina baguruĝani tu meraĝa, ‘Ĝemu rakava batuĝamaĝi-fitoĝari’ banasi, ba bara kira, ‘Novariĝisi, be noraka’ barasi?

²⁴ Au na navaĝa-ĝitami, Tarimarima Natuna tu ma seĝukana rakava betuĝamaĝi-fitoĝarini tanobarai.” Ĝia na keve rakava tarimana evaĝa-guruĝaiato, ekirato, “Novariĝisi, ĝemu gEDA noĝabia, be numa ĝana noiaĝo!”

²⁵ Benamo ġia maoromaoro evarigisito tarimarima ġoirari ai, egena-iaġirito dagarari eġabirito, ġena numa ġana eiaġoto, Barau evaġa-raġeato.

²⁶ Tarimarima mabarari nuġari ġefarevaġito ema Barau ġevaġa-raġeato. Gari na evaġa-vonurito, benamo ġekirato, “Veiġa boruri toma ġaro ai bita ġita!”

Iesu na takesi gogo tarimana arana Levi ekeaiato

Mataio 9:9-13; Mareko 2:13-17

²⁷ Moġa murinai Iesu tu vanuġa na eraka-rosito, benamo takesi gogo tarimana arana Levi takesi moniri ġeġabitto-ġoi numanai tanutaġo eġitaiato. Benamo Iesu na ekiraiato, ekirato, “Murigu ai noma raka.”

²⁸ Benamo Levi evarigisito, ġena dagara mabarari eraga-kwanerito, Iesu murinai erakato.

²⁹ Benamo Levi na ġaniġani baregona ġena numai eveiato Iesu ġana. Varivari tarimari vefakari ai tarimarima ġutuma takesi gogo tarimari ema tarima tari ġia ġesi ġeġaniġano.

³⁰ Farisea tarimari tari e taravatu ġevevaġa-riba iaġiato-ġoi tarimari, ġia ġeri doġoro tarimari, ġevanevaneto Iesu ġena mero ġeri ai, ġekirato, “Karase nai ġomi tu takesi gogo tarimari e vei-rakava tarimari ġesi ġoġaniġanini ema ġoniuniu-vegogoni?”

³¹ Iesu na evaġa-veserito, ekirato, “Namo tarimari tu doketa asi beġe vetaurini, senaġi keve tarimari moġo.

³² Au maki vei iobukaioibuka tarimari keakeari asi aiaġomato, senaġi vei-rakava tarimari beġene vetuġamaġi-kure e beġene raka-kure ġana aiaġomato.”

Ġaniveaġa

Mataio 9:14-17; Mareko 2:18-22

³³ Farisea tarimari na Iesu ġevaġa-guruġaiato, ġekirato, “Ioane Babatiso ġena mero nega-ġutuma ġeġani-veaġani e ġeġuriġurini. Ġai ġema mero maki moġesi ġeveini, a ġoi ġemu mero tu ġeġaniġanini e ġeniuniuni moġo.”

³⁴ Iesu na evaġa-veserito, ekirato, “Ġomi ġotuġamaġini veġaraġo variġu tarimana ġatana seviri ai etanuni nuġanai beġe ġani-veaġani ei?

³⁵ Ġarona eiaġomani, veġaraġo variġu tarimana ġia ġerina beġe ġabi-veġitaiani, monai vau beġe ġani-veaġani.”

³⁶ Iesu na ġeri barabore ta ma ekiraġiato, ekirato, “Tarima ta na dabuġa variġuna asi bedareani, dabuġa guinena bani-iaġina. Bema moġesi beveini nai, dabuġa variġuna bedareani, ema dabuġa variġuna veseana dabuġa guinena ġesi asi beġe ilailani.

³⁷ Tarima ta na vine nanuna variġuna nanigosi kefina guinenai asi besisiani. Bema moġesi beveini nai, vine nanuna variġuna na kefi guinena beġani-fakaiani. Vine nanuna bevebubuni e kefina berakavani.

³⁸ Senaġi vine nanuna variġuna nanigosi kefina variġunai besisiani tu namo!

³⁹ Ema tarima ta na vine nanuna guinena eniuani murinai vine nanuna variġuna asi beura-viniani, korana ġia bekirani, ‘Vine nanuna guinena tu namo vedaurea.’ ”

6

Iesu tu Sabadi Verena

¹ Sabadi tai Iesu widi vamokari nuġari na eraka-iaġoto-ġoi, benamo ġena mero widi ġebukito, ġimari ai ġemuturito-ġoi, benamo tauri tu ġeġanirito-ġoi.

² Farisea tarimari kotari na ġedanaġirito, ġekirato, “Ġomi tu kara dainai ġaina taravatu asi ġokorana-iaġiani, Sabadi ai widi ġobukini?”

³ Iesu na evaġa-veserito, ekirato, “Ġomi Davida ma karona ġesi ġevitorito nai, Davida na veġa ta eveiato guruġana tu asi ġoiaviani?

⁴ Barau ġena numai eraka-toġato, Barau ġoiranai ġetorerito-ġoi beredi eġabitto, eġanito ema karona maki evinirito. Mo beredi tu veaġa, Rubu Veaġa vereri moġo ġari, taravatu.”

⁵ Iesu na ma ekirarito, ekirato, “Tarimarima Natuna tu Sabadi Verena.”

Ġima boso tarimana

Mataio 12:9-14; Mareko 3:1-6

⁶ Ma Sabadi tai Iesu rubu ai eraka-toġato, benamo evevaġa-ribato-ġoi. Monai tarima ta tu ġimana aroribana tu ebosoto.

⁷ Taravatu ġevevaġa-riba iaġiato-ġoi tarimari e Farisea tarimari na tu ġia ġeġita-taġoato-ġoi, mai Sabadi ai bevevaġa-namoni ba asiġi, korana beġene samania ġana.

⁸ Senaġina Iesu na ġia kara ġetuġamaġiato-ġoi tu eribaiato, benamo mo tarima ġimana boso ekiraiato, ekirato, “Noruġa-vaisi, mainai noma ruġa.” Benamo eruġa-vaisito, ea ruġato.

⁹ Benamo Iesu na evaḡa-guruḡarito, ekirato, “Nadanaḡimi roḡo, taravatu nuḡanai aiḡa tu namo, Sabadi ai veiḡa namori veiveiri namo ba veiḡa rakavari sini veiri? Tana vevaḡa-maḡuri ba tana vaḡivaḡi?”

¹⁰ Eboḡe-ḡeḡeraḡito, mabarari eḡitarito, benamo mo tarima ekiraiato, ekirato, “Ḡimamu notuḡu-roroḡotoa.” Ḡimana etuḡu-roroḡotoato, benamo enamoto ḡimana reke ta kavana.

¹¹ Senaḡina ḡia tu ḡebaru-rakavato, benamo tauḡeri fakari ai moḡo ḡeḡuruḡa-vegogoto Iesu kamasi ta beḡene veia ḡana.

Iesu na tarima gabanana ruarua (12) eḡabi-hidirito

Mataio 10:1-4; Mareko 3:13-19

¹² Mo ḡaro tai Iesu ḡoro ta tuḡuna ḡana evaraḡeto ḡuriguḡuri, benamo mo boḡi vinubana Barau ḡenai eḡauḡauto.

¹³ Elaḡanito, ḡena mero ekea-vegogorito, benamo gabanana ruarua (12) eḡabi-viriguḡurito, arari evatorito, apostolo.

¹⁴ Simona, arana ta tu Petero, ma tarina Anduru; e Iakobo (o Iames), e Ioane, e Filipino, e Batolomeo,

¹⁵ e Mataio, e Tomasi; e Iakobo (o Iames), Alfeo natuna; e Simona, Selote tarimana;

¹⁶ e Iudas, Iakobo (o Iames) natuna; ema Iudas Isakariota, Iesu berevaiani tarimana.

Iesu evevaḡa-ribato e keve evaḡa-namorito

Mataio 4:24-25; Mareko 3:7-12

¹⁷ Ḡia ḡesi ḡoro na ḡeseiriguḡoto tano faiaranai, benamo Iesu ema ruḡa-tarito. Ḡia ḡenai riba ḡeḡabito-ḡoi tarimari ḡutuma ema tarimarima ḡutuma lelevaḡiri maki Iudea ema Ierusalem na ḡeiaḡomato, Taia konena na e Sidono konena na ḡeiaḡomato,

¹⁸ ḡia beḡene seḡaḡia uranai ema ḡeri keve bene vaḡa-namori ḡana. Iauka rakavari na ḡeboroguḡurito tarimari maki evaḡa-namorito.

¹⁹ Benamo tarimarima mabarari ḡeurato-ḡoi Iesu beḡene ḡabi-karaia, korana tu seḡuka ḡia ḡenana eiḡomato-ḡoi, benamo tarimarima mabarari ḡeri keve ḡenamato-ḡoi.

Deikara beḡene iaku e deikara ḡeri ai tu rakava

Mataio 5:1-12

²⁰ Iesu eboḡeboḡeto, benamo eboḡe-iaḡoto ḡena mero eḡitarito vau ekirato:

“Gara veḡubu tu ḡoiaku,

korana Barau ḡena Basileia tu ḡomi ḡemi.

²¹ Gomi deidei toma ḡevitomini tu boḡono iaku,

korana ḡomi roḡo boḡo ḡani-maseni bene.

Gomi deidei toma ḡotaḡi-taḡini tu boḡono iaku,

korana boḡo rikini bene.

²² Boḡono verere bema tarima na beḡe baru-vinimini, beḡe kira-fitoḡamini, beḡe rori-toremni, ema arami beḡe vaḡa-rakavarini Tarimarima Natuna dainai.

²³ Moḡeri beḡe ḡorani ḡaronai boḡono iaku e boḡono buri-vaishi ma vereremi ḡesi, korana davami tu asikeikeina gubai. Korana ḡia seneri na maki peroveta tarimari moḡesi ḡeveirito.

²⁴ Senaḡina ḡomi ma ḡemi

farefare ḡutuma tarimami

vetuḡami kika,

korana vaḡa-iakumi farefareri tu varau ḡoḡabito bene.

²⁵ Toma ḡogani-maseni tarimami,

vetuḡami,

korana beḡea vitomini.

Toma ḡorikini tarimami,

vetuḡami kika,

korana nuḡami beḡea metoni

e boḡoa taḡini.

²⁶ Tarimarima na ḡekiraḡi-varaḡe varaḡemini tarimami, vetuḡami, korana seneri na maki peroveta tarimari ḡoḡaḡofari tu maniḡesi ḡevaḡa-raḡerito.”

Ḡevaḡa-rakavamini tarimari boḡono ura-viniri

Mataio 5:38-48

²⁷ “Senaḡina au ḡoseḡaḡiguni tarimami akiramini: Ḡebaru-vinimini tarimari boḡono ura-viniri, ḡevaḡa-rakavamini tarimari veiḡa namori boḡono vei-viniri.

²⁸ Ḡekira-rakavamini tarimari boḡono vaḡa-namori ema veiḡa rakavari ḡevei-vinimini tarimari ḡeri boḡono ḡuriguḡuri.

²⁹ Bema tarima ta na taḡomu tavi ta beforoani nai, taḡomu reke ta maki bono vinya. Tarima ta na ḡemu koudi beḡabiani nai, sedi maki asi bono ḡabi-taria, bene ḡabia.

³⁰ Ḡemu ai beḡe noḡinoḡini tarimari bono viniri ema deikara na ḡemu dagara ta beḡabi-rakaiani, ḡabiḡoina guruḡana asi bono vei.

³¹ Kara ourani tarimarima na ḡemu ai beḡene veia veigana, ḡia ḡeri ai maki mo veiga bono veia.

³² Bema ḡoura-vinirini tarimari tu ḡomi ḡeura-vinimini tarimari moḡo nai, ḡomi ḡemi namo tu kara? Rakava tarimari maki ḡeura-vinirini tarimari moḡo ḡeura-vinirini.

³³ O bema veiga namori ḡemi ai ḡeveini tarimari moḡo veiga namori ḡovei-vinirini, ḡomi ḡemi namo tu kara? Rakava tarimari maki mani veiga sebona ḡeveiani.

³⁴ O bema ma beḡe vini-ḡoimini tarimari moḡo ḡovinirini, ḡomi ḡemi namo tu kara? Rakava tarimari na maki tarima ḡevinirini, murinai tu mabarari ma beḡene dava-ḡoiri ḡetoni.

³⁵ Senaḡina ḡebaru-vinimini ema ḡevaḡa-rakavimini tarimari boḡono ura-viniri, veiga namori ḡeri ai boḡono vei, boḡono viniri, a tuḡu vaḡa-voi tuḡamaḡina asi boḡono vei. Benamo davami beḡene barego, ema Iaru-korokoro Barauna natunai boḡono iaḡo, korana tu ḡia na asi ḡevaḡa-namoani tarimari e vei-rakava tarimari evaḡa-namorini.

³⁶ Boḡono vevetuḡa-ḡwa, ḡomi Tamami evevetuḡa-ḡwani kavana.”

*Nuḡami ai tarimarima asi boḡono vaḡa-rakavari
Mataio 7:1-5*

³⁷ “Nuḡami ai tarimarima asi boḡono kira-kerereri. Moḡesi tu Barau na maki asi bekiraḡimini ḡomi tu kerere. Rakava voina tarimarima ḡeri ai asi boḡono kiraḡi-kaua, benamo Barau na rakava voina ḡemi ai asi bekiraḡi-kauani. Rakava boḡono tuḡamaḡi-fitoḡaia, be Barau na maki ḡemi rakava bene tuḡamaḡi-fitoḡari.

³⁸ Boḡono vini, be Barau na maki bene vinimi, ḡutumari bene dori-riḡori, bene kora-vegogori, bene vonu-fokafoka, bene ḡiḡiḡiḡi-seḡi, bene bubu-riḡoa ḡemi ai. Korana aiḡesi ḡomi ḡovinini, Barau na maki moḡesi bevinimini.”

³⁹ Iesu na barabore ta ma ekira-vararito, ekirato, “Mata-bubu tarimana na mata-bubu tarimana ta beḡori-kauani riba ba? Ba tauri ruarua koufai beḡea keto-ḡurani?

⁴⁰ Riba vetau merona na evaḡa-ribaiani tarimana asi bevanagiani, senaḡina ḡena sikuli bevaḡa-koriani vau, evaḡa-ribaiani tarimana ḡesi beḡe ilailani.

⁴¹ Kara dainai tarikakamu matanai libika oḡitaiani, senaḡi ḡoi matamu ai ḡau tubina tu asi otuḡamaḡiani.

⁴² Kamara dabarai ḡoi tarikakamu okiraiani, okirani, ‘Gata, au na roḡo matamu ai libika nakokia,’ senaḡina ḡoi tauḡemu matamu ai ḡau tubina tu asi oḡitaiani? Gofaḡofa tarimamu, guine tu ḡoi matamu ai ḡau tubina nokoki-vaḡia roḡo, benamo boboḡeboḡe-ḡinikauni vau, tarikakamu matanai libika bono kokia.”

*Ḡau ta ḡwaḡwana
Mataio 7:16-20; 12:33-35*

⁴³ “Ḡau namona beḡwani ḡwaḡwana tu dia rakava, ema ḡau rakavana beḡwani ḡwaḡwana tu dia namo.

⁴⁴ Gau mabarari tu ḡwari ai bita ribani. Figi ḡwari maki ḡau ma giniginiri ḡerina asi ḡebokoni, ema vine ḡwari (o grapes) ḡauḡa ḡininirini ḡeri ai asi ḡebokoni.

⁴⁵ Tarima namona na dagara namori nuḡanai evaḡa-vegogorini dagarari bevaḡa-raka-rosirini. Tarima rakavana na dagara asi namori nuganai evaḡa-vegogorini dagarari bevaḡa-raka-rosirini. Korana tarima tu nuḡana na kara eiaḡomani murunai ekiraḡirini.”

*Numa ḡeragani tarimari ruarua
Mataio 7:24-27*

⁴⁶ “Karase nai au ḡokiraḡiguni, ḡokirani, ‘Vereḡauka, Vereḡauka,’ nuḡanai au aguruḡani veigari tu asi ḡoveirini?

⁴⁷ Navaḡa-ribami, deikara au ḡegu ai eiaḡomani, au ḡegu guruḡa ema seḡaḡini ma veigari eveirini tu kamasi.

⁴⁸ Ḡia tu tarima ta ḡena numa eragaiato kavana. Guri ekwa-variḡo kwareḡaiato, ema fore iatanai evaḡa-ruḡaiato, benamo ḡabata baregona eragato, mo numa edoriato, senaḡi asi eketoto, korana fore iatanai eragaiato nai.

⁴⁹ A tarima ta au ḡegu guruḡa eseḡaḡirini, senaḡi veigari tu asi eveirini, ḡia tu numa eragaiato nai, tano moirana iatanai moḡo evaḡa-ruḡaiato, ḡabata na mo numa edoriato nai, eketo-tarito, benamo eḡwa-rovorovoato.”

7

Roma vetari verena ġena vetuġunaġi merona

¹ Iesu na moġeri guruġa mabarari tarimarima goirari ai ekiraġi-ġosirito vau, Kaperanaua vanuġana*i* eraka-toġato.

² Monai Roma vetari verena ta etanuto-ġoi. Ġena vetuġunaġi merona, euravini-baregoato-ġoi merona, ekeve-rakavato, dori emaseto-ġoi.

³ Vetari verena na Iesu varina eseġaġiato, benamo Iuda tarima baregori kota etuġu-iaġorito, Iesu beġene noġia, bene iaġoma, ġena vetuġunaġi merona benema vaġa-namoa.

⁴ Benamo Iesu ġenai ġeiaġoto, ma nuġari mabarari ġesi ġenoġiato, ġekirato, "Mai vetari verena tu tarima namona naima bono vaġa-kavaia.

⁵ Korana ġia na ġita besera eura-vinirini, ema ġai ġema rubu maki ġia na eragaiato."

⁶ Iesu ġia ġesi ġeiaġoto. Numa ġeraka-kavinuġiato-ġoi nai, vetari verena na ġatana kota etuġu-iaġorito Iesu ġoirana ġana, benamo vetari verena ġena guruġa Iesu ġekira-varaiato, ġekirato, "Vereġauka, asi novekwaraġi, au tu asi ilaila, ġoi ġegu numai boraġekauni.

⁷ Au maki asi ilaila, ġoi ġemu ai baiaġosini. Senaġi ġoi noguruġa moġo, benamo au ġegu vetuġunaġi merona benamoni.

⁸ Au maki tarima kota ġeri veġitaġau gabureri ai ema vetari tarimari o soldia tu au gaburegu ai. Au na ta bakiraiani, 'Noraka!' benamo berakani, ma ta bakiraiani, 'Noiaġoma!' benamo beiaġomani. Ema au ġegu vetuġunaġi merona bakiraiani, 'Maiġa noveia!' benamo beveiani."

⁹ Iesu na mai guruġa eseġaġiato nai, eġaba-rakavato, eruġa-kureto, ġia murinai ġerakato tarimari ġutuma evaġa-guruġarito, ekirato, "Au na ġomi akiramini, veġabidadama maiġesi kavana Isaraela nuġana*i* asi adoġariato."

¹⁰ Benamo vetari verena na etuġurito tarimari ma ġeġenoġoito ġia ġena numa ġana. Keve merona ġedoġariato, ġena keve varau ekorito.

Iesu na vabu ta natuna mase na evaġa-maġuri-ġenoġoiato

¹¹ Moġa murinai Iesu tu vanuġa ta ġana eiaġoto arana Nain. Ġena mero ema tarimarima ġutuma maki ġia ġesi ġeiaġoto.

¹² Vanuġa nuġana*i* roġosi ġene raka-toġa nuġana*i*, mase ta vanuġa nuġana na ġeġwarosiatto-ġoi. Vabu ta natuna merona ġora ġereġa emaseto. Vanuġa tarimari ġutuma na vabu ġekavaiato.

¹³ Iesu na mo vabu eġitaiato, benamo evetuġaiato, ekiraiato, ekirato, "Asi notaġi."

¹⁴ Benamo Iesu eraka-kavi-iaġoto, mase mauġana eġabi-karaiato. Mauġa ġeġwaiato tarimari ġeruġa-tarito. Benamo Iesu ekirato, "Mero futua, akiramuni, novariġisi!"

¹⁵ Benamo etanu-vaisto, eguruġato. Moġa murinai Iesu na ġia sinana ma evini-ġenoġoiato.

¹⁶ Mabarari gari na evaġa-vonurito. Barau ġevaġa-raġeato, ġekirato, "Peroveta tarimana barana ta ġita fakarai bema fofori!" ema, "Barau na ġena bese tarimari benema vaġa-kavari ġana beiaġoma!"

¹⁷ Benamo mai veġa varina Iudea mabarana*i* ema Iudea sevina vanuġari mabarari ai ġefiu-rovorovoato.

*Iesu ma Ioane Babatiso**Mataio 11:2-19*

¹⁸ Ioane ġena mero na mai dagara mabarari ġeġorato dagarari ġekira-varaiato. Benamo Ioane na ġena mero ruarua ekearito,

¹⁹ etuġurito Vereġauka ġenai, ġene danaġia, "Ioane na ekiraġiato, beiaġomani tarimana tu ġoi, ba tarima boruna ta baġana vaga-nogaia?"

²⁰ Tauri ruarua Iesu ġenai ġeraġasito, benamo ġekirato, "Ioane Babatiso na betuġuma, bekira, 'Ġia na ekiraġiato beiaġomani tarimana tu ġoi, ba tarima boruna ta baġana vaga-nogaia?'"

²¹ Mo aoa ai Iesu na tarimarima ġutuma evaġa-namorito, keve tarimari, midigu ġeġanito-ġoi tarimari, iauka rakavari na ġeboroġirito tarimari. Mata-bubu tarimari ġutuma maki matari evaġa-iaġarito.

²² Benamo Iesu na tauri ruarua evaġa-veserito, ekirato, "Goġenoġoi, ġomi na boġo ġitari e boġo seġaġiri veġari Ioane boġono kira-varaia: Mata-bubu tarimari ġeboġeboġeni, kwaku rakava tarimari ġerakani, lepera tarimari ġenamoni, seġa-bubu tarimari ġeseġaġini, mase tarimari ġevarigisi-ġenoġoini, ema asi ġeri-ġari tarimari ġeri ai Vari Namona eġobata-vinirini.

²³ Ġena veġabidadama au ġegu ai asi beraga-kwaneani tarimana tu eiakuni!"

²⁴ Ioane ġena vetuġunaġi tarimari ġerakato vau, Iesu na ġevegogoto tarimari evaġa-guruġarito, Ioane varina ġeri ekiraġiato, ekirato, “Kara boġono ġitaia ġana tano fakana ġana ġoiaġoto? Gobu iavara na ekwari-ġareva ġarevaiani ġitaġitana ġoiaġoto?”

²⁵ Kara boġono ġitaia ġana ġoiaġoto? Dabuġa namona eveiani tarimana ġitaġitana ġoiaġoto? Asiġina, dabuġa namori ġeveirini tarimari ema ġaniġani namori ġeġanirini tarimari tu vere tarimari ġeri numai ġetanuni!

²⁶ Be, kara boġono ġitaia ġana ġoiaġoto? Peroveta tarimana dainai? Aba! Akiramini, ġoġitaiao tarimana tu peroveta tarimari mabarari evanaġirini.

²⁷ Ioane varina Buka Veaġai maiġesi etoreato, Barau ekirato,

‘Au na ġegu vetuġunaġi tarimana tu batuġu-guineani, ġemu dabara ġoiramu ai vaġa-maġatana.’ ”

²⁸ Iesu ma ekirato, “Akiramini, mai tanobarai beġe maġuri tarimari mabarari fakari ai ta na Ioane asi bevanaġiani. Senaġi Barau ġena Basileia nuġanai gabi tarimana na Ioane tu evanaġiani.”

²⁹ Tarimarima mabarari ema takesi gogo tarimari maki mai guruġa ġeseġaġiato nai, ġia na Barau ġena dabara ġevaġa-moġoniato, Ioane ġena babatiso ġeġabiato.

³⁰ Senaġi Farisea tarimari e taravatu ġevevaġa-riba iaġiato-ġoi tarimari na Barau ġena vevaġa-maġuri dabarana ġia ġeri ai ġetuġamaġi-fitoġaiao. Ioane ġena babatiso ġia ġeri ai asi ġeġabi-raġeato.

³¹ “Toma ġuru tarimari tu deikarari ġesi bana vaġa-ilailari? ġia tu kamasi?”

³² ġia tu noġa mero keiri kavana, vanuġa ġatamanai ġetanu-taġoni, ġeġereni, tavi ta merori na tavi tai ġekea-vinirini, ġekirani,

‘ġai tu veġaraġo vererenai ġita ġalauto-ġoi ġomi ġemi, senaġi ġomi tu asi ġobarato-ġoi! ġai tu mase mariri ġaġabito-ġoi, senaġi ġomi tu asi ġotaġito-ġoi!’

³³ Korana tu Ioane Babatiso eiagomato, eġani-veaġato ema vine nanuna asi eniuato. Benamo ġomi ġokirani, ‘ġia tu iauka rakavana na eboroġiato,’ ġotoni.

³⁴ Tarimarima Natuna eiagomato, ġia tu ġaniġani ta asi ruġaiani. Benamo ġomi ġokirani, ‘ġia tu boġeka tarimana ema vine nanuna eniu-ġutumani tarimana, takesi gogo tarimari e vei-rakava tarimari ġatari,’ ġotoni.

³⁵ Senaġi Barau ġena iaunega ġeġabi-raġeani tarimari na Barau ġena iaunega ġevaġa-moġoniani.”

Iesu tu Simona, Farisea tarimana, ġena numai

³⁶ Farisea tarimana ta na Iesu enoġiato, beġene ġaniġani-vegogo etato. Benamo Iesu eiagoto ġena numa ġana, ġaniġani gabunai etanu-tarito.

³⁷ Mo vanuġai vavine ta etanuto-ġoi, ġia tu mata-boraġa vavinena. ġia eseġaġito, Iesu tu Farisea tarimana ġena numai eġaniġanito-ġoi, benamo fore kavabuna namona, alabasta forena na ġeveiato kavabuna, nuġanai tu muramura ma bonana namona eġabi-kauato,

³⁸ eiagoto Iesu murinai eritoġo-tarito, kwakuna koranai etagi-rakavato, benamo matana nanuna na Iesu kwakuna evaġa-nufarito. Benamo ġwina na ma edau-kaukaurito, kwakuna everauato, muramura ma bonana namona kwakunai ebubuato.

³⁹ Farisea tarimana na, mo veġa eġitaiao nai, ġia nuġanai maiġesi etuġamaġito, “Mai tau bema moġoni peroveta tarimana nai tu, ġia bere riba, ġia eġabi-karaiani vavinena tu deikara. ġia bere riba, mo vavine tu mata-boraġa vavinena!”

⁴⁰ Benamo Iesu na ġia evaġa-guruġaiao, ekirato, “Simona, au tu ma ġegu guruġa ġoi ġemu ai.” Simona ekirato, “Vevaġa-riba taumu, noguruġa, be naseġaġi.”

⁴¹ Iesu ekirato, “Tarima ruarua na moni evinito-ġoi tarimana ġenai moni ġeġabi-toreto. Tarima ta na silva moniri sinau imaima (500) eġabi-torerito, ma ta na silva moniri gabana imaima (50) eġabi-torerito.

⁴² Senaġi mai tarima ruarua na ġeri ġabitore vaġa-ġenoġoina tu gwaġiġi rakava nai, moni evinito-ġoi tarimana na ġeri ġabitore etuġamaġi-fitoġaiao moġo. Dei na mo tarima euravini-baregoato?”

⁴³ Simona evaġa-veseto, ekirato, “Au atuġamaġini tu, eġabitore-baregotto tarimana.” Iesu ekirato, “Oi, ġemu vaġa-vese tu maoro.”

⁴⁴ Moġa murinai Iesu etanu-kureto, vavine eġoiraiato vau, Simona ekiraiato, ekirato, “Mai vavine oġitaiani? Au ġoi ġemu numai bama raġekau nai, kwakugu ġurigi-ġurigiina nanuna ta asi boġwa-iaġomaia, a mai vavine na tu matana gorana na au kwakugu beġurigiia vau, ġwina na bedau-kaukauri.

⁴⁵ ġoi na ġita ġera veġabiraġe veraunai au asi boġabi-raġeġu, a mai vavine oġitaiani, roġosi bene doko au kwakugu rogo everauani.

⁴⁶ Ğoi na debagu ai diġa ta asi bobubua, a ġia tu au kwakugu muramura ma bonana namona na bevaġa-fari vekoraġiri.

⁴⁷ Moġa lorinai au na ġoi akiramuni, ġena rakava ġutuma, senaġi Barau na varau betuġamaġi-fitoġari. Moġa lorinai ġena veuravini tu barego. A ġena rakava koturi moġo etuġamaġi-fitoġarito tarimana tu ġena veuravini maki asi barego.”

⁴⁸ Benamo Iesu na mai vavine ekiraiato, ekirato, “Ġemu rakava varau bama tuġamaġi-fitoġari.”

⁴⁹ Ġia ġesi ġeġaniġani-vegogoto tarimari ġevedanaġi-vedanaġito, ġekirato, “Mai tu kamara tarima, be ġia na tarima ġeri rakava maki etuġamaġi-fitoġarini etoni?”

⁵⁰ Senaġi Iesu na vavine ma evaġa-guruġaiato, ekirato, “Ġemu veġabidadama na varau bevaġa-maġurimu. Maivau noiaġo ma nuġa namomu ġesi.”

8

Vavine kota Iesu ġesi ġeiaġoto

¹ Moġa murinai Iesu na vanuġa barari e vanuġa keiri eiaġo-vinirito-ġoi, Barau ġena Basileia Varina Namona eġobata-iaġiato-ġoi. Ġena mero gabanana ruarua (12) ġia ġekavaiaato.

² Vavine kota maki ġia ġesi ġeiaġoto. Iesu na iauka rakavari mo vavine ġerina elai-vaġirito ema ġeri keve evaġa-namorito. Ta tu Maria, arana ġevatoato Magadala vanuġana vavinena. Mai tu iauka rakavari imaina ruarua (7) ġia ġenana elai-vaġirito vavinena.

³ Ma ta tu Ioana, Kusa ġaraġona. Kusa tu Heroda ġena farefare eġita-ġaurito-ġoi tarimana ta. Ta tu Susana ema vavine vovoka maki. Moġeri vavine na Iesu ma ġena mero ġeri farefare na ġevaġa-kavarito.

Barabore - Iaraġa tarimana widi ġueri evaroto

Mataio 13:1-9; Mareko 4:1-9

⁴ Tarimarima ġutuma bara ġevegogoto, vanuġa mabarari na Iesu ġenai ġeiaġoto. Benamo ġia na ġeri barabore ta ekiraġiato, ekirato,

⁵ “Iaraġa tarimana vamoka ġana eiaġoto, ġena widi ġueri bene fiu-rovorovori ġana. Efiurito-ġoi nai, kota dabarai ġeketoto. Benamo tarimarima na ġefana-veġonurito ema guba manuri na ġeġanirito.

⁶ Kotari tu fore tanonai ġeketoto. Ġetubuto, senaġi asikauna ġemaraito, korana tano tu asi nanuna nai.

⁷ Kotari tu ġauġa ġiniġiniri nuġari ai ġeketoto. Benamo ġauġa ġiniġiniri ġesi ġetubusebonato, senaġi varovaro dagarari ġetuturarito nai ġemaseto.

⁸ Kotari tu tano namonai ġeketoto. Benamo ġetubu-ġinikauto, ġeġwato, tata ġwana sinau ta (100).” Benamo Iesu garona evaġa-baregoato, ekirato, “Ma seġana tarimana bene seġaġi.”

Kara dainai Iesu na barabore ekiraġirito

Mataio 13:10-17; Mareko 4:10-12

⁹ Ġena mero na Iesu ġedanaġiato mo barabore anina tu kara.

¹⁰ Iesu evaġa-veseto, ekirato, “Barau ġena Basileia guruġari vekuretoġari ġemi ai evaġa-foforirini, senaġi mabarari tu barabore ai avaġa-guruġarini, beġene ġita, senaġi anina asi beġene ribaia, beġene seġaġi, senaġi asi beġene tuġamaġi-fakaia.”

Widi ġueri baraborena anina

Mataio 13:18-23; Mareko 4:13-20

¹¹ Mai barabore anina tu maġa: Widi ġueri tu Barau ġena guruġa.

¹² Dabarai ġeketoto widi ġueri tu tarimarima na Barau ġena guruġa ġeseġaġiani. Senaġi Satani eiaġomani, Barau ġena guruġa ġia nuġari na eġabi-vaġirini, Vari Namona beġe vaġa-moġoniani e beġe maġurini garina.

¹³ Tano ma forenai widi ġueri ġeketoto tu tarimarima na Barau ġena guruġa ġeseġaġiani e ma iakuri ġesi ġeġabi-raġeani. Senaġi ġia tu noġa tarima asi lamuri kavana. Nega-kotuna moġo Barau ġena guruġa ġekorana-iaġiani, senaġi veribaġani beraġasini nai, beġe ketoni.

¹⁴ Ġauġa ġiniġiniri nuġari ai ġeketoto widi ġueri tu tarimarima na Barau ġena guruġa ġeseġaġiani, senaġi ġetuġamaġi-ġutumani, tanobara farefareri ġetuġamaġi-gogo gogorini ema tanobara ġena maġuri iakuri na Vari Namona elau-tariani. Moġa lorinai ġwaġwa namori asi ġeġorani.

¹⁵ Senaġi tano namonai ġeketoto widi ġueri tu tarimarima na Barau ġena guruġa ġeseġaġiani, ma nuġari namori e ma manauri ġesi ġeġabi-raġeani, ġeġabi-tariani mo, ġwaġwa namori ġeġorani.

*Lamefa toretorena gabuna**Mareko 4:21-25*

¹⁶ “Tarima ta lamefa begabuani nai tu, dia ġuro na beġoġoi-tariani o fata gaburenai betoreani. Asiġina, ġia tu lamefa toretorena fatanai betore-kauani. Benamo tarima beġe raġekauni nai, mabarari na mama beġene ġitaia ġana.

¹⁷ Vekuretoġa dagarari mabarari beġe foforini, veġuni guruġari beġe ribani e beġe kiraġi-foforirini.

¹⁸ Moġa lorinai ġoseġaġirini guruġari loriri boġono toreri. Korana ma ġena seġaġi tarimana Barau na riba e tuġamaġi-faka beviniani, asi ġena seġaġi tarimana, ġia etuġamaġini ma ġena tuġamaġi-faka, senaġi ġena tuġamaġi-faka aiġesi misina maki beġabi-vaġiani.”

*Iesu sinana ema tarina merori**Mataio 12:46-50; Mareko 3:31-35*

¹⁹ Iesu sinana ema tarina merori ġia ġenai ġeiaġoto, senaġi tarimarima ġutuma nai, asi ġeri dabara Iesu ġenai beġe raka-kavini.

²⁰ Tarima ta na Iesu ekira-varaiato, ekirato, “Ġoi sinamu ema tarimu tu murikai ġeruġataġoni, ġoi ġevetaumuni.”

²¹ Benamo Iesu na mabarari ekirarito, “Barau ġena guruġa ġeseġaġirini e ġeiveirini tarimari tu au sinagu ema au tarigu.”

*Iesu na iavara e geta o ureure ekira-ġoirito**Mataio 8:23-27; Mareko 4:35-41*

²² Ġaro ta Iesu ma ġena mero ġesi ġasi ai ġeraġekauto, benamo Iesu na evaġa-guruġarito, ekirato, “Siveġasi-vanaġi, kou mo rekena ġana.” Benamo ġeiaġoto.

²³ Ġeiaġoto-ġoi nuġanai, Iesu eġena-maseto. Benamo iavara asikei kou ai eraġasito, benamo ureure ġasi nuġanai ġevebubu-ġurato nai, ġasi dori eburuto.

²⁴ Benamo ġena mero Iesu ġenai ġeiaġoto, ġevaġoato, ġekirato, “Vevaġa-riba taumu o, vevaġa-riba taumu o, ġita tu mai taburuni!” Iesu evariġisito, iavara e ureure ekira-ġoirito, benamo ġedokoto, ġemeġomeġo-tarito.

²⁵ Iesu na ġena mero evaġa-guruġarito, ekirato, “Ġomi ġemi veġabidadama tu ainai?” Ġia ġegarito e ġeġaba-rakavato nai, tauġeri mo ġevedanaġi-vedanaġito, ġekirato, “Mai tarima tu dei? Ġia na iavara e ureure evaġa-guruġarito nai, garona ġeseġaġiani!”

*Iesu na iauka rakavari na ġeborogiato tarimana evaġa-namoato**Mataio 8:28-34; Mareko 5:1-20*

²⁶ Monana Iesu ma ġena mero ġeiaġoto, Gerasa (o Gadara) tarimari ġeri gabu ai ġeraġasito, Galilea tavi ta kefonai.

²⁷ Iesu ġasi na eraka-riġoto nuġanai, iauka rakavari na ġeborogiato tarimana ta eiaġomato Iesu ġenai. Ġia tu mo vanuġa tarimana. Kai-veġata asi dabuġana etanuto-ġoi, dia numai, senaġi gara gabuna fore kouġari ai.

²⁸ Ġia na Iesu eġitaiato nai, ekoġo-fouto, benamo Iesu kwakuna koranai eketo-tarito, ekirato, “Iesu o, ġoi Iaru-korokoro Barauna Natuna, kara au ġegu ai noveia otoni? Anoġimuni, asi bono vaġa-midigu midigugu!”

²⁹ Ġia moġesi ekirato, korana Iesu na iauka rakavana evaġa-guruġaiato, mo tarima ġenana neraka-vaġi. Nega ġutuma iauka rakavana na eġabiato-ġoi, kwakuna e ġimana seini na ġebarurito-ġoi, senaġi seini edabu-ġuturito-ġoi, benamo iauka rakavana na tano fakana ġana eġwa-iaġoato-ġoi.

³⁰ Iesu na edanaġiato, ekirato, “Ġoi aramu tu deikara?” Ġia na evaġa-veiseato, ekirato, “Au aragu tu ‘Ġutuma,’ ” korana iauka rakavari vovoka na ġeborogiato nai.

³¹ Benamo iauka rakavari na Iesu ġenogiato-ġoi, guri variġo kwareġana ġana asi bene tuġu-iaġori. (Mo tu iauka rakavari ġeri dibura gabuna).

³² Monai bai serina tu ġoro gabakanai ġedokadokato-ġoi. Moġa lorinai iauka rakavari na Iesu ġenogiato, bai nuġari ai ġeraka-toġa, ġetato. Benamo Iesu na ekirarito, “Be, ġoiāġo!”

³³ Benamo iauka rakavari mo tarima ġenana ġeraka-vaġito, bai ġeri ai ġeraka-toġato. Benamo moġeri bai ġeġwa-bubu-lausiato, lalaġa na ġekokosi-firiġoto, kou ai ġeveboramaseto.

³⁴ Bai ġitaġauri tarimari na kara eġorato dagarana ġeġitaiato, benamo ġeragato, mo vari ġea fiuato vanuġa baranai e vanuġa keiri ai.

³⁵ Tarima-rima ġeġoto-iaġoto, kara eġorato dagarana ġea ġitaia ġana. Iesu ġenai ġeraġasito nai, ġia na mo tarima, iauka rakavari vovoka ġia ġenana ġeraka-vaġito tarimana, ġedoġariato, Iesu kwakuna koranai etanu-taġoto-ġoi ma dabuġana e ġena tuġamaġi maki maoro. Benamo ġia mabarari ġegarito.

³⁶ Mo veiġa ġeġitaiato tarimari na iauka rakavari na ġeborogġiatio tarimana kamasi enamoto varina tarimarima ġekira-vararito.

³⁷ Benamo Gerasa tano tarimari mabarari na Iesu ġenogġiatio, neraga-kwaneri ġetato, korana ġegari-rakavato nai. Moġa lorinai Iesu ġasi ai eraġekauto, ma eġenogġoito.

³⁸ Iauka rakavari ġia ġenana ġeraka-vaġġito tarimana na enogġiatio, Iesu ġesi bene iaġo etato. Senaġi Iesu na etuġu-ġenogġoito, ekirato,

³⁹ “Noġenogġoi ġemu numa ġana. Barau na ġoi ġemu ai beveia veiġana tarimarima bono kira-varari.” Benamo ġia eiaġoto, ġena vanuġa tarimari mabarari Iesu ġena veiġa ġia ġenai ġeġorato eġobata-iaġirito.

Iesu na kekeni ta ema vavine ta evaġa-namorito

Mataio 9:18-26; Mareko 5:21-43

⁴⁰ Iesu kou mo reke na ma eġenogġoito nai, tarimarima ġutuma na ġeġabi-raġeato ma iakuri ġesi, korana mabarari na Iesu ġevaġa-nogaiatio-ġoi.

⁴¹ Benamo tau ta arana Iairo, rubu ġitaġauna tarimana, Iesu ġenai eiaġoto, kwakuna koranai evetui-tarito, enogġiatio, ġena numa ġana ġeiaġo etato,

⁴² korana ġia natuna kekenina, ġora ġereġa, dori emaseto-ġoi nai. Ġena laġani tu gabanana ruarua (12).

Iesu eiaġoto-ġoi nuġanai, tarimarima ġutuma na ġeraka-vebibi vebibiatio-ġoi.

⁴³ Moġa nuġanai vavine ta, ġena keve tu rara kevena; laġani gabanana ruarua (12) ekeve-iaġiatio. Ġia na ġena farefare e moni mabarari evaġa-koririto doketa ġeri ai ġena keve beġene vaġa-namoa ġana. Senaġi ta na asi evaġa-namooto.

⁴⁴ Tarimarima ġutuma muriri ai vau evebibi-toġato, ma tavi ta na ea raka-rosito mo, Iesu sevinaġi ea raġasito. Iesu ġena dabuġa dudunai eveġabikauto. Benamo vaġa-sebo ġena rara kevena ekorito.

⁴⁵ Iesu evedanaġito, ekirato, “Dei na au beġabi-karagu?” Mabarari ġevekira-ġuniġauto, ġekirato, “Au tu asiġi.” Benamo Petero ekirato, “Vevaġa-riba taumu, tarimarima oġitarini, ġekou-ġeġeraġimuni ema ġeraka-vebebesi vebebesini.”

⁴⁶ Senaġi Iesu ekirato, “Ta na au beġabi-karagu, korana au ribagu, seġuka au ġeguna varau beraka-vaġi.”

⁴⁷ Mai vavine varau eribato, ġia asi ġena vekuretoġa dabarana, benamo ma ġoġo-ġoġona ġesi eiaġoto, Iesu kwakuna koranai evetui-tarito, Iesu kara dainai eġabi-karaiato ema ġena keve vaġa-sebo ekorito varina ekiraġi-foforirito tarimarima ġoirari ai.

⁴⁸ Benamo Iesu na ekiraiato, ekirato, “Natugu, ġemu veġabidadama na bevaġa-namomu. Be, ma nuġa namomu ġesi noiaġo.”

⁴⁹ Iesu roġo mo eguruġato-ġoi nuġanai, tarima ta rubu ġitaġauna tauna Iairo ġena numa na eiaġomatato, ekirato, “Natumu varau bemase. Vevaġa-riba tauna asi novaġa-vekwaraġia.”

⁵⁰ Iesu na mo guruġa eseġaġiatio nai, Iairo ekiraiato, ekirato, “Asi bono gari, bono veġabidadama moġo, benamo ġia tu bemaġurini.”

⁵¹ Iairo ġena numai eraġasito, benamo Iesu na tarimarima ekirarito, numai asi beġene raġekau, Petero, e Iakobo (o Iames), e Ioane, ema kekeni tamana ma sinana moġo.

⁵² Mabarari tu ġetaġito-ġoi ema ġetaġi-guruġa guruġato-ġoi nuġanai, Iesu ekirato, “Asi ġotaġi, kekeni tu asi bemase, ġia tu egenani moġo.”

⁵³ Tarimarima na ġerikiriki-iaġiatio, korana ġia ribari, kekeni tu emaseto.

⁵⁴ Senaġi Iesu na kekeni ġimanai eġabito, evaġa-guruġaiatio, ekeato, “Natugu o, no-variġisi!”

⁵⁵ Benamo iaukana eġenogġoito, ma emaġurito, vaġa-sebo evariġisito. Iesu na ekirarito, kekeni beġene ġubua.

⁵⁶ Ġia tamana sinana ġeġaba-rakavato, senaġi Iesu na evaġa-naġirito, mai veiġa varina tarima ta asi beġene kira-varaia.

9

Iesu na ġena mero gabanana ruarua (12) etuġurito

¹ Iesu na ġena mero gabanana ruarua (12) ekea-vegogorito, seġuka evinirito, iauka rakavari mabarari beġene lai-vaġiri, ema keve tarimari beġene vaġa-namori ġana.

² Benamo etuġurito, Barau ġena Basileia varina beġene ġobata-iaġia, ema keve tarimari beġene vaġa-namori.

³ Evaġa-guruġarito, ekirato, “Ġemi iaġoiġo ai kara ta asi boġono ġabi-kaua, toġoi, dura, ġaniġani dagarari, moni, ema sedi ruarua maki asi boġono ġabi.

⁴ Beġe ġabi-raġemini numanai boġono tanu, bene iaġo mo, vanuġa boġono raga-kwaneana.

⁵ Bema vanuḡa tai asi beḡe ḡabi-raḡemini nai, mo vanuḡa boḡono raga-kwanea, kwakumi kauri boḡono kwari-ketoketori, ḡia ḡeri kira-sirivaḡi vaḡa-moḡoniri ḡana.”

⁶ Iesu ḡena mero ḡerakato, vanuḡa tata ḡana ḡeiaḡoto, Vari Namona ḡeḡobata-iaḡiato-ḡoi ema keve tarimari ḡevaḡa-namorito-ḡoi gabu mabarari ai.

Heroda ḡena daradara

Mataio 14:1-2; Mareko 6:14-16

⁷ Heroda, Galilea tanona verena, Iesu varina eseḡaḡiato, benamo edaradara-rakavato, korana tarima kota ḡekirato, Ioane Babatiso tu mase na ma evariḡisi-ḡenoḡoito.

⁸ Ma kota ḡekirato, Elia efororito. Ma kota ḡekirato, peroveta tarimana guinena ta evariḡisi-ḡenoḡoito, ḡetato.

⁹ Senaḡi Heroda ekirato, “Ioane debana tu au na abasi-ḡutuato. Be, mai varina aseḡaḡiani tarimana tu dei?” Heroda eurato Iesu bene ḡitaia.

Iesu na tarimarima daḡara imaima (5,000) eḡuburito

Mataio 14:13-21; Mareko 6:30-44; Ioane 6:1-13

¹⁰ Iesu ḡena apostolo ma ḡeḡenoḡoito, karakara ḡeveirito veḡari variri Iesu ḡekiravariato. Benamo Iesu na eḡori-ḡerevaḡirito, vanuḡa ta arana Betesaida ḡana eḡori-iaḡorito.

¹¹ Senaḡi tarimarima na ḡeseḡaḡirito nai, Iesu murina na ḡerakato. Benamo Iesu na eḡabi-raḡerito, Barau ḡena Basileia varina eḡobata-vinirito ema keve tarimari evaḡa-namorito.

¹² Ġaro evariḡoto-ḡoi nuḡanai, ḡena mero gabanana ruarua (12) Iesu ḡenai ḡeiaḡoto, ḡekirato, “Mai tarimarima notuḡuri, be kavinaḡi vanuḡari ai ema vamoka vei tarimari ḡeri tanu gaburi ai, ḡari ḡaniḡani e gena-gaburi ḡea vetau, korana mai tu tano fakana nai.”

¹³ Senaḡi Iesu na evaḡa-guruḡarito, ekirato, “Ġomi na ḡaniḡani ḡoviniri.” Ġia na ḡevaḡa-veveato, ḡekirato, “Ġai ḡemai beredi tu imaima (5) ema maḡani-kone ruarua (2) moḡo. Ġoi ourani ḡai baḡana iaḡo, ḡaniḡani baḡana voiri mai tarimarima ḡutuma ḡari?”

¹⁴ Korana tau mabarari tu 5,000 kavana.

Iesu na ḡena mero ekirarito, ekirato, “Tarimarima ḡovareri doḡoro ta gabana imaima (50), doḡoro ta gabana imaima (50), benamo ḡene tanutanu-tari.”

¹⁵ Iesu ekirato lorinai ḡeveiato, tarimarima mabarari ḡevaḡa-tanutanu-taririto.

¹⁶ Moḡa murinai Iesu na beredi imaima e maḡani-kone ruarua eḡabirito, gubai egaga-raḡeto, Barau evaḡa-namoato vau, ebuki-ḡutuḡurito ema ekini-misimisirito, benamo ḡena mero evinirito beḡene vareri.

¹⁷ Tarimarima na ḡeḡanirito nai, mabarari ḡeḡani-maseto. Gabivau Iesu ḡena mero na ḡaniḡani kwari ḡevaḡa-vegogorito, boseḡa gabanana ruarua (12) ḡevaḡa-vonurito.

Petero na Iesu tu Kerisona ekiraḡito

Mataio 16:13-19; Mareko 8:27-29

¹⁸ Ġaro ta Iesu ḡereḡana eḡuririto, ḡena mero maki ḡia ḡesi. Benamo Iesu na edanaḡirito, ekirato, “Tarimarima tu kara ḡetoni au tu dei?”

¹⁹ Ġia ḡevaḡa-veseto, ḡekirato, “Kota ḡekirani ḡoi tu Ioane Babatiso, ma kota tu Elia, ma kota tu peroveta tarimana guinena ta evariḡisi-ḡenoḡoito.”

²⁰ Iesu na ekirarito, ekirato, “Senaḡi ḡomi tu kara ḡotoni au tu dei?” Petero na evaḡa-veveato, ekirato, “Ġoi tu Barau gena Keriso, ḡia na ekiraḡi-toreato vevaḡa-maḡuri tauna.”

Iesu ḡena mase ema variḡisi-ḡenoḡoi ekiraḡirito

Mataio 16:20-28; Mareko 8:30-9:1

²¹ Iesu na elaunaḡirito, ḡia varina tarima ta asi beḡene kira-varaia.

²² Ġia ma ekirato, “Tarimarima Natuna midigu vovoka roḡo beḡanini. Iuda vereri, e Rubu Veḡa vereri baregori, e taravatu ḡevaḡa-riba iaḡiani tarimari na beḡe ruḡaiani; ema beḡe vaḡi-maseani maki, senaḡina ḡaro vaḡa-toitoinai vau mase na ma bevariḡisi-ḡenoḡoini.”

Maḡuri guruḡari o Iesu murinai raka

Mataio 10:33; 10:39; Ioane 12:25

²³ Iesu na ḡia mabarari evaḡa-guruḡarito, ekirato, “Bema tarima ta eurani au murigu ai bene raka etoni tarimana, tauḡena bene vekira-fitoḡa, ḡena satauro bene ḡwaia ḡaro mabarari ai, au murigu ai bene raka.

²⁴ Korana deikara ḡena maḡuri moḡo lorina etoreani tarimana, ḡena maḡuri befitoḡaiani. A deikara au daigu ai ḡena maḡuri befitoḡaiani tarimana, ḡena maḡuri asi bevei-ekwarekwaiani.

²⁵ Bema tarima ta na tanobara mabarana uranai ġena maġuri befitoġaiani, a ġia tauġena ġena maġuri bevaġa-rakavaiani, ġena namo tu kara ġia ġenai?

²⁶ Bema tarima ta na au ema ġegu guruġa maiakari na bemaikaiani nai tu, Tarimarima Natuna na maki ġia bemaika-viniani ġena iaġomai, ma mamana marevana e seġuka baregona ġesi, Tamana ma aneru veaġari ġesi beġe iaġomani ġaronai.

²⁷ Moġoni akiramini, mainai ġeruġa-taġoni tarimari kota asi roġo beġe maseni, Barau ġena Basileia beġe ġitaiani.”

Iesu vetoġana eirauto

Mataio 17:1-13; Mareko 9:2-13

²⁸ Mai guruġa ekiraġi-ġosiato murinai, ġaro imaima toitoi (8) kavana ġevanaġito vau, Iesu na Petero, e Ioane, ema Iakobo (o Iames) eġabirito, ġoro ta ġana ġevaraġeto bene ġurिġuri ġana.

²⁹ Eġauġauto-ġoi nuġanai, ġia ġoirana vetoġana eirauto, ema ġena dabuġa ekuro-ġarogaro.

³⁰ Benamo tarima ruarua ġefoforito, Mose ma Elia, Iesu ġesi ġeguruġa guruġato-ġoi.

³¹ Tauri ruarua ma marevari e mamari ġesi ġefoforito, Iesu ġesi ġeguruġato, Ierusalem-mai bemaseni ġetato, Barau ġena ura ilailanai.

³² Petero ma karona ġegenamaseto, senaġi ma ġetataġato nai, Iesu ma marevana e mamana ġesi ġeġitaiao, ema ġia ġesi ġeruġa-taġoto tarimari maki ġeġita-rito.

³³ Tauri ruarua Iesu ġeraga-kwanea ġana nuġanai, Petero na Iesu ekiraiao, ekirato, “Vevaġa-riba taumu, namo vedaurea ġita tu maiġera, be mainai fouta toitoi ġaragari. Ta ġoi ġemu, ta Mose ġena, ta Elia ġena.” ġia asi ribana kara ekiraġiato.

³⁴ ġia roġo eguruġato-ġoi nai, magube na ema iauka-taririto. Magube na eġabi-ġaurito nai, ġia ġegarito.

³⁵ ġaro ta magube nuġana na ekea-rosito, ekirato, “Mai tu au Natugu, aġabi-hidiato tarimana, ġia boġono seġaġi-vinia!”

³⁶ Mo ġaro ekorito nai, Iesu ġereġana ġeġitaiao. Mai veġa ġeġitarito dagarari, tarima ta asi ġekira-varaiao mo negai.

Iesu na iauka rakavana na eborogiao merona evaġa-namoato

Mataio 17:14-21; Mareko 9:14-29

³⁷ ġaro ta ekorito murinai, ġia tu ġoro na ġeraka-varigoto-ġoi nuġanai, tarimarima ġutuma lelevaġi ġesi ġeraka-veġoitaġoto.

³⁸ Benamo tau ta ġutuma nuġari na ekea-fouto, ekirato, “Vevaġa-riba taumu o, anoġimuni, au natugu merona noma ġitaia. Mai tu au natugu sebona, ġora ġereġa.

³⁹ Nega tari ai ġia tu iauka rakavana na eġabiani, benamo ekoġo-founi; tauġanina maki evaġa-ġoġo-ġoġoani, benamo bokana na kaburoburo ġeraka-rosini. Maiġesina evaġi-mase vanaġi-vanaġiani.

⁴⁰ ġoi ġemu mero banogiri, ġelai-vaġia basi, senaġi ġia asi beġe ilaila.”

⁴¹ Iesu evaġa-veseto, ekirato, “Asi veġabidadama ema kira-sirivaġi ġuruna o! ġaro vira au tu sevimi ai bana tanu? ġaro vira bana vevaġa-gwaġiġi-vinimi?” Benamo Iesu na mo tau ekiraiao, ekirato, “Natumu noġori-iaġomaia.”

⁴² Mero eiaġomato-ġoi nai, iauka rakavana na tano ekwaraġi-iaġiao, tauġanina evaġaġoġo-ġoġoato. Senaġi Iesu na iauka rakavana ekira-ġoiao, mero evaġa-namoato, benamo tamana ma evini-ġenoġoiao.

⁴³ Tarima mabarari ġeġaba-rakavato, korana Barau ġena seġuka ġeġitaiao nai.

Iesu ġena mase ma ekiraġi-ġenoġoiao

Mataio 17:22-23; Mareko 9:30-32

Tarimarima roġo Iesu ġena veġa ġeġaba-iaġiao-ġoi nai, Iesu na ġena mero evaġa-gurugarito, ekirato,

⁴⁴ “Au na guruġa ta ġemi nakiraġia, be ġoseġaġi ema asi boġono tuġa-rekwaia. Tarimarima Natuna tu beġe revaiani vau tarimarima ġimari ai beġe toeani.”

⁴⁵ Senaġi ġena mero na asi ġetuġamaġi-doġario, Iesu tu kara ekiraġiao. Mo guruġa anina tu ġia ġeri ai vekuretoġa, asi beġene ribaia ġana, ema Iesu maki asi ġedanaġiao, korana ġegarito nai.

Deikara tu barego vedaurea

Mataio 18:1-5; Mareko 9:33-37

⁴⁶ Iesu ġena mero fakari ai vevane eġorato, korana tu ġekirato, dei tu barego vedaurea ġia fakari ai.

⁴⁷ Iesu varau eribato kara ġetuġamaġiao, moġa lorinai mero keina ta eġabiao, ġia sevina evaġa-ruġa-tario vau,

⁴⁸ ekirarito, ekirato, “Dei na mai mero beḡabi-raḡeani au aragu ai, ḡia na au beḡabi-raḡeguni. Bema tarima ta na au beḡabi-raḡeguni, etuḡuguto Barauna maki beḡabi-raḡeani. Korana deikara ḡomi na ḡokira-fitoḡaiani tarimana ḡomi fakami ai, ḡia tu barego vedaurea.”

*Iesu aranaɪ nuḡa-farevaḡi veiḡa boruri eveirito tarimana
Mareko 9:38-40*

⁴⁹ Ioane na Iesu evaḡa-guruḡaiato, ekirato, “Vevaḡa-riba taumu, tarima ta ḡaḡitaiato, ḡoi aramu ai iauka rakavari elai-vaḡirito-ḡoi, senaḡi ḡai na ḡakira-ḡoiato, korana ḡia tu dia ḡita ḡesi taḡauveini nai.”

⁵⁰ Iesu na ekirarito, ekirato, “Asi boḡono kira-ḡoia, korana deikara na ḡomi asi evaḡa-rakavamini tarimana tu ḡomi evaḡa-kavamini.”

Samaria tarimari kotari na Iesu asi ḡeḡabi-raḡeato

⁵¹ Iesu guba ḡana bevarageḡi ḡarona ekavinageḡi-ḡoi nai, Ieruselema bene iaḡo-vinia, etato.

⁵² Benamo Iesu na vetuḡunaḡi tarimari etuḡu-guinerito, Samaria vanuḡana tai ḡeraḡasito, Iesu ḡena totoḡa gabuna ḡea vetauato.

⁵³ Senaḡi vanuḡa tarimari na Iesu asi ḡeḡabi-raḡeato, korana tu Ieruselema eiaḡo-viniato-ḡoi nai.

⁵⁴ Iesu ḡena mero Iakobo (o Iames) e Ioane mo veiḡa ḡeḡitaiato, benamo ḡekirato, “Vereḡauka, ḡoi ourani karava guba na baḡana kiraḡia, bene mariḡo, bene vaḡa-rakavari?”

⁵⁵ Iesu eruḡa-kureto, tauri ruarua ekira-ḡoirito.

⁵⁶ Benamo ḡia ma ḡerakato, vanuḡa ta ḡana ḡeiaḡoto.

Iesu murinaɪ beḡene raka ḡetato tarimari

Matao 8:19-22

⁵⁷ ḡia dabara na ḡeiaḡoto-ḡoi nai, tarima ta na Iesu evaḡa-guruḡaiato, ekirato, “Ḡemu iaḡoiaḡo gaburi mabarari ai bana kavamu.”

⁵⁸ Iesu na ekiraiato, ekirato, “Boḡa kwaivari ma ḡeri kouḡa, ema manu ma ḡeri nuḡi, senaḡi Tarimarima Natuna tu asi ḡena gena-gabuna.”

⁵⁹ Iesu na tarima ta ma evaḡa-guruḡaiato, ekirato, “Murigu ai noma raka.” Senaḡi mo tarima evaḡa-veseto, ekirato, “Vereḡauka, asi roḡo, nageḡoḡoi, be tamagu roḡo naguria.”

⁶⁰ Iesu na evaḡa-veḡeato, ekirato, “Mani tu noiaḡuiri, mase tarimari (o Barau asi ḡekorana-iaḡiani tarimari) na ḡeri mase taḡeri na beḡene guriri. Senaḡi ḡoi tu noiago, Barau ḡena Basileia varina noa vari-fiua.”

⁶¹ Tarima ta na ma ekiraiato, ekirato, “Vereḡauka, murimu ai naraka, senaḡi naiago roḡo, ḡegu numa tarimari ḡesi ḡaveḡabi-tuḡu.”

⁶² Iesu na evaḡa-veḡeato, ekirato, “Tarima ta efokafokani nai, murina ḡana ma ebogeḡeḡoḡoini, ḡia tu asi ilaila Barau ḡena Basileia beḡabiani.”

10

Iesu na tarima gabana imaima ema gabana ruarua ma ruarua (72) etuḡurito

¹ Moḡa murinaɪ Vereḡauka na tarima 72 eḡabi-viriḡirito, benamo ruari ruari etuḡu-guinerito, ḡia beiaḡoni vanuḡari e gaburi mabarari ḡana.

² Evaḡa-guruḡarito, ekirato, “Kwakwa ḡaniganiri tu ḡutuma lelevaḡi, senaḡi kwakwa tarimari tu viravira moḡo. Moḡa lorinaɪ kwakwa Vereḡaukana ḡonoḡia, be kwakwa tarimari tari ma bene tuḡu-iaḡori, ḡaniganini beḡene kwari.

³ Ḡoiago, au na mamoe kavana atuḡumini, boḡa kwaivari rakavari fakari ai.

⁴ Moni fufuseri, dura e tamaka asi boḡono ḡabikau; dabarai tarima ta asi boḡono vaḡa-guruḡaia.

⁵ Bema numa tai boḡo raḡekauni nai, boḡono kira, ‘Maino mai numai bene tanu.’

⁶ Bema maino eura-viniani tarimana monai etanuni nai, ḡemi maino guruḡana ḡia iatanai bene tanu. Bema asiḡina nai, maino tu ḡemi ai ma bene ḡenoḡoi.

⁷ Karakara beḡe vinimini boḡono ḡaniri e boḡono niuri, korana eḡauveini tarimana davana bene ḡabia ḡana. Numa ta na ma numa ta ḡana asi boḡono iaḡo, senaḡi mo numa sebonai moḡo boḡono tanu.

⁸ Bema vanuḡa tai boḡo raḡasini, beḡe ḡabi-raḡemini, karakara ḡoirami ai beḡe tore-rosirini dagarari boḡono ḡaniri.

⁹ Mo vanuḡaɪ keve tarimari boḡono vaḡa-namori e tarimarima boḡono vaḡa-guruḡari, boḡono kira, ‘Barau ḡena Basileia, (ḡena veḡitaḡau seḡukana evaḡa-ruḡaiani), tu sevimi ai maiga.’

¹⁰ Senaġi bema vanuġai boġo raġasini, benamo asi beġe ġabi-raġemini nai, ġatamanai boġono raka-rosi, boġono kira,

¹¹ ‘Ġemi vanuġa gagauri kwakumai beġe kafakau dagarari maki mai ġakora-vaġirini ġemi kira-sirivaġi vaġa-foforiri ġana. Senaġi boġono riba, Barau ġena Basileia tu bekvinaġi.’

¹² Au na akiramini, Kota baregona ġaronai mai vanuġa na meto beġwaiani tu, Sodoma ġena meto maki bevanagiani.”

Asi veġabidadama vanuġari

Mataio 11:20-24

¹³ “Korasini o, ġoi ema Betesaida, vetuġami kika! Korana nuġa-farevaġi veġari ġemi ai ġefoforito-ġoi tu, Taia e Sidono nuġari ai beġere fofori, benamo ġia tu irau laġani ai ġere vetuġamaġi-kure, fuse rakavari ai e tauġaniri ma gurumari ai ġeri vetuġamaġi-kure ġere vaġa-foforia.

¹⁴ Barau na tarimarima bekota-vinirini ġarona baregonai, ġomi na boġo doġariani metona tu Taia e Sidono ġeri meto bevanagiani.

¹⁵ Ġoi maki, Kaperanauma o, ġoi ourani guba ġana bono varaġe otoni? Asigina, ġoi tu mase gabuna ġana boiaġoni!”

¹⁶ Iesu na ġena mero evaġa-guruġarito, ekirato, “Dei na ġomi beseġaġi-vinimini, au maki beseġaġi-viniguni; dei na asi beġabi-raġemini, au maki asi beġabi-raġeguni; ema dei na asi beġabi-raġeguni, etuġuġo Barauna maki asi beġabi-raġeani.”

Iesu na etuġurito tarimari 72 ġeġenoġoito

¹⁷ Ġena mero 72 ma ġeġenoġoito ma iakuri ġesi, ġekirato, “Vereġauka o, iauka rakavari ġoi aramu ai ġavaġa-guruġarito, benamo garoma ġeseġaġirito-ġoi.”

¹⁸ Iesu na evaġa-veserito, ekirato, “Satani aġitaiaato, kiriku ekimoreani kavana guba na eketo-firigoto.

¹⁹ Boġono riba, au na seġuka varau avinimito, mota ema kavikavi boġono fana-tariri, ema Satani ġena seġuka maki boġono vaġa-farakaia ġana; dagara ta na asi bevaġa-rakavamini.

²⁰ Senaġina, dia boġono iaku korana iauka rakavari ġomi ġemi seġuka nuġanai, asigina, a ġomi tu boġono verere korana arami gubai etorerito nai.”

Iesu eiakuni

Mataio 11:25-27; 13:16-17

²¹ Mo tanu-vegogo nuġanai Iauka Veaġa na Iesu tu iaku na evaġa-vonuato, benamo ekirato, “Tamagu o, avaġa-namomuni, guba ema tanobara Verena! Korana ġoi na ma iaunegari e riba tarimari ġeri ai okure-togarini dagarari tu, asi ġeri riba tarimari ġeri ai ovaġa-foforirini. Aba, Tamagu, mai tu ġoi ġemu veuravini korana evaġa-foforiani.

²² Dagara mabarari Tamagu na eviniguto. Tarima ta asi ribana ġia Natuna, Tamana moġo ġereġana, ema ta asi ribana ġia Tamana, senaġi Natuna ġereġana moġo, ema Natuna na eura-vinirini tarimari ġeri ai vau evaġa-foforirini.”

²³ Benamo Iesu eboġe-kureto ġena mero ġeri ai, veġuni ai evaġa-guruġarito, ekirato, “Ġomi tu boġono iaku, korana tu mai ġogitarini dagarari dairi ai.

²⁴ Au na akiramini, peroveta tarimari e tanobara vereri baregori o kini vovoka ġeurato, mai ġogitarini dagarari beġere ġitari, senaġi asi ġeġitarito, ema ġoseġaġirini dagarari beġere seġaġiri, senaġi asi ġeseġaġirito.”

Barabore - Samaria tarimana namona

²⁵ Taravatu evevaġa-riba iaġiato-ġoi tarimana ta evariġisito, benamo Iesu eribaġaniato, ekirato, “Vevaġa-riba taumu, au tu kara baveini vau, maġuri vanaġivanagħi badoġariani?”

²⁶ Iesu na evaġa-veseto, ekirato, “Taravatu tu kara etoni? Ġoi na tu kamasi oiaviani?”

²⁷ Ġia evaġa-veseto, ekirato, “Vereġauka ġoi ġemu Barau bono ura-vinia ma nuġamu mabarana, ma iaukamu mabarana, ma kokoremu mabarana, e ma tuġamaġimu mabarana”; ema ‘Sevimu tarimana maki bono ura-vinia ġoi tauġemu oveura-vinini kavana.’”

²⁸ Iesu na ekiraiato, ekirato, “Bovaġa-vese maoro, maniġesi bono vei, be bono maġuri.”

²⁹ Senaġi taravatu evevaġa-riba iaġiato-ġoi tarimana tu ma vevavina ġesi Iesu ma edanaġi-veribaġaniato, ekirato, “Au sevigu tarimana tu dei?”

³⁰ Iesu evaġa-veseto, ekirato, “Tau ta Ierusalem na Ieriko evariġo-viniato-ġoi nuġanai, lema tarimari na dabarai ġeguru-viniato, ġena dabuġa ġekokirito, ġevaġa-vevaġiato, dori moġo ġevaġi-maseato, benamo monai ġeraga-kwaneato.

³¹ Moġa Rubu Veaġa verena ta mo dabara na evariġoto-ġoi nai, mo tau edoġariato, senaġi eraka-ġevi-raġiato moġo.

³² Levi doĝorona tarimana ta, (Rubu Veĝai vetuĝunaĝi tauna), maki moĝesi, mo tau ea doĝariato nai, maki eraka-ĝevi-raĝiatio moĝo.

³³ Senaĝina Samaria tarimana ta ĝena iaĝoiago ai mo tau ea doĝariato, eĝitaiato nai, evetuĝaiato.

³⁴ Sevina ĝana eiaĝoto, diĝa e vine nanuna manuĝanai ebubuto, ekumuato, benamo ĝena doniki ai evaĝa-tanu-kauato, vinitaĝo numana ĝana eĝori-iaĝoato, monai enariato.

³⁵ Boĝibogĝi evarigisito nai, silva moniri ruarua numa ĝitaĝauna tarimana eviniato, ekirato, 'Mai tau bono nariĝau-ĝitakaua. Bema moni asi beilailani nai, ĝegu ĝenoĝoi ai vau ĝemu moni davana bavinimuni.'

³⁶ Iesu evedanaĝito, ekirato, "Goi tu kara otoni? Mai tarima toitoi fakari ai deikara sevina tarimana tu mo lema tarimari na ĝevaĝa-vevaĝiatio tauna ĝenai bita kiragiani?"

³⁷ Taravatu evevaĝa-riba iaĝiatio-ĝoi tarimana evaĝa-veseto, ekirato, "Evetuĝaiatio tarimana." Benamo Iesu na ekiraiato, "Noiaĝo, ĝoi maki moĝesi bono vei."

Mareta e Maria

³⁸ Iesu ma ĝena mero ĝesi ĝeri iaĝoiago ai vanuĝa tai ĝea votuto. Monai vavine ta arana Mareta ĝena numai eĝabi-raĝeato.

³⁹ Ĝia tu ma tarina arana Maria, benamo Maria tu eiaĝoto, Vereĝauka kwakuna koranai etanu-tarito, ĝena guruĝa eseĝaĝirito-ĝoi.

⁴⁰ Mareta tu vegabirage dagarari eveito-ĝoi, evekwaragiato-ĝoi. Benamo eiaĝomato, ekirato, "Vereĝauka, ĝoi tu otuĝamaĝini ba? Tarigu na beraga-kwanegu, au ĝereĝagu moĝo avekwaragi. Nokiraia, be nema vaga-kavagu!"

⁴¹ Vereĝauka na evaĝa-veseato, ekirato, "Mareta! Mareta! Dagara ĝutumari na nuĝamu ĝevaĝa-veĝonuani e ĝevaĝa-vekwaragi, ni,

⁴² senaĝi dagara sebona moĝo ĝerevaĝi. Maria na tu namona beĝabi-virigiata, ta na ĝia ĝenana asi ma beĝabi-vagiata."

11

Iesu na ĝena mero ĝurigiuri evaĝa-ribarito

¹ Ĝaro tai Iesu tu gabu tai eĝauĝauto. Ekorito nai, ĝena mero ta na evaĝa-guruĝaiato, ekirato, "Vereĝauka o, ĝurigiuri novaĝa-ribama Ioane na ĝena mero evaĝa-ribarito ilailanai."

² Iesu na ekirarito, ekirato, "Ĝoĝurigiurini nai, boĝono kira:

'Ĝai Tamama o,

ĝoi aramu baĝana vaĝa-veaĝaia;

ĝemu Basileia bene iaĝoma.

³ Ĝaro tata ĝai ĝema-ĝama bonoma vinima.

⁴ Ĝema rakava notuĝamaĝi-fitoĝari,

korana ĝai maki ĝevaĝa-rakavamani tarimari ĝeri rakava ĝatuĝamaĝi-fitoĝarini.

Ema veribaĝani ai asi bono ĝori-kauma.' "

⁵ Benamo Iesu na evaĝa-gurugiurito, ekirato, "Bema ĝomi ta bogi nuĝanai ĝatana ĝenai bere iaĝo, bere noĝia, bere kira, 'Ĝatagu o, ĝaniĝani dagarari kota naĝabi-toreri roĝo,

⁶ korana au ĝatagu ta tu ĝena iaĝoiago ai ĝegu ai beiaĝoma, senaĝi au tu asi ĝegu ĝaniĝani ĝia baĝubuanai.'

⁷ Benamo mo tarima na numa nuĝana na bere vaĝa-vesea, bere kira, 'Asi novaĝa-vekwaragi. Ĝatama-boka varau babiria, ema au tu natugu ĝesi ĝagenani. Au tu asi bavariĝisini, dagara ta asi bavinimuni.'

⁸ Akiramini, enabe ĝia ĝatana, senaĝi asi bevariĝisini, ĝaniĝani asi beviniani, senaĝi ĝena noĝinoĝi ĝenoĝoi-ĝenoĝoi dainai bevariĝisini, eura-vinirini dagarari beviniani.

⁹ Moĝa lorinai, au na ĝomi akiramini, noĝinoĝi ai Barau na bevinimini, vetauvetau ai boĝo doĝarini, sekeseke o fidifidi ai ĝemi ĝatama-boka bekeoani.

¹⁰ Korana benoĝi-noĝini tarimana tu beĝabini, bevetauni tarimana bedoĝarini, ema beseke-sekeni tarimana Barau na ĝena ĝatama boka bekeoani.

¹¹ Ĝomi tama fakami ai deikara bema natumu merona maĝani-kone benoĝini nai, ĝoi na tu mota boviniani?

¹² O ĝatoi benoĝini nai, kavikavi boviniani?

¹³ Boĝono tuĝamaĝi, ĝomi tu rakava tarimami, senaĝi dagara namori natumi viniviniri ma ribami, moĝa lorinai ĝomi Tamami gubai etanuni, ĝia na Iauka Veaĝa ĝenoĝi-viniani tarimari bevinirini veĝatana!"

Iesu e Belsebul

Mataio 12:22-30; Mareko 3:20-27

¹⁴ Iesu na iauka rakavana, muru-bubu iaukana, elai-vaḡiato, benamo mo muru-bubu tarimana eguruḡato. Tarimarima ḡutuma na ḡevaḡa-raḡeato,

¹⁵ senaḡi tarima kota ḡekirato, “Mai tu Belsebul, iauka rakavari ḡeri vere, ḡena seḡukai iauka rakavari elai-vaḡirini.”

¹⁶ Tarima kotari na Iesu ḡedanaḡi-veribaḡaniato, vetoḡa ta guba na bene viniri ḡetato.

¹⁷ Senaḡi Iesu na ḡia ḡeri tuḡamaḡi eribarito, benamo evaḡa-guruḡarito, ekirato, “Gavamani ta beveḡabi-kirani, ḡia tu berakavani, ema doḡoro ta beveḡabi-kirani, ḡia tu beketoni.

¹⁸ Moḡa lorinai Satani tu tauḡena moḡo bevevare-kirani, ḡena basileia tu kamasi beruḡani? Maiḡesi akiraḡiani, korana tu ḡomi ḡokirani, au tu Belsebul ḡena seḡukai iauka rakavari alai-vaḡirini.

¹⁹ Bema au iauka rakavari Belsebul ḡena seḡukai alai-vaḡirini nai, ḡomi murimi ai ḡerakani tarimari na iauka rakavari aiḡesi ḡelai-vaḡirini? ḡia na ḡevaḡa-moḡoniani ḡomi ḡemi guruḡa tu asi inana.

²⁰ Senaḡi bema au iauka rakavari Barau ḡena seḡukai alai-vaḡirini nai, boḡono riba, Barau ḡena Basileia, ḡena veḡitaḡau seḡukana, tu ḡomi ḡemi ai varau beḡaḡasi.

²¹ Kokore tarimana ma ḡena vaḡivaḡi dagarari ḡesi ḡena numa beḡita-ḡauani nai, ḡena farefare tu roḡo beḡe tanu-ginikauni.

²² Senaḡina kokore vedaurea tarimana ta ma beiaḡomani, mai tarima bevaḡa-vevaḡiani, benamo bevaḡa-dareani, ḡia ḡena vaḡivaḡi dagarari, veḡabidadama dagarari, beverari-ani, benamo ḡena farefare mabarari bevare-rovorovorini.

²³ Deikara dia au ḡatagu tu, au ḡegu inai tarimana, ema deikara au ḡesi asi etorevegogoni tu eveiari-lausilausini.”

Iauka rakavana ma eḡenoḡoito

Mataio 12:43-45

²⁴ “Iauka rakavana ta tarima ta ḡenana eraka-rosito, benamo gabu kaukauri na erakavanaḡito, iaḡana bene ḡania etato, senaḡi iaḡaraḡi gabuna ta asi edoḡariato. Benamo ḡia tauḡena ekirato, ‘Naḡenoḡoi, araga-kwaneato numana ḡana.’

²⁵ Eḡenoḡoi-iaḡoto, numa edoḡariato. Numana tu veiareva ema ḡitaḡitana namo vedaurea.

²⁶ Benamo ḡia na iauka rakava kwaikwairi imaima ruarua (7) ma eḡori-iaḡorito, mabarari ḡeraka-toḡato, monai ḡetanuto. Moḡa lorinai mo tarima tu tovtovonai ḡena rakava tu kota misina, senaḡi dokonai ḡena rakava tu bareḡo vedaurea.”

Verere moḡonina

²⁷ Mo guruḡa ekiraḡiato-ḡoi nai, vavine ta tarimarima ḡutuma fakari na eguruḡa-vaisito, ekirato, “Ḗoi evaḡa-maḡurimoto e evini-rurumuto vavinena tu namo!”

²⁸ Senaḡi Iesu evaḡa-veseto, ekirato, “Iniḡesi nokira, Barau ḡena ḡuruḡa ḡeseḡaḡiani ema ḡekorana-iaḡiani tarimari neḡi namo!”

Seḡuka vetoḡana ḡevetauato

Mataio 12:38-42; Mareko 8:12

²⁹ Tarimarima gutuma na Iesu ḡeruḡa-ḡeḡeraḡiato, benamo evaḡa-guruḡarito, ekirato, “Toma ḡuru tu ḡuru rakavana! Seḡuka vetoḡana ḡevetauani, senaḡi vetoḡa ta asi beḡe doḡarini, Iona, peroveta tarimana, vetoḡana mogo.

³⁰ Korana Iona tu vetoḡa ta Nineva tarimari ḡeri ai, moḡa ilailanai Tarimarima Natuna tu vetoḡai beiaḡoni mai guru tarimari ḡeri ai.

³¹ Barau na tarimarima bekota-vinirini ḡaronai, Seba vavine baregona o Kwin beruḡa-vaisini, mai guru tarimari besamanirini, korana ḡia tu ḡena tanobara manaḡana na eiaḡomato, Solomona ḡena iaunega guruḡari bene seḡaḡiri ḡana. Senaḡi ḡoḡitaia, tarima ta na Solomona evanaḡiani tu maiḡa.

³² Barau ḡena Kota baregona ḡaronai, Nineva tarimari beḡe ruḡa-vaisini, toma ḡuru tarimari beḡe samanirini, korana Iona ḡena ḡobata ḡeseḡaḡiato neganai, ḡia ḡeri rakava ḡerina ḡevetuḡamaḡi-kureto. Senaḡi tarima ta na Iona evanaḡiani tu maiḡa.”

Tauḡani mamana

Mataio 5:15; 6:22-23

³³ “Tarima ta na lamefa begabuani nai, asi bekure-toḡaiani, diḡu na asi beḡoḡoi-tariani, senaḡi lamefa tore-torena gabuna korikorinai betoreani, beḡe raka-toḡani tarimari na mama beḡene ḡitaia ḡana.

³⁴ Ḗoi matamu tu ḡoi tauḡanimu ḡena lamefa kavana. Bema ḡoi matamu namo nai, tauḡanimu mabarana bemamani. Senaḡi ḡoi matamu rakava nai, tauḡanimu mabarana bemukunani.

³⁵ Moġa lorinai, lorimu bono vetore, mama ġoi nuġamu ai bemukunani garina.

³⁶ Bema ġoi tauġanimu mabarana mama na bevonuvonu-raġeni, mukuna kota maki asi betanuni, ġia tu mama dikadika, lamefa emore-rovorovoni, ġoi evaġa-mamamuni kavana.”

Iesu na Farisea tarimari ema taravatu ġevevaġa-riba iaġiato-ġoi tarimari evanerito Mataio 23:1-36; Mareko 12:38-40; Luka 20:45-47

³⁷ Iesu eguruġa-ġosito nai, Farisea tarimana ta na ekeaiato, ġia ġesi beġene ġaniġani-vegogo; benamo ġena numa ġana eiaġoto, ġaniġani gabunai etanu-tarito.

³⁸ Mo Farisea tarimana na eġitaio nai, nuġana efarevaġi-rakavato, korana Iesu tu asi eveġuriġito, (ġia seneri vereri ġeri vevaġa-naġi ilailanai), senaġi eġani-ġanito moġo.

³⁹ Benamo Vereġauka na evaġa-guruġaiato, ekirato, “Gomi Farisea tarimami na ġemi kapusi ema disi muriri rekeri moġo ġoġuriġi-ġinikaurini, senaġi nuġami tu verariverari ema vei-taġuitaġui na ġevonu-fokafokato.

⁴⁰ Gomi tu babo! Gomi asi ġoribani, murika rekena eveiato Barauna na nuġana rekena maki ġia na eveiato?

⁴¹ Senaġi kapusi ema disi nuġari dagarari tu asi ġeri-ġari tarimari boġono viniri vau, dagara mabarari ġemi ai beġe veiarevani.

⁴² Farisea tarimami, vetuġami kika! Korana ġomi na Barau ġovarevare-viniani dagarari misimisiri, ġemi sivoġa, kodukarava ema ġaniġani ġailauri maki karava gabanana (10) goveirini, karava sebona boubou dagaranai govaġa-iaġoani, senaġina vei-iobukaiobuka ema Barau uravinina maġurina tu goleaiani. Gomi na tu maiġeri veġa baregori ġoro veiri ema mo veġa keiri maki asi bogoro iagui.

⁴³ Farisea tarimami, vetuġami kika! Korana ġemi ura rubu ai tu tanutanu namori ai boġono tanu, ema ġemi ura maki maketi gaburi ai beġene vaġa-namoni.

⁴⁴ Vetuġami kika! Gomi tu asi ġita vetoġari gara gaburi kavana, tarimarima iatari na ġeraka-vanaġini nai ġemirorini, ġia asi ġeribani mo tu gabu rakavana.”

⁴⁵ Taravatu ġevevaġa-riba iaġiato-ġoi tarimana ta na Iesu evaġa-guruġaiato, ekirato, “Vevaġa-riba taumu o, maiġesi okirani nai, ġai maki okira-fitoġamani!”

⁴⁶ Iesu evaġa-veseto, ekirato, “Gomi taravatu govevaġa-riba iaġiani tarimami maki vetuġami kika! Gomi na maruna metori tarimarima govaġa-faġarini, senaġi ġimami didina ta maki ġeri marunai asi goveġabikauni, asi govaġa-kavarini.

⁴⁷ Vetuġami kika! Gomi tubumi ġatami na peroveta tarimari ġevaġi-maserito, ema ġomi na tu ġeri gara gaburi namori goveirini.

⁴⁸ Moġesi ġomi tauġemi tubumi ġatami ġeri veġa ġokiraġi-foforirini ema govaġa-moġonirini; moġoni vegata, tubumi ġatami na peroveta tarimari ġevaġi-maserito, ema ġomi na ġeri gara gaburi goveirini.

⁴⁹ Moġa lorinai Barau ġena Iaunega ekirani, ‘Au na peroveta tarimari ema apostolo tarimari batuġu-iaġorini ġeri ai, benamo tari tu beġe vaġi-maserini, ma tari tu beġe la-laussilausirini.’

⁵⁰ Moġesi nai, peroveta tarimari mabarari ġevaġi-maserito, Barau na tanobara eveiato vegata beiaġoma mo maitoma, metona tu toma ġuru tarimari na beġe ġabiani.

⁵¹ Abela ġevaġi-maseato, monana eiaġomato mo Sakaria, ġia tu fata veaġana ema Barau ġena numa veaġana fakari ai ġevaġi-maseato. Aba, au na akiramini, mabarari metori tu toma ġuru tarimari na beġe ġabiani!

⁵² Taravatu govevaġa-riba iaġiani tarimami, vetuġami kika! Riba numana keo-fakana ġatama-boka kina tu ġomi na ġoġabiato. Gomi ġereġami asi boġo raka-toġani, ema ġerakatoġa ġetonni tarimari ġeri dabara ġomi na ġokourini!”

⁵³ Iesu mo gabu na eraka-rosito, benamo taravatu ġevevaġa-riba iaġiato-ġoi tarimari ema Farisea tarimari na ġekira-fitoġaiato, ema dagara vovoka ġevedanaġi-viniato,

⁵⁴ ġeribaġaniato, ġeri ura tu dagara ta bene kiragi-kererea, be beġene samania ġana.

12

Ġeġofaġofani tarimari boġono nariri

¹ Mo faka nuġani tarimarima ġutuma lelevaġi varau ġevevogoto, asi-iaġo asi-fana, benamo Iesu na ġena mero evaġa-guruġa guinerito, ekirato, “Boġono venari-ġinikau Farisea tarimari ġeri farao evaġa-tubuani muramurana ġerina, korana mani tu ġia ġeri ġofaġofa veġana bene.

² Vekouġau dagarari mabarari beġea foforini, vekuretoġa guruġari mabarari beġea ribani.

³ Moġa lorinai kara dagara mukunai ġokiraġiatio, mamai beġea seġaġiani, kara dagara koutoġai seġai ġoguruġa-ġurato dagarana, beġea kiraġi-foforiani numa tuġuna na, tarimarima mabarari na beġene seġaġia ġana.”

Barau bitana gari-vinia

Mataio 10:28-31

⁴ “Gatagu mabarami, akiramini, tauġani beġe vaġiani, ma murinai kara ta ma asi beġe veiani tarimari gariri asi boġono vei.

⁵ Senaġi navaġa-ribami, deikara garina boġono vei: Barau boġono gari-vinia. Tauġani bevaġiani murinai ma ġena seġuka, ġomi ma befiu-ġuramini, karava eġara-vanaġi vanaġini gabunai. Aba, au na akiramini, ġia moġo boġono gari-vinia!

⁶ Bisini imaima (5) maki fene ruarua na moġo ġevoirini, ene? Senaġina Barau na tu sebona ta maki asi etuġa-rekwaiani.

⁷ Moġoni veġatana, ġomi tu debami ġuiri maki mabarari Barau na eiavi-ginikaurito. Be asi boġono gari; ġomi voimi tu varaġe lelevaġi, bisini ġutuma voiri maki ġovanaġirito!”

Iesu bekiraġi-foforiani ema bekira-ġuniġauani

Mataio 10:32-33; 12:32; 10:19-20

⁸ “Au na akiramini, deikara na au tarimarima ġoirari ai bekiraġi-foforiguni, ġia maki Tarimarima Natuna na Barau ġena aneru ġoirari ai bekiraġi-foforiani.

⁹ Senaġina au deikara na tarimarima ġoirari ai beruġaguni e bekira-ġuniġauguni, ġia maki Barau ġena aneru ġoirari ai baruġaiani e bakira-ġuniġauani.

¹⁰ Tarimarima Natuna deikara na bekira-rakavaiani, Barau na ġia ġena rakava betuġamaġi-fitoġaiani, senaġina deikara na Iauka Veaġa bekira-rakavaiani, ġia ġena rakava tu asi betuġamaġi-fitoġaiani.

¹¹ Iuda tarimari ġeri rubu ai beġe vaġa-kotamini, ema vanuġa vereri e Kota baregori ġeseġaġini tarimari ġoirari ġana beġe ġori-iaġomini nai, nuġami asi beġene vekwaraġi, aiġesi toma boġo guruġani o kara toma boġo kiraġirini.

¹² Korana Iauka Veaġa na mo ġaro ai kara boġo kiraġirini guruġari bevaġa-ribamini.”

Barabore - Farefare vovoka tarimana

¹³ Tarimarima ġutuma nuġana na tarima ta na Iesu ekiraiato, ekirato, “Vevaġa-riba tarimamu o, au kakagu nokiraia, ġai tamama na eraga-kwanerito farefareri nevareri, be au tavi ta nevinigu.”

¹⁴ Iesu na evaġa-veseato, ekirato, “Goj tau o, au tu deikara na ġomi taumi ruarua ġemi farefare-tore viriġi-viriġina ġana etoreguto?”

¹⁵ Benamo evaġa-guruġarito, ekirato, “Boġono boġeboġe! Lorimi boġono vetore, farefare vovoka mata-ġaniġaniri boġo veini garina; korana tarimarima ġeri maġuri korikori tu dia ġeri farefare vovoka na ġevaġa-ġorarini.”

¹⁶ Benamo mai barabore ekiraġiatio, ekirato, “Farefare vovoka tarimana ta ġena tano na ġaniġani namori evaġa-ġorarito.

¹⁷ Ġia etuġa-maġito, ekirato, ‘Kamasi toma haveini? Mai ġaniġani mabarari tu ainai bana vaġa-vegogori?’

¹⁸ Benamo ekirato, ‘Au tu maiġesi navei. Ġaniġani atorinerini numari ġuineri narovori, benamo numa baregori naragari. Mainai vau au ġegu ġaniġani e farefare mabarari monai bana vaġa-vegogori.

¹⁹ Benamo au tauġegu bana vekira, ‘Goj ġemu dagara namori tu ġutuma gorogoro bovaġa-vegogori laġani vovoka ġana. Be, noiaġaraġi, noġaniġani, noniuniu e noverere.’

²⁰ Senaġina Barau na ekiraiato, ekirato, ‘Kamuto, ġoi tu babo! Toma boġi ġoi ġemu maġuri aġabi-vaġiani ġemuna, benamo mai ġemu farefare bovaġa-vegogorini tu deikara na beġabirini?’

²¹ Maiġesina mo deidei tauġeri moġo ġeri farefare ġevaġa-vegogoni tarimari tu asi ġeri farefare Barau ġoiranai.”

Asi bono tuġamaġi-vekwaraġi

Mataio 6:25-34

²² Benamo Iesu na ġena mero evaġa-guruġarito, ekirato, “Moġa lorinai, akiramini, ġemi maġuri asi boġono tuġamaġiri, kara boġo ġanini; o tauġanimi kara na boġo dabuġarini.

²³ Maġuri tu dagara baregona, a ġaniġani tu dagara keina, ema tauġani tu dagara baregona, a dabuġa tu dagara keina.

²⁴ Gaio ġotuġamaġiri, asi ġevarovaroni ema asi ġekwa-kwani; asi ġeri ġaniġani-tore numari, senaġina Barau na eġuburini! Ġomi tu dagara baregomi, a manu tu kei!

²⁵ Gomi deikara otuġamaġi-vekwaraġini nai, ġemu maġuri kota maia bovaġa-maukaiani?

²⁶ Mai dagara misina asi boveiani riba, karase nai tu dagara tari maia urari ai ovetuḡamaḡini?

²⁷ Boḡa veraverari ḡoḡitari aiḡesi ḡegarani. Asi ḡeḡauveini ema dabuḡa asi ḡeturini. Senaḡina akiramini, Kini Solomona ḡena vedabuḡa marevana maki ḡevanaḡiani.

²⁸ Bema Barau na tanobara ḡaugari mogesi edabuḡarini, ḡia toma tu ḡegarani, ma boinani tu karavai beḡe fiu-raḡerini, Barau na ḡomi tu bevaḡa-dabuḡa ginikau-raḡemini. ḡomi veḡabidadama misimisi tarimami!

²⁹ Moḡa lorinai asi boḡono boḡe vetau-vetau, kara toma ḡoḡanini e kara toma ḡoniuni; ema asi boḡono tuḡamaḡi-vekwaraḡi maki.

³⁰ Korana Barau asi ribari tarimari mabarari tu maniḡeri dagara ḡevetaurini, a ḡomi Tamami tu ma ribana maniḡeri dagara tu goura-vinirini.

³¹ Senaḡina Barau ḡena Basileia boḡono vetaua, benamo maniḡeri dagara mabarari bevinimini.”

Farefare boḡono vaḡa-vegogo gubai

Mataio 6:19-21

³² “Seri misina, asi boḡono gari, korana Tamami ḡena ura tu ma nuḡa namona ḡesi ḡena Basileia bene vinimi.

³³ ḡemi farefare ḡovoivoi-iaḡiri, ma moni asi-ḡeri e asi-ḡari tarimari ḡoviniri. Asi beḡe rakavani moni fusefuseri ḡoḡabiri, ḡemi farefare gubai ḡovaḡa-vegogori, monai tu asi beḡe korini, monai lema tarimari asi beḡe raka-kavini ema faro na maki asi beḡe vaḡa-rakavarini.

³⁴ Korana tu ḡomi ḡemi farefare ainai, ḡomi nuḡami maki monai.”

Vetuḡunaḡi tarimari namori

Mataio 24:42-51

³⁵ “ḡauvei ḡana boḡono vedabuḡa-tore ema ḡemi lamefa beḡene ḡara-taḡo.

³⁶ Vetuḡunaḡi tarimari na ḡeri vere numai ḡenari-taḡoani kavana boḡono tanu. Vevaḡa-veḡaraḡo verekona na ma beḡenoḡoini, ḡatama-bokai befidifidini nai, ḡena ḡatama beḡene raga-keoa ḡana.

³⁷ Vetuḡunaḡi tarimari roḡo tataḡa ḡeri vere beḡenoḡoini tu namo. Moḡoni akiramini, ḡena rami berigoani, ḡaniḡani gabunai bevaḡa-tanurini, benamo ḡaniḡani bevinirini.

³⁸ Mo vetuḡunaḡi tarimari roḡo naritaḡo ḡeri vere beḡenoḡoini tu namo, kamaso boḡi nuḡanai o boḡiboḡi rekenai beiaḡomani.

³⁹ Senaḡi boḡono riba, bema numa tarimana ma ribana, kamara horai lema tarimana beiaḡomani tu, numa benariani, be lema tarimana maki lema bevedaureani.

⁴⁰ Moḡa lorinai ḡomi maki boḡono venari-taḡo, korana Tarimarima Natuna tu asi ḡotuḡamaḡiani aoanai beiaḡomani.”

⁴¹ Benamo Petero na edanaḡiato, ekirato, “Vereḡauka, mai barabore tu ḡai ḡemai moḡo okiraḡiani, ba tarimarima mabarari ḡeri ai maki?”

⁴² Vereḡauka evaḡa-veseto, ekirato, “Deikara tu mo farefare nari tarimari na guruḡa eseḡaḡini ema veḡa roroḡotori eveini, ḡena vere na eḡabi-virigiato, numa ema vetuḡunaḡi tarimari bene ḡitaḡauri, ema ḡaniḡani maki nega korikori ai bene viniri?”

⁴³ Mo vetuḡunaḡi tarimana, ḡena vere na ekiraiato ilailanai eḡauveini, bema-ḡoitaḡoani tu namo.

⁴⁴ Moḡoni akiramini, ḡia tu ḡena vere ḡena farefare mabarari ḡitaḡauri tarimanai bevaḡa-iaḡoani.

⁴⁵ Senaḡina bema vetuḡunaḡi tarimana bekirani, ‘Au ḡegu vere ḡena ḡenoḡoi tu bekwaibo rakava,’ benamo vetuḡunaḡi tauri ema vavineri bekwaririni, ma beḡanini e beniu-babobani.

⁴⁶ Vetuḡunaḡi tarimana ḡena vere ḡena ḡenoḡoi ḡaronu tu asi etuḡamaḡiani ḡaronai, ma asi eribaiani aoanai beḡaḡasini. Gena vere na bea basi-ḡutuḡutuani, ma asi ḡevaḡa-moḡonini tarimari ḡesi bea toreani.

⁴⁷ Mo vetuḡunaḡi tarimana ḡena vere ḡena ura tu ma ribana, senaḡi asi eḡabi-kavini ema ḡena vere ḡena ura asi eveiani tu, ribi baregona korikori beḡabiani.

⁴⁸ A vetuḡunaḡi tarimana asi ribana ḡena vere ḡena ura, ma bea ḡauvei-kavani, voina tu ribi, senaḡi asi vovoka beḡabini. Gutumari eviniato tarimana ḡenana tu gutumari ma beura-viniani; vovoka lelevaḡiri eviniato tarimana ḡenana tu vovoka lelevaḡiri ma bevetau-viniani.”

Dia maino, senaḡi vetavi

Mataio 10:34-36

49 “Au tu karava aḡabi-iaḡomaiato tanobara ḡana, ema ḡegu ura bere ḡarakau guine tu namo!

50 Senaḡi au tu babatiso ta baḡabiani, ema au tu anuḡa-vekwaraḡini, beiaḡoni mo, bavaḡa-koriani!

51 Gomi ḡotuḡamaḡini, au tu maino tanobara ḡana aḡabi-iaḡomaiato? Asigḡi, senaḡi akiramini, vetavi-kirakira urana na aiaḡomato.

52 Toma beiaḡoni mo ḡoira laḡaniri ai, bese tai imaima tu beḡe vetavi-kirani, toitoi beḡe veḡitani ruarua ḡerina, ema ruarua beḡe veḡitani toitoi ḡerina.

53 Tamana natuna tauna ḡenana beveḡitani, natuna tauna tamana ḡenana beveḡitani; sinana natuna vavinena ḡenana beveḡitani, ma natuna vavinena sinana ḡenana beveḡitani; taḡama vavine barana taḡama vavine keina ḡenana beveḡitani, ma taḡama vavine keina taḡama vavine barana ḡenana beveḡitani.”

Aoa beraḡasini vetoḡana

Mataio 16:1-4

54 Iesu na tarimarima ḡutuma evaḡa-guruḡarito, ekirato, “Bema ḡaro eketoni rekenai magube dubadubari ḡeraḡekauni ḡoḡitarini nai tu, ḡokirani, ‘Ḡura beraguni,’ benamo eraguni.

55 Ma gabina rekena (o south) na iavara eiaḡomani nai ḡokirani, ‘Ḡaro beseḡukani,’ benamo ḡaro eseḡukani.

56 Gofaḡofa tarimami! Tanobara e guba vetoḡari kiraḡi-kiraḡiri tu ma ribami; kamasi nai mai toma ḡaro vetoḡana tu asi ribami?

57 Karase nai tauḡemi na asi ḡotuḡamaḡi-fakaiani kara tu maoro?

58 Esamanimuto tarimana ḡesi roḡo ḡoiaḡoni Kota ḡana nuḡanai boḡono maino. Bema asigḡina nai, Kota eseḡaḡini tarimana ḡimanai bea tore-kaumuni, ma Kota eseḡaḡini tarimana na folisi ḡimanai bea tore-kaumuni, benamo folisi na dibura numanai bea fiu-toḡamuni.

59 Akiramuni, asi boraka-vaḡini, beiaḡoni mo, moni mabarana boa vaḡa-voi-ḡosiani.”

13

Gemi rakava ḡerina boḡono vetuḡamaḡi-kure e boḡono raka-kure boḡo maseni ḡesi

1 Mo negai tarima kota Iesu ḡenai ḡeiaḡoto, benamo Iesu ḡekira-varaiato, Galilea tarimari Pilato na evaḡirito, ḡeri ginitaḡo dagarari Barau ḡeviniato-ḡoi nuḡanai; ḡia rarari tu ginitaḡo dagarari rarari ḡesi ebubu-sebonarito.

2 Iesu na evaḡa-veserito, ekirato, “Gomi ḡotuḡa-maḡini, mo Galilea tarimari moḡesi ḡevaḡirito-ḡoi nai, monana ḡevaḡa-moḡoniato, ḡeri rakava tu Galilea tarimari mabarari ḡeri rakava evanaḡirito?

3 Asigḡina! Au na akiramini, bema ḡemi rakava ḡerina asi boḡo vetuḡamaḡi-kureni, ḡomi mabarami moḡesi boḡo maseni ḡia ḡemaseto kavana.

4 A mo tarima gabanana imaima toitoi (18) Siloam kounai numa baregona eketoto ḡia iatari ai nai, evaḡirito tu kamasi? Gomi ḡotuḡamaḡini, mo tarima ḡeri rakava tu Ierusalem tarimari mabarari ḡeri rakava evanaḡirito?

5 Asigḡina! Au na akiramini, bema ḡemi rakava ḡerina asi boḡo vetuḡamaḡi-kureni, ḡomi mabarami maki boḡo maseni ḡia ḡemaseto kavana.”

Barabore - Figi ḡauna asi ḡwana

6 Iesu na mai barabore ekira-vararito, ekirato, “Tarima ta ḡena vine tavoḡana nuḡanai figi ḡauna evaroato. Benamo eiaḡoto, figi ḡauna ḡwaḡwana ea vetauato, senaḡina ḡwana ta asi edoḡariato.

7 Moḡa lorinai ḡena vamoka narinarina tarimana evaḡa-guruḡaiato, ekirato, ‘Noḡitaia, laḡani toitoi beḡe iaḡo, au mai ḡau ḡitaḡitana aiaḡomani, senaḡina ḡwana ta asi adoḡariani. Nobasi-laua, korana asi tauna bene! Mai tano eḡauvei-iaḡi-taḡuiani.’

8 Senaḡi vamoka ḡitaḡauna tarimana evaḡa-veseto, ekirato, ‘Vereḡauka, noraga-kwaneana, mai laḡani sebona moḡo bene tanu. Au na bakwa-ḡeḡeraḡiani ema tano namori ma babubuni.

9 Benamo ḡwaḡwana namori beḡe burini laḡani ḡoirai tu namo, bema asigḡi nai, vau bono basia.”

Iesu na Sabadi ai asi erakato vavinena evaḡa-namoato

10 Sabadi tai Iesu tu evaḡa-ribatoḡoi rubu ta nuḡanai.

11 Vavine ta monai iauka rakavana na eboroḡiato, evei-kevekeveato laḡani gabanana imaima toitoi (18). Ḡia doḡena eḡeḡevato, asi eruḡa-vaisito-ḡoi.

¹² Iesu na eġitaiato, benamo ekea-iaġomaiato, ekiraiato, “Vavine o, ġoi tu mani keve manina na varau bofaka.”

¹³ Benamo Iesu ġimana mo vavine iatanai eveġabikauto nai, vaġa-sebo moġo doġena eroroġototo, Barau evaġa-raġeato.

¹⁴ Rubu ġitaġauna tarimana ebaruto, korana Iesu na Sabadi ai evevaġa-namoto nai. Moġa lorinai ġia na tarimarima evaġa-guruġarito, ekirato, “Ġaro imaima sebona tarimarima ġeri ġauvei ġarori. Mo ġaro ai vevaġa-namo uranai boġono iaġoma, senaġi Sabadi ai asi boġono iaġoma.”

¹⁵ Vereġauka na evaġa-veseato, ekirato, “Ġofaġofa tarimami! Sabadi ai ġemi boromakau o doniki asi ġoruġarini, ġeri numa na asi ġoġori-rosirini nanu niu?”

¹⁶ A mai vavine, Aberahamo besena vavinena, Satani na laġani gabanana imaima toitoi (18) ebarubaruato, au na Sabadi ai barubaru ġenana asi baruġiaiani ba?”

¹⁷ Moġesi ekirato nai, ġebaru-viniato-ġoi tarimari ġemaiakarito, senaġi tarimarima mabarari na Iesu ġena veġa boruri ġeġitarito nai, ġeiau-rakavato.

Barabore - Mastadi ġauna ġutuna

Mataio 13:31-32; Mareko 4:30-32

¹⁸ Benamo Iesu na edanaġirito, ekirato, “Barau ġena Basileia tu aiġesi? Kara ġenai bavaġa-ilailaiani?”

¹⁹ Ġia tu mastadi ġauna ġutuna kavana. Tarima ta na eġabiato, ġena vamokai evaroato. Mastadi ġauna ġutuna egarato, ġau ai eiaġoto, benamo guba manuri leganai ġesikokauto.”

Farao evaġa-tubuani muramurana

Mataio 13:33

²⁰ Iesu na ma edanaġirito, ekirato, “Barau ġena Basileia tu kara ġesi bavaġa-ilailaiani?”

²¹ Ġia tu maġesi, vavine ta na farao evaġa-tubuani muramurana kotuna ta moġo eġabiato, benamo farao fuseri toitoi ġesi eġiroato, eiaġoto mo, muramura na mabarana evaġa-tubu baregoato.”

Barau ġena Basileia rakatogana

Mataio 7:13-14; 7:21-23

²² Iesu Ierusalem dabanarai eiaġoto-ġoi nai, vanuġa baregori ema keiri nuġari ai evevaġa-ribato-ġoi.

²³ Tarima ta na edanaġiato, ekirato, “Vereġauka, tarima viravira moġo beġe maġurini ba?” Iesu na evaġa-veserito, ekirato,

²⁴ “Boġono vebibi-toġa, ġatama-boka kibobona boġono raka-toġa ġana, korana au na akiramini, tarimarima ġutuma ġeraka-toġa ġetoni, senaġi asi beġe raka-toġani.

²⁵ Numa tarimana bevarġisini, ġatama-boka bekouani murinai, ġomi tu murikai boġo ruġa-taġoni, ġatama-bokai boġo fidifidini, boġo kirani, ‘Vereġauka, ġai ġema ġatama-boka nokeoa!’ senaġi ġia bekirani, ‘Au asi ribaġu ġomi ainana boġo iaġoma!’

²⁶ Benamo ġomi boġo kirani, ‘Ġai tu ġoi ġesi taġaniġanito-ġoi ema taniuniu-vegogoto-ġoi; ema ġoi tu ġai ġema vanuġa ġatamanai ovevaġa-ribato-ġoi!’

²⁷ Senaġina ġia ma bekirani, ‘Au asi ribaġu ġomi ainana ġoiaġomani. Au ġeguna ġoraka-veġita vei-rakava tarimami!’

²⁸ Benamo Aberahamo, Isako, Iakobo, ema peroveta tarimari mabarari boġo ġitarini Barau ġena Basileia nuġanai, senaġi ġomi tu murikai beġe dori-rosimini; mo ġaro ai boġo taġini, gadikami beġe vegara-tarini.

²⁹ Tarimarima ġaro eraġekauni ema ġaro evarġoni, e debana (o north) ema gabina (o south) rekana na beġe iaġomani, beġe tanu-tarini vereko ai Barau ġena Basileia nukanai.

³⁰ Boġono riba, toma ġegabini tarimari tu beġe ġuineni, a ġeguineni tarimari tu beġe gabini.”

Iesu Ierusalem taġina eveito

Mataio 23:37-39

³¹ Mo negai Farisea tarimari kota Iesu ġenai ġeiaġoto, ġevaġa-guruġaiato, ġekirato, “Mai gabu noraga-kwanea, gabu ta ġana noiaġo, korana Heroda euranai ġoi bene vaġimu etoni.”

³² Iesu evaġa-veseto, ekirato, “Ġoiaġo, mo boġa kwaivana ġoa kiraia, ‘Au tu iauka rakavari alai-vaġirini ema tarimarima avaġa-namorini toma, boinani, ema ġaro vaġa-toitoinai ġegu ġauvei bavaġa-kori ġinikauani.’

³³ Senaġi toma, boinani, ilaġani ġegu iaġoiaġo ai roġo baiaġoni, korana peroveta tarimana tu irau gabu ai asi bemasen, senaġi Ierusalem ai moġo!

³⁴ Ierusalem, Ierusalem o, ǵoi na peroveta tarimari ovaǵirini ema Barau na etuǵu-iaǵosirini tarimari fore na otaki-maserini. Nega ǵutuma aurato, natumi bana gana-ǵeǵeraǵiri, kokoroku vavinena na natuna egoru-taririni kavana, senaǵi ǵomi tu asi ǵourato!

³⁵ Moǵa lorinai ǵemi vanuǵa e Rubu Veaǵa korina betanuni. Au na akiramini, ǵomi roǵo au asi boǵo ǵitaǵoni, beiaǵoni mo, ǵaro ta beraǵasini, monai vau boǵo kirani, ‘Barau aranai eiaǵomani tauna sivaǵa-namoa.’”

14

Iesu na Sabadi ai keve tarimana evaǵa-namoato

¹ Sabadi tai Iesu (ǵekeaiato nai) eiaǵoto, Farisea ǵeri veǵorikau tarimana ta ǵena numai beǵene ǵaniǵani ǵana, benamo tarimarima na ǵena veia ǵeǵita-ginikaurito-ǵoi.

² Monai tarima ta ǵia tauǵanina eroro-roroto, Iesu ǵoiranai etanu-taǵoto.

³ Benamo Iesu na taravatu ǵevevaǵa-riba iaǵiatio-ǵoi tarimari e Farisea tarimari edanaǵirito, ekirato, “Sabadi ai keve vaǵa-namo tu maoro ba asiǵina?”

⁴ Senaǵi ǵia asi ǵeguruǵato, ta na maki asi evaǵa-veseato. Benamo Iesu na mo keve tarimana eǵabiato, evaǵa-namoato murinai etuǵuato.

⁵ Benamo ekirarito, ekirato, “Ǵomi deikara natumu o ǵemu boromakau nanu gurina nuǵanai bere keto-ǵura nai, ǵoi na Sabadi ai boro inu-raǵea ba asiǵina?”

⁶ Senaǵi ǵia na Iesu asi ǵevaǵa-veseato.

Barabore - Veǵaraǵo verekona

⁷ Iesu na varivari tarimari eǵitarito, tanutanu namori moǵo ǵeǵaunarito, benamo ǵeri barabore ta ekiraǵiatio, ekirato,

⁸ “Bema tarima ta na bekeamuni, veǵaraǵo verekona raka-vegogonai, gabu namonai asi bono tanu-tari, korana irau vereko ǵorikauna tauna na tarima barana ta bekeaiani ǵesi.

⁹ Benamo ekeamito tarimana beiaǵomani, bekiramuni, ‘Noveǵita, mai vere ǵena tanutanu novaǵa-fakaia.’ Ǵoi tu bemaikamuni, benamo botanu-riǵoni.

¹⁰ Bema ǵoi ǵekeamuni nai, tanutanu tanonai bono tanu. Benamo vereko ǵorikauna tarimana beiaǵomani nai, bekirani, ‘Ǵata, tuǵuna ǵana novaraǵe.’ Benamo ǵoi tu beǵevaǵa-raǵemuni vereko tarimari mabarari na.

¹¹ Korana tu tauǵena eveǵabi-vaisini tarimana tu, Barau na betore-rigoani, a tauǵena evetore-riǵoni tarimana tu, beǵabi-vaisiani.”

¹² Iesu na vereko ǵorikauna tarimana ekiraiaio, ekirato, “Bema ǵoi ǵaniǵani o vereko ta bodabaraiani nai, ǵatamu, tarikakamu, garagaramu o sevimu ai ǵetanuni taǵa tarimari asi bono keari, korana ǵia na ǵoi ma beǵe keamuni, ǵoina keakau beǵe vaǵa-voiani.

¹³ Senaǵi bema vereko ta bodabaraiani nai, gara veǵubu, tauǵaniri rakava, kwaku rakava, mata-bubu tarimari bono keari,

¹⁴ benamo ǵoi tu Barau ǵena vevaǵa-namo boǵoitaǵoani. Moǵoni, ǵia na asi beǵe vaǵa-voimuni, senaǵi veia ǵobuka-iobuka tarimari mase na ma beǵe variǵisi-ǵenoǵoini ǵaronai vau, voimu boa ǵoitaǵoani.”

Barabore - Vereko barana

Mataio 22:1-10

¹⁵ Iesu ǵesi ǵeǵaniǵani-vegogoto tarimana ta na mo guruǵa eseǵaǵiatio nai, ekiraiaio, ekirato, “Barau ǵena Basileiai vereko bea ǵaniani tarimana tu beiakuni.”

¹⁶ Iesu na evaǵa-veseato, ekirato, “Tarima ta na vereko barana ta edabaraiaio, benamo tarimarima gutuma ekearito.

¹⁷ Gani-vereko ǵaronai ǵena vetuǵunaǵi tarimana ta etuǵuato, ekearito tarimari nea kirari, ‘Goiaǵoma, dagara mabarari beǵe rovina-toreri.’

¹⁸ Senaǵi ǵia mabarari ǵekira-sirivaǵito. Ta ekirato, ‘Au tu tano ta bavoia, be aurani bana ǵitaia nai, asi bono baru.’

¹⁹ Ta ma ekirato, ‘Au tu boromakau gabanana (10) bavoiri nai, aiǵoni fokafokai atovonaǵirini, be asi bono baru.’

²⁰ Ta ma ekirato, ‘Au tu inivau mo haveǵaraǵo nai, asi baiaǵosini.’

²¹ Vetuǵunaǵi tarimana eǵenoǵoito, ǵena vere ekira-varaiaio. Benamo numa tarimana ma baruna ǵesi ǵena vetuǵunaǵi tarimana ekiraiaio, ekirato, ‘Noraga-iaǵo vanuǵai, gara veǵubu, tauǵaniri rakava, mata-bubu ema kwaku rakava tarimari bono ǵori-iaǵomari.’

²² Benamo vetuǵunaǵi tarimana eǵenoǵoito, ekirato, ‘Vere o, mani ǵemu ura ǵauveina tu varau haveia, senaǵi numa roǵosi bene vonu.’

²³ Benamo vere na vetuḡunaḡi tarimana ma ekiraiato, ekirato, 'Noiaḡo dabara barai ema vamoka dabarari ai, tarimarima bono kirari, beḡene iaḡoma, be auna numa benema vonu.

²⁴ Au na akiramini, akearito tarimari ta na ḡegu vereko ḡaniḡanina misina ta asi bevaḡa-mamiani.' "

Barabore - Iesu ḡena mero tu vevaḡa-gwaḡiḡi tarimari

Mataio 10:37-38

²⁵ Tarimarima ḡutuma-bara Iesu ḡesi ḡeiaḡoto-ḡoi, benamo eruḡa-kureto, ekirarito, ekirato,

²⁶ "Bema tarima ta eurani, au ḡegu ai bene iaḡoma etoni, senaḡi ḡia tamana ema sinana, ḡaraḡona ema natuna, kakana tarina ema tauḡena ḡena maḡuri maki veuraviniri asi betuḡamaḡi-fitoḡaiani nai, ḡia tu dia au ḡegu mero.

²⁷ Deikara tauḡena ḡena satauro asi beḡwaiani, benamo au murigu na asi berakani, ḡia tu dia au ḡegu mero.

²⁸ Bema ḡomi ta eurani numa ta bene ragaia etoni nai, betanu-tari guineni, numa voina beribaiani, moni beilailani ba asiḡina, ene?

²⁹ Irau ḡauvei besinaiani, benamo asi bevaḡa-koriani, mabarari na beḡe ḡitaiani tarimari na beḡe rikiriki-iaḡiani,

³⁰ beḡe kirani, 'Mai tarima na esinaiato, senaḡi asi evaḡa-koriato.'

³¹ O kamara vanuḡa verena, irau vanuḡa verena ta bene vetari-vunia etoni, benamo asi betanu-tari guineni, sisiba asi bevetauni, ḡena vetari tarimari mabarari 10,000, ema reke ta vere ḡena 20,000, ḡia ḡeiaḡoma-viniani nai, bevaḡa-darereani ba?

³² Bema ḡia asi ilaila nai, ḡia aranai ḡena tarima tari betuḡu-iaḡorini, mo doḡoro barana roḡo fakari manaḡa nugaḡani, maino beḡene ḡabia dabarana beḡea veiiani.

³³ Moḡa ilailana deikara ḡena dagara mabarari asi beiaḡuirini tu asi au ḡegu mero."

Barabore - Damena

Mataio 5:13; Mareko 9:50

³⁴ "Damena tu namo, senaḡi bema damena mamina berekwa-rekwani nai, kamara dabarai mamina ma beḡenoḡoini?

³⁵ ḡia tu asi ilaila tano vaḡa-namona ema asi namo varovaro dagarari ḡesi vaḡa-garari ḡana; moḡa lorina tarima na beḡe fitoḡaiani. Ma seḡana tarimana bene seḡaḡi!"

15

Barabore - Rekwerekwa mamona

Mataio 18:12-14

¹ Takesi gogo tarimari ema vei-rakava tarimari ḡutuma Iesu ḡenai ḡeiaḡoto, ḡena guruḡa beḡene seḡaḡiri ḡana.

² Farisea tarimari ema taravatu ḡevevaḡa-riba iaḡiato-ḡoi tarimari ḡemugumugoto, ḡekirato, "Mai tarima tu rakava tarimari eḡabi-raḡerini ema ḡia ḡesi ḡeḡaniḡani-vegogoni!"

³ Benamo Iesu na mai barabore ḡeri ekiraḡiato, ekirato,

⁴ "Bema ḡomi ta ma ḡena mamoe sinau ta (100), benamo sebona berekwa-rekwani nai, ḡia tu kara beveini? ḡia na 99 tano fakanai beraga-kwanerini, edobito mamona bevetauni mo beḡoitaḡoani.

⁵ Bedoḡariani nai, ḡabanai befaḡa-gabagabaiani ma iakuna ḡesi,

⁶ benamo numa ḡana beiaḡoni. Beraḡasini nai, ḡatana e sevina tarimari bekearini, bekirani, 'Sima iaku-vegogo, korana ḡegu mamoe, edobito dagarana, ma badoḡaria.'

⁷ Au na akiramini, moḡa ilailana rakava tarimana ta ḡena rakava ḡerina evetuḡamaḡi-kureni nai, gubai iaku ema verere tu barego lelevaḡi, a vei-iobukaibuka tarimari 99 ḡeri vei-iobukaibuka dairi ai asi beḡe vetuḡamaḡi-kureni maki bevanaiḡirini."

Barabore - Rekwerekwa monina

⁸ "Bema vavine ta ḡena silva moniri mabarana gabanana (10), benamo sebona bevei-rekwa-rekwani nai, ḡia tu kara beveini? ḡia na lamefa begabuani, numa bedaroani, mo moni sebona bevetau-ḡitakuani mo bea ḡoitaḡoani.

⁹ Bedoḡariani nai, ḡia na ḡatana e sevina tarimari bekearini, bekirani, 'Sima iaku-vegogo, korana tu ḡegu silva monina, erekwa-rekwato dagarana, varau badoḡaria.'

¹⁰ Au na akiramini, rakava tarimana ta ḡena rakava ḡerina evetuḡamaḡi-kureni nai, Barau ḡena aneru moḡesi beḡe iakuni."

Barabore - Rekwerekwa merona

¹¹ Iesu ma ekirato, "Tarima ta natuna ruarua.

¹² Tau muriseina na tamana ekiraiato, ekirato, ‘Tama, ġitana farefare novareri, be au debagu farefareri tu novinigu.’ Benamo farefare mabarari natuna ruarua fakari ai evererito.

¹³ Garo asi vovoka ġeiaġoto nuġanai, tau muriseina ġena farefare evaġa-vegogoto, benamo tano manaġa ġana erakato. Monai ġena farefare ea ġere-iaġirito.

¹⁴ Ġena farefare mabarari evaġa-koririto murinai, mo tano ai doġe barego eġorato. Ġia varau asi-ġena, asi-ġana.

¹⁵ Benamo eiaġoto, mo tanobara tarimana ta ġenai ġauvei ea vetauto, benamo ġia na etuġuato ġena tano ai bai bene ġitaġauri ġana.

¹⁶ Ġia evito-rakavaiato nai, bai ġari ġaniġani bene ġaniri etato, senaġi mo ġaniġani maki ta na asi eviniato.

¹⁷ Benamo ea vetuġamaġi-kureto, ekirato, ‘Tamagu ġena ġauvei tarimari tu vovoka, ema ġari ġaniġani maki ġutuma, senaġi au tu mainai vitona evaġiguni.

¹⁸ Naġenoġoi, tamagu ġenai niaġo, benamo bana kiraia: Tama, Barau ġoiranai ema ġoi ġoiramu ai avei-rakavato.

¹⁹ Au tu asi ilaila ġoi natumu ai ma bono kiraġigu; senaġi anoġimuni, ġemu vetuġunaġi tarimanai bono vaġa-iaġoggu, banasi.’

²⁰ Benamo evariġisito, tamana ġenai eiaġoto.

Gabu manaġa na roġo eiaġomato-ġoi nai, tamana na varau eġita-doġariato, benamo evetuġa-rakavaiato, benamo eraga-iaġoto, ea faġa-maġuriato, everauato.

²¹ Benamo natuna na ekiraiato, ekirato, ‘Tama, au tu Barau ġoiranai ema ġoi ġoiramu ai ma ġegu vei-rakava. Au tu asi ilaila ġoi natumu ai bono kiraġigu.’

²² Senaġi tamana na ġena vetuġunaġi tarimari evaġa-guruġarito, ekirato, ‘Ġoraga-vei! Dabuġa namo vedaureana ta ġoġwa-iaġomaia, ġoma vaġa-riġoa. Rini ta didinai ġoma dori-toġaia, ema tamaka maki kwakunai ġoma toreri.

²³ Ema boromakau natuna ma monana ġoġwa-iaġomaia, ġovaġia, benamo bisini ġania e bisini verere-vegogo.

²⁴ Korana natugu maiġa emaseto, senaġi ma bemaġuri-ġenoġoi; erekwa-rekwato, senaġi ma bama doġaria!’ Benamo ġia ġeverere-vegogoto.

²⁵ Natuna tau guinena tu vamokai. Vamoka na eġenoġoito, numa eiaġo-viniato-ġoi nai, mari e bara gururi eseġaġirito.

²⁶ Benamo vetuġunaġi tarimana ta ekeaiato, mo guru korana evedanaġi-iaġiato.

²⁷ Vetuġunaġi tarimana na evaġa-veaseato, ekirato, ‘Ġoi tarimu beġenoġoi, tamamu na ma namona e ma maġurina ġesi bema doġaria lorinai, ġia na vetuġunaġi tarimari bevaġa-gurugari, boromakau natuna ma monana ġesi beġe vaġia.’

²⁸ Tau guinena ebaru-rakavato, numai asi eraka-toġato, benamo tamana eraka-rosito, enoġiato neraka-toġa ġana.

²⁹ Senaġi ġia na tamana evaġa-veaseato, ekirato, ‘Noġitaia, au tu laġani ġutuma ġoi rekemu ai atanuni, vetuġunaġimu aiago-vinini, ġemu ura mabarana akorana-iaġirini, ġemu vevaġa-naġi ta asi afitoġaiato, senaġi ġoi na nanigosi natuna ta maki asi oviniguni au ma ġatagu ġesi vaġa-iaku-iaġima ġana.

³⁰ A mai natumu mata-boraġa vavineri ġeri ai ġemu farefare mabarari bea vaġa-koriri; bea ġenoġoi nai tu, ġoi na tu boromakau natuna mona mase bovaġia ġia ġana!’

³¹ Tamana evaġa-veseto, ekirato, ‘Natugu, ġoi tu au sevigu ai otanu-vanaġi vanaġini, au ġegu dagara mabarari tu ġoi ġemu.

³² A toma ġita si-iaku, bisini verere, korana tarimu emaseto, senaġi bemaġuri; erekwa-rekwato, senaġi ma bitama doġaria.’ ”

16

Vetuġunaġi tarimana ġena tuġamaġi-iobuka

¹ Iesu na ġena mero evaġa-guruġarito, ekirato, ‘Farefare e moni vovoka tarimana ta etanuto-ġoi. Benamo tarima kotari na farefare vovoka tarimana ġekira-varaiato, ġia ġena farefare ġitaġauna tarimana na ġena farefare eġere-iaġirini.

² Moġa lorinai taġa tarimana na ekeatoġaiato, benamo ekirato, ‘Ġoi varimu baseġaġia moġoni ba? Au ġegu ġauvei oġwa-raġaiato nai, novevarifu-iaġia, korana initoma ġoi tu dia au ġegu farefare narinarina tarimana.’

³ Benamo mo farefare ġitaġauna tarimana etuġamaġito, ekirato, ‘Au ġegu baregona na toma evaġa-dokoguni ġegu ġauvei na. Kara baveini? Au tu asi gwadagu baiaraġani ema noġinoġi au ġegu ai tu maiaka dagarana.’

⁴ Etuġamaġito-ġoi nuġanai, ekirato, ‘Mai bama riba kara baveiani! Benamo bevaġa-dokoguni nai, ġatagu namori ġutuma na beġe ġabi-raġeguni ġeri numai.’

⁵ Moġa lorinai ġena baregona ġenai ġeġabi-toreto tarimari mabarari ekea-vegogorito. Benamo ta edanaġiato, ekirato, 'Goi ġemu ġabitore tu vira?'

⁶ Evaġa-veseto, ekirato, 'Olive diġana kavaburi sinau imaima toitoi (800).' Benamo farefare ġitaġauna tarimana na ekiraiato, 'Ġemu ġabitore fefana maiġa, noraga-tanutari, benamo sinau vasivasi (400) notorea.'

⁷ Benamo ta ma edanaġiato, ekirato, 'Goi ġemu ġabitore tu vira?' Ġia ekirato, 'Widi fuseri mabarari 1,000.' Benamo farefare ġitaġauna tarimana na ekiraiato, 'Ġemu ġabitore fefana maiġa, noġabia, benamo sinau imaima toitoi (800) notorea.'

⁸ Dokonai mo farefare narinarina tarimana rakavana ġena baregona na evaġa-raġeato, korana ġena tuġamaġi-iobuka dainai. Korana tanobara tarimari tu ġeiaunega-lelevaġito ġeri tanu-vegogo ai, a mamai ġetanuni tarimari tu asiġina.

⁹ Au na akiramini, mai tanobara farefareri e moniri rakavari ġerina tarimarima tu ġomi gatami ai boġono vaġa-iaġori, korana ġemi moni bea korini nai, ġomi tu beġe tanu-vanaġi vanaġini numari ai beġene ġabi-raġemi gubai.

¹⁰ Deikara dagara misina ġauvei-iaġina ma ribana nai, dagara baregona maki ġauvei-iaġina ma ribana; ema deikara dagara keinai beġofaġofani nai, dagara baregonai maki beġofaġofani.

¹¹ Bema ġomi tanobara farefareri e moniri ġauvei-iaġiri asi ribami nai, Barau na kamasi farefare korikoriri gubai bevinimini boġo ġauvei-iaġirini?

¹² Ema bema ġomi tarima ta ġena farefare asi boġo ġitaġau-ginikaurini nai, Barau na ġomi ġemi farefare maki asi bevinimini?

¹³ Vetuġunaġi tarimana na baregona ruarua vetuġunaġiri asi beiaġo-vinirini riba. Korana ġia na ta tu asi beura-viniani, a ta tu beura-viniani; ta bevaġa-mogoniani, a ta tu beġofaġofa-iaġiani. Ġomi maki Barau ema moni nega sebonai vetuġunaġiri asi boġo iaġo-vinirini, asiġina-ġinavaġi."

Iesu ġena guruġa kota

¹⁴ Farisea tarimari tu moni ġeuravini-baregorito-ġoi. Iesu ġena guruġa mabarana ġeseġaġiato nai, ġerikiriki-iaġiato.

¹⁵ Iesu na evaġa-guruġarito, ekirato, "Ġomi tu tarimarima ġoirari ai ġovekiraġini, senaġi Barau tu nuġami ribana. Tarimarima na ġevaġa-raġerini dagarari Barau na tu asi eura-vinirini, etuġamaġi-fitoġarin.

¹⁶ Mose ġena taravatu ema peroveta tarimari ġeri guruġa ġetanuto-ġoi eiaġomato mo, Ioane Babatiso ġena negai. Monana Barau ġena Basileia varina ġeġobata-iaġiani nai, tarimarima mabarari ġevebibi-toġani beġene raka-toġa ġana.

¹⁷ Guba ema tanobara beġe rekwa-rekwani tu ma dabarana, senaġi taravatu ġena toutou ta maki asi berekwa-rekwani.

¹⁸ Tau ta na ġaraġona belaiani, benamo vavine ta ma beġaraġoani nai, ġia mo tu veġura-vanaġi veġana beveiani; ma tarima boruna ta na mo tau na elaiato vavinena moġa ma beġaraġoani nai, ġia maki beveġura-vanaġini."

Farefare e moni vovoka tarimana ema Lasaro

¹⁹ "Farefare e moni vovoka tarimana ta etanuto-ġoi. Ġia tu dabuġa namori moġo eveito-ġoi e ġaro mabarari ai everereto-ġoi ema ġaniġani namona moġo eġanito-ġoi.

²⁰ Ġena numa ġatama bokanai tarima ta asi-ġena ema asi-ġana arana Lasaro egenataġoto-ġoi. Ġia tu kefina mabarana lakufodo.

²¹ Eura-baregoto-ġoi taġa tarimana ġana ġaniġani momori bene ġani. Kwaiva maki ġeiaġoto, ġia manuġana ġeiamuserito-ġoi.

²² Asi ġena-ġana tarimana emaseto, benamo aneru na Aberahamo sevina ġana ġeġwa-iaġoato. Farefare vovoka tarimana ma emaseto, benamo ġeguriato.

²³ Mase gabunai (o Hades) midigu eġanito-ġoi nai, eboġe-raġeto, manaġai Aberahamo eġitaiato, ema Lasaro maki ġia ġesi.

²⁴ Benamo ekeato, ekirato, 'Aberahamo, tamagu o, novetuġagu, mani Lasaro notuġua, ġimana didina nanu ai nea duġi-reia, be meagu moġo nama vaġa-ġavea, korana tu au mai karava morenai midigu vovoka aġanini.'

²⁵ Senaġi Aberahamo ekirato, 'Natugu o, notuġamaġia, ġoi omaġurito-ġoi ġarori ai dagara namori oġabito-ġoi, a Lasaro tu dagara rakavari eġabito-ġoi. Senaġi toma ġia tu everereni, a ġoi tu midigu oġanini.

²⁶ Ġita fakarai maki koufa bara ta etanuni, moġa lorinai maina na tarima ta maniġana asi beiaġosini, ema manina na maki ta maiġana asi beiaġomani.'

²⁷ Benamo farefare vovoka tarimana ekirato, 'Tamagu o, anoġimuni, Lasaro notuġua tamagu ġena numa ġana.

²⁸ Au tarigu merori tu imaima. Ĝia na bene vaĝa-guruĝari, mai midigu ĝani gabuna ĝana beĝe iaĝomani garina.’

²⁹ Senaĝi Aberahamo ekirato, ‘Mose ema peroveta tarimari tu ĝia ĝesi, be garori neĝi beĝene seĝaĝiri.’

³⁰ Taĝa tarimana ekirato, ‘Asiĝi, tamagu! Senaĝi bema emaseto tarimana ta beiaĝoni nai, ĝia tu ĝeri rakava ĝerina beĝe vetuĝamaĝi-kureni.’

³¹ Aberahamo ekirato, ‘Bema Mose ĝena taravatu ema peroveta tarimari ĝeri ĝuruĝa asi beĝe seĝaĝirini nai, mase na tarima ta bere varigiĝi-ĝenoĝoi maki asi ĝere seĝaĝi-vinia.’ ”

17

Vei-rakava ema rakava tuĝamaĝi-fitoĝari

¹ Iesu na ĝena mero evaĝa-guruĝarito, ekirato, “Tarimarima vaĝa-ketori dagarari roĝo beĝe ĝorani, senaĝi bevaĝa-ĝorarini tarimana tu vetuĝana kekei.

² Ĝia tu bere namo fore baregona ta ĝaiĝonai ĝere baru-kaua, benamo davarai ĝere flu-reia, korana mai misimisiri ta rakavai beĝofa-toĝaiani garina.

³ Moĝesi nai lorimi boĝono vetore! Bema ĝoi tarikakamu veiĝa rakavari eveini nai, bono kira-ĝoia, ema ĝena rakava ĝerina bevetuĝamaĝi-kureni nai, ĝena rakava bono tuĝamaĝi-fitoĝari.

⁴ Bema ĝia na ĝaro ta vaĝa-imaima ruarua (7) bevaĝa-rakavamuni, ema vaĝa-imaima ruarua (7) beĝenoĝoini ĝemu ai, bekirani, ‘Bavetuĝamaĝi-kure,’ betoni nai, ĝoi na ĝena rakava bono tuĝamaĝi-fitoĝari.”

Veĝabidadama

⁵ Iesu ĝena apostolo na Vereĝauka ĝevaĝa-guruĝaiato, ĝekirato, “Ĝema veĝabidadama novaĝa-baregori!”

⁶ Vereĝauka na evaĝa-veserito, ekirato, “Bema ĝomi ĝemi veĝabidadama tu mastadi ĝauna ĝutuna ĝena barego kavana, misina korokoro moĝo, senaĝi ĝomi na mai ĝau baregona o malberi ĝauna boĝo kiraiani, ‘Noveraĝa-vaĝi, be davarai noa vevaro!’ boĝo toni, benamo garomi tu beseĝaĝiani.”

Vetuĝunaĝi tarimana ĝena ĝauvei

⁷ “Bema ĝomi ta ĝemu vetuĝunaĝi tarimana tano befokani o mamoe beĝita-ĝaurini murinai, ĝauvei gabuna na numa ĝana beiaĝomani nai, ĝoi na bokiraiani, ‘Noraka-ĝariĝari, be noma ĝaniĝani,’ botoni ba?”

⁸ Asiĝina, senaĝi ĝoi bokirani, ‘Ĝagu ĝaniĝani novei, ema bono vedabuĝa, be bonoma nari-ĝaugu; au bana ĝaniĝani ema bana niuniu-ĝosi murinai vau, ĝoi ma bono ĝaniĝani ema bono niuniu.’

⁹ Ba vetuĝunaĝi tarimana ĝena seĝaĝi ai dainai bevaĝa-namoani? Asiĝina.

¹⁰ Gomi maki moĝesi; bema Barau na bekiramini ĝauveiri mabarari boĝo veirini nai, boĝo kirani, ‘Ĝita vetuĝunaĝi tarimara ĝera ĝauvei.’ ”

Iesu na lepera tarimari gabanana (10) evaĝa-namorito

¹¹ Iesu Jerusalema eiāĝo-viniato-ĝoi nai, Samaria ema Galilea tanori vefakari na erakavanaĝito.

¹² Vanuĝa tai eraka-toĝato, benamo lepera tarimari gabanana (10) ĝesi ĝevedoĝarito. Roĝo manaĝai ĝeruĝa-tarito,

¹³ ĝia ĝekeato, ĝekirato, “Iesu! Ĝema Vereĝauka! Novetuĝama!”

¹⁴ Iesu na eĝitarito, benamo evaĝa-guruĝarito, ekirato, “Rubu Veaĝa vereri ĝeri ai ĝoiaĝo, be beĝenea ĝitami.” Benamo ĝeiaĝoto-ĝoi nuĝanai, tauganiri ĝeveiarevato, ĝenamoto.

¹⁵ Tarima sebona moĝo ĝia fakari ai kefina eĝitaiato enamoto, benamo eĝenoĝoi-iaĝoto, Barau evonevone-raĝe viniato.

¹⁶ Benamo Iesu kwakuna koranai evetui-tarito, evaĝa-namoato. Ĝia tu Samaria tarimana.

¹⁷ Iesu ekirato, “Tarima mabarari tu gabanana (10) beĝe namo. Imaima vasivasi (9) tu aiĝeri?”

¹⁸ Kara dainai mai irau gabu tarimana ĝereĝana moĝo beĝenoĝoi-iaĝoma, Barau bema vaĝa-raĝea?”

¹⁹ Benamo Iesu na ekiraĝato, ekirato, “Novariĝisi, noiaĝo, ĝemu veĝabi-dadama na bevaĝa-maĝurimu.”

*Barau ĝena Basileia beiaĝomani guruĝari
Mataio 24:23-28; 24:37-41*

²⁰ Farisea tarimari kota na Iesu ġedanaġiato, Barau ġena Basileia tu aitoma beiaġomani. Ġia na evaġa-veserito, ekirato, “Barau ġena Basileia beiaġomani tu asi boġo ġitaiani dagarana.

²¹ Tarima ta asi bekirani, ‘Noġitaia, iniġa!’ o ‘Iomogħa!’; korana Barau ġena Basileia tu ġomi fakami ai maniġa.”

²² Benamo ġia na ġena mero evaġa-guruġarito, ekirato, “Ġaro ta beraġasini nai, ġomi ġemi ura baregona tu Tarimarima Natuna ġena ġaro sebona ta moġo boġono ġitaia, senaġi asi boġo ġitaiani.

²³ Kotari na beġe kiramini, ‘Tarimana iomogħa!’ o ‘Tarimana maġia!’ beġe toni. Senaġi asi boġono iaġo, murinai asi boġono raka.

²⁴ Korana kiriku eragani nai, morena gubai reketa-reketa ġana eiaġoni kavana, Tarimarima Natuna ġena ġaro nuġanai maki moġesi beveini.

²⁵ Senaġi ġia midigumidigu vovoka roġo beġani-guineni, ema toma ġuru tarimari na roġo beġe kira-fitoġaiani.

²⁶ Tarimarima Natuna beiaġomani ġaronai tu Noa ġena negai kavana.

²⁷ Tarimarima mabarari ġeġaniġanito-ġoi, ġeniuniuto-ġoi, tau e vavine ġeveġaraġoto-ġoi, eiaġomato mo, Noa ġena lagatoġi ai eraka-toġato ġaronai, benamo ġutuġutu na mabarari eġutu-maserito.

²⁸ Lota ġena negai maki moġesi moġo. Ġeġaniġanito-ġoi, ġeniuniuto-ġoi, ġeivoivoito-ġoi, ġevaro-varoto-ġoi, numa ġeragato-ġoi.

²⁹ Senaġi Lota Sodoma eraga-kwaneato ġaronai, karava ma salfa o fore seġukari ġesi guba na ġeketo-firiġoto, mabarari evaġi-masemaserito.

³⁰ Tarimarima Natuna befoforini nai, maki moġesina beġorani.

³¹ Mo ġaro ai, bema tarima ta tu numa tuġunai etanu-taġoni, numai asi ma bene raka-toġa ġena farefare bene ġabiri. Ema bema tarima ta tu vamokai nai, ġia ġena numa ġana asi ma bene ġenoġoi ġena farefare ġabiġabiri.

³² Lota ġaraġona boġono tuġamaġia!

³³ Deikara tauġena moġo ġena maġuri lorina etoreani tarimana, ġena maġuri beleaiani; a ġena maġuri eleaiani tarimana na maġuri bedoġariani.

³⁴ Akiramini, mo boġi ai tarima ruarua geda sebona beġe genani nuġanai, ta tu Barau na beġabi-vaġiani, (korana beġabi-raġeani nai), a ta tu betanuni, (korana bekira-fitoġaiani nai).

³⁵ Vavine ruarua widi giro dagarana beġe giro-vegogoani nai, ta tu beġabi-vaġiani, a ta tu betanuni. [³⁶ Tarima ruarua vamokai beġe ġauveini nai, ta tu beġabi-vaġiani, a ta tu betanuni.]”

³⁷ Iesu ġena mero na ġedanaġiato, ġekirato, “Vereġauka o, ainai beġorani?” Iesu evaġa-veseto, ekirato, “Mase tauġanina etanuni gabunai, ġaio maki monai beġe vegogoni, (be ġia na beġe vaġa-foforiani).”

18

Barabore - Vabu ema Kota esegāġini tarimana

¹ Benamo Iesu na ġena mero ġeri barabore ta ekiraġiato. Mo barabore na bene vaġa-ribari, be vanaġivanaġi beġene ġauġau ema asi beġene moiramoiira ġana.

² Maġesi ekirato, “Vanuġa tai Kota esegāġini tarimana ta etanuto-ġoi. Ġia tu Barau garina asi eveito-ġoi, ema tarimarima maki asi egubakaurito-ġoi.

³ Mo vanuġa vabuna ta mai Kota esegāġini tarimana ġenai eiaġo-ġenoġoi ġenoġoito-ġoi, ġena maoro evevaġa-doġe-gani viniato-ġoi ema ekirato-ġoi, ‘Novaġa-kavaġu, be ġevaġa-rakavaguni tarimari davari noviniri!’

⁴ Nega emanaġato nuġanai, Kota esegāġini tarimana na vabu ġena ura veġana asi eveiato. Senaġi ġaro ta ġia tauġena evetuġamaġito, ekirato, ‘Au tu Barau garina asi aveini ema tarimarima maki asi agubakaurini,

⁵ senaġi dagara sebona tu, mai vabu na au evaġa-doġe-ganiguni nai, ġena ura veġana naveia, korana vanaġivanaġi beiaġomani, benamo au bevaġa-doġe-gani iaġoguni ġesi.”

⁶ Vereġauka ma ekirato, “Mo Kota esegāġini tarimana kara etato, ġoseġoġia.

⁷ Be kamasi? Barau na eviriġirito tarimari, ġia ġenai boġi ema laġani mabarari ai ġetaġitaġini ema ġenoġinoġi-viniani tarimari, vevaġa-maoro nuġanai tu asi bevaġa-kavarini? Nevaġa-kavari ġana nai tu bekwaiboni?

⁸ Au na akiramini, ġeri maoro ai ġia na bevaġa-kava ġariġaririni. Senaġi Tarimarima Natuna ma beiaġomani nai, ġia veġabi-dadama tanobarai bedoġariani ba asiġina?”

Farisea tarimana ema takesi gogo tarimana

⁹ Tarima kotari ġeri tuġamaġi ġia tu vei-iobukaiobuka, a tarimarima mabarari tu vei-rakava tarimari. Iesu na mai tarima ġeri barabore ekiraġiato, ekirato,

¹⁰ “Tarima ruarua Rubu Veaġa ġana ġeiaġoto, ġea ġuriġurito; ta tu Farisea tarimana, a ta tu takesi gogo tarimana.

¹¹ Farisea tarimana ġereġana reke tai eruġato, benamo eġauġauto, ekirato, ‘Barau o, avaġa-namomuni, korana au tu dia tarima mabarari kavana, be seġafore tarimari, vei ġeġeva-ġeġeva tarimari, veġura-vanaġi tarimari. Avaġa-namomuni, korana au tu dia iomo takesi gogo tarimana kavana.

¹² Fura o wiki ta nuġanai au tu ġaro ruarua aġani-veaġani, ema adoġarini dagarari karava gabanana (10) aveirini, benamo karava sebona tu goi avinimuni.’

¹³ Senaġi takesi gogo tarimana tu manaġai eruġato, asi eboġe-raġeto gubai, kobana ebotaġato, ekirato, ‘Barau o, au tu rakava tarimagu, noma vetuġagu!’

¹⁴ Au na akiramini, takesi gogo tarimana tu Barau na evaġa-moġonġato, ma vei-iobukaiobukana ġesi vanuġa ġana eġenoġoito, a Farisea tarimana tu asiġina. Korana tauġena moġo eveġabi-varaġeni tarimana tu, Barau na bevaġa-variġoani, a tauġena evevaġa-variġoni tarimana tu, bevaġa-varaġeani.”

Iesu na mero misiri evaġa-namorito

Mataio 19:13-15; Mareko 10:13-16

¹⁵ Tarima kotari mero misimisiri Iesu ġenai ġeġwa-iaġorito, ġimana iatari ai bene toreri ġana. ġena mero na ġeġitarito, benamo ġekira-ġoirito.

¹⁶ Senaġi Iesu na mero misiri ekea-iaġomarito, ġena mero ekirarito, ekirato, “Mani mero misiri au ġegu ai ġeiaġoma, asi ġolairi, korana maniġesina kavana tu Barau ġena Basileia tarimari.

¹⁷ Moġoni au na ġomi akiramini, dei na Barau ġena Basileia asi beġabi-raġeani mero misina kavana, Basileia ai beraka-toġani.”

Farefare vovoka tarimana

Mataio 19:16-30; Mareko 10:17-31

¹⁸ Iuda tarimari ġeri vere tauna ta na Iesu edanaġiato, ekirato, “Vevaġa-riba taumu namona, au kara baveini vau, maġuri vanaġivanaġi badoġariani?”

¹⁹ Iesu na evaġa-veseato, ekirato, “Goi karase nai au namogu okiraġini? Tarima ta asi namo, Barau moġo ġereġana.

²⁰ Taravatu ma ribamu, ‘Asi bono veġura-vanaġi, asi bono vaġivaġi, asi bono lema, asi bono vevaġa-daġa ġofaġofa, tamamu sinamu bono gubakauri.’”

²¹ Mo tarima ekirato, “Au keġu na beiaġoma toma mani taravatu mabarari akorana-iaġirini.”

²² Iesu na mo guruġa eseġaġiato, benamo ekiraiato, “Goi tu dagara sebonai moġo orabuni. ġemu farefare mabarari novoivoi-iaġiri, moniri tu asi-ġeri ema asi-ġari tarimari bono viniri, benamo gubai goi ġemu farefare badoġaririni. Moġesi boveini vau, au murigu ai bonoma raka.”

²³ Mo guruġa eseġaġiato nai, nuġana emeto-rakavato, korana ġia tu farefare ġutuma tarimana.

²⁴ Iesu na eġitaiato, benamo ekiraiato, ekirato, “Farefare vovoka tarimari Barau ġena Basileia ġeri rakatoġa tu gwaġiġi rakava!

²⁵ Kamela nila kadarena na ġena rakatoġa tu kotuna gwaġiġi, a farefare vovoka tarimana Barau ġena Basileia rakatoġana ġia ġenai tu gwaġiġi rakava.”

²⁶ Tarimarima na mai guruġa ġeseġaġiato, benamo Iesu ġedanaġiato, ġekirato, “Be, deikarari vau maġuri beġe doġariani?”

²⁷ Iesu evaġa-veseto, ekirato, “Tarimarima na asi beġe veirini riba dagarari tu Barau na beveirini riba.”

²⁸ Petero na ekiraiato, ekirato, “Goi ribamu, ġai tu ġema dagara mabarari ġaraga-kwanerito, murimu ai ġarakani.”

²⁹ Iesu na ekirarito, “Moġoni akiramini, tarima ta ġena numa eraga-kwaneato, o ġaraġona, kakana, tarina, tamana, sinana, natuna Barau ġena Basileia uranai,

³⁰ ġia na mai maġuri nuġanai dagara ġutuma beġoitaġoni, ema mo negai vau maġuri vanagivanaġi badoġariani.”

Iesu na ġena mase ma ekiraġi-foforiato

Mataio 20:17-19; Mareko 10:32-34

³¹ Iesu na ġena mero gabanana ruarua (12) eġori-veġitarito, benamo ekirarito, ekirato, “Goġeġaġi! ġita tu Ierusalem ġana tavaragani. Monai peroveta tauri na Tarimarima Natuna varina ġetore-ġuinetto guruġari aniri mabarari beġe moġonini.

³² Irau bese (o Roma) tarimari ġimari ai beġe toreani. Ġia na beġe vaseva vaseva-iaġiani, beġe rikiriki-iaġiani e beġe kanunu-kanunuani.

³³ Beġe botaliansi e beġe vaġi-maseani, senaġi ġaro vaġa-toitoinai vau ma bevarigisi-ġenoġoini.”

³⁴ Iesu ġena mero mo guruġa tauna asi ġeġoitaġoato. Guruġa anina ġia ġeri ai tu vekuretoġa. Ġia asi ribari Iesu na kara ekiraġiato.

Iesu na mata-bubu tauna evaġa-namoato

Mataio 20:29-34; Mareko 10:46-52

³⁵ Iesu tu Ieriko ekavinaġiato nai, mata-bubu tauna ta dabara rikinai etanu-taġoto-ġoi, enoġinoġito-ġoi.

³⁶ Tarimarima ġutuma dabaraġi ġeraka-vanaġito eseġaġito, benamo evedanaġito, “Mai guru anina tu kara?”

³⁷ Ġekirato, “Iesu, Nasareta tauna, eraka-vanaġini.”

³⁸ Benamo ekea-fouto, ekirato, “Iesu o, Davida natuna, au novetuġagu!”

³⁹ Ġoirai ġerakato tarimari na ġekira-ġoiato, senaġi ġia ekea-ġigiraġe ġigiraġeto-ġoi, “Davida Natuna o, au novetuġagu!”

⁴⁰ Iesu eruġa-tarito, benamo ekirato, “Ġoġori-iaġomaia!” Ġia eiaġomato, benamo Iesu na edanaġiato, ekirato,

⁴¹ “Kara ourani ġemu ai naveia otoni?” Ġia evaġa-veseto, ekirato, “Vereġauka o, matagu noma vaġa-iaġaia.”

⁴² Iesu ekirato, “Be, matamu nenamo, ġemu veġabidadama na bevaġa-namomu.”

⁴³ Vaġa-sebo matana enamoto, eboġeboġe-ġinikauto, Iesu murinai erakato, Barau evaġa-raġeato. Mo veġa ġeġitaġato tarimari mabarari na maki Barau ġevaġa-raġeato.

19

Iesu ema Sagaio

¹ Iesu Ieriko ai eraġasito, benamo vanuġa nuġana na eraka-iaġoto-ġoi.

² Monai tu takesi gogo tarimari ġeri vere ta arana Sagaio; ġia tu moni ema farefare vovoka tarimana.

³ Ġia ġena ura tu Iesu neġita-vetoġaia ġia tu dei, senaġi tarimarima ġutuma ema ġia tu tau kubina nai, neġitaia ġana egera-kavato.

⁴ Moġa lorinai eraga-guine-iaġoto, sikamoa ġauna tai eraġeto, Iesu monana beraka-vanaġini nai, bene ġitaia ġana.

⁵ Iesu mo gabu ai eraġasito, eboġe-raġeto, eġitaġiato, benamo ekiraiato, “Sagaio, norakariġo-ragaraga, korana au toma tu ġoi ġemu numai batanuni bene.”

⁶ Benamo Sagaio eraga-rakarigoto, ma iakuna ġesi Iesu eġori-iaġoato ġena numa ġana.

⁷ Ġeġitaġato tarimari mabarari ġemugumuguto, ġekirato, “Mai tau tu rakava tarimana, ġena numai ea tanuni.”

⁸ Sagaio eruġa-vaisito, Vereġauka evaġa-guruġaġiato, ekirato, “Vereġauka, noseġaġi! Ġegu farefare reke-ta tu gara veġubu tarimari bavinirini, ema ġena farefare aġabikavaġiato tarimana tu, nega vaġa-vasivasi bavini-ġenoġoiani.”

⁹ Iesu na ekiraiato, ekirato, “Toma vevaġa-maġuri tu mai numai bema raġasi, korana mai tarima maki Aberahamo natuna.

¹⁰ Korana Tarimarima Natuna tu rekwarkwa tarimari vetauvetauri ema bene vaġa-maġuriri ġana eiaġomato.”

Barabore - Vetuġunaġi tarimari moni ġenarito

Mataio 25:14-30

¹¹ Mabarari ġeseġaġito-ġoi nuġanai, Iesu na ġeri barabore ta ekiraġiato. Korana ġia tu Ierusalem ekavi-naġiato nai, ġia maboru ġekirato, Barau ġena Basileia tu mo negai befororini.

¹² Benamo ġia ekirato, “Dagi baregona tarimana ta gabu manaġana ġana eiaġoto, kini o vere dagina bene ġabia vau, ma bene ġenoġoi ġana.

¹³ Roġosi bere raka nai, ġena vetuġunaġi tarimari gabanana (10) ekea-iaġomarito, golo moniri ġia tata sebori-sebori evinirito, benamo ekirarito, ekirato, ‘Au murigu ai boġono ġauvei-iaġiri, be moni boruri tari ma boġono doġari.’

¹⁴ Senaġi ġena tanobara tarimari na asi ġeura-viniato-ġoi nai, murina na guruġa ġetuġuto, ġekirato, ‘Ġai asi ġaurani mai tarima ġai ġema vere ai bene iaġo.’

¹⁵ Senaġi mo tarima na kini dagina ġeviniato murinai, eġenoġoi-iaġomato. Benamo ġena vetuġunaġi tarimari ekea-iaġomarito, beġene vaġa-ribaia, moni boruri vira ġia tata ġedogarito.

¹⁶ Tarima giniguinena eiāgomato, benamo ekirato, 'Veregauka, golo monina sebona oviniguto nuḡanaī, au na tu moni gabanana (10) ma adoḡaririto.'

¹⁷ Ġia na evaḡa-namoato, ekirato, 'Ġoi tu vetuḡunaḡi taumu namona! Dagara misiri oḡauvei-iaḡi ginikaurini nai, au na vanuḡa mabarari gabanana (10) avinimuni, ḡoi na boḡita-ḡaurini.'

¹⁸ Vaḡa-ruaruana eiāgomato, benamo ekirato, 'Veregauka, sebona oviniguto nuḡanaī, au na moni imaima ma adoḡaririto.'

¹⁹ Gena vere na ekiraiato, 'Ġoi tu vanuḡa imaima boḡita-ḡaurini.'

²⁰ Vetuḡunaḡi tarimana ta ma eiāgomato, benamo ekirato, 'Veregauka o, ḡoi ḡemu moni sebona tu iniḡa, au na muko ai akumuato, akure-toḡaiato.

²¹ Au tu ḡoi garimu aveito, korana ḡoi tu asi vegubakau taumu. Tarima ḡeri dagara oḡabirini, ema dia ḡoi na ovarorito dagarari obasirini e okwarini.'

²² Gena vere na ekiraiato, 'Ġoi tu vetuḡunaḡi tarimana rakavana! Tauḡemu ḡemu guruḡa na havevaḡa-maoro vinimuni. Ġoi ribamu au tu asi vegubakau taugu, dia au ḡegu dagarari aḡabirini, ema dia avaroto dagarari abasirini.

²³ Be, karase nai ḡegu moni tu banikai asi otoreato? Benamo au bara ḡenoḡoi nai tu, ma torekaua o interestina ḡesi bara doḡaria.'

²⁴ Benamo monai ḡeruḡa-taḡoto-ḡoi tarimari ekirarito, ekirato, 'Mani moni sebona ḡenai manigā goḡabia, moni gabanana (10) tarimana ḡovinia.'

²⁵ Senaḡi ḡia na ḡekiraiato, 'Veregauka, ḡia ḡena moni tu varau 10 beḡabia.'

²⁶ Ġia evaḡa-veseto, ekirato, 'Au na akiramini, ma ḡena-ḡana tarimana tu ḡutumari ma baviniani, a asi ḡena-ḡana tarimana tu, ḡenai misina maki baḡabi-vaḡiani.

²⁷ Senaḡi au iḡebaru-viniguni tarimari, asi ḡeurato au ḡia bana guine-iaḡiri ḡetato tarimari, goḡori-iaḡomari, au ḡoiragu ai ḡoma-vaḡi-maseri!"

*Iesu ḡena rakatoḡa Ierusalemāi ḡevonevone-raḡe viniato
Mataio 21:1-11; Mareko 11:1-11; Ioane 12:12-19*

²⁸ Eguruḡa-ḡosito vau, Iesu eraka-guineto, Ieruselema ḡana evaraḡeto.

²⁹ Betefage e Betania ekavināḡirito-ḡoi nai, Olive Gorona rekenai, benamo Iesu na ḡena mero ruarua etuḡu-guinerito, ekirarito, ekirato,

³⁰ "Goira vanuḡana ḡana goiāḡo. Boḡo raḡasini nai, doniki natuna ta barutari boḡo ḡitaiani, iatanai tarima ta roḡosi bene raḡe. Boḡono ruḡaia, benamo boḡono ḡori-iaḡomaia.

³¹ Bema tarima ta na bedanaḡimini, bekirani, 'Karase nai ḡoruḡaiani?' betoni nai, ḡomi boḡono kira, 'Veregauka na eura-viniani.' "

³² Benamo tauri ruarua ḡeiāḡoto, Iesu na ekira-vararito ilailanai ḡedoḡariato.

³³ Doniki natuna ḡeruḡaiato-ḡoi nuḡanaī, doniki biaguri na ḡedanaḡirito, "Ġomi tu karase mani doniki ḡoruḡaiani?"

³⁴ Ġevaḡa-veseto, ḡekirato, "Veregauka na eura-viniani."

³⁵ Benamo Iesu ḡenai ḡeḡori-iaḡoato. Ġeri dabuḡa barari doniki doḡenai ḡeiavarito vau, Iesu ḡevaḡa-tanu-kaurato.

³⁶ Iesu eiāḡoto-ḡoi nai, tarimarima ḡeri dabuḡa barari dabarai ḡeiavarito.

³⁷ Ieruselema varau ekavināḡiato, Olive Gorona na evariḡoto-ḡoi, benamo Iesu ḡena mero ḡutuma lelevaḡi ḡeiakuto, Barau ḡevonevone-raḡe viniato, korana nuḡa-farevaḡi veigari ḡeḡitarito nai.

³⁸ Ġekirato,

"Ġera Vere baregona,
Veregauka aranai eiāḡomani Kinina,
sivaḡa-namoa!

Maino gubai bene barego ema vevaḡa-raḡe tu guba tuḡunai!"

³⁹ Benamo Farisea tarimari kota na tarimarima ḡutuma nuḡari na Iesu ḡekiraiato, ḡekirato, "Vevaḡa-riba taumu, ḡoi ḡemu mero nokira-ḡoiri!"

⁴⁰ Iesu na evaḡa-veserito, ekirato, "Au na akiramini, bema ḡia asi beḡe koḡoni nai, mai fore beḡe koḡoni."

Iesu Ieruselema taḡina eveito

⁴¹ Iesu vanuḡa barana Ieruselema ḡana eraka-kavināḡito, eḡitaiato, benamo taḡina eveito,

⁴² ekirato, "Toma ḡaro ai ḡemu maino korana boro ribaia bere namo! Senaḡi toma, ḡoi na asi oḡitaiani.

⁴³ Ġarona beraḡasini nai, ḡebaru-vinimuni tarimari na tano beḡe ragaiani, beḡe kobe-ḡeḡeraḡimuni, asi ḡemu rakarosi dabarana.

⁴⁴ Benamo ġoi ema nuġamu ai ġetanuni tarimari beġe fuki-bubu-riġomini tano ai; fore maki ta iatanai asi beġe iaġuiani, korana Barau ġena vevaġa-kava emariġoto asi oribaiani nai.”

Iesu na Rubu Veaġa eiarevaiaito

Mataio 21:12-17; Mareko 11:15-19; Ioane 2:13-22

⁴⁵ Iesu Rubu Veaġa nuġanai eraka-toġato, voivoi tarimari elai-rosirito,
⁴⁶ ekirarito, ekirato, “Buka Veaġa nuġanai tu maiġesi ekirani, ‘Ġegu numa tu ġurigiuri numana beġe kiraġiani,’ senaġi ġomi na tu lema tarimari ġeri gumu gabunai boġo vaġa-iaġoa.”

⁴⁷ Iesu tu ġaro mabarari ai Rubu Veaġa nuġanai evevaġa-ribato-ġoi. Rubu Veaġa vereri baregori, e taravatu ġevevaġa-riba iaġiato-ġoi tarimari, ema Iuda vereri na ġia beġene vaġia dabarana ġevetauto-ġoi.

⁴⁸ Senaġi asi ġeri dabara, korana tu tarimarima mabarari ġeurato-ġoi, Iesu ġena guruġa ta maki asi beġene vei-kettoa.

20

Ierusalem vereri na Iesu ġena seġuka korana ġevedanaġi-iaġiato

¹ Ġaro tai Iesu tu Rubu Veaġa nuġanai evevaġa-ribato-ġoi, Vari Namona tarimarima eġobata-vinirito-ġoi. Benamo Rubu Veaġa vereri baregori, e taravatu ġevevaġa-riba iaġiato-ġoi tarimari, ema Iuda vereri Iesu ġenai ġeiagoto,

² ġedanaġiato, ġekirato, “Kamara seġukai ġoi na mai dagara oveirini? Dei na mai seġuka evinimuto?”

³ Iesu na evaġa-veserito, ekirato, “Au na maki vedanaġi ta avinimini. Ġokira-varagu,

⁴ Ioane ġena babatiso veigana tu Barau ġenana eiagomato, ba tarimarima ġerina?”

⁵ Ġia fakari ai ġeverorito, ġekirato, “Bema ġita bita kirani, ‘Barau ġenana,’ bita toni nai, ġia bekirani, ‘Karase nai Ioane asi ġovaġa-moġoniato?’ betoni.

⁶ Senaġi bema ġita bita kirani, ‘Tarimarima ġerina,’ bita toni nai, tarimarima mabarari na fore na beġe taki-maserani, korana ġia ġekirani, Ioane tu peroveta tarimana, ġetoni.”

⁷ Iesu ġevaġa-veseato, ġekirato, “Ġai asi ribama,” ġetato.

⁸ Benamo Iesu na ġia maki ekirarito, ekirato, “Au na maki kamara seġukai mai dagara aveirini asi bakira-varamini.”

Barabore - Tavoga ġitaġauna tarimari rakavari

Mataio 21:33-46; Mareko 12:1-12

⁹ Benamo Iesu na tarimarima mai barabore ekira-vararito, ekirato, “Tarima ta vine tavogana evaroato vau, tavoga ġitaġauna tarimari ġeri ai eraga-kwaneato. Benamo erakato gabu ta ġana. Monai ġaro ġutuma ea tanuto.

¹⁰ Vine ġwari (o grapes) ġemaġeto, benamo ġia na ġena vetuġunaġi tauna ta etuġuato tavoga narinarina tarimari ġeri ai, vine ġwari kota benea gabi ġana. Senaġi tavoga ġitaġauna tarimari na ġekwariato vau, ġimana kori ġetuġu-ġenoġoiato.

¹¹ Benamo vetuġunaġi tauna ta ma etuġuato, senaġi ġia maki ġevaġa-vevaġiato, ġevei-maiaka maiakaiato, ġimana kori ġetuġu-ġenoġoiato.

¹² Vetuġunaġi tauna vaġa-toitoina maki etuġuato, senaġi ġevaġa-vevaġi rakavaiaito, kefina maki ma fauri vau ġelai-rosiato.

¹³ Benamo tavoga biaguna ekirato, ‘Au tu kara ma baveini? Au natugu, auravini-baregoani merona, na-tuġua, atuġamaġini ġia beġe gubakauani!’

¹⁴ Senaġi tavoga narinarina tarimari na ġeġitaliato nai, tauġeri ġeveguruga-vevinito, ġekirato, ‘Mani tu tavoga biaguna natuna, be sivaġia, benamo tavoga tu ġita ġera.’

¹⁵ Benamo tavoga murikanai ġeinu-rosiato, ġevaġi-maseato.

Iesu evedanaġito, ekirato, “Tavoga biaguna tu kara beveiani ġia ġeri ai?”

¹⁶ Ġia beiaġomani, tavoga ġitaġauna tarimari bevaġi-ġosirini, benamo tavoga tu tarima irauri na bevinirini.” Tarimarima na mai guruġa ġeseġaġiato nai, ġekirato, “Asiġi, maiġesi asi bene vetore!”

¹⁷ Iesu na eġitarito, benamo edanaġirito, ekirato, “Be, mai guruġa Buka Veaġa nuġanai anina tu kara? Maiġesi ekirato, ‘Fore numari ġeragarini tarimari na asi ġeura-viniato ma ġeftoġaiato forena tu duġu forenai eiagoto.’

¹⁸ Deikara mo fore iatanai beketokauni tarimana beġwa-kirakiraiani; ema mai fore tarima ta iatanai beketokauni nai, belau-fatafataiani.”

Kaisara, Roma ġeri vere, ġena takesi moniri

Mataio 22:15-22; Mareko 12:13-17

¹⁹ Taravatu ġevevaġa-riba iaġiato-ġoi tarimari e Rubu Veaġa vereri baregori na Iesu inimoġo beġene ġabia dabarana ġevetauato-ġoi, korana ġia ribari, Iesu na mai barabore tu ġia latari ai ekiraġirito-ġoi nai. Senaġi tarimarima ġutuma vegogo-taġo naima ġegarito.

²⁰ Moġa lorinai ġeġita-taġoato moġo. Gabivau ġofaġofa tarimari ġetuġurito, ġia na beġene danaġia noġa vei-iobukaiobuka tarimari kavana; beġene danaġia, bema Iesu ġena guruġa beiaġo-irauni nai, Iesu beġene ġabia, Roma gavanana ġimana seġukanai beġene torea.

²¹ Mo ġofaġofa tarimari na Iesu ġedanaġiato, ġekirato, “Vevaġa-riba taumu o, ġai ribama, ġemu guruġa e ġemu vevaġa-riba tu maoromaoro. Tarimarima ġeri dagi asi otuġamaġirini, senaġi ġoi na Barau ġena dabara ovevaġa-riba-iaġi ġitakauani ma moġonimu ġesi.

²² Nokirama, Kaisara, Roma ġeri vere, takesi moniri bitana vinia tu namo ba asiġi?”

²³ Iesu na ġeri ġofaġofa varau eġitaato, benamo ekirarito, ekirato,

²⁴ “Silva monina ta ġovaġa-ġitagu! Mai tu dei iouiouna e dei arana?” Ġia ġevaġa-veseto, ġekirato, “Mai tu Kaisara laulauna e arana,” ġetato.

²⁵ Benamo Iesu na ekirarito, “Kaisara ġena, Kaisara boġono vinia, Barau ġena, Barau boġono vinia.”

²⁶ Iesu ġena guruġa tarimarima ġoirari ai tu maoro nai, asi ġeri dabara ġia beġe ġofa-darereani, senaġi ġena vevaġa-vese na nuġari ġefarevaġito, asi ma ġeguruġato.

Variġisi-ġenoġoi guruġari

Mataio 22:23-33; Mareko 12:18-27

²⁷ Sadukea tarimari kota Iesu ġenai ġeiaġoto. Ġeri tuġamaġi tu, mase tarimari asi ma beġe variġisi-ġenoġoini. Iesu ġedanaġiato, ġekirato,

²⁸ “Vevaġa-riba taumu o, Mose na taravatu ġai ġema maiġesi etoreato, ‘Bema tau ta kakana bemaseni, ma vabuna tu roġo maġuri, senaġi asi naturi nai tu, mo tau na kakana vabuna bene ġaraġoa. Korana tu ġia na naturi tari beġene vaġa-maġuriri mo mase tauna ġena.’

²⁹ Tarikaka tau moġo korina mabarari tu imaima ruarua (7). Tau guinena na vavine ta eġaraġoato, ma emaseto, natuna ta asi evaġa-ġoraiato.

³⁰ Tau vaġa-ruaruana na vabu ma eġaraġoato,

³¹ tau vaġa-toitoina maki moġesina moġo. Moġa nuġanai ġia mabarari tu imaima ruarua (7), senaġi mabarari ġemaseto, naturi ta asi ġevaġa-ġoraiato.

³² Dokonai mo vavine maki emaseto.

³³ Variġisi-ġenoġoi ġaronai mo vavine tu dei ġaraġona, korana ġia tu tau imaima ruarua (7) na ġeġaraġoato nai?”

³⁴ Iesu na evaġa-veserito, ekirato, “Mai tanobarai tau e vavine ġeveġaraġoni,

³⁵ senaġi roġo beiaġomani Basileianai, vei-iobukaiobuka tarimari beġe variġisi-ġenoġoini. Ġia tu asi beġe veġaraġoni.

³⁶ Ġia asi beġe maseni maki, senaġi aneru kavana beġe tanuni. Barau natunai beġe iaġoni, korana ġia tu variġisi-ġenoġoi tarimari.

³⁷ Mose na evaġa-moġoniato, mase na ma beġe variġisi-ġenoġoini. Ġau eġaraiato-ġoi varina nuġanai, Mose na Vereġauka tu ‘Aberahamo ġena Barau, Isako ġena Barau, Iakobo ġena Barau’ ekiraġiato.

³⁸ Moġoni, ġia tu maġuri tarimari ġeri Barau, dia mase tarimari ġeri Barau. Korana Barau ġenai tu, tarimarima mabarari tu maġuri.”

³⁹ Taravatu ġevevaġa-riba iaġiato-ġoi tarimari kota ġekirato, “Vevaġa-riba taumu o, vevaġa-vese namona tu maniġa.”

⁴⁰ Benamo moġa murina na asi ma ġedanaġi-ġenoġoiato, ġegarito nai.

Keriso tu Davida natuna ba Davida ġena Vereġauka?

Mataio 22:41-46; Mareko 12:35-37

⁴¹ Iesu na ekirarito, ekirato, “Ġia tu kamasi nai Keriso tu Davida natuna ġetoni?”

⁴² Davida tu Salamo nuġanai ekirato,

‘Barau na ġegu Vereġauka ekiraiato:

Au ġimagu aroribana rekenai bono tanu,

⁴³ bene iaġo mo, ġoi ġebaru-vinimuni tarimari ġoi kwakumu gaburenai batorerini.’

⁴⁴ Davida na Keriso tu ‘Vereġauka’ etato. Kamasi nai Keriso tu Davida natuna?”

Taravatu ġevevaġa-riba iaġiato-ġoi tarimari ġeri ġofaġofa

Mataio 23:1-36; Mareko 12:38-40; Luka 11:37-54

⁴⁵ Tarimarima mabarari ġoirari ai Iesu na ġena mero ekirarito, ekirato,

⁴⁶ “Taravatu ġevevaġa-riba iaġiani tarimari ġerina lorimi boġono vetore. Ġia ġeurani dabuġa maukari beġene riġo, maketi gaburi ai beġene rakaorakao, tarimarima na beġene vaġa-namori urari ai. Rubu nuġari ai ema ġani-vegogo gaburi ai ġeri ura tanutanu namori ai beġene tanu.

⁴⁷ Ġia na vabu ġeri numa ma farefare ġevaġa-koririni. Ġeri ġauġau tu mauka kenene, senaġi ġeġofaġofani. Moġesi ġeveini tarimari meto barego vedaurea beġe ġabini.”

21

Vabu ġena boubou monina

¹ Iesu eboġe-vaesito nai, moni vovoka tarimari ġeri boubou moni mauġai ġeġurato-ġoi eġitarito.

² Asi-ġena ema asi-ġana vabuna ta eiagomato, eġitaiao, ġena moni misiri ruarua moġo eġura-riġorito, (mai tu noġa moġo toea sebna kavana).

³ Benamo Iesu ekirato, “Moġoni, au na akiramini, mai vabu na beġuraia monina tu mabarari ġeri vini bevanaġiri.

⁴ Korana mabarari ġeri moni vovoka ġerina koturi moġo beġe vini, senaġi mai vabu tu ġena moni misina ġenana moġo, ġena maġuri ai bere vevaġa-kava-iaġiri dagarari mabarari beġurari.”

Iesu na vau beġea ġorani dagarari ekiraġirito

Mataio 24:1-14; Mareko 13:1-13

⁵ Iesu ġena mero kota na Rubu Veaġa ġeguruġa-iaġiato, ġitaġitana ma marevana, ma ġena fore namori ġesi ema Barau ġevarevare-viniato varevare dagarari namori na ġevaġa-veraiao, ġetato. Senaġi Iesu ekirato,

⁶ “Ġarona beraġasini, mainai ġoġitarini dagarari mabarari tarima tari na beġe vare bubu-riġorini, fore ta fore ta iatanai asi beġe tanuni.”

⁷ Benamo Iesu ġedanagiato, ġekirato, “Vevaġa-riba taumu, aitoma beġorani? Ema beġorani nai, kamara vetoġa na bevaġa-moġoniani?”

⁸ Iesu evaġa-veseto, ekirato, “Gomi lorimi boġono vetore, beġe ġofamini ġesi. Korana tu tarimarima ġutuma au aragu ai beġe iaġomani, beġe kirani, ‘Tarimana tu au maigegu!’ ema, ‘Ġarona beraġasi!’ beġe toni. Senaġi ġia muriri ai asi boġono raka.

⁹ Bema ġomi na vetari o tuari gururi e gururaġe boġo seġaġirini nai, nuġami asi beġene raġe. Mai dagara beġe ġora-guineni, senaġi dokona asi roġo beraġasini.”

¹⁰ Iesu ma ekirato, “Tanobara ta tanobara ta ġesi beġe vevaġini, gavamani ta gavamani ta ġesi beġe vetarini.

¹¹ Gabu ġutuma nuġari ai tano beġe iaġaiagani, doġe beġe ġorani, ema tarimarima ġutuma keve beġe doġarini ta ġenana bevanaġini ta ġenai. Vevaġa-gari vetoġari baregori guba na beġe foforini.

¹² Senaġi mo dagara roġosi beġene ġora nai, ġia na ġomi beġe ġabimini, beġe vaġa-midigumini. Rubu ai beġe vaġa-kotamini, dibura numari ai beġe tore-toġamini. Kini e gavana ġoirari ai beġe ġori-iaġomini, korana au ġoġabi-raġeguni nai.

¹³ Mai tu ġomi ġemi nega namona au vaġa-moġonigu ai boġo iaġoni.

¹⁴ Boġono vetuġamaġi, ġemi vevaġa-vese guruġari asi boġono tuġamaġi-guine guineri,

¹⁵ korana tu au na guruġa e iaunega bavinimini, beġe baru-vinimini tarimari na beġe kira-ġoimini, senaġi asi beġe kokoreni.

¹⁶ Tamami, sinami, kakami, tarimi, garagarami, e ġatami na tarimarima ġimari ai beġe revamini. Gomi kota maki beġe vaġi-masemini.

¹⁷ Tarimarima mabarari na beġe iau-rakavamini, korana au ġoġabi-raġeguni nai.

¹⁸ Senaġi debami ġuri sebna maki asi berekwa-rekwani.

¹⁹ Boġo vevaġa-gwaġiġini nai tu, boġo maġurini.”

Ieruselema beġe vaġa-rakavaiani

Mataio 24:15-21; Mareko 13:14-19

²⁰ “Vetari o tuari doġorori na Ieruselema beġe tanu-ġeġeraġiani boġo ġitaiani, benamo boġo ribani, Ieruselema dori ġevaġa-rakavaiani.

²¹ Mo negai Iudeai ġetanuni tarimari tu ġoro ġana beġene raga-iaġo. Vanuġa barana Ieruselema nuġanai ġetanuni tarimari tu, vanuġa beġene raga-kwaneana, ema gunikai ġetanuni tarimari tu vanuġa barana nuġanai asi beġene raka-toġa.

²² Korana mo negai tu Barau na tarimarima ġeri rakava voiri bevinirini Buka Veaġai ġetore-guineato vaġa-moġoniri.

²³ Vavine ma baniri e ġabi-variġu vavineri kika ma vetuġari! Midigu barego mai tano ai beġe raġasini, ema Barau na ġena bese tarimari bevaġa-maoro vinirini.

²⁴ Tarima kota tu vetari baġari na beġe vaġi-maserini, kota tu beġe ġabi-maġuririni, tanobara mabarari ġana beġe ġori-iaġorini, beġea diburarini; ema irau bese tarimari na Ierusalemna beġe fana-tariani, beiaġoni mo, ġeri ġaro bea korini.”

Tarimarima Natuna ġena iaġoma

Mataio 24:29-31; Mareko 13:24-27

²⁵ “Ġaro, ġue, ema visiġu nuġari ai vetoġa beġe ġorani. Tanobara beseri davara ema ureure gururi ai beġe gari-rakavani.

²⁶ Tarimarima beġe keto-founi gari dainai, ġeri tuġamaġi maki roġo beġe korini mo beġe ġorani dagarari dairi ai; korana tu guba seġukari beġe iaġaiġani.

²⁷ Mo negai Tarimarima Natuna beġe ġitaiani, magube nuġana na beiaġomani ma seġukana e ma mamana baregona ġesi.

²⁸ Mo dagara beġe ġorani nai, boġono varigiġi, boġono boġe-vaisi, korana vaġa-maġurimi tu varau bekavinaġi.”

Barabore - Vevaġa-riba figi ġauna ġenana

Mataio 24:32-35; Mareko 13:28-31

²⁹ Iesu na ġeri barabore ta ekiraġiato, ekirato, “Figi ġauna ema ġau mabarari ġoġitari.

³⁰ Lauri varigiġuri ġefafani ġoġitarini, ġomi ġoribani, ġaro ġena tora taimina varau bekavinaġi.

³¹ Moġa ilailanai, ġomi maki bema boġo ġitarini, mai dagara beġe ġorani nai, boġo ribani, Barau ġena Basileia tu bekavinaġi.

³² Moġoni akiramini, mai ġuru asi bekorini, beiaġoni mo, mai dagara mabarari beġe ġorani.

³³ Guba e tanobara beġe rekwa-rekwani, senaġi au ġegu guruġa tu asi beġe rekwarekwani, beġe tanu-vanaġi vanaġini.”

Boġono venari

³⁴ “Lorimi boġono vetore, ġaniġani e niuniu ġutuma, ema tanobara ġena tuġamaġi dagarari na ġomi nuġami beġe vaġa-metorini ġesi. Benamo mo ġaro na nuġami bevaga-farevaġirini.

³⁵ Korana mo ġaro tu tanobarai ġetanuni tarimari mabarari ġeri ai beaġasini.

³⁶ Moġa lorinai boġono venari, boġono ġauġau ġaro mabarari ai, beġe ġorani dagarari mabarari ġerina boġono raga-maġuri ġana, korana Tarimarima Natuna ġoiranai roġo boġo ruġani.”

³⁷ Ġaro mabarari ai Iesu tu Rubu Veaġai evevaġa-ribato-ġoi, a lavilavi ai tu eraka-rosito-ġoi, Olive Ġorona tuġunai ea ġenato-ġoi.

³⁸ Boġibogi iamoiamonai tarimarima mabarari Rubu Veaġai ġevegogoto-ġoi ġia ġena guruġa beġene seġaġia ġana.

22

Iesu beġene vaġia dabarana ġevetauato

¹ Asi etubuni faraona verekona arana Pasova varau ekavi-naġito. (Mo tu Iuda tarimari mase aneruna na evanaġirito moġo, asi evaġirito verekona).

² Rubu Veaġa vereri baregori ema taravatu ġevevaġa-riba iaġiato-ġoi tarimari na Iesu beġene ġabia, benamo beġene vaġi-ġairia dabarana ġevetauato, korana tarimarima gariri ġeuito.

Iudas na Iesu erevaiato

Mataio 26:14-16; Mareko 14:10-11

³ Mo negai Satani na Iudas Isakariota, tarima ta gabanana ruarua (12) fakari ai, eboroġiato.

⁴ Benamo Iudas eiaġoto Rubu Veaġa vereri baregori ema Rubu Veaġa narinarina tarimari ġeri vere ġeri ai, Iesu tu ġia ġimari ai kamasi bene tore-kaua dabarana ġeobioga-vegogoato.

⁵ Ġia ġeiaku-rakavato, ġekira-toreato, moni beġe viniani, ġetato.

⁶ Iudas na eġabi-raġeato, benamo Iesu ġia ġimari ai vekuretoġai betore-kauani dabarana evetauato-ġoi.

Ġinitaġo mamoeni ġerovina-toreato

Mataio 26:17-25; Mareko 14:12-21

⁷ Ġinitaġo mamoeni beġe vaġirini ġarona varau eraġasito.

⁸ Benamo Iesu na Petero ma Ioane etuḡurito, ekirato, “Ḡoiāḡo, Pasova verekona boḡono dabaraia, bitana ḡania.”

⁹ Ḡevaḡa-veseto, ḡekirato, “Ḡai tu ainai baḡana dabara-torea?”

¹⁰ Benamo Iesu na ekirarito, ekirato, “Vanuḡa baregonai boḡo raka-toḡani nai, tarima ta nanu gwaḡutuna befaḡaiani boḡo ḡoiḡaḡoani. Murina na boḡono iaḡo, ḡia beraḡekauni numanai boḡono raḡekau.

¹¹ Benamo numa tarimana boḡono vaḡa-guruḡaia, boḡono kira, “Vevaḡa-riba tauna ekirani, ‘Varivari daiḡutuna tu aiḡa, au ema ḡegu mero ḡesi monai ginitaḡo mamoea baḡana ḡania?’

¹² Benamo ḡia na daiḡutu baregona ta numa tuḡunai bevaḡa-ḡitamini, ḡeiareva-toreato. Monai boḡono dabara-torea.”

¹³ Benamo ḡeiaḡoto, Iesu na ekiraḡirito kavana ḡedoḡaririto. Monai vereko ḡedabaraiato.

Ḡani-vegogo veaḡana

Mataio 16:26-30; Mareko 14:22-26; 1 Korinto 11:23-25

¹⁴ Ginitaḡo mamoea beḡe ḡaniani aoana eraḡasito. Iesu tu ḡena apostolo tarimari ḡesi ḡaniḡani gabunai ḡetanu-tarito.

¹⁵ Benamo Iesu na evaḡa-guruḡarito, ekirato, “Au ḡegu ura baregona mai ginitaḡo mamoea ḡomi ḡesi bitana ḡani-vegogo-guinea vau, midigu bana ḡani.

¹⁶ Korana tu akiramini, ginitaḡo mamoea asi ma baḡaniani, beiaḡoni mo, ginitaḡo anina korikorina bea fororini Barau ḡena Basileia nuḡana.”

¹⁷ Benamo Iesu na kapusi ta eḡabiatu, evaḡa-namoato, ekirato, “Maiḡa tu ḡoḡabia, mabarami boḡono niua.

¹⁸ Korana tu akiramini, vine nanuna asi ma banu-ḡenoḡoiani, beiaḡoni mo, Barau ḡena Basileia beiaḡomani vau.”

¹⁹ Benamo Iesu na beredi eḡabiatu, evaḡa-namoato, ebuki-ḡutuato, evinirito, ekirato, “Mai tu au tauḡanigu, ḡomi avinimini; maiḡa boḡono veia, au vetuḡamaḡi-iaḡigu ḡana.”

²⁰ Ḡeḡani-ḡosito vau, kapusi ma eḡabiatu, ekirato, “Mai kapusi tu Ginitaḡo Variḡuna, au raragu na bevaḡa-moḡoniani, bevebubuni ḡomi vaḡa-maḡurimi ḡana.

²¹ Senaḡi au berevaguni tarimana tu mainai au ḡesi taḡani-vegogoni!

²² Moḡoni, Tarimarima Natuna bemaseni, Barau na ekiraḡi-guineato ilailanai, senaḡi berevaiani tarimana vetuḡana kekei!”

²³ Benamo tauḡeri ḡevedanaḡi-vedanaḡito, ḡia deikara na moḡesi beveiani.

Deikara tu barego vedaurea

Mataio 20:25-28; Mareko 10:42-45

²⁴ Benamo Iesu ḡena mero tauḡeri ḡeveḡare-veḡareto, deikara ḡia fakari ai barego lelevaḡi.

²⁵ Iesu na evaḡa-guruḡarito, ekirato, “Irau bese tarimari ḡeri vere na tarimarima ḡedori-naḡinaḡirini, ema veḡuine-iaḡi tarimari baregori na ḡeri maoro seḡukari na ḡelaunaḡi-naḡirini, ema tarimarima na beḡene vevato-iaḡiri ḡetoni.

²⁶ Senaḡi ḡomi tu dia moḡesina. Ḡomi fakami ai tau guinea tu tau muriseinai bene iaḡo, ema vere tauna tu vetuḡunaḡi taunai bene iaḡo.

²⁷ Dei tu barego, ḡaniḡani gabunai etanu-taḡoni tarimana ba vetuḡunaḡi tarimana? Ḡaniḡani gabunai etanu-taḡoni tarimana, ene? Senaḡi au tu ḡomi fakami ai vetuḡunaḡi tarimana noḡa.

²⁸ Ḡomi tu au ḡeribaḡaniguto-ḡoi nai, ḡotanu-gwaḡiḡito-ḡoi tarimami.

²⁹ Moḡa lorinai au Tamagu na maoro eviniguto, Basileia ta au ḡegu ekiraḡiato ilailanai, au maki Basileia ta ḡomi ḡemi akiraḡiani.

³⁰ Benamo ḡomi maki au ḡegu Basileiai bita ḡaniḡani-vegogoni e bita niuniu-vegogoni, ema ḡomi teronai o vere seari ai boḡo tanuni, Isaraela beseri gabanana ruarua (12) boḡo vaḡa-maoro vinirini.”

Iesu na Petero ḡena vekira-ḡuniḡau ekiraḡi-toreato

Mataio 26:31-35; Mareko 14:27-31; Ioane 13:36-38

³¹ “Simona, Simona o, noseḡaḡi! Au na akiramini, Barau na Satani maoro eviniato, ḡomi bene ribaḡanimi, namo e rakava bene tore-kirari ḡana, noḡa iaraḡa tarimana na widi ema momo etore-kirarini kavana.

³² Senaḡi au na ḡemu varau aḡuriguḡurito, ḡemu veḡabidadama asi bene keto ḡana. Benamo ma bovetuḡamaḡi-ḡenoḡoni au ḡegu ai nai, tarikakamu bono vaḡa-kokoreri.”

³³ Petero evaḡa-veseto, ekirato, “Vereḡauka, au tu ḡoi ḡesi dibura numai beḡe torerani ema bita mase-vegogoni!”

³⁴ Iesu ekirato, “Petero, au na akiramuni, toma kokoroku asi begōgini, beiaḡoni mo, ḡoi na na vaḡa-toitoi bokira-ḡuniḡauguni, bokirani, ‘Au tu asi ribaḡu ḡia,’ botoni.”

Nega rakavana

³⁵ Iesu na ḡena mero evaḡa-guruḡarito, ekirato, “Au na ḡomi atuḡumito nai, asi ḡemi fufuse, dura, o tamaka. Gomi dagara tai ḡorabuto ba? ḡia ḡevaḡa-veseto, ḡekirato, “Asiḡina!”

³⁶ Iesu na ma evaḡa-guruḡarito, ekirato, “Senāḡi toma ḡomi deikara ma ḡena fufuse ema dura, bene ḡabiri; ema deikara asi ḡena vetari baḡana, ḡena koudi bene voivoi-iaḡia, benamo ta ma bene voia.

³⁷ Korana au na akiramini, Buka Veāḡa nuḡanai ekirani, ‘Seḡafore tarimari ḡesi beḡe iavi-vegogoani.’ Mo guruḡa au ḡegu ai bemoḡonini.”

³⁸ Iesu ḡena mero ḡevaḡa-veseto, ḡekirato, “Noḡitaiā, Vereḡauka, vetari baḡari ruarua maiḡeri.” Iesu evaḡa-veseto, ekirato, “Benamo!”

Iesu eḡuriḡurito Getesemane ai

Mataio 26:36-46; Mareko 14:32-42

³⁹ Benamo Iesu tu vanuḡa barana eraga-kwaneato, Olive ḡorona ḡana eiaḡoto eveito-ḡoi kavana. Gena mero ḡia murinai ḡerakato.

⁴⁰ Monai ḡeraḡasito, benamo Iesu na evaḡa-guruḡarito, ekirato, “Boḡono ḡauḡau, be veribaḡani ai asi boḡono moira.”

⁴¹ Benamo ḡeregana eraka-ḡerevaḡito, fore tafiurini ḡea keto-tarini ḡena manaḡa ilailanai, benamo evetui-tarito, eḡuriḡurito.

⁴² Ekirato, “Tamagu o, bema nuḡamu ilaila nai, mai midigu bedina au ḡeguna noma ḡabi-vaḡia; senāḡi dia au ḡegu ura, ḡoi ḡemu ura moḡo.”

[

⁴³ Benamo aneru ta guba na emariḡoto, Iesu kokore eviniato.

⁴⁴ Midigu barana na ḡia nuḡana evaḡa-vonuato, benamo eḡauḡauto ma nuḡana mabarana ḡesi, eiaḡoto mo, seḡurina tano ai eriḡoto rara kabudona noḡa.]

⁴⁵ Eḡauḡau-ḡosito vau, evariḡisito, ḡena mero ḡeri ai eḡenoḡoi-iaḡoto, ḡenari ai eḡoitaḡorito, dabarari ḡedokoto nai.

⁴⁶ Benamo ḡia na evaḡa-guruḡarito, ekirato, “Karase nai ḡomi ḡogenani? ḡovariḡisi, ḡoḡuriḡuri, be veribaḡani ai asi boḡono moira.”

Iesu tuari tarimari na ḡeḡabi-tariato

Mataio 26:47-56; Mareko 14:43-50; Ioane 18:3-11

⁴⁷ Iesu roḡo mo eguruḡato-ḡoi nuḡanai, tarimarima ḡutuma ḡeraḡasito, Iudas, mero ta gabanana ruarua (12) fakari ai, ḡia na eḡori-kaurito. Iesu eiāgo-viniato bene veraua ḡana.

⁴⁸ Senāḡi Iesu na ekiraiato, ekirato, “Iudas o, Tarimarima Natuna verau na borevaiani ba?”

⁴⁹ Iesu sevinai ḡeruḡa-taḡoto merori na ḡeḡitaiato kara beḡorani, benamo ḡedanaḡiato, ḡekirato, “Vetari baḡana na baḡana basiri ba?”

⁵⁰ Benamo ḡia ta na Rubu Veāḡa verena baregona ḡena vetuḡunaḡi tarimana vetari baḡana na eiāgo-viniato, benamo seḡana aroribana ebasi-vaḡiato.

⁵¹ Senāḡi Iesu ekirato, “Benamo, ḡovaḡa-dokoa!” Mo tarima seḡana eḡabi-karaiato, evaḡa-namoato.

⁵² Benamo Iesu ḡabiḡabina ḡeiaḡomato tarimari, Rubu Veāḡa vereri baregori e Rubu Veāḡa ḡitaḡauna tarimari ḡeri baregona ema Iuda vereri ḡia na evaḡa-guruḡarito, ekirato, “Gomi boḡo iaḡoma ma ḡemi vetari baḡari e ma ḡemi fato ḡesi, noḡa moḡo seḡafore tarimana ta ḡabiḡabina goro iaḡoma kavana?

⁵³ Garo mabarari ai au tu ḡomi sevimi ai Rubu Veāḡa nuḡanai, senāḡi asi ḡoḡabi-tariguto. Mai tu ḡomi ḡemi nega, mukuna (o Satani) ḡena seḡuka negana.”

Petero na Iesu ekira-ḡuniḡauato

Mataio 26:57-58; 26:69-75; Mareko 14:53-54; 14:66-72; Ioane 18:12-18; 18:25-27

⁵⁴ Benamo ḡia na Iesu ḡeḡabi-tariato, Rubu Veāḡa verena baregona ḡena numa ḡana ḡeḡori-iaḡoato. Petero maki ḡia murinai erakato, senāḡi ma fakana.

⁵⁵ Numa maḡuna nuḡanai tarima kota na karava ḡevaḡa-ḡaraiato, benamo ḡetanu-ḡeḡeraḡiato. Petero maki ḡia seviri ai etanu-tarito.

⁵⁶ Benamo vetuḡunaḡi ḡuiatona ta na karava mamanai eḡitaiato, eḡita-karakaraiato, ekirarito, ekirato, “Mai tarima maki Iesu ekavaiato-ḡoi!”

⁵⁷ Senāḡi ḡia evekira-ḡuniḡauto, ekirato, “Goi vavine, au tu asi ribaḡu ḡia!”

⁵⁸ Nega kotuna evanaḡito nuḡanai, tarima ta na Petero eḡitaiato, ekiraiato, “Goi maki ḡia karori ta!” Senāḡi Petero evaḡa-veseto, ekirato, “Goi tau, au tu asiḡi!”

⁵⁹ Aoa ta e vanagito vau, tarima ta ma eguruḡato ma nuḡana mabarana ḡesi, ekirato, “Moḡoni, ḡia maki Iesu ḡesi tarimana ta, korana ḡia maki Galilea tauna!”

⁶⁰ Senaḡi Petero evaḡa-veseto, ekirato, “Ḡoi tau, au asi ribagu ḡoi kara okiraḡiani!” Ḡia roḡo mo eguruḡato-ḡoi nuḡanai, kokoroku egoḡito.

⁶¹ Benamo Vereḡauka eruḡa-kureto, ḡia na Petero eḡitaiato nai, Vereḡauka ḡena guruḡa etuḡamaḡi-dogariato, ekiraiaato, “Toma kokoroku asi begoḡini, beiaḡoni mo, ḡoi na au vaḡa-toitoi bokira-ḡuniḡauguni.”

⁶² Benamo Petero eraka-rosito, etaḡi-rakava rakavato.

Iesu ḡevaseva-vaseva iaḡiato

Mataio 26:67-68; Mareko 14:65

⁶³ Iesu ḡenariḡauato tarimari na ḡevaseva vaseva-iaḡiato e ḡekwariato.

⁶⁴ Matana ḡekumu-ḡauato, ḡekiraiaato, ḡekirato, “Ḡoi tu peroveta tarimana, be nokiraḡia, dei na bekwarimu?”

⁶⁵ Guruḡa rakavari ḡutuma ḡia ḡeviniato.

Iesu kanisoro tarimari ḡoirari ai

Mataio 26:59-66; Mareko 14:55-64; Ioane 18:19-24

⁶⁶ Elaḡanito, Iuda vereri, e Rubu Veaḡa vereri baregori, ema taravatu ḡevevaḡa-riba iaḡiato-ḡoi tarimari ḡeraka-vegogoto. Iesu ḡeḡori-iaḡoato Iuda kanisoro tarimari ḡoirari ai.

⁶⁷ Benamo ḡekiraiaato, ḡekirato, “Nokira-varama, ḡoi tu Keriso, (Barau na ekiraḡi-toreato vevaḡa-maḡuri tauna), ba?” Iesu na evaḡa-veserito, ekirato, “Bema au na bakiramini, ḡomi na asi boḡo vaḡa-moḡoniguni,

⁶⁸ ema bema vedanaḡi ta bavinimini, asi boḡo vaḡa-veseguni.

⁶⁹ Senaḡi toma beiaḡoni mo ḡoira laḡaniri ai, Tarimarima Natuna tu Seḡuka Barauna ḡimana aroribanai betanu-taḡoni.”

⁷⁰ Benamo mabarari ḡekirato, “Be, ḡoi tu Barau Natuna otoni?” Ḡia evaḡa-veseto, ekirato, “Ḡomi na ḡokiraḡiani maniḡa.”

⁷¹ Ḡia ḡekirato, “Karase vevaḡa-moḡoni tarimari tari roḡo tavetaurini? Ḡia tauḡena muruna na bekiraḡia bita seḡaḡia.”

23

Iesu Pilato ḡoiranai

Mareko 15:1-5; Ioane 18:28-38

¹ Benamo vegogo tarimari mabarari ḡevariḡisito, Iesu ḡeḡori-iaḡoato gavana Pilato ḡenai.

² Monai ḡeḡofaḡofa-iaḡiato, ḡekirato, “Mai tarima maḡa baḡa doḡaria, ḡai ḡema bese tarimari eḡorikau-kerererini, ekirani, Kaisara, Roma ḡeri vere, ḡena takesi moniri asi beḡene vinia etoni, ema tauḡena evekiraḡini, ḡia tu Keriso, Barau na ekiraḡi-toreato verena o kinina.”

³ Benamo Pilato na edanaḡiato, ekirato, “Ḡoi tu Iuda tarimari ḡeri vere ba?” Iesu evaḡa-veseto, ekirato, “Oi, okiraḡiani maniḡa.”

⁴ Benamo Pilato na Rubu Veaḡa vereri baregori e tarimarima ḡutuma ekirarito, ekirato, “Kerere ta asi badogaria mai tarima ḡenai.”

⁵ Senaḡi mo tarimarima roḡo ḡeḡiḡiraḡeto, ḡekirato, “Ḡia ḡena vevaḡa-riba guruḡari na Iudea tarimari mabarari nuḡari evei-veḡonurini. Galileai esinaiaato mo beiaḡoma mai gabu ai.”

Iesu Heroda ḡoiranai

⁶ Mo guruḡa eseḡaḡiato nai, Pilato evedanaḡito, ekirato, “Mai tarima tu Galilea tarimana ba?”

⁷ Benamo Pilato eribato, Iesu tu Heroda ḡena seḡuka gaburenai nai, Iesu Heroda ḡenai ḡetuḡu-iaḡoato. Ḡia maki Ierusalem mai mo ḡaro ai.

⁸ Heroda eiaku-rakavato Iesu eḡitaiato nai, korana Heroda na Iesu varina eseḡaḡiato, ema kai-veḡata evaḡa-nogato Iesu bene ḡitaia ḡana. Ḡia eurato Iesu na nuḡa-farevaḡi veḡari kota bene veiri bene ḡitari.

⁹ Moḡa lorinai vedanaḡi ḡutuma Iesu edanaḡiato, senaḡi ḡia asi evaḡa-veseto.

¹⁰ Rubu Veaḡa vereri baregori ema taravatu ḡevevaḡa-riba iaḡiato-ḡoi tarimari monai ḡeruḡa-taḡoto-ḡoi, Iesu ḡeḡofaḡofa-iaḡi lelevaḡiato-ḡoi.

¹¹ Heroda ema ḡena vetari tarimari o soldia na Iesu ḡerikiriki-iaḡiato-ḡoi, ḡevei-veḡare veḡareato, ema dabuḡa namona ta ḡevaḡa-dabuḡa-iaḡiato, benamo ma ḡetuḡu-ḡenoḡoiaato Pilato ḡenai.

12 Pilato ema Heroda ġevebaru-vevinito-ġoi, senaġi mo ġaro ai ġeveġata-ġenoġoito.

Iesu vaġa-ruaruana Pilato ġoiranai

Mataio 27:15-26; Mareko 15:6-15; Ioane 18:38-19:16

13 Pilato na Rubu Veaġa vereri baregori, e Iuda vereri, ema tarimarima mabarari ekea-vegogorito,

14 ekirarito, ekirato, “Ġomi na mai tarima boġo ġori-iaġomaia au ġegu ai, ġokirani, ġia na tarimarima eġorikau-kerererini ġotoni. Toma au na ġomi ġoirami ai ġemi guruġa bavetauri, senaġi kerere ta asi badoġaria.

15 Heroda maki kerere ta asi edoġariato ġia ġenai nai, ma betuġu-ġenoġoi iaġomaia ġita ġerai. Ġomi na ġoġitaiani, ġia tu rakava ta asi eveiato bene mase ġana.

16 Moġa lorinai au na mai akwariani vau baruġaiani.” [

17 Vanagivanagġi eveini kavana Pilato na Pasova verekona ġaronai dibura numai etanuni tarimana ta beruġaiani.]

18 Senaġi tarimarima mabarari ġekoġo-vegogoto, ġekirato, “Bono vagia! Barabas noruġaia, novinima!”

19 Barabas tu dibura numai ġekou-ġauato, korana vanuġa barana nuġanai ġevevaġito ema tarima ta ġevaġi-maseato nai.

20 Pilato enuġa-vekwaragġito Iesu bene ruġaia, moġa lorinai tarimarima ma evaġa-guruġa ġenoġoirito,

21 senaġi ġia ma ġekoġo-ġenoġoi ġenoġoito-ġoi, ġekirato, “Novaġa-satauroa, novaġa-satauroa!”

22 Nega vaġa-toitoina evaġa-guruġarito, ekirato, “Karase nai, kamara rakava mai tarima na eveiato? Au na rakava ta asi aġoitaġoani eveiato bene mase ġana. Moġa lorinai au na mai akwariani vau baruġaiani.”

23 Senaġi ġia ġekoġoto ma nuġari mabarari ġesi, ġekirato, novaġa-satauroa; benamo dokonai ġia ġeri ura ekwalimuto.

24 Benamo Pilato na ġia ġeri ura eġabi-raġeato.

25 Mo vevaġi ema vaġivaġi dainai dibura numanai etanuto tarimana, eruġa-fitoġaiato ġeri noġinogġi ilailanai, a Iesu tu evinirito ġeri ura veġana beġene veia.

Iesu ġevaġa-satauroato

Mataio 27:32-44; Mareko 15:21-32; Ioane 19:17-27

26 Vetari tarimari na Iesu ġeġori-rosiato, benamo ġeġori-iaġoato-ġoi nai, tarima ta ġesi ġevedoġarito, Simona, Kurene tarimana, ġia tu gunika na ema raka-rosito vanuġa barana ġana eiaġoto-ġoi nai, tuari tarimari na ġeġabi-tariato, satauro ġia faġanai ġetore-kauato. Ġia na satauro efaġaiato, benamo Iesu murina na eiaġoto-ġoi.

27 Tarimarima ġutuma tu Iesu murinai ġerakato. Ġia vefakari ai tari tu vavine, ġia tu Iesu taġina ġeveito-ġoi ema ġetaġi-guruġa guruġato-ġoi.

28 Benamo Iesu eruġa-kureto, evaġa-guruġarito, ekirato, “Ierusalem vavinemi! Au taġigu asi ġotaġi, senaġi tauġemi taġimi ema natumi taġiri ġovei.

29 Korana ġaro rakavari beġe iaġomani, tarimarima maiġesi beġe kirani, ‘Sinage gabani vavineri ema ratari asi ġerururini vavineri beġene iaku!’

30 Benamo ġoro baregori beġe vaġa-guruġarini, beġe kirani, ‘Ġai iatamai ġoketokau!’ ema ġoro keiri beġe kirarini, ‘Ġai ġolautarima!’

31 Bema au, ġau maġurigu, na maiġesi beġe veiguni nai tu, ġomi, ġau matuġumi, kamasi beġe veimini?”

32 Seġafore tarimari ruarua maki Iesu ġesi ġeġori-rosirito ġia ġesi beġene vaġa-sataurori ġana.

33 Gabu ta arana “Deba Ġavana” ai ġeraġasito. Monai seġafore tarimari ġesi ġevaġa-satauroato, ta aroribana rekenai, ma ta kaurina rekenai.

34 Iesu ekirato, “Tamagu o, ġeri rakava bono tuġamaġi-fitoġari, korana kara ġeveiani ġia asi ribari.” Benamo laki ġerena ta ġeveiato vau, ġena dabuġa ġevarerito.

35 Tarimarima ġeruġa-tarito, ġe-marereto-ġoi, ema Iuda tarima baregori na ġerikiriki-iaġiato-ġoi, ġekirato, “Ġia na tarima tari evaġa-maġuririto, a ġia tauġena tu asi bevevaġa-maġurini bema ġia Keriso, Barau na eġabi-viriġiato vevaġa-maġuri tauna.”

36 Vetari tarimari na maki ġevaseva-vaseva-iaġiato, ġia ġenai ġeiaġoto, vine nanuna mamakina ġeduġi-viniato,

37 benamo ġekirato, “Bema ġoi Iuda tarimari ġeri vere otoni, ġoi tauġemu novevaġa-maġuri.”

38 Toretore ta maki ġia iatanai ġetoreato, ekirato: “MAI TU IUDA TARIMARI ĠERI VERE.”

³⁹ Seġafore tarimana ta, ġia ġesi ġevaġa-satauro vegogoato tarimana, na evaneato, ekirato, “Goi tu dia Keriso, (Barau na ekiraġi-toreato vevaġa-maġuri tauna)? Goi tauġemu novevaġa-maġuri, ġai maki novaġa-maġurima!”

⁴⁰ Ġia karonna na ekira-ġoiato, ekirato, “Goi Barau garina asi ogarini? Goi maki bomaseni ġia ilailanai.

⁴¹ Dagara sebona, ġita taura ruarua tamaseni ġera rakava voiri dainai, senaġi mai tarima tu asi ġena vei-rakava.”

⁴² Benamo ġia na Iesu enoġiato, ekirato, “Iesu, ġemu Basileia boġabiani nai, au maki bono tuġamaġigu.”

⁴³ Iesu na evaġa-veaseato, ekirato, “Moġoni akiramuni, toma ġaro ai ġoi tu au ġesi paradaiso ai.”

Iesu ġena mase

Mataio 27:45-56; Mareko 15:33-41; Ioane 19:28-30

⁴⁴ Garoġota, horaġauna 12 koloko varau eġabiato, ġaro ġena seġuka ekorito, tanobara mabarana mukuna na eġabi-ġauato, eiaġoto mo, horaġauna 3 koloko.

⁴⁵ Benamo Rubu Veaġa nuġanai veaġa lelevaġi daiġutuna kouġauna dabuġana o ketin evedare-kikimato.

⁴⁶ Iesu ekoġoto, ekirato, “Tamagu o, iaukagu tu ġoi ġimamu ai atoreani!” Eguruġa-ġosito vau emaseto.

⁴⁷ Vetari verena na mo veiġa eġitaiato, benamo Barau evaġa-raġeato, ekirato, “Moġoni veġata, mai tarima tu vei-iobukaiobuka tarimana!”

⁴⁸ Marere tarimari ġutuma na mo veiġa eġorato dagnarana ġeġitaiato, benamo kobari ġeiafarito, ġevetuġamaġi-rakavato, ġeri numa ġana ġeġenoġoito.

⁴⁹ Senaġi Iesu ġeribaioato tarimari mabarari, Galilea na ġia murina na ġeiaġomato vavineri maki, manaġai ġeruġato, ġeġorato dagarari ġeġitarito.

Iesu ġeguriato

Mataio 27:57-61; Mareko 15:42-47; Ioane 19:38-42

⁵⁰⁻⁵¹ Tarima ta arana Iosefa etanuto-ġoi Iudea vanuġana Arimatea nuġanai. Ġia tu varina namo tarimana ta, Barau ġena Basileia evaġa-nogaioato-ġoi. Ġia maki Iuda kanisoro tarimana, senaġi ġevakira-toreto veiġana asi eġabi-raġeato.

⁵² Benamo Pilato ġenai eiaġoto, Iesu tauġanina bene ġabi-riġoa etato.

⁵³ Moġa murinai Iesu tauġanina eġabi-riġoato, dabuġa kurokورونا namona na ekumumato, gara gabuna fore ġebasiato kouġanai etore-toġaiato. Mo gara tu variġuna, nuġanai mase ta roġosi beġere torea.

⁵⁴ Mo veiġa tu Fraidei lavilavi ai eġorato, Sabadi ġana ġevei-toreato-ġoi ġaronna, Sabadi dori eraġasito nai.

⁵⁵ Galilea na Iesu ġesi ġeiaġomato vavineri, Iosefa murina na ġeiaġoto, gara kouġana ema Iesu tauġanina aiġesi etore-toġaiato ġeġitaiato.

⁵⁶ Benamo ġeġenoġoito Ierusalemna sitina ġana, muramura ma bonari ema daudau muramurari ġeġabi-torerito.

Sabadi ai ġeiaġaraġito taravatu ekirani lorinai.

24

Iesu evariġisi-ġenoġoito

Ioane 20:1-10

¹ Fura ġaronna giniguenai o Sandei ai, vavine tu boġiboġi iamoiamonai gara ġana ġeiaġoto, muramura bonari namori ġerovina-torerito dagarari ġeġwa-iaġorito.

² Gara kouġana forena tu kure-veġita, irau ai vetore ġeġitaiato.

³ Gara kouġana na ġeraka-toġato, senaġi Iesu Vereġauka tauġanina tu asi ġedoġariato.

⁴ Ġia roġo mo ġedaradarato-ġoi nuġanai, tau ruarua ġia seviri ai ġeruġa-tarito, ġeri dabuġa tu kuro-ġaroġarori.

⁵ Vavine tu ġeġari-rakavato, tano ai ġetutuġu-tarito, benamo mo tarima na ġevaġa-guruġarito, ġekirato, “Karase nai maġuri tarimana mase gabunai ġovetauani?”

⁶ Ġia tu dia mainai; mase na ma bevariġisi-ġenoġoi. Galilea etanuto-ġoi nai, evaġa-guruġamito guruġana boġono tuġamaġia,

⁷ ekirato, “Tarimarima Natuna tu rakava tarimari ġeri ai beġe revaiani, beġe vaġa-satauroani, ġaro vaġa-toitoinai vau ma bevariġisi-ġenoġoini.”

⁸ Benamo vavine na mo guruġa ġetuġamaġi-doġariato.

⁹ Gara ġeraga-kwaneato, ġeġenoġoito, mo dagara eġorato dagnarana varina mabarana Iesu ġena mero gabanana sebona (11) ma karori ġesi ġekira-vararito.

¹⁰ Vavineri tu maiġeri: Maria, Magadala vavinena, e Ioana, e Maria, Iakobo (o James) sinana, ema karori tari maki. Ġia na mai vari Iesu ġena apostolo tarimari ġeri ġekiraġito.

¹¹ Senaġi vavine ġeri guruġa asi ġevaġa-moġonirito, korana apostolo ġetuġamaġito, ġia noġa ġeguruġa-babobaboto-ġoi.

¹² Senaġi Petero tu evariġisito, eraga-iaġoto, gara kouġanai ea boġe-toġato, senaġi Iesu ġekumuato dabuġari moġo eġitarito. Benamo numa ġana eġenoġoi-iaġoto nuġanai, ġeġorato dagarari etuġamaġirito nai, eġaba-rakavato.

Iesu Emausa dabaranai efoforito
Mareko 16:12-13

¹³ Mo ġaro sebonai Iesu ġena mero ruarua tu Emausa vanuġana ġana ġeiaġoto; mo gabu ġena manaġa Ierusalemna na tu 11 kilomita kavana.

¹⁴ Ġerakato-ġoi nuġanai, ġeġorato dagarari ġeguruġa-guruġa iaġirito-ġoi.

¹⁵ Ġeri raka guruġa-guruġai Iesu maki eraka-kavi-iaġoto, ġia ġesi ġeraka-iaġoto-ġoi.

¹⁶ Senaġi tauri ruarua asi ġeribato ġia tu dei.

¹⁷ Iesu na edanaġirito, ekirato, “Gomi tu kara mai dabarai ġoraka-guruġa guruġa-iaġiani?” Benamo tauri ruarua ġeruġa-tarito, ġeboġe-vetuġato.

¹⁸ Benamo ġia ta, arana Kleopa, na evaġa-veseato, ekirato, “Ierusalemna ġana ġeiaġomato tarimari fakari ai betaġu ġoi moġo ġereġamu mainai beġe ġora dagarari asi ribamu?”

¹⁹ Iesu evedanaġito, ekirato, “Kamara dagara?” Ġia ġevaġa-veseto, ġekirato, “Iesu, Nasareta tarimana, ġenai ġeġorato dagarari. Ġia tu peroveta tarimana, Barau ġoiranai e tarimarima mabarari ġoirari ai ġena veġa ema ġena guruġa maki ma seġukari.

²⁰ Ġita ġera Rubu Veaġa vereri baregori ema ġera vegorikau tarimari na ġerevaiato bene mase ġana, ġevaġa-satauroato.

²¹ Senaġi ġai ġatugaġito, ġia na Isaraela tarimari bevaġa-maġuririni.

Mai dagara eġorato beiaġoma toma tu varau ġaro toitoi beġe iaġo.

²² Moġa iatanai, ġema vavine tari na ġai nuġama beġe vaġa-farevaġiri. Ġia tu boġiboġi iamoiamonai gara ġana beġe iaġo.

²³ Senaġi tauganina asi beġe doġaria. Benamo beġe ġenoġoi-iaġoma, beġe kira tu, aneru beġe ġitari, mo aneru na beġe kirari, ‘Ġia tu varau bemaġuri-ġenoġoi,’ beġesi.

²⁴ Ġai karoma tari maki gara ġana beġe iaġo, vavine na beġe kiraġia kavana beġe doġaria, senaġi Iesu asi beġe ġitaia.”

²⁵ Benamo Iesu na ekirarito, ekirato, “Gomi tu babo, peroveta tarimari ġeri guruġa vaġa-moġoniri ai maki kwaibo rakava!

²⁶ Keriso tu moġesi bene midigu-midigu murinai vau, mareva namonai bene raka-toġa, ene?”

²⁷ Benamo ġia varina Mose e peroveta tarimari ġeri bukai ema Buka Veaġa mabarana maki ġetorerito guruġari aniri evaġa-ribarito.

²⁸ Ġeiaġo-viniato-ġoi vanuġana Emausa ġekavinaġiato, benamo ġia tu bene raka-vanaġi etato.

²⁹ Senaġi ġekira-ġoiato, ġekirato, “Ġai ġesi notanu, korana belavilavi ema ġaro maki mai emukunani bene.” Benamo ġia ġesi ġeraka-toġato, ġetanuto.

³⁰ Ġaniġani gabunai ġetanu-taġoto-ġoi nai, Iesu na beredi eġabiato, evaġa-namoato, edudu-ġutuato, tauri ruarua evinirito.

³¹ Benamo matari ġevekeoto, ġeribato mo tu ġia. Senaġi ġia tu ġoirari ai erekwa-rekwato.

³² Benamo tauri ruarua ġevoguruġa-vevinito, ġekirato, “Dabarai evaġa-guruġarani-ġoi nai, ema Buka Veaġai ġetorerito guruġari aniri ġera ekiraġi-maġatarini-ġoi nai, ġita nuġara tu ġeseġuseġuni-ġoi, noġa moġo karava na ġeġararini-ġoi, ene?”

³³ Benamo maoromaoro ġevariġisito, Ierusalemna ġana ma ġeġenoġoi-iaġoto, Iesu ġena mero gabanana sebona (11) ma karori ġesi vegogo-taġori ai ġedoġaririto.

³⁴ Ġia na tauri ruarua ġevaġa-guruġarito, ġekirato, “Moġoni veġata, Vereġauka tu bevariġisi-ġenoġoi ema Simona ġenai maki efoforito.”

³⁵ Benamo tauri ruarua na dabarai eġorato dagarana ema kamasi Iesu na beredi edudu-ġutuato vauro, Iesu ġia na ġeġita-leaiato ġeri ġekiraġito.

Iesu tu ġena mero ġeri ai efoforito
Mataio 28:16-20; Mareko 16:14-18; Ioane 20:19-23

³⁶ Mo tarima ruarua roġo ġeguruġato-ġoi nuġanai, Vereġauka ġia fakari ai eruġa-rosito, benamo ekirarito, ekirato, “Maino ġemi ai bene tanu.”

³⁷ Ġia tu nuġari maki ġefarevaġi-rakavato ema ġegarito, ġia mataboru ġekirato, murava ta ġeġitaiato.

³⁸ Senaḡi ḡia ekirato, “Karase nai nuḡami beḡe vekwaraḡi-rakava? Kara dainai ḡodaradarani?”

³⁹ Ġimagu ema kwakugu ḡoma ḡitari, benamo boḡono riba mai tu au. Ġoma ḡabi-karagu, benamo boḡono riba, korana murava tu asi viriḡona ema asi turiḡana, ḡoḡitaguni au tu ma viriḡogu e ma turiḡagu.”

⁴⁰ Moḡesi ekirato, benamo ḡimana ema kwakuna evaḡa-ḡitarito.

⁴¹ Senaḡi ḡia tu roḡo ḡedaradarato-ḡoi ḡeri iaku ema ḡeri nuḡa-farevaḡi dainai; benamo Iesu na edanaḡirito, ekirato, “Ganiḡani tari manigeri ba?”

⁴² Ġia na maḡani-kone gabugabuna ta ḡeviniato.

⁴³ Benamo Iesu na eḡabiato, ḡoirari ai eḡaniato.

⁴⁴ Benamo evaḡa-guruḡarito, ekirato, “Au tu roḡo ḡomi ḡesi tatanu-vegogoto-ḡoi nai, akiramito-ḡoi: Mose ḡena taravatu e peroveta tarimari ḡeri guruḡa ema Salamo ai au varigu ḡetorerito guruḡari mabarari beḡe moḡonini.”

⁴⁵ Benamo Iesu na nuḡari ekeorito, Buka Veaḡa guruḡari aniri beḡene tuḡamaḡi-fakari ḡana.

⁴⁶ Ma ekirarito, ekirato, “Maḡesi ḡetoreato: Keriso tu moḡesi roḡo bemidigu-midiguni, ema ḡaro vaḡa-toitoinai mase na ma bevariḡisi-ḡenoḡoini.

⁴⁷ Ema ḡia aranai vetuḡamaḡi-kure ema rakava tuḡamaḡi-fitoḡari beḡene ḡobata-iaḡi-rovorovori tanobara mabarari ai, Ierusalem na bene vematama.

⁴⁸ Mai dagara vaḡa-moḡoniri tarimami tu ḡomi.

⁴⁹ Au tauḡegu na tu Tamagu na ekiraḡi-toreato Iaukana batuḡuani, iatami ai befororini. Gomi tu Ierusalem boḡono tanu, bene iaḡo mo, guba na bemaḡoni seḡukana boḡo ḡabiani.”

Iesu Barau na eḡabi-varaḡeato guba ḡana

Mareko 16:19-20; Apostolo 1:9-12

⁵⁰ Moḡa murinai Iesu na Ierusalem na eḡori-rosirito, ḡeiaḡoto mo, Betania ḡana, benamo ḡimana eḡabi-vaisirito, evaḡa-namorito.

⁵¹ Evaḡa-namorito-ḡoi nuḡanai, Iesu tu ḡia ḡerina eveḡitato, Barau na eḡabi-varaḡeato guba ḡana.

⁵² Ġia na ḡetoma-rakarigo viniato murinai, ma iakuri e ma verereri ḡesi Ierusalem ḡana ma ḡeḡenoḡoi-iaḡoto.

⁵³ Benamo Rubu Veaḡai ḡetanuto-ḡoi, Barau ḡevaḡa-raḡeato-ḡoi.

VARI NAMONA IOANE NA ETOREATO

Ioane vaġa-foforina guruġari

Ioane tu Iesu ġena apostolo tarimari gabanana ruarua (12) nuġari ai tarimana ta. Ġia tamana tu Sebadaio, ma ġia tu kone ai maina tarimari.

Ioane ġena mai Vari Namona tu laġani 85 beiaġo 95 fakari ai ta etoreato, mo tu Iesu emaseto murinai. Ġia na mai Vari Namona tu tanobara tarimari mabarari, ġemaġuri-ġenoġoito ema asi ġemaġuri-ġenoġoito, ġeri etoreato.

Ġia ġena ura baregona tanobara tarimari mabarari bene vaġa-ribari, Iesu Nasareta tarimana tu moġoni Barau Natuna, e Iesu tu moġoni Barau na tanobara ġana etuġu-mariġoato, tanobara tarimari ġia ġenana maġuri beġene ġabia uranai, ema Barau vetoġana korikorina tu ġia ġenana ema vevaġa-foforiato tarimarima ġeri ai. Siri baregona Ioane ġena Vari Namona bukana nuġanai tu karoa 20:31, "Maiġeri guruġa atorerito, korana tu ġomi na Iesu boġono vaġa-moġonia, ġia tu moġoni Keriso, Barau Natuna. Ma bema ġomi na ġia boġo vaġa-moġoniani nai tu, ġia aranai maġuri vanaġivanai boġo ġabiani."

Ioane ġena toretore tu maiġesina eboiġaiato:

1. Barau Natuna - karoa 1:1-18

2. Barau ġena vetuġunaġi Iuda tarimari fakari ai ema iaġo-vinito - karoa 1:19-12:50

3. Barau ġena vetuġunaġi Iesu tauġena ġena mero fakari ai ema iaġo-vinito - karoa 13-17

4. Barau vetuġunaġina ema iaġo-vinito tanobara vaġa-maġurina ġana - karoa 18-21

Maġuri guruġana

¹ Tovotovonai veġata Guruġa etanuto-ġoi. Mo Guruġa tu Barau ġesi ġetanuto-ġoi, ema mo Guruġa tu Barau.

² Ġia tu tovotovona na veġata Barau ġesi ġetanuto-ġoi.

³ Dagara mabarari tu Barau na ġia ġenana eveirito. Ma Barau na dagara sebona kwariġutu ta maki dabara borunai ta maki asi eveiatio, asiġina ġinavaġi.

⁴ Maġuri tu ġia nuġanai beġene iaġo; mo maġuri tu tarimarima ġeri mama.

⁵ Mama tu mukuna nuġanai emamani, senaġi mukuna na asi etuġamaġi-fakaiato e asi eġita-leaiato.

⁶ Barau na tarima ta etuġuato, arana tu Ioane.

⁷ Ġia tu guruġa moġonina kiraġi-kiraġina ema mama vaġa-foforina ġana eiaġomato. Be ġia ġenana tarimarima mabarari na vari beġene seġaġia e beġene vaġa-moġonia ġana.

⁸ Ġia tauġena tu dia mo mama, senaġi ġia eiaġomato tu, mama benema kiraġia ġana.

⁹ Mo mama tu mama korikorina, tanobara ġana eiaġomato, tarimarima mabarari mama benema viniri ġana.

¹⁰ Guruġa tu tanobarai etanuto-ġoi, ema mo guruġa ġenana Barau na tanobara eveiatio, senaġi tanobara na tu asi eribaiato.

¹¹ Ġia tu ġena tanobara ġana eiaġomato, senaġi ġena tarimarima na asi ġeġabi-raġeato.

¹² A tarimarima kotari na ġeġabi-raġeato e ġevaġa-moġoniatio nai, ġia na maoro evinirito, Barau natunai beġene iaġo.

¹³ Ġia Barau natunai ġeiaġoto tu dia tauġanina ġenana. Mo tu dia sina tama rarari na o tauġani ġena urai o sina tama ġeri urai. Asiġi, tarimarima tu Barau tauġena ġereġana na moġo ġia natunai evaġa-iaġorini.

¹⁴ Mo Guruġa tu tarimarima tauġaninai eiaġoto, benamo gai fakamai ema tanuto. Ġia marevana e seġukana baregona ġaġitaiato. Moġa tu Barau na Natuna sebona kwariġutu evinatio marevana e seġukana. Varevare-bara ema guruġa e maġuri moġonina na evonuvonu-raġeto.

¹⁵ Ioane na ġia guruġana ekiraġi-foforiato, ekeato, ekirato, "Au na akiraġiatio tarimana tu maiġa, akirato, 'Au murigu na beiaġomani tarimana na au evanaġiguto. Korana tu au maki roġosi roġo bana maġuri nuġanai veġata, ġia tu etanuto-ġoi.'"

¹⁶ Ġia tu varevare-bara na evonuvonu-raġeto. Mo ġena varevare-bara lorinai ġita mabarara vevaġa-namo iatai-iatai maki evinirani.

¹⁷ Korana Barau na Mose ġenana taravatu eviniratio, a varevare-bara ema guruġa e maġuri moġonina tu Iesu Keriso na eġwa-iaġomarito.

¹⁸ Tovotovona na veġata beiaġoma maitoma tarima ta na Barau asi eġitaiato. Natuna ġora ġereġa, Tamana sevina i etanuni tarimana, ġia na Barau ema vaġa-foforiato.

Ioane Babatiso ġena guruġa-fofori

Mataio 3:1-12; Mareko 1:7-8; Luka 3:15-17

¹⁹ Ioane ġena guruġa-fofori tu maiġa. Iuda tarimari na Rubu Veaġa vereri e Levi doġorona tarimari, (mai tu Rubu Veaġai vetuġunaġi tarimari), kotari Ierusalemna na Ioane ġenai ġetuġu-iaġorito, beġene danaġia ġana, beġene kira, “Ġia tu deikara?”

²⁰ Benamo Ioane asi evekira-ġuniġauto, senaġi ġoirari ai eguruġa-foforito, ekirato, “Au tu dia Keriso, (Barau na ekiraġi-toreato vevaġa-maġuri tauna).”

²¹ Ma ġedanagiato, ġekirato, “Ba ġoi tu deikara? Goi tu Elia ba?” Ġia ekirato, “Au tu dia Elia.” Ma ġekirato, “Ġai na peroveta tarimana ġanariani tarimana tu ġoi ba?” Ġia evaġa-veseto, ekirato, “Asiġina!”

²² Benamo ġia na ma ġedanagi-ġenoġoiato, ġekirato, “Ba ġoi tu deikara? Ġemu vevaġa-vese novini-ġinikauma, be beġe tuġuma tarimari ġeri ai baġana iaġo, baġana vaġa-ribari. Goi tauġemu varimu tu aiġesi?”

²³ Benamo Ioane tauġena evevari-fiuto, ekirato, “Au tu garo ta tano fakanai ekeakoġokoġoni, ekirani, ‘Vereġauka ġena dabara boġono iareva-toretorea.’” Isaia peroveta tarimana na ekiraġi-ġuineato ilailana.

²⁴ Mo vetuġu ġeiaġo-viniato tarimari tu Farisea tarimari.

²⁵ Benamo Ioane ġedanagiato, ġekirato, “Bema ġoi tu dia Keriso, e dia Elia, e dia mo peroveta tarimana, karase nai ġoi tu ovevaġa-babatisoni?”

²⁶ Ioane evaġa-veseto, ekirato, “Au tu nanu na moġo ababatisoni, senaġina tarima ta tu ġomi fakami ai eruġa-taġoni, ma ġomi tu asi ribami ġia.

²⁷ Ġia tu au murigu na eiaġomani, ema au tu asi ilaila, ġia ġena tamaka varori baruġarini.”

²⁸ Mai dagara mabarari tu Betania, Ioridana ġarukana mo rekenai, ġeġorato, Ioane ebabatisono-ġoi gabunai.

Barau ġena ġinitaġo mamoena

²⁹ Ma elaġanito nuġanai, Ioane na Iesu eġitaiato, ġia ġenai eiaġomato-ġoi, benamo ekirato, “Ġoboġe, mani tu Barau ġena Mamoe Natuna, ġia na tanobara ġena rakava beġabi-vaġiani.

³⁰ Au na tu ġia akiraġiato, akirato, ‘Au murigu na eiaġomani tarimana na evanaġiguto, korana tu au roġosi roġo bara maġuri nuġanai veġata, ġia tu etanuto-ġoi.’

³¹ Tovo-tovonai au tu asi ribaġu ġia, senaġi au aiaġomato nanu na ababatisoni, korana tu Isaraela tarimari na Iesu beġene ribaia ġana.”

³² Benamo Ioane ma eguruġa-foforito, ekirato, “Iauka aġitaiato, guba na emariġoto pune noġa, ġia iatanai etanukauto.

³³ Tovotovonai au tu asi ribaġu ġia, senaġi Barau na etuġuguto, bana iaġoma tu, tarimarima nanu na bana babatisoni ġana. Ġia na evaġa-guruġaguto, ekirato, ‘Goi na tarima ta boġitaiani, Iauka bemarigoni, iatanai betanu-kauni. Mo tau tu tarimarima Iauka Veaġa na bebabatisoni.’”

³⁴ Ioane ekirato, “Au na aġitaiato naima akiraġi-foforiani, ġia tu Barau Natuna.”

Iesu ġena mero ġiniguineri

³⁵ Ma elaġanito nai tu, Ioane e ġena mero ruarua ġesi monai ma ġeruġa-taġoto-ġoi.

³⁶ Ġeruġa-taġoto-ġoi nuġanai tu, Iesu eraka-vanaġito, eġitaiato, benamo ekirato, “Ġoboġe, Barauna Mamoe Natuna, (ġena ġinitaġo mamoena), ġoġitaia.”

³⁷ Ma Ioane ġena mero ruarua na mo guruġa ġeseġaġiato, benamo Iesu murina na ġeiaġoto.

³⁸ Iesu eruġa-kureto, ma murinai ġerakakauto tarimari ruarua eġitarito, benamo edanaġirito, ekirato, “Ġomi tu kara ġourani?” Ġia ġevaġa-veseto, ġekirato, “Rabi, ġoi tu ainai otanuni?” Rabi anina tu vevaġa-riba tarimana.

³⁹ Ġia evaġa-veseto, ekirato, “Goiaġoma, ġoma ġitaia.” Benamo ġia ġesi ġeiaġoto, ma ġena tanu gabuna ġea ġitaiato, mo ġaro vinubana tu ġia ġesi ġebukato. Mo tu horaġauna 4 koloko lavilavi rekenai.

⁴⁰ Ioane ġena guruġa ġeseġaġiato, benamo Iesu murinai ġerakato tarimana ta tu Anduru, Simona Petero tarina.

⁴¹ Anduru na Iesu eraga-kwaneato. Asikauna kakana Simona edoġariato, benamo ekirato, ekirato, “Ġai na Mesia baġa doġaria.” Mesia anina tu Keriso, (Barau na ekiraġi-toreato vevaġa-maġuri tarimana).

⁴² Benamo ġia na Simona Iesu ġenai eġori-iaġoato. Iesu na eġitaiato, benamo ekirato, “Ġoi aramu tu Simona, Ioane natuna, senaġi ġoi toma aramu beġe kiragiiani tu Kefas beġe toni.” Mai ara “Kefas” ema “Petero” aniri tu sebona, garo ai anina tu “Fore”.

Iesu na Filipo e Natanaela ekearito

⁴³ Ma elāganito nai tu, Iesu tu Galilea tanona ġana neiaġo etato. Ġia na Filipino edoġariato, benamo ekiraiato, ekirato, “Murigu ai noma raka.”

⁴⁴ Filipino tu Betesaida tarimana, Anduru e Petero ġesi vanuġa sebona.

⁴⁵ Filipino na Natanaela edoġariato, benamo ekiraiato, ekirato, “Mose ġena taravatu ai ema peroveta tarimari ġeri bukai varina ġetoreato tarimana tu baġa doġaria; ġia tu Iesu, Nasareta tarimana, Iosefa natuna.”

⁴⁶ Natanaela evedanaġito, ekirato, “Nasareta na dagara namona ta beiaġomani?” Filipino ekirato, “Noiaġoma, noma ġitaia.”

⁴⁷ Iesu na Natanaela eġitaiato, eiaġomato-ġoi, benamo ġia ekiraiato, ekirato, “Ġoboġe, mani tarima tu Isaraela tarimana korikorina, ġia ġenai ġofaġofa ta tu asi etanuni.”

⁴⁸ Natanaela na edanaġiato, ekirato, “Kamasi boribagu?” Iesu na evaġa-veaseato, ekirato, “Filipo tu vau bekeamu. Au na ġoi tu baġita-guinemu figi ġauna gaburenai roġo otanuto-ġoi nai.”

⁴⁹ Benamo Natanaela na evaġa-veaseato, ekirato, “Vevaġa-riba tarimamu, ġoi tu Barau Natuna; ġoi tu Isaraela Verena.”

⁵⁰ Iesu na ma evaġa-veaseato, ekirato, “Ġoi na au ovaġa-moġoniguni, korana au na bakira-varamu, ġoi tu figi ġauna gaburenai baġita-guinemu, nene? Veiġa tari vau boġitarini, mai veiġa maigā maki beġe vanaġiani.”

⁵¹ Benamo ma ekirarito, ekirato, “Moġoni veġata, au na ġomi akiramini, guba bevekeo-fakani boġo ġitaiani, ema Barau ġena aneru beġe varaġeni e beġe mariġoni boġo ġitarini Tarimarima Natuna ġenai.”

2

Veġaraġo verekona Kana vanuġanai

¹ Ġaro ruarua ġekorito murinai, Kana vanuġana nuġanai veġaraġo verekona ta ġeveiato. Kana vanuġana tu Galilea tanona nuġanai. Mo veġaraġo verekona nuġanai tu Iesu sinana maki monai.

² Ema Iesu ma ġena mero ġesi maki ġeura-maġirito, be mo veġaraġo verekona nuġanai ġeraka-toġato.

³ Vine nanuna o wain ekorito, benamo Iesu sinana na Iesu evaġa-guruġaiato, ekirato, “Ġia tu asi ġari vine nanuna.”

⁴ Iesu na evaġa-veaseato, ekirato, “Vavine, karase nai au oma kira-varaguni? Mani tu ġomi ġemi ġauvei. Au ġegu ġaro tu roġosi bene votu.

⁵ Benamo sinana na vetuġunaġi tarimari evaġa-guruġarito, ekirato, “Kara bekira-varamini veiġana boġono veia.”

⁶ Monai tu fore gwaġuturi imaima sebona (6) vaġa-ruġa, Iuda tarimari ġeri veiareva veiġari ġari ġeġauvei-iaġirito-ġoi. Mo fore gwaġuturi tata nuġari tauri galon gabana ruarua (20) o gabana toitoi (30) kavari.

⁷ Iesu na vetuġunaġi tarimari ekirarito, ekirato, “Mani gwaġutu nanu na ġovaġa-vonuri!” Benamo ġevaġa-vonu fokafokarito.

⁸ Moġa murinai ma ekirarito, ekirato, “Kota ġoġutu-vaġia, ġoġwa-iaġoa vereko ġorikauna tarimana ġenai.” Ġegutu-vaġito, benamo ġeġwa-iaġoato,

⁹ vereko ġorikauna tarimana na mo nanu, vine nanunai evaġa-iaġoato moġa, eniutovoato. Ġia tu asi ribana mo vine nanuna tu ainana eiaġomato; a nanu ġesisiato merori ġereġari moġo ma ribari. Benamo vereko ġorikauna tarimana na veġaraġo variġu tauna ekea-iaġomaiato, benamo evaġa-guruġaiato, ekirato,

¹⁰ “Tarimarima mabarari na vine nanuna namo vedaureana tu ġetore-rosi guineani, benamo vereko tarimari ġeniu-maseni murinai vau, vine nanuna kota namo raġina ma ġetore-rosiani. Senaġina ġoi na tu vine nanuna namo vedaureana tu boġabi-taria mo maitoma.”

¹¹ Mai tu Iesu ġena vetoġa boruna giniguinena evaġa-foforiato Kana vanuġanai, Galilea tanona nuġanai. Monana ġia marevana e seġukana baregona evaġa-foforiato, ema ġena mero na ġevaġa-moġoniato.

¹² Moġa murinai Iesu ma sinana e tarina merori, ema ġena mero ġesi ġevariġoto Kaperanauma ġana. Ma monai ġaro viravira ta ġetanuto.

Iesu na Rubu Veaġa eiarevaiato

Mataio 21:12-13; Mareko 11:15-17; Luka 19:45-46

¹³ Iuda tarimari ġeri Pasova o Iuda tarimari mase aneruna na evanaġirito moġo verekona ġoirai ekavinaġito naima, Iesu tu Ierusalemna ġana evaraġeto.

¹⁴ Rubu Veaġa nuġanai tarimarima na boromakau, e mamoe, ema pune ġeivoivoi-iaġirito-ġoi, ema tarima kotari teibolo ai ġetanuto ma moni ġesisito-ġoi edoġaririto.

¹⁵ Benamo varo kwarina ta evatoato. Monana Rubu Veāga na mamoe e boromakau mabarari ema lailai-rosirito. Moni ġesenisirito-ġoi tarimari ġeri fata eġuke-vebuburito, ġeri moni ebubu-lausilausirito.

¹⁶ Benamo pune ġevoito-ġoi tarimari ekira-ġoirito, ekirato, “Maġeri dagara mainana ġoġabi-rosiri! Au Tamagu ġena numa tu voivoi numanai asi ġovaġa-iaġoa!”

¹⁷ Benamo ġena mero na Buka Veāgai evetoreto guruġana ġetuġamaġi-doġariato, ekirani, “Ġoi ġemu numa uravinina nuġagu ai tu karava noġa eġarani.”

¹⁸ Moġa murinai Iuda tarimari na ġevaġa-guruġaiato, ġekirato, “Maġesi oveini anina tu kara? Kamara vetoġa na bevaġa-foforimuni ġai ġemai, ġoi tu ma ġemu maoro maġeri boveirini?”

¹⁹ Iesu evaġa-veseto, ekirato, “Mai Rubu Veāga ġorovoa, benamo ġaro toitoi nuġanai au na ma bana vaġa-ruġa-vaisi ġenoġoia.”

²⁰ Ġia na ġekiraiato, ġekirato, “Mai Rubu Veāga tu laġani gabana vasivasi ma imaima sebona (46) nuġari ai ġeragaiato. A ġoi na tu ġaro toitoi nuġanai ma boraga-ġenoġoiani otoni?”

²¹ Senaġi Iesu na tu ġia tauġanina Rubu Veāgai evaġa-ilailaiato.

²² Iesu mase na evaisi-raġeto murinai, ġena mero na mo guruġa ġetuġamaġi-doġariato, benamo ġia na Buka Veāga ema Iesu na evaġa-ribarito guruġari ġevaġa-moġonirito.

Iesu ribana tarimarima ġeri veġa

²³ Iesu Pasova o Iuda tarimari mase aneruna na evanaġirito moġo verekona ġarori ai Ierusalemaj etanuto-ġoi nai, tarima vovoka na ġevaġa-moġoniato, korana tu vetoġa boruri ġutuma eveirito ġeġitarito nai.

²⁴ Senaġi Iesu na ġia asi evaġa-moġonirito, korana tarimarima mabarari ġia tu ma ribana ġinikau.

²⁵ Ema tarima ta tu asi ilaila ġia tarimarima ġeri maġuri dabarari bekira-varaiiani, korana tarimarima mabarari nuġari tu ġia ma ribana.

3

Iesu e Nikodemo

¹ Farisea tarimana ta etanuto-ġoi arana Nikodemo; ġia tu Iuda tarimari ġeri veġorikau tauna ta.

² Nega ta boġi ai Iesu ġenai eiaġoto, benamo ekirato, “Rabi, ġai ribama, ġoi tu vevaġa-riba tarimamu, Barau ġenana oiaġomato, korana tu vetoġa boruri oveirini maġeri tu Barau na asi evaġa-kavaiani tarimana na tu asiġina ġinavaġi beveirini riba.”

³ Iesu na evaġa-veseato, ekirato, “Moġoni veġata akiramuni, asi beġora-ġenoġoini tarimana na Barau ġena Basileia tu asiġina ġinavaġi beġitaiiani.”

⁴ Benamo Nikodemo na edanaġito, ekirato, “Tarima baregona ta tu kamasi ma beġora-ġenoġoini? Sinana nuġanai ma beraka-toġani, benamo ma beġora-ġenoġoini?”

⁵ Iesu ma evaġa-veseto, ekirato, “Au na akira-korikorimuni, tarima ta Barau ġena Basileia nuġanai asi berakatoġa-kavani, senaġina nanu ġenana beġorani ema Iauka ġenana maki beġorani tarimana vau beraka-toġani.

⁶ Tarimarima tauġanina ġenana eġorani tu tauġani, ma Barau Iaukana ġenana eġorani tu Iauka.

⁷ Ġoi nuġamu asi bene farevaġi maġesi akiramuni nai, korana au bakira, ‘Ġomi mabarami boġono ġora-ġenoġoi.’

⁸ Iavara etoġani tu, eurani gaburi ġana eġau-iaġoni. Guruna tu ġoseġaġiani, senaġi ainana eiaġomani, ma aiġana eiaġoni tu asi ġoribaiani. Barau Iaukana ġenana ġeġorani tarimari mabarari maki moġesina, asi ġoribani kamasi ġeġorani.”

⁹ Nikodemo ma evedanaġito, ekirato, “Mai dagara tu kamasi beġe ġorani?”

¹⁰ Iesu ma evaġa-veseto, ekirato, “Ġoi tu Isaraela ġeri vevaġa-riba tarimamu, senaġi maġeri dagara ġoi tu asi ribamu?”

¹¹ Au na akira-korikorimuni, ġai tu ribama dagarari ġaguruġa-iaġirini, ema ġaġitarito dagarari ġakiraġi-foforirini, senaġina ġema guruġa tu asi ġoġabi-raġerini.

¹² Au na ġomi ġemi tu tanobara dagarari akiraġirini, senaġi asi ġovaġa-moġoniguni, a guba dagarari bakira-varamini nai tu, kamasi boġo vaġa-moġoniguni?

¹³ Tarima ta guba ġana asiġina ġinavaġi evaraġeto, senaġina guba na emariġoto tarimana ġereġana moġo, mo tu Tarimarima Natuna.

¹⁴ Mose na tano fakanai mota eġabi-vaisiato ilailanai, Tarimarima Natuna maki moġesi beġe ġabi-vaisiani.

¹⁵ Monana vau ġia ġenai beġe veġabidadamani tarimari mabarari na maġuri vanagivanagġi beġe gabiani.

¹⁶ Korana Barau na tanobara euravini-baregoato nai, Natuna ġora ġereġa evinirato, be ġia beġe ġabidadama-viniani tarimari mabarari tu asi beġe maseni, a maġuri vanaġivanaġi beġe ġabiani.

¹⁷ Korana Barau na Natuna etuġu-mariġoato tanobara ġana tu, dia tanobara bene vaġa-kotaia ġana, senaġi tanobara ġia bakunai bene maġuri ġana.

¹⁸ Ġia ġenai eveġabidadamani tarimana tu meto asi beviniani, senaġi asi eveġabidadamani tarimana tu varau meto eġwa-taġoani, korana ġia na tu Barau Natuna ġora ġereġa asi eġabidadama-viniani nai.

¹⁹ Mo meto korana tu maġesi: Mama tu tanobarai varau ema foforito, senaġi tarimarima na mukuna ġeuravini-baregoato, korana ġeri veġa tu rakava nai.

²⁰ Veġa rakavari ġeveini tarimari mabarari na tu mama ġeruġaiani, mama asi ġeiaġo-viniani. Ġia tu ġegarini, korana ġeri veġa rakavari beġe foforini mamai garina.

²¹ Senaġi deikara dabara moġonina ekorana-iaġiani tarimana na mama eiaġo-viniani, benamo tarimarima na beġe ġita-ġinikauani, ġena veġa namori eveirito tu Barau ġenana eveirito.

Iesu ema Ioane

²² Moġa murinai Iesu ma ġena mero ġesi Iudea tanona rekena ġana ġeiaġoto. Monai Iesu tu ġena mero ġesi ġetanuto-ġoi e ebatisoto-ġoi.

²³ Ioane maki Aenon ai, Salim rekena, ebatisoto-ġoi, korana nanu tu barego monai. Tarimarima mo ġana ġeiaġoto-ġoi, ea babatisorito-ġoi.

²⁴ Mo tu Ioane dibura numanai roġosi ġere kou-ġaua nuġanai.

²⁵ Moġa ġaronai Ioane ġena mero Iuda tarimana ta ġesi ġeveġare-veġareto. Ġia ġeri guruġa tu, kamara veġuriġi veġanai tu tarimarima benamo-vedaureani.

²⁶ Ioane ġena mero Ioane ġenai ġeiaġoto, benamo ġekirato, "Vevaġa-riba tarimamu, Ioidana ġarukana mo rekena ġoi ġesi ġotanuto-ġoi e ġoi na oguruġa-iaġiato tarimana tu ebatisoni, ema tarimarima vovoka ġia ġenai ġeiaġoni."

²⁷ Ioane evaġa-veseto, ekirato, "Tarima ta na dagara ta asi beġoitaġo-kavaiani, senaġi Barau na guba na bevini-riġoani vau beġoitaġoni.

²⁸ Gomi tauġemi na ġoseġaġiguto, be ma ribami au akirato, 'Au tu dia Keriso, (Barau na ekiraġi-toreato vevaġa-maġuri tauna), senaġi au tu etuġu-guineguto ġia ġoirana ġana.'

²⁹ Beveġaraġoni ġuiatona tu beġaraġoani futuana na beġaraġoani. A beveġaraġoni futuana ġatana tu eruġa-taġoni moġo, (mai tu au, Ioane), ema gatana eseġaġi-ġauni, ma ġatana beveġaraġoni futuana garona beseġaġiani nai tu, beiakuni. Moġesi naima au tu iaku na bama vonuvonu-raġe.

³⁰ Ġia tu bene barego, a au tu bana kei."

Iesu tu guba na eiaġomato

³¹ "Tuġuna na emariġoto tarimana tu dagara mabarari iatari ai; tano na eiaġomato tarimana tu tanobara tarimana ema tanobara guruġari moġo bekiragiini. Guba na eiaġomato tarimana dagara mabarari iatari ai.

³² Ġia tu monai eġitato e eseġaġito dagarari ekiraġi-foforirini, senaġi tarima ta na ġena guruġa asi eġabi-raġeani.

³³ Deikara na ġia ġena guruġa eġabi-raġeani tarimana na evaġa-moġoni korikoriani, Barau tu moġoni veġata.

³⁴ Korana tu Barau na etuġuato tarimana na Barau ġena guruġa bekiragiiani, korana tu Barau na ġena Iauka Veaġa eviniato ema evaġa-vonuvonu-raġeani.

³⁵ Tamana na Natuna eura-viniani, ema dagara mabarari ġia ġimanai etore-kaurito.

³⁶ Deikara na Natuna evaġa-moġoniani tarimana na maġuri vanaġivanaġi beġabiani. A Natuna asi evaġa-moġoniani tarimana na maġuri asi beġabiani, senaġi Barau ġena baru tu ġia iatanai betanuni."

4

Iesu ema Samaria vavinena

¹ Farisea tarimari tu varau ġeseġaġito, Iesu na tarima vovoka eġabirito, ġena mero ai evaġa-iaġorito e ebatisorito, ma Ioane na tu asi vovoka eġabirito.

² Senaġina Iesu tauġena na ta tu asi ebatisoato; mo tu ġena mero moġo ġebabatisoto-ġoi.

³ Iesu eribato ġia varina Farisea tarimari na eseġaġiato, benamo Iudea eiaġuiato, Galilea ġana ma eġenoġoi-iaġoto.

⁴ Galilea ġana tu Samaria tanona na eraka-vanaġito.

⁵ Samaria vanuġana tai eraġasito. Mo vanuġa arana tu Sika. Mo vanuġa tu Iakobo na natuna Iosefa eviniato tanona sevinai.

⁶ Iakobo ġena nanu gurina maki monai. Iesu tu eraka-iaġomato, be egaugau-raġeto, benamo mo nanu gurina sevinai etanu-tarito. Mo tu horaġauna 12 koloko nuġanai ġarogġotai.

⁷ Etanu-taġoto-ġoi nuġanai, Samaria vavinena ta nanu ġutu eiaġoto, benamo Iesu na enoġiato, ekirato, “Nanu kota noma vinigu, be nama niu.”

⁸ Ġena mero tu vanuġa ġana, ġaniġani voi ġeiaġoto.

⁹ Samaria vavinena evaġa-veseto, ekirato, “Ġoi tu Iuda taumu, ma au tu Samaria vavinegu, karase nai au ġegu ai nanu onoġini?” Moġesi ekirato, korana Iuda tarimari tu Samaria tarimari ġesi asi ġevegara-garato-ġoi.

¹⁰ Benamo Iesu na evaġa-veseato, ekirato, “Bema Barau ġena vevvare dagarana boro riba, ema boro riba maki, nanu kota ġemu ai enoġiani tarimana tu deikara nai tu, ġia boro noġia, benamo ġia na maġuri nanuna bere vinimu.”

¹¹ Vavine ekirato, “Vereġauka, ġoi tu asi ġemu tuġu-riġo dagarana e guri maki varigo. Mani maġuri nanuna tu ainana boġġabiani?”

¹² Ġoi tu varaġe lelevaġi, ma ġai senema Iakobo tu kei, ei? Mai nanu gurina tu ġia na evinimato, ema ġia tauġena na eniuato-ġoi, natuna mabarari na ema ġena boromakau e mamoe seriri na maki ġeniuato-ġoi.”

¹³ Iesu na ma evaġa-veseato, ekirato, “Mai nanu beġe niuani tarimari mabarari bokari ma beġe koke-ġenoġoini.

¹⁴ A au na baviniiani nanuna beniuani tarimana tu, bokana asi ma bekoke-ġenoġoini. Korana au na baviniiani nanuna tu ġia nuġanai nanu gurina beiaġoni, bevoneġoi-voneġoini ema maġuri vanaġivanuġi beviniani.”

¹⁵ Mo vavine na enoġiato, ekirato, “Vereġauka, mani nanu novinigu, be bokagu asi ma bene koke-ġenoġoi, ema maġana nanu-ġutu asi ma bana iaġoma.”

¹⁶ Benamo Iesu na evaġa-guruġaiato, ekirato, “Noiaġo, ġaraġomu noa keaia, benamo taumi ruarua bogono iaġoma.”

¹⁷ Mo vavine evaġa-veseto, ekirato, “Au tu asi ġaraġogu.” Iesu ekirato, “Mani tu moġoni okirani, ‘Au tu asi ġaraġogu’ otoni tuna.

¹⁸ Ġemu guruġa tu moġoni, korana ġoi tu vaġa-imaima veġata oveġaraġoto, ema mani oġġabiato tarimana maniga tu dia ġoi ġaraġomu.

¹⁹ Mo vavine ekirato, “Vereġauka, au toma bama riba, ġoi tu peroveta tarimamu.

²⁰ Ġai tubuma ġatama na tu mai ġoro ai Barau ġetoma-rakarigo viniato-ġoi, a ġomi Iuda tarimami ġokirani, toma-rakarigo gabuna tu Ierusalemaj moġa, be tarimarima tu monai beġene toma-rakarigo.”

²¹ Iesu ekirato, “Vavine, ġegu guruġa bono vaġa-moġonia, ġaro ta eiaġomani, mai ġoro ai e Ierusalemaj maki Tamara asi boġo toma-rakarigo viniani.

²² Ġomi Samaria tarimami na ġotoma-rakarigo viniani Barauna tu asi ribami; a ġai na ġatoma-rakarigo viniani Barauna tu ribama, korana vevaġa-maġuri tu ġai Iuda tarimama ġemana eiaġomani.

²³ Senaġi ġarona eiaġomani ema varau beraġasi maġa, toma-rakarigo tarimari moġoniri na Tamara Barau tu iaukai e moġoni ai beġe toma-rakarigo viniani. Korana Tamara na tu moġesi beġe toma-rakarigo viniani tarimari evetaurini.

²⁴ Barau tu Iauka, ma beġe toma-rakarigo viniani tarimari na tu iaukai ema moġoni ai beġene toma-rakarigo vinia.”

²⁵ Mo vavine na ekiraiato, ekirato, “Au ribagu, Mesia, ġekiraġiani Keriso ġetoni, tu beiaġomani. Ġia beiaġomani ġaronai, ġia na dagara mabarari bekiraġi-foforirini.”

²⁶ Benamo Iesu na evaġa-veseato, ekirato, “Tarimana tu au maġegu, ġoi avaġa-guruġamuni.”

Iesu ġena mero ġeġenoġoito

²⁷ Iesu moġesi eguruġato-ġoi nuġanai, ġena mero ġeraġasito. Ġia mabarari nuġari ġefarevaġito, korana Iesu tu vavine ta ġesi ġeguruġa guruġato-ġoi, senaġi tarima ta asi ekirato, “Ġoi tu kara ourani?” O “Karase nai mai vavine ġesi ġoguruġa-guruġani?”

²⁸ Benamo mo vavine na ġena nanu gwaġutuna eraga-kwaneato, eġenoġoi-iaġoto vanuġa ġana, benamo vanuġa tarimari ea kirarito.

²⁹ Ekirato, “Goiaġoma, tarima ta ġoma ġitaia. Ġia na au ġegu veġa aveirito dagarari mabarabarari bekiraġi-fofori foririri. Betaġu ġia tu Keriso, (Barau na ekiraġi-toreato vevaġa-maġuri tauna), banaġu?”

³⁰ Benamo tarimarima na vanuġa ġeiaġuiato, ma Iesu ġenai ġeiaġoto.

³¹ Mo faka nuḡanai ḡena mero na Iesu ḡekiraiato, ḡekirato, “Vevaḡa-riba tarimamu, noḡaniḡani.”

³² Senaḡi ḡia evaḡa-veseto, ekirato, “Au tu ma ḡagu ḡaniḡani, ḡomi asi ribami ḡaniḡanina.”

³³ Moḡesina naima ḡena mero tauḡeri ḡevedanaḡito, ḡekirato, “Tarima ta na ḡana ḡaniḡani beḡwa-iaḡoma ba?”

³⁴ Iesu na ekirarito, ekirato, “Au ḡagu ḡaniḡani tu etuḡuguto Barauna ḡena ura bana veia, ema eviniguto ḡauveina bana vaḡa-koria.

³⁵ Ḣomi ma ḡemi sisiba guruḡana, ḡokirani, “Ḣue vasivasi murinai vau kwakwa ḡarona beiaḡomani.” A au na akiramini, matami ḡokeori, benamo vamoka ḡoḡita-ginikauri, tauri tu varau beḡe gwaḡiḡi, kwakwa ḡarona tu beḡaḡasi.

³⁶ Kwakwa tarimana ḡena ḡauvei voina tu beḡabiani, ema vamoka ḡaniḡanina bevaḡa-vegogoani tu, maḡuri vanaḡivananḡi ḡana. Tauna moḡa, varovarona tarimana e kwakwa tarimana beḡe iaku-vegogoni.

³⁷ Korana moḡesi bevetoreni nai tu, iniḡesina ḡekiraḡiani guruḡana tu moḡoni, “Tarima ta na tu evaroani, ma ta na tu ekwaiani.”

³⁸ Au na ḡomi atuḡumito tu, asi ḡovaro-vekwaraḡito dagarari kwakwari. Varovarori vekwaraḡiri tu tarima tari ḡevewaraḡito, a ḡomi na tu ḡia ḡeri vekwaraḡi dagarari kwakwari boḡo raka-toḡa.”

Samaria tarimari ḡutuma na Iesu ḡevaḡa-moḡoniato

³⁹ Benamo Samaria tarimari vovoka mo vanuḡa nuḡanai Iesu ḡevaḡa-moḡoniato, korana tu mo vavine ḡena vevarifiu guruḡana ḡenana naima, ḡia ekirato, “Au ḡegu veia rakavari aveirito dagarari mabarabarari bekirāḡi-fofori foforiri.”

⁴⁰ Moḡesina naima Samaria tarimari Iesu ḡenai ḡeiaḡomato nai tu, ḡenoḡiato, ḡia ḡesi roḡo beḡene tanu. Moḡa lorinai Iesu mo vanuḡai ḡaro ruarua ma etanuto.

⁴¹ Ma tarimarima vovoka na Iesu ḡevaḡa-moḡoniato, korana ḡena vevarifiu guruḡari na.

⁴² Benamo ḡia na mo vavine ḡekiraiato, ḡekirato, “Ḣai na maitoma Iesu ḡavaḡa-moḡoniani, dia ḡoi ḡemu guruḡa lorinai, senaḡi ḡai tauḡena na ḡia baḡa seḡaḡia, ma baḡama riba-ginikau, ḡia tu moḡoni Keriso, tanobara Vaḡa-maḡurina Tarimana.”

Vere ta natuna merona Iesu na keve na evaḡa-maḡurianto

⁴³ Iesu monai ḡaro ruarua etanuto murinai, Galilea ḡana ma eiaḡoto.

⁴⁴ Iesu tauḡena na ekiraḡi-foforiato, ekirato, “Peroveta tarimana tu ḡena vanuḡa korikorina tarimari na asi beḡe gubakauani.”

⁴⁵ Benamo Galileai ea votuto nai tu, Galilea tarimari na ḡeḡabi-raḡeato. Iesu ḡeḡabi-raḡeato korana Ierusalemāi Pasova verekona nuḡanai tu ḡia maki monai, be Iesu na kara eveirito dagarari mabarari tu, matari na ḡeḡitarito.

⁴⁶ Benamo Iesu ma eḡenoḡoito Galilea vanuḡana ta arana Kana ḡana. Kana tu Iesu na nanu wain ai evaḡa-iaḡoato vanuḡana. Monai kini ḡena vere ta Kaperanaumai etanuto-ḡoi, ma ḡia natuna merona tu ekeve-rakavato.

⁴⁷ Mo vere eseḡaḡito, Iesu tu Iudea na eiaḡomato Galilea ḡana, benamo eiaḡoto ḡia ḡenai, benamo enoḡiato, Kaperanauma ḡana nevariḡo, be ḡia natuna merona nea vaḡa-maḡuria, korana ḡia natuna merona tu dori emaseto-ḡoi.

⁴⁸ Iesu na ekiraiato, ekirato, “Ḣomi tu vetoḡa boruri e nuḡa-farevaḡi veigari asi boḡo ḡitarini tu, asi boḡo vaḡa-moḡoniguni.”

⁴⁹ Mo vere ekirato, “Vereḡauka, si-iaḡo, natugu bemaseni ḡesi.”

⁵⁰ Iesu na ekiraiato, ekirato, “Noiaḡo, natumu merona tu bemaḡuri bene.” Mo tarima na Iesu ḡena guruḡa evaḡa-moḡoniato, benamo eiaḡoto.

⁵¹ Dabara na eḡenoḡoi-iaḡoto-ḡoi nuḡanai, ḡena vetuḡunāḡi tarimari ḡesi ḡevedoḡarito, benamo ḡekira-varaiato, ḡekirato, “Ḣoi natumu merona tu bemaḡuri.”

⁵² Benamo ḡia na edanaḡirito, kamara horai natuna merona enamoto. Ḣia ḡevaḡa-veseto, ḡekirato, “Ḣoraḡani horaḡauna 1 koloko lavilavi rekenai ḡia mo keve na eraga-kwaneato.”

⁵³ Benamo tamana eriba-maoroto, mo aoa korikorinai enamoto, Iesu na ḡia evaḡa-guruḡaiato, ekirato, “Ḣoi natumu tu bemaḡuri.” Benamo ḡia e ḡena numa tarimari mabarari ḡesi Iesu ḡevaḡa-moḡoniato.

⁵⁴ Mai tu vetoḡa boruna vaḡa-ruaruana Iesu na eveiato, Iudea na Galilea ḡana eiaḡoto murinai.

5

Kou ai Iesu na tarima ta evaḡa-namoato

¹ Mai veiġa murinai Iesu tu Ierusalemā ġana ma evaraġeto, korana Iuda tarimari tu ġeri vereko ta ġeveiato-ġoi.

² Ierusalemaj kou ta tu ġatama-boka baregona arana Mamoe Ġatama-bokana sevinai. Mo kou arana Heberu garo ai tu Betesda, ma ġia sevinai tu iaġaraġi foutari imaima (5).

³ Ġaro mabarari ai kevekeve tarimari vovoka monai ġegenataġoto-ġoi, mata-bubu, kwaku rakava, ema tauganiri ġemaseto tarimari, [nanu ġena ġareva-ġareva ġevaġa-nogaġato-ġoi.

⁴ Korana aneru ta guba na emariġoto-ġoi, mo nanu evaġa-ġareva ġarevaiato-ġoi. Mo nanu eġarevato-ġoi nuġanai, eturu-ferei guineto-ġoi tarimana tu ġena keve enamoto-ġoi.]

⁵ Monai tarima ta egenataġoto-ġoi, ġena keve laġaniri tu gabana toitoi ma imaima toitoi (38).

⁶ Iesu na monai genataġonai eġitaiato, ma eribato, ġia tu ġaro vovoka veġata ekeve-iaġiato. Benamo Iesu na edanaġiato, ekirato, “Ġoi ourani nonamo ba?”

⁷ Keve tarimana na evaġa-veseato, ekirato, “Vereġauka, nanu eġareva-ġarevani nai, au kou ai tu asi tau raga tore-reiġu tarimana ta. Mainana tauġegu kou aiāġo-viniani nai tu, ta eraka-rei-guineni.

⁸ Iesu na ekiraiato, ekirato, “Novariġsi, ġemu geda noġabi-vaisia, be noraka.”

⁹ Benamo mo tarima ġena keve asikau enamoto, ma ġena geda eġabi-vaisiato, benamo eruġa-vaisito, erakato.

Mo veiġa tu Sabadi ai eġorato.

¹⁰ Moġa lorinai Iuda tarimari na mo keve na enamoto tarimana ġekiraiato, ġekirato, “Toma tu Sabadi, ġemu geda asi bono ġwa-rakao rakaoa, taravatu.”

¹¹ Ġia na evaġa-veserito, ekirato, “Au bevaġa-namoġu tarimana na bekiragu, bekira, ‘Ġemu geda noġabi-vaisia, be noraka,’ besi.”

¹² Benamo ġia na gedanaġiato, ġekirato, “Mo tu kamara tarima na bekiramu, ‘Ġemu geda noġabi-vaisia, be noraka,’ besi?”

¹³ Senaġi mo Iesu na evaġa-namoato tarimana tu asi ribana, dei na evaġa-namoato, korana Iesu tu eraka-veġitato, tarima ġutuma mo gabu ai vekaravari na.

¹⁴ Gabivau Iesu na mo tarima Rubu Veaġa nuġanai edoġariato, benamo ekiraiato, ekirato, “Noseġaġi, maitoma ġoi tu bonamo. Veiġa rakavana ta asi ma bono vei-ġenoġoia, rakava barego vedaureana ta na begabimuni ġesi.”

¹⁵ Benamo mo tarima erakato, eiaġoto, Iuda tarimari ea kira-vararito, ġia tu Iesu na evaġa-namoato.

¹⁶ Monana vau Iuda tarimari na Iesu ġevaġa-rakavaiato-ġoi, korana Sabadi ai mo vevaġa-maġuri veiġana eveġiato nai.

¹⁷ Benamo Iesu na evaġa-veserito, ekirato, “Au Tamagu tu vanaġivanaġi eġauveini naima, au maki aġauveini.”

¹⁸ Moġesi ma ekirato nai, Iuda tarimari ġeri ura tu dabara ta veġata beġene ġoitāġoia, be Iesu tu beġene vaġi-masea ġetatato. Dia mo Sabadi asi ekorana-iaġiato moġo dainai, senaġina ekirato, Barau tu ġia Tamana ma etato. Korana mo dabarai ġia tu Barau ġesi ilaila etato.

Barau Natuna ġena seġuka

¹⁹ Benamo Iesu na evaġa-veserito, ekirato, “Moġoni, au na akira-korikorimini, Natuna ġereġana na kara ta asi beveini, senaġi Tamana ġena veiġa beġitarini veiġari moġo ġia na beveirini. Tamana kara eveini dagarari mabarabarari Natuna na maki beveirini.

²⁰ Korana tu Tamana na Natuna eura-viniani, ema ġia na eveirini dagarari mabarari maki evaġa-ġitaiiani. Oba, dagara barego lelevaġiri maki ġenai bevaġa-foforiani, maġeri dagara maki beġe vanaġirini, ġomi nuġami beġene farevaġi ġana.

²¹ Vaġa-ilailana Tamana na mase tarimari evaġa-vaisi-raġerini, benamo maġuri evinirini kavana, Natuna na maki ġena ura tarimari maġuri evinirini.

²² Tamana na tu tarima ta asi evaġa-kotaiiani, korana vevaġa-kota seġukana mabarana tu Natuna eviniato.

²³ Moġa tauna tu, tarimarima mabarari na Natuna beġene gubakaua, Tamana ġegubakauani kavana. Natuna asi eguba-kauani tarimana na tu Tamana maki asi egubakauani, korana Tamana na tu Natuna etuġuato.

²⁴ Moġoni au na akiramini, au ġegu guruġa eseġaġiani ema etuġuguto Barauna evaġa-moġoniani tarimana na maġuri vanaġivanaġi varau beġabia. Ġia tu Barau ġena Kota nuġanai asi beraka-toġani. Asiġina. Mase varau beraga-kwanea, maġuri nuġanai varau beraka-toġa.

²⁵ Moġoni akiramini, ġarona roġo beiaġomani, ma varau bevotu, mase tarimari na Barau Natuna garona beġe seġaġiani, ma beġe seġaġiani tarimari tu beġe maġurini.

²⁶ Korana tu Tamana tauġena ġenai maġuri etanuni ilailanai, Natuna maki moġesi eviniato, maġuri ġenai etanuni.

²⁷ Ema ġia Natuna maoro eviniato, bene vevaġa-kota ġana, korana ġia tu Tarimarima Natuna.

²⁸ Nuġami asi beġene farevaġi! Ġarona mani eiaġomani, mase tarimari mabarari roġo gara nuġari ai na Barau Natuna garona beġe seġaġiani.

²⁹ Benamo beġema raka-rosini: Vei-namo tarimari beġe vaisi-raġeni, maġuri beġene ġabia ġana, a vei-rakava tarimari beġe vaisi-raġeni, rakava voina metona beġene ġabia ġana.”

Iesu beġe kiraġi-foforiani

³⁰ “Au tu ġereġagu na dagara ta asi haveiani riba. Avevaġa-kotani maki Barau na ekiraguni aseġaġirini ilailari ai aveirini, moġa lorinai ġegu vevaġa-kota tu roroġoto, korana dia au tauġegu ġegu ura ta akorana-iaġiani, senaġi au etuġuguto Barauna ġena ura moġo aveiani.

³¹ Bema au tauġegu moġo bara vekiraġi-fofori nai tu, au ġegu guruġa tu asi tau vaġa-moġonina.

³² Senaġi tarima ta na maki au evaġa-moġoniguni, ma au ribagu, ġia na au ekiraġi-foforiguni guruġana tu moġoni.

³³ Gomi na tarima kotari ġotuġu-iaġorito Ioane ġenai, benamo ġia na guruġa moġonina ekiraġiato.

³⁴ Au vaġa-moġonigu guruġari tu dia tarimarima ġerina eiaġomani, a Ioane bakiraġia korana tu, gomi maġuri boġono doġaria uranai.

³⁵ Ioane tu noġa moġo lamefa eġarato-ġoi ema emore-taġoto-ġoi, benamo gomi mo faka kotunai ġemi ura tu, ġia ġena mamai boġono iaku-tanu moġo ġotato-ġoi.

³⁶ Senaġi au ġevaġa-moġoniguni veiġari na, Ioane na evaġa-moġoniguni guruġari, moġeri tu ġevanaġirini. Korana tu Tamagu na eviniġuto gauveina maitoma aveiani, mainana au evaġa-moġoniguni, au tu Tamagu na etuġuguto.

³⁷ Au tu Tamagu na etuġuguto, ma ġia tauġena na maki au ekiraġi-foforiguto. Ġomi na ġia garona tu roġosi ġoro seġaġia, ema vetoġana maki roġosi ġoro ġitaia.

³⁸ Ema ġena guruġa gomi nuġami ai tu asi etanuni, korana ġia na etuġuato tarimana tu asi ġovaġa-moġoniani.

³⁹ Gomi na Buka Veaġa guruġari ġovetau-ginikaurini, korana gomi ġotuġamaġini tu, moġeri guruġa nuġari ai maġuri vanaġivanaġi boġo doġariani. Moġeri guruġa na tu au ġekiraġiguni.

⁴⁰ Senaġina gomi maġuri ġabiġabina uranai au ġegu ai iaġoma tu asi ġourani.

⁴¹ Au tu tarimarima ġerina vevaġa-raġe tu asi avetauani.

⁴² Senaġi gomi aiġesi, au tu ma ribagu. Au ma ribagu gomi nuġami o lorumi ġuturi ai Barau uravinina tu asi etanuni.

⁴³ Au aiaġomato tu Tamagu aranai, ma asi ġoġabi-raġeguni. Senaġi tarima boruna ma beiaġomani tauġena aranai nai tu, boġo ġabi-raġeani.

⁴⁴ Gomi tu tauġemi fakami ai moġo ġovevaġa-raġeni tu ġoġabi-raġerini. Senaġi mo vevaġa-raġe tu Barau ġereġana na moġo beveiani. Ma Barau ġenana eiaġomani mo vevaġa-raġe, gomi na tu asi ġourani boġono ġabia. Bema gomi maniġesi tauġemi fakami ai moġo ġovevaġa-raġeni nai tu, kamasí au boġo vaġa-moġoniguni?

⁴⁵ Asi boġono tuġamaġi, au na Tamagu ġoiranai bavaġa-daġamini, asiġina. Vaġa-daġa tarimana tu ġoġabi-raġeani tarimana, Mose, ġia na gomi bevaġa-daġamini.

⁴⁶ Bema gomi na Mose moġoni boġoro vaġa-moġonia nai tu, au maki boġoro vaġa-moġonigu, korana ġia na tu au varigu etoreato.

⁴⁷ Senaġina bema ġia na etoreato guruġana asi boġo vaġa-moġoniani nai, au ġegu guruġa tu kamasí boġo vaġa-moġoniani?”

6

Iesu na daġara imaima (5,000) eġuburito

Luka 9:10-17

¹ Moġa murinai Iesu Galilea kouna na evanaġi-iaġoto tavi ta reke ġana. Mo kou arana ta tu Tiberia.

² Benamo tarimarima vovoka tabutabu ġia murina na ġeiaġoto, korana vetoġa boruri eveito keve tarimari ġeri ai ġeġitarito nai.

³ Moġa murinai Iesu ġoro ġana evaraġeto, benamo monai ġena mero ġesi ġetanu-tarito.

⁴ Iuda tarimari ġeri vereko arana Pasova ekavinaġito-ġoi ġoirai. (Mai tu Iuda tarimari mase aneruna na evanaġirito moġo, asi evaġirito, verekona).

⁵ Iesu eboḡe-vaisito, tarimarima asisebo ġia ġenai ġeiaḡomato-ḡoi, benamo ġia na Filipino ekiraiato, ekirato, “Gita ġaniġani tu ainai toma tavoini, maġeri tarimarima mabarari taġubu-iaġirini?”

⁶ Iesu moġesi ekirato, korana Filipino nuġana bene ribaia ġana. A ġia tu ma ribana kara beveiani.

⁷ Filipino na evaġa-veseato, ekirato, “Silva moniri sinau ruarua (200) na ġaniġani dagarari bita voini, senaġi asi beġe ilailani, mai tu koturi koturi moġo maki asi veġata mabarari beġe ġanini.” (Silva moniri sinau ruarua (200) tu tarima ta davana ġue imaima toitoi (8) nuġanai beġabini kavana).

⁸ Ġena mero ta arana Anduru, Simona Petero tarina, ġia na ma evaġa-veseato, ekirato,

⁹ “Mero misina ta maġa, ġia tu ma ġana beredi imaima (5) e maġani-kone ruarua (2). Senaġi asi beġe ilailani mai tarimarima mabarari ġeri ai tu-na.”

¹⁰ Iesu na ekirarito, ekirato, “Tarimarima ġokirari, ġetanutani-tari.” Mo gabu moġa ġauġana tu vovoka. Benamo tarimarima mabarari ġetanutani-tarito. Tau ġereġari moġo mabarari tu 5,000 kavana.

¹¹ Benamo Iesu na mo beredi eġabirito, Barau evaġa-namoato, benamo ġetanutani-tarito tarimari mabarari ġevini-vaġa-ġaurito. Maġani-kone maki moġesi eveirito, mabarari ġeġabito ġeri ura ilailari ai.

¹² Ġia mabarari ġeġani-maseto, benamo Iesu na ġena mero ekirarito, ekirato, “Beredi kwari mabarari ġovaġa-vegogori, misina ta maki asi bene rekwa-rekwa.”

¹³ Benamo mo beredi ġeġanirito kwakwari moġeri mabarari ġevaġa-vegogorito, boseġa gabanana ruarua (12) ġevaġa-vonurito.

¹⁴ Tarimarima na Iesu na mai vetoġa boruna eveiato ġeġitaiato nai, ġekirato, “Moġoni, mai tu peroveta tarimana tanobara ġana beiaġomani ġetato tarimana.”

¹⁵ Iesu eribato, tarimarima tu beġe iaġomani, ġia beġema ġabi-tariani ġeri kini ai beġena vaġa-iaġoa ġana. Moġesina naima ġereġana ġoro ġana ma eiaġo-ġenoġoito.

Iesu nanu iatanai erakato

Mataio 14:22-33; Mareko 6:45-52

¹⁶ Elaviboġi-iaġoto nai, Iesu ġena mero kou ġana ġevariġoto.

¹⁷ Monai ġasi tai ġeraġeto, benamo kou na ġevanaġito, Kaperanauma ġana ġeiaġoto. Mo tu varau eboġito, ma Iesu tu roġosi bere rakakau ġia ġeri ai.

¹⁸ A iavara baregona tu eragato-ḡoi, be mo kou ureurena maki ebaregato.

¹⁹ Iesu ġena mero kilomita imaima (5) o imaima sebona (6) kavana ġasi ġelevatoro nuġanai, ġia na Iesu ġeġitaiato, nanu iatana na eraka-iaġomato-ḡoi, ġasi eiaġoma-viniato-ḡoi, benamo ġia tu ġegarito.

²⁰ Iesu na ekirarito, ekirato, “Asi ġogari, mai tu au.”

²¹ Benamo ġia ġeġabi-raġeato, ġasi ai eraġekauto, ma asikauna tu ġeiaġo-viniato-ḡoi gabunai ġevotuto.

Tarimarima na Iesu ġevetauato

²² Elaġanito boġiboġinai, tarimarima vovoka Iesu ġena mero ġasi ai ġeraġeto gabunai ġeruġa-taġoto-ḡoi. Ġia ġeribato, tovtovonai monai ġasi tu sebona moġo mo kou rikinai. Ema ma ribari maki, Iesu tu ġena mero ġesi mo ġasi ai asi eraġeto, ġena mero tu ġereġari moġo ġeraġeto ema ġevanaġi-iaġoto.

²³ Ġasi kotari Tiberia na ma ġeiaġomato, kou rikinai ġema darokauto. Ġia ġedarokauto gabuna moġa tu, Vereġauka na beredi Barau evaġa-namoato murinai, tarimarima evinirito, ġeġanirito gabuna sevina.

²⁴ Mo tarimarima ġeriba-maoroto, Iesu ma ġena mero ġesi monai tu asiġina, benamo mo ġasi ai ma ġeraġekauto, Kaperanauma ġana ġevanaġi-iaġoto, Iesu ġea vetauato.

Iesu tu maġuri ġaniġanina

²⁵ Tarimarima na Iesu kou tavi ta kefonai ġedoġariato, benamo ġekiraiato, ġekirato, “Vevaġa-riba tarimam, ḡoi tu aitoma mainai boma votu?”

²⁶ Iesu na evaġa-veserito, ekirato, “Au na moġoni akiramini, ġomi na au ġovetauguni korana tu mo beredi ġoġanito, benamo ġoġani-maseto, a dia mo vetoġa boruri ġoġitarito nai, ġovetauguni.

²⁷ Ma beġe rakavani ġaniġaniri ġauveiri asi boġono vei, senaġi ġaniġani roġo betanu-iaġoni, beiaġoni mo, maġuri vanaġivanaġi, ġauveina boġono vei. Mo ġaniġani tu Tarimarima Natuna na bevinimini, korana Tamana Barau na ġia ġenai vetoġa ta eveiato, mo tu ġia evaġa-moġoniato vetoġana.”

²⁸ Benamo ġedanaġiato, ġekirato, “Ġai Barau ġena ura ġauveiri ġaveini baġa toni tu kara baġana veia?”

²⁹ Iesu na evaġa-veserito, ekirato, “Barau ġena ġauvei ġomi na boġono veia etoni ġauveina tu maiġa moġo: Etuġuato tarimana boġono vaġa-moġonia.”

³⁰ Ġia na ma ġedanagiato, ġekirato, “Ġoi na ġai ġema tu kamara vetoġa boruna boveiani baġa ġitaiani, benamo ġoi baġa vaġa-moġonimuni? Ġoi na kara boveiani?”

³¹ Ġai senema na tu mana ġeġaniato tano fakanai, Buka Veaġa nuġanai ekirani kavana, maiġesi ekirani, ‘Ġia na beredi guba na evini-rigorito ġeġanito.’ ”

³² Iesu na evaġa-veserito, ekirato, “Moġoni veġata akiramini, dia Mose na mo beredi guba na evinimito. Asiġi. Au Tamagu na tu moġoni beredi korikorina guba na evinimini.

³³ Korana Barau ġena beredi tu guba na emariġoto tarimana. Ġia na tanobarai ġetanuni tarimari maġuri evinirini.”

³⁴ Benamo ġia na ġekiraiaato, ġekirato, “Vereġauka, mani beredi ġaro mabarari ai bono vinima.”

³⁵ Iesu na ekirarito, ekirato, “Maġuri beredina tu au maiġegu. Au ġegu ai beiaġomani tarimana tu asi ma bevitoni, ema au bevaġa-moġoniguni tarimana tu, bokana asi ma bekokeni.

³⁶ Senaġi au na ġomi tu varau akiramito, ġoġitaguni, senaġi asi ġovaġa-moġoniguni.

³⁷ Tamagu na au eviniguto tarimari mabarari tu, au ġegu ai beġe iaġomani, ema deikara au ġegu ai beġe iaġomani tarimari, au na asi balai-ġenoġoirini.

³⁸ Korana au guba na amariġoto tu, dia au ġegu ura bana veia ġana, senaġina au etuġuguto Barauna ġena ura bana veia ġana.

³⁹ Ema au etuġuguto Barauna ġena ura tu, au eviniguto tarimari mabarari ta asi bana vei-rekwa rekwaia, a mabarabarari mase na ma bana vaġa-varigiġi ġenoġoiri ġaro magonai.

⁴⁰ Korana au Tamagu ġena ura tu, Natuna beġe ġitaiani ema beġe vaġa-moġoniani tarimari mabarari na maġuri vanaġivanaġi beġe ġabiani, ma ġaro dokonai ma bavaġa-varigiġi ġenoġoirini.”

⁴¹ Benamo Iuda tarimari ġemuġu-muġuto, korana ġia ekirato, “Au tu guba na amariġoto beredina.”

⁴² Benamo ġekirato, “Mai tarima tu Iesu, Iosefa natuna, nene? Ġia tamana e sinana tu ġita ribara. Ma kamara dabarai ġia tu ekirani, ‘Au tu guba na amariġoto?’”

⁴³ Iesu na evaġa-veserito, ekirato, “Ġomi tauġemi fakami ai muġumuġu ġovaġa-dokoa.

⁴⁴ Au ġegu ai ta asi beiaġoma-kavani, senaġina Tamagu, au etuġuguto Barauna, ġia na deikara au ġegu ai beinu-kaviani tarimana moġo. Ema au ġegu ai beiaġomani tarimana tu, au na ġaro dokonai mase na bavaġa-varigiġi ġenoġoiani.

⁴⁵ Peroveta tarimari na maiġesi ġetoreato, ‘Ġia mabarari Barau na bevaġa-ribarini.’ Tamagu ġeseġaġi-viniani ema ġenana riba ġeġabini tarimari mabarari tu, au ġegu ai beġe iaġomani.

⁴⁶ Au tu asi akirani, tarima ta na Tamagu eġitaiaato atoni, senaġi Barau ġenana eiaġomato tarimana ġereġana na moġo Tamagu eġitaiaato.

⁴⁷ Moġoni akiramini, au evaġa-moġoniguni tarimana na maġuri vanaġivanaġi beġabiani.

⁴⁸ Maġuri beredina tu au maiġegu.

⁴⁹ Ġomi senemi na tano fakanai mana ġeġanito-ġoi, senaġi ma ġemaseto.

⁵⁰ A guba na emariġoni beredina tu maiġea, ġia beġaniani tarimana tu asi bemaseni.

⁵¹ Au tu maġuri beredina guba na amariġoto. Tarima ta na mai beredi beġaniani, ġia tu bemaġuri-vanaġi vanaġini. Mai beredi au na baviniiani tu au viriġogu. Au viriġogu bavini-fitoġaiani korana tu, tanobarai ġetanuni tarimari na maġuri beġene ġabia ġana.”

⁵² Mainana Iuda tarimari tauġeri fakari ai veġare-veġare baregona eġorato, ġia ġekirato, “Mai tarima na tu kamara dabarai ġia viriġona bevinirani bita ġaniani?”

⁵³ Iesu na ekirarito, ekirato, “Moġoni akiramini, bema ġomi na Tarimarima Natuna viriġona asi boġo ġaniani ema rarana asi boġo niuani nai, ġomi nuġami ai maġuri asi betanuni.

⁵⁴ Deikara na au viriġogu beġaniani ema raragu beniuani tarimana tu, maġuri vanaġivanaġi beġabiani, ema au na ġaro dokonai mase na bavaġa-varigiġi ġenoġoiani.

⁵⁵ Korana au viriġogu tu ġaniġani korikorina, ema au raragu maki niuniu dagarana korikorina.

⁵⁶ Deikara au viriġogu beġaniani e raragu beniuani tarimana tu, au nuġagu ai betanuni, ema au maki ġia nuġanai batanuni.

⁵⁷ Tamagu maġurina na etuġuguto ema au tu ġia koranai amaġurini. Moġa ilailanai au viriġogu beġaniani tarimana maki bemaġurini, korana au amaġurini.

⁵⁸ Au tu guba na emariġoto beredina maiġegu. Ġomi senemi tu mana ġeġanito ma ġemaseto. Senaġi mai beredi beġaniani tarimana tu bemaġuri-vanaġi vanaġini.”

⁵⁹ Iesu na maigeri guruḡa Iuda tarimari rubu ai ekiraḡirito, Kaperanaumai evevaḡa-ribato-ḡoi nuḡanai.

Maḡuri vanaḡivanaḡi guruḡari

⁶⁰ Iesu ḡena mero ḡutuma na mai guruḡa ḡeseḡaḡiatio nai tu, ḡekirato, “Mai vevaḡa-riba gurugana tu gwaḡiḡi rakava, dei na begabi-raḡeani.”

⁶¹ Iesu ribana ḡena mero na mo guruḡa ḡemugumugu-iaḡiatio-ḡoi, benamo ekirarito, ekirato, “Mai guruḡa na bevaḡa-daga-raḡemi?”

⁶² Bema ḡomi na Tarimarima Natuna boḡo ḡitaiani, beḡenoḡoi-varaḡeni, etanu-iaḡiatio gabuna ḡana tu kamasi?

⁶³ Barau Iaukana na maḡuri evinirani; tauḡani na asi bevaḡa-kavarani. Au na avaḡa-gurugamini guruḡari tu Iauka, ema ḡia nuḡari ai tu maḡuri etanuni.

⁶⁴ Senaḡi ḡomi kotari na tu asi ḡovaḡa-moḡoniguni.” Iesu ribana tovotovona na veḡata, deikara ta na tu asi evaḡa-moḡoniatio-ḡoi ema deikara na maki ḡia berevaiani.

⁶⁵ Ma ekirato, “Moḡesina naima au na akiramito, ta au ḡegu ai asi beiaḡoma-kavani, senaḡi Tamagu na bevaḡa-moḡoniani tarimana vau beiaḡomani.”

⁶⁶ Mo guruḡa ḡeseḡaḡiatio, monana Iesu ḡena mero ḡutuma ḡia ḡenana ḡeraka-veḡiatio, ema ḡia ḡesi asi ma ḡerakao-vegogoto-ḡoi.

⁶⁷ Benamo Iesu na ḡena mero gabanana ruarua (12) edanaḡirito, ekirato, “Ḗomi maki ḡourani boḡono raka-veḡita ba?”

⁶⁸ Simona Petero na evaḡa-veseato, ekirato, “Vereḡauka, ḡai tu deikara ḡenai ma baḡa iaḡoni? Maḡuri vanaḡivanaḡi guruḡari tu ḡoi ḡemu ai.

⁶⁹ Ḗai na ḡavaḡa-moḡonimuni ema ḡariba-korikorini, ḡoi tu Barau ḡena Veaḡa Tarimana.”

⁷⁰ Iesu evaḡa-veseto, ekirato, “Au na ḡomi gabanana ruarua (12) aḡobi-viriḡimito nene? Senaḡi sebomu ta tu bodiabol.”

⁷¹ Ḗia na tu Iudas, Simona Isakariota natuna, ekiraḡiatio. Iudas maki mo mero gabanana ruarua (12) fakari merona ta, senaḡi ḡia na Iesu vau berevaiani.

7

Iesu ma tarina merori ḡesi

¹ Moḡa murinai Iesu tu Galileai erakaoto-ḡoi. Ḗia asi eurato, Iudea ḡana bene iaḡo, korana Iuda tarimari monai ḡeri ura tu, ḡia beḡene vaḡia.

² Iuda tarimari ḡeri Fouta Verekona ḡarona ekavinaḡito. (Mai fouta verekona ḡeveiatio-ḡoi nai tu, fouta ḡeragato-ḡoi, benamo nuḡari ai ḡetanuto-ḡoi, korana seneri tano fakanai fouta nuḡari ai ḡetanuto-ḡoi, moḡa beḡene tuḡamaḡi-iaḡia ḡana).

³ Benamo Iesu tarina merori na ḡekiraiatio, ḡekirato, “Mai gabu noraga-kwaneana, Iudea ḡana bono iaḡo, benamo oveirini dagarari ḡemu mero na beḡene ḡitari.

⁴ Korana deikara tauḡena bene vevaḡa-fofori etoni tarimana, beḡene ribaia uranai tu, kara ta asi bevei-vekuretoḡaiani. Ma ḡoi tu maigeri veḡa oveirini, be tanobara mabarari ai novevaḡa-fofori!”

⁵ Korana Iesu tarina mabarari na maki ḡia tu asi ḡevaḡa-moḡoniatio-ḡoi.

⁶ Moḡa lorinai Iesu na ekirarito, ekirato, “Au ḡegu ḡaro tu roḡosi bene raḡasi. A ḡomi ḡemi ai ḡaro mabarari tu loriri ai moḡo.

⁷ Tanobara na ḡomi tu asi ebaru-vinimini, senaḡi au tu ebaru-viniguni, korana au tu veḡa rakavari eveirini dagarari akiraḡi-foforirini.

⁸ Ḗomi boḡono iaḡo mo vereko ḡana. A au tu asi baiḡoni, korana au ḡegu ḡaro korikori tu roḡosi roḡo bene raḡasi.”

⁹ Iesu moḡesi ekirato, benamo Galileai etanuto.

Iesu Ierusalem ai

¹⁰ Iesu tarina merori ḡeiaḡoto mo vereko ḡana, muriri ai Iesu maki ma eiaḡoto. Senaḡi asi eraka-foforito, a vekuretoḡai eiaḡoto.

¹¹ Mo vereko gabuna Iuda tarimari na tu mo vereko nuḡanai ḡevetauato-ḡoi, ḡevedanaḡi-vedanaḡito-ḡoi, ḡekirato-ḡoi, “Ḗia tu ainai?”

¹² Mo ḡutuma-bara nuḡanai Iesu kiraḡi-ḡairiḡairina tu ebarego-rakavato. Tarima kotari ḡekirato-ḡoi, “Ḗia tu tarima namona” ḡetato. Ma kotari tu ḡekirato-ḡoi, “Asiḡi, ḡia na tarimarima eḡorikau-darere darererini.”

¹³ Senaḡi tarima ta na asi eguruḡa-iaḡi foforiatio, korana ḡia mabarari Iuda vereri gariri ḡeveito-ḡoi.

¹⁴ Vereko ḡarori kotari ḡekorito, kotari roḡo moḡeri nuḡanai vau, Iesu Rubu Veaḡai eraka-toḡato, benamo evevaḡa-ribato.

¹⁵ Benamo Iuda tarimari ġeġaba-vedaureato, ġekirato, “Mai tarima vevaġa-riba guruġari tu kamasi eribato, ġia vevaġa-riba gabuna ta ġana riba-vetau tu asi eiaġoto.”

¹⁶ Iesu evaġa-veseto, ekirato, “Kara au avevaġa-riba iaġini tu dia au ġegu vevaġa-riba, senaġi au etuġuguto Barauna ġenana ġeiaġomani.

¹⁷ Bema tarima ta eurani Barau ġena ura bene veiri etoni tarimana na, au ġegu vevaġa-riba guruġari beribarini. Beribani, au ġegu vevaġa-riba guruġari Barau ġenana ġeiaġomani, o au tauġegu ġeguna moġo.

¹⁸ Tarima ta deikara ġena ura guruġari ekiraġini tu, tauġena arana vaġa-raġena dabarana evetauani. Senaġi au etuġuguto Barauna vaġa-raġena dabarana eveiani tarimana ġenai tu, guruġa moġonina etanuni, a ġia ġenai ġofaġofa ta tu asi etanuni.

¹⁹ Mose na ġomi taravatu tu evinimito, ene? Senaġi ġomi ta na mo taravatu tu asi ġokorana-iaġiani. Ma karase nai ġomi na au tu ġovoaġigu ġotoni?”

²⁰ Mo tarimarima ġutuma ġevaġa-veseto, ġekirato, “Ġoi tu iauka rakavana ta na eboroġimuto. Deikara na nevaġimu otoni?”

²¹ Iesu na evaġa-veserito, ekirato, “Au na mainai Ierusalemaj veġa boruna sebana aveiato nai, ġomi mabarabarami nuġami ġefarevaġini.

²² Mose na mero tauġaniri kefi-lamavaġi veġana evinimito, moġa lorinai ġomi na mero keiri Sabadi ai maki kefiri ġolama-vaġirini. Mo kefi-lamavaġi veġana tu dia Mose na esinaiato, senaġi ġomi senemi na ġesinaiato.

²³ Bema mero tauġaniri kefiri Sabadi ai ġolama-vaġirini Mose ġena taravatu boġo vanaġiani ġesi, kara dainai au tu ġobaru-viniguni, Sabadi ai tarima ta bavaġa-namo ġinikaua nai, ei?

²⁴ Ġomi na dagara tu murikari vetoġari ai asi boġono ġita-viriġiri, senaġi dagara mabarari veġa roroġotori ai boġono ġita-viriġiri.”

Mai tarima tu Keriso ba?

²⁵ Benamo Ierusalemaj tarimari kotari ġekirato, “Mai beġene vaġia ġetoni tarimana tu maiġa.

²⁶ Goġitaia, ġia tu ma guguraġina ġesi eguruġani, ma ta na ġenai guruġa ta asi ekiraġiani. Ba betaġu kanisoro tarimari beġe riba, Keriso korikorina tu maiġa.

²⁷ Senaġi Keriso, (Barau na ekiraġi-toreato vevaġa-maġuri tauna), beiaġomani nai, ta asi beribani ġia tu ainana beiaġomani. A mai tarima ainana eiaġomato ġita tu mabarara ma ribara.”

²⁸ Iesu roġo Rubu Veaġai evevaġa-ribato-ġoi nuġanai, eguruġa-baregoto, ekirato, “Moġoni, ġomi ma ribami au tu deikara e ainana eiaġomato. Senaġi au tu dia tauġegu ġegu urai moġo eiaġomato. Au etuġuguto Barauna tu moġoni. Ma ġomi tu asi ribami ġia.

²⁹ Senaġi au ġia tu ma ribaġu, korana au tu ġia ġenana eiaġomato e ġia na etuġuguto.”

³⁰ Benamo ġeġabi-taria ġetato, senaġi tarima ta ġimana ġia ġenai asi evenabakauto, korana ġena ġaro korikori tu roġosi bere votu bene.

³¹ Senaġi tarimarima vovoka mai ġutuma nuġanai ġia ġevaġa-moġoniatto, ġekirato, “Keriso beiaġomani nai, vetoġa boruri veiveiri ai mai tarima bevanaġiani ba?”

Nariġau tarimari ġetuġurito Iesu beġene ġabia ġana

³² Farisea tarimari ġeseġaġito, tarimarima ġutuma na mo guruġa Iesu ġenai ġekiraġi-ġairiġairito-ġoi. Moġa ġaramanai Farisea tarimari e Rubu Veaġa vereri baregori na Rubu Veaġa ġitaġauna tarimari kota ġetuġurito, Iesu beġene ġabia ġana.

³³ Iesu ekirato, “Au tu ġaro viravira moġo ġomi ġesi bita tanuni, moġa murinai ma baraka-veġitani, etuġuguto Barauna ġenai baiaġoni.

³⁴ Ġomi na boġo vetauguni, senaġi asi boġo doġariguni; ema au batanuni gabuna ġana, ġomi tu asi boġo iaġoni riba.”

³⁵ Benamo Iuda tarimari tauġeri ġevedanaġito, ġekirato, “Ġia tu aiġana beiaġoni, be ġita na asi bita doġariani riba etoni? Betaġu ġia tu beiaġoni irau bese tarimari ġeri tanobara ġana, Iuda tarimari ġutuma maki ġia fakari ai ġetanuni gaburi, monai irau bese tarimari bea vaġa-ribarini.

³⁶ Mai tu kamara guruġa ġia na ekiraġiani, ekirani, ‘Boġo vetauguni, senaġi asi boġo doġariguni,’ ema, ‘Au batanuni gabuna ġana ġomi tu asi boġo iaġoni riba?’”

Maġuri eviniani nanuna

³⁷ Vereko magona ġarona, mo tu ġaro barego lelevaġina, Iesu eruġa-vaesito, benamo eguruġa-fouto, ekirato, “Deikara nanu na bokana bekokeni tu, au ġegu ai bene iaġoma, nanu benema niu.

³⁸ Buka Veaġa nuġanai ekirani ilailanai, ekirani, ‘Au bevaġa-moġoniguni tarimana nuġana na tu maġuri nanuna beġaru-rosini.’”

³⁹ Iesu na Iauka moġesi ekiraġiatio-ġoi, kamara tarima Iesu ġevaġa-moġoniani tarimari na vau beġe ġabiani. Mo ġaro ai Iauka Veaġa tu Barau na roġosi bere viniri, korana Iesu na Barau ġena mareva baregona maki roġosi bere ġabia nai.

Tarimarima tauġeri ġevetavito

⁴⁰ Tarima kota mo ġutuma nuġari ai mo guruġa ġeseġaġiatio, benamo ġekirato, “Moġoni, ġita na peroveta tarimana tanariani tarimana tu maiġea.”

⁴¹ Tarima kotari ġekirato, “Mai tu Keriso.” Senaġi kotari ġekirato, “Asiġi, Keriso tu Galilea na asi beiaġomani.

⁴² Buka Veaġa nuġanai ekirani, Keriso tu Davida besena na beiaġomani, ema Betelehe-mai, Davida etanuto-ġoi vanuġanai, bemaġurini.”

⁴³ Moġesina naima tarima tauġeri fakari ai moġo ġevetore-kirato, korana Iesu ġaramanai.

⁴⁴ Tarima kota ġeurato beġene ġabia, senaġina ta ġimana ġia ġenai asi evenabakauto.

Iuda vereri na Iesu asi ġevaġa-moġoniatu

⁴⁵ Rubu Veaġa ġitaġauna tarimari ġeġenoġoito, benamo Rubu Veaġa vereri baregori ema Farisea tarimari na ġedanagiatio, ġekirato, “Karase nai ġia tu asi boġo ġori-iaġomaia?”

⁴⁶ Rubu Veaġa ġitaġauna tarimari ġevaġa-veseto, ġekirato, “Mai tarima eguruġani kavana, ta roġosi bene guruġa.”

⁴⁷ Benamo Farisea tarimari na ġekirarito, ġekirato, “Be, ġomi maki ġia na beġofami?”

⁴⁸ Veġorikau tarimana ta o Farisea tarimana ta na ġia evaġa-moġoniani ba? Asiġina!

⁴⁹ A mai tarimarima na ġevaġa-moġoniani, ġia tu Mose ġena taravatu asi ribari tarimari. Barau na ġeri rakava voiri bevinirini.”

⁵⁰ Farisea tarimana ta monai arana Nikodemo. ġia tu boġi ta eiaġoto Iesu ea ġitaiatu tarimana. ġia na ekirarito, ekirato,

⁵¹ “ġita ġera taravatu ekirani, tarima tu ġena guruġa ġeseġaġi-guineani roġo, moġa murinai vau ġena rakava voina metona beġe viniani.”

⁵² ġia na ġevaġa-veseato, ġekirato, “ġoi maki Galilea tarimamu ba? Buka Veaġa nuġana bono vetaua, monana boribani, peroveta tarimana ta Galilea na tu asi beiaġomani.”

[⁵³ Benamo tarimarima mabarari ġeri numa ġana ġeiaġoto.

8

Veġura-vanaġi vavinena

¹ Senaġi Iesu tu Olive Ġorona ġana eiaġoto.

² Ma elagiatio boġiboġi iamoiamo tu ġia ma eġenoġoito Rubu Veaġa ġana. Monai tarimarima mabarari ġeiaġomato ġenai, ġetanu-ġeġeraġiatio, benamo etanu-tarito, evaġa-ribarito.

³ Benamo taravatu ġevevaġa-riba iaġirito-ġoi tarimari e Farisea tarimari na vavine ta Iesu ġenai ġeġori-iaġoato. Mo vavine tu eveġura-vanaġito-ġoi nuġanai ġedoġariatio, benamo ġeġori-iaġoato mo, Iesu ġesi ġetanu-taġoto-ġoi tarimari mabarari ġoirari ai ġea vaġa-ritoġoato.

⁴ Iesu ġekiraiatio, ġekirato, “Vevaġa-riba tarimamu, mai vavine tu eveġura-vanaġini-ġoi nuġanai beġe ġoitagiata.

⁵ Ma Mose ġena taravatu ekirani, moġesi beġe veini vavineri tu, fore na baġana takimaseri. ġoi tu kara mani otoni?”

⁶ Moġesi ġekirato tu, Iesu ġeriba-ġaniatio, beġene vaġa-daġaia ġana. Senaġi Iesu etutuġu-tarito, tano ai didina ta na etoretoreto.

⁷ ġia na roġo Iesu ġedanagiatio-ġoi nai, eruġa-vaisito, benamo ekirarito, ekirato, “Deikara ġomi fakami ai roġosi roġo bene vei-rakava nai tu, ġia na fore bene ġabia, mai vavine bene ġidara-guinea.”

⁸ Benamo Iesu ma etoġa-tarito, tano ai ma etoretoreto.

⁹ ġia na mo guruġa ġeseġaġiatio nai, ġia tata nuġari ai ġeribato ma ġeri vei-rakava, benamo irau sebori-sebori ġerakaraka-veġitatio; tau ġaukari ġeraka-guinetu murinai vau ġuru-gabi ma ġerakato. Iesu ġereġana moġo etanuto, monai roġo eruġa-taġoto-ġoi vavinena ġesi.

¹⁰ ġia eruġa-vaisito nai tu, tarima ta asi eġitaiatio, mo vavine moġo, benamo edanaġiatio, ekirato, “ġoi beġe vaġa-daġamu tarimari tu aiġeri? Ta na ġemu rakava voina metona asi bevinimu?”

¹¹ Mo vavine evaġa-veseto, ekirato, “Vereġauka, sebona ta maki asiġina.” Benamo Iesu ekirato, “Au na maki ġemu rakava voina metona asi bavinimuni. Noiaġo, senaġi asi ma bono vei-rakava ġenoġoi.”]

Iesu tanobara mamana

¹² Benamo Iesu na tarimarima ma eġobata-vinirito, ekirato, “Au tu tanobara mamana. Deikara au murigu ai berakani tarimana tu, mukunai asi berakani, senaġi maġuri mamana begabiani.”

¹³ Farisea tarimari na ġekiraiato, ġekirato, “Ġoi tu tauġemu ovekiragġini; be ġoi ġemu vekiraġi tu asi moġoni.”

¹⁴ Iesu evaġa-veseto, ekirato, “Asiġi, au tauġegu avekiragġini, senaġina au na kara akiraġiani tu moġoni. Korana au ribaġu ainana aiaġomato ema aiġana ma baiaġoni. A ġomi tu asi ribami au ainana aiaġomato ema aiġana ma aiġoni.”

¹⁵ Ġomi tu tarimarima ġeri vevaġa-maoro dabaranai ġovevaġa-maoroni. Au na ta tu asi avavaġa-maoroani.

¹⁶ Senaġi bema au havevaġa-maoroni nai, ġegu vevaġa-maoro tu moġoni. Korana au tu dia ġereġagu moġo avevaġa-maoroni, senaġina Tamagu, au etuġuguto Barauna, au ġesi baġa vevaġa-maoroni.

¹⁷ Ġomi ġemi taravatu ai maki maiġesi ekirani, tarima ruarua na guruġa sebona moġo ġekiraġiani nai tu moġoni.

¹⁸ Au tu tauġegu avekiragġini; ema Tamagu, etuġuguto Barauna, na maki au ekiraġiguni.

¹⁹ Benamo ġia na ġedanagiato, ġekirato, “Ġoi tamamu tu ainai?” Iesu evaġa-veseto, ekirato, “Ġomi tu asi ribami au, ma Tamagu maki asi ribami. Bema au boġoro ribaġu tu, Tamagu maki ġoro ribaia.”

²⁰ Iesu na mai ġena guruġa tu Rubu Veaġai evevaġa-ribato-ġoi, moni ġevaġa-vegogoto-ġoi maugana gabunai. Tarima ta asi evenabakauto ġenai, korana ġia ġena ġaro roġosi bere votu.

Au baiaġoni gabuna ġana ġomi tu asi boġo iaġoni riba

²¹ Iesu na ma evaġa-guruġa ġenoġirito, ekirato, “Au tu araka-veġitani. Ma ġomi na boġo vetauguni, senaġi ġemi vei-rakava nuġanai boġo maseni. Au baiaġoni gabuna ġana, ġomi tu asi boġo iaġoni riba.”

²² Benamo Iuda tarimari ġekirato, “Ġia bekira, ġia beiaġoni gabuna ġana ġita tu asi bita iaġoni. Moġa tauna ġia tu tauġena bevevaġini ba?”

²³ Iesu evaġa-veseto, ekirato, “Ġomi tu mai tanobara maiġa mainana eveimito, senaġi au tu tuġuna na amariġoto. Ġomi tu mai tanobara tarimari, senaġi au tu dia mai tanobara tarimagu.”

²⁴ Moġa lorinai au na ġomi bakirami, ġemi rakavai boġo maseni. Korana bema au, Keriso, asi boġo vaġa-moġoniguni nai tu, ġemi rakavai boġo maseni.”

²⁵ Benamo ġia na ġedanagiato, ġekirato, “Ġoi tu deikara?” Iesu na ma evaġa-veserito, ekirato, “Tovotovonai veġata ġemi akiraġito-ġoi kavana.”

²⁶ Guruġa vovoka bara kiraġiri ema bara vevaġa-maoro vinimi, korana ġemi veġa lorinai. Senaġina sebona moġo, au etuġuguto Barauna tu moġoni, ma ġia ġenana aseġaġito guruġari tanobarai ġetanuni tarimari akira-vararini.”

²⁷ Ġia tu asi ġetuġamaġi-fakato Iesu na mo tu Tamana ekiraġiato-ġoi.

²⁸ Benamo ma ekirarito, ekirato, “Ġomi na Tarimarima Natuna ġau ġesi boġo ġabi-vaisiani murinai vau, boġo ribani au tu Keriso. Benamo boġo ribani, au ġereġagu na kara ta ġegu urai moġo asi aveiani, senaġi Tamagu na au kara evaġa-ribaguni guruġari moġo, au na ġomi akira-varamini.”

²⁹ Ema au etuġuguto Barauna tu au ġesi, au asi eraga-kwaneguni; korana na vanaġi-vanaġi tu ġia na eiaku-iaġirini veġari moġo aveirini.”

³⁰ Tarima vovoka na Iesu ġevaġa-moġoniato, maiġeri guruġa ekiraġirito-ġoi nai.

Aberahamo natuna

³¹ Benamo Iesu na mo Iuda tarimari, ġia ġevaġa-moġoniato tarimari, ekirarito, ekirato, “Bema ġomi na au ġegu vevaġa-riba guruġari boġo korana-iaġirini nai, ġomi tu moġoni au ġegu mero korikori.”

³² Benamo guruġa moġonina boġo ribaiani, ma mo guruġa moġonina na beruġa-vagiġimi, dagara ta na asi ma bebarubarumini.”

³³ Ġia ġevaġa-veseto, ġekirato, “Ġai tu Aberahamo garakana ema ġai tu tarima ta ġena tuġu-rakaorakao tarimanai tu asi ġaiaġoto. Ma ġoi kamasi nai tu okirani, ‘Guruġa moġonina na beruġa-vagiġimi?’”

³⁴ Iesu na evaġa-guruġarito, ekirato, “Akira-korikorimini, deikara rakava eveini, ġia tu vei-rakava ġena tuġu-rakaorakao tarimana.”

³⁵ Tuġu-rakaorakao tarimana tu numai asi betanu-vanaġi vanaġini, senaġi numa tarimana natuna tu numai betanu-vanaġi vanaġini.

³⁶ Moġa lorinai bema Barau Natuna na beruġa-vaġimini nai, ġomi tu boġo raka-vaġi korikorini, dagara ta na asi ma bebarubarumini.

³⁷ Au ribagu ġomi tu Aberahamo garakana, senaġi ġomi ġourani, au tu boġono vaġigu, korana ġomi na ġegu vevaġa-riba guruġari tu, asiġina ġinavaġi moġo ġoġabi-raġerini.

³⁸ Au na tu kara Tamagu ġenai aġitarito dagarari ġomi akira-varamini, a ġomi tu tamami ġenana ġoseġaġito dagarari ġomi na ġoveirini.”

³⁹ Ġia na Iesu ma ġevaġa-veseato, ġekirato, “Ġai tamama tu Aberahamo.” Iesu na evaġa-veserito, ekirato, “Bema ġomi moġoni Aberahamo natuna nai, ġia na eveirito veġari ġomi na maki ġoro veiri.

⁴⁰ Au tu Barau ġenana aseġaġirito guruġari moġoniri mabarari ġomi akira-varamini, senaġi ġomi ġourani tu, au ġovaġigu ġotoni. Aberahamo moġesi asi eveito.

⁴¹ Ġomi tu tauġemi tamami, (Diabolo), na kara eveini veġana ġoveiani.” Ġia ġevaġa-veseto, ġekirato, “Ġai tu dia kuġa-gara tarimama. Ġai Tamama tu Barau moġo ġereġana.”

Diabolo natuna

⁴² Iesu na ekirarito, ekirato, “Bema Barau moġoni ġomi Tamami nai tu, au ġoro ura-vinigu. Korana au tu Barau sevina na aiaġomato. Au ġegu urai asi aiaġomato, senaġi ġia na etuġuguto.

⁴³ Karase nai au na kara akiraġiani guruġana asi ġotuġa-maġi-fakani? Korana au ġegu guruġa tu asi ilaila boġo seġaġirini.

⁴⁴ Ġomi tu tamami Diabolo ġena tarimarima, be ġomi ġourani tu tamami na euravini-rakavarini veġari boġono veiri. Tovotovona na veġata ġia tu vevaġi-deba tarimana ema guruga mogonina tu asi ekorana-iaġiani, korana ġia nuġanai guruga mogonina ta tu asi etanuni. Ġia eġofaġofani, moġa tu ġia ġena maġuri korikori. Korana ġia tu ġofaġofa tarimana, ema ġofaġofa mabarari tamari.

⁴⁵ Senaġi au na ġomi tu guruġa moġonina akira-varamini, nuġanai ġomi na au tu asi ġovaġa-moġoniguni.

⁴⁶ Ġomi ta na au ġegu ai vei-rakava ta bodoġaria ba? A bema au na guruġa moġonina akiraġiani nai, kara dainai au tu asi ġovaġa-moġoniguni, ei?

⁴⁷ Barau natuna na Barau ġena guruġa beseġaġiani. A ġomi tu dia Barau natuna, moġa lorinai asi ġoseġaġini.”

Iesu ema Aberahamo

⁴⁸ Benamo Iuda tarimari na Iesu ġekiraiato, ġekirato, “Ġai tu moġoni ġamaoroni. Ġoi tu Samaria tarimamu ema iauka rakavana na beboroġimu.”

⁴⁹ Iesu evaġa-veseto, ekirato, “Au tu iauka rakavana na asi beboroġigu. Au tu Tamagu agubakauani, senaġi ġomi na au tu asi ġogubakauguni.

⁵⁰ Au tauġegu aragu vaġa-raġena dabarana asi avetauani; senaġi tarima ta na evetauani, ma ġia tu Kota eseġaġini tarimana.

⁵¹ Moġoni veġata, akiramini, au ġegu guruġa bekorana-iaġirini tarimana tu asi bemaseni.”

⁵² Iuda tarimari ġekirato, “Ġai toma baġa riba-ginikau, ġoi tu iauka rakavana na eboroġimuto. Aberahamo emaseto, peroveta tarimari maki ġemaseto, a ġoi okirani, deikara na ġoi ġemu guruġa bekorana-iaġirini tarimana tu asi bemaseni.

⁵³ Ġai tamama Aberahamo emaseto. Ġoi na ġia, tamama Aberahamo, ovanagiato, ei? Ġia emaseto ema peroveta tarimari maki ġemase-ġosito. Ġoi otuġamaġini, ġoi tu deikara?”

⁵⁴ Iesu evaġa-veseto, ekirato, “Bema au tauġegu bara vevaġa-raġe, ġegu vevaġa-raġe tu asi tauna. Senaġina au tu Tamagu na evaġa-raġeguni. Ma ġia tu ġomi na ġokiraġiani, ġokirani, ġomi ġemi Barau ġotoni.

⁵⁵ Ġomi tu asi ribami ġia, senaġi au tu ma ribagu ġia. Bema au bara kira, au asi ribagu ġia, au tu ġofaġofa tarimagu ġomi kavana, senaġi au ma ribagu ġia ema ġena guruġa akorana-iaġirini.

⁵⁶ Ġomi tamami Aberahamo etuġa-maġito, au ġegu iaġoma ġarona beġitaiani etato, benamo eiakuto. Eġitaiato, benamo iauna enamoto.”

⁵⁷ Iuda tarimari na Iesu ġekiraiato, ġekirato, “Ġoi ġemu maġuri laġaniri tu gabana imaima (50) maki roġosi bene doġara, ma kamasi tu Aberahamo oġitaiato otoni?”

⁵⁸ Iesu na evaġa-veserito, ekirato, “Moġoni akiramini, Aberahamo roġosi roġo bere ġora veġata, au tu atanuto-ġoi.”

⁵⁹ Benamo fore ġeġabito, ġetakia ġetato, senaġi Iesu egumuto, benamo vekaravari na Rubu Vevaġa na eraka-rosito.

9

Iesu na mata-bubu tarimana evaġa-namoato

¹ Iesu eraka-vanaġito-ġoi nuġanai, tarima ta eġitaiato. Mo tarima tu mata-bubu emaġurito.

² Ġena mero na Iesu ġedanagiato, ġekirato, “Vevaġa-riba tarimamu, deikara evei-rakavato, benamo mai tarima matana bubu emaġurito? Ġia ba tamana sinana?”

³ Iesu evaġa-veseto, ekirato, “Dia ġia ġena rakava o dia tamana sinana ġeri rakava dainai, senaġi maiġesi evetoreto korana tu, Barau ġena seġuka ġia ġenana bene fofori ġana.

⁴ Au etuġuguto Barauna ġena ġauvei tu lagani nuġanai bisini veiri. Bogi mani eiaġomani, ma ta asi beġauveini riba.

⁵ Au roġo tanobarai atanuni nuġanai, au tu tanobara mamana.”

⁶ Mai guruġa ekiraġiato murinai, Iesu tano ai ekanunuto. Kanununa na nigo emoġeato, benamo mo nigo na mata-bubu tarimana matana eianaiato.

⁷ Ma ekiraiato, ekirato, “Noiaġo, ġoiramu Siloam kounai noa ġurigiġia.” Siloam anina tu “Barau na etuġuato tarimana.” Benamo eiaġoto, ġoirana ea ġurigiġiato, ma eġenoġoito nai, matana tu varau eiaġaiato.

⁸ Ġia sevina tarimari e vanaġi-vanaġi enoġinoġito-ġoi gabunai ġeġitaiato-ġoi tarimari ġevedanaġito, ġekirato, “Mai tarima tu noġinoġi gabunai etanu-taġoto-ġoi tarimana ene?”

⁹ Kota ġekirato, “Tarimana tu maniġa.” Senaġi kota ġekirato, “Asiġina, mani tu tarima boruna ta, senaġina ġitaġitana moġo ġia kavana.” Benamo ġia tauġena ekirato, “Tarimana tu au maiġegu.”

¹⁰ Tarimarima ġekirato, “Be ġoi matamu tu kamasi boiaġaia?”

¹¹ Ġia evaġa-veseto, ekirato, “Mo tarima arana Iesu, ġia na nigo bemoġea, ma au matagu ai beianai, benamo bekiragu, ‘Siloam kounai noa ġurigiġia.’ Baiaġo, baġurigiġia, benamo matagu baiaġaia.”

¹² Ma ġedanagiato, ġekirato, “Tarimana tu aiġa?” Ġia evaġa-veseto, ekirato, “Au asi ribagu.”

Farisea tarimari na mo enamoto tarimana ġevedanaġi-iaġiato

¹³ Benamo matana enamoto tarimana Farisea tarimari ġeri ai ġeġori-iaġoato.

¹⁴ Mo ġaro Iesu na nigo emoġeato, ma mata-bubu tarimana matana evaġa-namoato tu Sabadi ġarona.

¹⁵ Moġa lorinai Farisea tarimari na ma ġedanagi-ġenoġoato, kamasi matana eiaġaiato. Ġia na ekirarito, ekirato, “Mo tarima na matagu nigo na eianaiato, benamo ġoiragu aġurigiġiato, ma toma tu aboġeboġeni.”

¹⁶ Farisea tarimari kotari ġekirato, “Mai tarima tu dia Barau ġenana eiaġomato, korana ġia na Sabadi asi ekorana-iaġiani.” Ma kotari ġekirato, “Vei-rakava tarimari na moġesina veigari tu kamasi beġe veirini?” Monana ġia tauġeri fakari ai ġevetavi-kirato.

¹⁷ Benamo Farisea tarimari na mo tarima ma ġedanagiato, ġekirato, “Ġoi okirani ġia na matamu bevaġa-iaġaia otoni? Ġoi na ġia tu kamasi oġitaiani?” Ġia evaġa-veseto, ekirato, “Ġia tu peroveta tarimana.”

¹⁸ Iuda tarimari na mai tarima ġena guruġa asi ġevaġa-moġoniato, korana ekirato, “Tovotovonai au matagu tu bubu, a mai vau aboġeboġe-ġinikauni.” Moġa lorinai tamana e sinana ġekea-iaġomarito.

¹⁹ Benamo ġia na ġedanagiato, ġekirato, “Mai tu ġomi natumi ba? Ma moġoni ġia tu mata-bubu emaġurito ġotoni? Ma kamasi nai tu vau mai ma eboġe-boġeni?”

²⁰ Benamo tamana e sinana ġevaġa-veseto, ġekirato, “Ġai ribama, ġia tu ġai natuma, ema ġai ribama maki, ġia tu mata-bubu emaġurito.

²¹ Senaġi ġai tu asi ribama, maitoma tu kamara dabarai eboġeboġeni. Ġai maki asi ribama, dei na matana bevaġa-namoa. Ġodanaġia, ġia tu mero barego, be tauġena bevaġa-veseni.”

²² Tamana e sinana moġesi ġekirato, korana Iuda tarimari gariri ġeveito nai. Korana Iuda tarimari na ġevaġa-moġoniato, tarima ta na Iesu bekiraġiani Keriso betoni tarimana tu, rubu na beġe tore-veġitaiani.

²³ Moġesi naima tamana e sinana ġekirato, “Ġia mero barego, be ġodanaġia,” ġetato.

²⁴ Matana enamoto tarimana ma ġekea-ġenoġoato, benamo ġekiraiato, ġekirato, “Barau novaġa-raġea, be noguruġa-korikori. Ġai ribama, ġoi matamu bevaġa-namoa tarimana tu vei-rakava tarimana.”

²⁵ Matana enamoto tarimana evaġa-veseto, ekirato, “Au asi ribagu, ġia tu vei-rakava tarimana ba asiġi. Dagara sebna moġo ma ribagu: Au matagu tu bubu, senaġi toma tu aboġeboġeni.”

²⁶ Ĝia na ĝekiraiato, ĝekirato, “Mo tarima tu kara eveiato ĝoi ĝemu ai? Ĝoi matamu bubu na tu kamasi evaĝa-fafaaiato?”

²⁷ Ĝia evaĝa-veseto, ekirato, “Au na ĝomi tu varau bakira-varami, senaĝi ĝomi asi ĝoseĝaĝini. Karase nai ĝourani ma ĝoseĝaĝi-ĝenogoi ĝotoni? Ĝomi maki ĝia ĝena mero ai boĝono iaĝo ĝotoni ba?”

²⁸ Benamo ĝia na ĝeguruga-gwaĝiĝi viniato, ĝekirato, “Ĝoi neĝi ĝia ĝena mero, ĝai tu Mose ĝena mero.

²⁹ Ĝai ribama Barau na Mose evaĝa-guruĝaiato. A mani tarima, ĝai asi ribama ĝia tu ainana eiagomato!”

³⁰ Matana enamoto tarimana evaĝa-veseto, ekirato, “Ia, ĝomi tu kamasi ma ĝoguruĝani, ma ĝokirani ĝomi tu asi ribami ĝia tu ainana eiagomato ĝotoni? Senaĝina ĝogitaia, ĝia na tu au matagu bevaĝa-namoa.

³¹ Ĝita ma ribara, Barau na vei-rakava tarimari tu asi eseĝaĝi-vinirini, a deikara na ĝia ĝekorana-iaĝiani e ĝena ura veiĝari ĝevairini tarimari, ĝia na tu eseĝaĝi-vinirini.

³² Tanobara evesinana na vegata tarima ta roĝosi tara seĝaĝi, tarima ta mata-bubu eĝorato tarimana matana evaĝa-iaĝaiato.

³³ Bema mai tarima Barau ĝenana asi bere iaĝoma, ĝia na dagara ta asi bere veia riba.”

³⁴ Ĝia ĝevaĝa-veseto, ĝekirato, “Ĝoi tu omaĝurito veĝata na rakava tarimamu, ma kamasi tu ĝai novaĝa-ribama otoni?” Benamo rubu nuĝana na ĝelai-rosiato.

Farisea tarimari ĝeri mata-bubu

³⁵ Iesu eseĝaĝito, matana enamoto tarimana tu ĝelai-rosiato, benamo tarimana edoĝariato nai tu, ekiraiato, ekirato, “Tarimarima Natuna ovaĝa-moĝoniani ba, ei?”

³⁶ Mo tarima evaĝa-veseto, ekirato, “Vereĝauka, ĝia tu dei? Nokira-varagu, be bana vaĝa-moĝonia.”

³⁷ Iesu na ekiraiato, ekirato, “Tarimana tu varau oĝitaiani maiĝa, ĝoi inította ĝia ĝesi ĝoguruĝa-guruĝani.”

³⁸ Benamo matana enamoto tarimana ekirato, “Vereĝauka, avaĝa-moĝonimuni.” Benamo evetui-tarito, Iesu etoma-rakariĝo viniato.

³⁹ Iesu ekirato, “Au tu vevaĝa-kota uranai mai tanobara ĝana aiaĝomato, mata-bubu tarimari beĝene boĝeboĝe ĝana, ema ĝeboĝeboĝeni tarimari matari beĝene bubu ĝana.”

⁴⁰ Farisea tarimari kota monai ĝia ĝesi, mai guruĝa ĝeseĝaĝiato, benamo ĝekiraiato, ĝekirato, “Ĝoi okirani, ĝai tu mata-bubu otoni?”

⁴¹ Iesu evaĝa-veseto, ekirato, “Bema ĝomi mata-bubu nai tu, ĝomi asi ĝemi rakava ĝoro tanu, senaĝi ĝomi ĝokirani ‘Ĝai matama tu iaĝataĝo’ ĝotoni, naima ĝomi ĝemi rakava tu roĝo iatami ai.”

10

Mamoe narinariri tarimana

¹ Iesu ekirato, “Moĝoni, au na ĝomi akira-korikorimini, mamoe maĝuna ĝatama bokana na asi beraka-toĝani, senaĝi dabara ta na befaĝa-seĝini tarimana tu lema e verari-verari tarimana.

² A mamoe ĝitaĝauri tarimana tu ĝatama-boka na beraka-toĝani.

³ Ĝatama-boka narinarina tarimana na ĝena ĝatama-boka bekeoani, benamo mamoe na ĝia garona ĝeseĝaĝiani. Ĝia na ĝena mamoe arari evatorini, benamo eĝori-rosirini.

⁴ Ĝena mamoe mabarari eĝori-rosirini, benamo ĝia ĝoirari ai erakani, ma ĝena mamoe ĝia murinai ĝerakakauni, korana mamoe ma ribari ĝia garona.

⁵ A tarima boruna ta murina na tu asi beĝe iaĝoni, asigina ĝinavaĝi; tarima boruna ĝenana tu beĝe raga-kwareĝani, korana ĝia garona mamoe tu asi ribari.”

⁶ Iesu na mo barabore ekira-vararito, senaĝi ĝia tu asi ĝetuĝamaĝi-fakato.

Iesu tu mamoe ĝitaĝauri tarimana namona

⁷ Benamo Iesu na ma ekirarito, ekirato, “Au na moĝoni akiramini. Au tu mamoe ĝeri ĝatama-boka.

⁸ Ĝeiaĝoma-guineto tarimari mabarari tu lema e verari-verari tarimari. A mamoe na garori asi ĝeseĝaĝirito.

⁹ Au tu ĝatama-boka. Deikara au ĝeguna beraka-toĝani tarimana tu bemaĝurini. Beraka-toĝani, beraka-rosini, ema ĝanigani beĝoitaĝoni.

¹⁰ Lema tarimana tu asi beiaĝoma-kavani. Senaĝi ĝia tu lema beiaĝomani, vaĝivaĝi beiaĝomani, vevaĝa-rakava kwaikwai beiaĝomani. A au aiaĝomato tu, maĝuri beĝene ĝabia, ema maĝuri na beĝene vonuvonu-raĝe ĝana.

¹¹ Au tu mamoe ġitaġauri tarimagu namona. Mamoe narinariri tarimana namona tu ġena maġuri etore-tariani mamoe urari ai.

¹² Ġauvei tarimana ġevoiani vau mamoe eġitaġauni tarimana, ġia tu dia mamoe ġitaġauri tarimana korikori, ema ġia tu dia mamoe biagunari. Moġa lorinai boġa kwaivana rakavana eiaġomani beġitaiani nai, mamoe beiaġuirini ma beraga-kwareġani. Benamo boġa kwaivana rakavana na beġabi-taririni, benamo bevaġa-gari lausirini.

¹³ Ma voina tarimana eraga-kwareġani, korana ġia tu vetuġunaġi tarimana ma voina, ema mamoe maki asi etuġamaġi-kaurini.

¹⁴ Au tu mamoe narinariri tarimagu namona. Ġegu mamoe ribagu e ġegu mamoe maki ma ribari au.

¹⁵ Vaġa-ilailana Tamagu ribana au e au maki ribagu Tamagu kavana. Ema ġegu maġuri maki atore-tariani ġia urari ai.

¹⁶ Au ma ġegu mamoe irauri kotari ġetanuni. Senaġi ġia mai seri nuġanai tu asi tauri roġo. Au na ġia maki baġori-iaġomarini. Ġia na au garogu beġe seġaġiani, ema ġia maki mai seri sebonai beġe iaġoni e ġitaġauri tarimana maki sebona.

¹⁷ Tamagu na eura-viniguni, korana ġegu maġuri tu atore-tariani, ema ma baġabi-ġenoġoiani.

¹⁸ Tarima ta na au ġegu maġuri asi beġabi-vaġiani au ġeguna. Au tauġegu ġegu urai atore-tariani. Au tu ma ġegu seġuka batore-tariani, ema ma ġegu seġuka baġabi-ġenoġoiani. Moġa tu au Tamagu na ekiraguto bana veia.”

¹⁹ Mai guruġa ġaramanai Iuda tarimari tauġeri vekaravari ai moġo ma ġevevarekira-ġenoġoito.

²⁰ Tarima vovoka ġekirato, “Ġia tu iauka rakavana na beboroġia, be bebabo. Karase nai ġia ġoseġaġi-viniani?”

²¹ Senaġi tarima kotari ġekirato, “Tarima ta iauka rakavana na beboroġiani nai tu, maiġesi asi beguruġani. Iauka rakavana na mata-bubu tarimari matari tu kamasi bevaġa-fafarini?”

Iuda tarimari na Iesu ġebaru-viniato

²² Monai Rubu Veaġa Vaġa-veaġana Verekona Ierusalemaj ġarona eġabiato. Mo tu faraka ġueri nuġanai.

²³ Ma Iesu tu Rubu Veaġai Solomona ġena touraġe na eraka-iaġoto-ġoi.

²⁴ Benamo Iuda tarimari na ġeruġa-ġeġeraġiato, benamo ġedanagiatu, ġekirato, “Ġai tu roġo ġadaradarani. Aitoma vau bokira-varamani, ġoi tu deikara? Bema ġoi moġoni Keriso, (Barau na ekiraġi-toreato vevaġa-maġuri tauna), nai tu, ġemai novekiraġi-fofori ġinikau.”

²⁵ Iesu na evaġa-veserito, ekirato, “Au na tu varau akiramito, senaġina asi ġovaga-moġoniguni. Au Tamagu aranai aveirini veiġari na tu au ġevaġa-foforiguni.

²⁶ Senaġi ġomi na asi ġovaġa-moġoniguni, korana ġomi tu dia au ġegu mamoe.

²⁷ Au ġegu mamoe na tu au garogu ġeseġaġiani. Ema au ribagu ġia, ema ġia tu au murigu ai ġerakani.

²⁸ Benamo au na maġuri vanaġivanaġi avinirini, ema ġia tu asiġina ġinavaġi beġe maseni; ema ta na au ġeguna asi beġabi-ġerevaġirini.

²⁹ Ġia tu au Tamagu na au eviniguto, e au Tamagu tu iaru-korokoro, ta na asi bevanaġiani. Ema ta na maki asi ilaila ġia ġena veġitaġau seġukana ġenana beġabi-ġerevaġirini.

³⁰ Au ema au Tamagu tu sebona moġo.”

³¹ Benamo Iuda tarimari fore ma ġeġabito, ġetakia ġetato.

³² Iesu na ekirarito, ekirato, “Veġa namori vovoka ġomi ġoirami ai aveirito. Mo veġa mabarari tu au Tamagu na eviniguto bana veiri etato. Moġeri veġa mabarari fakari ai tu, kamara veġa ġaramanai ġourani au ġotakigu ġotoni?”

³³ Iuda tarimari ġekirato, “Veġa namona ta ġaramanai ġoi tu asi ġatakimuni, senaġi ġoi na Barau okira-fitoġaiani nai. Ġoi tu tarimarima moġo, senaġi tauġemu Barau ai ovevaġa-iaġoni.”

³⁴ Iesu na evaġa-veserito, ekirato, “Ġomi ġemi taravatu nuġanai guruġa ta tu maiġesi ekirani, ‘Au akirato, ġomi tu barau.’

³⁵ Ġita ma ribara, kara Buka Veaġai ekiraġiani guruġana tu etanu-vanaġi vanaġini. Barau na mo tarimarima ekiraġirito ‘barau’, ma Barau na ġena guruġa evinirito tarimari tu ġia.

³⁶ A au tu Tamagu na eġabi-viriġiguto, ema etuġuguto tanobara ġana; ma kamasi nai tu ġokiraguni, ġokirani, au na Barau akira-fitoġaiani, korana au akirani, ‘Au tu Barau Natuna’ atoni ei?

³⁷ Bema au Tamagu ġena veġa asi aveirini nai, asi boġono vaġa-moġonigu.

³⁸ Senaġi ġena veiġa aveirini nai, mo veiġa boġono vaġa-moġoniri, bema au asi boġono vaġa-moġonigu ġotoni tu. Boġono riba ema boġono vaġa-moġonia, Tamagu tu au nuġagu ai etanuni, ema au maki Tamagu nuġanai atanuni.”

³⁹ Mo guruġa ġaramanai ġeurato, Iesu ma ġeġabi-taria ġetato, senaġina ġimari na moġo ma eveġabi-vaġito, erakato.

⁴⁰ Benamo monana Iesu ma eġenoġoito. Eraka-iaġoto, Ioridana ġarukana eraka-vanaġito, eiaġoto reke ta kefo, guinenai Ioane ebabatisoto-ġoi gabuna ġana; monai ea tanuto.

⁴¹ Tarima vovoka ġia ġenai ġeiaġoto, benamo ġekirato, “Ioane na vetoġa boruna ta asi eveiato, senaġi mai tarima guruġana ekiraġirito guruġari mabarari tu moġoni veġata.”

⁴² Monai tarima vovoka Iesu ġevaġa-moġoniato.

11

Lasaro ġena mase

¹ Betania tarimana ta arana Lasaro ekeveto. Betania tu Maria ma tobana ġuiatona Mareta ġeri vanuġa.

² Mai Maria maiġa mainana Vereġauka muramura bonana namo vedaureana na edioroato, ema Vereġauka kwakuna maki guina na edau-kaukauato ġuiatona. Lasaro tu Maria tobana futuana.

³ Benamo mai ġuiato ruarua na Iesu ġena guruġa ġetuġuto, ġekirato, “Vereġauka, ġoi na oura-viniani tarimana tu bekeve.”

⁴ Iesu na mo vari esegagiato nai tu, ekirato, “Mani keve na tu asi bevei-maseani. Mani tu Barau ġena seġuka e mareva baregona bene fofori ġana. Ema maniġa ġenana Barau Natuna beġene vaġa-raġea.”

⁵ Iesu na Mareta ma tarina ġuiatona Maria ema Lasaro tu eura-vinirito-ġoi.

⁶ Senaġi Lasaro ġena keve varina esegagiato tu, ġaro ruarua roġo ma etanuto, mo etanuto-ġoi gabunai.

⁷ Mo ġaro ruarua muriri ai ġena mero evaġa-guruġarito, ekirato, “Ġita tu ma siġenoġoi-iaġo Iudea ġana.”

⁸ Ġena mero na ġekiraiato, ġekirato, “Vevaġa-riba tarimamu, ini ġoraġani Iuda tarimari na tu fore na ġetakimu ġetato, a toma tu siġenoġoi-iaġo ma otoni.”

⁹ Iesu na evaġa-veserito, ekirato, “Ġaro ta nuganai horaġauna mabarana tu 12 ene? Bema tarima ta laġani mamanai erakani nai tu, asi bevefutu-naġini, korana ġia tu mai tanobara laġani mamanai ebogebogeni.

¹⁰ Senaġi mukunai erakani tarimana tu evekaġe-kaġekauni, korana ġia nuġanai mama tu asi etanuni.”

¹¹ Iesu maiġesi evaġa-guruġa-ġosirito murinai, ma ekirarito, ekirato, “Ġita ġatara Lasaro tu egenani, senaġi au tu aiagoni, ġena na navaġo-tataġaia ġana.”

¹² Benamo ġena mero ġekirato, “Vereġauka, bema egenani nai tu, vau ma benamoni.”

¹³ Senaġina Iesu na mo tu emaseto ekiraġiato-ġoi. A ġena mero mataboru ġekirato-ġoi tu, eiaġaraġini nai egena-maseto ekiraġiani, ġetato-ġoi.

¹⁴ Benamo Iesu na ekiravara-ġinikaurito, ekirato, “Lasaro tu bemase.

¹⁵ Senaġi ġomi ġemi namo atuġamaġiani nai aiakuni, mo ġaro ai au ġia ġesi tu asiġi, korana maiġa ġenana au boġo vaġa-moġoniguni. Be si-iaġo ġenai.”

¹⁶ Benamo Tomasi, arana ta tu Didimo o Kafa ġetato-ġoi, na Iesu ġena mero kotari ekirarito, ekirato, “Ġita maki ġia ġesi si-iaġo, be ġia ġesi bisini mase-sebona.”

Iesu tu maġuri korana

¹⁷ Iesu ma eraġasito nai eribato, Lasaro tauġanina tu ġaro vasivasi (4) guri ai varau beġena.

¹⁸ Betania e Ieruselema vefakari tu kilomita toitoi (3) kavana.

¹⁹ Ema Iudea tarimari vovoka Mareta e Maria ġeri ai ġeiaġoto, tauri beġene vaġa-gwaġiġiri ġana, korana tobari emaseto bene.

²⁰ Mareta esegagiato, Iesu tu eiaġomato-ġoi nai, eraga-raka toreġau-iaġoto Iesu ġesi ġea vedoġarito. A Maria tu numai etanu-gwaġiġito.

²¹ Benamo Mareta na Iesu ekiraiato, ekirato, “Vereġauka, ġoi bere mainai kavana tu, au tobagu asi bere mase.

²² Senaġi au ribagu, initoma maki kara dagara Barau bonoġiani tu, Barau na bevin-imuni.”

²³ Iesu na ekiraiato, ekirato, “Ġoi tobamu tu bevariġisi-ġenoġoini.”

²⁴ Mareta na Iesu evaġa-veaseato, ekirato, “Au ribagu, ġaro magonai variġisi-ġenoġoi ġaronai ġia tu ma bevariġisi-ġenoġoini.”

²⁵ Iesu na Maria ekiraiato, ekirato, “Au tu varigisi-ḡenoḡoi ema maḡuri. Au bevaḡa-moḡoniguni tarimana tu bemaseni, senaḡina roḡo maḡuri betanuni.

²⁶ Ema deikara maḡuri etanuni nuḡanai, au evaḡa-moḡoniguni tu asiḡina ḡinavaḡi bemaseni. Mai guruḡa ovaḡa-moḡoniani ba?”

²⁷ Mareta na ekiraiato, ekirato, “Oi Vereḡauka, au na avaga-moḡoni korikorimuni, ḡoi tu moḡoni Keriso, Barau Natuna, tanobara ḡana boiaḡomani tarimamu.”

Iesu etaḡito

²⁸ Mareta moḡesi ekirato murinai eḡenoḡoi-iaḡoto, benamo tarina Maria vekuretoḡai ea kea-ḡairiato, ekirato, “Vevaḡa-riba tarimana tu beiaḡoma ema ḡoi ekeamuni.”

²⁹ Maria na mo guruḡa eseḡaḡiato nai, asikauna evarigisito, benamo Iesu ḡenai eiaḡoto.

³⁰ Mo horai Iesu tu vanuḡai roḡosi roḡo bere raka-toḡa, ḡia roḡo Mareta na mo edoḡariato gabunai roḡo.

³¹ Iuda tarimari, Maria ḡetanu-dukudukuato-ḡoi tarimari, na Maria ḡeḡitaiato, eraga-varigisito ma eraka-rosito nai tu, murina na ḡerakato. ḡia mataboru ḡekirato, Maria tu gara ḡana eiaḡoni, mase tarimana nea taḡi-vinia ḡana.

³² Maria eiaḡoto, Iesu sevina eiaḡasito, ma Iesu eḡitaiato nai tu, kwakuna koranai evetui-tarito, benamo evaḡa-guruḡaiato, ekirato, “Vereḡauka, ḡoi bere mainai kavana tu, au tobagu asi bere mase.”

³³ Iesu na Maria eḡitaiato etaḡito-ḡoi, ema mo Iuda tarimari, ḡia ḡesi ḡeiaḡomato tarimari, maki ḡetaḡito-ḡoi nai tu, ḡia nuḡana maki tuḡamaḡina eḡabi-rakavaiato, dori etaḡito.

³⁴ Benamo Iesu na edanaḡirito, ekirato, “Ainai ḡotoreato?” ḡia na ḡevaḡa-veseato, ḡekirato, “Vereḡauka, noiaḡoma, be noma ḡitaia.”

³⁵ Iesu etaḡito.

³⁶ Benamo Iuda tarimari ḡekirato, “Goḡitaia, Lasaro tu euravini-rakavaiani.”

³⁷ Senaḡi Iuda tarimari kotari ḡekirato, “Mai tarima na mata-bubu tarimana matana evaḡa-iaḡaiato, be Lasaro maki asi veḡata bere vaḡa-masea, ene?”

Iesu na Lasaro mase na evaḡa-varigisi ḡenoḡoiato

³⁸ Monana Iesu nuḡana ma evaḡa-vekwarāḡi lelevaḡiato, benamo gara gabuna ḡana eiaḡoto. Mo gara forena kouḡana tu fore ta na ḡetabe-ḡauato.

³⁹ Iesu ekirato, “Fore ḡoḡabi-veḡitaia.” Ma Mareta, mo mase tarimana tobana, na Iesu ekiraiato, ekirato, “Vereḡauka, ḡia emaseto ḡarona na beiaḡoma toma tu ḡaro vaḡa-vasivasina (4), be bonana tu rakava kwaikwai banaḡu.”

⁴⁰ Iesu na Mareta ekiraiato, ekirato, “Au na ḡoi tu bakiramuni, bema bovaḡa-moḡoniguni nai, Barau marevana baregona boḡitaiani basi, ene?”

⁴¹ Benamo mase tarimana ḡetoreato gabuna na fore ḡeḡabi-veḡitaiato. Moḡa murinai Iesu eboḡe-vaisito, benamo ekirato, “Tamagu o, au na ḡoi atanikumuni, korana ḡoi na varau boseḡaḡigu.

⁴² Au ribagu, ḡoi na vanaḡivanaḡi oseḡaḡiguni. Senaḡi maiḡesi akirani korana tu mai tarimarima ḡeruḡa-taḡoni maiḡeri urari ai. Be ḡia na beḡene vaḡa-moḡonia, au tu ḡoi na otuḡuguto.”

⁴³ Moḡesi eguruḡato murinai ekea-fararato, ekirato, “Lasaro, noma rakarosi!”

⁴⁴ Benamo mo emaseto tarimana mase dabuḡari na ḡimana kwakuna viriviri-tari e ḡoirana ekumu-iaḡiato dabuḡana ḡesi ema raka-rosito. Iesu na ekirarito, ekirato, “Goruḡaia, be neraka.”

Iesu vaḡivaḡina dabarana ḡevetauato

Mataio 26:1-5; Mareko 14:1-2; Luka 22:1-2

⁴⁵ Benamo mo Iuda tarimari vovoka, Maria ḡenai ḡeiaḡoto moḡeri, Iesu na mo veḡi aveirito ḡeḡitarito nai, vovoka tu Iesu ḡevaḡa-moḡoniato.

⁴⁶ Senaḡi kotari tu ḡeḡenoḡoi-iaḡoto Farisea tarimari ḡeri ai, benamo Iesu na kara aveirito dagarari ḡea kira-vararito.

⁴⁷ Benamo Rubu Veaḡa vereri baregori ema Farisea tarimari na kanisoro tarimari ḡekea-vegogorito, benamo ḡekirato, “ḡita tu kara toma taveiani? Mai tarima na vetoḡa boruri vovoka eveirini.

⁴⁸ Bema ḡia maiḡesi ḡita na bita ḡita-ḡuraḡiani moḡo nai tu, tarimarima mabarari na ḡia beḡe vaḡa-moḡoniani. Benamo Roma tarimari beḡe iaḡomani, ḡita ḡera gabu (o Rubu Veaga) ema ḡera tanobara ḡita ḡerana beḡema ḡabi-vaḡiani.”

⁴⁹ Benamo ḡia fakari ai tarima ta arana Kaiafas, ḡia mo laḡani ai tu Rubu Veaga verena baregona, ḡia na ekirarito, ekirato, “Gomi dagarara ta tu asi ribami!”

⁵⁰ Ğomi asi ġotuġamaġi-fakani, namona tu tarima sebona moġo tarimarima mabarari urari ai bene mase, a mai tanobara mabarana beġe vaġa-rakava ġosiġosiani tu asi namo.”

⁵¹ Ğia moġesi ekirato tu, dia ġia tauġena nuġana siga moġo eguruġato; senaġi ġia mo laġani ai tu Rubu Veaġa verena baregona, moġa lorinai ġia mo tu eperovetato, Iesu tu bene mase Iuda tarimari mabarari urari ai.

⁵² Ema Iesu tu dia Iuda tarimari moġo urari ai bemaseni. Senaġi Barau natuna gabu iraurirau ai ġetanu-lausilausini tarimari mabarari bene ġabi-vegogori, doġoro sebonai bene vaġa-iaġori ġana.

⁵³ Moġa lorinai mo ġaro na evesinato eiaġoto tu, Iuda tarimari baregori na Iesu kamasi beġe vaġi-maseani dabarana ġevetauato.

⁵⁴ Moġesina naima Iuda tarimari ġoirari ai Iesu asi eraka-foforito-ġoi. Mo gabu na eraka-veġitato, eiaġoto tano fakana asi tarimarimana gabuna sevinai, vanuġa ta arana Efraim ġana. Ğena mero ġesi monai ġea tanuto-ġoi.

⁵⁵ Iuda tarimari ġeri Pasova verekona tu ekavinaġito. (Moġa tu Iuda tarimari mase aneruna na evanaġirito moġo, asi evaġirito verekona). Ma Iuda tarimari vovoka mo tanobarai ġetanuto Ierusalemaj ġema raka-vegogoto. Ğia ġema raka-vegogoto tauna korikori, Barau ġoiranai beġene veiareva vauro, Pasova verekona bene vesina.

⁵⁶ Ğia na Iesu ġeġita-vetauato-ġoi, ma Rubu Veaġa nuġanai ġeruġa-vegogoto nai tu, tauġeri fakari ai moġo ġevedanaġi-vedanaġito, ġekirato, “Ğomi tu kamasi mani ġotuġamaġini? Mai vereko ai toma ema ġoira-refoni ba?”

⁵⁷ Rubu Veaġa vereri baregori ema Farisea tarimari na vevaġa-naġi guruġana tu varau Iuda tarimari ġevinirito, ġekirarito, bema ta beseġaġini Iesu tu ainai, ġia tu maoromaoro bene iaġo, Iuda vereri benea kira-varari, be beġene ġabia.

12

Maria na Iesu ediġaiato Betania ai

¹ Pasova o Iuda tarimari mase aneruna na evanaġirito moġo verekona tu ġaro imaima sebona (6) roġo ġoirai nuġanai, Iesu Betania ġana eiaġoto. Lasaro tu Betaniai etanuto-ġoi, ema monai emaseto, ma Iesu na mase na evaġa-variġisiato.

² Monai Iesu ġabiraġena ġaniġanina ġeveiato. Mareta na ġari ġaniġani edabaraiato, ma Lasaro maki monai ġaniġani gabunai ġetanu-vegogoto tarimari ġesi ġetanu-vegogoto, ġeġaniġanito.

³ Benamo Maria na muramura bonana namo vedaureana lita kwana kavana eġabiato, benamo Iesu kwakuna fanafanana ediġa-iaġiato, ema ġuina na Iesu kwakuna fanafanana ma edau-kaukauato. Ma numa mabarana tu mo muramura bonana na evaiato. Mo muramura tu ġauġa arana nad ġokana na ġeveito-ġoi, ema voina tu varaġe rakava.

⁴ Senaġi Iesu ġena mero ta arana Iudas Isakariota, mai tu Iesu vau ma bea revaiaini tarimana, ekirato,

⁵ “Karase mai muramura mabarana tu silva moniri sinau toitoi (300) ai asi bevoivoi-iaġia? (Mai tu tarima ta davana laġani ta nuġanai kavana). Bere voivoi-iaġia, be voina monina bere ġabia tu, asi ġeri-ġari tarimari bere viniri.”

⁶ Ğia moġesina eguruġato tu, dia asi ġeri-ġari tarimari evetuġa-ġwarito-ġoi lorinai, senaġi korana ġia tu lema tarimana naima. Ğia na tu moni fusena eġwa-rakao rakaotato-ġoi, ma mo fuse ai moni elemarito-ġoi, benamo ġena ura dagarari evoi-iaġirito-ġoi.

⁷ Benamo Iesu ekiraiato, ekirato, “Ğoraga-kwanea, mai vavinena tu kara bere veia dagarana beveia, ġia na au tauġanigu muramura na bedau-guinea, gurigurigu ġana.

⁸ Asi ġeri-ġari tarimari tu vanaġivanaġi ġomi ġesi boġo tanuni, a au tu vanaġivanaġi ġomi ġesi asi batanuni.”

Rubu Veaġa vereri baregori na Lasaro beġene vaġia ġetato

⁹ Iuda tarimari vovoka tabutabu ġeseġaġito Iesu tu Betania ai. Benamo moġana ġeiaġoto, dia Iesu moġo uranai, senaġi Lasaro maki beġene ġitaia ġana. Lasaro tu mase na Iesu na evaġa-variġisi ġenoġoiato.

¹⁰ Moġesi naima Rubu Veaġa vereri baregori tu ġeboioġato, Lasaro maki beġene vaġi-masea ġetato.

¹¹ Korana tu ġia dainai Iuda tarimari vovoka ġia ġerina ġeraka-veġitato, benamo Iesu ġevaġa-moġoniato.

Iesu ġena rakatoġa Ierusalemaj ġevonevone-raġe viniato

Mataio 21:1-11; Mareko 11:1-11; Luka 19:28-40

¹² Ma elaġanito nai, vereko uranai ġeiaġomato tarimari vovoka ġeseġaġito, Iesu tu Ierusalemaj ġana varau eraka-iaġomato-ġoi.

¹³ Galamo lauri noġa dagarari ġeġabito, benamo Iesu ġenai ġeiaġoto, ġeġabato, ġekirato, “Hosana!

Isaraela ġeri Kini sivaġa-namoa, Vereġauka arananai eiaġomani tarimana sivaġa-namoa!”

¹⁴ Ma Iesu na doniki natuna ta edoġariato, benamo iatanai etanukauto, Buka Veaġa nuġanai ekirani ilailanai,

¹⁵ “Siona natuna,

(Ierusalemata tarimami), asi ġogari, ġoboġe, ġemi Vere eiaġomani, ġia tu doniki natuna iatanai betanukau.”

¹⁶ Mo ġaro ai ġena mero na maiġeri tu asi ġetuġamaġi-fakarito. Senaġi Barau na Iesu evaġa-raġeato e mareva baregona eviniato murinai vau, ġia ġeriba-maoroto, maiġeri mabarari ġetorerito tu, ġia ġekiraġiato. Ema ġeribato, mo veiaġa mabarari tu ġia ġenai ġevairito.

¹⁷ Iesu na Lasaro gara forena kouġana na ekea-rosiato, ema mase na evaġa-varigisiatu ġaronai, tarimarima tu ġutuma-bara ġia ġesi. Benamo moġeri tarima na mo veiaġa ġegitaġato varina tu roġo ġevari-fuato-ġoi.

¹⁸ Tarima ġutuma ġeiaġoto Iesu ġesi vedoġari, korana ġeseġaġito, Iesu na mo vetoġa boruna eveiatu dainai.

¹⁹ Moġesina nai Farisea tarimari tauġeri fakari ai ġevedare-mutukato, ġekirato, “Goġitaiani, ġomi tu asi ġokokoreni. Goboġe, mai tanobara tarimana mabarana tu ġia murinai ġerakani.”

Grik tarimari kotari na Iesu ġevetauato

²⁰ Vereko ġaronai toma-rakarigo uranai Ierusalemata ġana ġevaraġeto tarimari fakari ai tu, Grik o Helene tarimari kotari maki ġerakakauto.

²¹ Ġia ġeiaġoto Filipino ġenai, benamo ġekiraġiato, ġekirato, “Verebara, ġai ġaurani tu Iesu ġaġitaġa ġatoni.” Filipino tu Galilea tanonai vanuġa arana Betesaida tarimana.

²² Filipino eiaġoto Anduru ea kiraiato, benamo tauri ruarua ġeiaġoto, Iesu ġekiraġiato.

²³ Iesu na evaġa-veserito, ekirato, “Ġarona varau bema-raġasi, Tarimarima Natuna mareva baregona beġabiani.

²⁴ Mogoni korikori akiramini, widi ġuena tano nuġanai beketo-ġurani ema bemaseni vau, vovokari ġia ġenana beġe ġorani. A widi ġuena tano ai asi beketoni ema asi maki bemaseni nai, ġereġana moġo betanuni.

²⁵ Ġena maġuri eura-viniani tarimana na maġuri vanaġivanaġi tu asi beġabiani, beleaiani. A mai tanobarai ġena maġuri etuġamaġi-fitoġaiani tarimana na, ġena maġuri tu etoretaġoani maġuri vanaġivanaġi ġana.

²⁶ Au vetuġunaġigu eiaġo-vinini tarimana tu au murigu na bene raka; be au ainai, au vetuġunaġigu eiaġo-vinini tarimana maki monai ai ġesi. Au vetuġunaġigu eiaġo-vinini tarimana tu, au Tamagu na ġia maki bevaga-namoani.”

Iesu ġena mase eguruġa-iaġiato

²⁷ “Maitoma au nuġagu tu evekwaraġini, e ġegu tuġamaġi bebarego. Be kara batoni? Nakira, ‘Tama, mai hora na noma vaġa-maġurigu’ nasi? Asiġina, au ġegu iaġoma tauna korikori aoanai tu mai bama raġasi maiġea.

²⁸ Tamagu, ġoi aramu novaga-raġea.” Benamo garo ta guba na emariġoto, ekirato, “Au na aragu tu varau bavaġa-raġea, ema mai maki ma bavaġa-raġe ġenoġoiani.”

²⁹ Tarima ġutuma monai ruġa-vegogo na mo garo ġeseġaġiato, benamo ġekirato, “Guba begurua.” Ma kotari ġekirato, “Aneru ta na bevaġa-guruġaia.”

³⁰ Iesu na evaġa-veserito, ekirato, “Mani garo tu dia au uragu ai nai beiaġoma, senaġi ġomi urami ai nai beiaġoma.

³¹ Maitoma tu tanobarai Barau na vevaġa-maoro eveiani. Maitoma Barau na mai tanobara verena, Satani, evaġa-darereani.

³² Benamo au tano iatana na beġe ġabi-vaisiguni, monana tarimarima mabarari au ġegu ai bainu-kavirini.”

³³ Ġia maiġesi eguruġato tu, ġia ġena mase ai tu aiġesi bemaseni moġa ekiraġi-rosiato.

³⁴ Tarimarima ġevaġa-veseto, ġekirato, “Ġai taravatu guruġari na ġeseġaġito, Keriso tu betanu-vanaġi vanaġini, ma ġoi kamasi nai tu okirani, Tarimarima Natuna tu beġe ġabi-vaisiani? Tarimarima Natuna tu deikara ei?”

³⁵ Benamo Iesu na ekirarito, ekirato, “Mama ġomi ġesi tu asi betanu-maukani. Mama roġo ġomi ġesi nuġanai, mamai ġoraka, mukuna na beġabimini garina. Mukuna nuġanai erakani tarimana tu asi ribana, ġia tu aiġana eiaġoni.

³⁶ Mama roĝo ĝomi ĝesi nuĝanai, mama boĝono vaĝa-moĝonia, be mama natunai boĝono iaĝo.”

Maiĝeri guruĝa ekiraĝi-ĝosirito murinai eraga-kwanerito, benamo eiaĝoto, asi beĝe ĝoitaĝoani gabunai etanuto-ĝoi.

Iuda tarimari na Iesu roĝo asi ĝevaĝa-moĝoniato-ĝoi

³⁷ Iesu na Iuda tarimari ĝoirari ai vetoĝa boruri vovoka eveirito, senaĝi roĝo mo asi ĝevaĝa-moĝoniato-ĝoi.

³⁸ Monana peroveta tarimana arana Isaia ĝena guruĝa emoĝonito, Isaia maiĝesi ekirato, “Vereĝauka, deikara na ĝai ĝema guruĝa bevaĝa-moĝonirini? Deikara ĝenai Vereĝauka ĝena seĝuka befoforini?”

³⁹ Ĝia na Iesu asi ĝevaĝa-moĝoniato anina tu, Isaia gabu tai ĝena toretore ai ma ekirato,

⁴⁰ “Barau na matari evaĝa-tufarito, ema nuĝari evei-mukunarito, korana matari na asi beĝene boĝeboĝe, ema nuĝari ai asi beĝene tuĝamaĝi-faka ĝana.

Au ĝegu ai beĝe ĝenoĝoini, benamo bavaĝa-namorini garina.”

⁴¹ Isaia moĝesi ekirato, korana ĝia na Iesu marevana e seĝukana baregona eĝita-guineato nai, benamo ĝia eguruĝa-iaĝiato.

⁴² Iuda ĝorikauna vereri vovoka na maki Iesu ĝevaĝa-moĝoniato, senaĝi Farisea tarimari gariri ĝeveito-ĝoi, be Iesu asi ĝekiraĝi-foforiat-ĝoi. Korana bema beĝe kiraĝi-foforiani nai tu, Farisea tarimari na rubu na beĝe tuĝu-vaĝirini garina.

⁴³ Korana mo Iuda vereri ĝeri ura baregona tu, tarimarima na beĝene vaĝa-raĝeri, a Barau na bene vaĝa-raĝeri tuĝamaĝina tu asi ĝeveiat-ĝoi.

Iesu ĝena guruĝa na tarimarima bekota-vinirini

⁴⁴ Iesu efararato, ekirato, “Au bevaĝa-moĝoniguni tarimana tu dia au evaĝa-moĝoniguni, senaĝi au etuĝuguto Barauna evaĝa-moĝoniani.

⁴⁵ Ema au eĝitaguni tarimana na tu au etuĝuguto Barauna eĝitaini.

⁴⁶ Au tu mama, mai tanobara ĝana aiaĝomato, be au bevaĝa-moĝoniguni tarimana tu mukuna nuĝanai asi betanuni.

⁴⁷ Ma bema tarima ta na au ĝegu guruĝa eseĝaĝiani, senaĝi asi evaĝa-moĝoniani, au na mo tarima tu asi bakota-viniani. Korana au tu dia tanobara kota-vinina ĝana aiaĝomato. Asiĝina. Au tu tanobara vaĝa-maĝurina ĝana aiaĝomato.

⁴⁸ Au eruĝaguni ema au ĝegu guruĝa asi eĝabi-raĝerini tarimana, kota-vinina tarimana ta etanuni. Au na akiraĝirito guruĝari, moĝeri guruĝa na ĝia beĝea kota-viniani mo ĝaro magonai.

⁴⁹ Korana au tu dia tauĝegu ĝegu maoro ai aguruĝani. Senaĝi Tamagu, au etuĝuguto Barauna, na evaĝa-naĝiguto au na kara guruĝana bana kiraĝia ema kamasi bana kiraĝia.

⁵⁰ Au ribagu, Tamagu ĝena guruĝa na tarimarima maĝuri vanaĝivanaĝi beĝe ĝabini. Moĝa lorinai au na kara akiraĝirini guruĝari tu, kara dagara Tamagu na ekiraguni bana kiraĝiri etoni guruĝari moĝo.”

13

Iesu na ĝena mero kwakuri eĝuriĝirito

¹ Pasova o Iuda tarimari mase aneruna na evanaĝirito moĝo verekona tu dori eĝabiato-ĝoi, benamo Iesu eribato, mai tanobara beiĝuiani ma Tamana ĝenai bevarageni ĝarona tu varau berāĝasi. Mai tanobarai ĝena tarimarima ĝetanuto euravini-rakavarito, ma ĝena veuravini ĝeri ai tu asi edokoto, eiaĝoto mo magona.

² Iesu ma ĝena mero ĝesi lavilavi ĝaniĝanina ĝeĝaniato-ĝoi nuĝanai, Diabolo na Iudas Isakariota, Simona natuna, nuĝana eĝaniato, Iesu bene revaia ĝana.

³ Iesu ribana, Tamana na dagara mabarari tu ĝia ĝena seĝuka gaburenai etorerito. Ema ribana maki, ĝia tu Barau ĝenana eiaĝomato, ema ma beĝenoĝoini Barau ĝenai;

⁴ benamo ĝaniĝani gabuna na evariĝisito, ĝena koudi ekoki-vaĝiato, benamo tauĝela eriĝoato.

⁵ Benamo naĝu ai nanu ebututo, benamo ĝena mero kwakuri eĝuriĝirito, ma eriĝoato tauĝelana na tu edau-kaukaurito.

⁶ Kwakuri eĝuriĝi-iaĝomato mo, Simona Petero ĝenai eraĝasito, benamo Petero na ekiraiato, ekirato, “Vereĝauka, ĝoi tu au kwakugu noĝuriĝia otoni?”

⁷ Iesu na evaĝa-veseato, ekirato, “Maitoma au na kara aveiani veĝana tu asi otuĝamaĝi-fakaiani, senaĝi gabivau boribani.”

⁸ Petero na ekiraiato, ekirato, “Asiği, au kwakugu ġoi na tu asiğina ġinavaği boğuriğiani.” Iesu na evağa-veseato, ekirato, “Bema au na ġoi kwakumu asi bağuriğiani nai, ġoi tu dia au ġegu mero.”

⁹ Simona Petero ekirato, “Vereğauka, dia kwakugu moğo, senaği ġimagu ema debagu maki.”

¹⁰ Iesu na ekiraiato, ekirato, “Efouni tarimana tauğanina mabarana tu veiareva, be ġia tu kwakuna moğo beğuriğiani. Ġomi mabarami tu veiareva, senaği sebona ta moğo asi veiareva.”

¹¹ Iesu ma ribana deikara na ġia berevaiani; moğesina nai ekirato, “Dia mabarami veiareva.”

¹² Kwakuri eğuriği-ğosito murinai, ġena dabuğa baregona ma eveiato, ema eiağoto ġena tanutanu gabunai ea tanu-tarito, benamo ekirarito, ekirato, “Au na ġomi ġemi ai kara baveia veğana tauna korikori boğo tugamaği-fakaia ba?”

¹³ Ġomi na au ġokirağiguni, ġokirani ‘Vevağa-riba Tarimana’ ema ‘Vereğauka’, mo tu moğoni ġokirağiguni, korana au tu moğoni Vevağa-riba Tarimagu ema Vereğauka.

¹⁴ Bema au ġomi ġemi Vereğauka ema Vevağa-riba tarimagu na ġomi kwakumi bağuriğiri nai, ġomi maki tauğemi fakami ai moğo karomi tari kwakuri boğono ġuriğiri.

¹⁵ Korana au na bavağa-ğitami, be au na kara ġomi ġemi ai baveia veğana, ġomi na maki boğono veia.

¹⁶ Au na ġomi moğoni akiramini, ġauvei merona na ġena vere asi bevanağiani, e vetuğunaği merona na betuğua tarimana asi bevanağiani.

¹⁷ Toma mağeri dagara mabarari ġomi na boğo ribari, bema boğo veirini nai tu boğo iakuni.

Iesu ġena mase ekiraği-foforiato

¹⁸ Au na ġomi mabarami asi akirağimini, au na ağabi-viriğirito tarimari tu au ribagu. Senaği mai tu Buka Veğa nuğanai ġetorerito guruğari beğene moğoni ġana: ‘Deikara au ġesi beredi bağa ġani-vegogoani tarimana tu, kwakuna gwadirina beğabi-vaisiani au ġegu ai.’ (Moğa anina tu, Iesu ma bekira-fitoğaiiani, benamo vaği-masena dabarana beveiani).

¹⁹ Toma au na ġoirai beğe ġorani dagarari akira-varamini, be beğe ġorani nai tu boğono riba-maoro, (Barau na etuğuat) Tarimana tu Au.

²⁰ Moğoni akiramini, au na atuğoni tarimana eğabi-rağeani tarimana na tu au eğabi-rağeguni. Ma au eğabi-rağeguni tarimana na au etuğuguto tarimana, Barau, eğabi-rağeani.”

Iesu Iudas Isakariota na berevaiani ekirağiato

Mataio 26:20-25; Mareko 14:17-21; Luka 22:21-23

²¹ Iesu na mağeri guruğa ekirağirito murinai, nuğana evekwaraği-baregato, benamo eguruğa-foforito, ekirato, “Akira-korikorimini, ġomi ta na tu au borevaguni.”

²² Benamo ġena mero ġeveğita-veğitato, asi ribari deikara ekirağiato.

²³ Ġena mero vekaravari ai Iesu na eura-viniato-ğoi merona tu ġia ġenai evetabekauto.

²⁴ Ma Simona Petero na vetoğai moğo Ioane evağa-guruğaiato, eurato, Iesu nedanağia deikara ekirağiani.

²⁵ Benamo (Iesu na eura-viniato-ğoi merona) Iesu ġenai ma evetabekauto, benamo edanağiato ekirato, “Vereğauka, mo tu deikara, ei?”

²⁶ Iesu evağa-veseto, ekirato, “Au na beredi bafereiani, benamo ġia baviniiani tarimana tu moğea.” Benamo Iesu na beredi efereiato, ma Simona natuna, Iudas Isakariota, eviniato.

²⁷ Iudas na mo beredi eğabiato, benamo Satani nuğanai eraka-ğurato. Benamo Iesu na ekiraiato, ekirato, “Kara ourani noveia tu novei-ğarimoğia.”

²⁸ Senaği mo ġeganigani-vegogoto tarimari tu sebona ta maki asi eribato, karase nai Iesu na moğesi ekiraiato.

²⁹ Moğa nuğanai Iudas tu moni mauğa-mauğana eğita-ğauato-ğoi. Moğesina naima ġia kotari ġetuğamağito, Iesu na tu bekiraia, vereko ai karakara ġeura-vinirini dagarari nea voiri, o asi ġeri-ğari tarimari dagara tari nea viniri ġetato.

³⁰ Iudas na mo beredi eğabi-rağeato murinai tu, asikauna mo numa na eraka-rosito. Mo tu varau ebogito.

Iesu Petero na bekira-ğuniğauani ekirağiato

³¹ Iudas eraka-rosito murinai, Iesu ekirato, “Maitoma Tarimarima Natuna beğe vağa-rağeani, ema Barau maki Natuna ġenana beğe vağa-rağeani.

³² Bema Barau na Iesu bakunai vevaġa-raġe e mareva baregona beġabiani nai tu, Barau tauġena na maki tauġena ġena mareva baregona Tarimarima Natuna beviniani. Ma Barau na asikauna beviniani.

³³ Natugu, au ġomi ġesi tu asi bita tanu-maukani. Benamo ġomi na au ma boġo ġita-vetauguni. Au na Iuda tarimari avaġa-guruġarito ilailanai, ġomi maki mo guruġa sebona avinimini: Au aiġoni gabuna ġana, ġomi tu asi boġo iaġoni riba.

³⁴ Taravatu guruġana varिġuna avinimini. Tarikakami ġesi boġono veuravini. Au na ġomi aura-vinimini ilailanai, ġomi maki tarikakami ġesi boġono veuravini.

³⁵ Bema ġomi tarikakami ġesi boġo veura-vinini nai, tarimarima mabarari beġe ribani, ġomi tu au ġegu mero.”

³⁶ Simona Petero na Iesu edanaġiato, ekirato, “Vereġauka, ġoi tu aiġana oiġoni?” Iesu evaġa-veseto, ekirato, “Au aiġana aiġoni gabuna ġana, maitoma au murigu na tu asi boġo iaġomani, senaġi gabivau boġo iaġomani murigu na.”

³⁷ Petero na Iesu ekiraiato, ekirato, “Vereġauka, kara dainai toma au ġoi murimu na tu asi baiaġosini riba? Au tu ġoi uramu ai ġegu maġuri batore-tariani, bamaseni.”

³⁸ Iesu na Petero evaġa-veseato, ekirato, “Ġoi ġemu maġuri tu au uragu ai botore-tariani otoni? Akira-korikorimuni, kokoroku roġosi roġo bene goġi nuġanai, ġoi na au tu vaġa-toittoi bokira-ġuniġauguni.”

14

Iesu tu dabara

¹ “Nuġami asi beġene raġe, ema asi boġono tuġamaġi-ġutuma. Barau boġono vaġa-moġonia, ema au maki boġono vaġa-moġonigu.

² Au Tamagu ġena numai daigutu tu asisebo; bema asiġi nai tu, mai guruġa ġomi asi bara kira-varami: Au aiġoni tu, ġomi ġemi gabu ta arovina-toreani.

³ Benamo aiġoni, ġomi ġemi gabu barovina-toreani. Barovinatore-ġosiani vau, ma baġenoġoi-iaġomani, benamo ġomi baġori-iaġomini au ġesi bita tanuni. Be au ainai batanuni gabunai, ġomi maki monai au ġesi bita tanuni.

⁴ Au baiġoni gabuna dabarana tu ġomi ma ribami.”

⁵ Tomasi na ekiraiato, ekirato, “Vereġauka, ġai tu asi ribama ġoi aiġana oiġoni, ma dabara tu kamasi baġa ribaiani?”

⁶ Iesu na ekiraiato, ekirato, “Dabara tu au, e moġonina maki au, ema maġuri maki au. Tarima ta Tamagu ġenai dabara boruna na ta asi beiaġoni. Asiġina ġinavaġi. Au ġeguna mogo.

⁷ Bema moġoni au ġomi na ġoribaguto tu, au Tamagu maki ġoro ribaia. Ma toma vau ġoribaiani ema varau boġo ġitaia.”

⁸ Filippo na Iesu ekiraiato, ekirato, “Vereġauka, Tamara novaġa-ribama, be nuġama beġene genatari.”

⁹ Iesu na ekiraiato, ekirato, “Filipo, au ġoi ġesi tu kai-veġata atanuto, ma ġoi na au tu roġosi roġo boro ribagu? Au eġitaguni tarimana na Tamagu eġitaiani. Ma ġoi tu kamasi nai okirani, “Tamara novaġa-ribama otoni?”

¹⁰ Ġoi na asi ovaġa-moġoniani, au tu Tamagu nuġanai, ma Tamagu tu au nuġagu ai, ei? Au na ġomi avaġa-guruġamini guruġari tu dia au tauġegu ġegu maoro ai avaġa-guruġamini. Asiġina. Mai tu Tamagu, ġia tu nuġagu ai etanuni, ġia na ġena ġauvei eveirini.

¹¹ Au akirani, au tu Tamagu nuġanai atanuni ema Tamagu tu au nuġagu ai etanuni atoni nai tu boġono vaġa-moġonigu. Bema asiġina nai, mai veġa aveirini ġoġitarini nai boġono vaġa-moġonigu.

¹² Moġoni akiramini, au evaġa-moġoniguni tarimana tu, au na aveirini veġari, ġia na maki beveirini. Ema ġia na tu veġa barego lelevaġiri beveirini, au na aveirini veġari tu bevanaġirini. Korana au tu Tamagu ġenai ma aiġoni.

¹³ Ema au aragu ai karakara boġo noġirini tu, au na baveirini. Monana Tamagu beġe vaġa-raġeani Natuna bakunai.

¹⁴ Au aragu ai kara boġo noġi-raġerini dagarari mabarari tu, veġari au na baveirini.”

Iesu na Iauka Veaġa ekiraġi-toreato

¹⁵ “Bema ġomi na au ġoura-viniguni nai tu, au ġegu taravatu guruġari boġo korana-iaġirini.

¹⁶ Benamo au na Tamagu banoġiani, bena ġia na vevaġa-kava tarimana ta ma bevinimini. Mo vevaġa-kava tarimana tu ġomi ġesi betanu-vanaġi vanaġini.

¹⁷ Ġia tu guruġa moġonina evaġa-foforiani laukana. Ġia tu tanobara maġurinai ġetanuni tarimari na asi beġe ġabi-raġeani riba, korana asi ġeġitaiani ema asi ġeribaiani. Senaġi ġia ġomi tu ma ribami, korana ġia tu ġomi ġesi ġotanuni ema ġomi nuġami ai betanuni.

¹⁸ Au na ġomi ġereġami gara noġa asi baiaġuimini. Au ma baġenoġoi-iaġomani ġomi ġemi ai.

¹⁹ Tanobara tarimari na asi ma beġe ġitaguni ġarona tu asi manaġa, senaġi ġomi na tu boġo ġitaguni. Gomi tu au amaġuri-taġoni bakunai, be boġo maġuri-taġoni.

²⁰ Mo ġaro ai ġomi boġo ribani, au tu Tamagu nuġanai atanuni, ema ġomi au nuġagu ai ġotanuni, ema au ġomi nuġami ai atanuni.

²¹ Au ġegu taravatu guruġari eġabi-raġerini ema ekorana-iaġirini tarimana na tu au eura-viniguni. Ema au eura-viniguni tarimana tu au Tamagu na maki beura-viniani. Au na maki baura-viniani ema au tauġegu ġia ġenai bavevaġa-foforini.”

²² Iudas, dia Iudas Isakariota, na ekiraiato, ekirato, “Vereġauka, kamasi nai ġoi tauġemu ġai ġemai tu bovevaġa-foforini, senaġi tanobara ġenai tu asiġina?”

²³ Iesu na evaġa-veseato, ekirato, “Au eura-viniguni tarimana na au ġegu vevaġa-riba bekorana-iaġiani. Benamo au Tamagu na mo tarima beura-viniani. Benamo tauma ruarua baġa iaġoni ġia ġenai, bena ġia ġesi baġa tanu-vanaġi vanaġini.

²⁴ Au asi eura-viniguni tarimana tu, au ġegu guruġa asi ekorana-iaġirini. Mai guruġa ġoseġaġirini tu dia au ġegu, senaġi Tamagu ġena; au tu ġia na etuġuguto.

²⁵ Gomi ġesi roġo atanuni nuġanai, maġeri guruġa ġomi akira-varamini.

²⁶ A ġomi vaġa-kavami tarimana tu Iauka Veaġa. ġia tu au aragu ai Tamagu na betuġu-iaġomaiani. ġia na dagara mabarari bevaġa-ribamini, ema au na kara akiraġirito dagarari, ġemi tuġamaġi ai ma bevaġa-fofori ġenoġoirini.

²⁷ Maino ġomi ġesi mai aiġuiani. Mai tu au ġegu maino ġomi avinimini. Ema mai maino au na ġomi avinimini tu, dia tanobara tarimari na ġomi ġevinimini kavana avinimini. Nuġami asi beġene raġe e asi boġono tuġamaġi-ġutuma ema asi boġono gari.

²⁸ Au baguruġa boġo seġaġia, au bakira, ‘Au tu araka-ġerevaġini, senaġi ma baġenoġoi-iaġomani ġomi ġemi ai.’ Bema au boġoro ura-vinigu nai tu, Tamagu ġenai aiġoni, be ġoro iaku, korana au Tamagu tu iaru-korokoro, au iata-raġegu ai.

²⁹ Mai veġa tu roġosi roġo bere ġora nuġanai akira-varamini. Be mai veġa befoforini nai, boġono vaġa-moġonigu.

³⁰ Au ġomi ġesi asi bita guruġa-guruġa maukani, korana mai tanobara eġori-kauani verena, Satani, tu dori eraġasini. ġia tu asi kokorena, be au ġegu ai kara ta asi beveiani.

³¹ Senaġi mai tanobara tarimari beġene riba, au na Tamagu aura-viniani. Ema au tu Tamagu na ekiraġiato ilailanai aveini.

Be ġovariġisi, mai gabu na siraka-veġita.”

15

Vine ema legana

¹ “Au tu vine ġauna korikori, ma au Tamagu tu vine tavoġana ġauvei-iaġina tarimana.

² Vine legari au ġegu ai kafakau dagarari, asi ġeġwani legari tu, ġia na ebasi-vaġirini; ma lega mabarari ma ġewari tu, ġia na eiarevarini, beġene ġwa-vovoka uranai.

³ Ġomi tu varau boġo iareva-ġosi. Mo guruġa avinimito moġeri na beġe iarevami.

⁴ Au ġegu ai boġono kafakau, be au maki ġomi ġemi ai kafakau-taġo bana tanu. A vine legana ta ġereġana moġo nai tu asi beġwani, senaġi vine ġauna ġenai bekafakau-taġoni vau beġwani. Gomi maki moġesi, bema au ġesi asi boġo sebonani nai, ġwaġwami ta asi bevetoreni.

⁵ Au tu vine, a ġomi tu lega. Au ġegu ai bekafakauni, au ġia ġenai bakafakauni kavana, tarimana tu ġwaġwana asisebo bevetoreni. Bema au boġo iaġuiguni nai, dagara ta asi boġo veiani.

⁶ Au ġegu ai asi ekafakauni tarimana tu, vine ġauna legana noġa beġe ġabiani, ma beġe fitoġaiani, benamo bea kaukauni. Mo ġau legari kakorori tu ġeġabi-vegogorini, benamo karavai ġefu-raġerini, benamo ġegaburini.

⁷ Bema ġomi au ġegu ai boġo kafakauni o au ġesi boġo sebonani, ma au ġegu guruġa ġomi ġemi ai betanuni nai tu, kara ġoura-vinirini dagarari bogo noġini tu, ġemi noġinoġi dagarari boġo ġoitaġorini.

⁸ Bema ġwaġwami asisebo asisebo beġe vetoreni nai tu, tarimarima na au Tamagu ġevaġa-raġeani, ema ġomi maki au ġegu mero korikori ai boġo iaġoni.

⁹ Tamagu na au eura-viniguni ilailanai, au na ġomi maki aura-vinimini. Vanaġivanaġi au ġegu veuravini nuġanai boġono tanu.

¹⁰ Bema au ġegu taravatu guruġari boġo korana-iaġirini nai, ġomi tu au ġegu veuravini nuġanai boġo tanuni, ilailana au Tamagu ġena taravatu guruġari akorana-iaġirini, benamo ġia ġena veuravini nuġanai atanuni kavana.

¹¹ Au na maiġeri guruġa ġomi bavinimi anina tu, au ġegu iaku ġomi nuġami ai bene tanu, be ġomi maki nuġami iaku na beġene vonuvonu-raġe.

¹² Au ġegu taravatu guruġana tu maiġa, tauġemi fakami ai karomi ġesi boġono veuravini, au na ġomi aura-vinimimi kavana.

¹³ Ma ġena veuravini barego lelevaġina tarimana tu, karona urari ai ġena maġuri gwaina asi eġabiani, etore-tariani. Ma ġena veuravini barego tarimana korikori tu moġa, ma boruna ta tu asiġina maia.

¹⁴ Bema au na kara akiramini veiġari boġo veirini nai, ġomi tu au ġatagu.

¹⁵ Au na ġomi tu vetuġunaġi-iaġovini tarimami asi ma bakiraġimimi, korana vetuġunaġi-iaġovini tarimana na ġena vere na kara eveiani, ġia tu asi ribana. A ġomi tu ġata batoni, korana au Tamagu ġenana kara aseġaġirito dagarari mabarari tu, ġomi varau avaġa-ribamito.

¹⁶ Gomi na au asi ġoġabi-viriġiguto, senaġi au na ġomi aġabi-hidimito, ema avaġa-ruġamito boġono iaġo, ġwaġwami boġono vaġa-ġorari, ma moġeri tu namo moġo beġene tanu-vanaġi vanaġi. Moġesina tu karakara ġoura-vinirini dagarari au aragu ai Tamagu boġo noġiani tu, Tamagu na bevinimimi.

¹⁷ Au ġegu taravatu guruġana ġomi avinimimi tu maiġa, karomi ġesi boġono veuravini.”

Tanobara tarimari na Iesu ġena mero ġeiau-rakava vinirito

¹⁸ “Bema tanobara tarimari na beġe iau-rakava vinimimi nai, boġono riba, au tu ġeiau-rakava vini-guineguto.

¹⁹ Bema ġomi tanobara ġena tarimarima roġo ġoro tanu tu, tanobara tarimari na beġere ura-vinimi, korana ġomi tu ġia ġeri tarimarima bene. Senaġi ġomi tu dia tanobara ġena tarimarima. Asiġina. Gomi tu varau aġabi-viriġimito, ma tanobara maġurina nuġana na aġabi-vagiġimito. Moga lorinai tanobara tarimari na ġeiau-rakavamimi.

²⁰ Akiramito guruġana boġono tuġamaġi-taġoa: ‘Vetuġunaġi merona na etuġu-naġiani tarimana asi bevanagiani.’ Bema au ġevaġa-midigu midiguguto, ġomi maki beġe vaġa-midigu midigumimi. Bema au ġegu guruġa ġekorana-iaġirito, ġomi ġemi guruġa maki beġe korana-iaġirini.

²¹ Ġia na maiġeri veiġa asi namori mabarari ġomi ġemi ai beġe veirini tauna korikori tu, ġomi na au aragu ġokorana-iaġiani nai; korana au etuġuguto Barauna ġia tu asi ribari.

²² Bere au asi bara iaġoma, ma asi bara guruġa-viniri, ġia tu asi ġeri rakava. Senaġi ġia maitoma ġeri rakava na tu asi ġeri raga-maġuri dabarana.

²³ Au eiau-rakavaguni tarimana na au Tamagu maki eiau-rakavaiani.

²⁴ Bere au na nuġa-farevaġi veiġari, tarima tari na roġosi roġo beġene veiri dagarari, ġia vefakari ai asi bara veiri, ġia tu asi ġeri vei-rakava. Senaġi maitoma ġia na moġeri nuġa-farevaġi veiġari tu beġe ġitari, ma nuġanai ġia na au ma Tamagu ġesi tauma ruarua tu ġeiau-rakavamani.

²⁵ Senaġi maiġeri veiġa ġeġorani korana tu, taravatu nuġanai ġetoreato guruġana bene moġoni ġana. Mo guruġa tu iniġesi ekirani: ‘Au tu ġeiau-rakava-kavaguto moġo, asi korana tai.’

²⁶ Vevaġa-kava Iaukana tu beiaġomani. Ġia tu guruġa moġoniri kiraġi-kiraġiri Iaukana, Tamagu ġenana beiaġomani. Au na ġomi ġemi ai batuġuani, Tamagu sevinai batanuni nai tu. Ġia na au bema kiraġi-foforiguni.

²⁷ Ġomi na maki au roġo boġono kiraġi-foforigu, korana ġomi tu au ġesi tatanuni tovotovona na veġata bene.”

16

¹ “Au na maiġeri guruġa akira-varamimi, korana asi aurani ġemi veġabidadama na boġono raka-veġita.

² Iuda tarimari ġeri rubu na beġe tore-veġitamini. Aba, ġarona mani eiaġomani, tau ta na bevaġi-masemini nai tu, ġia matoru bekirani, ġia tu Barau vetuġunaġina eiaġo-viniani.

³ Maiġeri veiġa ġomi ġemi ai beġe veirini korana tu ġia na au Tamagu asi ġeribaiato, ema au maki asi ġeribaguto.

⁴ Senaġi au na maiġeri guruġa tu nakiravara-guinemi. Be ġoirai vau tarimarima na veiġari ġemi ai beġea veirini nai, maiġeri guruġa bakira-varami boġono tuġamaġiri.

Iauka Veaġa ġena ġauvei

Tovotovonai au tu roġo ġomi ġesi tatanuto-ġoi naima, maiġeri guruġa ġemi asi aki-raġirito.

⁵ Senaġi toma tu etuġu-marigoguto Barauna ġenai ma aġenoġoi-iaġoni, ma ta na tu asi odanaġiguni, ‘Goi tu aiġana oiaġoni?’ asi otoni.

⁶ Gomi tu maiġeri guruġa bakira-varami nai, nuġami ġevewaraguni e ġetaġitaġini.

⁷ Senaġi moġoni akiramini, mai tu ġomi ġemi namo uranai ġomi vekaravami na araka-ġerevaġini, arakani. Korana tu bema au asi barakani nai, vevaġa-kava laukana ġemi ai asi beiaġomani. Senaġi bema au baiaġoni nai tu, ġemi ai batuġu-iaġomaiani.

⁸ Ma ġia beiaġomani nai, mai tanobara tarimari ġeri vei-rakava ma Barau ġena vei-iobukaiobuka ema Barau na tanobara tarimari bekota-vinirini aniri bevaġa-fofori ginikaaurini.

⁹ Ġeri vei-rakava tauna korikori tu, au asi ġevaġa-moġoniguni.

¹⁰ Barau ġena vei-iobukaiobuka tauna korikori tu maiġa, au tu Tamagu ġenai aiāġoni, be asi ma boġo ġita-ġenoġoiguni.

¹¹ Ema Barau na tanobara tarimari bekota-vinirini anina tu maiġea, mai tanobara verena tu varau ekota-viniato.

¹² Dagara vovoka roġo aurani nakira-varami, senaġi mabarari maitoma tu asi ilaila boġo tugamaġi-fakarini e asi boġo ġabi-raġerini.

¹³ Senaġi guruġa moġoni laukana beiaġomani, ġia na vau ġomi beġori-kaumini, benamo guruġa moġoniri boġo ribarini. Korana ġia tu dia taugena ġena tugamaġi guruġari bekirāġirini. Asiġina. Ġia tu au ġeguna be-seġaġini guruġari moġo bekirāġirini. Ema gabivau beġe gorani dagarari bekiravara-guinemini.

¹⁴ Ġia na au bevaġa-raġeguni, korana au ġeguna beġabirini guruġari ġomi bekiravaramini.

¹⁵ Au Tamagu ġena dagara mabarari tu au ġegu. Moġesi naima au bakira, 'Ġia na au ġeguna beġabirini guruġari ġomi bekiravaramini.'

"Ġemi nuġa-midigumidigu tu iaku verere ai beġe iaġoni"

¹⁶ "Ġaro asi manaġa nuġanai, ġomi na au asi ma boġo ġitaguni, ma ġaro asi manaġa murinai tu, ma boġo ġitaguni. [Korana au tu Tamagu ġenai aiāġoni.]"

¹⁷ Benamo ġena mero kotari tauġeri vefakari ai moġo ġeguruġa-guruġato, ġekirato, "Mai ġia na tu kara ekiraġiani, ekirani, 'Ġaro asi manaġa nuġanai au asi ma boġo ġitaguni, ma ġaro asi manaġa murinai tu ma boġo ġitaguni,' e ma ekirani, 'Korana au tu Tamagu ġenai aiāġoni?'"

¹⁸ Moġesina naima ġekirato, "Mai ġia na tu kara ekiraġiani, ekirani, 'Ġaro asi manaġa' etoni? Ġita asi taribani ġia na tu kara ekiraġiani!"

¹⁹ Iesu eribato, ġena mero ġeri ura tu ġedanāġia ġetato-ġoi, naima ġia na evaġa-guruġarito, ekirato, "Ġomi tu taugemi ġeregami au na kara bakiraġia vedare-mutukana ġoveini ei? Au bakira, 'Ġaro asi manaġa nuġanai asi ma boġo ġitaguni, ma ġaro asi manaġa murinai tu ma boġo ġitaguni,' basi anina ġovetauani?"

²⁰ Moġoni akiramini, ġomi tu boġo taġini e boġo taġi-vanoro vanoroni, senaġi tanobara tarimari tu beġe iakuni, beġe verereni. Ġomi tu boġo nuġa-midigu midiguni, senaġi ġemi nuġa-midigumidigu tu iaku verere ai beġe iaġoni.

²¹ Vavine ta mero nevaġa-maġuria ġana tu, emidigumidiguni, korana ġena ġabi aoana eraġasini. Senaġi mero emaġurini nai, ġenai mo midigumidigu tu etuġa-rekwaiani, korana mero ta tanobarai varau bevaġa-maġuria iakunai.

²² Moġi maki moġesina: Toma tu ġonuġa-midigu midiguni, senaġi au na ma baġita-ġenoġoimini, be ma boġo iakuni. Ma tarima ta na ġomi ġemi mo iaku tu asi ilaila ġemina ma beġabi-veġitaiani.

²³ Ma mo ġaro ai ġomi na au dagara ta asi ma boġo noġiguni. Moġoni akiramini, au aragu ai karakara boġo noġirini dagarari mabarari, au Tamagu na bevinimini.

²⁴ Beiaġoma mo inītoma, ġomi na au aragu ai dagara ta roġosi roġo boġoro noġia. Au aragu ai boġono noġi-raġe, be boġono doġari; benamo nuġami iaku na beġene vonuvonu-raġe."

Iesu na tanobara ġena seġuka evaġa-ketoato

²⁵ "Maiġeri guruġa au na ġomi ġemi tu barabore ai akiraġirini, senaġi ġaro ġoirai tu barabore ai asi ma bavaġa-guruġamini. Ġoirai vau au Tamagu varina tu ġemi bakiraġi-fofori ginikauani.

²⁶ Mo ġaro beaġasini nai, ġomi tu au aragu ai boġo noġinoġini. A au tu asi akirani, au na ġomi urami ai Tamagu banoġiani;

²⁷ korana Tamagu taugena na ġomi eura-vinimini. Ġomi eura-vinimini, korana ġomi na au ġoura-viniguni, ema ġovaġa-moġoniguni, au tu Barau ġenana aiāġomato.

²⁸ Au tu Tamagu sevina na mai tanobara ġana amarigoto. Ma toma tu mai tanobara aiāġuiani, Tamagu ġenai ma aġenoġoi-iaġoni."

²⁹ Ġena mero na ġevaġa-guruġaiato, ġekirato, "Oġitaiani, toma ġoi tu oguruġa-fofori ginikauni, asi oguruġa-baraboreni.

³⁰ Toma ǵoi ǵama riba-korikorini, ǵoi tu dagara mabarari ma ribamu. Tarima ta na nedanaǵimu betoni vedanaǵina maki, ǵoi na tu boriba-guineani. Moǵa lorinai ǵavaǵa-moǵonimuni, ǵoi tu moǵoni Barau ǵenana oiaǵomato.”

³¹ Iesu na evaǵa-veserito, ekirato, “Mai vau ǵovaǵa-moǵoniguni, ei?”

³² Moǵoni, ǵarona mani eiaǵomani, varau beraǵasi, ǵomi tu boǵo raga-rovorovoni, tata ǵemi ura ragana boveini, benamo au tu ǵereǵagu boǵo iaǵui-momoraiǵuni. Senaǵi au tu dia ǵereǵagu, korana Tamagu tu au sevigu ai.

³³ Au aurani, au ǵegu ai boǵono kafakau, be au ǵegu ai maino boǵono ǵabi uranai, au na maiǵeri guruǵa ǵomi bakira-varami. Mai tanobarai ǵotanuni nai, midigumidigu boǵo ǵoitǵoani. Senaǵi boǵono kokore! Au na tanobara ǵena seǵuka avaǵa-ketoato.”

17

Iesu ǵena ǵuriǵuri

¹ Iesu moǵesi eguruǵa-ǵosito murinai, egaga-raǵeto, guba eǵitaiato, benamo ekirato, “Tamagu, horana tu maiǵa. Natumu marevana baregona novaǵa-foforia, be Natumu na goi marevamu baregona maki bene vaǵa-foforia.

² Korana ǵoi na maoro ǵia oviniato, tarimarima mabarari ǵia ǵena veǵitaǵau gaburenai beǵene tanu. Be ǵoi na ǵia oviniato tarimari mabarari maǵuri vanaǵivanaǵi bene viniri.

³ Maǵuri vanaǵivanaǵi tu maiǵa: Maǵuri vanaǵivanaǵi beǵe ǵabiani tarimari mabarari beǵene riba, Barau moǵonimu tu ǵoi sebomu kwarigutu moǵo, ema Iesu Keriso beǵene ribaia. Iesu Keriso tu ǵoi na otuǵuato tanobara ǵana.

⁴ Au na ǵoi tanobarai bavavaǵa-raǵemu. Goi na oviniguto bana veia otato ǵauveina varau bavavaǵa-koria.

⁵ Tama, tanobara roǵosi bere vesina ema au maki roǵo goi ǵesi atanuto-ǵoi nuǵanai, au ǵegu ai tu mareva baregona etanuto-ǵoi. Toma aurani, mo mareva ǵoi tauǵemu ǵoiramu ai ǵegu ai novaǵa-foforia.”

Iesu ǵena mero ǵeri eǵauǵauto

⁶ “Tanobara maǵurina nuǵana na oǵabi-vaǵirito, benamo oviniguto tarimari ǵeri ai ǵoi tu avavaǵa-foforimuto. Moǵeri tu ǵoi ǵemu tarimarima, ǵoi na au oviniguto. Ma ǵia na ǵoi ǵemu guruǵa ǵekorana-iaǵiatio.

⁷ Toma ǵia beǵe riba, ǵoi na oviniguto dagarari mabarari tu ǵoi ǵemuna moǵo ǵeiaǵomato.

⁸ Korana ǵoi na oviniguto guruǵari mabarari akira-vararito. Ǵia na mo guruǵa mabarari ǵeǵabi-raǵerito, ma ǵeriba-maoroto, au tu ǵoi sevimu na aiaǵomato. Ema ǵevaǵa-moǵoniani, au ǵoi na otuǵu-iaǵomaguto.

⁹ Au tu ǵia ǵeri aǵuriǵurini. Au tu dia mai tanobara maǵurinai ǵetanuni tarimari ǵeri aǵauǵauni. Senaǵi au oviniguto tarimari ǵeri aǵauǵauni, korana ǵia tu ǵoi ǵemu tarimarima.

¹⁰ Au ǵegu tarimarima mabarari tu ǵoi ǵemu tarimarima. Ema ǵoi ǵemu tarimarima mabarari tu au ǵegu tarimarima. Ema ǵia ǵerina au aragu evarageni, korana au ǵegu mareva baregona ǵevaǵa-foforiani.

¹¹ Au tu ǵoi ǵemu ai aiaǵosini, mai tanobarai asi batanu-rovaǵini. Senaǵi ǵia tu tanobarai roǵo beǵe tanuni. Tamagu Veaǵamu, ǵoi na au oviniguto tarimari ǵoi aramu seǵukana na bono ǵitaǵauri. Be ǵia mabarari beǵene sebona, ǵita taura ruarua kavana.

¹² Au tanobarai roǵo ǵia ǵesi atanuto-ǵoi nuǵanai, ǵoi aramu seǵukana na ǵia anariǵaurito-ǵoi. Goi na au oviniguto tarimari tu aǵitaǵau-ginikaurito, be ta asi erekwarekwato; bene rekwerekwa tauna moǵo, moǵoni erekwarekwato, Buka Veaǵai ǵetoreato guruǵana vaǵa-moǵonina ǵana.

¹³ Senaǵi toma au tu ǵoi ǵemu ai aiaǵosini. Au tu roǵo tanobarai maiǵegu nuǵanai, maiǵeri guruǵa bakiraǵiri, au ǵegu iaku e verere na ǵia nuǵari bene vaǵa-vonuvonu raǵeri ǵana.

¹⁴ Goi ǵemu guruǵa au na ǵia varau avinirito. Ma tanobara maǵurinai ǵetanuni tarimari na ǵeiaui-rakavarini, korana ǵia toma tu dia mai tanobara tarimari, au kavana, au tu dia mai tanobara tarimagu.

¹⁵ Au tu dia ǵia mai tanobara na bono ǵabi-vaǵiri ǵuriǵurina aveini. Senaǵi anoǵimuni, bono nariǵauri, be Tarima Rakavana, Satani, na asi bene ǵabiri atoni.

¹⁶ Ǵia tu dia mai tanobara tarimari, au kavana, au tu dia mai tanobara tarimagu.

¹⁷ Goi ǵemu guruǵa moǵonina na novaǵa-veaǵari; ǵoi ǵemu guruǵa tu moǵoni.

¹⁸ Goi na tanobara maǵurinai ǵetanuni tarimari fakari ai au otuǵu-toǵaguto ilailanai, au na ǵia maki tanobara maǵurinai roǵo ǵetanuni tarimari vekaravari ai batuǵu-toǵari.

¹⁹ Ǵia urari ai au tauǵegu avevaǵa-veaǵani, be ǵia maki beǵene veaǵa-korikori.”

Iesu eḡuriḡurito veḡabidadama tarimari mabarari ḡeri

²⁰ “Au tu dia ḡia ḡena mero gereḡari ḡeri moḡo aḡauḡauni. Asiḡi. Au tu ḡia na vari beḡea fiuani nai, au beḡe vaḡa-moḡoniguni tarimari mabarari maki ḡeri aḡuriḡurini.

²¹ Be ḡia mabarari sebonai beḡene iaḡo, Tama, ḡoi au nuḡagu ai otanuni ema au ḡoi nuḡamu ai atanuni ilailana. Moḡesi kavana au aurani, ḡia maki beḡene sebona moḡo, ma ḡita nuḡarai beḡene tanu, be tanobara maḡurinai roḡo ḡetanuni tarimari beḡene riba, au tu ḡoi na otuḡu-mariḡogoto.

²² Ḣoi na au mareva baregona oviniguto dagarana ḡia avinirito, ḡia sebonai beḡene iaḡo uranai, be ḡita taura ruarua sebona kavana, ḡia maki beḡene sebona.

²³ Au ḡia nuḡari ai, ma ḡoi au nuḡagu ai, be ḡia maki beḡene sebona-kwariguto korikori. Benamo monana tanobara maḡurinai roḡo ḡetanuni tarimari beḡene riba, au tu ḡoi na otuḡu-iaḡomaguto, ema beḡene riba maki, ḡoi na ḡia oura-vinirini au oura-viniguni kavana.

²⁴ Tama, au ḡegu ura baregona tu, au ainai batanuni, au oviniguto tarimari maki au ḡesi, be monai baḡana tanu, be au mareva baregona oviniguto marevana beḡene ḡitaia. Mo mareva oviniguto, korana au ḡoi na tu tanobara roḡosi roḡo boro veia nuḡanai veḡata oura-viniguto.

²⁵ Tamagu o, ḡoi tu vei-iobukaibuka Baraumu, tanobara maḡurinai ḡetanuni tarimari na ḡoi asi ḡeribamuto. A au na tu ḡoi aribamuto, ema au ḡegu mero maḡeri tu beḡe riba, au tu ḡoi na otuḡu-mariḡogoto.

²⁶ Ḣoi aramu ḡia akira-vararito, e roḡo bakiraḡi-foforiani. Korana monana au oura-viniguni veuravinina ḡia nuḡari ai betanuni, ema au maki ḡia nuḡari ai batanuni.”

18

Iesu tuari tarimari na ḡeḡabiato

¹ Iesu na mo ḡauḡau ekiraḡi-ḡosiato murinai, ḡena mero ḡesi ḡerakato. Ḣeiaḡoto, Kidron ḡarukana na ḡeraka-vanaḡito, reke ta ḡana. Monai tu vamoka ta, ma ḡena mero ḡesi mo vamoka nuḡana na ḡeraka-toḡato.

² Iudas, Iesu erevaiato tarimana, maki mo gabu tu ma ribana, korana Iesu ma ḡena mero ḡesi monai ḡaro vovoka ḡetanu-vegogoto-ḡoi.

³ Moḡesina naima Iudas na Roma vetari tarimari e Rubu Veaḡa ḡitaḡauna tarimari tari eḡoririto. Mo Rubu Veaḡa ḡitaḡauna tarimari tu Rubu Veaḡa vereri baregori e Farisea tarimari na ḡetuḡurito. Benamo mo vamoka ḡana ḡeiaḡoto, ma tosiri, ma lamefari, ema ma ḡeri vetari farefareri.

⁴ Iesu tu ribana guine, ḡia ḡenai kara beḡe ḡorani dagarari mabarari, naima eiaḡoto seviri ḡana, benamo edanaḡirito, ekirato, “Ḣomi na tu deikara ḡovetauani?”

⁵ Ḣia ḡevaḡa-veseto, ḡekirato, “Iesu, Nasareta tarimana.” Iesu na ekirarito, ekirato, “Tarimana tu au.” Ma Iudas, Iesu erevaiato tarimana, maki ḡia ḡesi monai ruḡataḡo.

⁶ Iesu na ekirarito, ekirato, “Tarimana tu au,” etato nai, ḡia mabarari ḡeruḡa-ḡenoḡito, benamo tano ai ḡeketo-tarito.

⁷ Iesu na ma edanaḡi-ḡenoḡirito, ekirato, “Ḣomi na tu deikara ḡovetauani?” Benamo ḡia ḡekirato, “Iesu, Nasareta Tarimana.”

⁸ Iesu evaḡa-veseto, ekirato, “Au na bakirami, tarimana tu au. Bema ḡomi tu au moḡo ḡovetauguni nai, maḡeri tarima ḡotuḡuri, ḡeraka.”

⁹ Moḡesi ekirato, korana ḡia ḡena guruḡa tovotovonai ekiraḡiato guruḡana bene moḡoni ḡana, ekirato, “Au oviniguto tarimari tu sebona ta maki asi avei-rekwa-rekwaiato.”

¹⁰ Ma nuḡanai Simona Petero ḡimanai tu vetari baḡana ta. Mo vetari baḡana einu-vaḡiato, edaveato, benamo Rubu Veaḡa verena baregona ḡena vetuḡunaḡi-iaḡovini tarimana seḡana aroribana ebasi-vaḡiato. Mo vetuḡunaḡi-iaḡovini tarimana arana tu Malko.

¹¹ Benamo Iesu na Petero ekiraiato, ekirato, “Ḣoi na mani vetari baḡana faosinai noḡura-toḡaia! Au Tamagu na bevinigu midigumidigu bedina tu asi bana niua, ei?”

Iesu Anas ḡenai ḡeḡori-iaḡoato

¹² Benamo vetari tarimari ma ḡorikauri tarimana ema Iuda tarimari ḡeri Rubu Veaḡa ḡitaḡauna tarimari na Iesu ḡeḡabiato, benamo ḡebarubaruato,

¹³ benamo Anas ḡenai ḡeḡori-iaḡo guineato, korana Anas tu Kaiafas ḡena taḡama. Kaiafas na Anas natuna vavinena eḡaraḡoato. Kaiafas tu Rubu Veaḡa verena baregona mo laḡani ai.

¹⁴ Kaiafas na Iuda tarimari esisiba-vinirito, ekirato, “Namona tu tarima sebona ta moḡo tarimarima mabarari urari ai bene mase.”

*Petero na Iesu ekira-ḡuniḡauato**Mataio 26:69-70; Mareko 14:66-68; Luka 22:55-57*

¹⁵ Simona Petero e Iesu ḡena mero ta na tu Iesu ḡeraka-ḡiuato. Rubu Veaḡa verena baregona tu ma ribana, mo Iesu ḡena mero moḡa. Moḡesi nai ḡia maki Iesu ḡesi evaḡa-rakatoḡa sebonaiato, Rubu Veaḡa verena baregona ḡena numa maḡuna nuḡanai Kota gabunai.

¹⁶ Senaḡi Petero tu ḡatama-boka murikanai moḡo eruḡato. Ma mo Iesu ḡena mero, Rubu Veaḡa verena baregona na eribaiato merona, ma eḡenoḡoito, benamo ḡatama-boka eḡita-ḡuato ḡuiatona ea vaḡa-guruḡaiato, ma Petero eḡori-togaioato.

¹⁷ Benamo ḡatama-boka eḡita-ḡuato ḡuiatona na Petero ekiraiato, ekirato, “Ḡoi maki mai tarima ḡena mero ta, ene?” Petero evaḡa-veseto, ekirato, “Asiḡina, au tu asiḡi.”

¹⁸ Mo gabu faraka na eḡabiato, be vetuḡunaḡi-iaḡovini tarimari ema Rubu Veaḡa ḡitaḡauna tarimari na tu karava ta ḡetutuato. Benamo mo karava ḡeruḡa-ḡeḡeraḡiato, ḡevetunuto-ḡoi. Petero maki ḡia seviri ai eruḡato ma evetunuto-ḡoi.

*Rubu Veaḡa verena baregona na Iesu edanaḡiato**Mataio 26:59-66; Mareko 14:55-64; Luka 22:66-71*

¹⁹ Mo horai tu Rubu Veaḡa verena baregona na Iesu edanaḡiato, Iesu ḡena mero e ḡena vevaḡa-riba evedanaḡi-iaḡirito.

²⁰ Iesu na evaḡa-veseato, ekirato, “Au tu tarimarima ḡutuma-bara ḡoirari ai aguruḡa-foforito. Au tu vanaḡivanaḡi Iuda tarimari ḡeri rubu ai ema Rubu Veaḡa nuḡari ai avevaḡa-ribato-ḡoi, ma Iuda tarimari ḡema-raka-vegogoni gaburi ai, au asi aguruḡa-vekuretoḡato.

²¹ Kara dainai au odanaḡiḡuni? Mo au aguruḡato ḡeseḡaḡiguto tarimari noa danaḡiri, ḡia ma ribari au na kara akiravara-vinirito.”

²² Iesu moḡesi eguruḡato nai, Rubu Veaḡa ḡitaḡauna tarimana ta ḡia sevina eruḡa-taḡoto-ḡoi, monana Iesu ḡoirana efora-bubuḡauato. Benamo Iesu ekiraiato, ekirato, “Ḡoi mai Rubu Veaḡa verena baregona tu maniḡesi ovaḡa-guruḡaiani?”

²³ Iesu na evaḡa-veseato, ekirato, “Bema au na guruḡa rakavana ta bakiraḡia nai, nokiraḡia, kamara guruḡa rakavana! Senaḡi bema au tu baguruḡa-korikori, kara dainai boforogu.”

²⁴ Benamo Anas na Iesu roḡo varo na barubaru Rubu Veaḡa verena baregona Kaiafas ḡenai etuḡu-iaḡoato.

*Petero na Iesu ma ekira-ḡuniḡau ḡenoḡoiato**Mataio 26:71-75; Mareko 14:69-72; Luka 22:58-62*

²⁵ Simona Petero tu roḡo ruḡataḡo karavai evetunuto-ḡoi. Benamo karava sevina ḡeruḡa-vegogoto tarimari na ḡedanaḡiato, ḡekirato, “Ḡoi maki ḡia ḡena mero ta, ene?” Petero evekira-ḡuniḡauto, ekirato, “Asiḡina, au tu asiḡi.”

²⁶ Rubu Veaḡa verena baregona ḡena vetuḡunaḡi-iaḡovini tarimana ta tu mo Petero na seḡana ebasi-vaḡiato tarimana garagarana ta, ḡia ekirato, “Au atuḡamaḡini tu, ḡoi maki ḡia ḡesi mo vamoka nuḡanai aḡitamuto banaḡu, ene?”

²⁷ Petero ma evekira-ḡuniḡau ḡenoḡoito, ma nuḡanai asikauna tu kokoroku egoḡito.

*Iesu Pilato ḡoiranai**Mataio 27:1-2 ema 27:11-14; Mareko 15:1-5; Luka 23:1-5*

²⁸ Benamo Iuda tarimari na Iesu Kaiafas sevina na ḡeḡori-iaḡoato Roma ḡeri gavana ḡena numa barana ḡana. Mo tu varau ekini-mama mamato-ḡoi. Ma Iuda tarimari tu asi ḡeurato, Roma ḡeri gavana ḡena numai beḡene raka-toḡa, korana ḡekirato, veiareva, asi rakavari, beḡene tanu. Ḡia ḡeri ura tu Pasova o mase aneruna na Isaraela tarimari evanaḡirito moḡo asi evaḡirito verekona beḡene ḡania veḡata.

²⁹ Benamo Pilato ḡeri ai eraka-rosito, benamo ekirato, “Mai tarima boḡo ḡabi-iaḡomaia ḡena kerere korana tu kara?”

³⁰ Ḡia na ḡevaḡa-veseato, ḡekirato, “Bema ḡia veiḡa rakavari asi bere vei nai tu, ḡoi ḡemu ai asi baḡara ḡabi-iaḡomaia.”

³¹ Benamo Pilato na ekirarito, ekirato, “Ḡoḡabia, ma ḡoḡori-iaḡoa, benamo ḡemi taravatu ekirani ilailanai ḡoa vaḡa-kotaia.” Moḡesi naima Iuda tarimari na Pilato ḡekiraiato, ḡekirato, “Ḡai ḡema taravatu na tu maoro asi evinimani, tarima ta baḡana vaḡi-masea.”

³² Maḡa eḡorato anina tu, Iesu na ḡia aiḡesina bemaseni ekiraḡiato guruḡana bene moḡoni ḡana.

³³ Benamo Pilato numa barana ḡana ma erakatoḡa-ḡenoḡoito, bema Iesu ekeaiato, ma edanaḡiato, “Ḡoi tu Iuda tarimari ḡeri vere ba?”

³⁴ Iesu na evaġa-veseato, ekirato, “Ġoi maniġesi au okiragiġni tu tauġemu nuġamu siga moġo oguruġani ba tarima tari na beġe kira-varamu guruġana.”

³⁵ Pilato evaġa-veseto, ekirato, “Be, au tu Iuda tarimagu, ei? Ġoi tu ġemu tanobara tarimari na ema Rubu Veaġa vereri na beġe ġabi-iaġomamu, au beġema vinigu. Goi tu kara kererena oveiato?”

³⁶ Iesu na evaġa-veseato, ekirato, “Au ġegu Basileia tu dia mai tanobara dagarana. Bere au ġegu Basileia mai tanobara nuġanai bere vetore e bere ruġa nai tu, au ġegu vetuġunaġi-iaġovini tarimari ġere varigiġsi, Iuda tarimari ġesi ġere vevaġi, ma tarima ta maki asi bere ilaila, Iuda tarimari ġimari ai bere toregu. Senaġi au ġegu Basileia tu dia mai tanobara nuġanai eruġani.”

³⁷ Pilato na moġesina naima Iesu edanaġiato, ekirato, “Be ġoi tu vere ba?” Iesu evaġa-veseto, ekirato, “Goi okirani au vere otoni tu moġoni oguruġani. Au tanobarai ama maġurito tauna korikori, guruġa moġonina bana vaġa-foforia ġana. Guruġa moġoninai ġetanuni tarimari mabarari na au garogu tu ġeseġaġiani.”

³⁸ Pilato ekirato, “Guruġa moġonina tu kara?”

Iesu bene mase guruġana

Mataio 27:15-31; Mareko 15:6-20; Luka 23:13-25

Moġesi eguruġato murinai, ma eraka-rosito Iuda tarimari ġeri ai, benamo ekirarito, ekirato, “Au na mai tarima ġenai rakava ta tu asi badoġaria.

³⁹ Senaġi ġomi ġemi veiġa ta tu iniġesi, Pasova verekona ġaronai, dibura tarimana ta bana tuġu-vaġia. Be ġomi ġourani tu, ġemi Iuda tarimari ġeri vere natuġu-vaġia, ba?”

⁴⁰ Benamo ġia mabarari ġekoġoto, ġekirato, “Asiġina! Ġia tu asiġi! Senaġi Barabas.” A Barabas tu elemato-ġoi e evevaġito-ġoi naima ġediburaiato.

19

¹ Moġesi naima Pilato na Iesu eġabiato, vetari tarimari o soldia evinirito, benamo ġekwariato.

² Ema soldia na varovaro ma giniri dagarana ġebito-ġeġeraġiato, korona noġa ġeveiato, benamo Iesu debanai getore-kauato. Ema dabuġa maukana kakakakana na ġevaga-dabuġaiato.

³ Benamo goirana ġana ġeraka-kavito, benamo ġekiraiato, ġekirato, “Iuda tarimari ġeri Vere, ġaro namona!” Benamo ġoirana ma ġeforoato.

⁴ Pilato ma eraka-rosito Iuda tarimari ġeri ai, benamo ekirarito, ekirato, “Ġoġitaia, au na ġia ġomi ġoirami ai ama ġori-rosiani anina tu nama vaġa-ribami, au na ġia ġenai rakava ta tu asi badoġaria.”

⁵ Benamo Iesu ema raka-rosito, debana tu ma koronana, ġau ma giniginina ġevatoato dagarana, ema dabuġa kakakakana maki roġo etoġi-taġoato-ġoi. Benamo Pilato na Iuda tarimari ekirarito, ekirato, “Ġoġitaia, tarimana tu maiġa.”

⁶ Moġesi Rubu Veaġa vereri baregori ma ġeri vetuġunaġi-iaġovini tauri na ġeġitaiaato nai, ġefararato, ġekirato, “Ġovaġa-satauroa! Ġovaġa-satauroa!” Benamo Pilato na ekirarito, ekirato, “Ġomi tauġemi na ġoġabi-iaġoa, ma ġoa vaġa-satauroa, korana au na ġia ġenai kerere ta asi badoġaria.”

⁷ Ma Iuda tarimari na ġevaġa-veseato, ġekirato, “Ġai tu ma ġema taravatu, ma ġai ġema taravatu ekirani, ġia tu bene mase veġata, korana ġia tu tauġena moġo Barau Natunai bevevaġa-iaġo.”

⁸ Pilato na mo guruġa eseġaġiato nai, egari-rakava rakavato.

⁹ Benamo numa baregonai ma eraka-toġato, benamo Iesu ekiraiato, ekirato, “Ġoi tu ainana oiaġomato, ei?” Senaġi Iesu na asi evaġa-veseato.

¹⁰ Benamo Pilato na ekiraiato, ekirato, “Goi tu asi ourani au vaġa-vesegu ei? Goi asi ribamu au tu ma ġegu seġuka ġoi bavaġa-satauromuni, e ma ġegu seġuka ġoi batuġu-vaġimuni?”

¹¹ Iesu evaġa-veseto ekirato, “Bere Barau na guba na ġoi seġuka asi bere vinimu nai tu, toma au ġoi ġemu seġuka gaburenai asi bara ritogo. Moġa lorinai, au egabiguto ma ġoi ġimamu ai etoreguto tarimana, ġena rakava tu barego lelevaġi.”

¹² Pilato na mo guruġa eseġaġiato, benamo dabara evetauto-ġoi, ġena ura Iesu bene tuġu-vaġia. Senaġi Iuda tarimari roġo ġekoġoto-ġoi, ġekirato-ġoi, “Bema ġoi na mai tarima botuġu-vaġiani nai, ġoi tu dia Kaisara ġatana. Kamara tarima tauġena evekiragiġni vere etoni, ġia na tu Kaisara, Roma ġeri vere, ekira-fitoġaiani.”

¹³ Pilato na mo guruġa eseġaġiato, benamo Iesu ema ġori-rosiato, benamo eiaġoto, Kota eseġaġini tarimana ġena sea ai ea tanukauto. Mo gabu tu “Fore Touraġena” ġetato-ġoi. Ma Heberu garonai tu “Gabata.”

¹⁴ Mo ġaro tu Pasova o Iuda tarimari mase aneruna na evanaġirito moġo verekona ġana rovinatore ġarona, ma horaġauna 12 koloko tu varau eġabiatu. Benamo Pilato na Iuda tarimari ekirarito, ekirato, “Goboġe, ġemi vere iomaiġa!”

¹⁵ Senaġi ġia tu ġefararato, ġekirato, “Goġabi-veġitaia! Goġabi-veġitaia! Goa vaġa-satauroa!” Pilato na ma edanaġirito, ekirato, “Gomi ġemi vere tu navaġa-satauroa, ei?” Rubu Veaġa vereri baregori ġevaġa-veseto, ġekirato, “Kaisara ġereġana moġo ġai ġema vere, ma vere boruna ta tu asiġina.”

¹⁶ Benamo Pilato na Iesu ġia ġimari ai etore-kauato beġene vaġa-satauroa ġana.

Iesu ġevaġa-satauroato

Mataio 27:32-44; Mareko 15:21-32; Luka 23:26-43

Benamo vetari tarimari o soldia na Iesu ġeġabiatu, ġeġori-iaġoato.

¹⁷ Ma Iesu na ġena satauro efaġa-vaisiato, eraka-rosito, eiaġoto gabu arana “Deba Ġavana Gabuna” ġana. Heberu garonai mo gabu arana tu “Golgota”.

¹⁸ Mo gabu ai ġia na Iesu ġevaġa-satauroato tarima ruarua ġesi; ta tavi tai, ta tavi tai, ma Iesu tu nuġanai.

¹⁹ Ma Pilato na guruġa tari ġau lefalefa tai etorerito, benamo satauro tuġunai ġekoko-kafakauato. Etorerito guruġari tu maiġeri, “IESU, NASARETA TAUNA, IUDA TARIMARI GERI VERE.”

²⁰ Mo guruġa tu Heberu garo ai, e Roma garo ai, ema Grik garo ai etorerito. Iesu ġevaġa-satauroato gabuna tu vanuġa baregona sevinai, be Iuda tarimari vovoka na mo guruġa debana ġeaviato.

²¹ Benamo Rubu Veaġa vereri baregori na Pilato ġekiraiato, ġekirato, “ ‘Iuda tarimari ġeri Vere’ tu asi notorea, senaġi iniġesi notorea, ‘Ġia ekirato, au tu Iuda tarimari ġeri Vere.’ ”

²² Ma Pilato na evaġa-veserito, ekirato, “Kara au na batorea guruġana tu batorea veġata.”

²³ Vetari tarimari na Iesu ġevaġa-satauroato murinai, ġena dabuġa ġeġabirito, ma karava vasivasi ġeveirito, benamo vetari tarimari na ġeri sebori sebori ġeġabito, ma vei-gabigabi dabuġana tu ġeiaġuiato. Korana vei-gabigabi dabuġana tu dabuġa sebona na moġo ġeturiato. A ġia tu dia dabuġa vesavesari vovoka ġeturi-kavikavito vau ġeveiato dabuġana.

²⁴ Moġesina naima tauġeri fakari ai ġeguruġa-vegogoto, ġekirato, “Asi sidarea, senaġi laki ġerena ta siveia, bewinini tarimana na mo dabuġa bene ġabia uranai.” Mai veiġa ġeveiato tauna korikori tu, Buka Veaġai ġetorerito guruġari beġene moġoni ġana, maiġesi ekirani, “Au ġegu dabuġa ġia fakari ai ġekaravarito, ema au ġegu dabuġa uranai laki ġerena ta ġeveiato.” Moġesi naima vetari tarimari na maiġeri veiġa ġeveirito.

²⁵ Iesu ġena satauro koranai tu vavine vasivasi (4) ġeruġa-taġoto-ġoi: Iesu sinana, e Iesu sinana tarina vavinena, e Maria, Klopa ġaraġona, ema Maria, Magadala vanuġana vavinena.

²⁶ Iesu na sinana e Iesu na eura-viniato-ġoi merona monai ruġataġo eġitarito, benamo Iesu na sinana ekiraiato, ekirato, “Natumu merona maniġa.”

²⁷ Ema ġena mero ekiraiato, ekirato, “Sinamu maniġa.” Mo ġaro na evesinato, Iesu ġena mai mero na Iesu sinana ġena numa ġana eġori-iaġoato, benamo enariato-ġoi.

Iesu ġena mase

Mataio 27:45-56; Mareko 15:33-41; Luka 23:44-49

²⁸ Moġa murinai Iesu eribato, ġena ġauvei mabarari tu varau bevaġa-koriri. Ma Buka Veaġai ġetoreato guruġana bene moġoni uranai ekirato, “Au bokagu bekoke.”

²⁹ A gwaġutu ta nuġanai tu vine nanuna mamakina monai toretaġo. Nanu erimaiiani dagarana mo vine nanuna mamakinai ġeduġi-ferieiato. Ma vine nanuna mamakina na evonuto, benamo isopo legana dudunai ġetore-kauato, benamo ġeduġi-varaġeato, Iesu bokanai ġetore-kauato.

³⁰ Iesu na mo vine nanuna mamakina eniuato, benamo ekirato, “Bema-kori.” Ma debana eġero-riġoto, benamo tauġanina na ġia iaukana eraka-vaġito, emaseto.

Soldia ta na Iesu sebina eġwanuato

³¹ Mo ġaro moġa tu rovinatore ġarona, korana beboġini ma belaġanini tu Sabadi veaġana baregona ta mo Pasova o Iuda tarimari mase aneruna na evanaġirito moġo verekona ġarori nuġari ai. Moġa lorinai Iuda tarimari asi ġeurato, mo Sabadi veaġana baregonai mase tarimari tauġaniri satauro tuġunai beġene tanu. Moġesi naima Pilato ġenogiato, Iesu ema mo tarima ruarua kwakuri beġene kwari-koruri, benamo satauro tuġuna na beġene ġabi-riġori.

³² Moġa lorinai vetari tarimari ġeiaġomato, benamo ġevaġa-satauro debaiato tarimana kwakuna ġekwari-koruato, ma tarima vaġa-ruaruana Iesu ġesi ġevaġa-satauroato moġa maki moġesi ġeveiato.

³³ Senaġi Iesu ġenai ġeiaġomato nai, Iesu tu varau emaseto ġeġitaiato, be kwakuna asi ġekwari-koruato.

³⁴ A vetari tarimana ta na moġo Iesu sebina garaġota na egwanuato. Benamo asikauna mo egwanuato gabuna na rara e nanu ġevebubu-rosito.

³⁵ Maġa eġitaiato tarimana na evari-fiuato, ma ġia ġena vevarifiu tu moġoni. Ġia ma ribana, ġia tu eguruġa-korikorini, ma ġia na ekiraġi-foforiani anina tu, ġomi na maki boġono vaġa-moġonia ġana.

³⁶ Maġeri veġa ġeveirito korana tu, Buka Veaġai ġetorerito guruġari beġene moġoni, ekirani, “Ġia tu turiġana sebona ta maki asi beġe lau-koruani.”

³⁷ Ma Buka Veaġai etoreato guruġana ta tu maġesi ekirani, “Sebina ġegwanuato tarimana ġenai ma beġe boġe-raġeni.”

Iesu ġeguriato

Mataio 27:57-61; Mareko 15; 42-47; Luka 23:50-56

³⁸ Maġa murinai Iosefa, Arimatea tarimana, na Pilato enoġiato, Iesu tauġanina bene ġabia ġana. Pilato na maoro eviniato, benamo eiaġoto, Iesu tauġanina ea ġabiato. Iosefa tu Iesu ġena mero ta, senaġi Iuda tarimari ġariri eveito-ġoi, be eraka-vekuretoġato-ġoi, ġena veġabidadama asi evaġa-foforito-ġoi.

³⁹ Nikodemo, tovotovonai Iesu ġenai boġi eiaġoto tarimana, maki eiaġoto. Ġia na tu muro e aloe ġeġiro-sebonarito muramurana kilogram gabana toitoi (30) maki eġabikauato. (Mo vedauro muramurana bonana tu namo vedaurea).

⁴⁰ Benamo Iesu tauġanina ġeġabiato, ma tauri ruaru na dabuġa kurokurona namona mamuramurana dagarana na ġekumuato, Iuda seneri na mase tarimari ġeveirito-ġoi ilailanai.

⁴¹ Iesu ġevaġa-satauroato gabuna tu ma vamokana. Mo vamoka nuġanai tu gara kouġana ta fore na ġeveiato, ma nuġanai tarima ta tu roġosi beġere tore-toġaia.

⁴² Mo ġaro moġa tu Iuda tarimari ġeri rovinatore ġarona, ema mo gara kouġana maki kavinaġi, be Iesu ġeġabiato, monai ġea tore-toġaia.

20

Gara kouġana tu korina

Luka 24:1-12

¹ Sabadi ġarona murinai, Sandei boġiboġi iamoiamo, roġo mukunamukunai, Maria, Magadala vavinena, gara ġana eiaġoto. Benamo eboġeto, gara ġatama bokana ġetabeġauato forena tu ġeġabi-veġitaiato, be irau ai vetore eġitaiato.

² Benamo eraga-ġenoġoi-iaġomato, Simona Petero e Iesu ġena mero ta, Iesu na eura-viniato-ġoi merona, ġeri ai, benamo ekirarito, ekirato, “Vereġauka tu gara na beġe ġabirakaia, ma ġita asi ribara ainai beġe torea.”

³ Benamo Petero ema Iesu ġena mo mero ta moġa ġeraka-rosito, benamo gara ġana ġeiaġoto.

⁴ Ma tauri ruaru ġeraga-vegogo-iaġoto, senaġi Iesu ġena mo mero ta na Petero eraga-kwaneato, ma gara forenai ea raġasi-guinetto.

⁵ Etoġa-tarito, benamo eboġe-toġato, Iesu ġekumuato mo dabuġa kurokurona eġitaiato monai toretari. Ġia tu eboġe-toġato moġo, asi eraka-toġato.

⁶ Benamo Simona Petero eragaġito, benamo eraka-toġato gara kouġana nuġanai, ma Iesu ġekumuato dabuġa kurokurona eġitaiato monai toretari,

⁷ ema Iesu debana mabarana ġebaru-ġauato mukona eġitaiato, Iesu tauġanina ġekumu-ġauato mo dabuġa kurokurona ġesi tu asi tore-sebona. Senaġi mo muko tu ġereġana iokuioku, be irau ai.

⁸ Benamo Iesu ġena mo mero ema raġasi-guinetto, moġa maki eraka-toġato. Moġeri dagara eġitarito, benamo evaġa-moġoniato.

⁹ Korana ġia na Buka Veaġai evetoreto guruġana tu roġosi roġo beġene riba-korikorina, guruġana tu maġa: Iesu tu mase na ma bevariġisi-ġenoġoini.

¹⁰ Benamo Iesu ġena mero ruaru ma ġeġenoġoito ġeri numa ġana.

Iesu tu Maria, Magadala vavinena, ġenai efororito

¹¹ Senaġi Maria tu gara kouġana murikanai eruġato vau etaġito-ġoi. Ma etaġito-ġoi nuġanai etoġa-tarito, benamo eboġe-toġato fore kouġana nuġana ġana.

¹² Benamo aneru ruarua eġitarito, dabuġa kurokuro ġetogito, Iesu ġevaġa-genaiaito gabunai tanutaġo. Ta tu debakanai etanuto, ma ta tu gabikanai etanuto.

¹³ Benamo mo aneru ruarua na ġekiraiato, ġekirato, “Vavine, ġoi tu karase nai otaġini?” Maria na evaġa-veserito, ekirato, “Korana au ġegu Vereġauka tu beġe ġabi-rakaia, ma au asi ribagu ainai ma beġea torea.”

¹⁴ Maġesi eguruġa-ġosito murinai, eboġe-ġeġeraġito tu, Iesu monai ruġataġo eġitaiaito. Senaġi Maria tu asi eriba-maoroto, mo tu Iesu eruġa-taġoto-ġoi.

¹⁵ Iesu na ekiraiato, ekirato, “Vavine, ġoi tu kara dainai otaġini?” Ġoi tu deikara ovetauani?” Maria etuġamaġito, Iesu tu mo vamokai eġaukarani tarimana, be ekiraiato, ekirato, “Verebara, bema ġoi na boġabi-rakaia nai tu, ainai botorea gabuna nokira-varagu, be naġabia.”

¹⁶ Iesu na ekiraiato, ekirato, “Maria!” Maria eruġa-kureto, benamo ekiraiato Heberu garo ai, ekirato, “Raboni!” Mai guruġa tauna tu, “Vevaġa-riba Tauna.”

¹⁷ Iesu na ekiraiato, ekirato, “Au asi noġabi-tarigu, korana au tu Tamagu ġenai roġosi roġo bara varaġe. Senaġi noiaġo au tarikakagu ġeri ai, benamo bono kirari, ‘Au tu au Tamagu e ġomi Tamami, ema au ġegu Barau e ġomi ġemi Barau ġenai avaraġeni.’”

¹⁸ Maria, Magadala vavinena, Iesu ġena mero ġeri ai eiaġoto, benamo ekirarito, ekirato, “Au na Vereġauka tu baġitaia.” Benamo Vereġauka na evaġa-guruġaiaito guruġari mabarari maki ma ekira-vararito.

Iesu ġena mero ġeri ai efororito

Mataio 28:16-20; Mareko 16:14-18; Luka 24:36-49

¹⁹ Mo Sandei boġi ai, mo tu ġaro giniguenena fura ta nuġanai, Iesu ġena mero tu numa tai ġevogogoto. Ġia tu luda tarimari gariri ai, be ġeri numa ġatama bokana tu ġebiri-ġauato. Ma Iesu eiaġomato, ġia fakari ai eruġa-tarito, benamo ekirato, “Asi ġogari, nuġami ai maino netanu.”

²⁰ Moġesi eguruġa-ġosito murinai, ġimana ġeikokorito e sebina ġegwanuato moġeri evaġa-gitarito. Vereġauka ġegitaiaito nai, ġeikaku-rakavato.

²¹ Benamo Iesu na ġia ma ekirato, “Asi ġogari, nuġami ai maino netanu! Tamagu na au etuġuguto kavana, au na maki ġomi atuġumini.”

²² Moġesina evaġa-guruġa ġosirito murinai, iaġana efururu-iaġoato ġeri ai, benamo ekirarito, ekirato, “Iauka Veaġa ġogabia.

²³ Ġomi na ġena rakava boġo tuġamaġi-fitoġaiani tarimana, ġena rakava tu Barau na maki betuġamaġi-fitoġaiani. A ġena rakava asi boġo tuġamaġi-fitoġaiani tarimana tu, ġena rakava Barau na maki asi betuġamaġi-fitoġaiani.”

Iesu Tomasi ġenai efororito

²⁴ Senaġi Tomasi tu Iesu ġena mero ġeri ai eiaġoto ġaronai ġia tu asiġina. Tomasi arana ta tu Didimo o Kafa, ema ġia maki Iesu ġena mero ta mo mero gabanana ruarua (12) nuġanai.

²⁵ Moġesina nai Iesu ġena mero na ġekira-varaiaito, ġekirato, “Vereġauka tu ġai na baġa ġitaia.” A Tomasi tu ekirato, “Au tu ġimana ġeikokorito gaburi baġitarini, ema didigu ikoko ġeraka-togato gaburi na baduġi-toġaiani, e sebina ġegwanuato, monana didigu baduġi-toġaiani vau, bavaġa-moġoniani.”

²⁶ Ġaro imaima toitoi (8) ġekorito murinai, Iesu ġena mero tu numa nuġanai maia, ma mo ġaro ai tu Tomasi maki ġia ġesi. Mo numa ġatama bokana tu biribiri, senaġi Iesu tu eiaġomato, fakari ai eruġa-tarito, benamo ekirato, “Asi ġogari, nuġami ai maino netanu.”

²⁷ Benamo Tomasi ekiraiato ekirato, “Tomasi, ġimagu noġitari, didimu mai ikoko gaburi ai noma duġi-toġaia. E ġimamu notuġu-iaġomaia, be didimu au sebigu ġegwanuato mainai noma duġi-toġaia. Gemu daradara novaġa-dokoa, ma novaġa-moġonigu.”

²⁸ Benamo Tomasi na Iesu evaġa-veaseato, ekirato, “Au ġegu Vereġauka ema ġegu Barau.”

²⁹ Iesu na ekiraiato, ekirato, “Tomasi, ġoi tu ovaġa-moġoniguni, korana boġitagu nai. A asi ġeġitaguni, senaġi ġevaġa-moġoniguni tarimari tu beġene iaku.”

Mai buka Ioane na etoreato anina tu kara

³⁰ Iesu na vetoġa boruri ġutuma ġena mero ġoirari ai eveirito. Senaġi moġeri mai bukai tu asi atorerito.

³¹ A maiġeri atorerito korana tu, ġomi na Iesu boġono vaġa-moġonia, ġia tu moġoni Keriso, Barau Natuna. Ma bema ġomi na ġia boġo vaġa-moġoniani nai, ġia aranaġi maġuri vanaġivanuġi boġo ġabiani.

Iesu mero imaima ruarua (7) ġeri ai efororito

21

¹ Moġa murinai Tiberia kouna rikinai Iesu ġena mero ġeri ai ma efororito. Monai tu maiġesi efororito:

² Simona Petero; Tomasi, arana ta tu Didimo o Kafa; Natanaela, Kana vanuġa tarimana, Kana tu Galilea tanonai; Sebedaio natuna ruarua; ema Iesu ġena mero ruarua; mabarari monai ġetanu-vegogoto-ġoi.

³ Benamo Simona Petero na ekirarito, ekirato, “Au tu kou ġana maina aiaġoni.” Ma mo kotari ġekirato, “Ġai maki ġoi ġesi taiġoni.” Benamo tauri imaima ruarua (7) ġerakorosito, ġeiaġoto, ġasi ai ġea raġekauto, benamo ġea mainato. Senaġi mo boġi barabara nuġanai tu maġani-kone ta maki asi ġeġoitaġoato.

⁴ Boġiboġi iamoiamo Iesu tu kou rikinai eruġa-taġoto-ġoi; senaġi ġena mo mero tu asi ġeriba-maoroto, mo tu Iesu eruġa-taġoto-ġoi.

⁵ Benamo Iesu na ekirarito ekirato, “Natugu, ġomi ġemi ai maġani-kone tari maniġeri, ba?” Ġia na ġevaġa-veseato, ġekirato, “Asiġina.”

⁶ Benamo Iesu na ekirarito, ekirato, “Reke ġasi aroribana rekena na ġofu-riġoa, maninai tu maġani-kone tari boġo ġoitaġoni.” Reke ġefiu-riġoato, benamo ma ġeinu-raġea ġetato nai tu ġeinu-kavaiato meto fanifani, korana tu maġani-kone vovoka tabutabu ġevaġa-toġarito bene.

⁷ Iesu ġena mero ta tu Iesu na eura-viniato-ġoi merona. Mai mero na Petero ekiraiato, ekirato, “Vereġauka tu iomoġa.” Simona Petero na mo guruġa eseġaġiato, “Vereġauka tu iomoġa” nai, asikauna ġena dabuġa eraga-veiato, benamo kou ai ebaba-reito. Mo dabuġa tu, eġauveito-ġoi be ekokiato.

⁸ Senaġi Iesu ġena mero kota tu mo bouti na vau ġeleva-iaġoto. Mo reke ma maġani-konena maki ġeinukau-iaġo sebonaiato. Korana ġia na mo reke ġefiu-riġoato gabuna ema fenu fakari tu asi manaġa, mita sinau sebona (100) kavana moġo.

⁹ Fenu ai ġea darokauto nai, ġeboġeto tu karava vaġa-ġara ġeġitaio, e maġani-kone karava torekau ġeġitarito, ema beredi tari maki monai toretaġo.

¹⁰ Ma Iesu na ekirarito, ekirato, “Gomi na reke ai boġo vaġa-toġari maġani-koneri tari ġoġabi-iaġomari.”

¹¹ Simona Petero ġasi ai eraġekauto, benamo reke fenu ai einu-raġeato. Mo reke tu maġani-kone baregori na evonuto, mo maġani-kone baregori tu mabarari sinau sebona gabana imaima ma toitoi (153), ġutuma lelevaġi, senaġi reke tu asi evedareto.

¹² Iesu na ekirarito, ekirato, “Goiaġoma, ġoma ġaniġani.” Iesu ġena mo mero moġeri ta na Iesu tu iniġesi asi ma ġedanagiato, “Ġoi tu dei, ei?” Korana ġia ribari, mo tu Vereġauka.

¹³ Iesu eiaġomato, beredi eġabiato, benamo evinirito, ma maġani-kone maki moġesi veirito.

¹⁴ Mai tu nega vaġa-toitoina ġena mero ġeri ai efororito, Barau na mase na evaga-varigiġi ġeġoiaio murinai.

Iesu na Petero elauaġiato

¹⁵ Ġeġaniġani-ġosito murinai, Iesu na Petero ekiraiato, ekirato, “Simona, Ioane natuna, ġoi na au oura-viniguni veuravinina na maiġeri ġeri veuravini au ġegu ai ġetoreani maki evanaġiani, ei?” Petero ekirato, “Oi Vereġauka, ġoi ma ribamu, au na ġoi tu auraviniġuni.” Iesu na ekiraiato, ekirato, “Au ġegu mamoe naturo bono ġuburi.”

¹⁶ Iesu na ma edanaġi-ġeġoiaio, ekirato, “Simona, Ioane natuna, au oura-viniguni, ei?” Petero evaġa-veseto, ekirato, “Oi Vereġauka, ġoi ma ribamu, au na ġoi tu auraviniġuni.” Iesu ekirato, “Au ġegu mamoe bono nari-ġinikauroi.”

¹⁷ Iesu na Petero vaġa-toitoina ma edanaġiato, ekirato, “Simona, Ioane natuna, ġoi na au oura-viniguni, ei?” Petero enuġa-metoto, korana Iesu na mo tu vaġa-toitoina edanaġiato, “Ġoi au tu oura-viniguni, ei?” Petero ekirato, “Vereġauka, ġoi tu dagara mabarari ma ribamu, e ġoi ma ribamu, au na ġoi tu auraviniġuni.” Iesu ekirato, “Au ġegu mamoe bono ġuburi.”

¹⁸ Akira-korikorimuni, ġoi variġumu ai tu, tauġemu na gabakamu gabaġau na obaruato-ġoi, benamo oura-vinirito-ġoi gaburi ġana oiaġoto-ġoi. Senaġi ġoi boġaukani nai tu, ġimamu botuġu-oroġotoani, benamo tarima ta na ġimamu bebaruani, benamo beġori-kaumuni, ma asi oura-viniani gabuna ġana beġori-iaġomuni.”

¹⁹ Iesu na mai guruġa ekiraġiato tu, Petero bemaseni dabarana ema ġena mase na kamasi Barau bevaġa-raġe baregoani, etore-rosiato. Benamo Petero ekiraiato, ekirato, “Au muriguo ai noma raka.”

Iesu ma ġena mero ta

²⁰ Petero eruḡa-kureto tu, Iesu na eura-viniato-ḡoi merona eḡitaiato, muriri na eraka-iaḡoto-ḡoi. Mai mero tu, mo Iesu ḡeḡaniḡani-vegogoto lavilavinai Iesu ḡenai evetabekauto, benamo edanaḡiato, ekirato, “Vereḡauka, ḡoi berevamuni tarimana tu dei, ei?”

²¹ Petero na mo mero (o Ioane) eḡitaiato, benamo Iesu ekiraiato, ekirato, “Senaḡi Vereḡauka, ḡia maḡurina tu aiḡesi ei?”

²² Iesu na evaḡa-veaseato, ekirato, “Bema au baurani, ḡia tu maḡuri bene tanu mo, au ma baḡenoḡoini, ḡoi tu asi ḡemu ḡauvei ta maniḡa ovedanaḡi-iaḡiani. Ḡoi tu au murigu ai noma raka.”

²³ Mai guruḡa dainai, tarikaka veḡabidadama nuḡanai fakari guruḡa leileiri ḡekiraḡirito-ḡoi, ḡekirato, “Iesu ḡena mai mero maiḡa tu asi bemaseni.” Senaḡi Iesu tu asi ekirato, mo mero tu asi bemaseni. Iesu maiḡesi moḡo ekirato, “Bema au baurani, ḡia tu maḡuri bene tanu mo, au ma baḡenoḡoini, ḡoi tu asi ḡemu ḡauvei ta maniḡa ovedanaḡi-iaḡiani.”

²⁴ Mo Iesu ḡena mero dagarana tu maiḡa, maiḡeri guruḡa evari-fiurini ema etorerini maiḡa. Ḡita ribara, ḡia ḡena vevarifitu guruḡari tu moḡoni.

²⁵ Iesu na dagara tu vovoka eveirito. Bere mabarari ḡere toreri nai tu, au atuḡamaḡini, mai tanobara gabuna mabarana tu bere kei, asi veḡata bere ilaila, moḡeri buka mabarari ḡetore-vegogori ḡana uranai tu-na.

APOSTOLO ĜERI VEIĜA E ĜAUVEI

Apostolo ĝeri ĝauvei e veiĝa vaĝa-foforiri guruĝari

Mai apostolo ĝeri ĝauvei e veiĝa bukana anina baregona tu Iauka Veaĝa Barau ĝenana emariĝoto ema apostolo ĝerina ema ĝauveito variri.

Mai buka maki Luka na Teofilo ĝena ma etoreato. Etoreato laĝanina tu laĝani 63 beiaĝo 68 fakari ai ta kavana, mo tu Iesu emaseto murinai.

Guruĝa baregori Luka na Teofilo mai fefai evaĝa-ribaiato tu maiĝeri: 1) Kamasi ekalesia doĝorori ĝevesinato; 2) ma kamasi tanobara mabarana ekalesia doĝorori na evaiato; 3) kamasi Keriso guba na Iauka Veaĝa ĝenana mai tanobara ĝena ekalesia doĝorona eragaiani; 4) ekalesia mabarari Iauka Veaĝa na bene vaga-vonuri, korana ĝia ĝenana vauro ĝia ĝeri vetuĝunaĝi ĝauveina bevaĝa-tubuani e bevaĝa-taunaiani, ema bevaĝa-kokoreani ema bevaĝa-seĝukaiani (Apostolo 1:8; Sekaraia 4:6).

Luka ĝena toretore tu maiĝesina eboioĝaiato:

1. Petero ĝena ĝauvei Iuda tarimari fakari ai - karao 1-12
2. Paulo ĝena ĝauvei irau bese tarimari fakari ai - karao 13-28

¹ Teofilo, ĝoi atore-vinimuni. Ĝegu toretore giniguinena nuĝanai, Iesu ĝena ĝauvei e ĝena vevaĝa-riba guruĝari mabarari atore-foforirito, ĝena ĝauvei esinaiato veĝata,

² eiaĝoto mo, Barau na guba ĝana eĝabi-varaĝeato. Rogosi roĝo bere ĝabi-varaĝea nuĝanai, Iauka Veaĝa ĝenana eĝabi-virigirito apostolori evaĝa-ribarito.

³ Ĝena midigumidigu e mase murinai ĝia mai apostolo ĝeri ai efoforito ema vetoĝa moĝoniri vovokari ai ĝia tauĝena evevaĝa-moĝonito ĝia tu maĝuri etanuni. Ĝia tu ĝaro gabana vasivasi (40) nuĝanai apostolo ĝeri ai dabara vovokai efoforito-ĝoi, ĝeĝitaiato-ĝoi, ema Barau ĝena Basileia, (ĝena veĝitaĝau seĝukana evaĝa-ruĝaiani maĝa), varina ĝeri ekiraĝiato-ĝoi.

⁴ Ma Iesu ĝesi ĝeraka-vegogoto nai, Iesu na ekirarito, ekirato, "Ieruselema asi boĝono iaĝua, senaĝi au na akira-varamito varevarena roĝo boĝono vaĝa-nogaia, mo tu au Tamagu na ekiraĝi-toreato varevarena.

⁵ Korana Ioane tu moĝoni nanu na ebatisoto-ĝoi, senaĝina ĝomi tu ĝaro viravira beĝe korini murinai tu, Iauka Veaĝa na bebatisomini."

Barau na Iesu guba ĝana eĝabi-varaĝeato

⁶ Apostolo Iesu ĝesi ĝevegogoto nai, Iesu ĝedanaĝiato, ĝekirato, "Vereĝauka, ĝoi na toma mai negai Isaraela tarimama, Roma ĝeri veĝitaĝau na bovaĝa-maĝurimani, benamo Isaraela ĝema veĝitaĝau o basileia ma bovini-ĝenoĝoimani ba?"

⁷ Iesu evaĝa-veseto, ekirato, "Mani tu au Tamagu ĝereĝana ĝena seĝukai ĝarori e negari etorerito, ĝomi na tu asi boĝo ribarini.

⁸ Senaĝi ĝomi tu Iauka Veaĝa iatami ai beraka-rigoni, benamo seĝuka boĝo ĝabiani, ema au kiraĝi-foforigu tarimami ai boĝo iaĝoni, Ieruselema ai, Iudea ai e Samaria gaburi mabarari ai, beiaĝoni mo, tanobara gaburi mabarari ai."

⁹ Eguruĝa-ĝosito murinai, matari ĝutuĝuturi ai Barau na guba ĝana eĝabi-varaĝeato. Ĝeĝita-ĝauato mo, magube na ekou-ĝauato, benamo asi ma ĝeĝitaiato.

¹⁰ Apostolo na Iesu guba ĝana evaraĝeto-ĝoi roĝo ĝeĝita-raĝeato-ĝoi nuĝanai, tau ruarua dabuĝa kurokurori na ĝevedabuĝato, asikauna ĝia seviri ai ĝema ruĝa-tarito.

¹¹ Benamo ĝekirato, "Galilea tarimami, karase maninai boĝo ruĝa vau guba ĝoĝita-taĝoani? Mai Iesu, ĝomi ĝemina guba ĝana beĝabi-varaĝea tarimana, tu ma beĝenoĝoi-iaĝomani. Ĝia tu guba ĝana bevaraĝe boĝo ĝitaia kavana, guba na ma bemariĝoni."

Apostolo tu Ieruselema ai ĝevegogoto

¹² Benamo apostolo Olive Gorona na Ieruselema ĝana ma ĝeĝenoĝoi-iaĝoto. Mo gabu ruarua fakari tu kilomita sebona kavana.

¹³ Ieruselemai ĝeraĝasito, benamo ĝetanuto-ĝoi numana tuĝuna daĝutuna ĝana ĝeraĝekauto. Mo daĝutu ai apostolo ĝevegogoto, arari tu Petero; Ioane; Iakobo (o James) e Anduru; Filipo e Tomasi; Batolomeo; Mataio; Iakobo Alfeo; Simona, Selote tauna; ema Iudas, Iakobo natuna.

¹⁴ Ĝia mabarari ma nuĝari sebona ĝesi ĝeĝuriĝuri-vegogoto-ĝoi, vavine tari maki e Maria, Iesu sinana, ema Iesu tarina doĝoro.

Iudas gabuna eĝabiato tauna

¹⁵ Moĝeri ĝaro ai Iesu ĝevaĝa-moĝoniato-ĝoi tarimari mabarari tu sinau sebona ma gabana ruarua (120) ĝevegogoto-ĝoi. Ĝia fakari na Petero eruĝa-vaisito, benamo ekirato.

¹⁶ “Tarikakagu mabarami, toretore veaġana tu bema moġoni, mo tu Iauka Veaġa Davida muruna na kai-veġata ekirato, Iudas na Iesu ġabitarina tarimari beġori-kaurini guruġana.

¹⁷ Iudas tu ġai karoma ta, ema ġia maki apostolo ġauveina tarimana, ġai kavana.”

¹⁸ Gena vei-rakava voina monina na tano ta evoiato. Monai ġia eketoto, benamo emaseto, ma nuġana eġwa-fakaiato, benamo sinageña evebubu-rosito.

¹⁹ Ierusalemata tarimari mabarari na varina ġeseġaġiato, benamo mo tano arana ġeri garo ai ġekiraġiato “Akeledama” anina tu “Rara Tanona.”

²⁰ Korana Salamo bukanai varau ġetoreato, ekirani,

‘Ġena numa bene karovo,

tarima ta asi bene tanu.’

Ma guruġa ta Salamo nuġanai ekirani,

‘Ġena veġitataġo ġauveina maki

ta na bene ġabia.’

²¹ Moġa lorinai namona tu tau ta siġabi-viriġia. Mo tau tu ġita ġesi vanaġivanagi tarakao-vegogoto-ġoi, Iesu Vereġauka ġita fakarai taraka-toġato-ġoi e taraka-rosito-ġoi nai,

²² ema Ioane na tarima ebatatorito negana na, beiaġoma mo, Iesu ġai ġemana guba ġana eġabi-varaġeato ġarona tarimana ta. Korana tu ġia maki ġai ġesi Iesu gena variġisi-ġenoġoi bene kiraġi-foforia.

²³ Moġa lorinai ġia na tau ruarua ġeġabirito, Iosefa, arana tu Barasaba ġetato-ġoi, arana ta maki Iusto; ema Matias.

²⁴ Benamo ġeġauġauto, ġekirato, “Vereġauka o, tarimarima mabarari nuġari ġoi na tu oribarini, moġa lorinai novaġa-ġitama, dei tu ġoi na boġabi-hidia,

²⁵ apostolo ġauveina bene veia Iudas gabunai; a Iudas tu eiaġoto ġena gabu korikorina ġana.”

²⁶ Benamo fore ġerena ġeveiato nuġanai, fore tu Matias aranai eketoto, benamo Matias apostolo gabanana sebona (11) ġesi ġeiavi-sebonaiato.

2

Iauka Veaġa eraka-riġoto

¹ Pentekoste ġaronai, Iesu ġevaġa-moġoniato-ġoi tarimari mabarari gabu sebonai ġevevegoto. Pentekoste anina tu gabana imaima (50), mo tu Pasova verekona ġarona na beiaġoma mo, mai ġaro maġa.

² Benamo asikauna iavara baregona ta guruna noġa guba na emariġoto, ġetanu-vegogoto numana nuġana mabarana evaġa-vonuato.

³ Benamo noġa moġo karava meari kavana ġemariġoto-ġoi ġeġitarito. Mo karava meari ġemariġoto, benamo ġia tata tubuari ai ġemoreto.

⁴ Benamo ġia mabarari Iauka Veaġa na evaġa-vonurito, benamo garo irauirauri ai ġegurugato, Iauka Veaġa na evinirito ilailanai.

⁵ Moġa ġaronai tu Iuda tarimari, Barau garina ġeveito-ġoi tarimari, tu tanobara gaburi mabarari na ġeiaġomato, benamo Ierusalemata ġetanuto-ġoi.

⁶ Mo guru ġeseġaġiato nai, tarimarima ġutuma ġeġaru-vegogoto. Nuġari ġefarevaġito, korana ġia tata na Iesu ġevaġa-moġoniato-ġoi tarimari ġeseġaġirito tu mo ġeraka-vegogoto tarimari ġeri garo ai ġegurugato-ġoi.

⁷ Ġia ġeġaba-rakavato e ġedaradarato, ġekirato, “Mai ġegurugani tarimari tu Galilea tarimari, ene?”

⁸ Kamara dabarai tu ġita tata ġera garo ai ġegurugani taseġaġirini?

⁹ Ġita tari tu Patia tarimara, tari tu Media tarimara e Elam tarimara. Tari tu Mesopotamia, Iudea e Kapadokia na, ema tari tu Ponto na e Asia na,

¹⁰ Frigia e Pamfilia na, Aigupito e Kurene sevina Libia tanori na, ema tari tu Roma na taiagomato,

¹¹ Iuda tarimara, e irau bese tarimari Iuda ġera toma-rakariġo ġeġabi-raġeato tarimari; ema ġita tari tu Krete e Arabia tarimara. Senaġi ġita mabarara na taseġaġirini ġita tata ġera garo ai Barau na veġa baregori boruri eveirito-ġoi ġekiraġi-foforirini.”

¹² Mabarari ma nuġa-farevaġiri e ma daradarari ġesi tauġeri ġevedanaġi-vedanaġito, ġekirato, “Mai veġa anina tu kara?”

¹³ Senaġina tarima tari na tu ġevaseva-vaseva-iaġirito, ġekirato, “Maiġeri tarima tu beġe niu-rakava.”

Petero ġena vevariftu

¹⁴ Benamo Petero ma apostolo gabanana sebona (11) ġesi ġeruġa-vaisito, ma garona evaġa-baregoato, benamo vegogo tarimari eġobata-vinirito, ekirato, “Iuda tarimami e

Ierusalemmai ġotanuni tarimami mabarami, boġono seġaġi-ginikau, mai veiġa tauna ġemi nakiraġi-maġataia.

¹⁵ Maiġeri tarima tu asi beġe niu-rakava, ġomi ġotuġamaġini kavana. Mai tu roġo bogġiboġi horaġauna 9 koloko.

¹⁶ Senaġi maitoma tu Ioel, peroveta tarimana, na ekiraġi-guineato kavana efororini, ekirato,

¹⁷ 'Barau ekirani:

Ġaro dokori ai au Iaukagu babubu-riġoani tarimarima mabarari iatari ai.

Benamo natumi merori e ġuiatori beġe perovetani,

ġemi maraġa variġu beġe mata-vanaġini,

ema ġemi tau ġaukari beġe nuvini.

¹⁸ Oi, moġeri ġaro ai au ġegu vetuġunaġi tauri e vavineri iatari ai au Iaukagu babubu-riġoani,

benamo beġe perovetani.

¹⁹ Benamo nuġa-farevaġi veiġari guba tuġunai bavaġa-foforirini,

ema vetoġa dagarari tanobarari;

rara, e karava, ema goġu barukari.

²⁰ Ġaro ma bevetore-kureni bemukunani,

e ġue tu bekakakakani, rara kavanai beiaġoni,

Vereġauka ġena iaġoma ġarona baregona e irau vedaureana bekavinaġini nai.

²¹ Benamo deikara Vereġauka aranai ekear-raġeni tarimana tu maġuri beġabiani.'

²² Israeala tarimami, mai guruġa boġono seġaġiri: Iesu, Nasareta tarimana, Barau na evinatio ġauveina tu ġomi ġemi ai evaġa-fofori ginikauato. Ġia ġenana Barau ġena seġuka veiġari e nuġa-farevaġi veiġari ema vetoġa tari eveirito ġomi vefakami ai, be ġomi tu ma ribami.

²³ Barau ġena urai e ribai varau eboioġa-guineato ilailanai, Iesu ġomi ġimami ai etorekauato, benamo rakava tarimari na ġevaġa-kavamito, benamo Iesu satauro ai goikokokauato nai ġovaġi-maseato.

²⁴ Senaġina Barau na ġia mase na evaġa-varigġisi ġenoġoiato, ema mase midiguna na eġabi-vaġiato, korana mase na ġia tu asi ilaila beġabi-tariani riba.

²⁵ Davida na ġia ekiraġiato, ekirato,

'Vereġauka tu ġaro mabarari ai ġoiragu ai aġitaiani.

Ġia tu au aroribagu ai,

be dagara ta na asi bevaġa-ġarevaguni.

²⁶ Moġa lorinai nuġagu iaku na bevonu,

ema ġegu guruġa tu iaku na beġe vonu.

Mase garina maki asi aveini,

²⁷ korana au tu mase tarimari ġeri gabu ai asi boraga-kwaneguni,

ema ġemu Tarima Veaġana tu asi beboragani.

²⁸ Maġuri dabarari tu varau ovaġa-ribaguto;

ġoi sevimu ai batanuni,

benamo iaku na bovaġa-vonuguni.'

²⁹ Tarikakagu mabarami, initiba au tu nuġagu ma kokorena ġesi bakirani, ġita senera baregona Davida tu emaseto ema ġeguriato, maitoma ġia gurina tu ġita ġesi maiġea.

³⁰ Senaġi ġia tu peroveta tarimana, ema ma ribana Barau na tu varau ekiraġi-toreato, ekirato: Davida besena ta tu ġia ġena teronai betanukauni veġata.

³¹ Davida na eriba-guineato, Barau na kara ġoirai beveiani eġitaato. Benamo Keriso ġena varigġisi-ġenoġoi guruġana ekiraġiato, ekirato, 'Ġia tu mase tarimari ġeri gabu ai asi eraga-kwaneato, ema tauġanina asi beboragani.'

³² Barau na mai Iesu, mase na evaġa-varigġisi ġenoġoiato, ġai mabarama ribama.

³³ Barau na eġabi-vaisiato, ġimana aroribanai etoreato, benamo Barau na ekiraġi-toreato, Iauka Veaġa na Tamana ġenana eġabiato. Benamo ġia na mo Iauka Veaġa toma bebubu-riġo, ġomi na ġoġitaiani ema ġoseġaġiani.

³⁴ Korana Davida guba ġana tu asi evarageto, senaġi ekirato,

'Barau na au ġegu Vereġauka ekiraġiato, ekirato:

Au aroribagu ai noma-tanu,

³⁵ bene iaġo mo, ġevetari-vinimuni tarimari bana tore-riġori,

kwakumu vaġa-ruġa tarina dagaranaai bana vaġa-iaġori.'

³⁶ Moġa lorinai Israeala tarimari mabarari tu beġene riba-ginikau, mai Iesu, ġomi na ġovaġa-satauroato tu, Barau na Vereġauka e Keriso ai evaġa-iaġoato."

Tarimarima ġutuma ġevetuġamaġi-kureto ma ġeraka-kureto

³⁷ Mai guruḡa ḡeseḡaḡiatio nai, nuḡari ḡeraḡeto, benamo Petero e mo apostolo tari ḡedanaḡirito, ḡekirato, “Tarikaka, ḡai tu kamasi toma ḡaveini?”

³⁸ Petero na ekirarito, ekirato, “Gomi tata ḡemi rakava ḡerina boḡono vetuḡamaḡi-kure ma boḡono raka-kure, ema Iesu Keriso aranai babatiso boḡono ḡabia, be ḡemi rakava bene tuḡamaḡi-fitoḡari; ema ḡena varevare, Iauka Veaḡa, boḡono ḡabia.

³⁹ Korana Barau ḡena kiragitore eveiatio tu ḡomi ḡemi e ḡomi natumi ḡeri, ema manaḡai ḡetanuni tarimari ḡeri. Aba, Vereḡauka ḡera Barau na ekiraḡi-toreatio Iauka Veaḡana tu bekearini tarimari mabarari bevinirini.”

⁴⁰ Petero na guruḡa ḡutuma ekiraḡirito, esisiba-vinirito e elau-naḡirito, ekirato, “Mai bese tarimari rakavari ḡerina tauḡemi boḡono raga-maḡuri.”

⁴¹ Tarima ḡutuma na ḡena guruḡa ḡeḡabi-raḡeatio, benamo babatiso ḡeḡabiatio. Mo ḡaro sebonai tarimarima mabarana daḡara toitoi (3,000) kavana ḡia ḡeri doḡoro nuḡanai ḡebere-toḡato.

⁴² Benamo vanaḡivanaḡi apostolo tarimari ḡerina riba ḡeḡabito-ḡoi, ḡevegogoto-ḡoi e ḡevevaḡa-kavato-ḡoi, beredi ḡetavi-kirato-ḡoi o anibou ḡeḡanito-ḡoi e ḡeḡauḡau-vegogoto-ḡoi.

Iesu ḡevaḡa-moḡoniatio-ḡoi tarimari ḡeri maḡuri

⁴³ Apostolo ḡerina Barau na nuḡa-farevaḡi veḡari e vetoḡa boruri ḡutuma eveirito-ḡoi, ema tarimarima mabarari ḡeḡari-rakavato.

⁴⁴ Iesu ḡevaḡa-moḡoniatio tarimari mabarari ḡetanu-vegogoto-ḡoi ema ḡeri-ḡari ḡevevarevare-vevinito-ḡoi.

⁴⁵ Geri farefare e tano ḡevoivoi-iaḡirito-ḡoi, benamo moniri tu ḡia mabarari vefakari ai ḡevarerito-ḡoi, tata ḡena rabu ilailanai.

⁴⁶ Garo vanaḡivanaḡi mabarari Rubu Veaḡai ḡevegogoto-ḡoi. Ḗeri numai anibou ḡeḡanito-ḡoi e ḡeḡaniḡani-vegogoto-ḡoi ma iakuri e ma mainori ḡesi.

⁴⁷ Barau ḡevaḡa-raḡeatio-ḡoi, ema tarimarima mabarari ḡeri veiau-namo ḡeverere-iaḡiatio-ḡoi. Benamo ḡaro mabarari ai Vereḡauka na evaḡa-maḡuririto-ḡoi tarimari ḡia ḡesi etore-vegogorito-ḡoi.

3

Kwaku rakava tarimana enamoto

¹ Garo ta lavilavi horaḡauna 3 koloko ai ḡauḡau horanai, Petero e Ioane Rubu Veaḡa ḡana ḡeiaḡoto.

² Monai tarima ta tu emagurito kwakuna rakava ḡeḡoitaḡoato. Ḗaro mabarari ai ḡeḡwa-iaḡoato-ḡoi, Rubu Veaḡa ḡatama bokana arana “Namo Vedaurea” koranai ḡevaḡa-tanutaratio-ḡoi, benamo Rubu Veaḡai ḡeraka-toḡato-ḡoi tarimari ḡeri ai moni enoḡito-ḡoi.

³ Ḗia na Petero e Ioane ḡeraka-toḡa ḡana nuḡanai eḡitarito, benamo kara ta ḡevinia uranai enoḡirito.

⁴ Tauri ruarua na ḡeḡita-karakaraiatio, benamo Petero na ekiraiatio, ekirato, “Ḗai noḡitamala!”

⁵ Mo guruḡa eseḡaḡiatio lorinai, tauri ruarua eḡitarito, ḡia maboru ekirato tu, kara ta beḡe viniani.

⁶ Senaḡi Petero na ekiraiatio, ekirato, “Au tu asi ḡegu moni, senaḡina ḡegu ai kara etanuni dagarana avinimuni. Iesu Keriso, Nasareta tauna, aranai akiramuni, novariḡisi, noraka!”

⁷ Benamo Petero na kwaku rakava tarimana ḡimana aroribanai eḡabito, evaḡa-ruḡa-vaitsiato. Asikauna ḡia kwakuna ema kwakuna komukomuri ḡetubutubu-kauto.

⁸ Ḗia eburi-vaitsito, eruḡa-tarito, eraka-iaḡoto. Benamo Petero ema Ioane ḡesi Rubu Veaḡanai ḡeraka-toḡato, erakato e eburi-vaitsito, Barau evaḡa-raḡeatio.

⁹ Tarimarima mabarari na ḡeḡitaiatio, erakato e Barau evaḡa-raḡeatio-ḡoi,

¹⁰ ema ḡeḡita-leaiatio, ḡia tu “Namo Vedaurea” ḡatama-boka koranai etanuto-ḡoi vau enoḡinoḡito-ḡoi tarimana nai, ḡia mabarari nuḡari ḡefarevaḡito e ḡeḡaba-rakavato, mo veḡa ḡia ḡenai eḡorato nai.

Petero ḡena ḡobata Rubu Veaḡai

¹¹ Mo tau roḡo Petero e Ioane ḡeri ai eveḡabikau-taḡoto-ḡoi, touraḡe baregona arana “Solomona Genā Touraḡe” ai, tarimarima mabarari ḡeḡaba-rakavato, benamo ḡeraga-iaḡoto ḡeri ai.

¹² Petero na mo tarimarima eḡitarito, benamo evaḡa-guruḡarito, ekirato, “Isaraela tarimami, karase nai mai dagara tu ḡoḡaba-iaḡiani? Karase nai ḡai ḡoḡita-karakaramani? Gomi ḡotuḡamaḡini mai tu tauḡema ḡema seḡukai e Barau korana-iaḡinai naima, mai tarima baḡa vaḡa-rakaia ḡotoni?”

¹³ Aberahamo, Isako, Iakobo ġeri Barau, ġita senera mabarari ġeri Barau, na ġena vetuġunaġi tarimana Iesu evaġa-raġeato, senaġi ġomi na Roma tarimari ġoviniato beġene vaġia ġana, ma Pilato ġena ura bene tuġu-vaġia asi beġene vaġia etato nai, ġomi tu asi ġourato.

¹⁴ Ġia tu Veaġa e Vei-Iobukaiobuka tarimana, senaġi ġomi na tu asi ġoura-viniato, ema Pilato ġonoġiato, vaġivaġi tarimana tu bene tuġu-rosia ġotato.

¹⁵ Maġuri eġwa-iaġomaiato tarimana tu ġomi na ġovaġi-maseato. Senaġi Barau na mase na ma evaġa-variġisi ġenoġiato. Ġai maġa tu ribama e ġakiraġi-foforiani.

¹⁶ Ġai ġema veġabidadama Iesu aranai nai, mai tarima ġomi na ġoġitaiani e ribami bevaġa-namoa. Mai tu Iesu aranai ema veġabi-dadama ġia ġenana eiaġomani na, mai tarima bevaġa-namo korikorria, ġomi mabarami na ġoġitaiani maġa.

¹⁷ Tarikakagu mabarami, au toma aribani, kara ġemi veġorikau tarimari ġesi ġoveiato tu asi ribami dainai.

¹⁸ Senaġina Barau na guinenai ġena peroveta tarimari mabarari mururi na ekirato, ġia ġena Keriso tu midigu roġo beġanini etato. Mo guruġa tu ġomi ġemina ema moġonito.

¹⁹ Moġa lorinai ġovetuġamaġi-kure ma ġoraka-kure Barau ġenai, be ġia na ġemi rakava bene ġabi-vaġiri.

²⁰ Bema moġesi boġo veini nai, Iauka ġena kokore Vereġauka ġenana beiaġomani, ema ġia na Iesu Keriso betuġu-iaġomaiani. Ġia tu Barau na ġomi ġemi eġabitore-guineato.

²¹ Ġia tu gubai roġo betanuni, beiaġoni mo, Barau na dagara mabarari bevaġa-variġu ġenoġoirini. Ġia na ġena peroveta tarimari veaġari mururi na kai-veġata ekiraġiato ilallanai.

²² Korana Mose ekirato, 'Vereġauka ġemi Barau na ġomi ġemi tarimarima fakari na ġemi peroveta tarimana ta bevaġa-ruġaiani au kavana. Ġia na bevaġa-guruġamini guruġari mabarari tu boġono seġaġiri.

²³ Tarima ta na ġia ġena guruġa asi beseġaġi-viniani tarimana tu, Barau na ġena tarimarima fakari na beġabi-vaġiani, benamo bevaġi-maseani.'

²⁴ Moġoni, peroveta tarimari mabarari Samuela na beiaġoma mo toma, ema ġia murina na ġeiaġomato peroveta tarimari maki ġutuma varau ġeguruġato, maġeri ġaro ġekiraġirito.

²⁵ Ġomi tu peroveta tarimari naturi, ema Barau ġena kiraġitore ġomi senemi ġeri eveiato maki ġomi ġemi. Barau na Aberahamo evaġa-guruġaiato nai, ekirato, 'Goi natumu ġenana tanobara beseri mabarari namo beġe ġabiani.'

²⁶ Moġa lorinai Barau na ġena vetuġunaġi tarimana Iesu evaġa-ruġaiato, benamo ġemi ai etuġu-iaġosi guineato, ġomi bene vaġa-namomi ġana. Mo namo anina tu, ġomi tata ġemi rakava ġerina beġori-kuremini.

4

Petero e Ioane ġeġabi-taririto

¹ Petero e Ioane na tarima-rima roġo ġevaġa-guruġarito-ġoi nuġanai, Rubu Veaġa vereri, e Rubu Veaġa ġitaġauna tarimari ġeri vere, ema Sadukea tarimari ġeraġasito.

² Ġia tu ġebaruto, korana mai apostolo ruarua na tu tarimarima ġevaġa-ribarito-ġoi e ġeri ġeġobatato-ġoi nai tu ġekirato-ġoi, Iesu tu mase na evariġisi-ġenoġoito; moġa lorinai mase tarimari maki beġe variġisi-ġenoġoini.

³ Benamo tauri ruarua ġeġabi-taririto, benamo dibura numai ġebiri-ġaurito; monai beġene gena mo bogibogi, korana tu ġaro maki ekofuto.

⁴ Senaġi Petero e Ioane ġeri ġobata tarima vovoka na ġeseġaġiato, benamo tarima ġutuma na ġevaġa-moġoniato, benamo tau numerana eiaġoto mabarana tu daġara imaima (5,000) kavana.

⁵ Elaġanito nai tu, Iuda vereri, e vanuġa tarima baregori, ema taravatu ġevevaġa-riba iaġiato-ġoi tarimari Ierusalemaj ġevevogoto.

⁶ Anas, Rubu Veaġa verena baregona, e Kaiafas, e Ioane, e Alesanda, ema Rubu Veaġa verena baregona ġena bese maki monai.

⁷ Benamo tauri ruarua ġeġori-iaġorito, benamo ġoirari ai ġea vaġa-ritoġorito vau ġedanaġirito, ġekirato, "Kamara seġukai o deikara aranai mai veiġa ġoveiato?"

⁸ Benamo Petero, Iauka Veaġa na evonuto, evaġa-veseto, ekirato, "Isaraela veremi e veġitaġau tarimami!"

⁹ Bema ġai toma boġo kea-iaġomama tu, ġourani ġai na ġakira-varami, mai kwaku rakava tarimana ġenai veiġa namona baġa veia ema kamara dabaraj ġia be-namo nai tu,

¹⁰ ĝomi mabarami e Isaraela nuĝanai tarimarima mabarami tu boĝono riba, Iesu Keriso, Nasareta tarimana, ĝomi na ĝovaĝa-satauroato, ma Barau na mase na evaĝa-variĝisi ĝenoĝoiato tarimana, aranai mai tarima benamo-ĝosiĝosi, ĝomi ĝoirami ai eruĝa-taĝoni.

¹¹ Mo Iesu tu,

‘ĝomi, numa raga tarimami, na ĝoruĝaiato forena, ĝia tu duĝu barana forenai eiaĝoto.’

¹² Vevaĝa-maĝuri tu ĝia ĝereĝana ĝenana bita doĝarini; tanobara mabarana nuĝanai Barau na ara ta tu asi evinirato, ĝita bene vaĝa-maĝurira ĝana.”

¹³ Kanisoro tarimari na Petero e Ioane ĝeĝitarito, asi ĝegarito-ĝoi ema ĝeribarito maki, ĝia tu vevaĝa-riba gabuna ta ĝana asi ĝeiaĝoto, ma tauri ruarua asi iaunegari. Moĝa ĝeĝitaiato nai, ĝegabato e nuĝari ĝevekeoto, benamo ĝeribato, ĝia tu Iesu ĝesi ĝerakao-vekekoto-ĝoi tarimari.

¹⁴ Ema mo tarima ĝeĝitaiato namo-ĝosiĝosi Petero e Ioane ĝesi ĝeruĝa-taĝoto-ĝoi, benamo asi ĝeri guruĝa dabarana.

¹⁵ Moĝa lorinai ĝekirarito, mo vegogo gabuna na ĝeraka-veĝita. Benamo ĝeraka-rosito murika ĝana, benamo ĝia ĝereĝari moĝo ĝevedanaĝi-vevinito, ĝekirato,

¹⁶ “Maĝeri tarima ruarua tu kamasi toma taveirini? Ierusalemaj ĝetanuni tarimari mabarari ma ribari, ĝia tu nuĝa-farevaĝi veiĝana ta beĝe veia, ema ĝita na asi bita kira-ĝuniĝauani riba.

¹⁷ Senaĝi tarimarima na beĝe vari-fuani garinai, maĝeri tarima tu tana vaĝa-gariri e tana kira-ĝoiri, Iesu aranai tarima ta asi ma beĝene vaĝa-guruĝa ĝenoĝoia.”

¹⁸ Benamo ma ĝekea-toĝarito, benamo ĝekirarito, Iesu aranai asiĝina ĝinavaĝi ma beĝene ĝobata e beĝene vevaĝa-riba.

¹⁹ Senaĝi Petero e Ioane na ĝevaĝa-veserito, ĝekirato, “Ĝomi tauĝemi ĝotuĝamaĝi-virigĝia, aiĝa tu roroĝoto Barau ĝoiranai? Ĝomi na kara ĝokiraĝiani baĝana veia, ba Barau na ekiraĝiani veiĝana baĝana veia?

²⁰ Korana ĝaĝitarito e ĝeseĝaĝirito dagarari tu ĝoi na asi ilaila baĝa kira-ĝuniĝaurini e muruma maki moĝeri kiraĝi-kiraĝiri ai asi baĝa kourini riba.”

²¹ Ma ĝevaĝa-guruĝa gvaĝiĝirito murinai, ĝetuĝu-rosirito. Vaĝa-rakavari dabarana ta asi ĝedoĝariato, korana tarima mabarari na Barau ĝevaĝa-raĝeato-ĝoi, mo nuĝa-farevaĝi veiĝana lorinai.

²² Korana mo nuĝa-farevaĝi veiĝana na enamoto tarimana ĝena maĝuri laĝaniri tu gabana vasivasi (40) maki evanaĝiato.

Ekalesia ĝeĝurigiurito

²³ Petero e Ioane ĝetuĝu-vaĝirito murinai, karori ĝeri ai ĝeĝenoĝoi-iaĝoto. Ma Rubu Veaĝa vereri baregori e Iuda vereri na kara ĝekiravara-vinirito dagarari mabarari karori ĝeri ĝekiraĝirito.

²⁴ Benamo karori na moĝeri guruĝa ĝeseĝaĝirito nai, ĝia mabarari Barau ĝeĝurigiuri-vini vegogoato, ĝekirato, “Vereĝauka o, guba, tanobara, daĝaru-bara, ema nuĝari ai ĝetanuni dagarari mabarari ĝoi na oveirito.

²⁵ Iauka Veaĝa ĝenana, ĝai senema Davida, ĝoi ĝemu vetuĝunaĝi tarimana, muruna na oguruĝato nai ekirato,

‘Kara dainai irau bese tarimari tu ĝebaru-rakava rakavani?

Ema karase nai tarimarima na tu asi beĝe ĝauveini boioĝari ĝeveirini?

²⁶ Tanobara vereri ĝeverovinato,

ema veĝitaĝau tarimari baregori ĝeĝaru-vegogoto,

Vereĝauka ma ĝena Keriso ĝesi

beĝene vetari-viniri ĝana.’

²⁷ Moĝoni veĝata, Heroda e Pontio Pilato, irau bese tarimari e Isaraela tarimari ĝesi mai vanuĝa baregonai ĝevevogoto. ĝoi ĝemu vetuĝunaĝi tarimana veaĝana Iesu, ĝia tu ĝoi na oviriĝiato e Keriso ai ovaĝa-iaĝoato, ĝana boioĝa ĝetogato.

²⁸ Ĝia na ĝeveirito dagarari tu kara ĝoi na ĝemu seĝukai e urai oboioĝa-ĝuinerito beĝene vetore otato dagarari moĝo.

²⁹ Moĝa lorinai, Vereĝauka o, ĝeri vevaĝa-gari veiĝari noĝitari, ema ĝai ĝoi ĝemu vetuĝunaĝi tarimama kokore novinima, be ĝemu vari baĝana kiraĝia ma kokorema ĝesi.

³⁰ Gimamu notuĝu-rosia, be keve tarimari bono vaĝa-namori, ema vetoĝa boruri e nuĝa-farevaĝi veĝari bono veiri, Iesu, ĝoi ĝemu vetuĝunaĝi tarimana veaĝana aranai.”

³¹ Ĝeĝauĝau-ĝosito murinai, ĝevevogoto numana eĝareva-ĝarevato. Benamo ĝia mabarari Iauka Veaĝa na ĝevonuto, benamo Barau ĝena vari ĝekiraĝiato ma kokoreri ĝesi.

³² Iesu ġevaġa-moġoniato-ġoi tarimari mabarari ġeri tuġamaġi e nuġari tu sebonai moġo. Ta ġena farefare ġia ġereġana ġena asi etato-ġoi, senaġi ġeri dagara mabarari ġia tata ġevewarevare-vevinito-ġoi.

³³ Seġuka barego ġesi apostolo tarimari na Iesu Vereġauka ġena varigisi-ġenoġoi ġevari-fiutato-ġoi, ema Barau ġena namo e varevare-bara ġia mabarari iatari ai ebubu-rigoato.

³⁴ Ġia fakari ai ta maki asi erabuto-ġoi. Korana ma ġeri tano o numa tarimari na, moġeri numa e tano ġevoivoi-iaġirito-ġoi, benamo davari moniri tu ġeġwa-iaġorito-ġoi,

³⁵ Apostolo ġoirari ai ġetore-taririto-ġoi. Benamo mabarari ġevini-ilailarito-ġoi, tata ġena rabu ilailanai.

³⁶ Iosefa tu apostolo na arana ġevatoato Banabas, anina tu “Velaunaġi Tarimana”. Ġia tu Levi doġorona, Saipras motumotunai emaġurito.

³⁷ Ġia ġena tano evoiato, benamo voina monina tu eġwa-iaġoato, apostolo kwakuri koranai ea tore-tariato.

5

Anania e Safira

¹ A tau ta etanuto-ġoi arana Anania, ġaraġona arana tu Safira. Anania na ġeri tano ta ea voivoi-iaġiato, ġaraġona na maki eġabi-raġeato.

² Senaġina mo tano monina kwana tu eġabi-tariato, ma kwana reke ta moġo eġwa-iaġoato apostolo ġoirari ai ea tore-tariato. Mo veiġa eveiato ġaraġona tu ma ribana.

³ Benamo Petero na ekiraiato, ekirato, “Anania, karase nai Satani na beboroġimu, benamo Iauka Veaġa boġofaia, tano monina kwana tu ġoi ġemu boġabi-taria?”

⁴ Roġosi boro voia nai tu, tano tu ġoi ġemu, ene? Ma beġe voia murinai maki moni tu ġoi ġemu. Kara botuġamaġia nai, mai veiġa bono veia bosì? Goi na tu dia tarimarima boġofari, senaġi Barau boġofaia.”

⁵ Anania na mo guruġa eseġaġiato nai, eketo-tarito, emaseto. Benamo mo veiġa eġorato varina ġeseġaġiato tarimari mabarari ġegari-rakavato.

⁶ Benamo tarima variguri ġevariġisito, Anania tauġanina dabuġa na ġeseġoato, ġeġwa-rosiato, benamo ġea guriato.

⁷ Hora toitoi kavana murinai, ġaraġona ema raka-toġato, senaġi ġia kara eġorato tu asi ribana.

⁸ Petero na edanaġiato, ekirato, “Nokira-varagu, ġomi taumi ruarua na tano monina boġo ġabia tu maiġa moġo ba?” Ġia evaġa-veseto, ekirato, “Oi, voina tu maniġa moġo.”

⁹ Benamo Petero na ekiraiato, ekirato, “Karase nai ġoi ma ġaraġomu ġesi nugami ġovaġa-sebonarito, Vereġauka Iaukana ġoġofaia? Noboġe, ġoi ġaraġomu beġe guria tarimari tu ġatama-bokai ġeruġa-taġoni, ġia na ġoi maki ma ġeġwa-rosimuni.”

¹⁰ Mo horai moġo ġia Petero kwakuna koranai eketo-tarito, emaseto. Benamo mo tarima variguri ġeraka-toġato, ma ġeġitaato mase, benamo tauġanina ġeġwa-rosiato, ġaraġona sevinai ġea guriato.

¹¹ Ekalesia mabarana e varina ġeseġaġiato tarimari mabarari gari baregona na eġabirito.

Vetoġa e veiġa boruri

¹² Vetoġa e veiġa boruri ġutuma apostolo na tarimarima ġoirari ai ġeveirito-ġoi. Ma Iesu ġevaġa-moġoniato-ġoi tarimari mabarari tu “Solomona Gena Touraġe” ai ġevegogoto-ġoi.

¹³ Asi veġabidadama tarimari na ġevaġa-raġerito-ġoi, senaġi ġegarito-ġoi, be ġia ġesi asi ġea vegogoto-ġoi.

¹⁴ Senaġi tau e vavine tu ġutuma lelevaġi na Vereġauka ġevaġa-moġoniato-ġoi. Mo ġevaġa-moġonito-ġoi tauri e vavineri tu mabarari apostolo ġeri doġoro ai ġerakaraka-toġato.

¹⁵ Apostolo na ġeveirito-ġoi veigari tarimarima na ġeribarito, benamo keve tarimari ġeġwa-rosirito dabara ġana, benamo genagena fatari ai e gedai ġetorerito, Petero bene raka-vanaġi nai, iouiouna na bene iauka-tariri ġana.

¹⁶ Ema tarimarima ġutuma-bara Ierusalemna sevinu vanuġari na keve tarimari e iauka rakavari na ġeboroġirito tarimari ġeġwa-iaġorito, benamo mabarari ġenamoto.

Apostolo tarimari ġevaġa-midigu midigurito

¹⁷ Benamo Rubu Veaġa verena baregona ma karona Sadukea doġorona ġesi, apostolo tarimari ġeri ai ġemama-rakavato.

¹⁸ Ġia na apostolo tarimari ġeġabi-taririto, benamo dibura numai ġebiri-ġaurito.

¹⁹ Senaġi mo boġi Vereġauka ġena aneru na dibura numa ġatama bokana erovoato, benamo apostolo eġori-rosirito, benamo evaġa-guruġarito, ekirato,

²⁰ “Goiāgo, Rubu Veāganai boḡono ruḡa, benamo mai maḡuri variḡuna mabarana tarimarima ḡeri boḡono kiragiā.”

²¹ Boḡibogi iamo-iamonai Rubu Veāgai ḡeraka-toḡato, aneru na ḡevaḡa-guruḡarito ilailanai tarimarima ḡevaḡa-ribarito.

Rubu Veāga verena baregona ma karona ḡesi ḡeraḡasito, benamo kanisoro tarimari e Isaraela vereri mabarari ḡekea-vegogorito, benamo dibura numa ḡena ḡevetuḡu-iaḡoto, apostolo tarimari urari na.

²² Senaḡi vetuḡunaḡi tauri dibura numai ḡea raḡasito nai tu, apostolo tarimari asi ḡedoḡaririto. Benamo ḡeḡenoḡoito, ḡea kira-vararito, ḡekirato,

²³ “Dibura numana ḡatama bokana tu biribiri, ema ḡitaḡau tarimari maki ruḡataḡo; senaḡi ḡatama-boka baḡa rovo-fakaia nai tu, apostolo ta tu asi baḡa goitaḡoa.”

²⁴ Rubu Veāga ḡitataḡona tarimana baregona e Rubu Veāga vereri baregori na mo guruḡa ḡeseḡaḡiato nai tu, ḡeiauvoiauvo-rakavato, asi ribari mo veḡa anina tu kara.

²⁵ Gedaradarato-ḡoi nuḡanai tu, tarima ta eraka-toḡato, benamo ekirarito, ekirato, “Ḡoseḡaḡi! Dibura numai ḡobiri-ḡaurito tarimari tu Rubu Veāgai ḡeruḡa-taḡoni, ma tarimarima ḡevaḡa-ribarini.”

²⁶ Benamo Rubu Veāga ḡitaḡauna tarimana baregona ma ḡena mero ḡesi apostolo tarimari ḡea ḡori-ḡenoḡoirito. Asi ḡevei-guguraḡirito, korana tarimarima na fore na beḡe ḡidararini garina.

²⁷ Ḡeḡori-toḡarito, kanisoro ḡoiranai ḡevaḡa-ruḡarito, benamo Rubu Veāga verena baregona na edanaḡirito, ekirato,

²⁸ “Ḡai na guruḡa gwaḡiḡina ḡavinimito, mai tarima aranai asi boḡono vevaḡa-riba, senaḡi ḡoḡitaia, ḡomi na kara boḡo veia! Gomi ḡemi vevaḡa-riba boḡo vaḡa-rega rovorovoa, benamo Ierusalem mabarana varau beḡaua, ema ḡomi ḡourani ḡia ḡena mase tu ḡai baḡana daḡa.”

²⁹ Petero e apostolo kotari ḡevaḡa-veseto, ḡekirato, “Ḡai tu Barau ḡena ura baḡa korana-iaḡiani, dia tarimarima ḡeri ura.

³⁰ Iesu tu ḡomi na satauro tuḡunai goikoko-kauato nai, ḡovaḡi-maseato, senaḡi ḡita tamara ḡeri Barau na ma evaḡa-varigiḡi ḡenoḡoiato.

³¹ Barau na eḡabi-vaiaḡito, ḡia aroribanai evaḡa-ruḡaiato, Veḡitaḡau Verena e Vevaḡa-maḡuri Tarimanai evaḡa-iaḡoato. Isaraela tarimari bene vaḡa-vetuḡamaḡi-kureri, ema ḡeri rakava bene tuḡamaḡi-fitogari gana.

³² Ḡai tu mai dagara kiragi-foforiri tarimama. Iauka Veāga na maki maiḡeri dagara ekiraḡi-foforirini. Mo Iauka Veāga tu Barau na ḡia ḡeseḡaḡi-viniani tarimari mabarari evinirito.”

³³ Kanisoro tarimari na mai guruḡa ḡeseḡaḡiato nai tu ḡebaru-rakavato, ma ḡeri ura mo apostolo tarimari tu ḡevaḡi-maseri moḡo.

³⁴ Senaḡi ḡia fakari ai Farisea tarimana arana Gamaliel, taravatu evevaḡa-riba iaḡiato-ḡoi, ema tarimarima mabarari na ḡegubakauato-ḡoi tarimana, kanisoro nuḡari na eruḡa-vaiaḡito. Benamo ekirato, moḡeri apostolo tarimari ḡeḡori-rosiri roḡo.

³⁵ Benamo ḡia na kanisoro vegogona ekiraiato, ekirato, “Isaraela tarimami, maiḡeri tarima kamasi ḡoveiri ḡotoni ḡenai boḡono tuḡamaḡi-ginikau.

³⁶ Ḡaro kotari varau beḡe iaḡo, Teuda eruḡa-vaiaḡito, evekiragiḡito, ḡia tu tarima baregona ta, benamo tarima sinau vasivasi (400) kavana ḡia ḡesi ḡekauto. Senaḡi ḡia ḡevaḡi-maseato nai tu, ḡena tarimarima mabarari ḡeraga-rovorovoto; mo doḡoro toma tu asiḡina maia.

³⁷ Moḡa murinai tu Iudas, Galilea tauna, tarimarima arari toretoreri o sensisi ḡabiḡabina ḡarori ai efororito, ḡia maki ḡutuma-bara eḡori-kaurito, senaḡina ḡia maki ḡevaḡiato nai, ḡena tarimarima tu ḡeraga-rovorovoto.

³⁸ Moḡa lorinai initoma veḡanai, au na akiramini, mai tarima ḡoraga-kwaneri, ema ḡeri ai kara ta asi boḡono veia. Korana bema ḡeri boioḡa e ḡauvei maiḡeri tarimarima ḡerina eiaḡomani nai tu berekwa-rekwani.

³⁹ Senaḡi bema mai tu Barau ḡenana eiaḡomani nai tu, ḡomi na maiḡeri tarima tu asi ilaila boḡo kourini bene. Asi namo Barau boḡo vetari-viniani!”

Kanisoro na Gamaliel ḡeseḡaḡi-viniato.

⁴⁰ Benamo apostolo ma ḡekea-toḡarito, ḡekwaririto, benamo ḡekirarito, Iesu aranai asiḡina ḡinavaḡi ma beḡene vevaḡa-riba ḡenoḡoi; benamo ḡetuḡu-rakarito.

⁴¹ Apostolo na kanisoro vegogona ḡeraga-kwaneato ma iakuri ḡesi, korana Barau na eḡabi-hidrito, ḡia tu ilaila Iesu aranai maiaka beḡe ḡabiani bene.

⁴² Benamo ḡaro vanaḡivanagi ai Rubu Veāgai e tarimarima ḡeri numa nuḡari ai Vari Namona ḡevevaḡa-ribato-ḡoi e ḡeḡobata-iaḡiato-ḡoi, ḡekirato-ḡoi, Iesu tu Keriso.

6

Vevaġa-kava tarimari imaima ruarua (7)

¹ Moġeri ġaro ai Iesu ġekorana-iaġiato-ġoi tarimari tu ġeġutuma-iaġoto-ġoi. Ma Iuda tarimari, Griġ garo ai ġeguruġato-ġoi tarimari, e Heberu garo ai ġeguruġato-ġoi tarimari fakari ai veġareveġare eġorato. Griġ garo ai ġeguruġato-ġoi tarimari ġekirato, ġia ġeri vabu tu ġaro tata ġaniġani ġevareto-ġoi nai tu ġevaġa-raburito-ġoi.

² Moġa lorinai apostolo gabanana ruarua (12) na Iesu ġekorana-iaġiato-ġoi tarimari mabarari ġekea-veġogorito, benamo ġekirato, “Ġai na ġaniġani varevarena uranai, Barau ġena guruġa asi baġa vari-fiuani tu asi maoro.

³ Moġa lorinai, tarikakagu mabarami, ġomi vefakami ai tau imaima ruarua (7) ġoġabi-virigiri, variri namo tarimari, Iauka Veaġa na e iaunega na ġevonuto tarimari; benamo mai ġauvei ġia baġana vini-vanaġiri.

⁴ A ġai taugema ġema taimi mabarana tu ġaugau e ġobatai baġana torea.”

⁵ Apostolo tarimari ġeri boioġa ġia mabarari na ġeiau-iaġiato. Benamo ġia na mai tau maiġeri ġeġabirito: Stefano, veġabidadama na e Iauka Veaġa na evonuto tarimana; e Filipo; Prokoru; Nikanoro; Timon; Pamena; e Nikolas, Antioka tarimana senaġi Iuda tarimari ġeri toma-rakarigo ekorana-iaġiato-ġoi.

⁶ Ġia na mai tau maiġeri apostolo ġoirari ai ġevaġa-ruġarito, benamo apostolo na ġia iatari ai ġeġurigurito ema apostolo ġimari ġia iatari ai ġetore-kaurito.

⁷ Benamo Barau ġena guruġa eraga-rovorovoto. Ema Iesu korana-iaġina tarimari Ierusalem ai ġevovoka-ġarimoġito, ema Rubu Veaġa vereri ġutuma gorogoro na maki Barau ġena guruġa ġeġabi-raġeato, benamo ġeveġabidadamato.

Stefano ġeġabi-tariato

⁸ Stefano tu Barau ġena varevare-bara e seġuka na evonuto tarimana, ġia na nuġa-farevaġi veigari boruri baregori tarimarima ġoirari ai eveirito-ġoi.

⁹ Senaġi vekira-fitoġa barego evarigisito. Iuda tarimari ġeri rubu doġorona ta ġekiraġirito-ġoi “Ruġavaġi tarimari”. Ġia ema Iuda tarimari, Kurene e Alesandria na ema Kilikia e Asia tanobara na ġeiaġomato tarimari, Stefano ġesi ġeveġare-veġareto.

¹⁰ Senaġi Stefano ġena guruġa tu asi ġelautariato-ġoi, korana ġia tu Iauka Veaġa na eviniato-ġoi iauneganai eguruġato-ġoi.

¹¹ Benamo ġia na tarima kotari nuġari ġeġanirito beġene kira, “Ġai na Stefano ġaseġaġiato, ġia na Mose e Barau ekira-fitogarito.”

¹² Mo dabarai ġia na tarimarima, e Iuda vereri, ema taravatu ġevevaġa-riba iaġiato-ġoi tarimari ġekira-vaisivaisirito. Ġia Stefano ġenai ġeiauġoto, ġea ġabi-tariato, benamo Iuda ġeri kanisoro ġoirana ġana ġeġori-iaġoato.

¹³ Monai beġene ġofaġofa ġana vevaġa-bade tarimari kotari ġeġori-toġarito, benamo ġekirato, “Mai tarima na tu ġaro mabarari ai ġita ġera Rubu Veaġana e Mose ġena taravatu ekira-fitogarini.

¹⁴ Ġai na ġaseġaġiato, ekirato, ‘Iesu, Nasareta tarimana, na mai Rubu Veaġana bevaġa-rakavaiani, ema Mose na evinirato veigari mabarari bevaġa-iraurini.’”

¹⁵ Kanisoro ai ġeveġogo-taġoto-ġoi tarimari mabarari na Stefano ġeġita-karakaraiato, ema ġoirana ġeġitaiato tu noġa moġo aneru ta ġoirana.

7

Stefano ġena ġobata

¹ Benamo Rubu Veaġa verena baregona na Stefano edanaġiato, ekirato, “Maiġeri guruġa tu moġoni ba?”

² Stefano na evaġa-veserito, ekirato, “Tarikakagu e tamagu mabarami, au ġoseġaġigu! Ġita senera Aberhamo Haran vanuġanai roġosi roġo berea tanu nai, mareva barego Barauna ġia ġenai eforito Mesopotamia ai,

³ benamo ġia ekiraiato, ekirato, ‘Ġemu bese e tanobara noiaġuia, benamo au na bavaġa-ġitamuni tanobarana ġana bono iaġo.’

⁴ Benamo ġia na Kaldea tanobarana eraga-kwaneato, benamo Haran ai ea vanuġato. Ma tamana emaseto murinai, Barau na etuġu-iaġomaiato inította ġotanua-iaġiani tanobarana ġana.

⁵ A Barau na Aberhamo tu ġena tano misina kota maki asi eviniato. Kwaku vaġa-ruġatarina gabuna ilailanai misina kota maki asi eviniato. Senaġi Barau eguruġa-toreto ġia na tano ta beviniani, ġia e ġia murina na beġe ġorani tarimari na tano ta beġe ġaunaiani ġia ġeri. Mo ġaro ai Aberhamo tu asi natuna.

⁶ Barau na ma evaḡa-guruḡaiato, ekirato, ‘Ġoi ḡemuna beḡe ḡorani beseri tu tano boruna tai beḡe tanuni. Ma laḡani sinau vasivasi (40) mo gabu tarimari ḡeri vetuḡunaḡi tarimari ai beḡe vaḡa-iaḡorini e beḡe vaḡa-midigu midigurini.’

⁷ Barau ma ekirato, ‘Isaraela tarimari na vetuḡunaḡiri ḡeiaḡo-vinini beseri tu au na havevaḡa-maoro vinirini, moḡa murinai ḡia tu mo tano na beḡe raka-rosini, mai gabu ai au beḡema toma-rakarigo viniguni.’

⁸ Benamo Barau na Aberahamo kefi-lamavaḡi veiḡana eviniato, mo tu ḡia ḡena kiraḡitore vetoḡana. Benamo Aberahamo na Isako evaḡa-ḡoraiato, ma ḡaro vaḡa-imaima toitoina (8) murinai tauḡanina kefina elama-vaḡiato. Moḡa murinai Isako na Iakobo evaḡa-ḡoraiato, ma Iakobo na ḡera doḡoro ḡedebarini tarimari gabanana ruarua (12) evaḡa-ḡorarito.

⁹ Doḡoro debari tarimari Iosefa ḡenai ḡemamato, benamo Aigupito tarimari ḡeri ai ḡevoivoi-iaḡiato. Senaḡina Barau tu Iosefa ḡesi,

¹⁰ ema ḡena dabara doko mabarari ḡerina evaḡa-maḡuriato. Barau na Iosefa iaunega eviniato, ema Pharao, Aigupito verena, nuḡana evaḡa-namoato Iosefa ḡenai, benamo Pharao na eura-viniato ema seḡuka eviniato, Aigupito tanona ema ḡia ḡena numa tarimari e farefareri bene ḡita-ḡauri.

¹¹ Benamo Aigupito tanona mabarana ema Kanana tanona mabaranai doḡe ḡeḡorato, monana vito e nanu mase baregona evaḡa-ḡoraiato, benamo ḡita senera tu asi ḡeri ḡaniḡani doḡari dabarana.

¹² Senaḡina Iakobo esegaḡito Aigupito tu ma widina, benamo ḡia na ḡita senera etuḡu-iaḡorito, mo tu ḡia ḡeri iaḡoiaḡo giniguinena.

¹³ Ma ḡeri iaḡoiaḡo vaḡa-ruaruanai Iosefa tauḡena kakana e tarina ekira-vararito ḡia tu deikara, benamo Pharao na Iosefa ḡena bese eribaiato.

¹⁴ Moḡa murinai Iosefa evetuḡuto, tamana Iakobo ma ḡena bese ḡeri ai Aigupito ḡana beḡene iaḡoma ḡana. Iakobo besena Kananai tu mabarana gabana imaima ma gabana ruarua imaima (75).

¹⁵ Benamo Iakobo Aigupito ḡana evarigoto, monai ḡia e ḡita senera ḡemaseto.

¹⁶ ḡia tauḡaniri tu Sekem ḡana ḡeḡwa-ḡenoḡoi iaḡorito, benamo monai ḡea guririto. Mo gara gabuna tu Aberahamo na Hamora naturi ḡerina moni na evoiato.

¹⁷ Barau na ḡena kiraḡitore Aberahamo ḡenai bevaḡa-moḡoniani ḡarona ekavinagito-ḡoi nai tu, ḡita ḡera tarimarima Aigupito ai ḡeḡutuma-gorogoroto.

¹⁸ Ma moḡa murinai tu vere ta na Aigupito eḡita-ḡauato. Mo vere moḡa tu asi ribana Iosefa.

¹⁹ ḡia na ḡita senera eḡofarito-ḡoi e evaḡa-midigu midigurito-ḡoi, ema ekirarito-ḡoi, naturi raraka-rarakari ḡeri numa na beḡene tore-rosiri, beḡene mase ḡana.

²⁰ Mo negai Mose emaḡurito. Ma Mose eḡorato nai, marevana tu namo vedaurea. Ma ḡia tu ḡue toitoi tamana ḡena numai ḡenariato,

²¹ benamo numa na ḡetore-rosiato nai tu, Pharao natuna ḡuiatona na eḡabiato, benamo natunai evaḡa-iaḡoato.

²² Mose tu Aigupito ḡeri riba e iaunega mabarana ḡevaḡa-ribaiato, ema ḡena guruḡa e veiḡa ma seḡukari tarimanai eiaḡoto.

²³ Ma ḡena maḡuri laḡanina gabana vasivasi (40) eḡabiato, benamo karona Isaraela tarimari nea raka-ḡitari etato.

²⁴ ḡia na Aigupito tarimana ta eḡitaato, Isaraela tarimana ekwariato-ḡoi, benamo ḡia eiaḡoto gogobana eragato, benamo mo Aigupito tarimana evaḡi-maseato.

²⁵ Mose matoru ekirato tu ḡena tarimarima beḡe tuḡamaḡi-fakani, ḡia ḡenana Barau na Isaraela tarimari bevaḡa-maḡuririni, senaḡi moḡa Isaraela tarimari na tu asi ḡeriba-maoroato.

²⁶ Ma elaḡanito nai, ḡia na Isaraela tarimari ruarua eḡitarito ḡevevaḡito-ḡoi, benamo nevaḡa-mainori ḡana ekirarito, ekirato, ‘Ḡomi tau ruarua, goseḡaḡi, ḡomi tu tarikaka moḡo ruarua, ma kara dainai tu taumi ruarua ḡovevaḡini?’

²⁷ Senaḡi vevaḡi ekoraiato tarimana na Mose edori-veḡitaato, benamo ekirato, ‘Ḡoi tu deikara na ḡai ḡema vere ema toto-iobukaiobuka tarimanai evaḡa-iaḡomuto?’

²⁸ Ḡoi ourani tu ḡoraḡani Aigupito tarimana ovagi-maseato kavana au novaḡi-masegu otoni?’

²⁹ Mose na mo guruḡa esegaḡiato, benamo eraga-kwareḡato, Midian ḡana egari-rakato. Monai etanuto-ḡoi nuḡanai natuna ruarua ḡemaḡurito.

³⁰ Laḡani gabana vasivasi (40) ḡekorito murinai, aneru ta tano fakanai Sinai Ḡorona sevinai Mose ḡenai efororito. Mo aneru tu ḡau ruguruguna ḡenai karava morenai eiaḡoto, benamo Mose ḡenai efororito.

³¹ Mose na moĝa eĝitaĭato nai, eĝabato; benamo nea ĝita-ginikaua ĝana eraka-kavinagi iaĝoto-ĝoi nuĝanai. Vereĝauka garona eseĝaĝiato, maiĝesi ekirato,

³² ‘Au tu ĝoi senemu Aberhamo, Isako, e Iakobo ĝeri Barau.’ Mose egari-rakavato, benamo asi eurato ma bene boĝe-iaĝo ĝenoĝoi.

³³ Barau na evaĝa-guruĝaĭato, ekirato, ‘Ĝemu tamaka kwakumu na novei-vaĝiri, korana mani oruĝa-taĝoni gabuna tu tano veaĝana.

³⁴ Moĝoni, au ĝegu tarimarima Aigupito ai ĝevaĝa-midigu midigurini tu baĝitari ema ĝeri midigumidigu ĝabana guruna baseĝaĝiri nai, au bamarigo tu navaĝa-maĝuriri ĝana. Toma noiaĝoma, au na ĝoi tu Aigupito ĝana atuĝu-ĝenoĝoimuni.’

³⁵ Mai Mose tu Isaraela tarimari na ĝeruĝaĭato tarimana. Maiĝesi ĝekirato, ‘Ĝoi tu deikara na ĝai ĝema vere e toto-iobukaiobuka tarimanai evaĝa-iaĝomuto?’ Mai tarima sebona moĝo tu Barau na etuĝuato bene vere e bene vevaĝa-maĝuri. Ema ĝia na maki ĝau rugurugunai karava moreri ai efororito aneruna ĝenana evaĝa-kavaĭato.

³⁶ Ĝia na Isaraela tarimari Aigupito na eĝori-rosirato nai, nuĝa-farevaĝi veĝiri e vetoga boruri eveirito-ĝoi, Aigupito nuĝanai e Davara Kakakakanai ema tanobara fakanai laĝani gabana vasivasi (40).

³⁷ Mai Mose sebona na Isaraela tarimari ekirarito, ekirato, ‘Barau na ĝemi peroveta tarimana ta betuĝuani, au etuĝuguto kavana. Mo peroveta tu ĝomi ĝemi tarimarima ta.’

³⁸ Ĝia tu Isaraela tarimari ĝeri vegogo nuĝanai tano fakanai ĝita senera ema Sinai Ĝoronai evaĝa-guruĝaĭato aneruna ĝesi monai. Ĝia na Barau ĝena maĝuri guruĝana Barau ĝenana eĝabiato, ĝita ma bene vaĝa-ribara ĝana.

³⁹ Senaĝina ĝita senera asi ĝeurato ĝena guruĝa beĝene ĝabi-raĝea, ema ĝia ĝekira-fitoĝaĭato ema nuĝari ai ĝeri ura tu Aigupito ĝana ma ĝeĝenoĝoi.

⁴⁰ Ĝia na Arona ĝekiraĭato, ĝekirato, ‘Ĝita ĝera barau tari noveiri, ĝita ĝoirarai beĝene raka ĝana. Korana mai Mose ĝita Aigupito na eĝori-rosirato tarimana tu ĝita asi ribara kamasi ta bevei bene.’

⁴¹ Mo ĝaro ai ĝia na boromakau natuna kavana kwaivakukuna ĝeveĭato. Benamo mo kwaivakuku ĝoiranai ginitaĝo dagarari ĝea toreto ema ĝeĝani-verekoto. Tauĝeri ĝimari na ĝeveĭato dagarana ĝeverere-viniato.

⁴² Benamo Barau eraka-veĝitato, ma Isaraela tarimari evini-iaĝorito, guba visiĝuri beĝene toma-rakariĝo viniri ĝana. Mo tu peroveta tarimari ĝeri bukai ĝetoreato ilailanai, ekirani,

‘Isaraela tarimami! Laĝani gabana vasivasi (40) tano fakanai ĝovaĝirito-ĝoi mamoori, boromakauri, e ginitaĝo dagarari tu dia au ĝegu.

⁴³ Mo tu kwaivakuku barauna Molok ĝena farai rubuna, ema ĝemi barau Refan ĝena visiĝu iouiouna ĝoĝwaiato-ĝoi; moĝeri kwaivakuku tu ĝomi na ĝoveirito, boĝono toma-rakariĝo viniri ĝana.

Moĝa lorinai au na ĝomi batuĝu-rakamini Babulona mo rekena ĝana.’

⁴⁴ Ĝita senera tanobara fakanai ĝetanuto-ĝoi nai tu, farai rubuna maki ĝia ĝesi. Mo farai rubuna Barau na ĝena guruĝa moĝoniri evaĝa-foforirito-ĝoi. Mo farai rubuna ĝeragaĭato tu Barau na Mose ekira-varaĭato lorinai, ema Mose na farai rubuna vetoĝana eĝitaĭato ilailanai moĝo ĝeveĭato.

⁴⁵ Moĝa murinai ĝita senera na mo farai rubuna tamari ĝerina ĝeĝabiato, benamo Iosefa ĝena veĝorikau neganai ĝeĝwakau-iaĝoato irau bese tarimari tu ĝita senera ĝoirari ai Barau na ĝeri tano na elai-veĝitarito. Mo farai rubuna monai etanuto mo, Davida ĝena nega.

⁴⁶ Davida na Barau ĝena vevaĝa-namo eĝabiato, ema enoĝinoĝito, monai Iakobo ĝena Barau ĝena tanu numana bene ragaia etato.

⁴⁷ Senaĝina Solomona na vau ĝena numa eragaĭato.

⁴⁸ Senaĝi Iaru-korokoro Barauna tu tarimarima ĝimari na ĝeragarini numari ai tu asi etanuni, peroveta tarimana ekirani kavana,

⁴⁹ ‘Vereĝauka ekirani,

“Guba tu au ĝegu terona,

ema tanobara tu au kwakugu vaĝa-ruĝatarina gabuna.

Be, au ĝegu numa tu kamasi-kamasi na boĝo ragaiani?

Au ĝegu iaĝaraĝi gabuna tu aiĝa?

⁵⁰ Maiĝeri dagara mabarari

au ĝimagu na asi aveirito, ei?’

⁵¹ Stefano ma eguruĝato, ekirato, “Kira-ĝuiragi tarimami! Ĝomi nuĝami e seĝami tu Barau asi ĝeura-viniani tarimari kavari. Ĝomi tu senemi ĝeveito-ĝoi kavari ĝoveini, vanaĝivanaĝi lauka Veaĝa ĝolai-veĝitaiani!

⁵² Kamara peroveta tu ġomi senemi na asi ġevaġa-midigu midiguato? Ġia na tu Vei-iobukaiobuka Tarimana ġena iaġoma ġekiraġi-fofori guineato tarimari tu ġevaġi-maserito. Ma toma ġomi na tu Iesu boġo revaia e boġo vaġi-debaia.

⁵³ Barau ġena taravatu aneru na ġeġwa-mariġoato tu ġomi na ġoġabiato, senaġina asi ġokorana-iaġiato.”

Stefano forena ġeġidara-maseato

⁵⁴ Ġia na mo guruġa ġeseġaġiato nai, ġebaru-rakavato, gadikari maki ġeġara-taririto Stefano ġenai.

⁵⁵ Senaġi Stefano tu Iauka Veaġa na evaġa-vonuato, egaga-raġeto guba ġana, benamo gubai Barau marevana baregona eġitaiao, ema Iesu eġitaiao Barau aroribanai ruġataġo.

⁵⁶ Benamo ekirato, “Ġoboġe! Guba bevekeo-faka aġitaiani, ema Tarimarima Natuna tu Barau aroribanai eruġa-taġoni!”

⁵⁷ Mo guruġa ġeseġaġiato nai tu, ġimari na seġari ġekou-ġaurito vau ġefararato. Benamo mabarari vaġa-sebo ġia ġeraga-viniato,

⁵⁸ ġeġabiato, benamo siti murina ġana ġeinu-rosiato, benamo fore na ġeġidaraiao. Ma vaġa-moġoni tarimari ġeri dabuġa tu futua ta arana Saulo, ġia kwakuna koranai ġetorerito.

⁵⁹ Ġeġidaraiao-ġoi nuġanai, Stefano eġurigurito, ekirato, “Iesu Vereġauka o, au iaukagu noġabi-raġea.”

⁶⁰ Evetui-tarito, benamo ma taġina ġesi ekea-raġeto, ekirato, “Vereġauka o, ġeri veiġa rakavana maiġa voina asi bono viniri.” Moġesi eguruġato, benamo emaseto.

8

¹ Saulo na Stefano vaġimasena tu eġabi-raġeato.

Ekalesia vaġa-midigumidiguna e lai-lautilusina evesinato

Mo ġaro ai Ierusalemna nuġanai ekalesia vaġa-midigumidiguna e lai-lautilusina baregona evesinato. Veġabidadama tarimari mabarari ġeraga-rovorovoto, Iudea e Samaria tanori mabarari ġana ġeiaġoto, senaġi apostolo tarimari ġereġari moġo ġeraga-kwanerito.

² Barau korana-iaġina tarimari kotari na Stefano taġina ġevei-rakavato e ma taġiri ġesi ġekeuato, benamo ġea guriao.

³ Senaġina Saulo na tu ekalesia nevaġa-rakava korikoria etato. Numa tata nuġari ai eraka-toġato-ġoi, benamo veġabidadama tauri e vavineri einu-rosirito-ġoi, ma eġabi-iaġorito-ġoi dibura numai ea biri-ġaurito.

Filipo Samaria ai eġobatato

⁴ Ġevaġa-karovorito tarimari tu ġeiaġoto gaburi ai Barau ġena guruġa ġea ġobata-iaġiato.

⁵ Filipino tu Samaria vanuġana baregona ġana eiaġoto, monai Keriso varina ea fiuato.

⁶ Ġutuma na Filipino ġena guruġa ġeseġaġiato ema nuġa-farevaġi veiġari eveirito ġeġitarito nai, ġia mabarari na ġeseġaġi-vini magomagoato.

⁷ Iauka rakavari tarimarima ġutuma ġerina ma ġabari ġesi ġeraka-vaġito, ema tauġaniri tavi tari ġemaseto tarimari e kwaku rakava tarimari ġutuma ġenamoto.

⁸ Moġa lorinai mo Samaria vanuġana nuġanai iaku baregona eġorato.

⁹ Mo vanuġai tarima ta etanuto-ġoi arana tu Simona. Guinenai ġena meġameġa e ġora veiġari na Samaria tarimari evaġa-ġaba rakavarito-ġoi. Tauġena evekiraġito-ġoi, ġia tu varaġe rakava,

¹⁰ ema tarimarima mabarari mo vanuġa nuġanai misina na beiġo mo baregona na ġeseġaġi-viniato-ġoi, ema ġekirato-ġoi, “Mai tarima tu mo Barau ġenana eiaġomato seġukana ġekiraġiani ‘Seġuka Baregona’.”

¹¹ Ġia ġeseġaġi-viniato, korana ġaro barego vedaurea ġia ġena meġameġa veiġari na evaġa-ġabarito.

¹² Senaġi Filipino na Barau ġena Basileia, (ġena veġitaġau seġukana evaġa-ruġaiiani maiġa), Varina Namona e Iesu Keriso arana varina eġobata-vinirito nai, tau e vavine na ġevaġa-moġoniato, benamo ebatisorito.

¹³ Simona na maki evaġa-moġoniato, benamo babatiso eġabiato. Moġa murinai Simona na Filipino ekaferi-kaferiato, ma Filipino na seġuka veiġari baregori e vetoġa boruri eveirito-ġoi nai, eġaba-rakavato.

¹⁴ Apostolo tarimari Ierusalemaj ġetanuto-ġoi ġeseġaġito, Samaria tarimari na tu varau Barau ġena guruġa ġeġabi-raġeato, benamo Petero e Ioane ġetuġu-iaġorito Samaria ġana.

¹⁵ Tauri ruarua ġeraġasito nai tu, veġabidadama tarimari iatari ai ġeġauġauto, Iauka Veaġa beġena ġabia ġana.

¹⁶ Korana Iauka Veāga ġia ta iatari ai tu roġosi roġo bere raka-riġo. Ġia tu Iesu Vereġauka aranai moġo babatiso ġeġabiato.

¹⁷ Petero e Ioane ġimari ġia iatari ai ġeveġabikauto, benamo ġia na Iauka Veāga ġeġabiato.

¹⁸ Simona na apostolo tarimari eġitarito, ġimari ġetore-kaurito vau Iauka Veāga ġeġabiato, benamo ġia na moni Petero e Ioane eduġi-vinirito, ekirato,

¹⁹ “Au maki mani seguka ġovinigu, be ġimagu ta iatanai bana tore-kaua nai, Iauka Veāga bene ġabia.”

²⁰ Senaġi Petero na ekiraiato, ekirato, “Ġoi ma ġemu moni ġesi karava gabuna ġana ġoiāġo, korana otuġamaġini Barau ġena varevare tu moni na bovoiani!

²¹ Mai ġauvei ai ġoi tu asi ġemu gabu, korana nuġamu tu asi rorogoto Barau ġoiranai.

²² Mai ġemu ura rakavana ġenana novetuġamaġi-kure, benamo Vereġauka nonoġia, betaġu ġia na manġesi tuġamaġi ġeġevana oġabiani nuġamu ai manġa betuġamaġi-fitoġaiani.

²³ Korana aġitamuni, ġoi tu nuġa-ġirimaġirima na ovonuto, ema rakava na ebaru-bubuġaumuto.”

²⁴ Benamo Simona na Petero evaġa-veaseato, ekirato, “Mani ġemi veiġa, au iatagu ai Vereġauka nonoġia, be mani bokiraġiri dagarari ta au ġegu ai asi bene ġora.”

²⁵ Petero e Ioane na Vereġauka ġena guruġa ġekiraġi-foforiato e ġevari-fiutato murinai, Ierusalemna ġana ġeġenoġoito. Ġeri ġenoġoi ai Samaria vanuġari vovokari Vari Namona ġeġobata-iaġiato.

Filipo e Itiopia tarimana baregona

²⁶ Vereġauka ġena aneru ta na Filipino evaġa-guruġaiato, ekirato, “Novariġisi, gabina (o south) rekena ġana noiaġo, bono iaġo mo, Ierusalemna na Gasa ġana ġeiaġoni dabarana ġana. Mo tu tano fakana dabarana, tarima ta asi etanuni.”

²⁷ Benamo evariġisito, eiaġoto. Eiaġoto-ġoi nuġanai, Itiopia tarimana ta, daġi baregona tarimana, tu ġena vanuġa ġana eġenoġoito-ġoi. Ġia tu Itiopia ġitaġauna vavinena baregona ġena farefare eġitaġaurito-ġoi tarimana baregona. Ġia tu eunuko, (seuri ġefararito tarimana). Ġia Ierusalemna ġana eiaġoto tu, Barau benea toma-rakariġo vinia ġana.

²⁸ Ġena ġenoġoi ai kariota iatanai etanukauto vau, Isaia peroveta tarimana ġena buka eiavi-iaġoato-ġoi.

²⁹ Benamo Iauka Veāga na Filipino evaġa-guruġaiato, ekirato, “Noiaġo, mo kariota sevina i bonoa raka.”

³⁰ Benamo Filipino kariota sevina ġana eraga-iaġoto, benamo mo tarima eseġaġiato, Isaia peroveta tarimana ġena buka eiaviato-ġoi. Benamo ekirato, “Mani guruġa oiaviani anina na ribamu ba?”

³¹ Ġia evaġa-veseto, ekirato, “Au tu kamasi baribani. Mai tu tarima ta na bekira-varaguni vau bariba-maoroni.” Benamo Filipino ekiraiato, ekirato, “Kariotai noma raġekau, be sevigu ai noma tanu.”

³² Ġia na buka nuġanai eiaviato-ġoi toretorena tu maġa, “Ġia tu mamoe kavana ġeġori-iaġoato, beġene vaġi-masea ġana; ema ġia tu mamoe natuna kavana ġuiri ġefakosi-vaġirini nai tu, mururi asi ġekeorini, moġesina kavana ġia maki muruna asi ekeoato.

³³ Ġetore-riġoato e ġena Kota dabarana ġekouato.

Ġena bese tarimari tu

dei na bekiraġirini?

Korana ġena maġuri tanobarai tu bema kori.”

³⁴ Eunuko tauna na Filipino enoġiato, ekirato, “Nokira-varagu, mai peroveta tarimana na tu deikara moġesi ekiraġiato? Ġia tauġena evekiraġito ba ta ekiraġiato?”

³⁵ Benamo Filipino na mo toretore ġenana ġena guruġa esinaiato, ema Iesu Varina Namona evaġa-ribaato.

³⁶ Mo dabara na ġeiaġoto nuġanai, nanu gabuna tai ġeraġasito. Benamo mo eunuko tauna na Filipino ekiraiato, ekirato, “Noboġe, nanu tu maġa, kara na au babatisogu elau-ġauni?” [³⁷ Benamo Filipino ekirato, “Bema nuġamu mabarana ġesi ovaġa-moġoniani nai tu ba-babatisomuni.” Ġia evaġa-veseto, ekirato, “Oi, nuġagu mabarana ġesi avaga-moġoniani Iesu Keriso tu Barau Natuna.”]

³⁸ Benamo ġena draiva ekiraiato, kariota nevaġa-ruġataria, benamo kariota eruġatarito. Filipino e eunuko tauri ruarua nanu ai ġeraka-riġoto, benamo Filipino na eunuko tarimana ebabatisoato.

³⁹ Tauri ruarua nanu na ġeraġekauto-ġoi nai, Vereġauka Iaukana na Filipo tu eġabi-veġitaiato. Eunuko tarimana na asi ma eġitaiato, senaġi ġena iaġoiaġo dabara na eiaġoto-ġoi roġo ma iakuna ġesi.

⁴⁰ Filipo tu Asoto ai ma ea foroforo. Monai vanuġa mabarari ġari eiaġoto, Vari Namona ea ġobata-iaġiato-ġoi, eiaġoto mo Kaisarea ai eraġasito.

9

Saulo evetuġamaġi-kureto

¹ Saulo roġo Vereġauka ġekorana-iaġiato-ġoi tarimari vaġa-rakavari e vaġi-maseri guruġari evei-gwadato-ġoi ma baruna ġesi. Benamo eiaġoto Rubu Veaġa verena baregona ġenai,

² enoġiato, vevaġa-riba fefana bene torea, Damaseko ai Iuda tarimari ġeri rubu bene viniri ġana. Be, Iesu ġekorana-iaġiani tauri e vavineri monai bene dogariri nai tu bene barubaruri, benamo Ierusalemata ġana bene ġori-ġenoġoi iaġomari.

³ Benamo Saulo na Ierusalemata eiaġiato ma Damaseko ġana eiaġoto. Damaseko vanuġa ekaviniaġiato nuġanai, asikauna mama ta guba na emoreto, ġia enanagi-tariato.

⁴ Benamo ġia tano ai eketo-tarito, ma garo ta eseġaġiato, ekirato, "Saulo, Saulo! Kara dainai au ovaġa-midigu midiguguni e olaiguni?"

⁵ Ġia evedanaġito, ekirato, "Vereġauka, ġoi tu deikara ei?"

Mo garo evaġa-veseto, ekirato, "Au tu Iesu, ġoi na au ovaġa-rakavaguni tarimagu.

⁶ Senaġi novariġisi, vanuġa baregonai noa raka-toġa, monai vau tarima ta na bekiramuni kara ma bono vei."

⁷ Ġia ġekavaiato tarimari mabarari ġeruġa-tarito, asi ġeguruġato, korana garo tu ġeseġaġiato, a tarimana tu asi ġeġitaiato.

⁸ Saulo tano na evariġisito, matana eiaġaiato nai tu, dagara ta asi eġitaiato. Benamo karonna na ġimantai ġeġabito, Damaseko ġana ġeġori-iaġoato.

⁹ Ġaro toitoi veġata matana ebubuto asi eboġeboġeto, ema asi eġaniġanito e nanu o dagara ta asi eniuato.

¹⁰ Damaseko ai Iesu ekorana-iaġiato-ġoi tarimana ta arana Anania, mata-vanaġi ai Vereġauka na evaġa-guruġaiato, ekirato, "Anania!" Ġia evaġa-veseto, ekirato, "Ou! Vereġauka, au maiġegu."

¹¹ Vereġauka na evaġa-guruġaiato, ekirato, "Novariġisi, be dabara ta arana Roroġoto Dabarana na noiaġo. Bono iaġo Iudas ġena numa nuġanai, Taso tarimana ta arana Saulo bonoo vedanaġi-iaġia, korana ġia tu monai moġa eġuri-ġurini.

¹² Ġia na mata-vanaġi ai tarima ta arana Anania beġitaia, beraka-toġa, ġimana ġia iatanai betore-kauri, matana bene fafa ġana."

¹³ Anania evaġa-veseto, ekirato, "Vereġauka, tarima ġutuma na ġegu ġekiraġito, mai tau na Ierusalematai ġoi ġemu tarimarima veaġari tu veiga rakava kwaikwairi evei-vinirini.

¹⁴ Ema Damaseko ġana beiaġoma tu Rubu Veaġa vereri baregori na maoro ġeviniato, ġoi aramu ġevava-raġeani tarimari mabarari bene barubaruri e dibura numai bene toreri ġana."

¹⁵ Senaġina Vereġauka na ekiraiato, ekirato, "Noiaġo, korana mai tau tu au na varau aġabi-viriġiato, bese iraurau tarimari e tanobara vereri baregori ema Isaraela tarimari goirari ai au aragu bene kiragġia ġana.

¹⁶ Ema au na bavaġa-ġitaiani, ġia au aragu bakunai tu midigumidigu vovoka roġo begabini."

¹⁷ Benamo Anania eiaġoto, numai eraka-toġato, ema ġimana Saulo iatanai etore-kauato. Benamo ekirato, "Saulo tarikakagu, Vereġauka Iesu, ġia tu maiġana oiagomato-ġoi nai dabara tumanai ġemu ai eforoforo tarimana. Ġia na betuġugu, korana matamu ma bene fafa ema Iauka Veaġa na ġoi bene vaġa-vonumu ġana."

¹⁸ Asikauna dagara ta maġani-kone ġunari noġa matana na eketo-vaġito, benamo ma eboġeboġe-ġenoġoito. Moġa murinai evaisi-raġeto, benamo babatiso eġabiato.

¹⁹ Eġaniġanito murinai, tauna ma ekokore-ġenoġoito.

Saulo Damaseko ai eġobatato

Ma Saulo Damaseko ai tu ġaro kotari roġo ma etanuto, Iesu ġekorana-iaġiato-ġoi tarimari ġesi.

²⁰ Ġia asikauna rubu ġana eiaġoto, Iesu ea ġobata-iaġiato, ekirato, "Iesu tu Barau Natuna."

²¹ Saulo ġeseġaġiato tarimari mabarari nuġari ġefarevaġito, benamo ġekirato, "Mai tarima tu Iesu arana ġekiraġiani tarimari Ierusalematai evaġirini tarimana ene? Ema

maiġana beiaġoma tu mai veġa sebona uranai bene ġabiri, be Rubu Veaġa vereri ġeri ai bene ġori-ġenoġoi-iaġori ġana ene?"

²² Senaġi Saulo ġena ġobata seġukana tu ebaregato-ġoi. Ġena guruġai Iesu evaġa-moġoniato-ġoi, moġoni Iesu tu Keriso, (Barau na ekiraġi-toreato vevaġa-maġuri tauna). Mo guruġa Iuda tarimari Damaseko ai ġetanuto-ġoi tarimari tu asi ġeri vaġa-veve dabarana.

²³ Ġaro ġutuma ġekorito murinai, Iuda tarimari ġevegogoto, Saulo vaġi-masena dabarana ġeboioġaiato;

²⁴ senaġi kara ġeboioġaiato dagarana tu tarima tari na Saulo ġekira-varaiato, be eribaiato. Boġi-laġani vanuġa barana ġatama bokari ġeġita-ġaurito-ġoi, ġia beġene vaġia uranai.

²⁵ Senaġi boġi ta Iesu ġekorana-iaġiato-ġoi tarimari na ġeġabiato, boseġai ġeġuraiato, benamo vanuġa maġuna murikana na ġetuġu-riġoato.

Saulo Ierusalemata

²⁶ Saulo Ierusalemata ei votuto nai tu, ġena ura Iesu ġekorana-iaġiato-ġoi tarimari ġesi beġene tanu-vegogo, senaġi ġia mabarari na ġegari-viniato, korana asi ġevaġa-moġoniato-ġoi, ġia tu moġoni korikori Iesu ġena mero.

²⁷ Senaġi Banabas na ea ġoriato, apostolo tarimari ġeri ai eġori-iaġoato. Ġia na vau ġeri ekiraġito, Saulo na Vereġauka dabarai kamasi eġitaiato, ema Vereġauka na eguruġa-viniato. Ema ekira-vararito, kamasi Saulo tu Damaseko ai ma kokorena ġesi, asi eġarito, Iesu aranai eġobatato nai.

²⁸ Moġa lorinai Saulo ġia ġesi ġetanuto-ġoi ema Ierusalemata mabarana ei eġobatato-ġoi Vereġauka aranai ma kokorena ġesi.

²⁹ Griko garo ai ġeguruġato-ġoi Iuda tarimari ġesi ġeguruġato-ġoi e ġeveġare veġareto-ġoi, senaġi ġia na tu beġene vaġi-masea dabarana ġevetauato-ġoi.

³⁰ Tarikaka na mai boioġa ġeribaiato nai tu, Saulo Kaisarea ġana ġeġori-variġoato, ma monana Taso ġana ġetuġu-rakaiato.

³¹ Moġa lorinai ekalesia mabarana Iudea, Galilea, e Samaria tanori ai maino eġorato. Ekalesia ġena kokore ebaregato e Vereġauka garina ġeveito-ġoi ema Iauka Veaġa na evaġa-kavarito.

Petero Lida e Iopa ai

³² Petero gabu mabarari ġari eiaġoto, nuġanai tu Lida ġana maki evariġoto, Barau ġena tarimarima veaġari rakaġitari.

³³ Monai tarima ta arana Aenea edoġariato. Ġia kwakuna tu mase ema laġani imaima toitoi (8) veġata ġena genagena bedina na asi evariġisito.

³⁴ Benamo Petero na evaġa-guruġaiato, ekirato, "Aenea, Iesu Keriso na evaġa-namomuni. Novariġisi, ġemu genagena noiokua." Asikauna Aenea evariġisito.

³⁵ Monai ġetanuto-ġoi Lida e Saron tarimari mabarari na ġeġitaiato, benamo Vereġauka ġenai ġeraka-kureto.

³⁶ Iopai Iesu ekorana-iaġiato-ġoi vavinena ta arana Tabita etanuto-ġoi. Griko garo ai arana tu Doreka, anina tu "deer". Ġia tu veġa namori ġutuma eveito-ġoi, ema asi ġeri-ġari tarimari evaġa-kavarito-ġoi.

³⁷ Mo negai ġia tu ekeveito, benamo emaseto. Tauġanina ġeguriato, benamo numa tuġunai daiġutu tai ġea toreato.

³⁸ Iopa e Lida fakari tu asi manaġa. Be Iesu ġekorana-iaġiato-ġoi tarimari Iopai ġeseġaġito Petero tu Lidai nai, tarima ruarua ġetuġu-iaġorito ġia ġenai, beġene noġia, beġene kira, "Ġai ġesi si-iaġo, asi nokwaibo!"

³⁹ Moġa lorinai Petero evariġisito, benamo ġia ġesi ġeiaiġoto. Eraġasito nai tu, tuġuna daiġutuna ġana ġeġori-varaġeato. Monai vabu mabarari na ġeruġa-ġeġeraġiato, benamo koudi e dabuġa kotari, Doreka na maġurinai eturirito-ġoi dagarari, ġia ġevaġa-ġita-iaġiato ma taġiri ġesi.

⁴⁰ Petero na ġia mabarari daiġutu na etuġu-rosirito, benamo evetui-tarito, eġuri-ġurito. Moġa murinai eboġe-tarito, mase vavinena eġitaiato, benamo ekirato, "Tabita, novariġisi!" Tabita na matana eiaġarito, ma Petero eġitaiato, benamo etanu-vaisito.

⁴¹ Petero na ġimanai eġabito, evaġa-ruġa-vaisiato. Benamo veġabidadama tarimari e vabu ekea-toġarito. Ġia ġema raka-toġato nuġanai, Tabita tu maġuri eruġa-taġoto-ġoi. Benamo Petero na ġeri ai etuġu-iaġoato.

⁴² Mai veġa varina Iopa mabarana ei eraga-rovorovoto, benamo tarima ġutuma na Vereġauka ġevaġa-moġoniato.

⁴³ Petero ġaro vovoka Iopai etanuto, boromakau kefiru eġauvei-iaġirito-ġoi tarimana arana Simona ġesi.

10

Petero e Korenelio

¹ Tarima ta arana Korenelio, ġia tu Kaisarea vanuġanai etanuto-ġoi. Ma ġia tu Roma ġeri vetari tarimari sinau sebona (100) eġorikaurito-ġoi tarimana. Ġia na vetari doġorona arana ġekiraġiato-ġoi tu "Itali ġeri Vetari Doġorona" eġita-ġaurito-ġoi.

² Ġia e ġena numa tarimari mabarari ġesi tu Barau ġekorana-iaġiato-ġoi ema Barau garina ġeveito-ġoi. Ġia na asi ġeri-ġari Iuda tarimari evaġa-kava baregorito-ġoi, ema vanaġivanagi eġauġauto-ġoi Barau ġenai.

³ Lavilavi ta, horaġauna 3 koloko rekenai ġia emata-vanaġito, Barau ġena aneru ta eġita-korikoriatto, ema raka-toġato, benamo ġia evaġa-guruġaiato, ekirato, "Korenelio!"

⁴ Benamo ma garina ġesi Korenelio na mo aneru eġita-karakaraiato, benamo ekirato, "Vereġauka, kara?"

Aneru na evaġa-veaseato, ekirato, "Ġemu ġurigiuri e ġemu vevaġa-kava asi ġeri-ġari tarimari ġeri ai tu Barau na eġabi-raġerito, ema ġia na etuġamaġirini.

⁵ Toma, tau kotari Iopa ġana notuġu-iaġori, be tau ta arana Simona, ġia arana ta tu Petero, beġenea ġoria.

⁶ Ġia tu Simona, boromakau kefiru eġauvei-iaġirini tarimana ġesi etanuni; ġena numa tu kone rikinai."

⁷ Mo evaġa-guruġaiato aneruna na eraga-kwaneato, benamo Korenelio na ġena vetuġunagi tarimari ruarua ema ġena vetari tarimana ta ekea-iaġomarito. Ġena vetari tarimana moġa tu Barau ekorana-iaġiato-ġoi tarimana e ġia tu vanaġivanagi Korenelio sevinaġi ġia vetuġunagi ġeiaġo-viniato-ġoi tarimana ta.

⁸ Kara eġorato dagarari mabarari Korenelio na ekira-vararito, benamo Iopa ġana etuġu-iaġorito.

Petero ġena mata-vanaġi

⁹ Ma elaganito, ġia tu dabara na roġo ġeiaġoto-ġoi, Iopa ġekavi-naġiato, ġarogotai Petero tu numa tuġunai eraġekauto, nea ġurigiuri ġana.

¹⁰ Ġia varau evitoato, benamo ġena ura tu neġaniġani. Ma ġaniġani tu roġo ġerovinarito-ġoi nuġanai, ġia emata-vanaġito.

¹¹ Ġia na guba evekeoto eġitaiato, ema dagara ta dabuġa baregona kavana, daigunina vasivasi emariġoto-ġoi ġia ġenai, noġa moġo ġetuġu-mariġoato-ġoi tanobara ġana.

¹² Ġia emariġoto-ġoi nuġanai tu maġuri dagarari irairau mabarari, kwakuri vasivasi ġerakani dagarari, e ġedarani dagarari, ema guba na ġerovoni manuri.

¹³ Benamo garo ta na ekiraiato, ekirato "Petero, novariġisi, be novaġiri, noġaniri!"

¹⁴ Senagi Petero evaġa-veseto, ekirato, "Vereġauka, asigina ġinavaġi! Rakava e asi veiareva dagarari ta au na roġosi roġo bara ġania."

¹⁵ Mo garo na ma evaġa-guruġa ġenoġoiato ekirato, "Barau na eiarevarito dagarari ta rakavana asi bono kiraġi."

¹⁶ Vaġa-toitoi moġesi eġorato, benamo mo dabuġa asikauna tu guba ġana ma eġabi-varaġeato.

¹⁷ Petero na mo ġena mata-vanaġi ai eġitarito dagarari anina roġo etuġamaġi-vetaurito-ġoi nuġanai, Korenelio ġena vetuġunagi tarimari tu ġevotuto, ma ġeribato Simona ġena numa tu ainai. Benamo ġeiaġoto mo numa ġatama bokana korana ġoiranai ġea ritoġo-tarito.

¹⁸ Benamo ġekeato e ġevedanaġito, ġekirato, "Simona, arana ta ġekiraġiani Petero, tu mainai etanuni ba?"

¹⁹ Petero na tu roġo mo mata-vanaġi anina etuġamaġi-vetaurato-ġoi nuġanai, Iauka Veaġa na evaġa-guruġaiato, ekirato, "Noseġagi, ġoi tu tarima toitoi na ġevetaumuni.

²⁰ Be novariġisi, noraka-riġo, ġia ġesi boġono iaġo. Asi bono ġoiagi, korana au na atuġurito bene."

²¹ Petero eraka-riġoto mo tarima ġeri ai, benamo ekirato, "Ġovetauani tauna tu au maiġegu. Kara dainai boġo iaġoma?"

²² Ġia ġevaġa-veseto, ġekirato, "Ġai tu vetari tarimari sinau sebona (100) eġori-kaurini tarimana arana Korenelio na betuġuma. Ġia tu vei-iobukaiobuka e Barau garina eveini tarimana, ema Iuda tarimari mabarari na maki ġegubakau-baregoani. Ġia tu Barau ġena aneru ta na ekiraiato, ġoi bene keakaumu, ġena numa ġana bono iaġo, ema ġoi na kara bokiraġirini bene seġagi."

²³ Benamo Petero na mo tarima eġabi-raġerito ġena numai, monai ġegenato.

Petero tu Korenelio ġena numa ġana eiaġoto

Boġiboġi ai ġevariġisito, benamo Petero ġia ġesi ġeiaġoto, ema tarikaka kotari Iopa na maki ġia ġesi ġeiaġo-sebonato.

²⁴ Ġia ġeiaġoto, dabara tumanai ġea genato, ma elaġanito vau Kaisareai ġevototo. Korenelio na tu ġia enari-taġorito-ġoi, garagarana e ġatana maki ekea-vegogorito ġena numai.

²⁵ Petero eraka-toġato nuġanai, Korenelio na edoġariato, benamo kwakuna koranai evetui-tarito ma etutuġutari-viniato.

²⁶ Senaġi Petero na evaġa-ruġa-vaisiato, ekirato, “Novariġisi, au maki tarimarima moġo.”

²⁷ Numa nuġanai ġeraka-toġato-ġoi nai, Petero na Korenelio evaġa-guruġaiato-ġoi. Ma numa nuġanai tu tarimarima ġutuma vegogotaġo edoġaririto.

²⁸ Benamo ġia na evaġa-guruġarito, ekirato, “Ġomi tauġemi maki ma ribami ġinikau, ġai ġema taravatu ekirani, Iuda tarimana ta irau bese tarimana ta ġesi asi bene tanu-vegogo o asi bene raka-ġitaia maki, taravatu. Senaġi Barau na bevaġa-ġitaġu, au na tarima ta asi bana kiragġia ġia tu rakava o asi veiareva.

²⁹ Moġa lorinai boġo keakaugu nai, baiaġoma moġo, asi bakira-sirivaġi. Be nadanaġimi, au tu kara dainai boġo keakaugu?”

³⁰ Korenelio ekirato, “Ġaro vasivasi varau beġe iaġo, au tu ġegu numai aġauġauto-ġoi horaġauna 3 koloko lavilavi rekenai, maitoma horaġauna kavana. Benamo asikauna dabuġa kurokuro lelevaġina na evedabuġato tarimana ta ġoiragu ai eruġa-tarito,

³¹ benamo ekirato, ‘Korenelio! Barau na ġemu ġauġau beseġaġia e vevaġa-kava veiġari asi ġeri-ġari tarimari ġeri ai etuġa-maġirito.

³² Iopa ġana novetuġu-iaġo, Simona, ġia arana ġekiraġiani Petero ġetoni, beġenea kiraia, be bene iaġoma. Ġia tu Simona, boromakau kefiru eġauvei-iaġirini tarimana ġena numai etanuni kone rikinai.’

³³ Moġa lorinai asikauna vetuġumu araga-veito, ema bovei-nauġa, veiġa namo taumu, korana boiaġoma bene. Toma ġai mabarama tu Barau ġoiranai maiġema, ma Vereġauka na bevaġa-naġimu guruġari baġana seġaġiri ġana.”

Petero ġena ġobata

³⁴ Benamo Petero ġena guruġa esinaiato, ekirato, “Au toma bama riba-maoro, Barau na tarimarima mabarari tu eġabiraġe-ilailarini.

³⁵ Bese mabarari nuġari ai tu deikara na ġia garina eveini, ema veiġa iobukari eveini tarimana moġo ġia na eġabi-raġeani.

³⁶ Barau na Isaraela tarimari ġeri ai etuġu-iaġomaiato varina tu maiġa, mo tu maino varina Iesu Keriso ġenanu maino varina namona efiuato-ġoi. Iesu Keriso tu tarima mabarari ġeri Vereġauka.

³⁷ Ġomi ma ribami Iudea nuġanai kara eġorato, Galilea na evesinato. Mo tu Ioane na babatiso eġobata-iaġiato murinai.

³⁸ Iesu, Nasareta tarimana varina, ġomi ma ribami, kamasi Barau na Iauka Veaġa e seġuka ġia iatanai ebubu-riġoato. Ġia tu gabu mabarari ġari eiaġoto, veiġa namori eveirito-ġoi, ema Diabolo ġena seġuka na eġabirito tarimari mabarari evaġa-maġuririto-ġoi, korana Barau tu ġia ġesi.

³⁹ Ġai tu ġia na Iuda e Ierusalem tanori ai eveirito-ġoi dagarari mabarari ġavaġa-moġonirini tarimama. Ġia tu satauro ai ġeikoko-kauato nai ġevaġa-maseato.

⁴⁰ Senaġina Barau na ġaro vaġa-toitoinai (3) evaġa-variġisi ġenoġoiato ema evaġa-foforiato beġene ġitaia ġana.

⁴¹ Ġia tu tarimarima mabarari na asi ġeġitaiaato, senaġi ġevaġa-moġoniani tarimari, mo tu Barau na eviriġi-ġuinerito tarimari na moġo ġeġitaiaato. Ma moġeri tarimari tu ġai maiġema. Ġia evariġisi-ġenoġoito murinai, ġai tu ġia ġesi ġaġaniġani-vegogoto e ġaniuniu-vegogoto.

⁴² Ġia na evaġa-naġimato, tarimarima ġeri baġana ġobata e baġana kiraġi-foforia, ġia tu Barau na eġabi-hidiato, maġuri tarimari e mase tarimari ġeri vevaġa-maoro tarimanai evaġa-iaġoato.

⁴³ Peroveta tarimari mabarari na ġia ġekiraġi-foforiato-ġoi, ġekirato-ġoi, ġia beġe vaġa-moġoniani tarimari mabarari tu ġia arana seġukanai Barau na ġeri rakava betuġamaġi-fitogarini.”

Irau bese tarimari Iauka Veaġa ġeġabiato

⁴⁴ Petero roġo eguruġato-ġoi nuġanai, Barau ġena guruġa ġeseġaġiato-ġoi tarimari mabarari iatari ai Iauka Veaġa eraka-riġoto.

⁴⁵ Iuda tarimari Iesu ġevaġa-moġoniato-ġoi ema Petero ġesi Iopa na ġeiaġomato tarimari tu ġeġaba-rakavato, korana Barau na Iauka Veaġa irau bese tarimari maki evinirito iatari ai ebubu-riġoato.

⁴⁶ Korana ġeseġaġirito garo irauri ai ġeguruġato-ġoi, ema Barau ġevaġa-raġeato. Benamo Petero ekirato,

⁴⁷ mai tarimarima na tu Iauka Veaġa varau beġe ġabia, ġita na taġbiato kavana. Be, nanu nuġanai babatiso beġene ġabia ġana tu deikara na bekira-ġoiani?

⁴⁸ Moġa lorinai ġia na ekirarito, Iesu Keriso aranai beġene babatisori. Benamo ġia na Petero ġenoġiato, garo kotari ġia ġesi roġo ma beġene tanu.

11

Petero ġena guruġa-fofori Ierusalemata ai

¹ Apostolo e tarikaka Iudea tanonai mabarari ġeseġaġito, irau bese tarimari na maki Barau ġena guruġa varau ġeġabi-raġeato.

² Benamo Petero Ierusalemata ġana evaragetto nai tu, Iesu ġevaġa-moġoniato-ġoi tarimari, senaġi tauġaniri kefiru tu ġelama-vaġirito, moġeri na ġeġau-fitogaiato,

³ ġekirato, "Goi tu kefiru asi ġelama-vaġirini irau bese tarimari ġeri numai oa raka-toġato, ema ġia ġesi oa ġaniġani-vegogoto!"

⁴ Benamo Petero na vari mabarana ġeri ekiraġito, kamasi evesinato mo magona. Ekirato,

⁵ "Au tu Iopa vanuġana baregonai aġuriġurito-ġoi, nuġanai amata-vanaġito. Aboġeto, dagara ta dabuġa baregona kavana, daġunina tu vasivasi (4), guba na emariġoto-ġoi, noġa moġo ġetuġu-mariġoato-ġoi, ġoiragu ai ema vetore-tarito.

⁶ Aboġe-gurato nai tu, maġuri dagarari iraurau, tanobarai kwakuri vasivasi na ġerakani bureġari, e boġai ġetanuni bureġari, e ġedarani dagarari, ema guba na ġerovoni manuri aġitarito.

⁷ Benamo garo ta aseġaġiato, ekirato, 'Petero, novariġisi, be novaġiri e noġaniri!'

⁸ Senaġi au akirato, 'Vereġauka, asiġina ġinavaġi, rakava e asi veiareva dagarari ta au murugu na roġosi beġere raka-toġa.'

⁹ Mo garo guba na ma eguruġa-ġenogoito, ekirato, 'Barau na eiarevarito dagarari tu rakavari asi bono kiragiari.'

¹⁰ Vaġa-toitoina moġesi eġorato, benamo dagara mabarari guba ġana ma eġabi-varaġerito.

¹¹ Mo horaġauna sebonai tarima toitoi au atanuto-ġoi numanai ġeraġasito. Ġia tu Kaisarea na ġetuġurito au ġegu ai.

¹² Benamo Iauka Veaġa na ekiraguto, ġia ġesi bana iago, asi bana goiaġi. Mai tarikaka imaima sebona (6) maki au ġesi Kaisarea ġana ġaiaġoto, ema mabarama Korenelio ġena numai ġaraka-toġato.

¹³ Ġia na ġema ekiraġiato, kamasi aneru ta, ġia ġena numai efoforito eġitaiato, ema ekiraiato, ekirato, 'Iopa ġana novetuġu-iago, Simona, ġia arana ta tu Petero, beġenea kiraia, bene iaġoma.

¹⁴ Ġia na guruġa tari ġemu bekiraġirini, benamo mo guruġa ġerina Barau na ġoi ema ġemu numa tarimari mabarari bevaġa-maġurimini.'

¹⁵ Au na guruġa vau asinaiato nuġanai, Iauka Veaġa emariġoto ġia iatari ai, Pentekoste ġaronai ġita iatarai emariġoto kavana.

¹⁶ Benamo Vereġauka na kara ekiraġiato dagarana atuġamaġi-doġariato, ekirato, 'Ioane tu nanu na ebabatisoto-ġoi, senaġina ġomi tu Iauka Veaġa na bebabatisomini.'

¹⁷ Bema Barau na mo varevare sebona moġo, ġita Vereġauka Iesu Keriso tavaġa-moġoniato nai evinirato varevarena, irau bese tarimari maki evinirito nai tu, au tu deikara, be au na Barau bakira-ġoiani?"

¹⁸ Ġia na mo guruġa ġeseġaġiato nai, ġeri guruġa barubaru ġevaġa-maġoato, benamo Barau ġevaġa-raġeato, ġekirato, "O kato, irau bese tarimari maki Barau na vetuġamaġi-kure dabarana bevaġa-ġitari, maġuri beġene ġabia ġana."

Ekalesia evesinato Antioka ai

¹⁹ Stefano emaseto nai, ekalesia vaġa-midigumidiguna e lai-lautilusina eġorato, benamo veġabidadama tarimari ġevaġa-raġa rovorovorito. Ġia kotari ġeiaġoto mo Foenikia, Saipras e Antioka ai ġea raġasito. Monai Iuda tarimari ġeri ai moġo Iesu varina ġeġobata-iaġiato-ġoi.

²⁰ Senaġi veġabidadama tarimari kotari, Saipras e Kurene tarimari tu Antioka ġana ġeiaġoto, Grik tarimari ġeri ai maki vari ġea fiuato, Iesu Vereġauka Varina Namona ġeġobata-iaġiato-ġoi.

²¹ Veregauka seḡukana tu ġia ġesi, be tarimarima ġutuma-bara Veregauka ġevaḡa-moḡoniato ema ġevetuḡamaḡi-kureto.

²² Ierusalemale ekalesiari na mai vari ġeseḡaḡiatio, benamo ġia na Banabas Antioka ġana ġetuḡu-iaḡoato.

²³ Ġia Antiokai eraḡasito, benamo Barau ġena varevare-bara tarimarima ġeri ai eḡitaiato nai, eiaku-rakavato. Ma mabarari elaunaḡirito, moḡoni ai Veregauka beḡene korana-iaḡia ma nuḡari mabarari ġesi.

²⁴ Banabas tu tarima namona, Iauka Veaḡa e veḡabidadama na evonuto. Ema tarimarima ġutuma-bara Veregauka ġena tarimarimai ġeiḡato.

²⁵ Benamo Banabas Taso ġana eiaḡoto, Saulo vetau-vetauna.

²⁶ Edoḡariato, benamo Antioka ġana eḡori-iaḡoato. Monai mo laḡani sebona, tauri ruarua ekalesia ġesi ġeveḡogoto-ḡoi e tarimarima ġutuma-bara ġevaḡa-ribarito-ḡoi. Iesu ġekorana-iaḡiatio-ḡoi tarimari tu Antioka vanuḡanai vau ġekiraḡirito “Christian”.

²⁷ Mo ġaro ai peroveta tarimari kotari Ierusalemale na Antioka ġana ġevariḡoto.

²⁸ Ta ġia fakari ai arana tu Agabo. Agabo evarigisito, Iauka na evaḡa-ribaiato ilailanai tanobara mabaranai doḡe baregona beḡorani varina efu-guineato. Mo doḡe baregona tu Klaudio ġena veḡitaḡau ġarori ai eḡorato.

²⁹ Iesu ġekorana-iaḡiatio-ḡoi tarimari na ġeura-iaḡiatio, ġia tata ġeri doḡari ilailari ai tarikakari Iudeai ġeri ai ġeri varevare dagarari kotari beḡene tuḡu-iaḡo, beḡene vaḡa-kavari ġana.

³⁰ Mo veiḡa tu ġeveiatio, Banabas e Saulo ġeri ai ġeri moni ġetuḡukauto, rubu ġitataḡona tarimari beḡene viniri ġana.

12

Ekalesia vaḡa-midigumidiguna e lai-lautilusina ebaregato-ḡoi

¹ Moḡeri ġaro ai Kini Heroda na ekalesia tarimari kotari eḡabi-taririto, bene vaḡa-midigu midiguri ġana.

² Iakobo (o Iames), Ioane kakana, tu baḡa na debana ebasi-ḡutuato.

³ Heroda na Iuda tarimari eḡitarito, mo veiḡa ġeiaku-iaḡiatio nai tu, Petero maki ma ea ḡabi-tariato. Mo tu asi etubuni faraona verekona ġarori ai eḡorato.

⁴ Petero eḡabi-tariato, benamo dibura numai etoreato. Monai vetari tarimari gabanana imaima sebona (16) etorerito, vasiri vasiri ai evaḡa-ruḡarito vauro, Petero ġeḡita-ḡauato. Heroda ġena ura tu Pasova murinai vauro, tarimarima ġoirari ai bene ḡori-rosia ema bene vaḡa-kotaia.

⁵ Moḡa lorinai Petero tu dibura numai ġeḡita-ḡauato-ḡoi, a ekalesia tu Barau ġenai ġeḡauḡau-kokore kokoreto-ḡoi Petero ġena.

Aneru na Petero evaḡa-maḡuriato

⁶ Boḡi, ma belaganini tu Heroda na tarimarima ġoirari ai Petero beḡori-rosiani, Petero tu seiini na ġebarubaruoato, benamo vetari tarimari ruarua vekaravari ai egenato, ema ġatama-boka ġitaḡauna vetari tarimari na maki ġatama-boka ġenari-taḡoato-ḡoi.

⁷ Benamo Veregauka ġena aneru ta efoforito, Petero sevina i eruḡa-tarito, ema mama ta dibura numa nuḡanai enanagi-tariato. Mo aneru na Petero ġabana ebota-karaiato, benamo evaḡo-tataḡaiato, ma ekiraiato, ekirato, “Ragavei, novariḡisi!” Benamo seiini Petero ġimana na ġeketo-vaḡito.

⁸ Benamo aneru na evaḡa-guruḡaiato, ekirato, “Ġemu gabaḡau nobaru-taria, ema ġemu tamaka noveiri.” Benamo Petero na eveirito. Aneru ma ekirato, “Ġemu koudi na noveseḡo, be au murigu na noiaḡoma.”

⁹ Petero ġia murinai erakato mo, dibura numa na eraka-rosito. Senaḡi ġia tu asi ribana, mo aneru na kara eveiatio-ḡoi tu moḡoni. Ġia maboru ekirato tu, emata-vanaḡini etato-ḡoi.

¹⁰ Ġatama-boka ġitaḡauna tarimari ġeruḡato gabuna ta ġeraka-vanaḡiatio, ma vaḡa-ruaruana ma ġeraka-vanaḡiatio, ġeiḡoto mo, auri ġatama-bokanai ġea raḡasito. Moḡa tu vanuḡa barana rakarosina ġatama-bokana. Mo ġatama-boka tu tauḡena moḡo ġia ġeri evekeoto, benamo ġeraka-rosito. Dabara na ġeraka-varigoto-ḡoi nuḡanai, asikauna aneru na Petero eraga-kwaneato.

¹¹ Monai vau Petero eribato ġia ġenai kara eḡorato, benamo ekirato, “Au toma moḡoni bama riba, Veregauka na ġena aneru betuḡua tu, Heroda ġimana na, ema Iuda tarimari na au ġegu ai kara ta beḡene veia ġetato-ḡoi ġenana bema vaḡa-maḡurigu.

¹² Mo veiḡa etuḡamaḡi-fakaiato, benamo Maria ġena numa ġana eiaḡoto. Maria tu Ioane Mareko sinana. Monai numa nuḡanai tu tarimarima ġutuma ġeveḡogoto, ġeḡauḡauto-ḡoi.

¹³ Petero numa murikana ġatama bokanai esekeseketo, benamo vetuġunaġi ġuiatona ta arana Roda eiaġoto, nea ġitaia ġana.

¹⁴ Senaġi ġia na Petero garona eseġaġi-leaiato, benamo iaku na evaġa-vonuato, benamo ġatama-boka tu asi ekeo-fakaiaato, a ġia tu eraga-ġenoġoito, ea kirarito, Petero tu murikai eruġa-taġoni.

¹⁵ Ġia na ġekiraiato, ġekirato, “Ġoi tu bebabomu ba!” Senaġi ġia eġġiraġeto-ġoi, ekirato, “Moġoni, Petero tu murikai eruġa-taġoni.” Benamo ġekirato, “Mani tu ġia ġena aneru!”

¹⁶ Senaġina Petero tu roġo esekeseke-ġġiraġeto-ġoi. Benamo ġeiaġoto, ġatama-boka ġea keo-fakaiaato nai tu, Petero ġeġitaiato, ġeġaba-rakavato.

¹⁷ Petero ġimana na ekira-ġoirito asi beġene guruġa, benamo Vereġauka na kamasi dibura numa na eġori-rosiato ġeri ekiraġito. Ġia na evaġa-guruġarito, ekirato, “Iakobo (o James) e tarikaka mabarari ġeri mai vari boġono kiragġia.” Benamo ġia tu erakato, gabu ta ġana ma eiaġoto.

¹⁸ Boġiboġi, vetari tarimari fakari ai tu daradara baregona eġorato; ġevedanaġi-vedanaġito, ġekirato, “Petero tu kamasi bevei?”

¹⁹ Heroda na gabu mabarana evetau-ginikauato, senaġi Petero asi eġoitaġoato. Benamo Petero ġeġita-ġauato tarimari evaġa-kotarito murinai, ġena vetari tarimari o soldia ekirarito beġenea vaġi-maseri. Moġa murinai Heroda na Iudea eraga-kwaneato, ma Kaisareai ġaro tari ea tanuto.

Heroda emaseto

²⁰ Heroda tu Taia e Sidono tarimari ebaruvini-rakavarito; moġa lorinai Taia e Sidono tarimari ġeveġabi-vegogoto, ma Heroda ġea ġitaiato. Senaġi guine, Blasto, Heroda ġena ġena-daigutuna ġitataġona tarimana ġesi roġo ġeveġatato, ġevaġa-maranaiato, ema ġia rekeri ai roġo ekauto. Moġa murinai vauro ġeiaġoto, Heroda ġenai maino ġea noġiato, korana ġia ġeri tanobara ġaniġanina tu Heroda ġena tanobarai ġeġabito-ġoi.

²¹ Benamo ekiraġi-toreato ġaronai, Heroda na ġena vere dabuġana eveiato, benamo ġena teronai ea tanukauto vau, tarimarima eguruġa-vinirito.

²² Benamo tarimarima ġeġabato, ġekirato, “Mai tu barau ta garona, dia tarimarima garona.”

²³ Mo horai Vereġauka ġena aneru ta na Heroda ekwariato, korana ġia na mo guruġa eseġaġiato nai, Barau tu asi evaġa-raġeato. Ġia tu ġuioġiu na ġeġaniato, emaseto.

²⁴ Senaġi Barau ġena guruġa tu ebaregote e eraga-rovorovoto.

²⁵ Banabas e Saulo tu ġeri ġauvei ġevaġa-koriato, benamo Ierusalemna na ġeġenoġoito; Ioane Mareko maki ġeġori-kauato.

13

Banabas e Saulo ġeġabi-viriġirito e ġetuġurito

¹ Antioka ekalesiana nuġanai tu peroveta e vevaġa-riba tarimari kotari. Arari tu Banabas; Simeona, arana ta tu Niga; Lukio, Kurene tarimana; Manaen, ġia tu Gavana Heroda ġesi ġevaġa-baregorito; e Saulo.

² Ġia na Vereġauka ġetoma-rakariġo viniato-ġoi e ġeġani-veaġato-ġoi nuġanai, Iauka Veaġa na ekirarito, ekirato, “Banabas e Saulo tu au ġegu boġono ġabi-ġerevaġiri, korana au na bakeari, ġegu ġauvei ta beġene veia ġana.”

³ Benamo ġia ġeġani-veaġato e ġeġuriġurito murinai, ġimari ġia iatari ai ġetore-kaurito, benamo ġetuġu-rakarito.

Saipras ai

⁴ Iauka Veaġa na Banabas e Saulo etuġurito, benamo tauri ruarua kone vanuġana Seleukia ġana ġevariġoto. Seleukia na tauri ruarua bouti ai ġeraġeto, benamo Saipras motumotu ġana ġevanaġito.

⁵ Banabas ma Saulo Salami ai ġevotuto nai, Barau ġena guruġa Iuda tarimari ġeri rubu tari ai ġea ġobata-iaġiato. Ioane Mareko maki ġia ġesi, ġia tauri ruarua evaġa-kavarito-ġoi.

⁶ Tauri ruarua na Saipras motumotu mabarana ġeraka-vanaġiato, ġeiaġoto Pafo vanuġanai ġea raġasito. Monai Iuda ġeri ġora e peroveta ġofaġofa tarimana ta arana Bar-Iesu ġea doġariato.

⁷ Ma Bar-Iesu tu motumotu verena, ma iaunega rakavarakava tarimana arana Sereġio Paulo ġatana. Mo vere na Banabas e Saulo ekea-iaġorito ġia ġoirana ġana, korana ġena ura tu Barau ġena guruġa bene seġaġia.

⁸ Senaġi mo ġora tarimana Elima, (Bar-Iesu arana ta tu Elima), na ġeri guruġa ekira-fitōġarito, ġena ura vere na Iesu asi bene vaġa-moġonia.

⁹ Benamo Saulo, arana ta tu Paulo, Iauka Veāga na evaāga-vonuato, benamo Elima eġita-karakaraiato.

¹⁰ Benamo ekirato, “Ġoi tu Diabolo natuna, ema veġa iobukaiobukari mabarari tu ġoi na ovetari-vinirini! Ġoi tu ġofaġofa e rakava mabarari na ovonuto. Vereġauka ġena veġa iobukaiobukari ġofaġofai bono vaāga-iaġori uranai ovededegwani. Mo veġa tu aitoma vau bovaāga-dokoani?”

¹¹ Noseġaġi! Toma Vereġauka ġena seġuka ġoi ġemu ai befoforini, matamu bebubuni, ma laġani mamana asi boġitaiani, beiaġoni mo, ġaro ta.”

Asikauna Elima tu mukuna na matana eġabi-ġauato, benamo eraka-ġeġeraġi ġeġeraġito, ġena ura ta na ġimanai bene ġabi, ma bene ġori-kaua.

¹² Mo vere na kara eġorato dagarana eġitaio nai, Vereġauka evaāga-moġoniato. Ema eġaba-rakavato Vereġauka ġena vevaāga-riba guruġari ai.

Antioka vanuġana Pisdia ai

¹³ Paulo ma karona ġesi Pafo ġeraga-kwaneato, bouti na Pega ġana ġeiaġoto. Pega tu Pamfilia nuġanai. Pegai benamo Ioane Mareko na Paulo e Banabas eraga-kwanerito, ġia tu Ierusalemna ġana ma eġenoġoi-iaġoto.

¹⁴ Pega na kwakuri na Antioka ġana ġeiaġoto. Antioka tu Pisdia tanonai. Sabadi ai tu Iuda tarimari ġeri rubu ai ġeraka-toġato, bena ġetanu-tarito.

¹⁵ Mose ġena taravatu e peroveta tarimari ġeri toretore ġeiavirito murinai, rubu ġitaġauna tarimari na noġinoġi ġetuġu-iaġoato ġia tauri ruarua ġeri ai, ġekirato, “Tarikaka, bema ma ġemi vevaāga-gwaġiġi guruġari mai tarimarima ġeri ai nai tu, ġai ġaurani, ġeri ġokiraġi.”

¹⁶ Paulo evarigisito, ġimana na eiave-taririto, benamo ekirato, “Isaraela taumi e irau bese tarimari fakari ai Barau garina ġoveini tarimami, ġoseġaġi!

¹⁷ Mai Isaraela tarimari ġeri Barau na ġai senema eġabi-virigirito, ema ġia na evaāga-ġutumarito, Aigupito tanonai ġetanuto-ġoi nai. Ma Barau ġena seġuka baregona na Aigupito tanona na eġori-rosirito,

¹⁸ ema laġani gabana vasivasi (40) kavana tano fakanai ġia ġeri ai evevaāga-gwaġiġito.

¹⁹ Ġia na Kanana tanonai bese imaima ruarua (7) tarimarimari evaāga-mou-taririto. Ma ġeri tano tu eġabiato, Isaraela tarimari evinirito e ġeri tanobarai evaāga-iaġoato.

²⁰ Mo dagara mabarari tu laġani sinau vasivasi ma gabana imaima (450) kavana nuġanai ġeġorato. Moġa murinai ġia na vevaāga-roroġoto tarimari evinirito, eiaġoto mo peroveta tarimana Samuela ġena veġitaġau laġanina.

²¹ Ma ġeri vere o kini ta beġene ġabia noġinoġina ġeveito nai, Barau na Saulo evinirito. Ġia tu Kisa natuna, mo tu Beniamina ġena doġoro tarimana. Saulo na laġani gabana vasivasi (40) eġita-ġaurito.

²² Saulo kini dagina na eġabi-vaġiato murinai, Barau na Davida eġabiato, Isaraela ġeri kini ai evaāga-iaġoato. Barau na Davida tu maiġesina ekiraġi-foforiato, ekirato, ‘Au na Davida, Iese natuna, badoġaria, ġia tu au nuġagu na euravini-rakavaiani tarimana. Ġia na au ġegu ura veġari mabarari beveirini.’

²³ Barau na ġena guruġatore ilailanai, Davida besena na, Isaraela tarimari ġeri vevaāga-maġuri tarimana etuġu-mariġoato. Mo vevaāga-maġuri tarimana tu Iesu.

²⁴ Iesu roġosi roġo bere ġauvei nuġanai, Ioane na Isaraela tarimari mabarari eġobata-vinirito, ekirarito, ġeri rakava ġerina beġene vetuġamaġi-kure, benamo babatiso beġene ġabia.

²⁵ Ioane na ġena ġauvei dori evaāga-koriato nuġanai, tarimarima ekirarito, ekirato, ‘Ġomi ġotuġa-maġini au tu dei? Au tu dia ġomi na ġovaāga-nogaiani tarimana. Senaġi ġoboġe! Ġia tu au murigu na mani eiaġomani, ma au tu asi ilaila ġia kwakuna tamakari bakoki-vaġirini.’

²⁶ Tarikakagu, Aberahamo besena, ema ġomi irau bese fakari ai Barau garina ġoveini tarimami: Mai vevaāga-maġuri guruġana tu ġita ġera etuġu-iaġomaio.

²⁷ Ierusalemna tarimari ma ġeri vere ġesi Iesu asi ġeġita-leaiato, ema Iesu, peroveta tarimari ġeri guruġa Sabadi mabarari ai ġeiavirito-ġoi, tu asi ġetuġamaġi-fakarito. Moġesina naima ġia na Iesu vaġi-masena guruġana ġekiraġito nai, peroveta tarimari ġeri guruġa ġevaāga-moġonirito.

²⁸ Oba, vaġi-masena korana ta tu asi ġedoġariato, senaġina Pilato ġenoġiato, bene vaġi-masea ġetato.

²⁹ Buka Veāgai ġia ġekiraġiato guruġari mabarari ġeveirito murinai, satauro tuġuna na ġeġabi-riġoato, benamo fore ġekwaiato kouġana garanai ġea toreato.

³⁰ Senaġi Barau na mase na ma evaāga-varigisi ġenoġiato,

³¹ ĝia ĝesi Galilea na Ieruselema ĝana ĝeiaĝoto-ĝoi tarimari na ĝaro vovoka ĝeĝitaio. Ma ĝia toma tu Isaraela tarimari ĝeri ai Iesu ĝekiraĝi-foforiani.

³² Ema Barau na ĝita senera kara ekiraĝitore-vinirito Varina Namona ĝomi ĝakira-varamini.

³³ Mo kiraĝitore tu Barau na ĝita, ĝia tuburi, ĝera evaĝa-moĝoniato, mo tu ĝia na Iesu mase na ma evaĝa-variĝisi ĝenoĝoiato nai. Salamo vaĝa-ruaruanai etoreato ilailana, ekirani,

'Goi tu au Natugu;

toma au tu goi Tamamu ai baiaĝo.'

³⁴ Barau na moĝoni mase na evaĝa-variĝisi ĝenoĝoiato e asi ma beĝenoĝoini gara ĝana, benamo beboraĝani. Barau na tu maiĝesi ekiraĝiato, ekirato,

'Davida ĝena akiraĝi-torerito,

vevaĝa-namo veaĝari e moĝoniri tu ĝomi bavinimini.'

³⁵ Ema Salamo ta nuĝanai ma ekirani,

'Goi ĝemu tarima veaĝana tu

asi beboraĝani,

korana tu asi bene ĝora otato.'

³⁶ Davida ĝena ĝuru ai Barau ĝena vetuĝunaĝi eiaĝo-vinito-ĝoi nai emaseto, benamo senena seviri ai ĝeguriato, ma tauĝanina tu eboraĝato.

³⁷ Senaĝi Iesu, Barau na mase na evaĝa-variĝisi ĝenoĝoiato tarimana, tu tauĝanina asi eboraĝato.

³⁸ Moĝa lorinai, tarikakagu mabarami, au aurani boĝono riba, ĝai tu Iesu bakunai rakava tuĝamaĝi-fitogaĝari varina ĝomi ĝemi ĝavari-fiunai.

³⁹ Mose ĝena taravatu na ĝomi ĝemi rakava tu asi beruĝa-vaĝirini riba, a Iesu na ĝia ĝevaĝa-moĝoniani tarimari mabarari ĝeri rakava tu eruĝa-vaĝirini, vei-iobukaiobuka tarimari ai evaĝa-iaĝorini.

⁴⁰ Rorimi boĝono vetore, be peroveta tarimari na ĝekiraĝirito dagarari, ĝemi ai asi beĝene ĝora; ĝekirato,

⁴¹ 'Gomi veĝabi-varaĝevarage

tarimami gobogeboĝe!

Nuĝami ĝefarevaĝi, benamo ĝomase!

Korana ĝemi maĝuri ĝarori ai

au na veĝa ta baveiani,

enabe ta na ĝemi bekiraĝi-ginikauani,

senaĝi asi boĝo vaĝa-moĝoniani! "

⁴² Paulo e Banabas rubu na ĝeraka-riĝoto-ĝoi nuĝanai, tarimarima na ĝenoĝirito, ĝoira Sabadi ai ma beĝene ĝenoĝoi, be mo guruĝa kotari ma ĝeri beĝene kiraĝi.

⁴³ Tarimarima vegogo na ĝeĝwa-lausiato murinai, Iuda tarimari ĝutuma, ema irau bese tarimari, Barau ĝekorana-iaĝiato-ĝoi tarimari, ĝutuma maki Paulo e Banabas muriri na ĝeiaĝoto. Tauri ruarua na ĝevaĝa-guruĝarito e ĝelaunaĝirito, Barau ĝena varevare-bara nuĝanai beĝene ruĝa-gwaĝiĝi.

⁴⁴ Sabadi vaĝa-ruaruanai, dori moĝo mo vanuĝa baregona tarimari mabarari na Vereĝauka ĝena guruĝa seĝaĝi-seĝaĝina ĝeraka-vegogoto.

⁴⁵ Iuda tarimari na mo ĝutuma ĝeĝitarito nai, ĝemama-rakavato; benamo Paulo na kara ekiraĝirito-ĝoi guruĝari, ĝia na ĝekira-fitogaĝarito e ĝevei-veĝare veĝareato.

⁴⁶ Senaĝi Paulo e Banabas tu ma kokoreri ĝesi ĝevaĝa-veserito, ĝekirato, "Barau ĝena ura lorinai tu ĝia ĝena guruĝa ĝai na ĝomi baĝana kiravara-guinemi. Senaĝi ĝomi na asi ĝogaĝi-raĝeani, monana tu ĝomi tauĝemi na ĝovaĝa-moĝoniani, ĝomi tu asi ilaila maĝuri vanaĝivanagaĝi boĝo ĝabiani. Moĝa lorinai, ĝai na ĝomi ĝaraga-kwanemini, ma irau bese tarimari ĝeri ai ĝaiaĝoni.

⁴⁷ Korana Vereĝauka na tu maiĝesi evaĝa-naĝimato, ekirato,

'Au na ĝomi atoremite tu,

irau bese tarimari ĝeri mamai

boĝono iaĝo,

be vevaĝa-maĝuri boĝono ĝabi-rosia tanobarai ĝetanuni tarimari mabarari ĝeri ai.'

⁴⁸ Irau bese tarimari na mo guruĝa ĝeseĝaĝiato nai, ĝeĝiakuto e Vereĝauka ĝena guruĝa ĝevaĝa-raĝeato; ema Barau na eĝabi-viriĝirito maĝuri vanaĝivanagaĝi beĝe ĝabiani tarimari mabarari ĝeveĝabidadamato.

⁴⁹ Vereĝauka ĝena guruĝa mo gabu mabarana nuĝanai eraga-rovorovoto.

⁵⁰ Senaĝi Iuda tarimari na irau bese vavineri, daĝi baregori ĝeĝabi-taĝorito-ĝoi ma Barau ĝekorana-iaĝiato-ĝoi vavineri, e vanuĝa baregonai veĝitaĝau tauri, nuĝari ĝeĝanirito.

Benamo ĝia na vevaĝa-midigumidigu ĝevaĝa-ĝoraiato Paulo e Banabas ĝeri ai, ema ĝeri gabu na ĝelai-rosirito.

⁵¹ Tauri ruarua na kwakuri kauri ĝekwari-ketoketorito, ĝia ĝeri kira-sirivaĝi vaĝa-moĝoniri ĝana, benamo Ikonio ĝana ĝeiaĝoto.

⁵² Iesu ĝekorana-iaĝiato-ĝoi tarimari Antiokai tu iaku e Iauka Veaĝa na ĝevonuvonu-raĝeto.

14

Ikonio ai

¹ Ikoniai Paulo e Banabas tauri ruarua Iuda tarimari ĝeri rubu ai ĝeveito-ĝoi kavana ĝeraka-toĝato, benamo ĝeĝobatato. Ĝeri ĝobata na Iuda e Grik tarimari ĝutuma lelevaĝi ĝeveĝabidadamato.

² Senaĝi Iuda tarimari asi ĝeurato Iesu beĝene vaĝa-moĝonia, tarima kotari na irau bese tarimari ĝelaunaĝi-naĝirito, benamo tarikaka vegabidadama nuĝana tarimari ĝeiaurakava vinirito.

³ Paulo e Banabas monai ĝetanu-maukato. Ma kokoreri ĝesi Vereĝauka ĝena varevarebara guruĝana ĝekiraĝiato-ĝoi. Vereĝauka na ĝeri guruĝa evaĝa-moĝonirito tu seĝuka evinirito, vetoĝa boruri e nuĝa-farevaĝi veĝari ĝeveito.

⁴ Senaĝi mo vanuĝa baregona tarimari tu ĝevevare-kirato, reke-ta Iuda tarimari ĝesi ĝekauto, reke-ta tu apostolo tarimari ĝesi.

⁵ Benamo irau bese tarimari e Iuda tarimari ma ĝeri veguine-iaĝi tauri ĝesi ĝeverori-vegogoto, ĝeurato apostolo beĝene vaĝa-midigu midiguri e fore na beĝene ĝidara-maseri.

⁶ Senaĝi Paulo e Banabas na mo boioĝa ĝeribaiato, benamo Likaonia tanonai vanuĝa baregori ruarua Listera e Derebe, ema seviri tanori ĝana ĝegari-iaĝoto e seviri vanuĝari tari ĝari.

⁷ Monai Vari Namona ĝeĝobata-iaĝiato-ĝoi.

Listera e Derebe ai

⁸ Listerai tarima ta etanuto-ĝoi; ĝia tu kwakuna rakava emaĝurito, be asi erakato-ĝoi.

⁹ Mo tarima tu eseĝaĝi-tagoto-ĝoi Paulo eĝobatato-ĝoi nuĝana. Paulo na eĝitakarakaraiato, benamo eribato ĝia tu ĝena vegabidadama na bevaĝa-namoani riba,

¹⁰ benamo eguruĝa-fararato, ekirato, “Novariĝisi, noruĝa-tari. Benamo eburi-vaisito, erakato.

¹¹ Tarimarima ĝutuma na kara Paulo na eveiato ĝeĝitaiato nai, ĝeri Likaonia garonai ĝekogoto, ĝekirato, “Barau tu tarimarimai beĝe iaĝo, beĝe raka-riĝo ĝita ĝerai!”

¹² Ĝia na Banabas arana tu Dios ĝetato, ema Paulo arana tu Hemes ĝetato, korana Paulo tu eguruĝa-vovokato-ĝoi.

¹³ Dios ĝena Rubu Veaĝa verena ĝena rubu tu vanuĝa barana murikanai. Ĝia na boromakau e veravera vanuĝa maĝuna ĝatama bokana ĝana eĝwa-iaĝorito, korana tarimarima ĝutuma ĝesi ĝeurato, apostolo ĝeri ai ginitaĝo veĝari beĝene vei ĝana.

¹⁴ Senaĝina apostolo ruarua Banabas e Paulo na ĝeseĝaĝirito, kara ĝeveia ĝetato nai, ĝeri dabuĝa ĝedarerito, benamo ĝutuma nuĝari ai ĝeraga-ĝabaĝaba-toĝato.

¹⁵ Ĝekirato, “Karase ĝomi tau tu maĝesi ĝoveini? Ĝai maki tarimarima moĝo ĝomi kavana! Ĝai na tu Vari Namona ĝomi ĝemi ai ĝaĝabi-iaĝomaiani, ĝomi ĝakiramini, mai asi tauri dagarari boĝono raga-kwaneri, benamo Barau maĝurina ĝenai boĝono raka-ĝenoĝoi ĝatoni. Ĝia na guba, tanobara, daĝaru-bara, e ĝetanu-iaĝirini dagarari mabarari eveirito.

¹⁶ Guinenai ĝia na bese mabarari etao-fitoĝarito, tauĝeri ĝeri ura dabarari ai beĝene raka ĝana.

¹⁷ Senaĝi dagara namori eveirini ĝerina, ĝia tauĝena vanaĝivanaĝi evevaĝa-moĝonini: Ĝia na ĝura guba na evinimini e varovaro dagarari ĝeri ĝaro korikoriri ai evinimini. Ĝia na ĝaniĝani asisebo evinimini e nuĝami iaku na evaĝa-vonurini.”

¹⁸ Moĝesi ĝevaĝa-guruĝarito, senaĝina mo tarimarima ĝutuma-bara tu ĝia tauri ruarua ĝeri ai ginitaĝo ĝauveina ĝeveia roĝo ĝetato-ĝoi, kiraĝoiri tu tauri ruarua ĝeri ai tu egwaĝiĝito.

¹⁹ A Iuda tarimari kotari Antioka e Ikonio na ĝeiaĝomato, ma moĝeri tarimari ĝia rekeri ai ĝeĝabi-vanaĝirito. Benamo Paulo fore na ĝeĝidaraĝiato ma ĝeinu-rosiato vanuĝa murina ĝana. Ĝia ĝetuĝamaĝito tu varau emaseto.

²⁰ Senaĝi Iesu ĝekorana-iaĝiato-ĝoi tarimari na ĝeruĝa-ĝeĝeraĝiato nai tu eruĝa-vaisito, benamo vanuĝa barana ĝana ma erakatoĝa-ĝenoĝoito. Boĝiboĝi tu Banabas ĝesi Derebe ĝana ĝeiaĝoto.

Siria Antiokana ĝana ĝeĝenoĝoito

²¹ Paulo e Banabas na Derebe ai Vari Namona ġeġobata-iaġiato, benamo tarimarima ġutuma Iesu korana-iaġina tarimari ai ġeġabi-toġarito. Benamo ma ġeġenoġoi-iaġoto Listera, e Ikonja, ema Pisidia Antiokana ġana.

²² Ġia na Iesu ġekorana-iaġiato-ġoi tarimari ġevaġa-kokorerito e ġelaunaġirito, ġeri veġabidadama beġene ġabi-ġigitariri. Ema ġekirato, “Ġita tu midigumidigu vovoka bita ġabirini vau Barau ġena Basileiai bita raka-toġani.”

²³ Tauri ruarua na rubu tatai veġorikau tarimari ġevaġa-ruġarito. Ma tauri ruarua ġeġani-veaġato e ġeġauġauto murinai, Vereġauka ġimanai ġetore-kaurito. Mo tu ġia na ġeġabidadama-viniato-ġoi Vereġaukana ġenai.

²⁴ Pisidia tanona na ġeraka-vanaġito murinai tu, Pamfilia tanonai ġeraġasito.

²⁵ Pega vanuġanai Vereġauka ġena guruga ġeġobata-iaġiato murinai tu, Atalia vanuġana ġana ġeiaġoto.

²⁶ Atalia na tu bouti na ġeġenoġoi-iaġoto Antioka ġana. Monai tu, ġeri evanelia iaġoiġona roġosi roġo beġene sinaia nai, tarikaka na Barau ġena namo e varevare-bara nuġanai ġetore-kaurito, mai ġauvei beġene veia ġana. Ġauveina tu toma beġe vaġa-koria.

²⁷ Antiokai ġeraġasito nai tu, ekalesia tarimari ġevaġa-vegogorito, benamo Barau na ġia ġerina kara eveirito dagarari mabarari, e kamasi ġia na irau bese tarimari ġeri veġabidadama ġatama bokana ekeoato variri, ġeri ekiraġito.

²⁸ Monai Iesu ġekorana-iaġiato-ġoi tarimari ġesi tauri ruarua ġetanu-maukato.

15

Ekalesia vegogona baregona Ierusalemaj

¹ Tau kotari Iudea na Antioka ġana ġevarigoto, benamo tarikaka veġabidadama nuġanai tarimari ġevaġa-ribarito, ġekirato, “Ġomi tu vevaġa-maġuri asi ilaila boġo ġabiani riba, bema mero tauġaniri kefi-lamavaġi veġana Mose ġena taravatu ai ekiraġiani dagarana asi boġo korana-iaġiani nai.”

² Mo guruga ġaramanai, Paulo e Banabas ġia ġesi veġare-veġare baregona ġeveiato. Moġa lorinai Paulo e Banabas ema Antioka ekalesia tarimari kotari ġevirigirito, Ierusalemaj ġana beġene varage, be apostolo e ekalesia ġeġori-kauato-ġoi tarimari ġeri ai mo guruga beġenea vedanaġi-iaġia.

³ Ġia tu rubu na ġetuġu-iaġorito. Ma Foenikia e Samaria tanori nuġari na ġeraka-vanaġito nai tu, monai tarikaka ġeri ġekiraġito, kamasi irau bese tarimari Barau ġenai ġevetuġamaġi-kureto. Tarikaka mabarari na mo vari ġeseġaġiato nai, mabarari ġeiau-rakavato.

⁴ Ierusalemaj ġeraġasito nai, ekalesia tarimari, e apostolo tauri, ema ekalesia ġeġita-taġoato-ġoi tarimari na ġeġabi-raġerito. Benamo Barau na ġia ġerina kara eveito dagarari mabarari ġeri ġekiraġito.

⁵ Senaġi Farisea doġoro na Iesu ġeġabidadama-viniato-ġoi tarimari kotari ġeruġa-vaisito, benamo ġekirato, “Irau bese tarimari maki tauġaniri kefirri beġene lama-vaġiri, ema boġono kirari, Mose ġena taravatu beġene korana-iaġia.”

⁶ Benamo apostolo e ekalesia ġeġita-taġoato-ġoi tarimari ġetanu-vegogoto, ma mo vedanaġi ġetuġa-maġiato.

⁷ Ġeguġuġa-iaġi maukaiato murinai, Petero evarigisito, benamo ekirato, “Tarikakagu mabarami, ġomi ma ribami, kai-veġata ġomi vefakami ai Barau na au eġabi-hidiguto, irau bese tarimari ġeri Vari Namona bana kiraġia, be ġia maki beġene seġaġi e beġene veġabidadama.

⁸ Ema tarimarima nuġari eribarini Barauna na irau bese tarimari Iauka Veġa evinirito, ġita evinirato kavana. Mo veġa ġenana evaġa-ġitarani, ġia maki eġabi-raġerito.

⁹ Ġita e ġia fakarai vaġa-iraura vetoġana ta tu asi eveiato, korana tu ġeri veġabidadama lorinai, Barau na nuġari eiarevarito.

¹⁰ Ma toma tu kara dainai Barau ġotovo-naġiani, Iesu ġekorana-iaġiani tarimari iatari ai meto ġotorerini. Mo tu ġita tauġera na e ġita senera na maki mo maruna ġwaġwana asi ġeilailato dagarana.

¹¹ Asigina! Ġita taribani, ġita tu Iesu Vereġauka ġena namo e varevare-bara lorinai, Barau na evaġa-maġurirani, ġia maki moġesina.”

¹² Petero moġesi ekirato nai, vegogo tarimari mabarari asi ġeguġato. Benamo Banabas e Paulo ġeseġaġi-vinirito, Barau ġia ġerina vetoġa boruri e nuġa-farevaġi veġari, Grik tarimari fakari ai eveirito dagarari, mabarari ġekiraġirito.

¹³ Ġia ġeguġuġa-ġosito vau, Iakobo (o Iames) eguruġato, ekirato, “Tarikakagu mabarami, ġoseġaġigu!

¹⁴ Simona na inivau bekiraġi-ginikaua, kamasi tovotovonai Barau na irau bese tarimari etuġamaġirito, benamo ġia fakari na bese ta eġabi-virigiato, ġia arana beġene ġabia ġana.

¹⁵ Mai tu peroveta tarimari ġeri guruġa ġesi beġe ilaila-ginikau, korana maiġesi ġetoreato,

¹⁶ ‘Vereġauka ekirani:

Maiġa murinai au ma baġenoġoi-iaġomani,

benamo Davida ġena numa,

eġwa-kafuato dagarana,

ma baraga-ġenoġoiani.

Ġefuki-rovorovoato dagarana,

au na ma baraga-ġenoġoiani,

ema bavaġa-ruġavaisi-ġenoġoiani.

¹⁷ Korana tu tarimarima kotari maki mabarari na,

ema au aragu ġeġabi-rakaoani tarimari irau bese tarimari mabarari na,

au, Vereġauka, beġene vetaugu ġana.

¹⁸ Vereġauka na maiġeri dagara mabarari bevaġa-ġorarini.

Ma irau laġani ai veġata maiġeri veġa evaġa-foforirito.’

¹⁹ Moġa lorinai au atuġamaġini, irau bese tarimari ġevetuġamaġi-kureni Barau ġenai nai tu, ġeri ai asi bitana vaġa-gwaġiġia.

²⁰ Senaġi fefa ta bitana torea, bitana kirari, kwaivakuku ġevarevare-vinirini ġaniġaniri tu asi beġene ġaniri, korana mo tu ġofaġofa barauri ġevinirini dagarari; mata-boraġa veġari asi beġene veiri, ema ġaiġori na ġebito-maserini bureġari asi beġene ġaniri e rara asi beġene ġani.

²¹ Korana Mose ġena taravatu tu kai-veġata vanuġa baregori mabarari ai ġeġobata-iaġirini ema Sabadi ġarori mabarari ai Iuda tarimari ġeri rubu ai ġeivirini.”

Irau bese veġabidadama tarimari ġeri fefa

²² Benamo apostolo e ekalesia ġeġori-kauato-ġoi tarimari ema ekalesia mabarari ġeurato, ġia fakari na tau kotari beġene ġabi-virigiari, benamo Paulo e Banabas ġesi Antioka ġana beġene tuġu-iaġori. Ġia na Iudas, arana ta tu Barasaba ġetato-ġoi, e Silas ġeġabi-virigiari. Ġia tu tarikaka na ġegubakau-baregorito-ġoi tarimari.

²³ Mai tu ġia ġesi ġetuġu-iaġoato:

“Ġai ġomi tarikakami veġabidadama nuġanai, apostolo tarimama e ekalesia ġeġita-taġoani tarimama na ġema vevaġa-namo ġatuġu-iaġosiani, ġomi tarikaka veġabidadama nuġanai irau bese tarimami, Antioka ai, Siria ai, e Kilikia ai ġotanuni tarimami mabarami ġemi ai.

²⁴ Ġai baġama seġaġi, mainana tau kotari ġeiaġosito, benamo ġeri guruġa na ġemi tuġamaġi ġevaġa-veġonurito e ġevaġa-daradaramito. Korana tu ġekiramito, tauġanimi kefirni boġono lama-vaġiri ema taravatu boġono korana-iaġia. Senaġi mani tu dia ġai ġemana ġeġabito guruġari.

²⁵ Moġa lorinai, ġema vegoġo ai ġai mabarama na ġavaġa-moġoniato, tau kotari baġana ġabi-hidiri, be baġana tuġu-iaġosiri, ġema tuġamaġikau tarimari Banabas e Paulo ġesi beġene iaġosi.

²⁶ Ġia tu ġeri maġuri gwairi asi ġeġabirito, ġetore-taririto, ġera Vereġauka Iesu Keriso arana dainai.

²⁷ Moġa lorinai, Iudas e Silas baġa tuġuri, kara baġa toreri dagarari ġia tauġeri mururi na guruġai ġomi ġemi ai beġene vaġa-moġoniri ġana.

²⁸ Iauka Veaġa e ġai ġakirato, namona tu ġomi iatami ai meto ta asi baġana tore-kaua. Senaġina maiġesi veġari moġo boġono korana-iaġiri:

²⁹ Ġofaġofa barauri o kwaivakuku ġevinirini ġaniġaniri asi boġono ġani; rara asi boġono ġani; ġaiġori na ġebito-maserini bureġari asi boġono ġaniri; e mata-boraġa veġari asi boġono veiri. Mo dagara ġerina boġo raka-veġitani nai, ġomi tu boġo iaġo-ginikauni. Boġono ġena.”

³⁰ Ġevirigiari tarimari ġetuġurito, benamo Antioka ġana ġevariġoto. Monai veġabidadama tarimari mabarari ġevaġa-veġogorito vau, ġeri fefa ġevinirito.

³¹ Ġia na mo fefa ġeiviatu nai, ġeiatu-rakavato, korana vevaġa-kava guruġana ġeseġaġiato nai.

³² Iudas e Silas, ġia tauġeri tu peroveta tarimari. Ġia tauri ruarua na tarikaka ġeri guruġa ġutuma ġekiraġirito, ġelaunaġirito e ġevaġa-gwaġiġirito.

³³ Ġaro kotari monai ġetanuto murinai, ma mainori ġesi tarikaka na ġetuġu-ġenoġoirito, ġetuġurito tarimari ġeri ai. [³⁴ Senaġi Silas tu eurato Antiokai roġo bene tanu.]

³⁵ Paulo e Banabas tu Antiokai ġetanu-maukato, ma tarima ġutuma ġesi Vereġauka ġena guruġa ġevevaġa-riba iaġiato-ġoi, e ġeġobata-iaġiato-ġoi.

Paulo e Banabas ġeveraġa-kwaneto

³⁶ Ġaro kotari ġevanaġito murinai, Paulo na Banabas evaġa-guruġaiato, ekirato, “Taura ruarua ma siġenoġoi-iaġo, Vereġauka ġena guruġa taġobata-iaġiato-ġoi vanuġari mabarari ġari, tarikakara bitana ġitari, ġeri veġabidadama maġurina tu aiġesina.”

³⁷ Banabas ġena ura tu Ioane Mareko maki neġori-kaua, be ġia ġesi beġene iaġo.

³⁸ Senaġi Paulo asi ġena ura ġia beġene ġori-kaua, korana ġia na Pamfilia ai tu eraga-kwanerito, ema ġia ġesi asi ġeġauveito mo ġeri ġauvei magona.

³⁹ Moġa ġaramanai ġia tauri ruarua veġareveġare baregona ġeveiato. Benamo tauri ruarua ġeveraġa-kwaneto. Banabas na Mareko eġoriatu, bouti ai ġeraġeto, benamo Saipras ġana ġeiaġoto.

⁴⁰ A Paulo na tu Silas eġabi-viriġiato. Tarikaka na Vereġauka ġena varevare-bara vevaġa-namona ġevinirito murinai ġerakato.

⁴¹ Siria e Kilikia tanori na ġeraka-vanaġito, benamo ekalesia doġorori monai ġevaġa-gwaġiġirito-ġoi.

16

Timoteo tu Paulo e Silas ġesi ġeiaġoto

¹ Paulo monana evanaġi-iaġoto Derebe ai ea votuto, ma monana tu eiaġoto Listera ai ea raġasito. Listerai tu Iesu ekorana-iaġiato-ġoi tarimana ta etanuto-ġoi, arana tu Timoteo. Timoteo sinana tu Iuda vavinena, ġia maki eveġabi-dadamato-ġoi vavinena, senaġi tamana tu Griġ tarimana.

² Tarikaka mabarari Listerai e Ikoniai na Timoteo tu tarima namonai ġekiraġiato-ġoi.

³ Paulo eurato Timoteo tu bene ġori-kaua, be ġia ġesi beġene iaġo, moġa lorinai, ġia tauġanina kefina elama-vaġiato. Moġesi ġeveiato, korana monai ġetanuto-ġoi Iuda tarimari mabarari ribari, Timoteo tamana tu Griġ tarimana.

⁴ Vanuġa loriri na ġevanaġi-iaġoto-ġoi nai tu, Ierusalemaj ġetanuni apostolori e ekalesia ġorikauri tarimari na ġevaġa-moġonirito guruġari veġabidadama tarimari ġeri ġekiraġito-ġoi, ġia na beġene korana-iaġiri ġana.

⁵ Benamo ekalesia tarimari ġeri veġabidadama ġevaġa-kokorerito, e ġaro mabarari ai ekalesia ġeġutumato-ġoi.

Troas ai - Paulo ġena mata-vanaġi

⁶ Paulo ma karona ġesi Frigia e Galatia tanori nuġari na ġeraka-vanaġito moġo, korana Iauka Veaġa na ekira-ġoirito, Asia tanori ai Barau ġena guruġa asi beġene vari-fiua.

⁷ Misia tano vetoġanai ġeraġasito, benamo Bitinia tanonai ġeraka-toġa ġetato, senaġi Iesu Iaukana asi eurato ġia mo ġana beġene iaġo.

⁸ Moġa lorinai Misia na ġevanaġito, Troas vanuġanai ġea votuto.

⁹ Mo boġi Paulo emata-vanaġito. Ġia na Makedonia tarimana ta ruġataġo eġitaiato, ġia enoġiato-ġoi, ekirato, “Makedonia ġana noiaġoma, noma vaġa-kavama.”

¹⁰ Paulo na mo mata-vanaġi eġitaiato murinai, ġaraga-ġabikavito, Makedonia ġana baġana iaġo ġana. Korana ġaribato, mo tu Barau na ekeamato, mo tarimarima ġeri ai Vari Namona baġana fiua ġana.

Filipi ai - Lidia ġena vetuġamaġi-kure

¹¹ Moġa lorinai Troas ai bouti ai ġeraġeto, benamo maoromaoro Samotrake motumotu ġana ġeiaġoto. Monai ġagenato, elaġanito vau Neapoli ġana ġeiaġoto.

¹² Monana ġunika ġana ġeiaġoto mo, Filipi ai ġeraġasito. Filipi ai Makedonia tanonai vanuġa baregona eruġa-ġuinetu vanuġana, e Roma ġeri gabu. Monai ġaro kotari ġatanuto.

¹³ Sabadi ai, vanuġa maġuna ġatama bokana na ġaraka-rosito, ġaruka rekena ġana ġeiaġoto, ġai ġatuġamaġito, Iuda tarimari ġeri ġauġau gabuna ta tu monai. Ġai ġatanutarito, benamo mo ġaruka rikinai ġeveġogoto vavineri ġavaġa-guruġarito.

¹⁴ Monai eseġaġimato-ġoi vavinena ta arana Lidia, Taiatira vavinena. Ġia tu voiri barego dabuġari evoivoi-iaġirito-ġoi. Ġia tu Barau etoma-rakarigo viniato-ġoi vavinena. Ġia Vereġauka na nuġana ekeoato, benamo Paulo na kara ekiraġiato-ġoi eseġaġiato ma eġabi-raġeato.

¹⁵ Ġia ma ġena numa tarimari ġesi babatiso ġeġabiato murinai, ġia na enoġimato, ekirato, “Bema ġovetuġamaġini au tu Vereġauka ġenai moġoni aveġabidadamani nai tu, si-iaġo, be au ġegu numai bitana tanu.” Benamo ġia na nuġama eġanirito, benamo ġia ġesi ġeiaġoto.

Filipi dibura numanai

¹⁶ Ġaro ta ġauġau gabuna ġana ġaiagħoto-ġoi nuġanai, vetuġunaġi ġuiatona ta na edoġarimato. Ġia tu iauka rakavana ta na eboroġiato, ma ġoirai kara beġe ġorani dagarari ekiraġi-foforirito-ġoi. Ġoirai beġe ġorani dagarari ekiraġi-foforirito-ġoi nai tu, ġitaġauna tarimari ġeri moni ġutuma evaġa-ġorarito-ġoi.

¹⁷ Mo ġuiato na Paulo e ġai mabarama murima na eiaġomato, ekoġoto-ġoi, maiġesi ekirato-ġoi, "Maiġeri tarima tu Iaru-korokoro Barauna ġena vetuġunaġi tarimari! Vevaga-maġuri kamasi boġo ġabiani dabarana varina ġefiuani."

¹⁸ Ġaro vovoka moġesi eveito-ġoi, eiaġoto mo, Paulo eharuto, benamo eruġa-kureto, mo iauka rakavana ekiraiato, ekirato, "Iesu Keriso aranai au na akiramuni, mani kekeni ġenana noraka-vaġi!" Benamo mo horai moġo iauka rakavana mo ġuiato ġenana eraka-vaġito.

¹⁹ Mo ġuiato ġitaġauna tarimari ġeribato, ġia ġeri moni doġari dabarana ekorito, benamo ġia na Paulo e Silas ġeġabi-taririto, taravatu tauri ġeri ai maketi gabuna ġana ġeinu-iaġorito.

²⁰ Kota ġeseġaġini tarimari ġoirari ai ġevaġa-ruġarito vau ġekirato, "Mai tu Iuda tarimari. Ġia na ġita ġera vanuġa baregonai rakava ġevaġa-ġoraiani.

²¹ Ema ġia na ġevaġa-riba iaġirini veġari ġita ġera taravatu na tu asi eġabi-raġerini. Ġita tu Roma tarimara, ġia ġeri veġa tu asi bita ġabi-raġerini e asi bita veirini riba."

²² Tarimarima ġutuma-bara ġia ġesi ġekauto, Paulo e Silas ġeguru-vinirito. Benamo Kota ġeseġaġini tarimari na Paulo e Silas ġeri dabuġa ġedarerito, benamo mo ġutuma-bara ġekirarito, beġene kwariri.

²³ Ġekwari-biruġa biruġarito murinai, dibura numai ġefiu-toġarito, ema dibura numa ġitaġauna tarimana ġekiraiato, bene ġitaġau-ġinikauri.

²⁴ Ġia na mo vevaġa-naġi guruġana eseġaġiato, benamo dibura numana nuġana buroburonai efiu-togarito. Kwakuri tu ġau duduri baregori ma metori vekaravari ai ebaru-taririto.

²⁵ Boġi nuġanai Paulo e Silas tu ġeġurigurito-ġoi e Barau vaġa-raġena mariri ġeġabirito-ġoi, ma dibura numa tarimari kotari na tu ġeseġaġi-taġorito-ġoi.

²⁶ Asikauna tano-iaġa baregona eraġasito, dibura numana korana duġuri maki eġareva-ġareva vinubato. Vaġa-sebo ġatama-boka mabarari ġevekeoto, e dibura tarimari ġebarurito seiniri mabarari ġeketoketo-vaġito.

²⁷ Dibura numana ġitaġauna tarimana etataġato, mo ġatama-boka mabarari eġitarito tu vekeo. Ġena tuġamaġi dibura tarimari mabarari tu ġeraga-lemato etato, benamo ġena vetari baġana einu-vaġiato, ma tauġena nevevaġi-mase etato.

²⁸ Senaġi Paulo na eġaba-viniato, ekirato, "Tauġemu asi novevaġa-rakava! Ġai mabarama tu maiġema!"

²⁹ Dibura numa ġitaġauna tarimana kere keari eveito, eraga-toġato, benamo ma ġoġo-ġoġona ġesi Paulo e Silas kwakuri korari ai ea keto-tarito.

³⁰ Benamo monana eġori-rosirito ma edanaġirito, ekirato, "Vere tarimami, au tu kamasi baveini vau maġuri badoġariani?"

³¹ Ġia na ġevaġa-veveato, ġekirato, "Iesu Vereġauka bono ġabidadama-vinia, benamo maġuri boġabiani, ġoi e ġemu numa tarimari mabarari."

³² Benamo ġia na Vereġauka ġena guruġa, ġia ma ġena numa tarimari mabarari ġesi, ġeri ġekiraġito.

³³ Mo boġi horanai moġo, dibura numa ġitaġauna tarimana na tauri ruarua eġori-iaġorito, manuġari ea gurigirito, ema ġia ma ġena numa tarimari mabarari ġesi mo boġi sebonai ġebabatisorita.

³⁴ Moġa murinai ġia na Paulo e Silas ġena numa nuġanai eġori-toġarito, benamo ġaniġani evinirito, ġeġanito. Ma ġia ma ġena numa tarimari ġesi tu iaku na ġevonuto, korana ġia toma tu Barau ġenai ġeveġabidadamani.

³⁵ Boġiboġi, Kota ġeseġaġini tarimari na vetuġunaġi-iaġovini tarimari ġetuġurito, ġekirato, "Mani dibura numai tarimari ruarua goa tuġu-vaġiri."

³⁶ Benamo dibura numa ġitaġauna tauna na Paulo ekira-varaiato, ekirato, "Kota ġeseġaġini tarimari na guruġa beġe tuġua, ġoi e Silas tu baġana tuġu-rosimi beġesi. Moġa lorinai ġoraka-rosi ma mainomi ġesi."

³⁷ Senaġi Paulo na vetuġunaġi-iaġovini tarimari ekirarito, ekirato, "Ġai tu Roma tarimama, senaġi ġia na tarimarima ġutuma-bara ġoirari ai ġai ġekwari-kavamato moġo, a ġema rakava tu asi ġevetauato, senaġi dibura numai ġefiu-toġamato. Ma initoma tu vekuretoġai ma ġetuġu-rosima ġetoni? Asiġina ġinavaġi! Ġia tauġeri maiġana beġene iaġoma, benamo ġai beġenema ġori-rosima."

³⁸ Benamo vetuḡunaḡi-iaḡovini tarimari na mo guruḡa Kota ḡeseḡaḡini tarimari ḡekira-vararito. Gia ḡeseḡaḡito Paulo e Silas tu Roma tarimari ai ḡeiaḡoto nai tu ḡegarito.

³⁹ Benamo ḡeiaḡoto, Paulo e Silas ḡenoḡirito, ḡeri rakava beḡene tuḡamaḡi-fitoḡari. Benamo ḡia tauri ruarua dibura numa na ḡetuḡu-rosirito, e ḡenoḡirito, mo vanuḡa barana beḡene raga-kwanea.

⁴⁰ Paulo e Silas na dibura numana ḡeraga-kwaneato, Lidia ḡena numa ḡana ḡeiaḡoto. Monai tarikaka ḡesi ḡevedoḡarito, benamo vevaḡa-gwaḡiḡi guruḡari na ḡevaḡa-kokorerito, benamo ḡerakato.

17

Tesalonika ai

¹ Paulo e Silas na Amfipoli e Apolonia ḡeraka-vanaḡiato, ḡeiaḡoto mo Tesalonikai ḡeraḡasito. Iuda tarimari ḡeri rubu ta tu monai.

² Paulo tu eveito-ḡoi kavana rubu ai eraka-toḡato. Ema Sabadi ḡarori toitoi nuḡari ai, ḡia tu tarimarima ḡesi Buka Veaḡa guruḡari ḡeguruḡa-guruḡa-iaḡirito.

³ Gia ḡeri ekiraḡi-ginikauto-ḡoi, e evaḡa-moḡoniato-ḡoi, Keriso tu bemidigu-midiguni e mase na ma bevariḡisi-ḡenoḡoini. Ema ekirato, “Mai Iesu, varina ḡomi ḡemi afiuanii tarimana, tu Keriso, (Barau na ekiraḡi-toreato vevaḡa-maḡuri tauna).”

⁴ Iuda tarimari kotari na mo guruḡa ḡevaḡa-moḡoniato, benamo Paulo e Silas ḡesi ḡesebonato. Ema Barau ḡetoma-rakarigo viniato-ḡoi Grik tarimari ḡutuma lelevaḡi e vanuḡai ḡeri daḡi barego vavineri ḡutuma maki ḡia ḡesi ḡesebonato.

⁵ Senaḡi Iuda tarimari tu ḡemamato, benamo voivoi gabunai seḡafore lelevaḡi tarimari kotari ḡeḡabi-vegogorito, seḡafore doḡorona ta ḡesinaiato. Benamo ḡia na gururaḡe e vevaḡi baregona vanuḡa barana nuḡanaḡi ḡeveiato. Ma Iason ḡena numa ḡeraḡeato, Paulo e Silas beḡene doḡariri, be tarimarima ḡoirari ai beḡene ḡori-rosiri ḡana.

⁶ Senaḡi asi gedoḡaririto, benamo Iason e tarikaka kotari ḡeinu-iaḡorito, vanuḡa ḡitaḡauna tauri ḡoirari ḡana, ma koḡori ḡesi ḡekirato, “Tanobara mabarari ai mai tarima na rakava ḡevaḡa-ḡoraiani, ma toma tu mai ḡana beḡe iaḡoma,

⁷ benamo Iason na ḡena numai eḡita-ḡaurini. Gia na Kaisara ḡena taravatu ḡekiraḡi-fitoḡaiani, korana tu ḡekirani, vere barana ta ma ḡetoni. Ḗekirani, mo vere arana tu Iesu.”

⁸ Vanuḡa tarimari e ḡitataḡona tarimari na mo guruḡa ḡeseḡaḡiato nai, ḡeri daradara ebareḡoto.

⁹ Benamo ḡia na Iason ma karona ḡesi ḡevaḡa-fainirito moḡo, benamo ḡetuḡu-rakarito.

Berea ai

¹⁰ Eboḡito nai tu asikauna tarikaka na Paulo e Silas Berea ḡana ḡeraga-tuḡu-rakarito. Bereai ḡea raḡasito nai tu ḡeiaḡoto, Iuda tarimari ḡeri rubu ḡana.

¹¹ Bereai tarimarima tu tarima namori, dia Tesalonika tarimari kavari. Gia na Barau ḡena guruḡa ḡeseḡaḡiato-ḡoi nai, ḡeura-iaḡi baregoato-ḡoi. Ema ḡaro mabarari ai Buka Veaḡa nuḡanaḡi kara Paulo na ekiraḡiato-ḡoi ḡevetauato-ḡoi. Korana tu ḡeurato-ḡoi beḡene riba, Paulo na kara ekiraḡiato-ḡoi guruḡari tu moḡoni ba, beḡene vava-moḡoniri ḡana.

¹² Iuda tarimari ḡutuma Iesu Keriso ḡevaḡa-moḡoniato; ema Grik vavineri barego-baregori kotari na e Grik tauri ḡutuma maki Iesu Keriso ḡevaḡa-moḡoniato.

¹³ Senaḡi Iuda tarimari Tesalonikai ḡeseḡaḡito, Paulo tu Bereai Barau ḡena guruḡa eḡobata-iaḡiato-ḡoi. Benamo ḡeiaḡoto, vanuḡa tarimari nuḡari ḡea ḡanirito e ḡekira-vaissi vaissirito.

¹⁴ Benamo Paulo tu asikauna tarikaka na kone ḡana ḡetuḡu-rakaaiato; a Silas ema Timoteo tu Bereai ḡetanuto.

¹⁵ Paulo ḡekava-iaḡoato tauri na ḡeḡori-iaḡoato mo Atena. Monana ma ḡeḡenoḡoito Berea ḡana. Gia ḡeḡenoḡoito nai tu, Paulo ḡena keakau guruḡana ta maki ḡeḡwaiato, ekirato, Silas e Timoteo ḡia ḡenai beḡene iaḡo-ḡarimoḡi etato.

Atena ai

¹⁶ Atenai, Paulo na Silas e Timoteo evaḡa-nogarito-ḡoi nuḡanaḡi, mo vanuḡa baregona eḡitaiato tu kwaivakuku na ḡevaḡa-vonuato. Benamo ḡia nuḡana emeto-rakavato.

¹⁷ Moḡa lorinaḡi eiaḡoto Iuda tarimari ḡeri rubu ḡana, Iuda tarimari e irau bese tarimari Barau ḡetoma-rakarigo viniato-ḡoi tarimari ḡesi ḡeguruḡa-guruḡato. Ema ḡaro mabarari ai maketi ai ḡeraka-refoto-ḡoi tarimari evaḡa-guruḡarito-ḡoi.

¹⁸ Vevaḡa-riba tauri irauri, ḡeri ore a ḡekiraḡirito-ḡoi tu Epikurea ema Stoiki, na Paulo ḡeḡoitaḡoato, benamo ḡevaḡa-veḡare veḡareato. Gia kotari ḡevedanaḡito, ḡekirato, “Mai muru-babo tu kara ekiraḡiani?” Ma kotari ḡevaḡa-veseto, ḡekirato, “Gia mai tu noḡa moḡo

barau irauri ekiraġirini.” Ġia moġesi ġekirato, korana Paulo tu Iesu e ġena varigġisi-ġenoġoi varina eġobata-iaġiato-ġoi.

¹⁹ Benamo ġia na Paulo ġeġabiato, Areopago ġorona ġana ġeġori-iaġoato, kanisoro ġevogoto-ġoi gabuna ġana. Benamo monai ġekiraiato, ġekirato, “Ġai ġaurani tu ġariba, mai vevaġa-riba variguna oveiani tu kara okiraġiani?”

²⁰ Ġoi na guruġa tari okiraġirini tu ġai na asi ġeseġaġirini dagarari, naima ġai ġaurani tu aniri baġana ribari.”

²¹ Korana Atena tarimari mabarari e irau gabu tarimari monai ġetanuni tu, ġauvei ta asi ġveiato-ġoi, senaġi ġia ġeri veġa sebona tu ġaro mabarari ai mo guruġa variguri moġo ġekiraġi-taġorito-ġoi e ġeseġaġi-taġorito-ġoi.

²² Benamo Paulo tu Areopago vegogona nuġana na eruġa-vaisito, benamo ekirato, “Atena tarimami! Au na ġomi aġitamini, ġomi tu ġemi barau ġeri ai ġovetuġamaġikau-barego korikorini.

²³ Korana ġemi vanuġai arakaorakaoni e ġemi toma-rakarigo gaburi aġitarito nai tu, au na fata veaġana ta aġitaato, iatanai tu mai guruġa ġetoreato, ‘ASI RIBAMA BARAUNA ĠENA.’ Moġa lorinai mo asi ribami Barauna, ġomi na ġotoma-rakarigo viniani tu, toma au na akira-varamini.

²⁴ Tanobara e tanobara nuġanai ġetanuni dagarari mabarari eveirito Barauna tu guba e tanobara verena. Ġia tu tarimarima ġimari na ġeragarito rubu veaġari ai tu asi etanuni.

²⁵ Ġia tu dagara tai asi erabuto, be tarimarima ġimari na ġia ġena tu asi beġe veiani riba. Ġia tauġena na tarimarima mabarari maġuri evinirini, iaġari ema dagara mabarari evinirini.

²⁶ Tarima sebona ġenana ġia na tarimarima beseri mabarari evaġa-ġorarito, ema tanobara mabarana beġene tanu-iaġia etato. Ġia tauġena na ġeri maġuri laġaniri ema ġeri tanu gaburi korikori eboioġa-guinerito.

²⁷ Barau na moġesi eveiato, korana ġia beġene ġita-vetaua ġana; ema beġene vetau-kokore kokorea, benamo beġene doġaria. Oba, Barau e ġita tata vefakara tu asi manaġa.

²⁸ ‘Korana ġita tu, ġia koranai tamaġurini, taġareva-ġarevani e roġo tamaġuri-taġoni.’ Ġemi mari ġegarani e ġesisiba-iaġirini tauri na ġekiraġiato kavana, ġekirato, ‘Ġita maki ġia natuna.’

²⁹ Ġita tu Barau natuna lorinai, asi bitana tuġamaġi, Barau tu golo, silva, o fore, tarimarima ġena boioġai ema ribai ekororito dagarari kavana.

³⁰ Guinenai tarimarima tu asi ġeri ribamaoro nai, Barau na moġeri tu eġita-ragakwanerito. Senaġi toma tu, ġia na tarimarima mabarari gabu mabarari ai ekirarini, beġene vetuġamaġi-kure.

³¹ Korana ġia na ġaro ta ekiraġi-toreato, mo ġaro ai ġena ġabivirigi tarimana na tanobarai vevaġa-maoro beveiani ma iobukaiobukana ġesi. Barau na mo tau evaġa-moġoniato tarimarima mabarari ġoirari ai, vetoġana tu mase na evaġa-varigġisi ġenoġoiato.”

³² Mase na varigġisi-ġenoġoina guruġana ġeseġaġito nai, kotari na tu Paulo ġerikiriki-iaġiato. Ma kotari tu ġekirato, “Ġai ġaurani tu, mo vari ġema ma nokiraġi-ġenoġoia.”

³³ Benamo Paulo na mo vegogo eraga-kwaneato.

³⁴ Senaġi tau lakouna tu ġia ġesi ġerakakauto e Barau ġenai ġeveġabidadamato. Ġia fakari ai tu Dionisio, ġia tu Areopago ġoro ai ġevogoto-ġoi tarimana ta, e vavine ta arana Damari, ema tarima kotari maki.

18

Korinto ai

¹ Moġa murinai Paulo na Atena eraga-kwaneato, Korinto ġana eiaġoto.

² Monai ġia na Iuda tarimana arana Akwila eġoitaġoato. Akwila tu Ponto ai emagurito. Ġia tu ġaraġona Priskila ġesi Itali na vau ġeraġasito. Ġia Itali na ġeiaġomato, korana tu Klaudio na Iuda tarimari mabarari ekirarito, Roma beġene raga-kwaneana. Paulo eiaġoto ġia ġeri ai, ea ġitarito.

³ Ġia maki Akwila ma ġaraġona ġesi kavana farai numari eturito-ġoi. Moġa lorinai Paulo monai tu ġia tauri ruarua ġesi etanuto-ġoi ema ġeġauvei-vegogoto-ġoi.

⁴ Sabadi mabarari ai tu Iuda tarimari ġeri rubu ai eġobatato-ġoi, Iuda e Griki tarimari nuġari neġabiri uranai.

Silas e Timoteo ġeraġasito

⁵ Silas e Timoteo Makedonia na ġeraġasito nai, Paulo tu Barau ġena guruġa eġobata-iaġiato-ġoi ġaro mabarana, Iuda tarimari ġeri ai ekiraġi-foforiato-ġoi, Iesu tu moġoni Keriso, (Barau na ekiraġi-toreato vevaġa-maġuri tauna).

⁶ Senaĝi Iuda tarimari na Paulo ĝena guruĝa ĝevaĝa-ĝenoĝoiato, e guruĝa asi namori ĝenai ĝekira-veĝare veĝareato nai, Paulo na ĝena dabuĝa ekorakoraĭato ĝia ĝoirari ai vauro evaĝa-guruĝa gwaĝiĝi-vinirito, ekirato, “Ĝomi rarami verebana tu tauĝemi iatami ai! Au ĝegu ai vereba ta asiĝina. Toma au tu aiagoni irau bese tarimari ĝeri ai.”

⁷ Benamo mo rubu na eraka-rosito, eiagoto, irau bese tarimana arana Titio Iusto ĝena numa ĝana. Titio tu Barau etoma-rakarigo viniato-ĝoi tarimana, ma ĝena numa tu rubu sebinai mogo.

⁸ Krispo, rubu ĝorikauna tarimana e ĝena numa tarimari mabarari ĝesi tu Vereĝauka ĝeĝabidadama-viniato-ĝoi. Ema Korinto tarimari ĝutuma na maki vari ĝeseĝaĝiato, benamo ĝevaĝa-moĝoniato ema babatiso ĝeĝabito.

⁹ Boĝi tai Vereĝauka na Paulo mata-vanaĝi ai evaĝa-guruĝaiato, ekirato, “Asi bono gari, murumu asi bene kafu, bono guruĝa!

¹⁰ Korana au tu ĝoi ĝesi bene; ta na asi beiagō-vinimuni e asi bevaĝa-rakavamuni riba, korana au ĝegu tarimarima tu ĝutuma mai vanuĝa baregonai.”

¹¹ Moĝa lorinai Paulo monai etanuto laĝani ta e ĝue imaima sebona (6); Barau ĝena guruĝa tarimarima evaĝa-riba iaĝirito-ĝoi.

¹² Galio tu Akaia tanona ĝeri gavana ĝauveina eveito-ĝoi nuĝanai, Iuda tarimari ĝeĝaru-vegogoto, Paulo ĝeĝabi-tariato, Kota gabuna ĝana ĝeĝori-iaĝoato.

¹³ Ĝekirato, “Mai tarima na tarimarima nuĝari eĝanirini, ma taravatu na asi ekiraĝiani maĝurinai Barau beĝene toma-rakarigo vinia etoni.”

¹⁴ Paulo neguruĝa etato nuĝanai, Galio na Iuda tarimari ekirarito, ekirato, “Ĝomi Iuda tarimami, bema veĝa rakavana tai o kerere baregona tai bogoro samani nai tu, bara seĝaĝi-vinimi riba.

¹⁵ Senaĝi mani veĝareveĝare tu vevaĝa-riba, e ara, ema tauĝemi ĝemi taravatu veĝareveĝareri, naima tauĝemi na boĝono vei-roroĝotori. Au na maniĝesina dagarari Kotai tu asi baseĝaĝirini!”

¹⁶ Benamo ĝia na Kota gabuna na elai-rosirito.

¹⁷ Ĝia mabarari na rubu ĝorikauna tarimana, Sostene, ĝeĝabi-tariato, Kota gabuna ĝoiranai benamo ĝekwari-korukoruato. Ma Galio tu eĝitarito senaĝi eboĝe-ĝuiragito moĝo.

Paulo Antioka ĝana eĝenoĝoito

¹⁸ Paulo Korinto ai tarikaka veĝabidadama nuĝanai tarimari ĝesi tu ĝaro kota vovoka roĝo ma ĝetanuto. Moĝa murinai eraga-kwanerito, benamo Priskila e Akwila ĝesi bouti ta Siria ĝana ĝeiagoto. Kenkrea na roĝosi beĝere raka nuĝanai, ĝia tu debana ĝeraroato, korana ĝena kiraĝitore gwaĝiĝina ta Barau ĝenai eveiato nai.

¹⁹ Efeso ai ĝeraĝasito, benamo Paulo na Priskila e Akwila monai eraga-kwanerito. Ĝia tu Iuda tarimari ĝeri rubu ai eraka-toĝato benamo Iuda tarimari ĝesi ĝea guruĝa-guruĝato.

²⁰ Ĝia na ĝenoĝiato, monai Iuda tarimari ĝesi roĝo bene tanu, senaĝi ĝeri noĝinoĝi asi eĝabi-raĝeato.

²¹ Senaĝi ĝena rakai tu iniĝesi evaĝa-guruĝarito, ekirato, “Bema Barau beuranai nai, ĝomi ĝemi ai ma baĝenoĝoi-iaĝomani.” Benamo bouti ai ea raĝekauto, ma Efeso eraga-kwaneato.

²² Kaisareai eraĝasito nai, kwakuna na Ieruselema ĝana evaraĝeto, ekalesia ĝesi ĝea veĝoitaĝoto vauro, Antioka ĝana evariĝo-iaĝoto.

²³ Ĝaro kotari monai etanuto murinai, Galatia e Frigia tanori ĝana eiagoto, Iesu ĝekorana-iaĝiato-ĝoi tarimari mabarari gabu tatai ĝetanuto-ĝoi tarimari ea vaĝa-kokorerito.

²⁴ Mo horai Iuda tarimana ta arana Apolos, Alesandria ai emaĝurito tarimana, Efeso ĝana eiagoto. Ĝia ĝena riba tu varage lelevaĝi, guruĝai namo vedaurea e Buka Veaga maki eriba-ginikau-raĝeato.

²⁵ Ĝia tu Vereĝauka ĝena dabara ĝevaĝa-ribaiato, benamo nuĝana mabarana ĝesi Iesu varina efiuato, e evaĝa-riba-iaĝi ginikauato. Dagara sebona, ĝia tu Ioane ĝena babatiso moĝo eribaiato.

²⁶ Rubu nuĝanai eĝobatato-ĝoi ma kokorena ĝesi. Monai Priskila e Akwila na ĝeseĝaĝiato, benamo ĝeĝori-kauato, ĝia ĝetanuni numana ĝana ĝeĝori-iaĝoato, monai vauro Barau ĝena dabara moĝonina ĝevaĝa-riba ginikauato.

²⁷ Benamo Apolos eurato, Akaia ĝana bene iaĝo. Moĝa lorinai tarikaka Efeso ai ĝetanuni na ĝevaĝa-kavaiato, e fefa ta ĝetoreato Akaiai Iesu ĝekorana-iaĝiato-ĝoi tarimari ĝeri, ĝenoĝirito, Apolos eiagoni nai beĝene ĝabi-raĝea. Apolos ea raĝasito nai tu, Barau ĝena varevare-bara ĝenana Barau ĝevaĝa-moĝoniato tarimari tu vevaĝa-kava barego Apolos ĝenana ĝedoĝariato.

²⁸ Korana ġena guruġa kokoreri ġerina Iuda tarimari evaġa-ketorito tarimarima ġutuma ġoirari ai, Apolos na Buka Veaġa na ġeri evaġa-moġoniatu-ġoi Iesu tu Keriso, (Barau na ekiraġi-toreato vevaġa-maġuri tauna).

19

Paulo Efeso ai

¹ Apolos tu Korinto ai etanuto-ġoi nai, Paulo gunika rekena na eiaġoto mo Efeso ai ea raġasito. Monai Iesu ġekorana-iaġiatu-ġoi tarimari tari edoġaririto,

² benamo edanaġirito, ekirato, “Iesu ġenai ġoveġabidadamato nai, Iauka Veaġa ġogabiato ba?” Ġia ġevaġa-veseto, ġekirato, “Asiġina, ġai tu Iauka Veaġa maki etanuni guruġana ta tu roġosi maki baġana seġaġia.”

³ Benamo Paulo na ma edanaġirito, ekirato, “Be ġomi na tu kamara babatiso ġogabiato?” Ġia ġevaġa-veseto, ġekirato, “Ioane ġena babatiso.”

⁴ Benamo Paulo ekirato, “Ioane tu rakava ġerina ġevetuġamaġi-kureto tarimari eba-batorito, ema Isaraela tarimari ekirarito, ġia murina na beiġomani tarimana beġene ġabidadama-vinia, mo tu Iesu.”

⁵ Mo guruġa ġeseġaiato nai, Vereġauka Iesu aranai babatiso ġeġabiato.

⁶ Paulo ġimana ġia iatari ai etore-kaurito nai tu, Iauka Veaġa emariġoto ġia iatari ai. Benamo garo iraurau ai ġeguruġato, e Barau na ġia ġeri ai evaġa-foforirito guruġari ġevari-fiurito.

⁷ Tauri mabarari tu gabanana ruarua (12) kavana.

⁸ Paulo monai ġue toitoi etanuto. Ma vanaġivanaġi rubu ai eraka-toġato-ġoi, Barau ġena Basileia, (ġena veġitaġau seġukana evaġa-ruġaiani maġa), eġobata-iaġiatu-ġoi ma kokorena ġesi, ema tarimarima ġesi ġeguruġa-iaġiatu-ġoi e nuġari eġanirito-ġoi.

⁹ Senaġi tari nuġari tu bubu, be asi ġeseġaġi-viniato, ema tarimarima ġutuma ġoirari ai Vereġauka ġena dabara iatanai guruġa tu rakavari ġekiraġito. Moġa lorina Paulu na eraga-kwanerito, Iesu ġekorana-iaġiatu-ġoi tarimari moġo eġori-kaurito, benamo ġaro mabarari ai Tirano ġena vevaġa-riba numanai evaġa-ribarito-ġoi.

¹⁰ Laġani ruarua moġesina eveito, moġesina naima Asia tanonai ġetanuto-ġoi Iuda tarimari e Grik tarimari mabarari na Barau ġena guruġa ġeseġaġiato.

Skeva natuna

¹¹ Barau na Paulo ġenana veġa boruri irauri eveirito.

¹² Ġia na eġauvei-iaġirito-ġoi mukori e eriġorito-ġoi dabuġari keve tarimari ġeri ai ġeġabi-iaġorito-ġoi nai tu, ġeri keve ġenamoto-ġoi, e iauka rakavari ġia ġerina ġeraka-vaġito-ġoi.

¹³ Iuda tarimari kotari monai ġerakaoto-ġoi ma iauka rakavari ġelai-vaġirito-ġoi tauri na maki Vereġauka Iesu arana ġevatoato iauka rakavari na ġeboroġirito tarimari iatari ai. Iauka rakavari ġekirarito, ġekirato-ġoi, “Paulo na eġobata-iaġiani tarimana Iesu aranai akiramini, ġoraka-vaġi.”

¹⁴ Skeva, Iuda ġeri Rubu Veaġa verena baregona ta, natuna merori imaima ruarua (7) tu moġesina ġevaito-ġoi.

¹⁵ Benamo ġaro ta iauka rakavana na ekirarito, ekirato, “Iesu tu au ribagu, ema Paulo maki ma ribagu, a ġomi tu deikara?”

¹⁶ Benamo iauka rakavana na eboroġiatu tarimana na tauri imaima ruarua (7) na eguru-vinirito, ebota-korukuririto. Evaġa-vevaġi rakavarito, be mo numa na ġema raga-roso tu kefiru kori e ma rarari.

¹⁷ Efeso ai ġetanuto-ġoi tarimari, Iuda e Grik tarimari mabarari, na mo vari ġeseġaġiatu nai, ġegari-rakava rakavato, ema Iesu Vereġauka arana ġevaġa-raġe baregoato.

¹⁸ Iesu ġevaġa-moġoniatu tarimari vovoka ġeiaġomato, benamo ġutuma ġoirari ai ġeri veġa rakavari ġekiraġi-foforirito.

¹⁹ Meġameġa tarimari ġutuma ġeri meġa bukari ġeġwa-vegogorito, benamo tarimarima mabarari ġoirari ai ġegaburito. Mo buka voiri ġevaġa-vegogorito tu silva moniri 50,000.

²⁰ Mai veġa seġukari ġeġorato ġerina Vereġauka ġena guruġa eraga-rovorovoto, e ebareġoto ma seġukana ġesi.

Efeso ai gururaġe baregona eġorato

²¹ Moġeri muriri ai Paulo nuġanai etuġamaġito, Makedonia e Akaia tanori na bene vanaġi-iaġo Ierusalemna ġana. Ekirato, “Mo ġana bana iaġo murinai, Roma maki bana ġitaia.”

²² Benamo Timoteo e Erasto, ġia ġevaġa-kavaiatu-ġoi tarimari ruarua, Makedonia ġana etuġ-iaġorito, a ġia tu Asia tanonai kota roġo etanu-maukato.

²³ Mo ġaro sebonai Efeso ai gururaġe baregona eġorato, korana Vereġauka ġena Dabara dainai.

²⁴ Monai silva eġauvei-iaġirito-ġoi tarimana ta arana Demetrio, ġia na barau vavinena arana Diana ġena rubu baregona ġitaġitana ilailanai rubu misimisiri silva na eveirito-ġoi. Monana ġena ġauvei tarimari moni boruri barego vedaurea ġedoġarito.

²⁵ Benamo Demetrio na ġia mabarari, e ġia ġeri ġauvei kavana tarimari ekea-vegogorito, ma ekirarito, ekirato, “Tau, ġomi tau mabarami ribami ġita ġera moni tu mai ġauvei na eiaġomani.

²⁶ Toma ġomi tauġemi na ġoġitaiani e ġoseġaġiani, mai tarima Paulo na kara eveiani. Ġia ekirani, tarimarima ġimari na ġeveirini barauri tu dia barau, ema ġia na tarimarima ġutuma-bara nuġari eġanirini, e eġori-veġitarini, dia Efeso ai moġo, senaġi Asia tanona mabarana maki.

²⁷ Mai tu dia ġita ġera ġauvei namona arana moġo evaġa-rakavaiani, senaġi barau vavinena baregona, Diana, ġena rubu maki asi aninai beġe vaġa-iaġoani, e Diana iaru-korokorona asi ma beġe vevato-iaġiani; aba, mai barau vavinena tu Asia tarimari mabarari e tanobara mabarana na ġetoma-rakarigo viniani.”

²⁸ Mo guruġa ġeseġaġiato nai, ġebaru-rakava rakavato, e ġekoġoto, ġekirato, “Efeso barauna Diana tu iaru-korokoro!”

²⁹ Benamo mo guru baregona eraġeto na mo vanuġa barana mabarana tu iauvoiauvo e daradara na eġauato. Ma Paulo ġesi ġerakao-vegogoto-ġoi Makedonia tarimari ruarua, Gaius e Aristako, tu ġeġabi-taririto, benamo marere gabuna ġana ġeġori-ragaraga-iaġorito.

³⁰ Paulo ġena ura tu tarimarima ġutuma-bara ġoirari ai bene raka-rosi, senaġi Iesu ġekorana-iaġiato-ġoi tarimari asi ġeurato, ma ġeruġa-ġauato.

³¹ Asia vereri kotari Paulo ġatana. Ġia na maki ġena guruġa ġetuġuto, ġenoġiato, marere gabunai asi bene fofori.

³² Mo vegogo nuġanai daradara asikeikeina eġorato, korana tarimarima mabarari irau ġababaġabana keakeana ġeiaġoto. Ġeġabato-ġoi e ġekeato-ġoi nai, tari tu guruġa ta ġekiraġiato-ġoi, ma kotari tu guruġa boruri tari ġekiraġirito-ġoi, korana tarima ġutuma tu asi ribari kara dainai ġea ġaru-vegogoto.

³³ Iuda tarimari na Alesanda mo ġutuma-bara nuġana na ġetuġu-rosiato, tarimarima ġoirari ai ea ruġato, Iuda tarimari iatari ai bene guruġa ġana. Benamo Alesanda ġimana na tarimarima elau-taririto asi beġene gururaġe ġana.

³⁴ Senaġi ġeġita-leaiato, ġia tu Iuda tarimana nai, mabarari vaġa-sebo mai guruġa sebona moġo ġekoġo-iaġi ġenoġoi-ġenoġiato-ġoi, ġekirato-ġoi, “Efeso barauna, Diana, tu iaru-korokoro!”

³⁵ Vanuġa ġena toretore tauna o klak mo tarimarima ġutuma evaġa-magorito, benamo ekirato, “Efeso tarimami, tarimarima mabarari ma ribari, Efeso tu Diana barau vavinena baregona ġena rubu ġitaġauna vanuġana, e guba na fore veaġana Diana ilailanai dagarana eketo-firigoto ġitaġauna vanuġana maki.

³⁶ Tarima ta na maiġeri dagara asi bekira-ġuniġaurini riba. Moġa lorinai asi ġoguru-raġe, asi ġovei-taġuitaġui.

³⁷ Mai tarimarima na rubu dagarana ta tu asi beġe lemaia, e ġera barau vavinena ġenai maki guruġa rakavana ta asi beġe kiraġi, senaġi ġomi na maiġana boġo ġori-iaġoma-kavari.

³⁸ Bema Demetrio ma ġena ġauvei tauri ġesi ma ġeri baru tarima ta ġenai nai tu, ġita tu ma ġera gavana, ġera Kota ġarori tu vekeo. Monai vauro beġene vei-rorogotori.

³⁹ Bema ġourani dagara ta ma boġono kiraġia nai tu, taravatu na evaġa-moġoniato vegogonai vauro beġene guruġa-iaġia.

⁴⁰ Toma kara beġora korana beġe danaġirani nai, ġita tu bita kerereni. Korana mai gururaġe baregona bita veia tu asi tauna ta, e ġera ġaru-vegogo kava anina tu asi bita kiraġiani riba.”

⁴¹ Eguruġa-ġosito murinai, ġevegogoto tarimari etuġu-rovorovorito.

20

Paulo tu Makedonia e Grik ġana eiaġoto

¹ Mo daradara nuġanai ġekoġoto-ġoi, ġeġabato-ġoi, moġa emeġomeġo-tarito murinai, Paulo na Iesu ġekorana-iaġiato-ġoi tarimari ekea-vegogorito; benamo elaunaġirito murinai, eġabi-tuġurito. Benamo ġia tu ma erakato Makedonia ġana.

² Mo gabu nuġari na eraka-vanaġito-ġoi nai, guruġa ġutuma ekiraġito, tarimarima evaġa-kokorerito-ġoi. Monana eiaġoto mo, Grik ai evotuto.

³ Monai ġue toitoi etanuto. Bouti na Siria ġana bene iaġo ġana eġabi-kavito-ġoi nuġanai tu eseġaġito, Iuda tarimari na tu ġia beġene vaġia boioġana ġetogaiato-ġoi. Moġa Iorinai Makedonia na dabarai bene ġenogoi-vanaġi etato.

⁴ Tarima kotari na ġia ġekavaiato, tarimari tu maġġeri: Sopata Piro, Berea tarimana; Aristako e Sekundo, Tesalonika tauri; Gaius, Derebe tarimana; Tikiko e Trofimo, Asia tauri; e Timoteo. Moġeri na ġekavaiato, Asia ġana ġeiaġoto.

⁵ Ġia tu ġeraka-guineto, Troas ai vau ġai ġea vaġa-nogamato.

⁶ Senaġi ġai tu Asi Etubuni Faraona Verekona ekorito murinai vau, Filipi ġaraga-kwaneato. Ġaro imaima (5) ġekorito vau, ġia ġeri ai Troas ai ġavotuto, ġavedoġarito. Monai tu ġaro imaima ruarua (7) ġatanuto.

Paulo ġena iaġoiaġo magona Troas ai

⁷ Fura sebona ġena ġaro ġiniguinenai o Sandei ai ġaraka-vegogoto anibou baġana ġani ġana. Benamo Paulo na mo lavilavi tu tarimarima eġobata-vinirito, eiaġoto mo, boġi nuġana, korana belagani ġia tu berakani nai.

⁸ Mo numa tuġuna daiġutunai ġai ġavegogoto, moġa lamefa na tu asisebo ġevaġa-ġararito.

⁹ Mero futuana ta arana Eutiko tu windoa nuġanai etanuto. Paulo ġena guruġa emauka-iaġoto-ġoi nuġanai, Eutiko matana tu egenagenato-ġoi mo ea ġena-vetuġa-rekwato. Benamo mo numa tuġuna na stori vaġa-toitoina (o third story) na ea keto-firiġoto mo tano ai. Ġea ġabi-vaisiato nai tu mase.

¹⁰ Senaġi Paulo eraka-riġoto, Eutiko iatanai evefiukauto, eregoato, benamo ekirato, "Nuġami asi ġeraġe, ġia tu maġuri!"

¹¹ Moġa murinai numa tuġuna ġana ma evaraġeto, ma farao ebuki-ġutuato, ġeġanito. Ġena guruġa ma esiriġuato, eiaġoto mo elagani, benamo erakato.

¹² Vegogo tarimari na mo futua ġeġoriatto, benamo ma verereri ġesi ġerakato.

Paulo Troas na eiaġoto mo Mileto

¹³ Ġai tu bouti na Aso ġana ġaiġo-guineto, a Paulo tu monai vau ma baġa ġura-kauani. Paulo na tu moġesina ekiramato, korana ġia tu kwakuna na beraka-vanaġini etato.

¹⁴ Aso ai ema doġarimato, benamo ġaġura-kauato, Mitilene ġana ġaiġoto.

¹⁵ Monana bouti na ma ġaiġoto mo elagani vau, Kioso iata-raġenai ġadarokauto. Mo ġaro murinai tu Samo ai ma ġavotuto, ma ġaro ta ma evanaġiato vau, Mileto ai ġaraġasito.

¹⁶ Paulo eurato, Efeso tu beġene raga-vanaġia, Asia tanonai ġaro kotari beġe vaġa-koririni garina, korana ġia nuġana eġariġarito-ġoi. Ġena ura bema ma dabarana nai tu, Ierusalem ai beġene votu vau, Pentekoste ġarona bene raġasi, mo tu Pasova ġaro gabana imaima (50) murinai.

Paulo ġena veġabituġu guruġari Efeso ekalesiana ġorikauna tauri ġeri ai

¹⁷ Paulo tu Mileto vanuġana na Efeso ekalesia ġorikauna tauri ġeri guruġa etuġu-iaġoto, ekirarito, beġene iaġoma, ġia ġesi beġenema vedoġari.

¹⁸ Ġia ġema votuto nai, evaġa-gurugarito, ekirato, "Ġomi ma ribami au ġaro mabarari ai ġomi ġesi tatanuto-ġoi nai, aiġesina atanuto, ġaro tovotovona na Asia tanonai ama raġasito vegata.

¹⁹ Ġaro vovoka Iuda tarimari ġeurato-ġoi au beġene kougu, veiġa rakavari ġutuma au ġegu ai ġeveirito-ġoi. Senaġi nuġagu ma maranana ġesi moġo e ma taġigu ġesi Vereġauka vetuġunaġina aiġo-vinito-ġoi.

²⁰ Ġomi ribami, vaġa-kava-iaġimi guruġari mabarari avaġa-ribamito, ta asi akure-toġaiato, ġemi numai e ġutuma ġoirari ai avevaġa-ribato-ġoi nai.

²¹ Iuda tarimari e Grik tarimari ġoirari ai aguruġa-foforito-ġoi, ġeri rakava ġerina beġene vetuġamaġi-kure, Barau ġenai beġene ġenoġoi, ema ġera Vereġauka Iesu Ġeriso beġene ġabidadama-vinia.

²² Au toma tu Ieruselema ġana aiġoni, korana Iauka Veaġa na evaġa-naġiguni nai, ma asi ribagu monai tu kara ġegu ai beġorani.

²³ Dagara sebona moġo au ribagu tu Iauka Veaġa na vanuġa baregori mabarari ai evaġa-ribaguni, au ġoiragu ai tu dibura numa e midigumidigu evaġa-noga taġoguni.

²⁴ Senaġi au ġegu ai, au ġegu maġuri tu asi atuġamaġi-baregoani, kara ġana atoni, ġegu ura sebona tu ġegu raga-iruiru moġo bana vaġa-ġuguru, ema mo ġauvei Vereġauka Iesu na eviniguto, bana veia etato ġauveina, bana vaġa-koria. Mo ġauvei tu: Barau ġena varevare-bara Varina Namona bana kiraġi-foforia.

²⁵ Au tu ġomi mabarami fakami ai arakao-rakaoto, Barau ġena Basileia, (ġena veġitaġau seġukana evaġa-ruġaiani maiġa), ġemi aġobata-iaġiato. A toma au ribagu, ta na asi ma boġita-ġenoġoiguni.

²⁶ Moġa lorinai toma ġaro ġomi ġoirami ai au aguruġa-foforini, bema ġomi ta Barau ġenana beraka-rekwarekwani nai, verebana tu dia au ġegu ai.

²⁷ Korana Barau ġena ura mabarana avaġa-ribamito, misina ta maki asi akira-ġuniġauato.

²⁸ Tauġemi lorimi boġono vetore, ema mamoe serina lorina boġono toreri. Mani mamoe serina tu Iauka Veaġa na evinimito boġono ġitaġauri ġana. Barau ġena ekalesia boġono ġita-ġaua e boġono ġori-kaua. Mani tu ġia Natuna rarana na evoiato.

²⁹ Au ribagu, au barakani murigu ai tu boġa kwaivari rakavari ġomi fakami ai beġe raka-toġani, benamo mani mamoe serina beġe vaġa-rakavaiani.

³⁰ Gomi tauġemi fakami na maki tau kotari beġe variġisini, benamo ġofaġofa guruġari beġe kiragini, Iesu ġekorana-iaġiani tarimari ġia na beġene ġori-ġerevaġiri ġana.

³¹ Moġa lorinai lorimi boġono vetore! Boġono vetuġamaġi-taġo, au na tu laġani toitoi veġata matagu ma taġina ġesi, ġomi asisiba-vini boġimito-ġoi e asisiba-vini laġanimito-ġoi.

³² Toma Barau ġimanai e ġena varevare-bara guruġana nuġanai atoremimi, ġia na tu bevaġa-ruġa-iobukamini ilaila, ema voimi bevinimimi evaġa-veaġarito tarimari mabarari ġesi.

³³ Au na ta ġena silva, o golo, o dabuġa urana asi aveito.

³⁴ Gomi tauġemi ma ribami, au ġegu rabu e karogu ġeri rabu dagarari mabarari tu, mai ġimagu ruarua ġeri ġauvei ġerina aġabito-ġoi.

³⁵ Dagara mabarari nuġari ai au na avaġa-ġita iaġimito-ġoi, au moġesi ġauvei kokorekokore ġerina vauro moira-moira tarimari bitana vaġa-kavari. Iesu Vereġauka ġena guruġa boġono tuġamaġi-taġoa, ekirato, "Varevare iakuna tu barego, a ġevinirani nai taġoitaġoni iakuna tu kei."

³⁶ Paulo eguruġa-ġosito vau, ġia ġesi ġevetui-tarito, benamo mabarari ġesi ġeġuriġurito.

³⁷ Ġia mabarari ġetaġi-rakavato, ġevefaġato, ma ġeverauato.

³⁸ Ġia nuġari ġevewaraġi-rakavato tu maiġesina evaġa-guruġarito nai, ekirato, ġia na ġoirana asi ma beġe ġita-ġenoġoiani. Benamo bouti ġana ġeġori-iaġoato.

21

Paulo Ierusalemia ġana eiaġoto

¹ Ġia ġesi ġaveġabi-tuġuto, benamo ġarakato. Davara na ġaiaġoto, maoromaoro mo Koso ai ġavotuto; ma elaganito vau Rodes ġana ġaiaġoto, monana ma ġaiaġoto Patara.

² Foenikia ġana beiaġoni boutina monai ġadoġarito, ma ġaraġeto, benamo ġaraġato.

³ Ġaboġe-iaġoto Saipras ġaġitaiao, benamo gabina (o south) rekena na ġavanagiato, ġaiaġoto mo Siria ai ġaraġasito. Taia vafuna na vau ġaraka-riġoto, korana mo bouti farefarena tu monai beġe tore-riġorini nai.

⁴ Iesu ġekorana-iaġiato-ġoi tarimari kotari monai ġadoġaririto, ġia ġesi fura o wiki sebona gatanuto. Iauka seġukana ġenana ġia na Paulo ġekiraiao, Ierusalemia ġana asi bene iaġo.

⁵ Senaġi ġema raka ġarona eġabiato, benamo ġarakato. Ġia mabarari ma ġaraġori e ma naturi ġesi vanuġa baregona na ġeġori-rosimato kone ai. Benamo ġai mabarama ġavetuitui-tarito, ġaġurigurito.

⁶ Ġia tata ġesi ġaveġabi-tuġuto, benamo ġai tu bouti baregonai ġaraġeto, a ġia tu monana ġeġenoġito ġeri numa ġari.

⁷ Taia na ġaiaġoto Tolemais. Ġema davara iaġoiaġona dokona moġa. Monai tarikaka tari ġesi ġavedoġarito, ma ġavaġa-namorito, ġia ġesi ġaro sebona gatanuto.

⁸ Elaġanito, benamo kwakuma na ġarakato, ġaiaġoto, Kaisarea ai ġaraġasito. Monai evanelia tarimana arana Filipino ġena numa ġana ġaiaġoto, ġia ġesi gatanuto. Ġia tu Ierusalemia tarima imaima ruarua (7) ġeġabi-viriġirito tarimana ta.

⁹ Ġia natuna ġuiatori vasivasi tu Barau na peroveta varevarena evinirito.

¹⁰ Ġaro vovoka monai gatanuto murinai, peroveta tarimana ta arana Agabo, Iudea na ema raġasito.

¹¹ Ġia tu ġai ġemai eiaġomato, ma Paulo ġena gabaġau eġabi-vaisiato, benamo ġia tauġena kwakuna e ġimana ebarubarurito, benamo ekirato, "Iauka Veaġa tu maiġesi ekirani, 'Mai gabaġau tarimana tu Iuda tarimari na Ierusalemia maiġesina beġe barubaruanai, benamo irau bese tarimari ġimari ai beġe tore-kauani.'"

¹² Mai guruġa ġaseġaġiato nai, ġai ema monai tarima kotari ġesi Paulo ġanoġiato, Ierusalemia ġana asi bene iaġo.

¹³ Senaġi ġia evaġa-veseto, ekirato, “Kara taġina ġoveini e au nuġagu ġovaġa-moiraiiani? Au tu rovinatore, dia Ierusalemaj beġe barubaruguni moġo, senaġi Vereġauka Iesu arana bakunai bamaseni maki.”

¹⁴ Ġai tu asi ilaila ġia nuġana baġa ġaniani nai, ma ġia noġinoġina ġavaġa-dokoato, benamo ġakirato, “Vereġauka ġena ura moġo bene vetore.”

¹⁵ Ġaro kotari ġekorito murinai, ġema farefare ġaġabi-kavirito, benamo Ierusalemaj ġana ġaiaġoto.

¹⁶ Kaisarea ai ġetanuto-ġoi Iesu ġekorana-iaġiato-ġoi tarimari kotari maki ġai ġesi ġaiaġoto. Ġia na ġeġori-iaġomato, Nason, Saipras tarimana, ġena numa ġana. Nason tu kai-veġata na Iesu ekorana-iaġiato-ġoi tarimana.

Paulo na Iakobo (o Iames) eraka-ġitaiato

¹⁷ Ierusalemaj ġaraġasito nai tu, tarikaka na ma iakuri ġesi ġeġabi-raġemato.

¹⁸ Elaġanito, benamo Paulo tu ġai ġesi ġaiaġoto Iakobo ġitaġitana; ma rubu ġorikauna tarimari mabarari tu monai vegogotaġo.

¹⁹ Paulo na evaġa-namorito murinai, ġia ġena ġauvei ġenana Barau na irau bese tarimari kamasi eveirito-ġoi variri mabarari ġeri ekiraġito.

²⁰ Ġia na ġeseġaġiato nai, mabarari na Barau ġevaġa-raġeato. Benamo ġia na Paulo ġekiraiato, ġekirato, “Tarikakama, oġitaiani Iuda tarimari vira-tausen varau Iesu ġeġabidama-viniani, ema taravatu maki ġekorana-iaġi ġigitariani.

²¹ Ġoi varimu tu ġia ġekira-vararito. Ġekirarito, ġoi na irau tano ai ġetanuni Iuda tarimari mabarari ovaġa-ribarini, okirani, Mose ġena taravatu beġene raga-kwaneana, naturi merori tauganiri kefiru asi beġene lama-vaġiri, ema Iuda seneri ġeri veġa asi beġene korana-iaġiri.

²² Be, ġai tu kamasi toma ġaveini? Ġoi boma raġasi varina tu beġe seġaġiani veġata.

²³ Moġa lorinai kara baġa kiravara-vinimuni veġana bono veia. Tauri vasivasi (4) maiġeri, ġia tu kiraġitore gwaġiġina ta ġeveiato Barau ġenai.

²⁴ Ġia ġesi boġono iaġo, e ġoi maki ġia ġesi boġono veiareva, ema beġe ġwa-iaġoni dagarari voiri bono vei, be ġia debari beġe rarorini. Maiġesi boveini vau, tarimarima mabarari beġe ribani, ġoi iatamu ai ġekiraġirito-ġoi guruġari mabarari tu asi mogoni, a ġoi taugemu maki Mose ġena taravatu ilailanai otanuni.

²⁵ Irau bese ġeveġabidadamani tarimari tu ġeri fefa varau ġatuguto, ġakirarito, kwaivakuku ġevinirito ġaniganiri tu asi beġene ġaniri, rara e ġaigori na ġebora-maserini bureġari virigori tu asi beġene ġani, ema asi beġene mata-boraġa.”

²⁶ Benamo Paulo na mo tarima vasivasi evaġa-ġabirito, benamo elaġanito nai, mabarari veiareva ġauveina ġea veiato. Moġa murinai Rubu Veaġi eraka-toġato, ma aitoma veiareva bemagoni ġarona, ema aitoma varevare dagarari ġia tata arari ai betoreni ekiraġi-foforirito.

Iuda tarimari na Paulo Rubu Veaġi ġeġabi-tariato

²⁷ Ġeri veiareva ġauveina tu ġaro imaima ruarua (7); dori ġekorito nuġanai, Iuda tarimari kotari Asia tanona na ġeiaġomato, ġia na Paulo Rubu Veaġi ġeġitaiato. Ġia na tarimarima mabarari nuġari ġeganirito, benamo Paulo ġeġabi-tariato,

²⁸ ġekoġoto, ġekirato, “Isaraela taumi, ġai ġovaġa-kavama! Mai tarima maiġa tu gabu mabarari ġari eiaġoni, tarimarima mabarari evaġa-ribarini; Isaraela tarimari, e Mose ġena taravatu, ema mai Rubu Veaġa asi beġene korana-iaġia etoni. Toma maki, ġia na Grik tarimari mai Rubu Veaġa nuġanai beġori-toġari, mai gabu veaġana bevaġa-rakavaia.”

²⁹ Moġesina ġekirato, korana ġia na Efeso tarimana arana Trofimo, Paulo ġesi mo vanuġa baregonai ġeġitarito, ema ġetugamaġito, ġia tu Paulo na Rubu Veaġi egori-toġaiato.

³⁰ Vanuġa mabarana iauvoiauvo e daradara na eġabiato, ema tarimarima mabarari monai ġema ġaru-vegogoto, benamo Paulo ġeġabi-tariato, Rubu Veaġa na ġeinu-rosiato. Asikauna Rubu Veaġa ġatama-bokari ġebiririto.

³¹ Ġia na Paulo ġevaġi-masea ġetato-ġoi nuġanai, tarima ta eraga-varaġeto, Roma vetari verena baregona ea kira-varaiato, Ierusalemaj mabarana tu gururaġe baregona ġeveiani.

³² Ġia tu asikauna ġena vetari ġitaġauna tarimari e vetari tarimari egoririto, benamo ġeraga-rigoto mo ġutuma-bara ġeri ai. Tarimarima na vetari verena baregona ma ġena vetari tauri o soldia ġesi ġeġitarito nai, ġia na Paulo kwarikwarina ġevaġa-dokoato.

³³ Benamo vetari verena baregona Paulo ġenai eiaġoto, eġabiato, ġena mero ekirarito, sei ni ruarua na beġene baru-taria. Benamo evedanaġito, ekirato, “Mai tu kamara tau, e ġia tu kara beveia?”

³⁴ Mo ġutuma-bara nuġanai tari ġefararato-ġoi; guruġa ta ġekiraġiato-ġoi, ma kotari na tu guruġa ta, be vetari verena baregona na maki guruġa rorogotona ta asi eġabiato. Moġa lorinai ġena mero ekirarito, Paulo tu vetari tarimari ġeri gabu ġana beġene ġori-iaġoa.

³⁵ Raġekau ai ġeġori-votuato nai tu, vetari tarimari na ġefafa-vaissiato, ġeġwa-raġeato, korana mo tarimarima mabarari tu ġeniara-lelevaġito nai.

³⁶ Mo tarimarima mabarari ġia murina na ġeraka-iaġoto tu, ġefararato-ġoi, ġekirato, “Ġovaġi-masea!”

Paulo tauġena evelauġau-tovoto

³⁷ Dori moġo vetari tarimari ġeri numai ġeġori-toġaiato nuġanai, Paulo na vetari verena baregona evaġa-guruġaiato, ekirato, “Bavaġa-guruġamuni lorinai ba?” Ġia na evaġa-veseato, ekirato, “Ġoi Grik ġeri garo ma ribamu?”

³⁸ Be ġoi tu dia mo Aigupito tarimana, ġaro kotari varau beġe iaġo, ġia na gavamani vevaġi-vinina esinaiato, ema vaġideba tarimari daġara vasivasi (4,000), ma ġeri vevaġi farefareri ġesi, tano fakana ġana eġori-iaġorito tarimamu?”

³⁹ Paulo na evaġa-veseato, ekirato, “Au tu Iuda tarimagu, amaġurito vanuġana baregona arana tu Taso, ma arana vanuġana, ġia Kilikia tanonai. Anoġimuni, mani ġemu veiga, mai tarimarima navaġa-guruġari.”

⁴⁰ Vetari verena baregona na maoro eviniato, benamo Paulo raġekau ai eruġato, ġimana na tarimarima elau-taririto. Gururaġe emagoto, benamo Paulo na Heberu garo ai evaġa-guruġarito.

22

¹ “Tarikakagu e tamagu mabarami, ġoirami ai navekiragi-faka, be boġono seġaġi.”

² Ġia ġeseġaġiato, Heberu garo ai evaġa-guruġarito nai, asi gurgururi ai ġeiaġoto, mabarari ġeseġaġi-magomagoto; benamo Paulo ekirato:

³ “Au tu Iuda tarimagu, Taso vanuġanai Kilikia tanona nuġanai amaġurito, senaġi mai Ierusalemata vanuġa baranai abaregato. Gamaliel ġena vevaġa-riba nuġanai atanuto-ġoi, ġia na ġita senera ġeri taravatu veigari gwaġiġiri evaġa-ribaguto-ġoi, ema Barau ġena ġauvei aveiato-ġoi ma kokoregu ġesi, toma ġomi na ġokokore-iaġiani ilailanai.

⁴ Au na mai dabara ġekorana-iaġiato-ġoi tarimari tu avaġa-midigu midigurito-ġoi mo ġea maseto-ġoi. Tau e vavine aġabirito-ġoi, dibura numari ai abubu-toġarito-ġoi.

⁵ Rubu Veaġa verena baregona e kanisoro tarimari mabarari na maki beġe vaġa-moġoniguni, au tu moġoni akirani. Au tu ġia na maki fefa ġeviniguto, tarikaka Iuda tarimari Damaseko ai ġeri bana viniri ġana. Benamo au mo ġana aiaġoto, mai tarimarima bana ġabiri, sei ni na bana barubaruri ma Ierusalemata ġana bana ġori-iaġori, ġeri rakava voiri beġene ġabiri ġana.”

Paulo ġena vetuġamaġi-kure ekiraġiato

⁶ “Au roġo dabara na aiaġoto-ġoi, ma Damaseko akaviniaġiato, ġaro tu tubuagu ai mama baregona ta guba na emariġoto, asikauna ema nanagi-tariguto.

⁷ Au tano ai aketo-tarito, ema garo ta aseġaġiato, au evaġa-guruġaguto, ekirato, ‘Saulo! Saulo! Karase nai au ovaġa-rakavaguni?’

⁸ Benamo au avedanagito, akirato, ‘Vereġauka, ġoi tu deikara?’ Ġia evaġa-veseto, ekirato, ‘Au tu Iesu, Nasareta tarimagu, ġoi na ovaġa-rakavaguni tarimagu.’

⁹ Au karogu maki na mama ġeġitaato, benamo ġegarito, senaġi au eguruġa-viniguto garona tu asi ġeseġaġiato.

¹⁰ Benamo avedanagito, akirato, ‘Vereġauka, au tu kara toma aveiani?’ Vereġauka evaġa-veseto, ekirato, ‘Novariġisi, Damaseko ai noa raka-toġa, monai vau ta na bevaġa-ribamuni, ġoi tu kara boveini.’

¹¹ Mo mama baregona na matagu evei-bubuato, benamo karogu na ġimagu ai ġeġabito, Damaseko ġana ġeġori-iaġoguto.

¹² Monai tau ta arana Anania, ġia tu Barau garina eveito-ġoi e taravatu ekorana-iaġiato-ġoi tarimana, ema Iuda tarimari mabarari Damaseko ai ġetanuto-ġoi na ġegubakau-baregoato-ġoi.

¹³ Ġia eiaġomato sevigu ai ema ruġa-tarito, benamo ekirato, ‘Saulo tarikakagu, matamu ma nefafa.’ Asikauna moġo matagu ġefafato, ġia aġitaato.

¹⁴ Moġa murinai Anania na ekiraguto, ekirato, ‘Ġita senera ġeri Barau na varau beġabivirigimu, ġia ġena ura kara bono veia, bono ribaia. Ema vei iobukaiobuka tarimana bono ġitaia, e ġia tauġena muruna na beguruġani garona bono seġaġi.

¹⁵ Korana ġoi tu ġia bovaġa-moġoniani tarimamu, kara boġita e boseġaġi maiġeri, tarima mabarari bokira-vararini.

¹⁶ Kara ma ovaḡa-nogaiani? Novariḡisi, babatiso noḡabia. Ġia arana nokea-raḡea, benamo ġemu rakava neḡurigi-vaḡiri.’”

Paulo ġena kea irau bese tarimari bene ḡobata-viniri ġana

¹⁷ “Monana Ierusalema ġana aḡenoḡoito, benamo Rubu Veaḡai aḡurigiurito-ḡoi nuḡanai, amata-vanaḡito.

¹⁸ Monai au na Vereḡauka aḡitaiato, au evaḡa-guruḡaguto, ekirato, ‘Noraga-vei, Ierusalema noragakwane-ḡarimogia, korana mainai au varigu bokiraḡiani, senaḡi mai tarimarima na asi beḡe vaḡa-moḡonimuni.’

¹⁹ Au na avaḡa-veseato, akirato, ‘Vereḡauka, ġia tu ma ribari ginikau, au rubu mabarari ġana aiaḡoto-ḡoi, ḡevaḡa-moḡonimuni tarimari aḡabirito-ḡoi, dibura numanai abiri-ḡaurito-ḡoi e akwaririto-ḡoi.

²⁰ Ema ḡoi evaḡa-moḡonimuto-ḡoi tarimana Stefano rarana ḡevaḡa-riḡoato ḡaronai au tu monai, ḡevaḡi-maseato avaḡa-moḡoniato, ema ḡevaḡiato-ḡoi tarimari ḡeri dabuḡa anaririto.’

²¹ Senaḡi Vereḡauka na ekiraguto, ekirato, ‘Noiaḡo, korana au na batuḡumuni, irau bese tarimari gabu manaḡai ḡetanuni tarimari ḡeri ai.’”

²² Tarimarima na Paulo ḡeseḡaḡi-taḡoato-ḡoi, eiaḡoto mo, ġia moḡesi eguruḡato. Benamo ḡefararato, ḡekirato, “Goḡabi-fitoḡaia! Govaḡi-masea! Ġia tu asi ġena namo ta emaḡuri-taḡoni mai tanobarai.”

²³ Geḡabato-ḡoi, ḡeri dabuḡa ḡeiave-iaverito-ḡoi, e forara ḡefiu-vaisito-ḡoi.

²⁴ Roma ḡeri vetari verena baregona na ġena mero ekirarito, Paulo beḡene ḡori-iaḡoa, vetari tarimari ḡeri tanu gabuna ġana. Ema ekirarito beḡene kwaria, e beḡene danaḡia kara ḡaramanai ġia moḡesi ḡeḡabaḡaba-viniani, bene kira-varari.

²⁵ Senaḡi ḡebarubaruato-ḡoi beḡene kwaria ġana nuḡanai Paulo na vetari ḡitaḡauna tarimana ekiraiato, ekirato, “Mai moḡoni taravatu nuḡanai ekiraḡiani, ḡoi na Roma tarimana bokwari-guinea; a ġia na kara bevei-leaia Kota na tu roḡosi bere kira-varaia, senaḡi?”

²⁶ Mo vetari ḡitaḡauna tarimana na mo guruḡa eseḡagiato, benamo eraga-iaḡoto vetari verena baregona ḡenai, ekiraiato, ekirato, “Ḡoi tu kara toma oveiani? Mo tarima tu Roma tarimana!”

²⁷ Moḡa lorinai vetari verena baregona eiaḡoto Paulo ḡenai, benamo ea danaḡiato, ekirato, “Nokira-varagu, ḡoi tu Roma tarimamu ba?” Paulo evaḡa-veseto, ekirato, “Oi.”

²⁸ Benamo vetari verena baregona ekirato, “Au Roma tarimagu ai aiaḡoto tu moni baregona gavamani avinirito.” Paulo evaḡa-veseto, ekirato, “Senaḡi au tu Roma beseri ḡerina aḡorato Roma tarimagu.”

²⁹ Asikauna Paulo beḡe danaḡiani tarimari ḡeruḡa-ḡenoḡoito, ema vetari verena baregona maki egarito, korana eriba-maoroto, Paulo tu Roma tarimana, ġia na ebarubaruato ḡekwaria ġana.

Paulo kanisoro ḡoiranai

³⁰ Ma elaḡanito, vetari verena baregona ġena ura bene riba-maoro, kara dainai Iuda tarimari na Paulo ḡevaḡa-daḡaiato. Moḡa lorinai ġia na Paulo ḡebaruato varori ḡeruḡarito, benamo Rubu Veaḡa vereri baregori e kanisoro mabarana ekirarito beḡene vegogo. Benamo ġia na Paulo eḡori-iaḡoato, ġia ḡoirari ai ea vaḡa-ruḡaiato.

Paulo Iuda ḡeri kanisoro tarimari ḡoirari ai

23

¹ Paulo na kanisoro tarimari eḡita-karakararito, benamo ekirato, “Tarikakagu mabarami! Au tu ma nuḡa iobukaiobukagu ḡesi Barau ḡoiranai atanuni, beiaḡoma mo inította.”

² Paulo moḡesina eguruḡato nai tu, Rubu Veaḡa verena baregona Anania na Paulo sevinaḡi ḡeruḡa-taḡoto-ḡoi tauri ekirarito, Paulo bokana beḡene foro-ḡaua.

³ Benamo Paulo na ekiraiato, ekirato, “Ḡoi tu Barau na beforomuni, ḡoi kobe ḡevaḡa-kurokuroato kavana, rakava asi beḡene ḡitaia ġana, ḡofaḡofa tarimamu! Ḡoi maninai botanu tu taravatu ilailanai au okota-viniguni, senaḡi ḡoi tauḡemu na taravatu boleaia, tarima bokirari, au ḡeforogu bosii!”

⁴ Paulo sevina tauri na ḡekiraiato, ḡekirato, “Ḡoi tu Barau ġena Rubu Veaḡa verena baregona ḡenai guruḡa rakavari okiraḡini!”

⁵ Paulo evaḡa-veseto, ekirato, “Tarikakagu, au tu asi bariba-maoro ġia tu Rubu Veaḡa verena baregona. Korana ribagu Buka Veaḡai tu ekirani, ‘Ḡomi ḡemi vere tu asi boḡono guruḡa-rakava vinia.’”

⁶ Paulo na ġia tari eġitarito tu Sadukea tarimari, ma kotari tu Farisea tarimari, benamo kanisoro ġoiranai ekoġoto, ekirato, “Tari-kakagu, Isaraela tarimami, au tu Farisea tarimagu, Farisea tarimana natuna. Au tu vevaġa-kota gabunai maiġegu, korana au ġegu tuġamaġikau, mase tarimari tu ma beġe varigisi-ġenoġoini!”

⁷ Moġesi ekirato, benamo Farisea tarimari ema Sadukea tarimari ġeveġare-veġareto, ema ġeri vegogo maki evetavi-kirato.

⁸ Korana Sadukea tarimari ġekirani, tarimarima mase na tu asi ma beġe varigisi-ġenoġoini, ema aneru e iauka tu asi ġetanuni; a Farisea tarimari na moġeri mabarari tu ġevaġa-moġonirini.

⁹ Moġesina naima fararafarara guruna ebaregotto-ġoi, nuġanai taravatu ġevevaġa-riba iaġiato-ġoi Farisea tarimari ġeruġa-vaisito, ma kokoreri ġesi ġeguruġato, ġekirato, “Mai tarima ġenai rakava ta tu asi bita doġaria! Bema ġia tu iauka na o aneru ta na moġoni bevaġa-guruġaia nai tu, Barau asi sivaga-vevaġia!”

¹⁰ Veġareveġare eseġu-ġaraġarato nai, vetari ġitaġauna tarimana baregona egarito, Paulo beġe inu-vedare vedareani garina. Moga lorinai ġena vetari tauri ekirarito, beġene rakariġo-iaġo, Paulo beġene ġabi-veġitaia Iuda tarimari fakari na, benamo vetari tauri ġeri numa ġana beġene ġori-iaġo.

¹¹ Ma elaġanito boġinai, Vereġauka Paulo sevinai ema ruġa-tarito, benamo ekirato, “Ġoi na mai Ierusalemaj au okiraġi-foforiguto ilailanai, Romaj maki moġesi bonoa kiraġi-foforigu.”

Paulo vaġivaġina boioġana ġetogato

¹² Ma elaġanito boġiboġinai, Iuda tarimari kotari ġevevogoto, ma boioġa ta ġetogaiato. Ġia na kiraġitore guruġana gwaġiġina ġekiraġiato, ġekirato kara ta asi beġe ġaniani e asi beġe niuani, beiaġoni mo, Paulo beġe vaġiani.

¹³ Mo boioġa ġetoga-vegogoto tauri mabarari tu gabana vasivasi (40) maki evanaġiato.

¹⁴ Benamo ġeiaġoto Rubu Veaġa vereri baregori e Iuda vereri ġeri ai, ma ġea kirato, ġekirato “Ġai tu kiraġitore guruġana gwaġiġina baġa kiraġia, asi baġa ġaniġanini, beiaġoni mo, Paulo baġa vaġi-maseani.

¹⁵ Maitoma ġoi ma kanisoro ġesi noġinoġi guruġana ġotuġu-iaġoa, Roma ġeri vetari verena baregona ġenai, be Paulo ġomi ġemi ai bene tuġu-mariġoa, boġono ġofa-ġaua, boġono kira, ġomi na Paulo ġoura-viniani, korana ġia ġenana guruġa iobukana boġono ġabia ġana. Senaġi ġai tu baġa vaġa-noga-taġoni, mainai roġosi berema raġasi, a ġai na tu baġa vaġi-maseani.”

¹⁶ Senaġi Paulo tobana natuna merona na mo boioġa eseġaġi-kauato, benamo eiaġoto, vetari tauri ġeri numaj eraka-toġato, ma Paulo ekira-varaiato.

¹⁷ Benamo Paulo na vetari ġorikauna tarimana ta ekeaiato, benamo ekiraiato, ekirato, “Mai mero variguna vetari verena baregona ġenai noġori-iaġoa. Korana ġia na ġena guruġa ta beġwa-iaġomaia, bene kira-varaia.”

¹⁸ Ma vetari ġorikauna tarimana na eġori-iaġoato vetari verena baregona ġenai, ekirato, “Dibura numanai tarimana, Paulo na bekeagu e benoġigu, mai mero variguna ġoi ġemu ai bana ġori-iaġomaia, korana ġia na ġemu guruġa ta beġwa-iaġomaia, bene kira-varamu ġana.”

¹⁹ Vetari verena baregona na ġimanai eġabito, eġori-ġerevaġiato vauro, edanaġiato, ekirato, “Kara ourani ġegu nokiraġia?”

²⁰ Ġia ekirato, “Iuda tarimari na guruġa ta beġe vaġa-moġonia, boinani beġene vei-ġofakau, benamo ġoi beġene noġimu, be Paulo bono tuġu-varigoo kanisoro ġoirana ġana. Ġeri veġofaġau guruġana ġoi beġene kiram tu, ġia ġeri ura Paulo varina korikori kotari ma beġene ġabi.

²¹ Senaġi asi bono seġaġi-viniri, korana tau mabarari gabana vasivasi (40) bevanaġia tu beġe gumuni, ġia beġe vaġa-nogaiani. Ġia tu kiraġitore guruġana gwaġiġina ġekiraġiato, asi beġe ġaniġanini e dagara ta asi beġe niuani, beiaġoni mo, Paulo beġe vaġi-maseani. Mo veġa beġene veia ġana, ġia toma tu beġe veikavi, ġoi ġemu vaga-vese moġo ġevaġa-noga taġoani.”

²² Vetari verena baregona na ekiraiato, ekirato, “Au ġegu bokiraġi guruġana maiga, tarima ta asi ma bonoa kira-varaia.” Benamo ġia na mero variguna etuġu-rakaiato.

Paulo Gavana Feliki ġenai etuġu-iaġoato

²³ Benamo vetari verena baregona na ġena vetari ġorikauna tauri ruarua ma ekearito, benamo ekirarito, ekirato, “Vetari tauri sinau ruarua (200), e hosi ai raġe tarimari gabana imaima ma gabana ruarua (70), ema auri fiu tauri sinau ruarua (200) boġono ġabi-toreri, toma boġi horaġauna 9 koloko Kaisarea ġana boġono iaġo ġana.

²⁴ Paulo bene raĝe hosiri tari maki boĝono rovina-toreri, be Gavana Feliki ĝenai maĝuri boĝono ĝori-iaĝoa ĝana.”

²⁵ Benamo vetari verena baregona na fefa ta maigēsina etoreato:

²⁶ “Au Klaudia Lisia na ĝoi Feliki, gavana tarimamu namo vedaureamu, atore-vinimuni: Avaĝa-namomuni!

²⁷ Iuda tarimari na mai tau ĝeĝabiato, ma dori moĝo ĝevaĝi-maseato. Senaĝi au aribato, ĝia tu Roma tarimana naima ĝegu vetari tauri ĝesi ĝaiĝoto, ĝavaĝa-maĝuriato.

²⁸ Au aurato tu bana riba, kara koranai ĝevaĝa-daĝaiato-ĝoi, moĝa lorinai aĝori-variĝoato, ĝeri kanisoro ĝoirana ĝana.

²⁹ Au na adogaĝiatio tu ĝia ĝeri taravatu ĝaramanai ĝevaĝa-daĝaiani, senaĝi ĝia beĝene vaĝi-masea o dibura numanai beĝene torea korana ta tu asi adogaĝiatio.

³⁰ Iuda tauri na beĝene vaĝi-masea ĝana, boioĝana ĝetogato varina ĝegu ĝekiraĝito nai, atuĝamaĝito, ĝoi ĝemu ai bana tuĝu-iaĝosia. Ĝia ĝevaĝa-daĝaiani tarimari maki akirarito, ĝoi ĝoiramu ai ĝeri vevaĝa-daĝa guruĝari beĝene kiraĝiri.”

³¹ Vetari tauri na ĝekirarito veigana ĝevaiato. Mo boĝi, ĝia na Paulo ĝeĝabi-iaĝoato mo Antipatri.

³² Elaĝanito vau, vetari tauri kwakuri na ĝerakani tauri ĝeri tanu gabuna ĝana ĝeĝenoĝoito. Hosi tauri moĝo Paulo ĝesi ĝeiĝoto.

³³ Kaisareai ĝea raĝasito, benamo fefa ĝeĝabiato, gavana ĝeviniato, ema Paulo maki ĝevini-vanaĝiatio.

³⁴ Gavana na fefa eiaviato, benamo Paulo edanaĝiatio, ĝia tu kamara gabu tarimana. Ĝia eribato Paulo tu Kilikia tarimana nai,

³⁵ ekirato, “Ĝevaĝa-daĝamuni tarimari beĝema raĝasini vauro, kara ovei-leiatio guruĝana au na baseĝaĝimuni.” Benamo gavana ekirato, Paulo beĝene ĝabi-iaĝoa, Kota numanai beĝenea ĝita-ĝaua. Mo Kota numana tu Heroda na maĝurinai eragaiato.

24

Iuda tarimari na Paulo ĝevaĝa-daĝaiato

¹ Ĝaro imaima ĝekorito murinai, Rubu Veaĝa verena baregona, Anania, Kaisarea ĝana evariĝoto, Iuda vereri kotari e taravatu ma ribana tarimana ta arana Teretulo ĝesi. Mabarari ĝevariĝoto, Gavana Feliki ĝoiranai vauro Paulo ĝevaĝa-daĝaiato guruĝana ĝea kiraĝiatio.

² Paulo ekea-toĝaiato, benamo Teretulo na Paulo ĝevaĝa-daĝaiato guruĝana ĝoiranai ekiraĝirito, ekirato, “Namo vedaurea veremu Feliki! Ĝoi ĝemu veĝitaĝau gaburenai tu maino ai baĝa tanu-mauka kenene, e ĝema bese bene namo ĝana, dagara namori vovoka bovaga-variĝu ĝenoĝoiri.

³ Mai tu gabu mabarari ai e ĝaro mabarari ai ĝai na ĝaĝabi-raĝeani, moĝa lorinai ĝoi tu ĝavaĝa-namo baregomuni.

⁴ Au asi aurani, ĝoi ĝemu taimi bana vaĝa-kori-kavaia, senaĝi anogaĝimuni, novetuĝa-ĝwama, asi bono baru, be ĝema guruĝa kubina tu noseĝaĝia.

⁵ Ĝai na mai tau ĝadogaĝiatio tu, rakava vaĝa-ĝorana tarimana, ĝia na gururaĝe barego evaĝa-ĝorarini, Iuda tarimari tano mabarari ai ĝetanuni fakari ai. Ĝia tu Nasareta dogorona ĝeri veĝorikau tarimana ta.

⁶ Ĝia na tu Rubu Veaĝa maki nevaĝa-rakavaia etato, senaĝi ĝai na ĝaĝabi-tariato, [ĝema taravatu ilailanai baĝana vaĝa-kotaia ĝatato.

⁷ Senaĝi vetari verena baregona, Lisia, ema raka-toĝato, benamo ma ĝaramana ĝesi Paulo ĝai ĝimama na ema ĝabi-veĝitaio.

⁸ Benamo Lisia ĝena guruĝa ilailanai, ĝia vaĝa-daĝana tarimari tu ĝoi ĝoiramu ĝana beĝe iaĝoma.] Goi tauĝemu na ĝia bodanaĝi-ginikauani vauro, ĝia ĝavaĝa-daĝaiani dagarari mabarari tauĝena na bekira-varamuni.”

⁹ Iuda tarimari maki ĝia ĝesi ĝekauto, ĝekirato mai bekiraĝiri dagarari mabarari tu moĝoni.

Paulo ĝena vetoreĝau guruĝana Feliki ĝoiranai

¹⁰ Gavana na Paulo vetoĝa ta evei-viniato Paulo ma bene guruĝa ĝana, benamo Paulo eguruĝoto, ekirato, “Au ribagu, laĝani ĝutuma varau beĝe iaĝo, ĝoi tu mai bese tarimari ĝeri Kota ĝitaĝauna ĝauveina oveiani. Moĝa lorinai au tu ma iakugu ĝesi ĝegu vetoreĝau guruĝana ĝoi ĝoiramu ai akiraĝiani.

¹¹ Goi tauĝemu na maki asikauna boraga-dogaĝiani, ĝaro gabanana ruarua (12) maki roĝosi bene vanaĝia nuĝanai, au tu Ierusalemna ĝana toma-rakarigo avaraĝeto.

¹² Ma mai au ġevaġa-daġaguni tarimari na ta ġesi Rubu Veaġai ġaveġare-veġareto-ġoi nuġanai asi ġedoġariguto, ema asi ġedoġariguto tarimarima аваġa-vegogorito rubu nuġanai o gabu tai vanuġa baregona nuġanai.

¹³ Ema mai ġevaġa-daġaguni dagarari maki ġoi ġoiramu ai asi beġe vaġa-moġonirini riba.

¹⁴ A mai tu moġoni akirani, au na tu ġai senema ġeri Barau atoma-rakarigo viniani e mo Dabara Variguna akorana-iaġiani, ma mai dabara ġia tauġeri na tu dabara ġofaġofana getoni. Mose ġena taravatu ema peroveta tarimari na ġetorerito guruġari mabarari tu аваġa-moġonirini.

¹⁵ Au ġegu tuġamaġikau Barau ġenai e mai tau ġeri tuġamaġikau tu sebona moġo, moġa tu maġesi: Vei-iobukaiobuka tarimari e vei-rakava tarimari mabarari mase na ma beġe varigiġi-ġenoġoini.

¹⁶ Moġa lorinai au tu vanaġivanaġi nuġagu bene iobukaiobuka vededegwana aveini Barau ġoiranai e tarimarima ġoirari ai.

¹⁷ Laġani kota vovoka varau ġeiaġoto, au na Ieruselema araga-kwaneato. Moġa murinai au ma baġenoġoi-iaġo ġegu tarimarima ġeri ai, asi ġeri-ġari tarimari ġeri moni baġabi-iaġo e varevare dagarari Barau bana vinia ġana.

¹⁸ Ma au tu taravatu na ekiraġiani ilailanai veiareva veigana аваġa-koriatu nuġanai, Asia tanona na ġeiaġomato Iuda tauri kotari na Rubu Veaġa nuġanai ġedoġariguto. Moġa nuġanai au sevigi ai tu ġutuma-barana ta asiġi, e ta ġesi maki asi aveġare-veġareto-ġoi.

¹⁹ Moġeri Iuda tarimari Asia tanona na ġeiaġomato beġere iaġoma, be ġoi ġoiramu ai au beġerema vaġa-daġagu, beġere kira-varamu, au na tu kamara rakava aveiato.

²⁰ A mai tarima maġeri na ġekiraġi-foforia, au kanisoro ġoiranai aruġato ġaronai, au ġegu ai tu kamara rakava ġedoġariato.

²¹ Senaġi dagara sebona moġo tu, ġia ġoirari ai aruġato, afararato, akirato, 'Mase tarimari ma beġe varigiġi-ġenoġoini atoni naima, ġomi na au toma ġovaġa-kotagu ġotoni.' "

²² Mo Dabara, (mai tu Iesu Keriso ġabidadama-vinina dabarana), Feliki tu ma eribaginikauato. Ġia na Kota ma etuġu-naġiato, ekirato, "Vetari verena baregona, Lisia, beragaġasini vau, au na ġomi ġemi guruġa havei-rorogotoani."

²³ Benamo ġia na vetari ġitaġauna tarimana ekiraiato, Paulo dibura numanai beġene ġita-ġauna, senaġi ġitaġauna asi beġene vei-gwaġigia. Gatana kotari na ġevaġa-kavaia beġe toni nai tu beġene ġabi-raġeri.

Paulo Feliki e Drusila ġoirari ai

²⁴ Ġaro kotari ġeiaġoto muriri ai, Feliki ma ġaraġona Drusila ġesi ġeraġasito. Drusila tu Iuda vavinena. Feliki na Paulo vetuġuna eveito, benamo Paulo eiaġomato, Iesu Keriso ġabidadama-vinina guruġari ekiraġirito eseġaġiato.

²⁵ Senaġi Paulo ġena sisibai tu vei-iobukaiobuka e vevaġa-gwaġigii ema Barau ġena Kota baregona beiaġomani guruġari ekiraġirito nai, Feliki eġarito, benamo ekirato, "Benamo, toma tu noraka roġo, ġaro namona tai vauro ma bana kea-iaġomamu."

²⁶ Feliki ġena tuġamaġi ta maki, Paulo na moni kota bene vinia. Moġa lorinai ma eke-ġenoġoi ġenoġoiato-ġoi, ġia ġesi beġene guruġa-guruġa ġana.

²⁷ Laġani ruarua murinai, Porokio Festo na Feliki ġena gavana ġauveina gabuna eġabiato. Senaġi Iuda tarimari na beġene ura-vinia ġana, Paulo tu dibura numanai eraga-kwaneato.

25

Paulo Festo ġoiranai

¹ Festo beveġitaġauni tanonai eraġasito, ma ġaro toitoi ġekorito murinai, Kaisarea na Ieruselema ġana evaraġeto.

² Monai Rubu Veaġa vereri baregori e Iuda ġitaġauna tauri na Paulo ġevaġa-daġaiato guruġari ġea kiraġirito, ma Festo ġenoġiato,

³ ġia bene vava-kavari, be Paulo Ieruselema ġana bene tuġu-iaġoa. Korana Paulo dabara tumanai beġene gana-torea ma beġene vaġi-masea boioġana tu varau ġetogaiato-ġoi.

⁴ A Festo evaġa-veseto, ekirato, "Paulo tu Kaisareai moġea, dibura numanai ġeġita-ġauni, ma au tu mo ġana dori ma aġenoġoi-iaġoni.

⁵ Be ġemi vegitaġau tarimari neġi au ġesi Kaisarea ġana baġana iago, be monai kara evei-leiato beġene kiragia, bema ġia na rakava ta eveiato nai tu."

⁶ Festo ġaro imaima toitoi (8) o gabanana (10) ġia ġesi monai ġetanuto vauro, Kaisarea ġana ma evariġoto. Elaġanito vau Kota gabunai ea tanu-tarito, benamo evetuġuto, Paulo ġoirana ġana beġene ġori-iaġomaia ġana.

⁷ Paulo ema raḡasito nai tu, Ierusalemā na ḡeiaḡomato Iuda tarimari na ḡeruḡa-ḡeḡeraḡiatio, benamo ḡevaḡa-daḡaiatio guruḡari ḡwaḡiḡiri ḡutuma ḡekiraḡirito, senaḡina ḡeri guruḡa tu asi vaḡa-moḡoniri gaburi.

⁸ Benamo Paulo ma evaḡa-veseto, ekirato, “Iuda tarimari ḡeri taravatu, e Rubu Veaḡa, ema Roma verena vaḡa-rakavari ḡana, veiḡa rakavana ta asi aveiatio.”

⁹ Senaḡi Festo na Iuda tarimari bene vaḡa-iakuri ḡana Paulo edanaḡiatio, ekirato, “Goi ourani Ierusalemā ḡana bono varage, be mai ḡevaḡa-daḡamuni guruḡari tu monai vau bana seḡaḡiri ba?”

¹⁰ Paulo evaḡa-veseto, ekirato, “Au tu Kaisara, Roma ḡeri vere, ḡena Kota gabuna ḡoiranai aruḡani, be mainai Kota na vevaḡa-iobuka veiḡana au ḡegu ai bene veia. Au na Iuda tarimari vaḡa-rakavari veiḡana ta tu asi aveiatio, goi tauḡemu maki ribamu ginikau.

¹¹ Bema taravatu asi akorana-iaḡiatio o mase veiḡana rakavana ta aveiatio, voina tu bana mase neganai, au tu asi akira-sirivaḡini bana mase ḡana tu-na. Senaḡi bema mai Iuda tarimari ḡeri vevaḡa-daḡa guruḡari au iatagu ai ḡekiraḡirini tu asi moḡoni nai, tarima ta asi ḡena seḡuka au bevinai-vanaḡiḡuni ḡia ḡeri ai. Au aurani tu Kaisara na bene seḡaḡigu!”

¹² Benamo Festo ma ḡena kanisoro ḡesi ḡeguruḡa-guruḡato murinai, Paulo evaḡa-veseato, ekirato, “Kaisara ḡenai bonoḡinogi lorinai, Kaisara ḡenai boiaḡoni!”

Paulo Agripa e Berenike ḡoirari ai

¹³ ḡaro kotari ḡevanaḡito murinai, vere Agripa e tobana Berenike, Festo rakaḡitana e beḡene vaḡa-namoā ḡana, Kaisarea ai ḡeraḡasito.

¹⁴ Monai ḡaro kota vovoka ḡetanuto murinai, Festo na Paulo guruḡana vere ḡena ekiraḡi-ginikauto, ekirato, “Tarima ta tu mainai maiḡa. ḡia tu Feliki na dibura numai eraga-kwaneato.

¹⁵ Au Ierusalemā ḡana aiaḡoto nai tu, Iuda ḡeri Rubu Veaḡa vereri baregori e Iuda vereri na Paulo ḡevaḡa-daḡaiatio guruḡari ḡegu ai ḡeḡwa-iaḡorito, e au ḡenoḡiguto, ḡekirato, ḡia ḡenai vevaḡa-iobuka veiḡana bana veia.

¹⁶ Senaḡi au na avaḡa-veserito, akirato, ‘ḡita Roma tarimara ḡera maḡuri nuḡanai ḡevaḡa-daḡaiani tarimana tu asi roḡo bita vaḡi-mase guineani. ḡia tu ḡevaḡa-daḡaiani tauri ḡesi beḡe raka-vegogoni, ema ḡevaḡa-daḡaiani tarimari ḡoirari ai ḡevaḡa-daḡaiani guruḡari bevaḡa-vese ḡuinerini roḡo.’

¹⁷ Moḡa lorinai ḡia ema au mainai ḡaraḡasito nai tu, au tu asi ma avaḡa-nogato. Senaḡi elaḡanito nai, Kota gabunai atanu-tarito, benamo akirato, Paulo ḡeḡori-iaḡomaia atato.

¹⁸ Vevaḡa-daḡa tauri ḡeruḡa-vaisito nai, au maboru atuḡamaḡito tu, veiḡa rakavari vevaḡa-daḡari beḡe veini atato, senaḡi asiḡina.

¹⁹ ḡia ḡeri guruḡa mabarari tu, tauḡeri ḡeri toma-rakarigo dabarari veḡare-veḡareri kotari, ema tarima ta arana Iesu guruḡana moḡo. Iesu tu emaseto, senaḡi Paulo ekirani, ḡia tu maḡuri.

²⁰ Mo dagara dabarari vetauvetauri au ḡegu ai tu egwaḡigito. Moḡa lorinai au na Paulo adanaḡiatio, euranai Ierusalemā ḡana bene iaḡo ba, monai vau ḡia ḡevaḡa-daḡaiani guruḡari bana vaḡa-iobuka iobukari.

²¹ Senaḡi Paulo enoḡinoḡito, dibura numanai moḡo beḡene ḡita-ḡaua, bene iaḡo mo, Kaisara na vau bene seḡaḡia. Moḡa lorinai akirarito, dibura numanai beḡene ḡita-ḡaua, bene iaḡo mo, Kaisara ḡenai bana tuḡu-iaḡoa.”

²² Benamo Agripa na Festo ekiraiatio, ekirato, “Au aurani mai tarima tauḡegu na bana seḡaḡia.” Festo evaḡa-veseto, ekirato, “Boinani vau boseḡaḡiani.”

²³ Elaḡanito, benamo Agripa e Berenike tu ḡeveḡabi-raḡeto, dabuḡa marevari maki barego lelevaḡiri ḡeveirito, benamo ma marevari ḡesi Kota numanai ḡema raka-toḡato, vetari ḡorikauna tarimari baregori e vanuḡa barana tarima baregori ḡesi. Festo eguruḡato, benamo Paulo ḡema ḡori-toḡaiatio.

²⁴ Benamo Festo ekirato, “Kini Agripa e ḡai ḡesi boḡoma fofori tarimami mabarami! Mai tau maiḡa ḡoḡitaiani. ḡia tu Iuda tarimari Ierusalemā e mainai Kaisareai maiḡeri na ḡevaḡa-daḡaiatio guruḡana au ḡegu ai ḡeḡwa-iaḡoato. ḡia ḡekoḡoto, ḡekirato, ḡia tu asi ma bene maḡuri-iaḡo.

²⁵ Senaḡi ḡia ḡenai veiḡa ta asi adoḡariatio bene mase ḡana. Ma ḡia tauḡena, Kaisara arana enoḡinoḡito. Moḡa lorinai, ḡia tu Kaisara ḡenai bana tuḡu-iaḡoa atato.

²⁶ Senaḡi au tu asi ariba-ginikauni, ḡita ḡera vere barana ḡenai fefa tu kamasi batoreani. Moḡa lorinai ḡomi ḡoirami ḡana baḡori-iaḡomaia, e namo barana tu, goi ḡoiramu ḡana, Kini Agripa. Be mainai sidanaḡi-ginikaua, be mai vetauvetauna kara bitana doḡaria guruḡana tu Kaisara ḡena bana tore-iaḡoa.

²⁷ Korana au atuḡamaḡini tu asi roroḡoto, mai dibura tarimana au na batuḡu-iaḡoani, a vaḡa-daḡana guruḡana tauna korikori tu asi batuḡu-kauani.”

26

Paulo tauḡena vetoreḡau guruḡari ekiraḡirito Agripa ḡoiranai

¹ Agripa na Paulo ekiraiato, ekirato, “Maoro avinimuni, tauḡemu novevarifiu.” Benamo Paulo ḡimana eḡabi-vaisiato, benamo ḡena vetoreḡau guruḡari esinaiato, ekirato:

² “Kini Agripa! Au tu aiakuni, korana Iuda tarimari na ḡevaḡa-daḡaguni dagarari mabarari tu, toma ḡoi ḡoiramu ai avaḡa-veserini.

³ Korana tu Iuda seneri na veḡata ḡeri veiḡa e veḡareveḡare mabarari ḡoi tu ma ribamu ginikau. Moḡa lorinai anoḡimuni, bono veaḡa-gwaḡiḡi, be ḡegu guruḡa bono seḡaḡiri.

⁴ Au aiḡesi atanuto, misigu na veḡata eiaḡomato mo toma, ḡegu tanobarai e Ierusalemai, Iuda tarimari mabarari tu ma ribari.

⁵ Au tu tovtovona na veḡata ḡeribaguto, ḡeguruḡa-fofori bema ḡeurani nai tu. Ḗegu maḡuri evesinato na veḡata au tu Farisea doḡorona tarimagu. Toma-rakariḡo korana-iaḡina ḡevaḡa-gwaḡiḡiani doḡorona.

⁶ Ma toma au Kota gabunai bama ruḡa, korana tu Barau na ḡai senema ekira-torerito guruḡana atuḡamaḡi-kauani nai.

⁷ Ḗai ḡema doḡoro gabanana ruarua (12) na mo guruḡa-tore ḡevaḡa-moḡoniani, ma ḡenari-taḡoani bemoḡonini naima, ḡia na Barau ḡetoma-rakariḡoani boḡi-laḡani ma kokoreri ḡesi. Vere o, au tu mo tuḡamaḡikau ḡaramanai Iuda tarimari na ḡevaḡa-daḡaguni.

⁸ Karase nai ḡomi Iuda tarimami tari tu ḡokirani, Barau na mase tarimana tu asi ilaila ma bevaḡa-variḡisiani?

⁹ Au maki atuḡamaḡito, dagara ḡutuma gorogoro bana veiri, Iesu Nasareta tarimana arana bana lau-ḡaua ḡana.

¹⁰ Ierusalemai au tu moḡesi aveito-ḡoi. Rubu Veaḡa vereri baregori na seḡuka ḡeviniguto, benamo Barau ḡena tarimarima veaḡari gutuma dibura numanai atorerito-ḡoi, ema beḡene vaḡi-maseri ḡetato-ḡoi nai tu, au maki beḡene mase guruḡana avaḡa-moḡoniato-ḡoi.

¹¹ Garo vovoka Iuda tarimari ḡeri rubu tatai araka-toḡato-ḡoi, benamo akwari-korukorurito-ḡoi, ema Iesu beḡene kiragi-rakavaia ḡana avaḡa-urarito-ḡoi. Au na abaruvini-rakava rakavarito-ḡoi, naima vanuḡa baregori boruri ḡari maki aiaḡoto-ḡoi, bana vaga-midigu midiguri e bana lai-lautilusiri ḡana.”

Paulo evetuḡamaḡi-kureto varina

¹² “Mo veiḡa uranai Rubu Veaḡa vereri baregori na maoro ḡeviniguto ema ḡetuḡuguto, Damaseko ḡana aiaḡoto.

¹³ Benamo, Verebara, au tu dabara na roḡo aiaḡoto-ḡoi, a ḡaro tu tubuamai, benamo ḡaro mamana maki evanaḡiatio mamana, guba na emariḡoto, aḡitaiato, ma au ḡesi ḡaiaḡoto tarimari e au enanagi-tarimato.

¹⁴ Ḗai mabarama tano ai ḡaketo-tarito. Benamo au na garo ta aseḡaḡiatio, Heberu garo ai au evaḡa-guruḡaguto, ekirato, ‘Saulo, Saulo! Karase nai au ovaḡa-rakavaguni. Mani ḡoi na tu ḡau masakona matana ofudiani, naima ḡemu ai tu gwaḡiḡi ema tauḡemu ovevaḡa-rakavani.’

¹⁵ Benamo au akirato, ‘Vereḡauka, ḡoi tu deikara?’ Vereḡauka evaḡa-veseto, ekirato, ‘Au tu Iesu, ḡoi na ovaḡa-rakavaguni tarimagu.

¹⁶ Senaḡi novariḡisi, ema noruḡa-tari. Au ḡoi ḡemu ai bafofori korana tu navaḡa-ruḡamu, be au ḡegu vetuḡunaḡi tarimamu ai bono iaḡo ḡana. Ema toma kara boḡita dagarari e ḡoirai kara bavaḡa-ḡitamuni dagarari maki tarima tari ḡeri bonoa kiragi-foforiri ḡana.

¹⁷ Au na Israela tarimari e irau bese tarimari ḡerina bavaḡa-maḡurimuni. Ḗoi tu au na atuḡumuni,

¹⁸ matari bono vaḡa-fafari, ema mukuna na bono ḡori-kureri, be mamai beḡene ruḡa, ema Satani ḡena seḡuka na bono ḡabi-vaḡiri, be Barau rekenai beḡene ruḡa. Benamo Barau na ḡeri rakava bene tuḡamaḡi-fitoḡari ema Barau na eḡabi-virigirito ma evaḡa-veaḡarito tarimari ḡesi gabu beḡene ḡauna, korana au ḡegu ai ḡeveḡabidadamani nai.’

Paulo na ḡena ḡauvei ekiraḡiani

¹⁹ Moḡa lorinai, Kini Agripa, au tu mo mata-vanaḡi guba na ema foforito dagarana ḡenai tu asi akira-sirivaḡito.

²⁰ Guine tu Damaseko ai e Ierusalemai aḡobatato, moḡa murinai Iudea tanona mabarana e irau bese fakari ai maki. Au aḡobatato-ḡoi nai tu, akirarito-ḡoi, ḡeri rakava ḡerina beḡene vetuḡamaḡi-kure, Barau ḡenai beḡene iaḡo. Benamo ḡeri vetuḡamaḡi-kure tu ḡeri veiḡa na beḡene vaḡa-moḡoniri.

²¹ Mo tu moġa ġaramanai Iuda tarimari na Rubu Veāġa nuġanai ġeġabi-tariguto, ġevaġi-masegu ġetato.

²² Senaġi mo ġaro na beiaġoma mo maitoma, au tu Barau na evaġa-kavaguni. Moġa lorinai mai bama ruġa-tari, tarima mabarari misina na beiaġo baregona ġoirari ai ama guruġa-foforini. Au na kara boruna ta tu asi akiraġiani, senaġina peroveta tarimari na e Mose na kara ġekiraġiato beġorani dagarana moġo.

²³ Dagarana maiġi, Keriso tu bene midigumidigu, ma tau giniginena mase na ma bene variġisi-ġenoġoi, benamo Barau ġena mama varina Iuda tarimari e irau bese tarimari ġeri ai bene vari-fiua.”

²⁴ Paulo moġesi evetoreġauto nuġanai tu, Festo na efarara-viniato, ekirato, “Paulo, ġoi tu bobabo! Ġemu riba baregona na evaġa-babomuni.”

²⁵ Paulo evaġa-veseto, ekirato, “Verebara Festo, au tu asi bababo. Au na kara akiraġirini guruġari tu moġoni e maġata.

²⁶ Kini Agripa! Au tu ma kokoregu ema asi garigu ġesi ġoi bavaġa-guruġamuni, korana mai dagara maiġeri mabarari ġoi tu ma ribamu. Au ribagu, mai bakiraġiri dagarari mabarari ġoi ġemu ai ta tu asi bevekure-toġa, korana maiġeri dagara tu vekuretoġa gabunai ta asi eġorato.

²⁷ Kini Agripa, ġoi na mai peroveta tarimari ġeri guruġa ovaġa-moġonirini ba? Au ribagu ġoi na ovaġa-moġonirini.”

²⁸ Agripa na Paulo ekiraiato, ekirato, “Mai horaġauna kotunai, dori moġo nuġagu bovāġa-moirata, benamo dori moġo Keriso bavaġa-moġonia.”

²⁹ Paulo evaġa-veseto, ekirato, “Horaġauna kubinai ba maukanai, senaġi au na Barau anoġiani, ġoi e initoma au ġeseġaġi-taġoġuni tarimami mabarami au kavana boġoro vei, senaġina mai ġebarubaruguto kavana moġo asiġi.”

³⁰ Paulo moġesina eguruġa-ġosito, benamo kini, e gavana, e Berenike, ema ġia ġesi ġetanulo tarimari mabarari ġevariġisito.

³¹ Geraka-rosito murika ġana, benamo ġeguruġa-guruġato nai tu ġekirato, “Mai tau tu veiġa rakavana ta voina tu bere mase o dibura numai bere tanu veiġana ta tu asi eveiato.”

³² Benamo Agripa na Festo ekiraiato, ekirato, “Bema asi bere kira, Kaisara na ġena guruġa benea seġaġia asi beresi nai, mai tau tu tara ruġa-vaġia.”

27

Paulo Roma ġana eiāġoto

¹ Itali ġana baġana iaġo guruġana emoġonito nai tu, Paulo e dibura tarimari kotari tu vetari ġitaġauna tarimana arana Iulio ġimanai ġetorerito. Ġia tu Kaisara ġena vetari doġorona nuġanai.

² Ġai tu Adramitio boutina tai ġaraġeto. Mo bouti tu Asia tanona koneri ġari beiaġoni boutinai. Benamo mo bouti na ġadauto. Makedonia tarimana ta arana Aristako maki ġai ġesi ġaiāġoto. Ġia tu Tesalonika na eiāġomato.

³ Ma eiaġanito vau Sidono ai ġaraġasito. Iulio na Paulo evetuġa-ġwaiato, benamo maoro eviniato, karona ġeri ai bene iaġo, be ġena ura dagarari beġene vinia.

⁴ Mo gabu ġaraga-kwaneato nai, Saipras motumotu ravaravana rekena na ġaiāġoto, korana iavara tu ġoirama na eiāġomato-ġoi.

⁵ Kilikia e Pamfilia iatari na ġaraga-vanaġito, ġaiāġoto, Mira ai ġadaro-kauto. Mira tu Likia tanonai.

⁶ Monai vetari ġitaġauna tarimana na Alesandria boutina, Itali ġana beiaġoni boutina, edoġariato, benamo monai evaġa-raġe vanaġimato.

⁷ Ġaro vovoka tuġama tuġama moġo ġadau-iaġoto-ġoi, e ma vekwaraġima ġesi Kenido sevinaġi ġaraġasito. Monai iavara na eraga-ġaumato lorinai, Krete motumotu ravaravana rekena na ġaiāġoto. Mo tu Salmone duduna reke ta kefona na.

⁸ Ma vekwaraġima ġesi fenu rikiri na ġaiāġoto mo, gabu ta arana Darokau Gaburi Namori ai ġaraġasito. Mo gabu e Lasea vanuġana vefakari tu asi manaġa.

⁹⁻¹⁰ Ġaro vovoka monai varau ġekorito, e bouti na monana rei-iaġo tu gwaġiġi e ma garina, korana ġaniveaġa ġarona maki varau ekorito. Moġa lorinai Paulo na ekira-toreġaurito, ekirato, “Tau mabarami, au aribani ġita ġera iaġoiāġo tu berakavani. Ġera farefare mabarari beġe rekwarekwani ema bouti maki berakava-moġovaġini. Dia maiġeri dagara moġo, senaġi ġita ġera maġuri maki bita fitoġarini.”

¹¹ Senaġi vetari ġitaġauna tarimana na tu bouti taritarina tarimana baregona e bouti tarimana garori eseġaġirito, a Paulo ġena guruġa tu asi eġabi-raġeato.

¹² Mo darokau gabuna faraka e iavara ġueri ai tu asi namo. Moġa lorinai ġutuma na tu ġeurato baġana dau-tovo, be Foeniki ai vau faraka e iavara ġueri baġana ġabiri. Foeniki

tu Krete ai darokau gabuna ta. Reke ta tu iavaraḡere (o south-west) eḡoiraiani, o reke ta tu buibara (o north-west) eḡoiraiani.

Iavara na davara evaḡa-rakavaiato

¹³ Iavaraḡere evesinato, tuḡana moḡo eḡauto-ḡoi nai, ḡia ḡetuḡa-maḡito tu ḡeri ḡaro namona beḡe doḡaria. Moḡa lorinai dogo ḡeinu-raḡeato, benamo Krete fenu rikiri na moḡo ḡedau-iaḡoto.

¹⁴ Asikauna tu iavara baregona arana koiviru, motumotu iataraḡena na emariḡoto.

¹⁵ Bouti ai ema kwari-kauato, benamo ḡai tu asi ḡema daunagi dabarana. Goira ḡana iaḡo uradikana asi ḡaveito, senaḡi iavara ḡena urai moḡo ḡadauto.

¹⁶ Motumotu misina arana Kauda gabigabina rekenai ḡadau-toḡato vau, ravaravana na ḡadau-iaḡoto. Monai vauro bouti misina ḡobina ḡatorea ḡatato, vaḡa-maḡurina uranai ḡavekwaragi-rakavato.

¹⁷ ḡia na bouti misina ḡeinu-raḡeato bouti tuḡana ḡana, benamo bouti ḡesi ḡebaru-kafaiato bene ḡabi-taria ḡana. Ema ḡegarito, be bouti faraina maki ḡeinu-rigoato, benamo ḡareito moḡo. ḡia ḡeri gari korana tu iavara na bouti beḡwa-iaḡoani mo Sirtis ai Afrika rekenai davara sefana mirina tai bea tanukauni garina.

¹⁸ Mo iavara baregona ema ureure baregori ḡesebonato nai, bouti maki dori moḡo ḡevei-buruato-ḡoi. Moḡa lorinai elaganito nai tu, bouti ai ḡeḡurarito farefareri mabarari davaraḡi ḡebubu-reirito, bouti bene meraḡa ḡana.

¹⁹ Garo vaḡa-toitoinai taugeri ḡimari na bouti farefarena ma ḡefiu-rigorito.

²⁰ Garo ḡutuma varau ḡeiaḡoto, ma ḡaro e visiḡu asi ḡefoforito, ema iavara maki ebarego-sirivaḡito. Benamo ḡema tuḡamaḡikau mabarari ḡekorito, korana ḡatugaḡaḡito, ḡai tu asi ḡema maḡuri dabarana.

²¹ Garo ḡutuma asi ḡeḡaniganito murinai, Paulo ḡoirari ai eruḡato, benamo ekirato, “Ḗomi tau, ḡomi tu au garoḡu ḡoro seḡaḡia, be Krete na asi tara dau-rosi; be mai farefare maḡesi asi tara bubu-fitogari.

²² Senaḡi toma au na alaunagimini, akirani, boḡono kokore! Korana tu ta asi bomaseni. Senaḡi bouti ḡereḡana moḡo moḡoni berakava-moḡovaḡini.

²³ Au tu Barau ḡena tarima ta ema au tu ḡia vetuḡunaḡina aiago-vinini. Ḗoraḡani bogi, ḡia ḡena aneru ta seviru ai ema ruḡa-tarito,

²⁴ benamo ekirato, ‘Paulo, asi bono gari. Ḗoi tu Kaisara ḡoiranai roḡo boa ruḡani, ema Barau ḡena namo ḡoi ḡemu ai ḡenana, ḡoi ḡesi boḡo iaḡoma tarimari mabarari maḡuri beḡe doḡariani.’

²⁵ Moḡa lorinai, ḡomi tau, au na akiramini, boḡono kokore. Korana au na Barau tu avaga-mogoniani, kara aneru na bekira-varagu tu bekiraḡiri ilailanai beḡe gorani.

²⁶ Senaḡi ḡita tu iavara na motumotu tai bea kwari-kaurani.”

²⁷ Boḡi vaḡa-gabanana vasivasi (14) ḡai tu Adria Davaranai iavara na ekwari-rakao rakaomato-ḡoi. Boḡi nuḡanai bouti ḡwaragana tauri ḡevemami-raḡito, ḡai tu tano varau ḡakavinaḡiatio.

²⁸ Moḡa lorinai varo dudunai dagara metona ta ḡebaru-kauato, benamo davaraḡi ḡefiu-reiato. Moḡa nuḡanai ḡeribato, davara ḡena variḡo tu 37 mita kavana. Asi luana ma ḡeḡitaiato, monai davara ḡena variḡo tu 27 mita moḡo.

²⁹ Bouti fore ḡeri ai beverarakauni garinai, bouti murina rekenai dogo vasivasi ḡefiu-reirito. Benamo ḡeḡauḡauto bene raga-laḡani ḡana.

³⁰ Bouti ḡwaragana tauri ḡeri ura tu beḡene raga-lemo. Moḡesina naima ḡia na bouti misina dobu ai ḡetore-reiato, ḡevei-ḡofakauto bouti ḡoiranai dogo kotari moḡeri ḡeiaḡoto, ḡea tore-rigorito ḡetato.

³¹ Senaḡi Paulo na vetari ḡitaḡauna tarimana e vetari tauri ekirarito, ekirato, “Bema bouti ḡwaragana tauri bouti ai asi beḡe tanuni nai tu, ḡomi maki asi boḡo maḡurini.”

³² Moḡa lorinai vetari tauri na bouti misina varori ḡekari-ḡuturito, benamo ḡevaḡa-rei kwareḡiatio.

³³ Dori elaganito-ḡoi nai, Paulo na ḡia mabarari enogirito, ḡaniganai kota beḡene ḡani. Ḗia ekirato, “Ḗomi tu ḡaro gabanana vasivasi (14) boḡo vaḡa-noga-iaḡia, kara ta roḡosi ḡoro ḡania.

³⁴ Moḡa lorinai boḡono kokore e maḡuri tuḡamaḡinai anogimini, ḡaniganai kota ḡoḡani. Korana ḡomi debami ḡuiri tu sebona ta maki asi berekwa-rekwani bene.

³⁵ Moḡesi ekirato murinai, ḡia na beredi ta eḡabiato, benamo ḡia mabarari ḡoirari ai Barau evaḡa-namoato, ma edudu-ḡutuato, benamo eḡaniato.

³⁶ Ḗia mabarari maki nuḡari ḡevaḡa-gwaḡigirito, benamo ḡeḡaniganito.

³⁷ Bouti nuḡanai ḡai mabarama tu 276.

³⁸ Ĝia mabarari ĝeĝani-maseto, benamo bouti bene meraĝa uranai, widi tu davarai ĝefiu-reirito.

Geta o ureure na bouti ebota-kirakiraiato

³⁹ Elaganito nai, bouti ĝwaragana tauri na tanobara vetoĝana tu asi ĝeĝita-ginikauato. Senaĝi ĝaruka tanobara na davara ĝana eraka-rosini, ma fenuna koutoĝana ĝesi moĝo ĝeĝita-iaĝoato. Benamo ĝetuĝamaĝito, bema ma dabara nai tu, monai bouti beĝere vaĝa-raga-raĝea ĝetato.

⁴⁰ Benamo dogo varori ĝekari-ĝuturito, davarai ĝeraga-kwanerito. Mo hora sebonai leva o bara ĝebaru-taririto varori maki ĝeruĝarito. Benamo ĝoira rekenai farai ĝeduiato, iavara na ĝoira fenuna ĝana bene kwari-iaĝori uranai.

⁴¹ Senaĝi bouti tu semure ĝenai everarato, benamo etanukauto. Bouti ĝoirana tu evedagi-nunuto, a murina rekena tu ureure na ebota-kirakiraiato, e eveluki-rovorovoto.

⁴² Vetari tauri ĝeboioĝato, dibura tarimari tu beĝene vaĝi-maseri, korana beĝe naurakani, benamo beĝe raga-lemani garina.

⁴³ Senaĝi vetari ĝitaĝauna tarimana ĝena ura tu Paulo bene vaĝa-maĝuria, moĝa lorinai ĝia na ekira-ĝoirito, mo veiĝa asi beĝene veia. Benamo ma nau ribari tauri ekirarito, davarai ĝeburi-rei, benamo beĝene nau-guine-iaĝo fenu ĝana.

⁴⁴ A tarima mabarari tu ĝau tubiri o bouti taviri tari beĝene ĝabiri vau, ĝia muriri na beĝene rei-iaĝo. Mo dabarai mabarari tanobara ĝea doĝariato, ta asi erekwa-rekwato.

28

Malta motumotunai

¹ Ta davarai kamasi ta asi eveito, mabarama namo moĝo kone ai ĝaraĝekauto. Benamo monai vauro ĝaribato, mo motumotu arana tu Malta.

² Mo motumotu tarimari na ĝai ĝemai tu veiĝa namo vedaureana ĝeveiato. Korana mo ĝura e nagure nuĝanai ĝema karava bara ta ĝegasiato ĝai bene tunu-seĝuseĝuma ĝana.

³ Paulo eiagoto lako degona ta ea ĝabiato, benamo karavai ema tore-raĝeato. Mota ta mo lako degonai karava gugurana na eĝabiato, benamo ema nene-rosito, ma Paulo ĝimanai ekafukauto.

⁴ Mo motumotu tauri na mo mota Paulo ĝimanai ĝerokautaĝo ĝeĝitaiato, benamo tauĝeri ĝevemugu-vinito, ĝekirato, "Asi ĝofaĝofa, mai tarima tu vevaĝideba tarimana. Korana davara na tu benau-maĝuri, senaĝina godio vavinena Dike tu asi veĝata eurani ĝia bene maĝuri."

⁵ Senaĝi Paulo na mo mota tu karavai ekora-fiuraĝeato, ma Paulo tu rakava ta asi eĝoitaĝoato.

⁶ Tarima ĝetuĝamaĝito, Paulo tauĝanina tu toma egoba-vaisi-raĝeni, ba toma eketo-tarini, benamo emaseni. Gevaĝa-noga manaĝato, senaĝi Paulo ĝenai kara rakavana ta tu asi eĝorato. Benamo ĝia ma ĝevetuĝamaĝi-kureto, benamo ĝekirato, "Ĝia maki barau ta!"

⁷ Mo gabu e motumotu tauna baregona arana Publio. Ĝia ĝena gabu tu asi manaĝa. Ĝia na eĝabi-raĝemato, e ĝaro toitoi veĝata ĝia ĝena varivari tarimamai evaĝa-iaĝomato.

⁸ Publio tamana tu keve e efurito-ĝoi, be genagenai egena-taĝoto-ĝoi. Paulo ĝenai eraka-toĝato, ma eĝurigurito, ema ĝimana iatanai etore-kaurito, benamo ĝena keve enamoto.

⁹ Mo veiĝa eĝorato, benamo mo motumotu ai keve tarimari mabarari Paulo ĝenai ĝeiaĝoto, benamo ĝia na ĝeri keve ĝerina evaĝa-namorito.

¹⁰ Ĝeri varevare dagarari vovoka ĝevinimato. Ma ĝadau ĝana bakunai tu ĝema iaĝoiaĝo ai baĝa ura-vinirini dagarari ma ĝevinimato.

Romai ĝaraĝasito

¹¹ Ĝue toitoi murinai Alesandria boutina tai ĝaraĝeto. Mo bouti ai tu barau arana Dios natuna kafa merori ruarua vetoĝari o fikisari ĝeberarito. Mo bouti maki faraka e iavara ĝueri tu mo motumotu ai edoĝaririto.

¹² Ĝaragato mo Sirakuse ai ĝaraĝasito. Monai ĝaro toitoi ĝatanuto.

¹³ Monana ĝadau-ĝeĝeraĝi-iaĝoto mo Regio. Ĝaro ta evanaĝiato murinai, gabina iavarana etoĝato, ma ĝaro vaĝa-ruaruanai vauro Puteoli ai ĝaraĝasito.

¹⁴ Monai tarikaka kotari ĝadoĝaririto. Ma ĝaro imaima ruarua (7) tu ĝia na monai ĝeĝabi-tarimato. Monana vau ĝaraka-iaĝoto Romai ĝaraĝasito.

¹⁵ Monai tarikaka kotari varima ĝeseĝaĝiato, benamo ĝai ĝemai ĝeiaĝomato mo, vanuĝa keiri arari Apia-Foru e Taven-Toi ĝana. Paulo na eĝitarito, benamo Barau evaĝa-namoato, e tauna ewaĝiĝito.

Roma nuĝanai

¹⁶ Romai ġaraġasito nai, Paulo tu maoro ġeviniato, ġereġana bene tanu. Senaġi vetari tauna ta na moġo bene ġita-ġaau.

¹⁷ Ġaro toitoi ġevanaġirito murinai, Paulo na Iuda ġedebaiato-ġoi tauri ekea-vegogorito. Ġema raka-vegogoto, benamo ġia na evaġa-guruġarito, ekirato, “Tarikakagu, au na ġera tarima ta asi avaġa-rakavaiato, ema senera ġeri veiġa maki asi avaġa-rakavarito. Senaġi au tu Ierusalemaj ġeġabiguto dibura tarimana ta noġa, benamo Roma ġeri gavamani ġimari ai ġetore-kauguto.

¹⁸ Ġia na ġedanagiguto, ma ġegu guruġa ġeseġaġiato nuġanai tu ġeriba-maoroto, au tu asi ġegu vei-rakava ema beġene vaġi-masegu korana ta maki asi ġedoġariato. Moġa lorinai ġeurato beġene tuġu-vaġigu.

¹⁹ Senaġi Iuda tarimari na mo ura tu asi ġeġabi-raġeato. Moġa lorinai au tu asi ġegu dabara ta, naima anoġi-noġito Kaisara na ġegu guruġa bene seġaġia. Dia au tu ġegu tarimarima navevaġa-maoro-viniri ġana atato. Asiġi.

²⁰ Moġa lorinai bakea-iaġomami, au ġesi sima guruġaguruġa ġana. Korana Isaraela ġena tuġamaġikau lorinai au maiġesi ġebarubaruguto.”

²¹ Ġia na ġevaġa-veseato, ġekirato, “Goi guruġamu fefana ta Iudea na asi ġadoġariato. Tarikakara monana ġeiaġomato tauri na maki varimu rakavana ta asi ġekiraġiato, be asi ġaseġaġiato.

²² Senaġi ġai ġaurani tu ġoi ġemu tuġamaġi guruġana baġana seġaġia. Korana gabu mabarari ai tarimarima na ġoi na mai doġoro tu ġerori-toreani.”

²³ Moġa lorinai ġia na ġaro ta ġeġabi-iriġiato. Mo ġaro ai tarima-rima ġutuma-bara Paulo ġena tanu gabuna ġana ġeiaġoto. Boġiboġi na veġata evesinato eiaġoto mo lavilavi, Paulo na Barau ġena Basileia eġobata-iaġiato. Ema Mose ġena taravatu na e peroveta tauri ġeri buka na Iesu varina ġia ġeri ekiraġi-ginikauto, Iesu beġene vaġa-moġonia uranai.

²⁴ Tarima kotari na tu ġena guruġa ġeġabi-raġeato, a kotari na tu asi ġevaġa-moġoniato.

²⁵ Ġia nuġari tu dia sebona, moġa lorinai ġeraka-rovorovoto. Senaġi roġosi roġo beġene raka nuġanai, Paulo na guruġa ta ekiraġiato, maiġesi ekirato, “Iauka Veaġa peroveta tarimana Isaia ġenana ġomi senemi tu guruġa moġonina ekira-vararito.

²⁶ Korana iniġesi ekirato,
 ‘Noiaġo maiġeri tarima ġeri ai,
 benamo bono kira:
 Seġaġi tu boġo seġaġini,
 senaġi asi boġo riba-maoroni.
 Gita tu boġo ġitani,
 senaġi asi boġo ġita-fakani.

²⁷ Korana maiġeri tarima
 nuġari tu mukuna,
 seġari tu vekodobegau,
 ema matari maki bubu.
 Irau matari na beġe ġitani
 e seġari na beġe seġaġini
 e beġe tuġamaġi-fakani,
 benamo beġe vetuġamaġi-kureni
 ema bavaġa-namorini garina.
 (Barau tu moġesi ekirani).’

²⁸ Moġa lorinai au auranai ġomi boġono riba, Barau ġena vevaġa-maġuri varina tu irau bese tarimari ġeri ai etuġu-iaġoato, be ġia na beġe seġaġiani!” [²⁹ Paulo moġesi eguruġato murinai, Iuda tarimari ġerakato, ma tauġeri fakari ai moġo vegareveġare baregona ta ġeveiato.]

³⁰ Laġani ruarua tauġena na edavaiato-ġoi numanai etanuto. Ma ġia ġenai ġeiaġomato-ġoi tarimari mabarari eġabi-raġerito-ġoi.

³¹ Barau ġena Basileia, (ġena veġitaġau seġukana evaġa-ruġaiani maiġa), guruġana eġobata-iaġi vinirito-ġoi, ema Vereġauka Iesu Keriso varina evaġa-ribarito-ġoi ma koko-rena ġesi. Ma tarima ta na tu asi ma ekiraġoiato-ġoi.

PAULO ĜENA TORETORE ROMA EKALESIARI ĜERI

Roma vaĝa-foforina guruĝari

Paulo na mai fefa Roma ekalesiari ĝeri tu laĝani 56 ema 57 fakari nuĝari ta etoreato, mo tu Korinto ekalesiari vaĝa-toitoina ma evarivaririto nuĝanai etore-vinirito; mai tu Iesu emaseto murinai etoreato.

Paulo ĝena ura baregona Roma ĝana bene iaĝo, senaĝi Ieruselema ĝana eiaĝoto roĝo (Apostolo 19:21). Monai Iuda tarimari tari na ĝeĝabi-tariato, ma ĝevaĝia ĝetato. Senaĝina Barau na enari-ĝaŭato, ma Roma ĝana bene iaĝo dabarana ekeoato. Moga lorinai Paulo tu Roma ĝana eiaĝoto laĝani 59 nuĝanai kavana.

Paulo Roma ĝana tu roĝosi bere iaĝo nuĝanai, mai fefa etore-vinirito. Paulo ĝena ura baregona tu, Barau ĝena Vari Namona ĝeri bene vaĝa-fofori ginikaua, ema Roma ekalesiari bene vaĝa-kokoreri ĝana (Roma 1:1 ema 11).

Roma bukana nuĝanai siri baregori tu karoa 1:16-17.

Mai fefa nuĝanai Paulo na Roma ekalesiari ĝeri dagara tari ekiraĝi-ginikaurito tu maiĝeri: 1) Iuda tarimari ema irau bese tarimari tu Keriso ĝena Vari Namona ĝenana vauro Barau ĝoiranai vei-iobukaioibuka tarimari beĝe ruĝa-tarini, a dia taravatu ĝenana. 2) Tanobara tarimari mabarari, Iuda tarimari ema irau bese tarimari, tu vei-rakava nuĝanai ĝetanuni (karoa 1-3). 3) Karoa 3-8 nuĝanai tu vevaĝa-roroĝoto varina e vevaĝa-veaĝa varina, ema Barau marevana mamana baregona befoforini varina. 4) Karoa 9-11 tu ĝabiviriĝi varina; Barau na Iuda tarimari asi beĝabi-raĝeri, Keriso asi ĝevaĝa-moĝoniani nai; ema Iuda tarimari Barau na ma beĝabiraĝe-ĝenoĝoirini, korana Keriso ĝenai ma beĝe veĝabidadamani. 5) Karoa 12-16 tu ekalesia doĝorona kamasi beĝene tanu Barau ĝoiranai.

Paulo na apostolo ĝauveina eveiato, korana Barau na ekeaiato nai

¹ Au Paulo, Keriso Iesu ĝena vetuĝunaĝi taugu; ĝeguna mai fefa eiaĝosini. Au tu ekeaguto, ĝena apostolo tarimagu ai aiaĝoto, ema eviriĝiguto, Barau ĝena Vari Namona bana vari-fiuva ĝana.

² Mai Vari Namona tu guinenai Barau na peroveta tarimari mururi na ekiraĝi-toreato, benamo Buka Veaĝa nuĝanai ĝetoreato.

³ Mai tu Barau Natuna, ĝita ĝera Vereĝauka Iesu Keriso, varina. Ĝia tu tanobarai ema maĝurito, ema Kini Davida garakana.

⁴ Ĝia mase ĝenana evariĝisi-ĝenoĝoito, monana Iauka Veaĝa na ma segukana ĝesi ĝita ĝerai evaĝa-foforiato ĝia tu Barau tuĝutuĝu Natuna.

⁵ Iesu ĝenana ema ĝia arana bakunai, ĝai varevare-bara e apostolo dagina ĝaĝabiato, bese irauirau tarimari baĝana vetauri, Barau beĝene vaĝa-moĝonia e beĝene seĝaĝi-vinia.

⁶ Ma ĝomi maki, Roma nuĝanai ĝotanuni tarimami, ĝia ĝesi Barau na ekea-sebonamito, Iesu Keriso ĝena tarimarimai boĝono iaĝo ĝana.

⁷ Ĝomi Roma nuĝanai ĝotanuni tarimami mabarami, Barau na eura-vinimini e ekeamito, ĝena veaĝa tarimari ai ĝoiĝoto, ĝomi avaĝa-namomini: Barau ĝita Tamara ema ĝera Vereĝauka Iesu Keriso ĝerina varevare-bara ema maino ĝemi ai bene tanu.

Paulo ĝena ura baregona Romai bene varivari

⁸ Ĝegu guruĝa giniguĝena, au ĝegu Barau atanikiu-viniani Iesu Keriso aranai ĝomi mabarami iatami ai, korana ĝemi veĝabidadama variri tanobara mabarana nuĝanai ĝekiraĝi-foforirini.

⁹ Natuna Varina Namona aĝobata-iaĝiani, ma iaukagu mabarana ĝesi vetuĝunaĝina aiaĝo-vinini Barauna ĝoiranai, ĝomi tu ĝegu ĝuriguĝeri mabarari nuĝari ai asi atuĝa-rekwamini.

¹⁰ Ema maki ĝegu ĝuriguĝeri nuĝari ai anoĝinoĝi-bukani, akirani, bema initoma Barau euranai nai, ĝegu dabara ta bene vei-roroĝotoa, be ĝemi ai bana iaĝosi.

¹¹ Korana au ĝegu ura baregona tu bara ĝitami, be Iauka Veaĝa ĝevarevare kotari ma bara vinimi, boĝono kokore ĝana.

¹² Mo tu ĝomi e au tara velaunaĝi-vevini ĝera veĝabidadama nuĝanai.

¹³ Tarikakagu mabarami, boĝono riba-maoro, nega ĝutuma aurato ĝomi ĝemi ai bana iaĝosi atato, senaĝi ĝegu iaĝosi lairi tu ĝevetoutou-kauni beiaĝoma mo toma. Ĝegu ura, irau bese tari na ĝegu ĝauvei ĝenana vevaĝa-kava ĝeĝoitaĝoato ema Iesu Keriso ĝena doĝoro tarimari ai ĝeĝoito kavana, ĝomi maki fakami ai bana vevaĝa-kava.

¹⁴ Barau na ĝauvei evinigitu, Grik tarimari e asi Grik tarimari, iaunega tarimari e vei-babobabo tarimari bana vaĝa-kavari ĝana.

¹⁵ Moġa lorinai au ġegu ura baregona tu, mai Vari Namona ġomi Romai ġotanuni tarimami mabarami ġemi ai maki bana ġobata-iaġia.

Vari Namona tu ma ġena seġuka

¹⁶ Barau ġena Vari Namona maiakana asi aveini, korana mai Vari Namona nuġanai Barau seġukana eġauveini, ġia ġevaġa-moġoniani tarimari vaġa-maġuriri ġana: Iuda tarimari ġeri ai guine, gabi ai vau bese irauirau tarimari.

¹⁷ Korana Vari Namona nuġanai tu Barau na tarimarima kamasi vei-iobukaiobuka tarimari bekiraġirini efororini. Vei-iobukaiobuka tu veġabidadama nuġanai moġo korana na beiġo mo magona, Buka Veaġai ekirani kavana: "Barau beġabidadama-viniani tarimana tu Barau na vei-iobukaiobuka tarimanai bekiraġiani, benamo bemaġurini."

Barau ġena baru tarimarima ġeri ai

¹⁸ Barau ġena baru guba na efororini, korana tarimarima na Barau asi ġekorana-iaġiani e veġa iobukaiobukari asi ġeveirini. Ma ġeri veġa rakavari ġerina guruġa moġonina ġelaulau-ġauani.

¹⁹ Barau beġe ribaiani maġuriri mabarari ġia ġeri ai tu fofori, Barau tauġena na evaġa-fofori ginikaurito.

²⁰ Barau asi taġitaiani, senaġi guba e tanobara eveirito, monana beiġoma mo toma, Barau vetoġana vekuretoġana tu taġita-ginikaurini. Ġia tu moġoni Barau tuġutuġu ema ġena tanu-vanaġivanāġi seġukana tu ġimana ġauveiri dagarari na maki ġevaġa-foforiani, be taribaiani. Moġa lorinai tarimarima tu asi ġena vetoreġau laina.

²¹ Oba, ġia moġoni ma ribari Barau, be ġere vaġa-raġea, senaġi asi ġevaġa-raġeani ema asi maki ġetanikiu-viniani. A ġeri tuġamaġi tu vei-taġuitaġui na moġo ġevaġa-vonurini. Moġa lorinai ġeri tuġamaġi babobabori na nuġari ġevaġa-mukunarini.

²² Ġia tauġeri ġekirani, ġia tu ma iaunegari ġetoni, senaġi ġia tu ġebaboto.

²³ Be maġuri vanaġivanāġi Barauna beġere vaġa-raġea, senaġi ġima veivei dagarari vaġa-ilailana ma beġe maseni tarimari iouiuori o laulauri, e boġa bairi, manu, ema tano ai ġedarani dagarari iouiuori ġevaġa-moġonirini.

²⁴ Moġa lorinai Barau na veġa mirori beġene vei ġana etao-fitoġarito, be beġene mata-boraġa nuġari ai ġeverere-iaġirini ilailana, e tauġeri fakari ai vevaġa-maiaka veġari irauirauri na tauġanari beġene vaġa-rakavari.

²⁵ Ġia na Barau ġena guruġa moġoniri gaburi ai tu ġofaġofa veġari ġeveirini, ema Barau na eveirito dagarari ġetoma-rakariġo vinirini e vetuġunaġiri ġeiaġo-vinini, a moġeri eveirito Barauna tu asiġi. Ġia moġo ġereġana sivevato-iaġia, asi dokona, asi magona. Amen.

²⁶ Tarimarima moġesi ġeveito nai, Barau na etao-fitoġarito, maiaka veġari beġene uravini-lelevaġiri ġana. Ġeri vavine maki veġaraġo maġuriri roroġotori ġeiaġuirini, ma karori ġesi ġevekima-vevinini.

²⁷ Tauri maki ġia kavana, vavine ġesi kima maġuriri korikori tu ġeiaġuirini, ma tau karori ġemata-ġaniġani-iaġirini. Mo tu tau tauġeri karori ġesi moġo boru ġeravani. Maiġeri veġa rakavari voiri metori tu ġia tauġeri na ġeġabirini.

²⁸ Ma iatanai, ġia tu asi ġeurato, Barau beġene riba-ginikaua e tuġamaġi-faka ġia nuġari iaġasiri ai beġene tanu, naima etao-fitoġarito ġeri tuġamaġi babobabori ġeri ai, be asi beġere veiri veġari beġene veiri ġana.

²⁹ Ġia tu rakava mabarari na ġevonuvonu-raġeto, veġa rakavari, mata-ġaniġani, tuġamaġi barubaru, mama, vaġideba, veġareveġare, veribaġani e tarimarima vaġa-ketori veġari, veroritore,

³⁰ guruġa vemuriġoi, Barau ġeiau-rakavaiani, seġafore rakavarakava, kira-sirivaġi, e veivai; vekiraġi-varaġevaraġe, rakava vei dabarari variuġiri ġevaġa-reforini, sina-tama garori asi ġeseġaġirini;

³¹ asi ġetuġamaġi-fakani, asi tuġamaġi-kauri tarimari, veuravini asi ribari tarimari, vetuġaġwa asi ribari tarimari.

³² Oba, ġia tu ma ribari, Barau ġena veġausina o sisiba tu ekirani, vei rakava tarimari tu beġe maseni. Senaġi ġia na tu ġeveirini, ma dia ġia na moġo ġeveini, senaġi tarimarima kotari na ġeveirini maki ġeiau-namorini e ġeġabi-raġerini.

2

Barau ġena vevaġa-maoro

¹ A ġoi tarima tari ovaġa-maororini ma kerereri ai oragani tarimamu, ġoi tu asi ġemu vekira-ġuniġau laina. Ġoi na tarima ta ovaġa-maoroani, ma ġena veġa rakavari okiraġirini

nai tu, Ɠoi tauƓemu moƓo ovevaƓa-metoni e ovevaƓa-kotani. Korana tu tarima ta Ɠena veiga rakavari okiragirini veigari tu, Ɠoi tauƓemu na maki oveirini.

² Ɠita tu ribara, Barau na moƓesi veiga rakavari Ɠeveirini tarimari bevaƓa-maoro vinirini, ma meto bevinirini tu roroƓoto.

³ Kamasi ƓotuƓamaƓini, Ɠomi, tarimarima kika moƓo, na tarimarima kotari ƓovevaƓa-maoro vinirini, ma nuƓanai tu Ɠomi tauƓemi na maki mo veiga rakavari tu Ɠoveirini. Gomi ƓotuƓamaƓini Barau Ɠena vevaƓa-maoro Ɠenana tu boƓo raga-maƓurini?

⁴ Ba Barau Ɠena namo baregona, e nuƓana eƓabi-tariani, e vevaƓa-gwaƓiƓi iatari ai tu asi tauri Ɠotoni? Ba asi Ɠoribani Barau Ɠena namo baregona anina tu, Ɠomi boƓono vetuƓamaƓi-kure ma boƓono raka-kure Ɠana?

⁵ SenaƓina Ɠomi nuƓami tu ƓovaƓa-gwaƓiƓirini, ma asi ƓovetuƓamaƓi-kureni. Ma Ɠesi Ɠoveini tu tauƓemi iatami ai Ɠemi meto iatai-iatai Ɠolabulabu-kaurini. Ma Barau Ɠena Kota baranai Ɠena vevaƓa-maoro roroƓotona beveiani mo Ɠaro ai vau Ɠena baru bevaƓa-foforiani, benamo Ɠemi veiga metori boƓo Ɠobirini.

⁶ Barau na “tata karakara Ɠoveito ilailari ai tauri ma bevinimini.”

⁷ Tarima kotari tu Ɠobiri Ɠevetoreni veiga namori Ɠeveini, Barau marevana, e Ɠabiragena, ema asi bedokoni maƓurina Ɠevetauani. Barau na Ɠia tu maƓuri vanaƓivanagi bevinirini.

⁸ A tarima kotari tu tauƓeri Ɠeri namo moƓo Ɠevetaurini, ema guruƓa e maƓuri moƓonina tu ƓeruƓarini, ma rakava veigari Ɠekorana-iaƓirini. Ɠia tu Barau na beiau-rakavarini ma baruna Ɠesi.

⁹ BeƓe vei-rakavani tarimari mabarari tu rakava metona baregona ema midigumidigu baregona beƓe Ɠabiani. Mo tu Iuda tarimarima Ɠeri ai beƓe Ɠora-guineni, ma murinai tu irau bese tarimari Ɠeri ai maki beƓe Ɠorani.

¹⁰ Senagi veiga namori beƓe veini tarimari mabarari Ɠeri tu, Barau na mareva baregona e vemataurai barana ema maino bevinirini: Iuda tarimari Ɠeri ai guine, ma murinai tu irau bese tarimari Ɠeri ai maki.

¹¹ Korana Barau na tarimarima mabarari maƓuri sebonai moƓo eƓabi-raƓerini, Ɠeri veiga loriri ai voire evinirini.

Barau na Iuda tarimari e irau bese tarimari bevevaƓa-maoro vinirini

¹² Irau bese tarimari tu Mose Ɠena taravatu asi ribari, nuƓanai Ɠevei-rakavani, moƓeri mabarari beƓe mase-buƓani, (Barau na bekota-vinirini), taravatu murikanai enabe asi ribari; ema Iuda tarimari tu taravatu ma ribari, senaƓina Ɠevei-rakavani tarimari mabarari tu taravatu na bevaƓa-maoro vinirini.

¹³ Korana taravatu ƓeseƓaƓiani moƓo tarimari, Barau Ɠoiranai tu dia vei-iobukaiobuka tarimari, senagi taravatu Ɠekorana-iaƓiani tarimari vau, Barau na ekiragirini vei-iobukaiobuka tarimari.

¹⁴ Oba, irau bese tarimari tu asi Ɠeri taravatu, senagi Ɠeri maƓuri nuƓari ai taravatu na ekiragirini veigari tu Ɠeveirini. MoƓeri mabarari tu Ɠeri taravatu ai ƓeiaƓoni, a Ɠia tu asi Ɠeri taravatu senagi.

¹⁵ Ɠia Ɠeri veiga na evaƓa-foforiani, Barau Ɠena taravatu na eura-vinirini veigari tu Ɠia loruri Ɠuturi ai etorerito. Ma Ɠa tu nuƓari iaƓasiri na maki evaƓa-moƓonirini, korana tu Ɠaro tari ai Ɠeri tuƓamaƓi na evaƓa-daƓa-raƓerini, ma Ɠaro tari ai tu Ɠogobari eragani.

¹⁶ Au na Vari Namona aƓobata-iaƓiani tu, Barau na tarimarima Ɠena veiga e tuƓamaƓi vekuretoƓari Iesu Keriso Ɠenana bevevaƓa-maoro vinirini Ɠaronai vau beƓe foforini.

Iuda tarimari e taravatu

¹⁷ A Ɠoi Iuda tarimamu tu kamasi otuƓamaƓini? Oba, Ɠoi tu ovekiraƓini Iuda tarimamu. Ma Ɠoi tu taravatu Ɠenai ovetaƓeƓauni, e oveiavini, okirani, Ɠoi tu Barau Ɠena bese tarimamu.

¹⁸ Ma okirani, Barau tu ma ribamu e Ɠena ura veiga namo vedaureari e rakavari oƓitalearini, korana taravatu na evaƓa-ribamuni nai.

¹⁹ Goi okirani, moƓoni Ɠoi na mata-bubu tarimari boƓori-kaurini, ema Ɠoi tu mukunai Ɠetanuni tarimari Ɠeri kere mamana;

²⁰ ema vei-babobabo tarimari kira-rogori tarimamu, e mero keikeiri Ɠeri vevaƓa-riba tarimamu, korana tu taravatu nuƓanai iaunega ema guruƓa moƓoniri Ɠetanuni dagarari tu ma ribamu.

²¹ Ɠoi na karomu tu ovaƓa-ribarini, a Ɠoi tauƓemu tu asi ovevaƓa-ribani. Tarimarima oƓobata-vinirini nai tu okirani, “Asi boƓono lema,” otoni, a Ɠoi tu olemani.

²² Tarimarima asi beƓene veƓura-vanaƓi otorini, ma Ɠoi tu oveƓura-vanaƓini. Kwaivakuku oiau-rakava-vinirini, senagi Ɠeri rubu nuƓari farefareri tu olemarini.

²³ Taravatu ovaġa-raġe lelevaġirini nuġanai tu, Barau ġoi na tu asi ogubakauani, ġena taravatu tu oseġafore-vinirini.

²⁴ Buka Veaġai tu iniġesi ekirani, “Barau arana irau bese tarimari na vekaravari ai ġekira-fitoġaiani, korana tu ġomi ġemi kira-sirivaġi lorinai.”

²⁵ Mero taugani kefiri lamavaġi veigana tu ma tauna, bema taravatu bokorana-iaġirini nai. Senaġi bema taravatu okira-sirivaġi vinirini nai, ġemu kefi-lamavaġi veigana tu asi taunai beiaġoni, ema ġoi tu kefina asi ġelama-vaġiato tarimana kavana.

²⁶ Irau bese tarimari tu kefiri asi ġelama-vaġito. Senaġi bema taravatu maġuriri korikori ġeveini nai tu, Barau ġoiranai ġia tu kefiri ġelama-vaġirito tarimari kavana, ene?

²⁷ Oba, taravatu bukana tu ġemu ai, ema kefimu tu ġelama-vaġiato. Senaġina bema ġoi na taravatu okira-sirivaġiani nai tu, taravatu ekorana-iaġiani tarimana, mai tu irau bese tarimana, Kota seanai betanuni, benamo ġoi bevaġa-kotamuni. Aba, taugani rekenai tu kefina asi ġelama-vaġiato, senaġi.

²⁸ Bema tarima ta tu arana korina moġo Iuda tarimana ema kefi-lamavaġi maki murika ema taugani kefina vetoġana korina moġo nai tu, ġia tu dia Iuda tarimana korikori.

²⁹ Asigina ġinavaġi. Iuda tarimana o Barau ġena bese tarimana korikorina tu deikara nuġana iaġasina na ema ġena tuġamaġi na evaġa-foforiani, ġia tu Iuda tarimana. Ema kefi-lamavaġi veigana maki tarimarima loruna ġutunai bene fofori. Ġia tu dia taravatu guruġari ġetorerito moġeri korana-iaġiri ai beġorani. Asigina. Ġia tu Barau Iaukana na tarimarima nuġana iaġasinai beveiani dagarana. Mo tarima moġa tu dia tarimarima na bevaġa-raġeani, senaġi Barau na bevaġa-raġeani.

3

¹ Iuda tarimari na irau bese tarimari ġevanaġirito? Mero tauganiri kefiri ġelama-vaġirini ġenana tu kara namona ġedoġarjato?

² Aba, dagara namori ġutuma ġedoġaririto! Tovotovonai tu Barau na ġia muruna guruġari korikori evaġa-ġauna-iaġirito.

³ Ma bema Iuda tarimari kotari Barau ġenana ġeraka-veġitato, asi ġeri veġabidadama nai tu aiġesi? Mogoni, Iuda tarimari kotari tu asi ġeri veġabidadama; senaġi ġia asi ġeri veġabidadama lorinai, Barau ġena kiraġitore maki asi taunai beiaġoni ba?

⁴ Asigina ġinavaġi! Barau tu moġoni veġata, ġena kiraġitore asi eketoni, ma tarimarima tu ġeġofaġofani. Buka Veaġai ekirani kavana, “Barau, ġoi bogurugani nai tu, beġe vaġa-moġonimuni, ema Kotai beġe ġofaġofa-iaġimuni nai maki bovaġa-darererini.”

⁵ Tarima kotari na ġeri vefafauġu guruġari beġe kiraġirini, beġe kirani: Bema ġita ġera veġa asi roroġotori na tu Barau ġena vei-iobukaiobuka etore-fofori ġinikauani nai, ġita tu kara bita toni? Bita kirani, Barau na ġena baru veġari ġita iatarai ema-torerini nai tu maoro ba?

⁶ Asigina, Barau ma ġena maoro. Bema Barau tu asi roroġoto nai tu, ġia na tanobara mabarana tu kamasi bevevaġa-maoro viniani?

⁷ Tarima ta ma bevefau-ġauni, bekirani, “Bema au ġegu ġofaġofa na Barau ġena guruġa moġoniri evaġa-fofori ġinikaurini ema ġia marevana evaġa-baregoani nai tu, kara dainai au tu roġo mo evaġa-daġaguni rakava tarimagu etoni?”

⁸ Mo guruġa tu babo, noġa moġo ini guruġa kavana, “Rakava sivei, be namo bene fofori.” Tarima kotari na ġai ġevaġa-rakavamani, ġeġofaġofa-iaġimani, ġekirani, ġai tu maiġesi ġakirani ġetoni. Maiġesi ġai ġeġofaġofa-iaġimani tarimari Barau na voiri metona bevinirini tu asi vetoukauna, korana ġeri ġofaġofa lorinai.

Tarima ta asi iobukaiobuka

⁹ Benamo kara ma bita toni? Ġita Iuda tarimara moġo namo, a irau bese tarimari tu asiġi? Asigina ġinavaġi! Varau bita kiraġia, Iuda tarimari e irau bese tarimari vekaravari ai ta tu asi ġena rakava asi bita toni.

¹⁰ Buka Veaġai tu maiġesi ġetoreato:

“Tarima ta asi iobukaiobuka,

sebona kwarikwari ta maki asiġina;

¹¹ tarima ta asi etuġamaġi-roroġotoni,

ta na maki Barau asi evetauani.

¹² Mabarari ġeraka-doġe-muriġito,

ġia mabarari veġa iobukaiobukana tu asi ġeveiani,

mabarari asi ġevei-roroġotoni,

ta veġa namo asi ribana,

sebona kwarikwari ta maki asiği.

¹³ Gia godokari mase guriri kouğari kavana; meari na ġofağofa rakavari ġekirağirini.

Ġeri guruğa na mase ġevağa-ğorarin, noğa moğo mota foisiniri ġia bibiğari ai ġetanuni.

¹⁴ Mururi ai tu vevane e vekira-barubaru na ġevonu-fokafokato.

¹⁵ Gia tu ġeğarimoği-rakavani vevaği ema vevağideba veiğari ai;

¹⁶ ġeri iağoiago gaburi ai tu vei-rovorovo e rakava ġeiağuni.

¹⁷ Maino mağuriri tu asi ribari.

¹⁸ Asi ġeri vegubakau ta Barau ġenai.”

¹⁹ Gita ribara, maiğeri taravatu guruğari na kara dagara ġekirağiani tu, mo deikara taravatu gaburenai ġetanuni tarimari ekirarini. Moğa tauna tu, taravatu gaburenai ġetanuni tarimari ema tarimarima mabarari maki mururi na kara ta asi beğene kirağia, ema mai tanobarai tarimarima mabarari Barau ġoiranai beğene ruğa-tari ma ġeri vei-rakava.

²⁰ Moğa lorinai taravatu korana-iağina mağurina tarima ta asiğina ġinavaği Barau ġoiranai Barau na bekiraği-foforiani, ġia tu vei-iobukaiobuka tarimana. Asiğina, taravatu ġenana ġita na vei-rakava taribaiani.

Vei-iobukaiobuka tu veğabidadama ġenana eiağomani

²¹ Senaği inıtoma kamara dabarai Barau na tarimarima ekirağirini vei-iobukaiobuka tarimari etoni dabarana tu bema ofori-ginikau. Mo tu dia taravatu korana-iağina mağurina. Asiğina. Mai tu Mose ġena taravatu na ema peroveta tarimari ġeri guruğa-fofori ai ġekirağiato dabarana na.

²² Mai vei-iobukaiobuka Barau ġenana eiağomani tu Iesu Keriso beğe ġabidadamavini tarimari mabarari na beğe ġabiani. Ta tu asi irau.

²³ Korana tarimarima mabarara tu rakava tarimara moğo, be mabarara Barau marevana namona ġenana taveğitato.

²⁴ Senaği Barau ġena varevare-bara nuğanai asi ġera kerere etorani, korana Keriso Iesu ġenana ġera rakava ġerina evağa-mağurirato.

²⁵ Barau na Iesu tu ginitağo varevarenai evağa-iağoato, korana tarimarima ġia ġenana bene ġabi-rağeri ġana. Moğa mağurina tu inıgesi: Deikara ġia raranai beveğabi-dadamani tu, Barau na ġena rakava betuğamaği-fitoğarini. Barau na mo mağuri eveiato anina tu, ġia ġena iobukaiobuka bene vağa-foforia ġana. Guinenai rakava ġeveito-ğoi nai tu, eğita-dağaseğirito-ğoi, rakava voiri asi eveito-ğoi.

²⁶ Ma maitoma Iesu tu ginitağo varevarenai evağa-iağoato korana ġena vei-iobukaiobuka bene vevağa-ğita-iağiri inıtoma ġana, be ġia ġena iobukaiobuka bene ofori, e ġia na Iesu Keriso ġeğabidadamavini tarimari maorori bene kirağiri.

²⁷ Be ġita tu kara bita veiavi-iağiani? Vekokoroku tu asi ġena gabu ta. Kara dainai? Taravatu takorana-iağiani nai? Asiği, mağuri tu veğabidadama mağurina moğo bita doğariani.

²⁸ Korana bitana riba-maoro, tarimarima tu veğabidadama lorinai Barau na eğabi-rağerani, a dia taravatu bita korana-iağiani nai.

²⁹ Be Barau tu Iuda tarimari moğo ġeri? Gia tu dia irau bese tarimari maki ġeri Barau? Aba, ġia tu irau bese tarimari maki ġeri Barau,

³⁰ korana Barau tu sebona moğo. Gia na tauğaniri kefirri ġelama-vağito tarimari veğabidadamai maorori bekirağini, ema kefirri asi ġelama-vağirito tarimari maki maorori bekirağini mo veğabidadama sebona na.

³¹ Moğa nuğanai veğabidadama na taravatu seğukana tavağiani? Asiğina ġinavaği! Senaği taravatu tavağa-ruğa gigitariani.

4

Aberahamo ġena veğabidadama

¹ Ġita tu kara ma bita kirağiani, senera Aberahamo na mai mağuri maiğa ema ġoitağoato iatanai?

² Bere moğoni, Aberahamo ġena ġauvei e veiğa bakunai Barau ġoiranai vei-iobukaiobuka tarimanai bere iağo tu, tauğena bere vekiraği, ġia tu kwalimu-koru na bere vekiraği. Senaği ġia Barau ġoiranai tu asi ġena vekokoroku gabuna ta.

³ Buka Veğa nuğanai tu kara etoni? Buka Veğa nuğanai tu ekirani, “Aberahamo na Barau ġena guruğa evağa-moğoniato nai, Barau ekirato, ġia tu vei-iobukaiobuka tarimana etato.”

⁴ Tarima ta eġauveini, benamo voina beġabiani. Ġia mo eġauveini nai, voina eġabiani moġa tu, ġevarevare-viniani dagarana asi bita toni. Asiġina ġinavaġi. Mo tu ġia ġena ġauvei voina veġata.

⁵ Senaġi tarima ta, ġia tu ġauvei o veiġa ta asi eveiani, senaġi ġia tu Barau, rakava tarimari vei-iobukaiobuka tarimari ai evaġa-iaġorini Barauna, ġenai eveġabidadamani. Mai tarima maiġa tu ġena veġabidadama lorinai, Barau na ekiraġiani, ġia tu vei-iobukaiobuka tarimana etoni.

⁶ Davida na maki mo guruġa sebona ekiraġiato. Maiġesi tarimari tu ekirarito, beġe iakuni etato. Mo tu ġauvei o veiġa tari asi ġevairini, senaġi Barau, rakava tarimari asi ġeri vei-rakava etorini Barauna, na ġia tu ekirarini, vei-iobukaiobuka tarimari etorini. Davida ekirato,

⁷ “Ġeri kira-sirivaġi etuġamaġi-fitoġarini,

e ġeri rakava eġabi-vaġirito tarimari tu beġe iakuni.

⁸ Vereġauka na ġena rakava iatanai asi ma beiavi-kaurini tarimana tu beiakuni.”

⁹ Vevaġa-namo ema iaku maiġesiri tu tauġaniri kefirri ġelama-vaġirito tauri moġo ġeri, ba tauġaniri kefirri asi ġelama-vaġirito tauri maki ġeri? Varau bita kira, Aberahamo tu ġena veġabidadama lorinai, Barau ekirato, ġia tu vei-iobukaiobuka tarimana etato.

¹⁰ Aitoma ġia vei-iobukaiobuka tarimanai eiaġoto? Tauġanina kefirri ġelama-vaġiato murinai, ba tauġanina kefirri roġosi roġo beġene lama-vaġia nuġanai. Ġia tu dia tauġanina kefirri ġelama-vaġiato murinai vauro Barau ekirato, ġia tu vei-iobukaiobuka tarimana etato. Asiġina. Ġia tu tauġanina kefirri roġosi roġo beġene lama-vaġia nuġanai, vei-iobukaiobuka tarimanai eiaġoto.

¹¹ Ġia tauġanina kefirri tu gabi vauro ġelama-vaġiato. Mo tauġanina vauro ma ġelama-vaġiato moġa tu, ġia tauġanina roġosi roġo beġere lama-vaġia nuġanai vei-iobukaiobuka tarimanai eiaġoto, moġa vetoġana moġo ma evaġa-moġoniato. Monana Aberahamo tu Barau ġevaġa-moġoniani tarimari tamari ai eiaġoto, enabe tauġaniri kefirri asi ġelama-vaġirito senaġi. Korana Barau ġevaġa-moġoniani tarimari tu, Barau na eġabi-raġerini vei-iobukaiobuka tarimari.

¹² Ema ġia tu tauġaniri kefirri ġelama-vaġirito tarimari maki tamari. Au na dia tauġaniri kefirri ġelama-vaġi-kavarito tarimari akiraġirini. Asiġina. Senaġi tamara Aberahamo tauġanina kefirri roġosi beġere lama-vaġia nuġanai, Barau eġabidadama-viniato kavana, ġia na maki Barau moġesina ġeġabi-dadama-viniani tarimari akiraġirini.

Taravatu e veġabidadama

¹³ Barau na Aberahamo ekira-toreato, ekirato, ġia ma garakana ġesi na mai tanobara beġe ġaunaiani. Mai kiraġitore guruġana Barau na ekiraġiato tu, dia Aberahamo na taravatu ekorana-iaġiato nai, senaġi Barau eġabidadama-viniato nai, benamo vei-iobukaiobuka tarimanai eiaġoto.

¹⁴ Bema taravatu ġekorana-iaġiani tarimari na tanobara beġere ġaunaia nai, veġabidadama tu asi ġena namo ta, ema kiraġitore guruġana maki guruġa korina moġo.

¹⁵ Aba, taravatu na tu Barau ġena baru baregona evaġa-ġoraiani. Senaġi bema taravatu asiġina tu, tarima ta na taravatu ta asi beleaiani.

¹⁶ Moġa lorinai, guruġatore tu veġabidadama ġenana eiaġomani, be Barau ġena namo e varevare-bara nuġanai guruġatore tauri moġoniri Aberahamo ma garakana ġesi ġeri ai beġe ġorani. A dia taravatu gaburenai ġetanuni tarimari moġo ġeri ai, senaġi Aberahamo ġena veġabidadama nuġanai ġetanuni tauri maki ġeri. Aberahamo tu ġita mabarara tamara.

¹⁷ Buka Veaġai evetoreto kavana: “Au na ġoi tu tanobara ġutuma tamari ai avaġa-iaġomuto.” Mai Aberahamo na evaġa-moġoniato Barauna ġoiranai Aberahamo tu ġita tamara. Mai Barau na mase tarimari ma evaġa-maġuri ġenoġoirini ema tanobarai asi ġeġorato dagarari evaġa-ġorari.

¹⁸ Aberahamo ġena tuġamaġikau noġa asi vaġa-tubukauna dagarana ta, senaġi Barau ġena guruġai evetuġa-maġi-kauto, ma evaġa-moġoniato lorinai, tanobara ġutuma tamari ai eiaġoto. Barau na ekira-toreato ilailanai: “Ġoi garakamu tu beġe vovokani visigū kavana.”

¹⁹ Aberahamo mo negai ġena laġani tu dori sinau sebona (100), ma tauġanina maki emoirato, ma mase tauġaniri ilailari ai varau eiaġoto, e Sara maki asi ilaila ġia mero ta beġabiani riba. Ġia na maiġeri tu eġitarito, senaġi maiġeri na ġia ġena veġabidadama asi veġata ġevaġa-moiraiato.

²⁰ Moġa nuġanai ġia asi etuġamaġi-iauvoiavoto, asi edaradarato, ema asi eġareva-ġarevato maki Barau ġena guruġatore iatanai. A ġia tu ġena veġabidadama moġo evaġa-gwaġġiġiato, benamo Barau moġo evaġa-raġeato.

²¹ Korana ġia tu nuġana mabarana ġesi eribato, Barau ma seġukana, kara ekiraġi-toreato dagarana tu bevaġa-ġoraiani.

²² Moġesina naima Barau na ekiraiato, “Ġia tu vei-iobukaiobuka tarimana,” etato.

²³ Mai guruġa maiġeri, “Ġia tu vei-iobukaiobuka tarimana,” tu dia Aberahamo ġereġana ġena moġo ekiraġiato.

²⁴ Senaġi ġita ġerai maki ekiraġiato. Ġita ġera Vereġauka Iesu Keriso mase na evaġa-variġisi ġenoġoiato Barauna tavaġa-moġoniani tarimara maki Barau na bekirarani, vei-iobukaiobuka tarimara, betoni.

²⁵ Barau na Iesu etuġu-iaġomaiato, tanobarai emaseto, ġita ġera rakava benema voi-vagiġi ġana. Ma ġita Barau na vei-iobukaiobuka tarimarai bene kiragiġa ġana uranai, mase na ma evaġa-variġisi ġenoġoiato.

5

Barau na ġita vei-iobukaiobuka tarimara etato

¹ Moġa lorinai ġita tu ġera veġabidadama lorinai, Barau ekirato, ġita tu vei-iobukaiobuka tarimara etato, ma ġera Vereġauka Iesu Keriso ġenana Barau ġesi maino taġabiato.

² Ġita tu Iesu Keriso bakunai veġabidadama ġenana Barau ġena namo e varevare-bara nuġanai bita bere-toġa, benamo nuġanai taruġa-taġoni. Ema taiakuni, korana tavetugamaġikauni, Barau na vau ġia marevana baregona bevinirani.

³ Dia moġa moġo, senaġi ġera midigumidigu ai maki bitana verere, korana ma ribara, midigumidigu na vevaġa-gwaġġiġi evaġa-ġoraiani

⁴ Vevaġa-gwaġġiġi na veribaġani bita vaġa-darererini, ma veribaġani bita vaġa-darererini tu, Barau marevana baregona bita tuġamaġi-kauani.

⁵ Mai tuġamaġikau na tu asi bevaġa-dabara dokorani, korana tu Barau na Iauka Veaġa evinirato, maġa genana ġita lorura guturi ai Barau na ġena veuravini ebubu-guraiato.

⁶ Ġoseġaġi, ġita tu roġo asi kokorera nuġanai, Barau na eġabi-toreato ġaronai varau Keriso emaseto, ġita, Barau tatugamaġi-fitogaiani tarimara, bene voi-ġenoġoira ġana.

⁷ Tarima namona uranai ta bemaseni ba? Gwaġġiġi! Senaġi tarima namo vedaureana uranai tu, betaġu ta bevetugamaġi-kwalimuni, benamo bemaseni riba.

⁸ Senaġi toma mainai tu Barau ġena veuravini ema vaġa-foforiani: Ġita roġo rakava tarimara nuġanai, Iesu tu varau emaseto ġita dairai.

⁹ Ribara, Iesu rarana na bema iarevara, benamo asi ġera rakava besi. Moġa lorinai ġia bakunai, Barau ġena baru baregona bevaġa-foforiani ġaronai bevaġa-maġurirani.

¹⁰ Ġita roġo Barau tavetari-viniato-ġoi nuġanai, Barau Natuna ġena mase na Barau ġesi ma evaġa-veġata ġenoġoirate. Toma ġita tu Barau gatana na taiġo-ġenoġoito, moġa lorinai Iesu emaġuri-ġenoġoito ġenana, vevaġa-maġuri maki bita ġoiġaġoni.

¹¹ Dia moġa moġo, senaġi ġera Vereġauka Iesu Keriso bakunai Barau ġenai bitana verere, korana Iesu Keriso ġenana ġita Barau ġesi maino bitama ġabia ema bitama veġata.

Adamu tu mase evaġa-ġoraiato, Keriso na tu maġuri evaġa-ġoraiato

¹² Ġita ribara, tarima sebna evei-rakavato, benamo ġia ġenana rakava tanobarai ema bere-toġato. Ma rakava na mase eġabi-iaġomaiato. Moġesina naima mase na tarimarima mabarari eguguvirito, korana tarimarima mabarari ġevei-rakavato.

¹³ Moġa anina tu, vei-rakava tanobarai tu eġora-guineto, a Mose ġenana taravatu tu gabi vauro eiaġomato. Senaġi bema taravatu asiġina nai, Barau na vei-rakava, o sikira taravatu ġedaġa-seġiani rakavana, tarima ta ġenai asi bekiraġiani.

¹⁴ Senaġi ribara, Adamu ġena nega na beiaġoma mo Mose ġena negai, tarimarima tu mase ġena seġuka gaburenai ġetanuto-ġoi. Oba, Barau ġena vevaġa-naġi guruġana ta tu asi ġekira-sirivaġi viniato Adamu na eveiato kavana, senaġina ġia mabarari maki mase ġena seġuka gaburenai ġetanuto-ġoi.

Adamu na ġoirai vau beiaġomani tarimana moġo ema vaġa-foforiato. (Mo tu Keriso).

¹⁵ Senaġi mai varevare dagarana asi voina maġa tu irau, dia mo Adamu ġena vei-rakava ġesi ilaila. Mai tarima sebna ġena vei-rakava dainai, tarima ġutuma ġemaseto. Senaġi Barau ġena namo e varevare-bara ema varevare dagarana mo vei-rakava ġena seġuka evanaġiato: Barau ġena mai namo baregona ema varevare dagarana tu tarima sebna, Iesu Keriso, ġenana eiaġomato, ma tarimarima ġutuma ġeri ai evebubu-riġoto.

¹⁶ Barau ġena varevare dagarana tu irau, dia mo tarima sebna, Adamu, ġena vei-rakava kavana: Vei-rakava sebna moġo eġorato ġenana, Barau na tarimarima e tanobara mabarana ekota-viniato, ma rakava voina metona baregona iatarai etoreato. Senaġi

Barau ġena varevare dagnarana rakava vovoka muriri na ema bere-rosito, monana tarimarima tu vei-iobukaiobuka tarimari ai evaġa-iaġorito.

¹⁷ Moġoni, mo tarima sebona na mo vei-rakava eveiato, monana tanobara mabarana mase ġena seġuka gaburenai etanuni. Mase tu mai vei-rakava eveiato tarimana ġenana eiaġomato tanobara ġana. Senaġina tarima sebona, Iesu Keriso, ġia na eveiato dagnarana na mo vei-rakava eveiato tarimana ġena veiġa seġukana na evanaġiato. Tarimarima mabarari, Barau ġena namo ma varevare-bara barego lelevaġina ema vei-iobukaiobuka varevarena beġe ġabiani tarimari tu, Iesu Keriso ġenana maġuri beġe ġabiani, benamo kini kavana beġe vereni.

¹⁸ Mo Adamu ġena vei-rakava sebona dainai, Barau ekirato, tarimarima mabarari tu vei-rakava tarimari ema rakava voina beġe ġabiani etato. A Keriso ġena veiġa iobukaiobukana sebona ġenana, tarimarima mabarari vei-iobukaiobuka tarimari ai beġe iaġoni ma maġuri beġe ġabiani riba.

¹⁹ Ema tau sebona ġena kira-sirivaġi na tarimarima vovoka vei-rakava tarimari ai ġeiaġoto. Moġa ilailana, tau sebona ġena seġaġi na tarima gutuma iobukaiobuka tarimari ai bevaġa-iaġorini.

²⁰ Betaġu taravatu etore-kauato tu rakava bene barego ġana. (O sikira, taravatu ġenana tarimarima ġeri rakava mabarari beġene fofori-ginikau). Senaġi vei-rakava ebaregoni gabunai tu, Barau ġena namo e varevare-bara maki ebarego-lelevaġini.

²¹ Guinena tarimarima tu vei-rakava ġena veġitaġau seġukana gaburenai ġetanuto, monana mase eġorato. Moġesina kavana, Barau ġena namo e varevare-bara na tu vei-iobukaiobuka evaġa-foforiani, ma maġuri vanaġivanaġi ġera Vereġauka Iesu Keriso ġenana eġabi-iaġomaiani ġita ġerai.

6

Rakava ġenai tamaseto, Keriso ġena maġuri nuġanai ġita tu maġuri

¹ Be kara bita toni? Ba sikira, rakava veigari sivei-ġenoġoi ġenoġoiri, be Barau na ġena namo e varevare-bara ġerai bene vaġa-fofori barego-lelevaġiri?

² Asigina ġinavaġi! Ġita vegabidadama tarimara tu varau tamaseto rakava ġenai, (mai tu rakava maġurina ġenana taveġitato); ma kamara dabarai tu rakava maġurina nuġanai roġo ma bita tanuni?

³ Ġita babatiso taġabiato anina tu maġa: Ġita na mo babatiso taġabiato tu Keriso Iesu ġena maġuri nuġanai tabere-toġato, ma mo babatiso taġabiato nuġanai, ġita tu ġia ġesi tamase-sebonato. Ba ġomi maġa tu asi ribami?

⁴ Babatiso taġabiato anina tu, ġita maki Keriso ġesi tamase-vegogoto, ma Barau na Keriso ġesi eguri-sebonarato. Benamo Tamara marevana ema seġukana baregona na Keriso mase na ma evaġa-varigisi ġenoġoiato kavana, ġita maki maġuri varigiu gerageranai bitana tanu.

⁵ Bema ġita Keriso ġesi tasebonato, benamo ġia emaseto kavana ġita maki tamaseto nai, moġoni, ġia Barau na mase na evaġa-maġuri ġenoġoiato kavana, ġita maki moġesi Barau na bevaġa-maġuri ġenoġoirani veġata.

⁶ Korana ġita ribara, ġita ġerai tarima guinena moġa tu Keriso ġesi vaġa-sebo satauro ai ġeraġeto. Mo veġa eġorato tauna tu, rakava eveito-ġoi tauġanina ma ġena ura rakavari ġita ġerana bene koki-fitoga moġovaġia, be ġita veġa rakavari ġeri tuġu-rakaorakao tarimarai asi ma bitana iaġo ġana.

⁷ Korana mase tarimana na veġa rakavana ta asigina ġinavaġi ma bevei-ġenoġoiani.

⁸ Bema ġita Keriso ġesi tamase-vegogoto nai, moġoni veġata taribani, Keriso ġesi maki bita tanu-vegogoni.

⁹ Korana ma ribara, Keriso mase na tu varau evariġisi-ġenoġoito, be asi ma bemase-ġenoġoini; mase asi seġukana ġia ġenai.

¹⁰ Keriso mo emaseto nai tu, rakava ġena seġuka evaġa-keto-moġovaġiato. A toma mai maġuri ġia na etanu-iaġiani maġa tu, Barau ġena moġo etanuni.

¹¹ Mo dabara sebonai ġomi maki tauġemi inġesi boġono vekiraġi: Gomi tu veġa rakavari ġeri ai tu varau ġomaseto, ma Keriso Iesu ġena maġuri nuġanai ġomi tu maġuri ġotanuni Barau ġena.

¹² Moġa lorinai rakava na mani ma berakavani tauġanina maniġa ġenana ġomi asigina ġinavaġi bene ġori-kaumi. Korana bema mani ma berakavani tauġanina maniġa rakava na beġori-kauani nai, ġomi tu ġia ġena ura rakavari boġo korana-iaġirini.

¹³ Tauġanimi legana ta rakava asi boġono vinya, be veġa rakavari veiveiri farefarenai asi bene vaġa-iaġoa. A ġomi tu mase na ma evaġa-maġuri ġenoġoimito lorinai, tauġanimi

mabarari Barau boĝono vinia. Tauĝaniami legari mabarari maki Barau boĝono vinia, veig̃a maorori beĝene vei ĝana.

¹⁴ Be rakava na ĝomi asi ma bene ĝori-kaumi, korana ĝomi tu dia taravatu ĝena seĝuka gaburenai ĝotanuni. Asiĝina. Gomi tu Barau ĝena namo ema varevare-bara nuĝanai ĝotanuni.

Vei-iobukaiobuka ĝena vetuĝunaĝi tarimara

¹⁵ Be kara maia? Veig̃a rakavari roĝo bitana vei, korana ĝita tu dia taravatu gaburenai tatanuni, ne Barau ĝena namo e varevare-bara nuĝanai tatanuni, be bisini vei-rakava ba? Asiĝina ĝinavaĝi!

¹⁶ Gomi asi ribami, bema tauĝemu tarima ta ĝena tuĝu-rakaorakao tarimamu ai ovevaĝa-iaĝoni. garona bono seĝaĝia otoni nai, ĝoi tu mo tarima ĝena tuĝu-rakaorakao tarimamu ai varau oiag̃oni. Mo tu rakava ĝena vetuĝunaĝi tarimamu ai boiaĝoni, benamo dokonai tu boa maseni. O Barau ĝena guruĝa bokorana-iaĝiani, benamo vei-iobukaiobuka tarimamu ai boiaĝoni.

¹⁷ Barau sitanikiu-vinia, korana ĝomi tovtovonai tu rakava ĝena tuĝu-rakaorakao tarimami, senaĝi toma tu Barau ĝena guruĝa moĝonina ma nuĝami mabarari ĝesi ĝokorana-iaĝiani, ĝevaĝa-ribamito-ĝoi ilailanai.

¹⁸ Benamo Barau na rakava ĝenana eruĝa-vaĝimito, ma vei-iobukaiobuka ĝena vetuĝunaĝi tarimami ai ĝoiag̃oto.

¹⁹ Au na mai maĝuri maĝeri tu tuĝu-rakaorakao tarimari ĝeri maĝuri ai ama kiraĝirini boĝono tuĝamaĝi-fakari ĝana, korana ĝomi tauĝani rekenai tu roĝo asi kokoremi. Gomi guinenai mani tauĝaniami legari manĝeri tu veig̃a mirori ema veig̃a rakava kwaikwairi ĝeri tuĝu-rakao-rakao dagarari ai ĝovaĝa-iaĝorito. A initoma mani tauĝaniami taviri manĝeri tu guinenai rakava ĝenai ĝoveirito ilailanai, vei-iobukaiobuka ĝena vetuĝunaĝi dagarari ai boĝono vaĝa-iaĝori, be beĝene veaĝa-tanu.

²⁰ Ĝomi rakava ĝena tuĝu-rakaorakao tarimami ai roĝo ĝotanuto-ĝoi neganai, vei-iobukaiobuka tu asi ĝena gabu ta ĝomi ĝemi maĝuri nuĝanai.

²¹ Ĝomi mo veig̃a ĝoveirito moĝeri ĝerina tu kara namona ĝoĝoitaĝoato, ei? Moĝeri veig̃a toma ĝotuĝamaĝi-ĝenoĝoirini nai, ĝemaiakamini. Moĝeri veig̃a magonai tu mase boĝo itaĝoani.

²² Senaĝi ĝomi toma tu rakava nuĝana na eĝabi-vaĝimito, ma Barau ĝena tuĝu-rakaorakao tarimami ai ĝoiag̃oto. Barau ĝena tuĝu-rakaorakao tarimami ai bogo iaĝoni, monana namo boĝo doĝariani dagarana na tu veaĝa-bara tarimami ai boĝo iaĝoni. Benamo monana ĝomi maĝuri vanag̃ivanaĝi boĝo ĝabiani.

²³ Korana rakava voina tu mase, a Barau ĝena varevare ĝera Vereĝauka Keriso Iesu ĝenana bita ĝabiani dagarana tu maĝuri vanag̃ivanaĝi.

7

Ĝita tu dia taravatu ĝena seĝuka gaburenai tatanuni

¹ Tarikaka-ĝore, ĝomi tu moĝoni asi ĝoriba-maoroni? Ĝomi tu taravatu ma ribami tarimami au na avaga-guruĝamini. Ribami, tarima roĝo maĝuri etanuni nai, ĝia tu taravatu ĝena seĝuka gaburenai etanuni, a emaseni nai, taravatu tu asi ĝena seĝuka ĝia ĝenai.

² Vaĝa-ilailana, veĝaraĝo vavinena, bema ĝaraĝona roĝo maĝuri etanuni nai, ĝia tu veĝaraĝo taravatuna gaburenai roĝo betanuni. A ĝaraĝona bemaseni murinai, mo veĝaraĝo taravatuna moĝa, seĝukana gaburenai asi ma betanuni, befakani.

³ Bema ĝia ĝaraĝona roĝo maĝuri nuĝanai, ma bere veĝaraĝo-sirivaĝi nai, ĝia tu veĝura-vanaĝi vavinena bitara kiraĝia. Senaĝi bema ĝaraĝona bere mase, ĝia veĝaraĝo taravatuna ĝena seĝuka na tu bere raka-vaĝi lorinai, asi bere veĝura-vanaĝi. Aba, tau fakana ta ma bere ĝaraĝoa maki, mo tu asi bere veĝura-vanaĝi.

⁴ Tarikakagu, ĝomi maki moĝesina, Keriso tauĝanina emaseto, monai tu ĝomi maki taravatu ĝenai ĝomaseto, (mai tu, ĝomi tu dia taravatu ĝena seĝuka gaburenai ĝotanuni). Mo veig̃a eĝorato anina tu, ĝomi Keriso ĝena tarimarimai boĝono iaĝo ĝana. Gomi Keriso ĝena tarimarimai ĝoiag̃oto korana tu, ĝita mabarara ĝwaĝwara namori beĝene vetore Barau ĝenai ĝana. Mai Keriso maig̃a tu Barau na mase na ma evaĝa-variĝisi ĝenoĝoiato tarimana.

⁵ Ĝita na tauĝanira ĝeri ura veig̃ari roĝo takorana-iaĝirito-ĝoi neganai tu, taravatu na ura rakavari evaĝa-bere rosirito-ĝoi. Moĝeri ura rakavari ĝita tauĝanirai ĝeĝauveito-ĝoi lorinai, ĝita na mase beĝe vaĝa-ĝorarini veig̃ari taveirito-ĝoi.

⁶ Senaĝi ĝita toma taravatu ĝenana eĝabi-vaĝirato, korana mo ebaru-barurato-ĝoi dagarana ĝenai varau tamaseto. Be ĝita toma tu Iauka Veaĝa ĝena dabara variĝunai Barau

vetuḡunaḡina bita iaḡo-vinini, a dia Buka Veāḡai ḡetorerito taravaturo koranaiaḡi-gigitariri dabaranai.

Taravatu ḡenana tu kara namona bita ḡabiani?

⁷ Ini tu kara ma bita toni? Taravatu tu rakava dagarana bita toni ba? Asiḡina ḡinavaḡi! Moḡoni, au vei-rakava tu asi bara ribaia, senaḡi taravatu ḡenana, naima aribaiato. Ilailana, au asi bara riba, tarima tari ḡeri farefare mata-ḡaniganiri tu rakava veigana, bere taravatu inigesi asi bere kira, "Tarima tari ḡeri farefare mata-ḡaniganiri asi bono vei."

⁸ Senaḡi vei-rakava na Barau ḡena mo taravatu guruḡana ḡenai dabara ta eḡita-doḡariato, benamo mo dabara na eḡauveito, benamo au nuḡagu ai tarima tari ḡeri farefare mata-ḡaniganiri tuḡamaḡiri e veigari irauirauri ema vaḡa-berebere rosirito. Korana bema taravatu asiḡina nai, vei-rakava tu mase au ḡegu ai, be asi ḡena seḡuka ta, (korana ḡena seḡuka nuḡagu ai eḡauveini moḡa asi ribagu bene).

⁹ Taravatu roḡosi roḡo bara ribaia neganai, au tu maḡuri atanuto-ḡoi. Senaḡi taravatu eiaḡomato neganai, vei-rakava au ḡegu ai eguru-varigisito, emaḡurito.

¹⁰ Benamo au tu amaseto, korana vei-rakava ḡegu ai maḡuri bene. Monana au ama ribato, maḡuri bere ḡabi-iaḡomaia taravatuna na tu mase moḡo eḡwa-iaḡomaiato.

¹¹ Korana vei-rakava na taravatu guruḡana ḡenai dabara ta eḡita-doḡariato, benamo mo dabara na eḡauveito, benamo au eḡofa-darereguto. Be vei-rakava na au tu taravatu ḡenana evaḡi-maseguto.

¹² Moḡa lorinai taravatu tu veaḡa, taravatu guruḡari maki veaḡa, maoro ema namo.

¹³ Be, au tu mo dagara namona na ema vaḡi-maseguto? Asiḡina! Au tu vei-rakava na evaḡi-maseguto. Mo dagara namona eiaḡomato anina tu, vei-rakava vetoḡana korikori nema vaḡa-bererosia, be bitana riba, vei-rakava tu rakava kwaikwai. Senaḡi vei-rakava tu mo dagara namona ḡenana eḡauveito, benamo au evaḡa-maseguto. Be Barau ḡena taravatu guruḡana evaḡa-foforiani, vei-rakava tu dagara rakava kwaikwaina.

Rakava na ḡera maḡuri eguine-iaḡirini

¹⁴ Ḳita ribara, taravatu tu Barau Iaukana ḡenana eiaḡomato dagarana, a au tu tarimarima moḡo, tauḡani ai atanuni. Ma au tu vei-rakava na evoiguto, benamo ḡena tuḡu-rakaorakao tarimagu ai evaḡa-iaḡoguto.

¹⁵ Au na kara aveiani tu asi maki atuḡamaḡi-fakaiani. Korana mo veigā, aurani bana veiri veḡata atoni veigari, tu asi aveirini, senaḡi asi aura-vinirini veigari tu aveirini.

¹⁶ Bema asi aura-vinirini veigari aveirini nai, taravatu tu ama vaḡa-moḡoniani, ḡia tu moḡoni namo.

¹⁷ Mo veigā nuḡanai, mo tu dia au tauḡegu nuḡagu sigai mo vei-rakava aveiani. Asiḡina! Mo tu mo vei-rakava au ḡegu ai etanuni monana eveiani.

¹⁸ Au ma ribagu, au ḡegu ai mai tauḡanina ma ḡena veigā e ura rakavari nuḡanai namo ta asiḡina-ḡinavaḡi etanuni. Moḡoni, aura-baregoni namo veigari bana veiri atoni, senaḡi ḡauvei-iaḡiri ḡegu ai tu asi ilaila.

¹⁹ Ḳegu ura tu veigā namori bana veiri veḡata atoni, senaḡi asi akokoreni, veigā rakavari moḡo aveirini. Moḡoni, asi veḡata aurani veigā rakavari bana veiri, senaḡina roḡo aveirini.

²⁰ Moḡa lorinai, bema au na kara aveiani tu asi veḡata aurani bana veia atoni veigana aveiani nai, mo tu dia au tauḡegu nuḡagu sigai aveiani. Asiḡina! Mo tu vei-rakava au nuḡagu ai etanuni, monana eveiani.

²¹ Be au ḡegu maḡuri ai dagara ta noḡa moḡo taravatu ta kavana na eguine-iaḡiguni, maiḡesi eḡauveini ama ḡoitāḡoani: Au namo veigari navei atoni nai, rakava tu moḡa nuḡagu ai eḡauveini.

²² Au iaukagu ai Barau ḡena taravatu tu aiaku-iaḡiani.

²³ Senaḡi au na taravatu o seḡuka ta maia ama ḡitaiani au tauḡanigu legari tari nuḡari ai ḡeḡauveini, au ḡegu tuḡamaḡi na evaḡa-moḡoniani taravatuna ḡevetari-viniani. Mai taravatu ta tu vei-rakava ḡena taravatu o seḡuka, ḡia au tauḡanigu legari ai eḡauveini, ma au eḡabiguni, benamo vei-rakava ḡena dibura tarimanai evaḡa-iaḡoguni.

²⁴ Au tu moḡoni rakava kwaikwai tarimagu! Deikara na au bevaḡa-maḡuriguni mai mase tauḡanina nuḡana na?

²⁵ Barau sitanikiua, korana ḡita ḡera Vereḡauka Iesu Keriso ḡenana evaḡa-maḡuriguto.

Moḡa lorinai au tauḡegu ḡegu tuḡamaḡi na tu Barau ḡena taravatu vetuḡunaḡina aveini, senaḡi tauḡanigu na tu vei-rakava ḡena taravatu o seḡuka vetuḡunaḡina aiaḡo-vinini.

¹ Tauna moġa, initoma Keriso Iesu ġena maġuri nuġanai ġetanuni tarimari tu, Barau na vei-rakava tarimari asi bekiraġirini ema asi bekota-vinirini.

² Korana au tu Keriso Iesu ġena maġuri nuġanai maġuri Iaukana ġena taravatu seġukana na vei-rakava ema mase ġeri taravatu seġukari na varau eruġa-vaġiguto.

³ Taravatu tu taugani, ma ġena ura rakavari tauganina, na varau evaġa-moiraiato, be asi ġena seġukai eiaġoto, asi ilaila bevaġa-kavarani. Moġa lorinai taravatu na asi ilaila beveiani ġauveina tu Barau na eveiato. Mo tu Barau taugena na Natuna korikori vei-rakava tarimari ilailari ai etuġu-iaġomaiato, rakava benema vaġa-darerea ġana. Benamo Keriso ġenana Barau na vei-rakava ġena seġuka taugani ġenai ekiraġi-fitogaiato, kerere ma evaġi-maseato.

⁴ Barau na mo veġa eveiato anina tu, taravatu na vei-iobukaiobuka veġana, eura-viniani veġana, ġita ġerai beġene fofori-ġinikau ġana. Korana toma tu taugani ġena urai asi tarakani, ne Iauka Veaġa ġena urai tarakani.

⁵ Taugani ġena ura lorinai ġetanuni tarimari tu, taugani na eura-vinirini dagarari moġo ġetuġamaġi-taġorini; a Iauka Veaġa ġena ura loriri ai ġetanuni tarimari tu, Iauka Veaġa na eura-vinirini dagarari moġo ġetuġamaġi-taġorini.

⁶ Tarima ta taugani ġena ura na eġori-kauani tarimana ġena tuġamaġi tu mase evaġa-ġoraiani; a Iauka Veaġa ġena ura na eġori-kauani tarimana ġenai maġuri e maino etanuni.

⁷ Taugani dagarari etuġamaġirini tarimana ġena tuġamaġi na tu Barau evetari-viniani. Korana ġia ġena mo tuġamaġi na tu Barau ġena taravatu asi ekorana-iaġiani, ema asiġina-ġinavaġi maki bea korana-iaġiani riba.

⁸ Moġesina naima taugani ġena urai ġerakani tarimari na, Barau tu asiġina-ġinavaġi beġe vaġa-iakuani.

⁹ Senaġi ġomi tu dia tauganimi ġeri ura na ġeġori-kaumini tarimami. Ġomi tu Iauka Veaġa na ġemi maġuri eġori-kaurini, korana Barau Iaukana tu ġomi nuġami ai etanuni. Bogono riba, deikara ġenai Keriso Iaukana asi etanuni, ġia tu dia Keriso ġena tarima.

¹⁰ Bema Keriso ġomi tata nuġami ai etanuni nai tu, enabe tauganimi beġe maseni vei-rakava dainai, senaġina iaukani tu maġuri ġetanuni, korana vei-iobukaiobuka tarimami ai varau goiaġoto bene.

¹¹ Iesu tu Barau Iaukana na mase na ma evaġa-varigiġi ġenoġoiato. Ma bema Barau Iaukana ġomi nuġami ai etanuni nai, mani Iauka ġenana Barau na mani ma berakavani tauganina, ġomi ġemi ai maniġa, maki maġuri beviniani.

¹² Moġa lorinai, tarikaka-ġore, ġita ġera ġauvei toma tu dia taugani rekenai bitana tanu, ma taugani ġena rakava veġari ma bitana vei-tanu.

¹³ Korana bema taugani ġena vei-rakava maġurinai boġo tanuni nai, boġo maseni; senaġi Iauka Veaġa ġena ura dabaranai boġo tanuni nai, taugani ġena veġa rakavari boġo vaġi-maserini, benamo ġomi tu boġo maġurini.

¹⁴ Barau Iaukana na eġori-kaurini tarimari tu Barau natuna.

¹⁵ Korana ġomi na Iauka Veaġa ġogabiato, maninana tu dia tuġu-rakaorakao tarimami ai ma bevaġa-iaġomini, be ma boġo garini maia. Asiġina. Mani tu venatu-vanaġi Iaukana ġogabiato. Ġita tu ġia ġenana tataġi-ġaba-raġeni, takirani, "Tama, Tamagai o," taton.

¹⁶ Iauka Veaġa taugena ġita iaukara ġesi ġeguruġa-vegogoni, ġekirani, ġita tu Barau natuna.

¹⁷ Bema ġita Barau natuna nai, ġita maki ma bakura, be Barau na ekiraġi-torerito dagarari bita ġaunarini. Mai tu Keriso na varau eġaunarito dagarari Keriso ġesi bita ġauna-sebonarini. Mo tu dabara sebonai moġo: Keriso emidigu-midiguto moġesi bita midigu-midiguni nai, ġia na marevana baregona eġabiato moġa, ġita na maki bita ġabiani.

Barau marevana baregona ġoirai bita ġabiani

¹⁸ Goirai Barau marevana baregona ġita ġerai bea foforini, monana, au atuġamaġini, initoma mai tamidigumidiguni maiġeri tu bea vanaġirini.

¹⁹ Barau ġimana veiveiri dagarari mabarari ġevenari-taġoni ma vetuġa-maġikauri ġesi, Barau na ġia natuna bevaġa-foforirini ema ġena mareva ma mamana baregona bevinirini ġarona ġetanu-vaġa-nogaiani.

²⁰ Korana tu Barau ġimana veiveiri dagarari mabarari tu benamo asi ġeri namo tai ġeiaġoto. Mai tu dia ġia tauġeri ġeurato asi ġeri namo ai beġene iaġo ġetato nai. Asiġina. Mai tu Barau taugena ġena urai moġesina eveirito. Senaġina ġoirai dagara namona ġeri ai bevaġa-ġoraiani, moġa ma ġenari-taġoani.

²¹ Korana Barau na eveirito dagarari mabarari mase ema boraġa ġena dibura nuġanai ġetanuni roġo. Senaġi ġaro ta maiġeri dagara mabarari Barau na mo mase ema boraġa ġena dibura na bea ġabi-veġitarini, benamo Barau natuna ġeri gabu fakanai, ma mareva baregona gabunai, ma betorerini.

²² Ġita ma ribara, Barau ġimana veiveiri dagarari mabarari tu, vavine ġeġabi ġana nuġari ġemidiguni kavana, ġia midigu ġeġanini. Mabarari ġeloduni, ġeġabani, beiaġoma mo toma.

²³ Senaġi mai tu dia ġia moġo ġeloduni, ġeġabani. Asiġi. Ġita Iauka Veaġa ġwaġwana guinena taġabiato maġġera maki nuġarai taloduni, taġabani, Barau na bene nату-vanaġira ġaronna tanari-taġoani nuġanai. Mo tu ġita tauġanira bevaġa-maġuririni negana tanari-taġoani.

²⁴ Ġita tu mai tuġamaġikau bakunai Barau na ġita evaġa-maġurirato. Senaġi tatuġamaġi-kauani dagarana taġita-ġoitaġoani nai, asi ma bita tuġamaġi-kauani. Moġa lorinai kamara deikara na varau eġoitaġoato dagarana roġo etuġamaġi-kauani, ei?

²⁵ A bema roġosi roġo bitara ġabia dagarana tatuġamaġi-kauani nai tu, ma vevaġa-gwaġġira ġesi bita nari vaġa-noga taġoani.

²⁶ Moġa nuġanai, Iauka Veaġa na maki ġita ġera moira gaburi ai evaġa-kavarani. Ma ġita asi ribara kara bita ġauġau-iaġirini, senaġi Iauka Veaġa tauġena ġita iatarai eġauġauni. Ġia eġurigurini nai tu, etaġi-ġabarageeni. Mo etaġi-ġabarageeni guruġari tu tarimarima na asi ilaila beġe kiraġirini guruġari.

²⁷ Barau ma ribana ġinikau ġita nuġara iaġasiri ai kara ġetanuni, ma Iauka Veaġa ġena tuġamaġi maki ġia tu ma ribana. Korana Iauka Veaġa tu Barau ġena ura loriri ai ġena doġoro tarimari veaġari iatari ai eġurigurini.

²⁸ Ġita ribara, deikara Barau ġeura-viniani tarimari na ġeri ai karakara ġeġorani dagarari mabarari ġerina namo beġe ġoitaġorini. Korana moġeri tarima tu ġia na ġena ura lorinai ekearito, maġuri beġene ġabia ġana.

²⁹ Barau na deideiri eriba-guinerito ġia ġeura-viniani tarimari tu ġia na evirigirito, ġia Natuna ilailanai bene vaġa-iaġori ġana. Korana mo dabarai ġia Natuna tu maġuri guine meronai beiaġoni tarikaka ġutuma vefakari ai.

³⁰ Mo eġabi-hidirito tarimari tu ġia na ekearito tarimari; ma mo ekearito tarimari tu ġia na vei-iobukaibuka tarimari ai ekiraġirito; ma mai vei-maoromaoro tarimari ai ekiraġirito tarimari tu, ġia marevana baregona evinirito.

Barau ġena veuravini tu barego vedaurea

³¹ Be Barau na maġeri veġa eveirito iatari ai ġita tu kara bita kiraġiani? Bema Barau ġita ġesi, ġita evaġa-kavarani nai, dei na ġita beiaġoma-vinirani? Ta asiġina, korana

³² Natuna korikori maki gwaina asi eġabiato, senaġi etao-fitoġaiato ġita bitana maġuri ġana. Ma kamara dabarai tu Iesu Keriso ġesi dagara mabarari asi bevarevare-vini sebonarani?

³³ Be, Barau na evirigirito tarimari tu deikara na bevaġa-daġarini Barau ġoiranai? Ta asiġina, korana Barau tauġena na maorori ekiraġirini!

³⁴ Ma deikara na rakava voina metona bevinirini, ei? Ta asiġina, korana Keriso Iesu tu emaseto, benamo Barau na ma evaġa-maġuri ġenoġoato. Ġia toma tu Barau ġimana aroribanai etanu-taġoni, ma ġita iatarai eġurigurini.

³⁵ Ġita tu deikara na Keriso ġena veuravini nuġana na beġabi-ġerevaġirani? Meto ġerai ġeraġasini moġerina ba? Maġuri gwaġġiri ġerai ġeraġasini moġerina ba? Ġevaġa-midigu midigurani e ġelai-rovo-rovorani moġerina ba? Vito nanu mase taġoitaġorini moġerina ba? Asi kefiru dabuġari tatanuni moġerina ba? Vevaġa-gari dagarari taġoirarini moġerina ba? Vetari baġari na beġe vaġirani monana, ei? Asiġina veġata!

³⁶ Buka Veaġai ekirani kavana,

“Ġai tu ġoi daimu ai vanaġivanaġi ġevaġi-masema veġata ġetoni.

Ġai tu beġene vaġi-maseri ġetoni mamoori kavana ġeveimani.”

³⁷ Senaġi euravini-baregorani Kerisna ġenana maġeri meto mabarari nuġari ai takokoreni veġata, be tavaġa-darererini.

³⁸ Korana au ama riba-maoroni, ġita tu dagara ta na asi ilaila veġata Barau ġena veuravini ġenana beġabi-ġerevaġirani: Mase o maġuri, aneru o iauka rakavari, initoma taġitarini dagarari na o ġoirai vau mani beġe ġorani dagarari na, o seġuka kotari,

³⁹ guba tuġunai dagara ta o tanobara gaburenai mase gabuna dagarana ta, o Barau ġimana veiveiri dagarana ta na asiġina-ġinavaġi Barau ġena veuravini na beġabi-veġitarani, mo veuravini tu Barau na ġita evinirato, korana ġita tu ġera Vereġauka Keriso Iesu nuġanai tatanuni.

¹ Au tu Keriso ġena maġuri nuġanai atanuni, naima asi aġofaġofani, guruġa moġoniri akiraġirini, Iauka Veaġa na au nuġagu ai evaġa-fofori ginikauani, ma au nuġagu iaġasina na evaġa-moġoniani.

² Au tu nuġagu taġitaġi asikei, ma ġegu nuġa-vekwaraġi Isaraela tarimari iatari ai maki asi ekorini.

³ Ġegu ura baregona tu maiġa moġo: Bere namo, au tarikakagu ema ġegu doġoro korikoriri maġuri beġene ġabia uranai tu, Barau na au moġo iatagu ai rakava meto lelevaġina bere tore-kaua, ema Keriso ġenana bere tore-fitogaġu, be rekwarkwa tarimagu ai bara iaġo, a ġia tu au gabugu ai maġuri beġere ġabia.

⁴ Mai tu Isaraela tarimari akiraġirini. Ġia tu Barau na enatu-vanaġirito e Barau na marevana e mamana baregona evaġa-fofori vinirito; ema ġena kiraġitore guruġari baregori evinirito, taravatu maki evinirito; e Barau beġene toma-rakarigoa maġuriri ekira-vararito, ema guruġa-tore tu ġia ġeri ai eveirito.

⁵ Aberahamo, Isako, Iakobo tu ġia seseri doġori, ema taugani rekenai bita ġitaiani nai, Keriso tu ġia ġeri bese tauna. Keriso tu Barau, ma dagara mabarari debari tu ġia. Ġia tu vanaġivanaġi bitana vaġa-raġea. Amen.

⁶ Au asi akirani, Barau ġena guruġa (Isaraela tarimari ġeri ai) tu benamo asi tauri ai beġe iaġo atoni. Asiġina. Au akirani tu, (Barau ġena guruġa tu Isaraela besena mabarana ġeri senaġi) dia Isaraela besena mabarana tu Isaraela tarimari korikori.

⁷ Ema maiġesi maki asi bakirani: Ġia tu Aberahamo besena, be ġia mabarari Aberahamo natuna batoni. Asiġina. Korana Barau ekirato tu, "Ġoi besemu tu Isako ġenana moġo vau beġea maġurini."

⁸ Moġa anina tu: Tauġani rekenai ġemaġurini tarimari tu dia Barau natuna. Asiġina. Ġia tu Barau ġena kiraġitore maġuriri korikoriri ai ġemaġurini tarimari moġo tu Aberahamo besena.

⁹ Korana Barau ġena kiraġitore guruġana tu iniġesi ekirani, "Au na baġabi-torea ġaronai ma baġenoġoi-iaġomani, benamo Sara na natumi merona ta beġabiani."

¹⁰ Dia moġa moġo, senaġi boġono ġitaia, Rebeka natuna kafa ruarua maki tamari tu sebona moġo, mo tu ġita tamara Isako.

¹¹⁻¹² Senaġi kafa roġosi beġere maġuri e veiġa namona ta o rakavana ta maki roġosi beġere vei-karaia nuġanai, Barau na Rebeka ekiraiato, ekirato, "Tau-guinena na tau-muriseina ġena vetuġunaġi beiiaġo-vinini." Tovotovonai veġata Barau moġesina eguruġato, korana ġia ġena boioġa ilailanai eġabi-hidiato merona tu gabunai betanuni veġata. Tarima Barau na tu dia ġeri ġauvei e veiġa namori bakuri ai ekearini, senaġi Barau tauġena ġena ribai moġo ekearini.

¹³ Buka Veaġai etoreato kavana, ekirani, "Iakobo tu au na aura-viniani, senaġi Esau tu aiau-rakavaiani."

¹⁴ Be kara bita toni? Sikira, Barau tu dia vei-iobukaiobuka Barauna sisi? Asiġina ġinavaġi veġata.

¹⁵ Korana Barau na Mose tu ekiraiato, ekirato, "Au na deikara bavetuġa-ġwaiani tarimana, ġia na bavetuġa-ġwaiani, ema au na matari vetuġari baġwani tarimari tu, bavaġa-kavarini korana bavetuġa-ġwari kekei."

¹⁶ Moġa lorinai, dagara baregona tu dia tarimarima ġeri ura o vekwaraġi, senaġi Barau ġena vevetuġaġwa.

¹⁷ Korana Buka Veaġai ekirani, Barau na Pharao, Aigupito ġeri vere, tu maiġesina ekiraiato, ekirato, "Au na ġoi kini ai atoremuto korana tu maiġa, ġoi ġemu kira-sirivaġi ai au ġegu seġuka bana vaġa-rakarosia, be au aragu tanobara mabarana beġene kiraġi-foforia."

¹⁸ Moġesina naima bema Barau eurani tarima ta nevetuġa-ġwaia etoni nai tu, evetuġa-ġwaiani, ma eurani ta nuġana nevaġa-gwaġiġi foroforoa etoni nai, nuġana evaġa-gwaġiġi foroforoani, benamo Barau ekira-sirivaġi viniani.

¹⁹ Ma ta na au bokiraguni, bokirani, "O kara dainai ġita Barau na tu roġo evaġa-daġarani, ekirarani, ġita tu vei-rakava tarimara veġata etoni, ei? Be deikara tu ma kokorena Barau na neveia veġata betoni veigana ġia na bekira-ġoiani, ei?"

²⁰ Ġoi tauġemu novetuġamaġi, ġoi tu deikara, be Barau garona ġoi na oġareani? Be, ġimana na ġeveiato dagarana ta na eveiato tarimana bekiraiani, 'Ġoi tu kara dainai au maiġesina oveiguto,' betoni ba?"

²¹ Ribara, ġuro eveini tarimana tu ma ġena maoro veġata, mo tano tavi baregona sebona eġabiani, monana ġuro ruarua beveirini. Ġuro ta tu namo vedaurea beveiani, mo tu vereko baregona ġana, ma ġuro ta tu bevei-kavaiani moġo, vanaġivanaġi daridari ġana. Mai ġuro vei tarimana maiġa tu moġoni ma ġena maoro ba asiġina mo veiġa beveiani nai tu, ei?"

²² Barau maki moĝoni moĝesina eveito. Ĝia eurato, ĝia ĝena baru baregona nevaĝa-foforia, ema ĝena seĝuka nevaĝa-bererosia, be tarimarima na beĝene ribaia etato. Senaĝi ebaruvini-rakava rakavarito ma bene vaĝi-ĝosiĝosiri etato tarimari ĝeri ai, nuĝana eĝabitaro e evevaĝa-gwaĝiĝito.

²³ Barau na mo veiĝa eveiato korana tu ĝia eurato, ĝia marevana barego lelevaĝina moĝa beĝene ribaia etato. Gita tu ĝia na evetuĝa-ĝwarato, ema ĝita tu Barau na tovtovonai veĝata erovina-torerato, ĝia marevana baregona bitana ĝabia ĝana.

²⁴ Gita tu ĝia na ekearato tarimara. Barau na tu dia Iuda tarimama moĝo ekeamato, asiĝina, irau bese tarimami maki ekeamito.

²⁵ Hosea nuĝanai eguruĝato kavana, ekirato, “Ĝia tu dia au ĝegu tarimarima, senaĝi ‘au ĝegu tarimarimai’ bakiraĝirini, ema asi aura-vinirini doĝorona bakiraĝirini, bakirani, ‘ĝegu uravini doĝorona’ batoni,
²⁶ ema,

‘Gomi tu dia au ĝegu tarimarima’ atato gabunai, mo gabu sebonai ĝia bakiraĝirini, ‘Maĝuri Barauna natuna doĝorori.’ ”

²⁷ Isaia na Isaraela tarimari ekiraĝirini nai tu ekirato, “Mo tu moĝoni, Isaraela tarimari asisebo kone-mirina noĝa moĝo, senaĝi tarima viravira moĝo beĝe maĝurini.

²⁸ Korana tu Vereĝauka na tanobara tarimari ĝeri rakava voiri tu beraga-vini-vaĝirini, asi bekwaiboni.”

²⁹ Mai tu Isaia tovtovonai eguruĝato kavana, “Bere seĝuka rakava-rakava Vereĝaukana na ĝita besera tari asi bere goru-tariri nai, ĝita tu Sodoma e Gomora kavari bitara vei.”

Isaraela tarimari asi ĝeri veĝabidadama

³⁰ Be ĝita tu kara ma bita toni? Inĝesina sikira: Irau bese tarimari tu vei-iobukaiobuka tarimari ai beĝene iaĝo vekwaraĝina tu asi ĝeveito (Isaraela tarimari kavana), senaĝi ĝeri veĝabidadama Iesu Keriso ĝenai ĝetoreani ĝenana, vei-iobukaiobuka tarimari ai ĝeiaĝoto.

³¹ A Isaraela tarimari na tu taravatu ĝekorana-iaĝi ginikauato Barau na vei-iobukaiobuka tarimari bene kiraĝiri ĝana nuĝanai tu, vei-iobukaiobuka tarimari ai asi ĝeiaĝoto.

³² Kara dainai? Korana ĝia tu dia veĝabidadama ĝenana vei-iobukaiobuka tarimari ai beĝe iaĝoni ĝetato. Asiĝina. Ĝia ĝekirato tu, ĝeri ĝauvei e veiĝa ĝerina vauro vei-iobukaiobuka tarimari ai beĝe iaĝoni ĝetato. Moĝa lorinai Keriso tu ĝia ĝeri vedaĝaraĝe forenai eiaĝoto, benamo ĝeketo-tarito.

³³ Buka Veaĝai etoreato ekirani kavana,

“Ĝoĝitaia, au na Sionai

(o Jerusalemai) fore ta atoreato,

tarima bene vaĝa-vedaĝa-raĝeri ĝana,

ema mo fore barana atoreato,

bene vei-ketori uranai.

Senaĝi ĝia bevaĝa-moĝoniani tarimana tu, asiĝina-ĝinavaĝi moĝo bemaiaikaiani.”

10

¹ Tarikakagu mabarami, au nuĝagu ĝena ura baregona korikori, ma ĝegu noĝinoĝi Barau ĝenai aveiani tu, Isaraela tarimari Barau na bene vaĝa-maĝuriri.

² Korana au na maki ĝia avaĝa-moĝonirini, ĝia na Barau ĝena ura veiĝari beĝene korana-iaĝi ginikauri veĝata, senaĝi dagara sebona tu, Barau uravinina maĝurina korikori ĝia tu asi ribari.

³ Korana Barau ĝenana vei-iobukaiobuka eiaĝomani, moĝa ĝia tu asi ribari, be ĝia tauĝeri na ĝeri vei-iobukaiobuka veiĝari boruri ma ĝevaĝa-ruĝarini. Moĝesina naima Barau na tarimarima etore-roroĝotorini lairi korikori ĝia na tu asi ĝeĝabi-raĝerini.

⁴ Taravatu tu eiaĝomato mo Keriso ĝenai ema magoto. Toma tu Keriso beĝe vaĝa-moĝoniani tarimari mabarari tu vei-iobukaiobuka tarimari ai beĝe iaĝoni.

⁵ Mose na taravatu korana-iaĝina ĝenana vau Barau ĝoiranai vei-iobukaiobuka tarimari ai beĝe iaĝoni lairi ekirarito nai, maĝesina ekirato, “Mai taravatu maĝeri beĝe korana-iaĝirini tarimari tu mai taravatu ĝenana maĝuri beĝe ĝabiani.”

⁶ Senaĝi veĝabidadama ĝenana vei-iobukaiobuka taĝoitaĝoani guruĝana Buka Veaĝai tu maĝesina ekirani, “Nuĝamu ai asi bono kira, ‘Guba ĝana deikara bevaraĝeni?’ ” Be Keriso guba na bene ĝori-mariĝoa ĝana.

⁷ “Ema asi bono kira maki, ‘Deikara tano gaburena ĝana bevariĝoni?’ ” Be Keriso mase na bene ĝori-maraĝea ĝana.

⁸ A mai guruḡa korana korikori tu maiḡesi ekirani, “Guruḡa tu ḡoi sevisevimu ai maniḡa; ḡoi murumu ai ma ḡoi lorumu ḡutunai etanuni.” Gai na veḡabi-dadama guruḡana ḡomi ḡemi ai tu maiḡa ḡakiraḡiani.

⁹ Mo tu bema murumu na boguruḡa-foforini, bokirani, “Iesu tu Vereḡauka,” botoni, ma lorumu ḡutuna bovaḡa-moḡoniani, ḡia tu Barau na mase na ma evaḡa-varigisi ḡenoḡoiato nai, Barau na bevaḡa-maḡurimuni.

¹⁰ Korana loruna ḡutuna na evaḡa-moḡoniani tarimana tu, Barau ḡoiranai vei-iobukaibuka tarimanai eiagoni; ema muruna na eguruḡa-iaḡi fororini tu, maḡuri edoḡariani.

¹¹ Korana Buka Veaḡai maiḡesina ekirani, “ḡia evaḡa-moḡoniani tarimana tu asi bemaikaiani.”

¹² Anina tu, Iuda tarimari e irau bese tarimari fakari ai vetoḡa boruna ta asi betanuni, korana tu ḡita mabarara ḡera Vereḡauka tu sebona kwariḡutu, Barau ḡereḡana moḡo, ma ḡia ḡenai ḡekea-raḡeni tarimarimari mabarari tu ḡena vevaḡa-namo barego vedaureana evinirini.

¹³ Korana, “Barau arana beḡe vatoani tarimari mabarari tu Barau na bevaḡa-maḡuririni.”

¹⁴ Senaḡina, kamara dabarai Barau asi ḡevaḡa-moḡoniani tarimari ḡia ḡenai beḡe kea-raḡeni? Ema kamara lai ai Barau varina asi ḡeseḡaḡiatio tauri na ḡia beḡe vaḡa-moḡoniani? Ema kamara dabarai ḡia varina beḡe seḡaḡiani, bema ta na asi beḡobata-vinirini nai?

¹⁵ E deikara na beḡobata-vinirini, bema Barau na ta asi betuḡuani nai? Buka Veaḡai ekirani kavana, “Vari Namona eḡwa-iaḡomaiani tarimana kwakuna tu namo vedaureana veḡata, (korana namo baregona evaḡa-foforiani).”

¹⁶ Senaḡi dia tarimarima mabarari na Vari Namona ḡeḡabi-raḡeani, nai Isaia maiḡesi ekirani, “Vereḡauka, deikara na ḡaina guruḡa evaḡa-moḡoniani?”

¹⁷ ḡita ribara, veḡabidadama tu Vari Namona ḡeḡobata-iaḡiani taseḡaḡiani, monana eiagomani; ema taseḡaḡiani varina tu Keriso ḡena guruḡa.

¹⁸ Senaḡi Isaraela tarimari tu kamasi? Barau ḡena guruḡa moḡoni ḡia na asi ḡeseḡaḡiatio? Asigina, ḡeseḡaḡiatio. Korana Buka Veaḡai ekirani, “Tarima kotari na tanobara mabaranai ḡea vari-fiuato, ema ḡeri guruḡa maki tanobara dokona-dokona ḡea ḡoitaḡoato.”

¹⁹ Avedanaḡini: Isaraela tarimari na mo guruḡa tauna asi ḡedoḡarियो? Asigina, ḡia ma ribari. Korana Mose varau maiḡesi ekirato,

“Au na ḡomi tu asi arana besena ta ḡerina ḡomi bavaḡa-maiakamini.

Ema au na ḡomi tu asi ḡetuḡamaḡi-fakani besena ḡenana bavaḡa-barumini.”

²⁰ Ema Isaia maki asi eguruḡa-ḡarito, ekirato,

“Au tu asi ḡevetauguto tarimari na ḡeḡoitaḡogoto,

ema asi ḡevedanaḡi-vetauguto tarimari ḡeri ai avevaḡa-foforito.”

²¹ Senaḡi Isaraela tarimari tu ekirarito, ekirato,

“Boḡiboḡi na eiagoni mo ea lavini,

au ḡimagu tu seḡafore ema kira-sirivaḡi tarimari ḡeri ai atuḡu-rosiani.”

11

Isaraela besena lakouna Barau na evetuḡarito

¹ Moḡa lorinai ma avedanaḡini: Barau na ḡena Isaraela tarimari tu eruḡa-doḡe-muriḡirito ba? Asigina ḡinavaḡi! Au maki Isaraela tarimagu, Aberahamo besena, Beniamina ḡena doḡoro taugu.

² Barau na ḡena tarimarima, tovotovona na veḡata eḡabi-hidirito tarimari, kamasi beruḡa-doḡe-muriḡirini? Gomi Buka Veaḡai Elia varina ḡetoreato tu moḡoni veḡata asi ribami? ḡia Isaraela tarimari na beḡe vaḡi-maseani ḡetato nai, Barau ḡenai eḡauḡauto, maiḡesi ekirato:

³ Vereḡauka, ḡemu peroveta tarimari tu beḡe vaḡi-ḡosiri, ma ḡoi ḡevarevare-vinimuni dagarari ḡetore-kaurini e ḡegaburini fata veaḡari maki beḡe rovori. Mai tu au moḡo ḡereḡagu roḡo maiḡegu nuḡanai, au maki ḡevaḡi-masegu ḡetoni.

⁴ Ma Barau na ḡia tu kamasi evaḡa-veseato, ei? Barau ekirato, “Au ḡegu tarimarima mabarari daḡara imaima ruarua (7,000) atore-ḡerevaḡirito, roḡo maḡuri maniḡeri. ḡia na ḡofaḡofa barauna Bal asi ḡetoma-rakarigo viniato.”

⁵ Maitoma maki, Barau na ḡena namo e varevare-barai Isaraela tarimari lakouna eḡabi-viriḡirito.

⁶ Bema ḡena vevetuḡaḡwa e varevare-barai eveḡabi-hidito nai, dia kara ta ḡeveiato bakunai eḡabi-viriḡirito. Korana bema ḡeri ḡauvei ta dainai Barau na bere ḡabi-hidiri nai,

ġena ġabihidi veiġana tu dia ġena vevetuġaġwa e varevare-bara dainai, vevetuġaġwa maki asi anina.

⁷ Be kara bita kiraġiani? Isaraela tarimari na beġene ġabia ġana ġevetau-gwadagwadaiato dagarana tu ġia na asi ġeġabiato, senaġi Barau na eġabi-hidiritto tarimari kotari na moġo ġeġabiato. A mabarari na tu Barau ġena keakea asi ġeseġaġi-viniato.

⁸ Buka Veaġai ekirani kavana,
 “Barau na ġia nuġari e ġeri tuġamaġi tu evei-vegonurito,
 be tovotovona na veġata mo initoma ġia tu asi ġeboġe-fakani,
 ema garo maki asi ġeseġaġini.”

⁹ Davida ġena guruġa maki maiġesi ekirani,
 “Bere namo ġari ġaniġani fatana maki ġeri konagi e ġeri ganai bene iaġo,
 e ġeri vekakenaġi dagarana bene iaġo,
 ema ġeri vei-rakava voina ġabiġabina gabunai bene iaġo.

¹⁰ Bere namo matari bene vei-mukunari,
 be asi beġene boġeboġe, ma doġeri beġene ġeġeva,
 be beġene raka-dorudoru vanaġivanagi.”

Barau na boġa oliveri legari vamoka oliveri legari ġeri ai ekafa-kaurito

¹¹ Ma avedanaġini, Isaraela tarimari ġevékenenaġito nai tu, beġene keto-moġovaġi ġana ba? Asigina, dia moġesina! Senaġi ġeri kira-sirivaġi dainai, vevaġa-maġuri tu irau bese tarimari ġeri ai evotuto, korana Isaraela tarimari beġene launaġiri, Barau ġena vevaġa-maġuri beġene vetaua ġana.

¹² Situġamaġia, Isaraela ġeri kira-sirivaġi na vevaġa-namo barego tanobarai ema raka-toġato, ema iauka maġuriri ai ġerabu-iaġirini gaburi ai irau bese tarimari ġeri ai namo-bara ema foforini, a Isaraela tarimari mabarari beġe ġenoġoini Barau ġenai nai tu, Barau ġena vevaġa-namo tu ma barego lelevaġina bebubu-rigoani.

¹³ Mai tu ġomi irau bese tarimami, avaga-gurugamini, korana au tu ġomi irau bese tarimami ġemi apostolo taugu. Au ġegu iaku tu barego mai ġauvei aveiani nai.

¹⁴ Korana au aurani ġegu tarimarima korikori bana vaġa-vetuġamaġi daradarari, be kotari na maġuri beġene doġariri.

¹⁵ Korana Iuda tarimari Barau na eruġarito nai tu, tanobara boruri tarimari eġabi-kavirito, a Barau na Isaraela tarimari ma beġabi-raġerini tu, kamasi beġea vetoreni? Namu baregona begorani! Mo tu mase na maġuri-ġenoġoi bevaġa-ġoraiani kavana.

¹⁶ Bema ġebaki-guineani beredina Barau ġeviniani nai tu, mo beredi mabarana tu ġia ġena, ema bema ġau ġokana Barau ġeviniani nai, legana maki ġia ġena.

¹⁷ Isaraela tu noġa moġo olive ġauna namona ta. Barau na mo olive legana tari etau-korurito, ma ġomi, boġa olivena legari, eġabimito, mo etau-korurito moġeri gaburi ai evaġa-kafakafa-kaumito, benamo toma tu mo olive namona ġokana na ġaniġani namori ġevaraġeni, moġeri goġanirini.

¹⁸ Moġa lorinai asi boġono veiavi ġia vekaravari ai. Bema boġo veiavini nai, boġono riba: Dia ġomi na ġau ġokana ġovaġa-kavaiani, asigina, ġau ġokana na ġomi evaġa-kavamini.

¹⁹ Betaġu boġo kirani, “Olive legari tu etau-korurito, au ġia gaburi ai bene vaġa-kafakaugu ġana.”

²⁰ Oba, mani tu moġoni. Senaġi ġia tu asi ġeri veġabidadama naima etau-korurito, ma ġomi tu ġemi veġabidadama lorinai, ġia gaburi ai ġoruġani. Moġesina naima asi boġono vetuġamaġi-vaġe vaġe, senaġi boġono gari moġo.

²¹ Korana bema Barau na olive legana korikoriri maki gwairi asi eġabirito senaġi etau-korurito nai, ġomi maki gwaimi asi beġabirini.

²² Moġeri na Barau ġena veiaiu-namo veiġana namona ma ġena veiaiu-rakava veiġana metona boġono ġitaia. Barau ġabidadamanai ġeketoni tarimari tu eiaiu-rakavarini, ma ġeri ai veiġa metona eveirini. Senaġi ġomi tu eiaiu-namomini. Barau na roġo beiaiu-namo-iaġomini, bema ġia ġena veiaiu-namo nuġanai moġo boġo tanu-iaġoni nai. Asigina nai tu, ġomi maki bebasi-ġutumini.

²³ Iuda tarimari maki, bema Barau asi ġevaġa-moġoniani veiġari beġe iaġuirini, benamo Barau beġe vaġa-moġoniani nai tu, Barau na ma bekafakau-ġenoġoirini. Korana Barau na ma bekafakau-ġenoġoirini riba.

²⁴ Gomi tu boġa olivena ġauna legana, a dia varovaro olivena, senaġi eġabimito, ma vamoka olivena ġaunai ekafa-kaumito. Bema ġomi boġa olivena legari moġesina eveimito nai, vamoka olivena legana etau-koruato, moġea maki etau-koruato olivena ġaunai ma bekafa-kauani riba.

Isaraela tarimari mabarari Barau na bevaġa-maġuririni

²⁵ Tarikakagu mabarami, au aurani mai guruḡa vekuretoḡana maiḡa boḡono ribaia, korana tauḡemi boḡo vekiraḡi-varaḡe varaḡeni garina: Isaraela tarimari nuḡari tu moḡesi gwaḡiḡi moḡo asi beḡe tanu-iaḡoni. Asigina. Ġia nuḡari e ḡeri tuḡamaḡi moḡesi beḡe tanu-iaḡoni, beiaḡoni mo, irau bese tarimari mabarari, (Barau na eḡabi-hidirito tarimari), beḡema bere-toḡani Barau ḡena maḡuri nuḡanai.

²⁶ Moḡa murinai vau Isaraela besena mabarari Barau na bevaḡa-maḡuririni. Buka Veaḡai etoreato ilailanai, ekirato, “Siona (o Ierusalem) na vevaḡa-maḡuri tauna beiaḡomani,

ḡia na Iakobo besena ḡenana Barau asi ḡetoma-rakarigoani maḡurina betore-veḡitaiani.

²⁷ Benamo au na ḡia ḡeri rakava baḡabi-veḡitaiani nai,

au na ḡia ḡeri ai mai kiraḡitore gwaḡiḡina baveiani.”

²⁸ Iuda tarimari ḡutuma na Vari Namona ḡekira-fitoḡaiani nai, Barau ḡena vetari tarimari ai ḡeiaḡoto. Senaḡi moḡesi ḡeveito dainai, ḡemi maḡuri dabarana evekeoto. A ḡia tu Barau na eḡabi-hidirito besena lorinai, seneri (Aberahamo, Isako, Iakobo) bakuri ai Barau na eura-vinirini.

²⁹ Korana Barau ḡena vevarevare ema ḡena keakea tarimarima ḡeri ai tu beḡe tanu-vanaḡi vanaḡini, asi ma beḡe vekoki-fitoḡani dagarari.

³⁰ Vaḡa-ilailana ḡomi tovtovonai tu Barau ḡokira-sirivaḡi viniato-ḡoi, senaḡi toma tu Barau ḡena vevetuḡaḡwa boḡo ḡoitaḡoa. Gomi tu Isaraela tarimari ḡeri kira-sirivaḡi dainai, Barau ḡena vevetuḡaḡwa boḡo ḡabia.

³¹ Isaraela maki toma tu ḡekira-sirivaḡini, korana Barau na ḡomi evetuḡa-ḡwamini dainai, ḡia maki ma bene vetuḡa-ḡwari ḡana.

³² Korana Barau na tarimarima mabarari kira-sirivaḡi maḡurinai etore-toḡarito, korana ḡia ḡena vevetuḡaḡwa ḡia mabarari na beḡene ḡabia.

Barau bitana vaḡa-raḡea

³³ Barau ḡena iaunega ema riba tu barego, ma barego lelevaḡi veḡata! Ġia ḡena vevaḡa-maoro dabarana maki vetau-kavana beḡorani! Gena dabara maki deikara na betuḡamaḡi-doḡariani?

³⁴ Buka Veaḡa ekirani kavana, “Vereḡauka ḡena tuḡamaḡi tu dei na beribaiani? O deikara na ḡia besisiba-viniani?

³⁵ Dei na Barau evini-farefareato, be Barau na ḡia ma bevini vaḡa-voiani?”

³⁶ Korana dagara mabarari korari tu ḡia, ema ḡia ḡenana ḡeḡorato e ḡefoforito, ema ḡia ḡena moḡo. Ġia moḡo bitana vaḡa-raḡea mo vanaḡivanaḡi. Amen.

12

Tauḡanimu Barau ḡena

¹ Tarikakagu mabarami, Barau ḡena vevetuḡaḡwa tu barego aḡitaiani ḡita iatarai. Tauna moḡa au na ḡomi alaunaḡimini, akirani, tauḡanimi mabarari vevarevare dagarari maḡuriri e veaḡari ai boḡono vaḡa-iaḡori, ema Barau na beiaḡu-iaḡi-baregorini tauḡaniri Barau boḡono vini-raḡea, ginitaḡo varevareri kavana. Moḡesina boḡo veini tu, Barau boḡo tomaraḡariḡo vini-korikoriani.

² Mai tanobara ḡena maḡuri ema veḡa irauirauri asi boḡono ḡabi-raḡeri ema asi boḡono veiri. A ḡomi tu ḡemi tuḡamaḡi boḡono vaḡa-variḡuri, be ḡemi maḡuri beḡene vekurevo. Monana vau Barau ḡena ura korikori boḡo riba-ginikaurini. Boḡo ribani maki, aiḡa tu namo vedaurea, Barau na eiaku-iaḡiani dagarana.

³ Barau na ḡena namo e vevarevare-bara lorinai ekeaguto, ḡena apostolo ḡauveina eviniguto nai, au na ḡomi mabarami avaḡa-guruḡamini: Tauḡemi asi boḡono vetuḡamaḡi, ḡomi ḡemi riba ema veḡa tu varaḡe lelevaḡi. Asigina. Namona tu boḡono vetuḡa-maḡi-ginikau, Barau na veḡabadadama aiḡa baregona evinimito, moḡa ilailanai moḡo boḡono tuḡamaḡi e guruḡa.

⁴ Vaḡa-ilailana ḡita tauḡanira tu sebona moḡo, a legana tu ḡutuma gorogoro, ma mai tauḡanira legari ḡeri ḡauvei tu dia sebona.

⁵ Ġita ekalesia maki moḡesi, ḡita asisebo, senaḡi Keriso ḡena maḡuri nuḡanai ḡita tu tauḡani sebonai taiaḡoto. Ma ḡita tata tu karora tata ḡeri, (dia mabarara tata ḡera-ura ḡera-urai bita rakani).

⁶ Barau ḡena namo ema vevarevare-barai evinirato ilailanai, vevarevare dagarari irauirau ḡerai ḡetanuni. Bema ta peroveta vevarevarena o seḡukana eviniato nai, bene peroveta ḡena veḡabadadama ilailanai.

⁷ Bema ekalesia vetuḡunāgi iaḡoviniri eviniato nai, bene vaḡa-kavari. Bema vevaḡa-riba varevarena eviniato nai, bene vevaḡa-riba.

⁸ Bema kotari ḡeri veḡabidadama vaḡa-kokoreri varevarena eviniato nai, bene vaḡa-kokoreri; bema rabu tarimari vaḡa-kavari varevarena eviniato nai, bene vini-ginikauri; bema tarimarima ḡorikauri varevarena eviniato nai, ma nuḡana mabarana ḡesi bene veḡorikau; bema tarimarima vetuḡaḡwari varevarena eviniato nai, bene vetuḡaḡwari e bene vaḡa-kavari ma iakuna ḡesi.

Veuravini

⁹ Nuḡami mabarari ema ma moḡoniri ḡesi boḡono veuravini. Rakava veigari asi boḡono ura-viniri, a veiḡa namori boḡono ḡabi-gigitariri.

¹⁰ Vetarikaka veuravinina boḡono korana-iaḡi gwadaia, karomi tata ḡesi boḡono vegubakau, a dia tata tauḡemi arami boḡono tore-varaḡe varaḡeri.

¹¹ Boḡono ḡauvei-kokore kokore, asi beḡene ḡubulefimi; Iauka Veaḡa na nuḡami bene vaḡa-varigiḡisiri, Vereḡauka vetuḡunāgina boḡono iaḡo-vini.

¹² Gotuḡamaḡi-kauani dagarana bakunai boḡono iaku; meto ḡoḡoitaḡorini nuḡari ai boḡono vevaḡa-gwaḡigi; ḡauḡau asi boḡono vaḡa-moirai.

¹³ Barau ḡena tarimarima ḡeri rabu ma vetau-vetau gaburi ai boḡono vaḡa-kavari. Tarimarima boruri ḡemi ai beḡe iaḡosini nai, boḡono ḡabi-raḡeri, ema boḡono nari-ginikauri.

¹⁴ Gevaḡa-rakavamini tarimari boḡono vaḡa-namori, iatari ai boḡono ḡauḡau, asi boḡono vaḡa-rakavari, asi boḡono tovoḡari.

¹⁵ Geverereni tarimari ḡesi boḡono verere-vegogo, ma ḡemidigu-midiguni tarimari ḡesi maki boḡono midigu-midigu sebona.

¹⁶ Karomi ḡesi nuḡa sebonai boḡono tanu, asi boḡono vekokoroku, ne ma nuḡami mabarari ḡesi gaburemi tarimari ḡesi boḡono vetore-sebona. Tauḡemi asi boḡono vetore-varaḡe varaḡe, asi boḡono kira, ḡomi moḡo ma iaunegami.

¹⁷ Veiḡa rakavari evei-vinimini tarimana ḡena veiḡa rakavari voina tu veiḡa rakavari na asi ma boḡono vaḡa-voia. Boḡono ḡauvei-gitaḡita, be tarimarima mabarari ḡoirari ai veiḡa iobukaiobukari moḡo boḡono veiri.

¹⁸ Maino tanutanuna tu ḡomi mabarami ḡimami ai moḡo maniḡea, be ma dabarana nai tu, tarimarima mabarari ḡesi maino ai boḡono tanu.

¹⁹ Garagaragu namomi, gevaḡa-rakavamini tarimari ḡeri vei-rakava voiri asi boḡono vei-viniri, a Barau faka boḡono vinia, be ḡena baru vauro iatari ai bene vaḡa-foforia. Korana Buka Veaḡai tu maḡesina ekirani, “Vereḡauka ekirani, ‘Au na vauro bavaḡa-voirini.’”

²⁰ Senaḡi, “Bema ebaru-vinimuni tarimana evitoani nai, bono ḡubua; bema bokana ekokeni nai, nanu bono vinia bene niu. Maḡesina boveini nai tu, karava memeḡari ḡia debanai bolabu-kaurini,” bemaikaiani.

²¹ Rakava na ḡoi asi bene vaḡa-dareremu, ne ḡoi na rakava veiḡa namori na bono vaḡa-darereri.

13

Taravatu tauri garori bitana seḡaḡiri

¹ Tarimarima mabarari gavamani ḡeri veḡorikau maorona gaburenai beḡene tanu ema beḡene seḡaḡi-viniri. Korana gavamani boruna ta tu asi etanuni, senaḡi Barau na evaḡa-ruḡarito ema maoro baregona evinirito gavamaniri moḡo ḡetanuni.

² Moḡesina naima gavamani ḡeri guruḡa eḡarerini ma ekira-fitogari tarimana na tu Barau na evaḡa-ruḡarini tarimari eḡarerini ma ekira-fitogari. Ma mo veiḡa beveiani tarimana tu tauḡena moḡo vei-rakava tarimanai evevaḡa-iaḡoni, ma evevaḡa-metoni.

³ Veḡitaḡau o gavamani tarimari na vei-iobukaiobuka tarimari tu asi gevaḡa-garirini, ne ḡia tu veiḡa ḡeleaiani tarimari gevaḡa-garirini. Bema ḡomi ḡourani, boḡono tanu-rekoreko moḡo, gavamani tarimari gariri asi boḡono vei ḡotoni nai, veiḡa iobukaiobukari moḡo boḡono vei. Moḡesi boḡo veirini tu, ḡia na bevaḡa-raḡemini.

⁴ Gavamani tarimari tu Barau ḡena vetuḡunāgi ḡeiaḡo-vinini, ḡomi namo boḡono ḡoitaḡo ḡana ḡeḡauveini. Senaḡi bema ḡomi na veiḡa boḡo leaiani nai tu, boḡono gari korana ma ribani, gavamani ḡimanai tu vevaḡa-maoro baḡana eḡabi-taḡoani. Barau na asi evini-kavaiato, senaḡi ḡia vetuḡunāgina eiaḡo-vinini, kerere tarimari ḡeri rakava voiri bene viniri ḡana.

⁵ Moḡa lorinai gavamani ḡeri veḡitaḡau gaburenai bitana tanu ema garori bitana seḡaḡiri. Dia kerere voiri beḡe vinirani moḡo gariri ai, senaḡi nuḡarai maki taribani, veiḡa namori bitana veiri.

⁶ Ğomi tu moġesina naima ġotakesini. Gavamani takesi ġoviniani, korana gavamani tu Barau ġena vetuġunaġi ġeiaġo-vinini tarimari. Ġia ġeri taimi mabarana tu veġitaġau ġauveina ġeveiani.

⁷ Ma ġemi ġabitore nai, voiri boġono vei. Bema takesi roġosi boġono vini nai, boġono vini, ma moni kotari roġosi boġono vini nai, boġono vini; vegubakau nai, boġono vegubakau; vemataurai nai, boġono vemataurai.

Boġono veuravini, korana ġaro bevotu

⁸ Karomi ta ġenai ġemi ġabitore ta asi bene tanu, senaġi ġabitore sebona moġo bene tanu tu maġa: Karomi boġono uravini-vanaġi vanaġiri. Korana karoni eura-viniani tarimana na Barau ġena taravatu mabarana ekorana-iaġiani veġana eveiani.

⁹ Mai taravatu maġeri: Asi bono veġura-vanaġi; asi bono vevaġi-deba; asi bono lema; tarima tari ġeri dagara mata-ġaniġaniri asi bono vei; ma taravatu kotari maki, moġeri mabarari tu mai taravatu sebona na eġabi-vegogoani: “Sevimu tarimana bono ura-vinia, ġoi taugemu oveura-vinini kavana.”

¹⁰ Veuravini na sevina tarimana asi evaġa-rakavaiani. Moġa lorinai dagara barego vedaureana Barau ġena taravatu nuġanai tu veuravini, korana taveura-vinini nai, taravatu mabarana takorana-iaġiani.

¹¹ Mai veġa boġono veia, korana mai nega vetoġana tu ma ribami. Nega varau beraġasi, be ġotataġa ġena na. Korana ġita vaġa-maġurira ġaronu tu varau bekvinaġi-rakava, dia mo guinenai, Keriso taġabi-raġeato ġaronu gabunai kavana.

¹² Boġi tu dori ekorini, ġaro tu ġena raġe bakunai. Moġa lorinai mukuna veġari sitoretariri, ma mama dabuġari sirigo-kauri, vetari tarimari na vetari dabuġari ġerigo-kaurini kavana.

¹³ Veġa namori moġo sivei, laġani erakani tarimana kavana. A asi sivereko-lauvaġi lauvaġi e niuniu moġo asi sivaġa-kokorea, kima mata-ġaniġaniri asi sivei e asi simata-boraġa, asi sivevaġi-vevaġi ema asi simama.

¹⁴ Senaġi ġita tu Vereġauka Iesu Keriso moġo sirigo, dabuġa tariġo-kaurini ilailanai. Ma taugani ġena ura veġari rakavari veiveiri tugamaġiri tu asi sigabi-raġeri.

14

Moiramoira ema kokore

¹ Veġabidadamai emoiramoirani tarimana boġono ġabi-raġea, enabe ġena tuġamaġi tari ġomi ġemi tuġamaġi ġesi asi ilaila, senaġi asi boġono vaġa-veġareveġarea e asi boġono ġau-fituġaia.

² Tarima ta ġena veġabidadama kokore nai, eġani-taġuitaġuini, ma ta tu ġena veġabidadama moira lorinai, ġaniġani koriri, asi bureġari, moġo eġanini.

³ Eġani-taġuitaġuini tarimana na vamoka ġaniġaniri moġo eġanini tarimana asi bene kira-fituġaia, ema vamoka ġaniġaniri moġo eġanini tarimana na maki dagara mabarari eġani-taġuitaġuirini tarimana asi bene vaġa-rakavaia, korana ġia tu Barau na varau eġabi-raġeato.

⁴ Goi tu dei, be tarima ta ġena vetuġunaġi tauna bono vevaġa-maoro vinia? Ġia ġena veġabidadamai eruġa-gigitarini o eketoni moġa tu ġena baregona na vauro bekiraġiani. Senaġi ġia tu beruġa-gigitarini, korana Vereġauka na kokore beviniani bene.

⁵ Tarima ta na tu ġaro tari evaġa-veaġa baregorini, ma ta na tu ġaro mabarari ilaila moġo etoni. Namona tu, ġia tata nuġari e ġeri tuġamaġi ai beġene riba ġeri tuġamaġi tu maoro.

⁶ Tarima ta na ġaro ta eġabi-hidiani, benamo ekirani, mai tu ġaro vevaġana etoni nai, mo tarima na mo veġa tu Vereġauka ġenai eveiani. Eġani-taġuitaġuini tarimana maki Vereġauka etuġamaġiani vauro eġaniġanini, korana ġia na Barau etanikiu-viniani. Ema asi ebureġani tarimana maki Vereġauka etuġamaġiani vauro eġani-ġanini. Ġia maki Barau etanikiuani.

⁷ Korana ġita tamaġurini nuġanai dia taugera ġera maġuri moġo, ma bita maseni maki dia ġita taugera ġereġara ġera bita maseni moġo. Asiġina ġinavaġi.

⁸ Maġuri tatanuni nai, Vereġauka ġena tamaġurini, ema bita maseni maki, Vereġauka ġena moġo bita maseni. Moġa lorinai, tamaġurini o bita maseni, ġita tu Vereġauka ġena veġata.

⁹ Keriso emaseto ma emaġuri-ġenoġoito korana tu, mase tarimari ema ġemaġurini tarimari ġeri Vere ai bene iaġo ġana.

¹⁰ Moġa lorinai karase ġoi tarikakamu ovevaġa-maoro viniani? Ma kara dainai tarikakamu okira-fituġaiani? Bono tuġamaġi, ġita mabarabarara tu Barau ġena vevaġa-maoro seana ġoiranai bita ruġa-tarini, vevaġa-maoro bita ġabini.

¹¹ Isaia na etoreato kavana, ekirani,
 “Vereḡauka ekirani,
 ‘Moḡoni veḡata, amaḡuri-taḡoni dainai,
 tui mabarabarari au ḡoiragu ai beḡe vetuitui-tarini,
 mea mabarabarari na Barau beḡe kiraḡi-foforiani.’ ”

¹² Moḡesi naima ḡita tata ḡera maḡuri Barau ḡoiranai bita kiraḡi-fofori foforirini.

Tarikakamu ḡena veḡabidadama asi bono vaḡa-rakavaia

¹³ Moḡa lorinai karora ḡesi tauḡera asi bitana vevaḡa-maoro vevini. A namona ḡita tu ḡera tuḡamaḡi sivaḡa-maorori, be tarikakara ḡoirari asi sifatafata-ḡauri, ḡeri veḡabidadama na beḡe ketoni garina.

¹⁴ Iesu Vereḡauka nuḡanai amaḡurini nai, ma nuḡagu mabarana ḡesi ariba-maoroni, ḡaniḡani dagarana ta tu asi rakava o ma mirona Barau ḡoiranai. Senaḡi bema tarima ta na ḡaniḡani dagarana ta etuḡamaḡi-rakavaiani nai, mo ḡaniḡani dagarana tu ḡia ḡereḡana ḡenai moḡo moḡoni rakava o ma mirona.

¹⁵ Bema tarikakamu asi eiakuni, ḡoi na ḡoiranai kara oḡaniani eḡitaiani nai, bono riba, mo tu dia veuravini veḡana ḡoi na oveiani. Gemu ḡaniḡani na tarikakamu ḡena maḡuri asi bono vaḡa-rakavaia. Keriso tu ḡia maki uranai emaseto.

¹⁶ Moḡa lorinai ḡemi veḡa ḡobiri boḡono toreri, tarimarima maoro asi boḡono viniri, ḡemi veḡabidadama namori rakavari beḡene kiraḡiri.

¹⁷ Korana dagara baregona tu Barau ḡena Basileia, a dia ḡaniḡani o niuniu dagarari, senaḡina vei-iobukaiobuka, maino, ema iaku-verere Iauka Veaḡa ḡena maḡuri nuḡanai.

¹⁸ Deikara maḡeri veḡa nuḡari ai Keriso vetuḡunaḡina beiaḡo-vinini tarimana tu, Barau na beiakua-iaḡiani, ema tarimarima na maki beḡe vaḡa-moḡoniani.

¹⁹ Moḡa lorinai mabarara sikokore, maino vaḡa-ḡorana ema ḡera veḡabidadama vaḡa-tubuna ḡauveiri siveiri.

²⁰ ḡaniḡani ḡaramari ai Barau ḡena ḡauvei asi boḡono vaḡa-rakavaia. Moḡoni, ḡaniḡani mabarari tu namo ema veiareva Barau ḡoiranai, senaḡi bema ḡoi na ḡaniḡani ta oḡaniani nai, tarima ta nuḡana ovaḡa-metoani, benamo ḡena veḡabidadama na beketoni, moḡa neḡi asi namo.

²¹ Moḡa lorinai namona tu, asi bono bureḡa, e vine nanuna asi bono niu, ema tarikakamu vaḡa-daḡaraḡena veḡana ta tu asi bono veia. Korana tarikakamu ta bovaḡa-daḡaraḡeani, benamo bevei-rakavani garina.

²² Kara dagara ovaḡa-moḡoniani, maniḡa tu ḡoi ema Barau fakami ai moḡo bene tanu. (Senaḡi tarikaka tari asi bono launaḡiri, ḡoi na kara ovaḡa-moḡoniani dagarana beḡene ḡabi-raḡea, korana) nuḡanai kara eḡabi-raḡeani dagarana na nuḡana asi evaḡa-meto ḡenoḡoiani tarimana tu beiakuni.

²³ Bema tarima ta tu mo kara eḡabi-raḡeani dagarana ma daradarana ḡesi beḡaniani nai, ḡia tu tauḡena bevevaḡa-metoni, korana ḡia tu asi veḡabidadamana ḡesi eḡaniani. Ema asi veḡabidadama ḡenana ḡeiaḡomani dagarari mabarari tu vei-rakava dagarari moḡo.

15

Keriso ḡena maḡuri bitana tovoতোভো

¹ Ḳita ma kokorera tarimara na moira tarimari ḡeri keto ai bisini vaḡa-kavari, a dia tauḡera ḡereḡara moḡo lorira bitana toreri.

² Ḳita tata karora loriri bisini toreri, be namo beḡene ḡabia, ema ḡeri veḡabidadama bitana vaḡa-tuburi.

³ Korana Keriso maki tauḡena lorina asi etoreato, senaḡi Buka Veaḡai etoreato ilailanai, ekirani, “Vanevane guruḡari metori ḡoi, Barau, iatamu ai ḡekiraḡirito tu, au iatagu ai beḡema ketokau.”

⁴ Guinena guruḡa mabarari Barau ḡena Bukai ḡetorerito moḡeri tu, ḡita beḡene vaḡa-riba-iaḡira ḡana ḡetorerito. Korana ḡita mo ḡetorerito guruḡari ḡerina vevaḡa-gwaḡiḡi ema vevaḡa-naḡi bisini ḡabia, benamo ḡoirarai Barau ḡena Basileia moḡa bisini tuḡamaḡi-kaua.

⁵ Vevaḡa-gwaḡiḡi ema velaunaḡi tu Barau evinini. Ḳia na gomi vekaravami ai nuga-sebona bene vaḡa-ḡoraia Keriso Iesu ḡotovotovoani nuḡanai.

⁶ Be nuḡa-sebonai ema garo sebonai ḡera Vereḡauka Iesu Keriso Tamana Barau boḡono vevato-iaḡia.

⁷ Tata karomi ḡesi boḡono veiau-namo ema boḡono veḡabi-raḡe, Keriso na eiaunamomito ema eḡabi-raḡemito kavana. Moḡesina boḡo veini tu, Barau boḡo vaḡa-raḡe ḡitakauani.

⁸ Boĝono tuĝamaĝi: Keriso tu Iuda tarimari ĝeri vetuĝunaĝi taunai eiaĝoto, Barau ĝena vetuĝamaĝikau vaĝa-moĝonina, ema Barau ĝena kiragiĝore guruĝari, senera (Aberahamo, Isako, ema Iakobo) eguruĝa-tore vinirito guruĝari vaĝa-taunari ĝana.

⁹ Ema irau bese tarimari na maki Barau beĝene vaĝa-raĝea ĝena vevetuĝaĝwa bakunai.

Buka Veaĝa etoreato ilailanai,

“Moĝa lorinai irau bese tarimari vekaravari ai au na ĝoi bavaĝa-raĝemuni;

ĝurigiĝuri mariri baĝabini,

ĝoi aramu bavaĝa-namoani.”

¹⁰ Ma ekirani,

“Irau bese tarimami o, ĝia ĝena bese tarimari ĝesi ĝoiaku-vegogo.”

¹¹ Ma ekirani,

“Gomi irau bese tarimami,

Vereĝauka ĝovaĝa-raĝea,

ema ĝomi tarimarima mabarabarami,

mari ai ĝia ĝovaĝa-raĝea.”

¹² Ema Isaia ma ekirani,

“Iese natuna ta betubu-vaisini,

ĝena bese tarimana ta bevaisi-raĝeni,

tanobara mabarana beĝita-ĝauani;

irau bese tarimari ĝia ĝenai beĝe vetuĝamaĝikauni.”

¹³ Vetuĝamaĝikau tu Barau ĝenana eiaĝomani. Ĝia na iaku verere ema maino na bene vaĝa-vonuvonu raĝemi ĝenai ĝoveĝabidadamani nuĝanai. Be monana Iauka Veaĝa ĝena seĝuka na ĝemi vetuĝamaĝikau bene vaĝa-barego lelevaĝia.

Paulo, irau bese tarimari ĝeri haroro tauna

¹⁴ Tarikakagu mabarami, au bama riba-maoro, ĝomi maniĝemi tu namo na ĝovonuvonu-raĝeto, ĝoriba-ĝinikauto, ema karomi tata ĝesi boĝo vevaĝa-riba-vevinini maki ilaila.

¹⁵ Senaĝi guruĝa matari tari ĝomi batore-vinimi nai, kota bakiraĝi-metori, mo tu ĝomi noĝa ma bakiravara-ĝenoĝoimi maia. Moĝesi aveini, korana Barau na ĝena namo e varevare-bara dabaranai mai ĝauvei eviniguto.

¹⁶ Ekeaguto, Keriso Iesu ĝena vetuĝunaĝi tarimanai bana iaĝo, ma irau bese tarimari vekaravari ai Rubu Veaĝa vereri ĝeri ĝauvei bana veia, Barau ĝena Vari Namona bana ĝobata-iaĝia. Benamo monana irau bese tarimari maki Barau na beĝabi-raĝerini varevare dagarari ai beĝene iaĝo. Ema Iauka Veaĝa na bene vaĝa-veaĝari.

¹⁷ Moĝa lorinai Keriso Iesu ĝena maĝuri nuĝanai aveiavini, Barau ĝena vetuĝunaĝi aiaĝo-vinini nuĝanai.

¹⁸ Kara boruna ta guruĝana au asi haveini, senaĝi kara au na akiraĝiato ema aveiato ĝerina, kara Keriso na au ĝeguna eveiato, benamo irau bese tarimari na Barau ĝema-seĝaĝi-viniato, moĝa moĝo bakiraĝiani.

¹⁹ Ĝegu ĝobata ema ĝauvei tu Iauka Veaĝa ĝena seĝuka na vetoĝa boruri ema nuĝa-farevaĝi veigari na evaĝa-foforirito-ĝoi. Mogesina nai Ieruselema na ageĝeragiĝoto, aiaĝoto mo Iliriko tanona, Keriso ĝena Vari Namona mabarana akiraĝi-fofori ginikauato.

²⁰ Au ĝegu ura baregona vanagiĝvanagi tu, Keriso roĝosi rogo beĝere ribaia gaburi ĝana bana iaĝo, Vari Namona bana ĝobata-iaĝia. Korana asi aurato, tarima ta na ĝauvei evaĝa-ruĝaiato gabunai ma bana ĝauvei-iaĝo.

²¹ Senaĝi ĝegu ura tu, Buka Veaĝa etoreato kavana bana vei, ekirani,

“Ĝia varina asi ĝekira-vararito tarimari na beĝene gitaia,

ema varina asi ĝeseĝaĝiato tarimari na beĝene ribaia.”

²² Mogesi nai nega gutuma naiagiĝosi atoni, senaĝi ama vedaĝa-raĝeni.

Paulo na Roma benea ĝitaia boioĝana etogato

²³ Senaĝi toma mainai au tu asi ĝegu ĝauvei gabuna ta maia, ema laĝani ĝutuma varau beĝe iaĝo nuĝari ai, au ĝegu ura baregona tu banasi raka-ĝitami,

²⁴ nai atuĝamaĝini, Spein ĝana baiagiĝoni nai tu, basi ĝitamini roĝo. Maninana bavanaĝini nai, atuĝamaĝini, basi raka-ĝitamini, ma ĝomi ĝesi bita tanu-kotunani roĝo. Moĝa murinai aurani, ĝomi na boĝono vaĝa-kavagu ĝegu iaĝoiaĝo bana iaĝo-vinia ĝana.

²⁵ Initoma tu roĝo Ieruselema ĝana aiaĝoni, Barau ĝena tarimarima veaĝari navaĝa-kavari ĝana.

²⁶ Korana Makedonia ema Akaia tanori ai tu nuĝari ma verereri ĝesi Ierusalemaj asi ĝeri-ĝari tarimari Barau ĝena tarimarima veaĝari vekaravari ai ĝetanuni moĝeri ĝeri moni ĝevaĝa-vegogoto.

²⁷ Ĝia tu ma iakuri ĝesi ĝeri moni ĝevaĝa-vegogoto, ma mo tu Iuda tarimari ĝeri ĝabitore ĝia ĝeri ai ĝevaĝa-voiani. Korana bema irau bese tarimari Iuda tarimari ĝeri namo iauka

rekenai dagarari ġeġabirini nai tu, ġia tauġaniri rekenai farefarena maki Iuda tarimari ġesi beġe vare-barabararini. Korana ma ġeri ġabitore Iuda tarimari ġeri ai dainai.

²⁸ Be mai ġauvei maiġa bavaġa-koriani, ema bana riba-maoro mai moni tarimari korikori na beġene ġoitagħo murinai vau, Spein ġana baiagħoni, ema ġomi maki basi raka-ġitamini ġegu iaġoiagħo nuġanai.

²⁹ Au ma ribagu ġomi ġemi ai baiagħosini nai, Keriso ġena vevaġa-namo barego lelevaġina baġabi-iaġosiani ġomi ġemi ai.

³⁰ Tarikaka-ġore, ġera Vereġauka Iesu Keriso aranai ema Iauka Veaġa ġena veuravini, ġita iatarai etoreani veuravinina, bakunai, au ġomi alaunaġimini: Au ġegu vekwaraġi ai boġono vaġa-kavaġu, iatagu ai Barau ġenai boġono ġauġau.

³¹ Boġono ġuriguri, be Barau na Iudea nuġanai Keriso asi ġevaġa-moġoniani tarimari ġimari na bene vaġa-maġurigu, ema mo varevare dagarana Ierusalemaj Barau ġena tarimarima veaġari na beġene ġabi-raġea ma iakuri ġesi.

³² Be Barau ġena ura ilailanai ġomi ġemi ai ma iakugu ġesi bana iaġosi, ema mabarara bisini vevaġa-kokore.

³³ Maino Barauna ġomi mabarami sevimi ai bene tanu. Amen.

16

Paulo ġena vevaġa-namo guruġari

¹ Avaġa-ribamini, ġita tobara Foiġe tu beiagħosini. Ġia tu ekalesia ġena vetuġunaġi vavinena ta Kenkrea rubuna nuġanai.

² Anoġimini, Vereġauka aranai boġono ġabi-raġea, ekalesia o veaġa tarimari ġoġabi-raġerini dabarari korikoriri ai. Ema ma ġena ura dagarari ġomi ġemi ai nai, boġono vinia. Korana ġia ġena vevaġa-kava maki barego lelevaġi tarimarima ġutuma ġeri ai. Au maki evaġa-kava barego-lelevaġiguto.

³ Priskila ema Akwila au ġegu vevaġa-namo boġono viniri. Ġia tauri ruarua tu au ġesi ġauvei sebona moġo ġaveiani Keriso Iesu ġena ġauvei nuġanai.

⁴ Ġia tauri ruarua tu au uragu ai be dori ġevaġi-maserito. Au ema tanobara iraurau ai ġetanuni ekalesiari ġema iaku tu asikei ġia tauri ruarua ġeri ai.

⁵ Ġia ġeri numai ġeraka-vegogoni ekalesiana maki boġono vaġa-namori.

Au ġatagu namona Epeneto au ġegu vevaġa-namo boġono vinia. Ġia tu Keriso murinai eraka-guineto Asia tanobarana nuġanai.

⁶ Maria au ġegu vevaġa-namo boġono vinia. Ġia tu ġomi urami ai evekwaraġi-baregato.

⁷ Au garagaragu Androniko ema Iunia au ġegu vevaġa-namo boġono viniri. Ġia tu au ġesi dibura numai ġatanu-vegogoto. Apostolo mabarari vekaravari ai ġia tauri ruarua tu ġerevaġi, ema ġia tu Keriso ġena maġuri nuġanai ġeberetoġa-guineto, muriri ai vau au ama bere-toġato.

⁸ Ampliato au ġegu vevaġa-namo boġono vinia. Vereġauka ġena maġuri nuġanai ġia tu au ġatagu korikori.

⁹ Urebano au ġegu vevaġa-namo boġono vinia. Ġia tu ġita ġesi taġauvei-vegogoni tarimana Keriso ġena maġuri nuġanai. Au ġatagu namona Stakis au ġegu vevaġa-namo boġono vinia.

¹⁰ Apele au ġegu vevaġa-namo boġono vinia. Ġia tu moġoni veġata Keriso ġena maġuri nuġanai eruġa-gwaġigini.

Aristobulo ġena numa tarimari mabarari ġegu vevaġa-namo boġono viniri.

¹¹ Au garagaragu Herodion ġegu vevaġa-namo boġono vinia.

Narakiso ġena numa tarimari deidei Vereġauka ġena doġoro tarimari ġegu vevaġa-namo boġono viniri.

¹² Trifena ema Trifosa au ġegu vevaġa-namo boġono viniri. Maniġeri vavine Vereġauka ġena ġeġauvei-vekwaraġini.

Au tobagu namona Peresi ġegu vevaġa-namo boġono vinia. Mani vavine maki Vereġauka ġena eġauvei-vekwaraġini.

¹³ Rufo ma sinana ġesi au ġegu vevaġa-namo boġono viniri. Rufo tu Vereġauka na eġabi-virigiato ġena vetuġunaġi taunai bene iaġo, ma sinana tu au sinagu ai eiagoto.

¹⁴ Asinikrito, Flegon, Hemes, Patroba, Hemes ema tarikaka tari ġia ġesi ġetanuni maniġeri ġegu vevaġa-namo boġono viniri.

¹⁵ Filologo, Iulia, Nereus ma tobana, e Olimpas, ema Barau ġena tarima veaġari ġia ġesi ġetanuni mabarari ġegu vevaġa-namo boġono viniri.

¹⁶ Karomi tata vetarikaka verauna na boġono vaġa-namori

Keriso ġena ekalesia mabarabarari na ġemi vevaġa-namo beġe tuġu.

Velaunaġi tari

¹⁷ Tarikakagu mabarami, alau-naġimini, boġono boġe-ġotoġoto, vetavi-kirakira veiġari ġevairini tarimari ema ġomi ġemi veġabidadama ġefatafata-ġaurini, dia ġomi na ġoġabirito vevaġa-ribari na. Maniġeri tarima seviri ġana asi boġono raka-kavi.

¹⁸ Korana maniġeri tarima tu dia ġita ġera Vereġauka Keriso ġena vetuġunaġi ġeiġo-viniani, a ġia tauġaniri ġeri ura veiġari ġevairini. Ġia tu ġeri guruġa meriġa-meriġari na ema ġeri guruġa ginikau-ginikau na asi iaunegari tarimari ġeri tuġamaġi ġeġofa-darererini.

¹⁹ Tarimarima ġutuma na ġomi ġemi seġaġi varina varau ġeseġaġiato. Moġa lorinai au ġegu verere asikei ġomi ġemi ai. Senaġi au aurani, veiġa namori boġono riba-ginikauri, ma veiġa rakavari asiġina ġinavaġi boġono veiri.

²⁰ Maino Barauna na nega kotuna moġo benamo Satani ġomi kwakumi fanafana na gaburenai befana-fatafataiani.

Ġita ġera Vereġauka Iesu ġena namo ema varevare-bara ġomi iatami ai bene tanu.

²¹ Timoteo, au ġauvei karogu, ema au garagaragu Lukio, Iason ema Sosipata na ġemi vevaġa-namo guruġari beġe tuġu.

²² Au, Teretio, Paulo ġena guruġa mai fefai batorea taugu, na maki Vereġauka aranai ġegu vevaġa-namo atuġu-iaġosiani.

²³ Gaius na ġemi vevaġa-namo guruġari betuġu. Au tu ġia na ġena numai enariguni, ema ekalesia tarimari mabarari tu mainai ġeraka-vegogoni.

Erasto, mai siti ġena moni eġita-ġauani tarimana, ema ġita tarikakara Kwatas na ġemi vevaġa-namo beġe tuġu.

[²⁴ Ġita ġera Vereġauka Iesu Keriso ġena namo ema varevare-bara ġomi iatami ai bene tanu.]

Barau vaġa-raġena guruġari

²⁵ Barau sivaġa-namoa, korana ġia na ġomi ġemi veġabidadama bevaġa-kokore-iaġirini au ġegu Vari Namona, Iesu Keriso aġobata-iaġiani varina, ġenana. Mai vari tu guineri laġaniri na veġata vekuretoġa etanuto-ġoi dagarana bema fofori.

²⁶ Maitoma moġeri tu tanu-vanaġivanaġi Barauna ġena guruġa ilailanai peroveta tauri ġeri toretore na ġema vaġa-foforirini, ma tama ribarini. Mai veiġa ema vetoreto anina tu, tanobara mabarari na ġia beġene vaġa-moġonia ema beġene seġaġi-vinia ġana.

²⁷ Iaunega Barauna sebona kwarikwari sivaġa-raġea Iesu Keriso bakunai. Ġia marevana baregona bene tanu vanaġivanaġi. Amen.

PAULO ĜENA TORETORE GINIGUINENA KORINTO EKALESARI ĜERI

1 Korinto vaĝa-foforina guruĝari

Korinto ekalesiana doĝorona tu Paulo ĝenana eĝorato (Apostolo 18). Ma mai fefa giniguinena Paulo na etoreato korana tu, Korinto ekalesiari fakari ai tu meto kota ĝeĝorato-ĝoi. Ma ĝia na Paulo ĝetore-viniato, ĝedanaĝiato, kamasi beĝene vei ĝetato. Mogesi naima Paulo na mai fefai ĝeri vedanaĝi evaĝa-veŝeato (7:1; 8:1; 12:1; 16:1), ema mo deideiri ĝevei-rakavato-ĝoi moĝeri evaĝa-guruĝa-gwĝiĝirito ema ekalesia maĝurina korikorina tu aigesina ekira-vararito.

Paulo na mai fefa tu Efeso vanuĝa na etore-vinirito, mo tu Efeso ekalesiari vaĝa-toitoina evarivaririto taiminai. Mai fefa tu laĝani 53 ma 55 fakari nuĝanai ta etoreato, mo tu Iesu emaseto murinai.

Mai fefai siri baregori tu karoa 1:30-31. Ma ĝena vevaĝa-riba guruĝari baregori ekiraĝirito tu maiĝeri: 1) Ekalesia doĝorona korikori vetoĝana boĝitaiani, ĝia tu Iesu Keriso ĝena vere o veĝitaĝau gaburenai ĝetanuni. 2) Barau ĝena ekalesia doĝorona korikori tu dia tarima o tanobara ĝena iaunegai ekalesia doĝorona beĝe ĝori-kauani, senaĝi Barau ĝena iaunegai ema seĝukai. 3) Ekalesia doĝorona korikori tu Barau na eboiĝaiato dabaranai moĝo beĝe tanuni. 4) Ekalesia doĝorona korikori tu Barau ĝena guruĝa beĝe korana-iaĝiani, ema Barau ĝena veuravini ai moĝo beĝe tanuni.

Paulo na mai fefa tu maiĝesina eboiĝaiato:

1. Ekalesia nuĝanai vevare-kirakira eĝorato - karoa 1-4
2. Veiĝa rakavari ekalesia nuĝanai - karoa 5-7
3. Kwaivakuku ĝevinirini bureĝari - karoa 8-10
4. Tomaraka-riĝo dabarana - karoa 11
5. Iauka Veaĝa ĝena vevare - karoa 12-14
6. Variĝisi-ĝenoĝoi - karoa 15
7. Guruĝa dokona - karoa 16

¹ Au Paulo, Barau ĝena urai ekeaguto, Keriso Iesu ĝena apostolo tarimagu ai bana iaĝo, ema ĝita tarikakara Sostene ĝesi tauma ruarua ĝemana mai fefa eiaĝosini,

² Barau ĝena ekalesia tarimami Korinto nuĝanai ĝotanuni ĝemi. Gomi tu Barau ĝena tarimarima, be Keriso Iesu nuĝanai varau evaĝa-veaĝamito, ma ĝomi Barau na ekeamito tu boĝono veaĝa uranai. Tarimarima mabarari gabu mabarari ai ĝetanuni ĝera Vereĝauka Iesu Keriso aranai ĝeĝaĝauni tarimari maki, Barau na ĝomi ĝesi ekea-sebonamito, boĝono veaĝa uranai. Iesu Vereĝauka tu ĝia e ĝita mabarara ĝera Vereĝauka.

³ Gita Tamara Barau ema Vereĝauka Iesu Keriso ĝerina vevare-bara ema maino ĝemi ai bene tanu.

Paulo na Barau etanikiu-viniato

⁴ Au na ĝegu Barau vanaĝivanagi atanikiu-viniani ĝomi iatami ai, korana ĝia ĝena vevare-bara ĝomi Keriso Iesu nuĝanai ĝotanuni tarimami evinimito nai.

⁵ Iesu Keriso ĝesi ĝosebonani nai, Barau na ĝomi dagara mabarari ai varau bevaĝa-taĝami, guruĝa kiraĝikiraĝi iaunegari mabarana ema tuĝamaĝi-faka mabarana maki evinimito.

⁶ Keriso varina maki ĝomi nuĝami ai tu varau emoĝonito e ĝemi veĝabidadamai ĝoruĝa-gwaĝiĝini.

⁷ Moĝesina naima ĝita ĝera Vereĝauka Iesu Keriso ĝena iaĝoma roĝo ĝovaĝa-noga-taĝoani nuĝanai tu, Iauka Veaĝa ĝena vevare tai tu asi ĝorabuni.

⁸ E Barau na ĝomi bevaĝa-ruĝa gwaĝiĝimini beiaĝoni mo magona. Be ĝera Vereĝauka Iesu Keriso ĝena vevaĝa-kota ĝaronai ĝomi tu asi ĝemi vei-rakava bene doĝarimi.

⁹ Barau tu ma ĝena vetuĝamaĝikau. Ĝia na ĝomi ekeamito, ĝia Natuna Iesu Keriso ĝita ĝera Vereĝauka ĝesi boĝono sebona moĝo ĝana.

Ekalesia nuĝanai vevare-kirakira eĝorato

¹⁰ Tarikakagu mabarami, au na ĝita ĝera Vereĝauka Iesu Keriso aranai anoĝimini, aurani mabarabarami tu dagara sebona moĝo boĝono kiraĝia, be tauĝemi fakami ai asi boĝono vevare-kirakira. Gomi mabarami ĝemi tuĝamaĝi ema ura sebonai moĝo boĝono tanu.

¹¹ Korana tarikakagu, ĝomi varimi tu Kloe ĝena numa tarimari na ĝema-kiravaraguto, ĝekirato, ĝomi tu tauĝemi moĝo ĝoveĝare-veĝareni fakami ai.

¹² Au na akiraĝiani gabuna tu iniĝa. Ta tu okirani, “Au tu Paulo murinai arakani.” Ta tu okirani, “Au tu Apolos murinai arakani.” Ma ta ma okirani, “Au tu Kefas, (mai tu Petero), murinai arakani.” Ma ta maki ma okirani, “Au tu Keriso murinai arakani.”

¹³ Keriso tu bebevare-kirakira, be doĝoro ĝutumai beiaĝo ba? Mo tu Paulo ĝomi urami ai ĝevaĝa-satauroato ba? O Paulo aranai ĝomi ĝebabatisomito?

¹⁴ Au na Barau atanikiu-viniani, korana au na ĝomi ta asi ababatisomito, a Krispo ema Gaius moĝo ababatisorito.

¹⁵ Asi namo ĝomi ta bokirani, “Ĝai tu Paulo na ebabatisomato nai ĝena mero ai ĝaiaĝoto,” botoni.

¹⁶ Moĝoni, Stefanas ma ĝena numa tarimari ĝesi maki au na ababatisorito. Ma asi aribani, au na tarima kotari maki ma ababatisorito ba asiĝina.

¹⁷ Au Keriso na etuĝuguto tu, dia bana babatiso ĝana, senaĝi Vari Namona bana ĝobata-iaĝia ĝana. Ma dia iaunega lelevaĝi tarimari ĝeri guruĝa maĝurinaĝi bana ĝobata-iaĝia, korana Keriso ĝena satauro asi seĝukanai beiaĝoni garina.

Satauro Varina

¹⁸ Moĝoni, satauro varina mase dabaranai ĝerakani tarimari na tu asi ĝevaĝa-moĝoniani, ĝekirani tu vari babona ĝetoni. Senaĝi maĝuri dabaranai tarakani tarimara ĝerai tu Barau ĝena seĝuka satauro varina nuĝanai efororini.

¹⁹ Buka Veaĝa nuĝanai Barau tu maĝesi ekirani, “Au na iaunega lelevaĝi tarimari ĝeri iaunega tu asi tauri ai bavaĝa-iaĝorini, ema ĝeriba-vanaĝito tarimari ĝeri riba lelevaĝina bavaĝa-rakavarini.”

²⁰ Be iaunega lelevaĝi tarimari tu ainai? Vevaĝa-riba e toretore tarimari tu ainai? Ribavanagi tarimari guruĝa ĝevaĝa-vevaĝirini tauri tu ainai? Barau na evaĝa-foforiato, mai tanobara ĝena iaunega tu babo veĝata.

²¹ Moĝoni, Barau ĝena iaunega tu fofori, korana Barau na guba ema tanobara eveirito mabarari na ĝena iaunega tu ĝevaĝa-foforiani, senaĝina tarimarima tauĝeri ĝeri iaunega na Barau asi ĝeribaĝiato. Mogesina nai Barau ekirato, namona tu, satauro varina, tarimarima na ĝekira-baboani varina, ĝevaĝa-moĝoniani tarimari Barau na bene vaĝa-maĝuriri.

²² Iuda tarimari ĝeri ura baregona tu vetoĝa boruri beĝene ĝita, a Grik tarimari tu iaunega ĝeĝita-vetauni.

²³ Senaĝi ĝai na tu Keriso, ĝevaĝa-satauroato tarimana, ĝaĝobata-iaĝiani, ĝia tu vevaĝa-maĝuri tauna. Ma mai vari Iuda tarimari ĝeri ai tu guruĝa rakavana e Grik tarimari ĝeri ai tu vari babona.

²⁴ Senaĝi Barau na ekearito tarimari, Iuda tarimari e Grik tarimari, ĝita mabarara ĝerai Keriso tu Barau ĝena seĝuka ema Barau ĝena iaunega.

²⁵ Barau ĝena veĝa tarimarima na ĝekira-baboborini, moĝeri veĝa na tarima ĝeri iaunega evanaĝirini. Ema Barau ĝena veĝa tarimarima na moira-moirai ĝekiraĝirini, moĝeri na tarima ĝeri kokore evanaĝirini.

²⁶ Tarikakagu mabarami, ĝovetuĝamaĝi-ĝenoĝoi, ĝomi tu aiĝesi tarimami Barau na ekeamito. Gomi tanobara iaunegana ĝesi bita vaĝa-vetovomini nai, ĝomi viravira moĝo ma iaunegami, e ĝomi viravira moĝo ĝoseĝukato, ema ĝomi viravira moĝo ĝemi bese tu vere.

²⁷ Senaĝi Barau na tu mai tanobarai babo tarimari eviriĝirito, benamo ĝia ĝerina mai tanobara ĝena iaunega tarimari evaĝa-maiakarito. Ema Barau na mai tanobarai moira tarimari eviriĝirito, benamo ĝia ĝerina tanobarai kwalimu tarimari evaĝa-maiakarito.

²⁸ Ema Barau na mai tanobarai tarima tari, asi ĝeĝiavirini, ĝeĝita-fitoĝarini e ĝekirani, namo ta asi beĝe vaĝa-ĝoraiĝi ĝetoni tarimari, eviriĝirito, benamo ĝia ĝerina tanobarai ĝevaĝa-raĝerini tarimari asi tauri ai evaĝa-iaĝorito.

²⁹ Mo veĝa eveiato korana tu, tarima ta ĝia ĝoiranai asi bene vetore-varaĝevaraĝe ĝana.

³⁰ Gomi ĝemi maĝuri tu Barau na Keriso Iesu ĝesi evaĝa-sebonaĝiato. Keriso Iesu tu Barau na eĝabiato ĝita ĝera iaunegaĝi evaĝa-iaĝoato. Keriso ĝenana ĝita tu Barau ĝena vei-iobukaĝiobuka tarimara e Barau ĝena vevaĝa tarimara, ema Barau na rakava nuĝana na evoi-vaĝirato, ma rakava toma tu asi seĝukana ĝita ĝerai.

³¹ Moga lorinaĝi Buka Veaĝai ekirani ilallana bitana tanu, ekirani, “Tarima ta eurani bene veiavi nai tu, Vereĝauka na kara ĝita iatarai eveiato veiavina moĝo bene veiavi-iaĝia.”

2

¹ Tarikakagu mabarami, au ĝomi ĝemi ai aiagositato, Barau ĝena guruĝa vekuretoĝana ĝemi aĝobata-iaĝiato tu, dia guruĝa gwaĝiĝiri ai e ĝegu iaunegaĝi ĝomi avaĝa-guruĝamito.

² Au ġomi ġesi roġo tatanuto-ġoi nai, au ġegu ura baregona aveiato tu, dagara ta tu asi bana kiragġia, senaġi Iesu Keriso moġo, o sikira, Iesu Keriso, ġevaġa-satauroato tarimana moġo bana ġobata-iaġia.

³ Au ġomi ġesi tatanuto-ġoi tu asi kokoregu, ma garigu ġesi, ema tauġanigu maki eġoġo-ġoġoato-ġoi.

⁴ Ema au ġegu guruġa e ġobata maki dia tarimarima ġeri iaunega guruġari na, senaġi au ġegu guruġa ema ġobata tu Iauka Veaġa seġukana avaġa-foforiato-ġoi.

⁵ Moġesi naima ġomi ġemi veġabidadama tu tarimarima ġeri iaunegai asi boġono vaġa-ruġari, senaġi Barau ġena seġukai boġono vaġa-ruġari.

Iauka ġenana eiagomani iaunegana

⁶ Moġoni, Iauka rekenai ġefakirato tarimari tu, guruġa iaunegari avinirini. A maiġeri guruga iaunegari tu dia mai tanobara ġena iaunegai o mai tanobara ġorikauri tarimari ġeri iaunegai; ġia ġeri iaunega tu mai ekorini.

⁷ Au na akiragġiani iaunegana tu Barau ġena iaunega vekuretoġana. Tarimarima ġerina tu ekure-toġaiato, senaġi ġia na mai tanobara roġosi roġo bere veia nuġanai, eġabitoreato, ġita na mareva baregona bitana ġabia uranai.

⁸ Mai iaunega vekuretoġana tanobara ġeġori-kauani tarimari na ta maki asi ġeribaiato. Korana bema begere ribaia nai tu, mareva baregona Vereġaukana tu asi ġere vaġa-satauroa.

⁹ Senaġi Buka Veaġai ekirani ilailanai, “Ta matana na asi eġitaiato, ta segana na asi eseġaġiato, ta ġena tuġamaġi asi etuġamaġi-fakaiato, moġa tu Barau na erovina-toreato, ġia beġe ura-viniani tarimari ġeri.”

¹⁰ Mai tu vekuretoġa dagarari, senaġi Barau na ġita ġerai tu evaġa-foforito ġia Iaukana ġenana. Iauka tu dagara mabarari eragaġirini, Barau ġenai dagara dobu-masemaseri maki eragaġirini.

¹¹ Vaġa-ilailana tarima ta na tarima boruna ġena tuġamaġi asi eribaiani. Asiġina. Mo tarima tauġena Iaukana na vau ġia nuġanai tuġamaġi vekuretoġari eribarini. Barau maki moġesina, tarima ta na ġia ġena tuġamaġi asi eribaiani, senaġi Barau Iaukana na moġo eribaiani.

¹² Ġita na tu dia mai tanobara Iaukana taġabiato. Asiġina. Ġita tu Barau na etuġuato Iaukana taġabiato, Barau na varevare evini-kavarato, dagarari bitana riba-maorori ġana.

¹³ Maiġeri dagara tu dia tarimarima ġeri iaunegai ġevaġa-ribamani guruġari loriri ai ġakiraġirini. Senaġi mai tu Iauka Veaga na evaġa-ribamani guruġari ilailari ai ġaguruġani. Iauka rekenai dagarari o guruġari tu Iauka Veaga na evaġa-ribamani ilailanai ġakiraġirini.

¹⁴ Tanobara tarimana na Barau Iaukana ġenana dagara ta tu asi bedogariani, korana ġia tanobara tarimana ġenai mo tu babo dagarari, ema asi maki beribarini, korana moġeri dagara mo tu Iauka Veaga nuġanai ġetanuni tarimari na vau beġe ribarini.

¹⁵ Iauka Veaga ġia nuġanai etanuni tarimana na, dagara mabarari beġita-ginikaurini e betuġamaġi-fakarini, senaġi ġia tauġena tu ta na asi beġita-ginikauani e asi beriba-maoroani.

¹⁶ Korana Buka Veaga nuġanai maiġesi ekirani, “Deikara na Vereġauka nuġana eribaiani? Deikara na ġia besisiba-viniani? A Keriso ġena tuġamaġi tu ġita ġerai etanuni.”

3

Barau ġena vetuġunaġi tarimari

¹ Tarikakagu mabarami, au na ġomi avaġa-guruġamito-ġoi tu dia Iauka Veaga na eguine-iaġirini tarimari kavana. Senaġi au na ġomi tu tanobara maġurinai ġetanuni tarimari kavana avaġa-guruġamito-ġoi. Mo negai ġomi Keriso ġena veġa e maġuri nuġanai tu roġo raraka-raraka.

² Moġesi naima au na ġomi tu lata gorari ai aġubumito, a dia ġanigani gwaġġiri ai. Korana mo negai ġomi Iauka ġaniganiri gwaġġiri ġaniganiri ġana tu roġosi roġo boġoro barego-ginikau. Aba, initoma maki ġomi tu roġosi roġo boġoro barego-ginikau, roġo raraka-raraka Iaukai;

³ Korana ġomi tu roġo tauġanimi ġeri ura rakavari na ġequine-iaġimini. Ġomi fakami ai mama e vevane tu roġo ġetanuni, mainana moġo evaġa-moġoniani ġomi tu mai tanobara tarimari ġeri maġuri ai roġo ġotanuni.

4 Ğomi tu roĝo tanobara maĝurinai ĝotanuni, korana ĝomi ta okirani, “Au tu Paulo ĝena,” ma ta tu ma okirani, “Au tu Apolos ĝena.”

5 Be Apolos tu dei? Ema Paulo tu dei? Ĝia tauri ruarua tu vetuĝunaĝi tarimari koriri moĝo, ĝia ĝerina ĝomi Iesu ĝovaĝa-moĝoniato. Ĝai tauma ruarua tu Vereĝauka na ĝauvei tata evinimato.

6 Au tu avaroto, a Apolos na tu nanu na edairiato, senaĝi Barau na tu evaĝa-garaiato.

7 Moĝesi naima evaroto tarimana e nanu na edairirito tarimana tauri ruarua tu asi arari, senaĝi Barau ĝereĝana moĝo, korana ĝia na dagara evaĝa-gararini.

8 Evaroni tarimana ema nanu na edairini tarimana tu ilaila moĝo. Ĝia tata ĝeri ĝauvei ilailari ai Barau na voiri bevinirini.

9 Ĝai tu Barau ĝesi ĝaĝauvei-sebonani tarimama, a ĝomi tu Barau ĝena vamoka; ĝomi maki Barau ĝena numa.

Barau ĝena ĝauvei tu numa ragaragana kavana

10 Barau na ĝena namo e varevare-bara eviniguto ilailanai, au tu numa raga tarimagu namonai aiagoto. Numa vaĝa-ruĝavaisina duĝuna forena aragaiato (o kwakuri avaĝa-ruĝa ginikaurito), ma ta na tu iatanai numa eragaiani. Senaĝi numa beĝe ragaiani tarimari tata tu beĝene venari, kamasi numa beĝe ragaiani tu.

11 Barau na Iesu Keriso tu numa vaĝa-ruĝavaisina duĝuna forenai evaĝa-iaĝoato. Ma ta na numa vaĝa-ruĝavaisina duĝuna boruna ta tu asi ma beragaiani veĝata.

12 Tarima tari na mai numa vaĝa-ruĝavaisina duĝuna forena (o numa kwakuri) iatanai tu golo, silva o galasi foreri beĝe ĝauvei-iaĝirini numa beĝe ragani nai, a tarima tari na ĝau, reĝi o biri beĝe ĝauvei-iaĝirini.

13 Ĝia tata ĝeri ĝauvei vetoĝari tu Vereĝauka ĝena Kota baregona ĝaronai vau bevaĝa-foforirini. Korana mo ĝauvei tu karava na bevaĝa-foforiani ema karava na tarima tata ĝeri ĝauvei betovo-naĝirini, moĝeri ĝauvei tu namori ba rakavari.

14 Bema tarima ta na mo numa vaĝa-ruĝavaisina duĝuna forenai eragaiato numana tu karava na asi beĝaraiani nai, ĝia tu voina namona beĝabiani.

15 Bema ĝena numa karava na beĝaraiani tarimana tu, ĝena ĝauvei mabarari tu beĝe rekwa-rekwani, ĝia ĝereĝana moĝo bemaĝurini. Senaĝi ĝia tu noĝa moĝo karava na beraga-maĝurini.

Ĝomi tu Barau ĝena Rubu Veaĝa

16 Ĝomi asi ribami, ĝomi tu Barau ĝena Rubu Veaĝa ema Barau Iaukana tu ĝomi nuĝami ai etanuni, ei?

17 Bema tarima ta na Barau ĝena Rubu Veaĝa bevaĝa-rakavaiani nai, ĝia maki Barau na bevaĝa-rakava kwaikwaiani, korana Barau ĝena Rubu tu veaĝa, ema ĝomi tu ĝia ĝena Rubu Veaĝa.

Tarimarima asi boĝono vaĝa-veiaviri

18 Tarima ta ĝena tuĝamaĝi na asi bene ĝofaia. Bema tarima ta ĝomi fakami ai etuĝamaĝini, ĝia tu ma iaunegana mai tanobarai, ĝia tu babo tarimanai bene iaĝo, be bene iaunega.

19 Korana mai tanobara iaunegana Barau ĝoiranai tu iaunega babona. Buka Veaĝai ekirani kavana, ekirani, “Barau na iaunega tarimari tauĝeri ĝeri iaunega rakavari nuĝari ai eĝabi-taririni.”

20 Ema Buka Veaĝai maki ma ekirani, “Vereĝauka ribana, iaunega tarimari ĝeri tuĝamaĝi tu asi tauri, koriri moĝo.”

21 Moĝesi naima, tarima ta na tarimarima tu asi bene vaĝa-veiaviri. Korana dagara mabarari tu ĝomi ĝemi.

22 Paulo e Apolos ema Petero; mai tanobara mabarana tu ĝomi ĝemi, maĝuri e mase, maitoma ĝefoforini dagarari ema goirai vau beĝe iaĝomani dagarari; mabarari tu ĝomi ĝemi.

23 A ĝomi tu Keriso ĝena, ema Keriso tu Barau ĝena.

Vereĝauka tauĝena na ĝena vetuĝunaĝi tarimari ĝeri maĝuri evetau-ginikaurini

4

1 Moĝesi naima ĝomi na ĝai boĝono tuĝamaĝima, ĝai tu Keriso ĝena vetuĝunaĝi-iaĝovinina tarimama, ema Barau ĝena vekuretoĝa dagarari ĝitaĝauri tarimama.

2 Farefare ĝeviniani bene ĝita-ĝauri ĝetoni tarimana ĝena biaguna ĝena ura baregona, ĝia tu ma vetuĝa-maĝikauna ĝesi farefare bene nariri.

³ Au tu kamasi ġotoni? Au tu asi atuġamaġini, ġomi na au boġo vetau-ginikauguni o tarimarima ġeri Kota maġurina beġe vetau-ginikauguni ba asiġina. Au tu tauġegu maki asi avevaġa-maoroni.

⁴ Au tauġegu avetuġamaġini, ġegu rakava ta asi atuġamaġi-doġariani. Senaġi asi akirani, au tu asi ġegu vei-rakava. Vereġauka na moġo au eġita-ginikauguni.

⁵ Moġesina naima Vereġauka roġosi bene iaġoma e ġena vevaġa-kota ġarona roġosi bene ġabia nuġanai, maitoma tu tarima ta asi boġono vetau-vinia. Vereġauka na mukuna furufuru ai vekuretoġa dagarari mabarari mamai betore-rosirini, ema tarimarima ġeri tuġamaġi loruri ġutunai ġetanu-vekuretoġani maki bevaġa-foforirini. Mo ġaro ai Barau na tata bevaġa-raġerini ġeri veiġa loriri ai.

⁶ Tarikakagu mabarami, maġeri guruġa au tauġegu ema Apolos ġema bavaġa-vetovori, korana tu ġomi namo boġono doġari uranai. Be, ġai ġemana maġa boġono ribaia, "Buka Veaġai ġetoreato guruġana asi boġono vanagi." Monana tarima sebona ta moġo asi boġo vaġa-veiviani e ta asi boġo kira-fitoġaiani.

⁷ A ġoi tu deikara na tarima baregomu ai etoremuto tarimarima mabarari fakari ai? Ġoi ġemu dagara mabarari tu dia Barau na evinimuto? Bema ġoi na Barau ġenana odoġaririto nai tu, kara dainai ovekokorokuni, noġa dia Barau ġenana ogoitagoato dagarana ovevini?

⁸ Ġomi tu ġoura-vinirini dagarari na varau boġo vonuvonu-raġe. Ġomi tu varau boġo taġa-ġosi. Ġai tu ġomi na boġo vanagi, korana ġomi tu varau boġo kini, be ġoveġitaġauni. (Ġomi tu noġa moġo Keriso varau bere iaġoma-ġenoġoi kavana ġoveini). Au ġegu ura barana sebona, ġomi tu moġoni boġoro kini, be ġai maki ġomi ġesi bitara kini-sebona. (Korana boġono riba, Keriso ma beġenoġoi-iaġomani nai, ġai maki ġomi ġesi bita kinini).

⁹ Senaġi au atuġamaġini tu maġesi: Barau na ġai apostolo tu gabi tarimamam etoremato, mai tanobarai asi beġene ġita-leama e asi beġene iavima gabunai etoremato. Ġai tu noġa tarima kotari, Kota na evaġa-moġonirini beġene vaġi-maseri etoni, benamo ġeġabirini, ġutuma-bara ġoirari ai ġevaġa-ruġa-rosirini, beġene ġitari vau beġene vaġiri ġetoni kavana. Ġai maki Barau na mai tanobara mabarana nuġanai etore-rosimato, aneru e tarimarima ġoirari ai.

¹⁰ Ġai tu babo Keriso ġaramanai bene, a Keriso nuġanai ġomi tu iaunega. Ġai tu asi kokorema, a ġomi tu ma kokoremi. Ġomi tu ġeguba-kaumini, a ġai tu asi ġegubakaumani.

¹¹ Ġai ġatanu-iaġomani mo toma tu ġavito-maseni e ġananu-maseni; dabuġa rakavari na ġavedabuġani; ġekwarimani; ema asi ġema tanutaġo numari.

¹² Ġai tu tauġema ġimama na ġaġauveini. Tarima na ġekira-fitogauni nai, ġai na tu ġevaġa-namorini; ġevaġa-midigu midigumani e ġelai-lautilusimani, senaġi ġaruġa-gwaġġini moġo, voiri asi ġaveirini.

¹³ Ġai arama tu ġevaġa-rakavarini, a ġai na tu ġavaġa-guruġa ginikaurini. Ġai tu tanobara ġena momo ai ġaiaġoto, e tanobara na eruġamani asi eġabi-raġemani beiaġoma mo toma.

¹⁴ Au na maġeri mabarari atoririni tu, dia ġomi navaġa-maiakami ġana, senaġi ġomi tu au natugu, aura-vinimini tarimami, naima akiravara-toreġaumini.

¹⁵ Aba, Keriso nuġanai ġevaġa-ribamini e ġeġori-kaumini tarimari tu betaġu 10,000, senaġi tama tu asi vovoka ġomi fakami ai, sebona moġo. Korana Vari Namona ġenana au tu ġomi tamami ai aiaġoto Keriso Iesu nuġanai.

¹⁶ Moġesi naima au na ġomi alaunaġimini, au boġono tovtotovogu.

¹⁷ Moġa lorinai maki au na Timoteo ġomi ġemi ai atuġu-iaġosiatu. Ġia Vereġauka nuġanai tu au natugu e auravini-rakavaiani, ema ġia tu Vereġauka ġena ġauvei evei-ġitakauani ma vetuġamaġikauna ġesi. Ġia na au Keriso Iesu nuġanai aġesi atanuni maġurina ma bekiravaramini, gabu e rubu mabarari ai avevaġa-riba iaġirini ilailari ai.

¹⁸ Ġomi tari tu ġovekokorokuni, noġa moġo au ġomi ġemi ai tu asi baiaġosini noġa ġoveini. Ġomi garimi aveini ġotoni.

¹⁹ Senaġi bema Vereġauka ġena ura nai tu, ġemi ai baiaġosi-ġarimoġini. Benamo au baiaġosini vauro, manġeri tarima ġeri vekokoroku guruġari ema ġeri seġuka basi ribarini.

²⁰ Korana ainai Barau na ġena Basileia o veġitaġau evaġa-ruġaiani, monai tu dia guruġa korina ġesi moġo efororini. Asiġi. Barau ġena veġitaġau tu ma seġukana ġesi efororini.

²¹ Ġomi na tu aiġa ġoura-viniani? Au ġomi ġemi ai tu ma kwarigu ġesi bana iaġosi, ba veuravini ai ema manau ai, ei?

5

¹ Ma asegaḡini, ḡekirani, ḡomi fakami ai mata-boraḡa maḡurina eḡorani. Mai mata-boraḡa maḡurina ḡomi fakami ai eḡorani tu Barau asi ribari beseri fakari ai maki asi eḡorani veigana. Au ḡekiraguni, tau ta na sinana raḡetaḡona eḡabiani, benamo ḡaraḡonai evaḡa-iaḡoani, egena-viniani.

² Ma nuḡanai ḡomi tu ḡovekokorokuni. Ḗomi tu nuḡami taḡi na beḡere vonu, be moḡesi eveini tarimana tu ḡomi fakami na boḡoro tuḡu-veḡitaia.

³ Aba, au tauḡanigu ḡomi vekaravami ai tu asiḡina, senaḡi iaukai au tu ḡomi vekaravami ai maniḡegu. Be mai veigā eveiani tarimana tu au na varau bavaḡa-maoroa, au tauḡani ai ḡomi ḡesi maninai mani ḡegu bara vaḡa-maoroa ilailanai.

⁴ Ḗomi ḡera Vereḡauka Iesu Keriso aranai ḡoraka-vegogoni, ema au iaukagu maki ḡomi vekaravami ai nuḡanai, ḡera Vereḡauka Iesu Keriso ḡena seḡukai,

⁵ ḡomi na maniḡesi eveini tarimana tu Satani boḡono vinia, tauḡanina bene vaḡa-rakavaia uranai bene. Moḡesina boḡono veia, be Iesu Vereḡauka ḡena ḡenoḡoi ḡaronai ḡia iaukana tu bene maḡuri.

⁶ Ḗomi ḡoveiavini tu asi namo. Ḗomi asi ribami farao evaḡa-tubuani muramurana misina na farao mabarana evaḡa-tubuani?

⁷ Moḡesina naima farao evaḡa-tubuani muramurana guinena mabarana ḡemina boḡono tore-veḡitaia, be ḡomi tu beredi variguna asi farao evaḡa-tubuani muramurana beredinai boḡono iaḡo. Au ribagu, ḡomi tu moḡoni beredi variguna, dia farao evaḡa-tubuani muramurana ḡesi ḡevei-sebonamito beredina. Korana Keriso tu moḡoni ḡita ḡera mamoe natuna ginitaḡo ḡana. Ḗia tu ḡita urarai ginitaḡo ḡana ḡevaḡiatio.

⁸ Moḡa lorinai Rubu Veaḡa verekona bitana ḡabi-gwaḡiḡia, senaḡi dia farao evaḡa-tubuani muramurana guinena ḡesi. Mai veigā tari ilailana tarima vaḡa-rakavari tuḡamaḡiri e veigā rakavari tu farao evaḡa-tubuani muramurana kavana, be maiḡeri maki bitana tore-veḡitari Rubu Veaḡa verekona bita ḡabi-gwaḡiḡiani nai. Ḗita na Rubu Veaḡa verekona bita ḡabi-gwaḡiḡiani nai tu, dia farao evaḡa-tubuani muramurana ḡesi ḡevei-sebonaiani beredina ḡesi. Moḡa tauna tu, ma moḡonira ḡesi ema moḡoni ai bitana ḡabia.

⁹ Fefa tai au na ḡomi atore-vinimito nuḡanai akiramito, mata-boraḡa tarimari ḡesi tu asi boḡono vekako.

¹⁰ Moḡesi atore-vinimito nai, au na tu dia ekalesia murikanai ḡetanuni tarimari akiraḡirito, au iniḡesi tu asi akirato, ḡekima-rakaoni, o ḡemata-ḡaniḡanini, o ḡofaḡofa veigari ai ḡeverarini, o kwaivakuku ḡetoma-rakarigo vinirini tarimari ḡerina tu boḡono rakaveḡita-moḡovaḡi. Korana bema maiḡeri tarima ḡerina goveḡita-moḡovaḡi boḡo toni nai tu, mai tanobara boḡo iaḡuaini.

¹¹ Senaḡi toma au na atore-vinimini tu, akirani, deikara ekirani, ḡia tu tarikaka vegabidadama nuḡanai, senaḡi ḡia tu ekimani o emata-ḡaniḡanini, o babarau etoma-rakarigo vinirini, o tarimarima ḡeri maḡuri ekiraḡi-rakava rakavarini, o niuniu tarimana, o ḡofaḡofa veigari eveirini tarimana ḡesi asi boḡono vekako. Maiḡesi tarimari ḡesi tu asi maki boḡono ḡani-vegogo.

¹²⁻¹³ Au tu asi ḡegu ḡauvei ta ekalesia murikanai ḡetanuni tarimari au na bavaḡa-maororini. Barau na vau bekota-vinirini. Senaḡi ḡomi tu ma ḡemi maoro ekalesia nuḡanai ḡetanuni tarimari boḡo vaḡa-maororini. Buka Veaḡa ekirani ilailanai, “Vei-rakava tarimana ḡomi fakami na boḡono tore-veḡitaia!”

6

Vekotavini ekalesia karomi ḡesi

¹ Bema ḡomi ta ekalesia karomu ta ḡesi ḡoveḡare-veḡareni nai, kara dainai tu Barau asi ḡekorana-iaḡiani Kota seḡaḡi tarimari ḡeri ai oa samaniani, ḡia beḡene vevaḡa-maoro ḡana, a Barau ḡena tarimarima veaḡari ḡeri ai mo meto tu asi ḡoḡabi-iaḡoani vei-maorona, ei?

² Ḗomi asi ribami, tanobara maḡurinai ḡetanuni tarimari tu Barau ḡena tarimarima na beḡe vaḡa-maororini? Karase nai ḡomi na mai dagara misiri tu asi ilaila tauḡemi na ḡemi vegogo ai boḡo vaḡa-maororini?

³ Ḗomi asi ribami, ḡita na tu aneru bita kota-vinirini? Bema moḡesi bita veini nai tu, atuḡamaḡini, mai vanaḡivanaḡi tatanu-iaḡiani maḡurina dagarari maki bita vetau-ginikaurini riba.

⁴ Goḡitaiani, bema mai vanaḡivanaḡi tatanu-iaḡiani maḡurina dagarari ḡita na bita vetau-ginikaurini, karase nai tu Barau asi ḡekorana-iaḡiani Kota tarimari ḡeri ai ḡoiḡoni, ḡemi beḡene vevaḡa-maoro ḡotoni.

⁵ Maiḡesi akirani tu ḡomi beḡene maiakami ḡana. Moḡoni korikori, ḡomi fakami ai iaunega tarimana sebona ta maki asiḡina ḡinavaḡi moḡo, be ḡia na tarikakana vekaravari ai mani meto misina asi bevaḡa-maoroani, ei?

⁶ A ġomi tu ekalesia karona ta na karona ta eġori-kotaiani, ma tauri ruarua tu ġeiaġoni, Iesu asi ġevaġa-moġoniani tarimari ġoirari ai ġea ruġa-tarini, ġekota ġana.

⁷ Moġoni, ġomi tauġemi moġo vekaravami ai ġoveġori-kotani tauna korikori tu, ġomi ġemi veġabiddadama maġurina na tu moġoni boġo keto-korikori. Karase nai tarikakami tari na ġevaġa-rakavanimi nai tu, asi moġo ġoġabi-raġerini? Kara dainai ġofaġofai ġemi farefare ġeverarimi ġetoni nai tu, asi moġo ġoġabi-ragerini, ei?

⁸ A ġomi tu tarikakami ġesi tauġemi moġo ġofaġofai ġoveverarini e ġovevaġa-rakavani.

⁹ Gomi asi ribami, veiġa iobukaiobukari asi ġeveini tarimari na Barau ġena Basileia tu asi beġe ġaunaiani. Tauġemi nuġami na asi beġene ġofami. Korona tu ġekimani tarimari, kwaivakuku ġetoma-rakarigorini tarimari, veġura-vanaġi tarimari, tau tu tau karori ġesi ġekimani, ema ġeġiġiraġeni tauġeri karori ġesi maiaka veiġari beġene vei ġetoni tarimari,

¹⁰ ġelemani tarimari, ġemata-ġaniġanini tarimari, niuniu tarimari, ġofaġofa veiġari ai ġeveverarini tarimari, ema tarimarima ġeri maġuri ġekiraġi-rakava rakavarini tarimari na Barau ġena Basileia tu asi beġe ġaunaiani.

¹¹ Ma ġomi kotari guinenai tu moġesi ġoveito-ġoi tarimami. Senaġi ġomi tu ġita ġera Barau Iaukana na Iesu Vereġauka aranai varau eġurigiimito, evaġa-veaġamito, ema asi ġemi vei-rakava etato.

Ġita tauġanira tu Iauka Veaġa ġena tanu numana

¹² Ta bekirani, “Dagara mabarari au ġegu ai tu asi taravatu,” betoni. Gomaoroni, senaġi dia mo dagara mabarari ġerina ġomi namo boġo dogarini. Dagara mabarari au ġegu ai tu asi taravatu, senaġi asi namo au dagara ta na beġori-kauguni, benamo ġena tuġu-rakaorakao tarimanai baiaġoni.

¹³ Ma ta bekirani, “Ġaniġani tu sinaġe ai bene tanu ġana e sinaġe tu ġaniġani ġana.” Mai tu moġoni! Senaġi ġaniġani e sinaġe tu Barau na tauri ruarua bevaġa-rakavarini. Ġita tauġanira Barau na eveiato tu dia tarimarima na bitana kima-iaġia ġana. Asiġina. Barau na tauġani tu Vereġauka ġena eveiato, ma Vereġauka maki tauġani ġena Vere.

¹⁴ Barau na Vereġauka mase na evaġa-varigiġi ġenoġoiato, ema ġita maki mase na bevaġa-varigiġi ġenoġoirani, Barau tauġena ġena seġuka na.

¹⁵ Gomi asi ribami, tata tauġanimi tu Keriso tauġanina koturikoturi, ei? Ma Keriso tauġanina koturikoturi moġeri tu nagabiri, be mata-boraġa tarimari tauġaniri ai navaġa-iaġori? Asiġina ġinavaġi!

¹⁶ Ba ġomi tu asi ribami, mata-boraġa vavinena ġesi evekafani tarimana tu mo mata-boraġa vavinena ġesi sebonai ġeiaġoni? Korona Buka Veaġa nuġanai Barau ekirato, “Mo tarima ruarua tu tauġani sebonai moġo beġe iaġoni.”

¹⁷ Senaġi Vereġauka ġenai bekaġakauni tarimana tu Vereġauka ġesi iauka sebonai beġe iaġoni.

¹⁸ Mata-boraġa maġurina ġenana boġono raka-veġita. Veiġa rakava mabarari tarimarima na ġeveirini tu tauġani murikana moġo rakavana, senaġi ekimani tarimana tu tauġena tauġanina nuġanai evei-rakava viniani.

¹⁹ Ba ġomi tu asi ribami, ġomi tauġanimi tu Iauka Veaġa ġena Rubu Veaġa, ma Iauka Veaġa tu ġomi tauġanimi nuġanai etanuni, ei? Mani Iauka Veaġa tu Barau na evinimito, moga lorinai ġomi tu dia tauġemi ġemi, senaġi ġomi tu Barau ġena.

²⁰ Gomi tu Barau na voimi varau eveirito, evoi-ġenoġoimito, be tauġanimi tu Barau ġena. Moga lorinai tauġanimi na Barau boġono vava-raġea.

7

Veġaraġo guraġari

¹ Maitoma tu ġemi fefai au ġotore-viniguto guraġari ma navaġa-voiri. Tau ta asi eveġaraġoni tu namo.

² Senaġi kima veiġana eġorani lorinai, namona tu tau tata tauġeri ġaraġori sebori sebori beġene ġaraġo, e vavine tata maki tauġeri ġaraġori sebori sebori beġene ġaraġo.

³ Tau tauġanina tu ġaraġona ġena, be tauġanina ġaraġona ġenai asi bene koua, a ġaraġona ġena ura bene veiri. Vavine maki moġesi, tauġanina tu ġaraġona ġena, be tauġanina ġaraġona ġenai tu asi bene kou-ġaua, a ġaraġona ġena ura bene veiri.

⁴ Veġaraġo vavinena tu asi ġena maoro ġia tauġena tauġanina ġenai, a ġaraġona tauna moġo ma ġena maoro ġia tauġanina ġenai. Veġaraġo tauna maki moġesina, ġia tu asi ġena maoro ġia tauġena tauġanina ġenai, a ġaraġona vavinena moġo ma ġena maoro ġia tauġanina ġenai.

⁵ Goveġaraġoto tarimami tu ġaraġomi ġeri ai tauġanimi asi boġono kouri. Senaġi taumi ruarua nuġa sebonai boġo kirani, ġoġaniveaġa e ġoġauġau boġo toni, moġa uranai vauro mo negai boġono tanu-faka. Senaġi moġa bekorini murinai tu, ma boġono ġena-vegogo

maia. Moġesi boġono vei, be Satani na asi ġovevaġa-gwaġiġi-iaġiani gabunai asi bene riba-ġanimi.

⁶ Maiġesi aguruġani tu, ġomi navaġa-kavami ġana moġo, dia taravatu atoreani, akirani, boġono veia veġata atoni.

⁷ Korana au ġegu ura baregona ġomi tau mabarami tu au kavana boġoro vei, asi boġoro veġaraġo. Senaġi Barau na tau tata varevare evinatio, tau ta ġena varevare tu bene veġaraġo, ma ta ġena tu asi bene veġaraġo.

⁸ Au na asi ġaraġori tarimari ema ġaraġori ġemaseto tarimari tu akirarini: Ġia tu gora, asi beġene veġaraġo, beġene tanu moġo au kavana.

⁹ Senaġi bema ġia asi ilaila beġe vevaġa-gwaġiġini nai tu, benamo beġene veġaraġo. Korana beġe veġaraġoni tu namo, a asi namo kima veigari nuġari ai karava noġa beġene ġara.

¹⁰ A Veġaraġo tarimami tu mai taravatu avinimimi. Senaġi mai tu asi au ġegu taravatu. Asigina. Mai tu Iesu Vereġauka ġena taravatu ġomi ġemi: Veġaraġo vavinena na ġaraġona asigina ġinavaġi bene dobi-kwaneana.

¹¹ Senaġi irau ġaraġona bedobi-kwaneani nai tu, bene tanu-gora moġo, a asigina tu, ġaraġona ġesi ma beġene veġaraġo-ġenoġoi. Ema veġaraġo tauna na maki ġaraġona asigina ġinavaġi bene dobi-kwaneana.

¹² Tarima kotari ġeri ai tu nakira, -mai tu au moġo ġegu guruġa dia Vereġauka ġena guruġa, -bema veġabidadama nuġanai tarikaka ta ġaraġona vavinena tu Iesu asi evaġa-moġoniani vavinena, senaġi ġena ura ġaraġona tauna ġesi beġene tanu-vegogo nai, mo tau na ġaraġona vavinena asi bene dobi-kwaneana.

¹³ Ema bema vavine ta ġaraġona na Iesu tu asi evaġa-moġoniani, senaġi eurani ġaraġona vavinena ġesi beġene tanu-vegogo, mo vavine na ġaraġona asi bene dobi-kwaneana.

¹⁴ Korana Iesu asi evaġa-moġoniani tauna tu ġaraġona vavinena ġenana moġo veiareva etanuni, ema Iesu asi evaġa-moġoniani vavinena tu ġaraġona tauna ġenana moġo veiareva etanuni. Bema asigina nai tu, toma ġomi natumi Barau ġoiranai tu asi veiareva, senaġi ġia toma tu veaġa.

¹⁵ Senaġi bema Iesu asi evaġa-moġoniani tauna o vavinena ġaraġona ġenana bedobini nai tu, namo bene dobi, bene raka. Mo Iesu evaġa-moġoniani tauna o vavinena mai dabarai tu befakani, meto ta asi beġwaiani. Barau na ġomi ekeamito maino ai boġono tanu.

¹⁶ Ġoi veġabidadama vavinemu tu kamasi ġoi oribani, ġoi na ġaraġomu vei-rakava nuġana na bovaġa-maġuriani? O ġoi veġabidadama taumu tu kamasi ġoi oribani, ġoi na ġaraġomu vei-rakava nuġana na bovaġa-maġuriani?

Barau na ekeamito ilailanai boġono tanu

¹⁷ Gomi tata Iesu Vereġauka na evinimito ilailari ai ema Barau na tata ekeamito ilailari ai moġo boġono tanu. Au na tu mai taravatau misina ekalesia mabarari avaġa-ribarini.

¹⁸ Bema tau ta tauġanina kefina ġelama-vaġiato murinai vau, Barau na ekeaiato nai tu, kefina asi ma bene inu-ġaua, benamo ġelamaiato fauna bene kure-toġaia. Ema bema tau tauġanina kefina roġosi beġene lama-vaġia nuġanai, Barau na ekeaiani nai tu, kefina asi beġene lama-vaġia maia.

¹⁹ Korana tu kefi-lamavaġi tu asi anina ta, ema kefi asi lamavaġi maki asi anina ta. Dagara baregona tu Barau ġena taravatau guruġari boġabi-gigitaririni.

²⁰ Tarimarima mabarari aiġesina ġetanuto-ġoi nuġanai, Barau na ekearito, moġesi moġo beġene tanu.

²¹ Ġoi Barau na ekeamuto neganai, ġoi tu tuġu-rakaorakao tarimamu asi voimu otanuto-ġoi, ei? Asi ġena rakava, namo moġo. Moġa tuġamaġi vekwaragina asi bono vei, senaġi mani tuġu-rakaorakao maġurina beġe tuġu-vaġimuni nai tu, bono ġabi-raġea.

²² Korana tarima ta roġo tuġu-rakaorakao tarimana nuġanai, Barau na ekeaiato Vereġauka ġesi beġene sebona, ġia tu varau fakai etanuni, korana ġia tu Vereġauka ġena tarima. Aba, tauġani ai ġia tu roġo tuġu-rakaorakao tarimana senaġi. Moġa ilailanai, asi tuġu-rakaorakao tarimana o fakai etanuni tarimana Barau na ekeaiani tu Vereġauka ġena tuġu-rakaorakao tarimana.

²³ Gomi tu Barau na voimi varau eveito, evoi-ġenoġoimito. Be tarimarima ġeri tuġu-rakaorakao tarimami ai asi boġono iaġo.

²⁴ Tarikakagu mabarami, ġita tata aiġesi tatanuto-ġoi nuġanai, Barau na ekearato, bema moġesi moġo Barau ġesi bitana tanu.

Sisiba guruġari gora ema vabu ġeri ai

²⁵ Ma roĝosi beĝene veĝaraĝo ĝuiatori e futuari ĝeri taravatu ta Vereĝauka na au tu asi eviniguto. Senaĝi au ĝegu tuĝamaĝi ai aĝitaiani guruĝana nakiraĝia, korana au tu Vereĝauka ĝena vevetuĝaĝwai moĝo etoreguto, guruĝa moĝoniri moĝo bana kiraĝiri ĝana.

²⁶ Mai nega rakavari maiĝeri meto baregori ĝeĝorani dainai, au atuĝamaĝini, tau tu toma ĝotanuni kavana moĝo boĝono tanu-iaĝo.

²⁷ Goi oveĝaraĝoto taumu tu, ĝaraĝomu dobi-kwanena tuĝamaĝina asi bono vei. A asi ĝaraĝomu meromu tu, ĝuiato asi bono vetau, ta noĝaraĝoa uranai.

²⁸ Senaĝi bema ĝoi boa veĝaraĝoni maki namo, ĝoi na vei-rakava ta asi boveiani. Ma ĝuiato beveĝaraĝoni maki namo, ĝia na vei-rakava ta asi beveiani. Senaĝi beĝe veĝaraĝoni tarimari tu ĝeri maĝuri nuĝanai meto vovoka beĝe doĝaririni. Ma au na tu mo meto ĝerina navaĝa-maĝurimi atoni.

²⁹ Tarikakagu mabarami, au na kara akiraĝiani tauna tu iniga: Nega tu bekubi-rakava. Be, maitoma na besinaia beiaĝoni tu, veĝaraĝo tauri tu asi ĝaraĝori noĝa beĝene tanu.

³⁰ Ema ĝetaĝini tarimari noĝa moĝo asi ĝetaĝini tarimari kavana beĝene tanu, e ĝeverereni tarimari noĝa moĝo asi ĝeverereni tarimari, e farefare ĝevoini tarimari tu farefare ta asi ĝeĝaunaiani tarimari noĝa moĝo,

³¹ ema tarima na mai tanobara dagarari ĝeĝauvei-iaĝirini nai, moĝeri dagara tu asi beĝene ĝabiri dagara baregori ĝia ĝeri maĝuri nuĝari ai. Korana mai tanobara vetoĝana korikori tu varau ekori-iaĝoni.

³² Au asi aurani, mai tanobara dagarari na ĝemi tuĝamaĝi beĝene vaĝa-vonuri. Asi eveĝaraĝoto tarimana tu Vereĝauka ĝena dagara etuĝamaĝi-ĝutumarini, aiĝesi Vereĝauka iauna bevaĝa-namoani etoni.

³³ Veĝaraĝo tauna tu mai tanobara dagarari etuĝamaĝi-ĝutumarini, aiĝesi ĝaraĝona iauna bevaĝa-iakuani etoni.

³⁴ Moĝesina naima ĝia tu egabi-daĝadaĝani, tavi ta tavi ta na ĝeinuani. Veĝaraĝo vavinena ema asi kota maki ekima-karato ĝuiatona tu ma ĝeri irau. Asi ĝaraĝona vavinena tu Vereĝauka ĝena dagara betuĝamaĝi-ĝutumarini. Ĝia ĝena ura tu tauĝanina ema iaukana beĝene veaĝa Vereĝauka ĝena. Senaĝi veĝaraĝo vavinena tu tanobara dagarari betuĝamaĝi-ĝutumarini, aiĝesi ĝaraĝona iauna bevaĝa-iakuani etoni.

³⁵ Mai tu ĝomi bana vaĝa-kavami ĝana maiĝeri akiraĝirini, dia ĝomi akirakira-ĝaumini. Senaĝi mai tu au ĝegu ura ĝomi boĝono tanu-ĝinikau moĝo, e kara ta na asi bene kookou-ĝaumi Vereĝauka vetuĝunaĝina boĝo iaĝo-vinini nai.

³⁶ Bema tau ta etuĝamaĝini, kirakauna ĝuiatona, asi kota maki ekima-karato ĝuiatona, ĝenai ĝena veiĝa tu asi roroĝoto, ema ĝena ura kirakauna ĝenai ebarego-lelevaĝini, ma eĝitaiani asi ilaila bevevaĝa-gwaĝigini nai tu, tauri ruarua beĝene veĝaraĝo ĝena ura lorinai. Mo tu vei-rakava asi beveini.

³⁷ Senaĝi bema tarima ta nuĝana evaĝa-gwaĝigiani, ma dagara ta na nuĝana asi maki evaĝa-ĝariĝariani, e tauĝena tauĝanina ĝena ura etuĝamaĝi-fitoĝaiani, e tauĝena nuĝanai ekirato kirakauna, asi kota maki ekimato ĝuiatona, tu asi beĝaraĝoani, tarimana maki namo. Ĝia na maki veiĝa namona beveiani.

³⁸ Moĝesina naima tarima ta na kirakauna, asi kota maki ekima-karato ĝuiatona, beĝaraĝoani tu, veiĝa namona beveiani; senaĝi kirakauna asi beĝaraĝoani tarimana na tu, veiga namo lelevaĝina beveiani.

³⁹ Veĝaraĝo vavinena ĝaraĝona roĝo maĝuri etanuni nai, ĝia tu veĝaraĝo taravatuna na eĝabiani, be ĝaraĝona ĝesi moĝo beĝene tanu-vanaĝi vanaĝi. Ĝia tu ĝaraĝona bemaseni, monai vauro ĝia befakani. Be ĝia beurani, tau ta ĝesi ma ĝeveĝaraĝo betoni nai, beĝene veĝaraĝo asi taravatuna. Senaĝi Vereĝauka evaĝa-moĝoniani tauna moĝo bene ĝaraĝo.

⁴⁰ Senaĝi au ĝegu tuĝamaĝi ai aĝitaiani, ĝia moĝesi gora moĝo betanuni asi ĝaraĝona nai tu beiauku-lelevaĝini. Ema au aribani, au na maki Barau Iaukana aĝabiato.

8

Kwaivakuku ĝevarevare-vinirini bureĝari bitana ĝaniri ba asiĝina?

¹ Mai tu kwaivakuku ĝevarevare-vinirini bureĝari guruĝari ma aveini. Ĝomi kotari ĝokirani, “Ĝita mabarara tu ma ĝera riba.” Oba, mai tu moĝoni. Senaĝi ĝita ĝera riba na tu vekokoroku evaĝa-ĝoraiani, a veuravini na tu tarimarima evaĝa-kokoreani.

² Bema tarima ta etuĝamaĝini, ĝia na dagara ta eribaato, mai tarima na kara bere ribaia dagarana korikorina tu roĝosi roĝo bere ribaia.

³ Senaĝi Barau eura-viniani tarimana tu, Barau ma ribana ĝia.

⁴ Moĝa lorinai kwaivakuku ĝevarevare-vinirini bureĝari ĝeri ai, au ĝegu guruĝa tu maiĝa: Ĝita ribara, mai tanobara nuĝanai kwaivakuku tu asi dagara ta e asi aniri. Ema Barau tu sebona kwarigutu moĝo, ma ta tu asiĝina maia.

⁵ Aba, mai ġekira-baraurini dagarari ġetanuni gubai o mai tanobarai, korana inította maġeri barau e vere tu asisebo,

⁶ Senaġi ġita ġerai tu, Tamara Barau tu sebona kwariġutu moġo, dagara mabarari tu ġia na evaġa-ġorarito, ema ġita maki ġia ġena tatanuni. Ema Vereġauka Iesu Keriso maki sebona kwariġutu moġo, ġia ġenana dagara mabarari ġeġorato, ema ġita maki ġia na maġuri evinirani nai, tamaġuri-tanuni.

⁷ Senaġi tarimarima mabarari maiġa tu asi ġeribaiani. Korana tarima kotari tu kwaivakuku ġemarana-iaġirito, be maitoma maki bureġa ġeġanirini nai, ġia tu roġo ġetuġa-maġini, mo bureġa tu kwaivakuku ġevarevare-vinirito bureġari. Moġa lorinai moġesi bureġari ġeġanirini nai, ġenuġa-vekwaraġini, ġetuġamaġini, veiġa rakavana ġeveiani.

⁸ Ġita dia ġaniġani na Barau sevina ġana beġabi-kavirani. Bema asi bita ġaniani nai tu, Barau ġoiranai rakava kwaikwai tarimara? Asiġina! O bema bita ġaniani nai tu, Barau ġoiranai tarimarima namora? Asiġina!

⁹ Senaġi boġono ġita-ġinikaua, mo veiġa ġomi na maki boġo veiani riba, maninana ġeri veġabidadama moiramaira tarimari boġo vaġa-vedaġa-raġerini.

¹⁰ Korana bema nuġa moira tarimana na ġoi ma ġemu riba mai gabu ai beġitamuni, kwaivakuku rubunai oġaniġanini nai, ġia tu bolaunaġiani noġa, be beiaġoni, kwaivakuku ġevarevare-vinirito bureġari bea ġanirini.

¹¹ Benamo mo veġabidadama moiramaira tarimana, mo tu ġoi tarikakamu veġabidadama nuġanai, ema Keriso tu ġia maki uranai emaseto, senaġi ġoi ġemu riba dainai mo tarima tu berekwani.

¹² Moġesina naima, mai maġuri ai tarikakamu bovei-rakava viniani, benamo ġia nuġa moira moġa bovaġa-rakavaiani nai, ġoi tu Keriso bovei-rakava viniani.

¹³ Moġa lorinai, bema au na kwaivakuku ġevarevare-vinirini bureġana ta baġaniani nuġanai, au tarikakagu ta rakava beveini tu, au bureġa asi ma baġani-ġenoġoini. Moġesi aveini anina tu, tarikakagu ta bavvaġa-vedaġa-raġeani, benamo rakava beveini ġesi.

9

Apostolo tarimari ġeri ġauvei voina ema ġeri maoro

¹ Au tu fakai atanuni tarimagu, dagara ta na asi ebarubaruguni. Au tu apostolo, ema ġita ġera Vereġauka Iesu maki aġitaato. Gomi tu au ġegu ġauvei Vereġauka nuġanai ġwaġwari.

² Bema tarima boruri ġoirani ai au tu dia apostolo tarimagu, moġa tu asi kara ta, korana ġomi ma ribami, au tu apostolo. Ema ġomi mani ġemi tu vetoġa ta, au ġegu apostolo ġauveina vaġa-moġonina ġana, korana Vereġauka ġoġabi-raġeato nai.

³ Au ġeriba-korikorigu ġetoni, ġedanaġiguni nai, au na tu maiġesi avaġa-veserini:

⁴ Ba ġai apostolo tu asi ġema maoro, ġama ġaniġani e niuniu dagarari baġa doġarini, ei?

⁵ Ba ġai apostolo tu asi ġema maoro, ekalesia vavineri baġa ġaraġorini, benamo baġa ġori-rakao rakaorini ġema iaġoiaġo ai, apostolo kotari, e Vereġauka tarina merori, e Kefas, (mai tu Petero), ġeveini kavana, ei?

⁶ Ba mai tu au ema Banabas moġo tauma ruarua tauġema ġema ġauvei ġenana ġema-ġama baġana ġoitaġo?

⁷ Kamara vetari tarimana tu tauġena ġena kokore ai eveġubuto-ġoi vetari ġauveina eveiato-ġoi nuġanai tu, ei? Ma deikara na vine tavoġana tu eveiato moġo, ma vine ġeġwato nai tu, ġwaġwari asi eġanirito, ei? Ma dei tu mamoe serina enarito moġo, a ġia ġerina lata tu asi eġabito, eniuto, ei?

⁸ Gomi ġotuġamaġini, mai tu tarimarima moġo ġeri tuġamaġi guruġari akiraġirini, a Barau ġena taravatu maiġesi tu asi ekirani ġotoni, ei?

⁹ Mose ġena taravatu nuġanai tu iniġesi ekirani, “Boromakau muruna dagara ta na asi bono kou-ġaua, widi momori nekokiri uranai efanafana-taririni neganai.” Gomi ġotuġamaġini, Barau na boromakau tu etuġamaġi-baregorini naima moġesi eguruġato? Asiġina!

¹⁰ Barau na mai tu ġita etuġamaġirato nai maiġesi eguruġato. Moġoni, Barau na mai guruġa tu ġita urarai ekiraġiato. Korana Barau eurato tu, tano efokaiani tarimana e widi tauri ekwari-vaġirini tarimana, tauri ruarua ġeġauvei-iaġiani dagarana ġenana eiaġomani ġaniġanina ġia maki beġene ġani.

¹¹ Gomi fakami ai iauka dagarari namori ġavaroto. Ma ġomi ġemina, ġai tauġanima vaġa-kavari ġana, farefare tu asi veġata baġana ġabi, ei?

¹² Bema ġomi na apostolo kotari ġovaġa-kavarini tauġanina vaġa-kavari farefareri e moniri ai, au atuġamaġini, ġai ma ġema maoro ġomi ġemi na farefare e moni bareġo lelevaġi baġara doġari.

Senagi ġai mo maoro moġa tu asi ġaġauvei-iaġiato. A ġai tu ġavito-maseto e ġananu-maseto moġo, korana asi ġaurato, Keriso varina namona bene raga-rovorovo dabarana baġana kookou-ġaua.

¹³ Gomi asi ribami, Rubu Veagai veaġa dagarari ġeġauvei-iaġirini tarimari tu Rubu Veaġa na ġari ġaniġani ġeġabirini? Ema fata veaġanai ġeġauveini tarimari tu, fata veaġanai varevare dagarari ġeġauvei-iaġirini kwari ġari ġeġabirini.

¹⁴ Moġa ilailanai, Vereġauka na taravatu etoreato, ekirato, deikara Vari Namona beġe ġobata-iaġiani tarimari tu, Vari Namona ġevari-fuani voina beġene ġabia veġata.

¹⁵ Senagi au Vereġauka na mai maoro eviniguto, maġa tu asi aġauvei-iaġiani. Ema au na maiġeri guruġa atore-vinimini tu akirani, maiġeri veġa au ġegu ai boġono veiri atoni? Asiġina! Initoma maki au tu maiġesi moġo bana tanu mo bana mase tu namo vedaurea, ġegu ġauvei voina ġomi ġemi ai asiġina ġinavaġi bana vetau. Maiġesi atanuni tu aiakuni e avekokorokuni, ma asi aurani au ġegu vekokoroku tu guruġa koriri moġo benesi.

¹⁶ A Vari Namona baġobata-iaġiani nai, au tu asi bavekokorokuni, korana Vereġauka ekirato, bana vari-fuua veġata etato. Bema Vari Namona asi bavari-fuani nai, au tu vetuġagu kekei, asi ġegu namo ta moġo.

¹⁷ Bema au nuġagu siga moġo baurani, mai ġauvei naveia veġata batoni nai tu, ma voigu. Senagi bema dia au ġegu urai aveiani, moġa anina tu, Barau na eviniguto ġauveina, naima aġauvei-iaġiani.

¹⁸ Be, moġesina nai, au voigu tu kara baġabiani? Maiġa moġo: Mo tu Vari Namona avari-fuani nai tu, bavarifutu-kavaiani asi voina. Au tu ma ġegu maoro ġegu-ġagu bana ġabia, senagi ġegu maoro tu asi aġauvei-iaġiani.

Paulo tu tarimarima mabarari ġeri vetuġunaġi tarimanai eiaġoto

¹⁹ Aba, au fakai atanuni tarimagu, dia tarima ta ġena tuġu-rakaorakao tarimagu, senagi au tauġegu moġo tarima mabarari ġeri vetuġunaġi tarimagu ai avevaġa-iaġoto. Korana mai maġuri ai tu tarima ġutuma baġabi-iaġomarini Keriso ġenai.

²⁰ Iuda tarimari ġesi ġatanuni tu, Iuda tarimagu ai aiaguni, korana Iuda tarimari bana ġabi-iaġori Keriso ġenai uranai. Au tauġegu tu dia Mose ġena taravatu ġaburenai atanuni, senagi taravatu ġaburenai ġetanuni tarimari ġesi ġatanuni tu, au maki taravatu ġaburenai atanuni, korana taravatu ġaburenai ġetanuni tarimari bana ġabi-iaġori Keriso ġenai uranai.

²¹ A asi ġeri taravatu tarimari ġesi ġatanuni tu, ġia kavana dia taravatu ġaburenai atanuni. Moġa anina tu, au Barau ġena taravatu ġenana aveġitato? Asiġina! Au monai tu Keriso ġena taravatau ġaburenai atanuni. Moġesi aveini korana tu, asi ġeri taravatu tarimari Keriso ġenai bana ġabi-iaġori uranai.

²² Veġabidadamai moiramoira tarimari ġesi ġatanuni tu, ġia kavana atanuni. Veġabidadamai moiramoira atanuni korana tu, veġabidadamai moiramoira tarimari Keriso ġenai bana ġori-iaġori uranai. Au tu tarimarima mabarari ġeri maġuri irauirauri atovotovorini, bena ġia ġesi ġatanu-sebona sebonani. Korana aurani, dabara irauirauri mabarari bana ġauvei-iaġiri, be moġeri na tarima kotari bana vaġa-maġuriri.

²³ Au maiġesi aveini tu, Vari Namona bene raga-rovorovo ġana. Korana aurani, Vari Namona ġena namo ġomi ġesi bana ġabi-vegogo ġana.

Raga-iruiru ai bono kokore

²⁴ Gomi asi ribami, raga-iruiru ai tu raga-iruiru ai beġe ruġani tarimari mabarari beġe raga-vaġa-seboni, senagi tarima sebona na moġo kokore voina beġabiani? Gomi maki moġesi boġono raga-gwada, be kokore voina boġono ġabia.

²⁵ Gere nuġanai ġeraka-toġani tarimari mabarari tu tauġeri ġerovina-ġinikauni tereinini ai. Ġia moġesina ġeveini tu, dia betanu-vanaġi vanagini koronana beġene ġabia uranai. Senagi ġita betanu-vanaġi vanagini koronana bitana ġabia uranai taraga-iruiruni.

²⁶ Moġesi naima, au tu eraga-taġuitaġuini tarimana kavana asi aragani. Senagi au tu voigu bana ġabia uranai araga-gwadani. Ema au vefaisi ai evefaisi-ġinikauni tarimana kavana aveini, ġegu faisai iavara korinai moġo asi etubuni.

²⁷ Asiġina, au tauġanigu tu afaisiani, au ġegu tuġu-rakaorakao dagarana ai avaġa-iaġoani, ġena ura rakavari asi aveini. Korana asi namo, tarima kotari aġobata-vinirini, senagi au tauġegu na voigu ġoirai asi baġabiani.

¹ Tarikakagu mabarami, au aurani, ġita tubura ġeri ai kara eġorato moġa asi boġono tuġarekwaia. Ġita tubura tu, Barau na magube etuġuato dabara bene kira-varari ġana, moġa gaburenai ġerakato, ema ġia tu Davara Kakakakana nuġana na ġeraka-vanaġito.

² Ġia mabarari tu magube ai ema daġaru-bara nuġanai Barau na ebabatorito, ma Mose ġena tarimarimai ġeiaġoto.

³ Ġia mabarari iauka ġaniġanina sebna ġeġaniato.

⁴ Ema mabarari iauka nanuna sebna ġeniuato. Korana ġia tu iauka forena, ġia muriri na erakato forena, ġenana nanu ġeniuto. Mo fore moġa tu Keriso.

⁵ Senaġi Barau nuġana tu asi eiakuto ġutuma ġeri ai, moġesi nai tano fakanai tauġaniri ġemase-fitari fitarito.

⁶ Maġeri dagara ġeġorato tu, ġita matara vaġa-kaniri ġana. Be ġita na moġeri bisini ġitari, benamo ġita dagara rakavari asi bitana mata-ġaniġani iaġiri, ġia ġemata-ġaniġanito kavana.

⁷ Ema kwaivakuku asi bisini toma-rakarigo viniri, ġia kotari ġeveito kavana. Buka Veagai ekirani kavana, "Tarimarima ġetanu-tarito, ma ġeġani-verekoto, moga murinai tu ġevariġisito, ġeġereto e ġebarato, (mata-boraġai ġedau-toġato)."

⁸ Ema ġita maki asi bisini kima e mataboraġa-taġuitaġui, korana ġia kotari tano fakanai ġekimato e ġemata-boraġato nai tu, tarimarima mabarari 23,000 veġata ġemaseto.

⁹ Vereġauka ġita na asi bisini tovo-naġia, korana ġia kotari na ġetovo-naġiato tarimari tu, mota na ġekafurito, benamo ġemaseto.

¹⁰ Asi bisini guruġa-vemuriġoi, korana ġia kotari ġeguruġa-vemuriġoito nai tu, mase aneruna na evaġi-mase maserito.

¹¹ Maġeri veġa ġeġorato anina tu, ġita na bisini ġitari, benamo matara beġene kani uranai, ġita maitoma tatanuni tarimara ġerai. Korana ini horai mai tanobara tu magonai varau beragasi.

¹² Moġesi naima, bema ġomi ġotuġamaġini, ġemi veġabidadamai ġoruġa-gigitarini ġotoni nai tu, lorimi boġono vetore, boġo ketoni ġesi.

¹³ Mani veribaġani ġoġoitaġorini tu, dia veribaġani boruri. Asiġi. Mani tu tarima tata ġeri ai vanaġivanaġi eġorani dagarari. Barau tu vetuġamaġikau Barauna, be beġitamuni, asi bovaġa-dareani veribaġanina tu ġemu ai asi bevaġa-foforiani. A ġoi veribaġani boraka-ġoitaġoni nai, Barau na tu ġemu raga-maġuri dabarana ta maki betore-rosiani, korana mo veribaġani nuġanai bono ruġa-gwaġiġi ġana.

Barau e iauka rakavari asi boġono korana-iaġi sebna

¹⁴ Moġa lorinai, tarikakagu, kwaivakuku toma-rakarigo viniri ġerina boġono veġita-moġovaġi.

¹⁵ Au na tu iaunega tarimami avaġa-guruġamini, be tauġemi na au kara akiraġirini maġeri boġono tuġamaġi-ginikauro.

¹⁶ Anibou taġaniani neganai, vevaġa-namo kapusina taġabiani, ma Barau tavaġa-namoani, benamo taniuani. Mo tu Keriso rarana mabarara na taniu-sebonaiani, Keriso rarana ġesi ġia ema ġita tasebonani, ene? Ema beredi tatavi-kiraiani nai maki, mabarara Keriso tauġanina taġani-vegogoani, Keriso tauġanina ġesi ġia ema ġita tasebonani, ene?

¹⁷ Ġita tu vovoka, senaġi mabarara beredi sebonai ema tauġani sebonai taiaġoni. Tauna korikori, ġita tu mo beredi sebna moġo taġani-vegogoani.

¹⁸ Israela tarimari situġamaġi-iaġori. Ginitago dagarari fata veaġanai ġegaburito-ġoi, kwari ġeġanirito-ġoi tu, mo fata veaġana ġesi sebonai ġeiaġoto-ġoi.

¹⁹ Au na mai guruġa akiraġirini tauri tu kara? Au akirani, kwaivakuku ġevarevare-vinirini dagarari tu ma aniri atoni ba? O kwaivakuku tu dagara korikorina atoni ba?

²⁰ Asiġi. Au tu iniġesi akirani: Barau asi ribari beseri ginitago dagarari ġevinini tu, iauka rakavari ġevarevare-vinirini, a dia Barau ġevarevare-viniani. Moġesi nai au tu asi aurani, ġomi iauka rakavari ġesi sebonai boġono iaġo.

²¹ Gomi asiġina ġinavaġi Barau ġena kapusi e iauka rakavari ġeri kapusi boġo ġabi-vegogorini, benamo Barau ġena kapusi ai boġo niuni ema iauka rakavari ġeri kapusi ai maki boġo niuni. Asiġina. Gomi asiġina ġinavaġi Barau ġena teibolo boġo ġaniġanini e vaġa-sebo iauka rakavari ġeri teibolo maki boġo ġaniġanini.

²² Ġita tu maġesi sivei, be Barau sivaġa-uraia tatonni, ei? Be ġita ġera kokore tu Barau ġena kokore evanaġiato ba?

Vanaġivanaġi Barau bisini vaġa-raġea

²³ Dagara mabarari tu asi taravaturi, senaġi dia dagara mabarari ġerina namo bita doġarini. Dagara mabarari tu asi taravaturi, senaġi dia dagara mabarari ġerina vevaġa-kava bita doġarini.

²⁴ Tarima ta tauĝena ĝereĝana ĝena namo moĝo asi bene vetaua, senaĝi tarima tari ĝeri namo beĝene ĝobia uranai bene ĝauvei e bene tanu.

²⁵ Bureĝa ĝeivoivoi-iaĝirini gabunai bureĝa ĝetorerini, moĝeri tu boĝono ĝaniri, mo tu asi taravaturi. Asi boĝono vedanaĝi-rakaorakao, nuĝami boĝo tore-metorini garina.

²⁶ Korana, Buka Veagai ekirani kavana, "Tanobara tu Barau ĝena, ema tanobara nuĝanai ĝetanuni dagarari mabarari maki Barau ĝena."

²⁷ Bema Iesu asi evaĝa-moĝoniani tarimana na ta beĝori-iaĝomuni ĝena numai ĝaniĝani, benamo ĝoi bourani noiaĝo botoni nai, kara ĝoiramu ai etore-taririni tu bono ĝaniri moĝo. Asi bono vedanaĝi, nuĝamu botore-metoani garina.

²⁸ Senaĝi bema tarima ta na bekiramuni, bekirani, "Mai tu kwaivakuku ĝevarevare-viniato bureĝana," betoni, moĝa vauro asi bono ĝania. Korana mo bekira-varamu tarimana uranai e nuĝana bevekwaragiĝini garina.

²⁹ Au na nuĝa mainai akiraĝirini tu, dia ĝoi nuĝamu akiraĝiani, senaĝi mo bekira-varamuni tarimana nuĝana akiraĝiani.

Betaĝu ta ekirani: Kara dainai au, maĝuri fakanai e namonai atanuni tarimagu, tarima ta na nuĝanai au bekota-viniguni.

³⁰ Bema au na Barau atanikiu-viniani vau aĝaniĝanini, kara dainai Barau batanikiuani ĝaniĝanina aĝaniani nai tu, guruĝa rakavari ĝegu ai ekiraĝini?

³¹ Moĝesi naima, ĝoĝaniĝanini o ĝoniuniuni o kara ĝoveiani nai, dagara mabarari ai Barau boĝono vaĝa-raĝea.

³² Tarima ta asi boĝono vaĝa-vedaĝa-raĝea. Iuda tarimana o irau bese tarimana o Barau ĝena eklesia asi boĝono vaĝa-daĝa-raĝeri, beĝe ketoni garina.

³³ Au maki avededegwani, tarimarima mabarari nuĝari navaĝa-namori ĝana. A dia au tauĝegu ĝegu namo avetauani, senaĝi tarima vovoka ĝeri namo avetaurini, Barau na bene vaĝa-maĝuriri ĝana.

11

¹ Au ĝegu maĝuri boĝono tovtotova, korana au Keriso ĝena maĝuri atovotovoani bene.

Deba kumuĝauna veiĝana

² Au na ĝomi tu avaĝa-raĝemini, korana dagara mabarari ai au ĝotuĝamaĝiguni, ema vevaĝa-riba gurugari aĝabirito, ĝemi avaĝa-riba-iaĝirito, moĝeri ĝokorana-iaĝirini.

³ Senaĝi au aurani toma ĝomi boĝono riba, tau mabarari ĝeri deba tu Keriso, ema vavine ĝeri deba tu tau; ema Keriso ĝena deba tu Barau.

⁴ A tau mabarari debari beĝe kumu-ĝaurini vauro, beĝe ĝauĝauni o beĝe perovetani nai tu, ĝeri deba tauna Keriso asi beĝe gubakauani.

⁵ Ema vavine mabarari debari asi kumuĝau beĝe ĝauĝauni o beĝe perovetani nai tu, ĝeri deba, (mo tu ĝia ĝaraĝori), asi beĝe mataurairini. Korana moĝa tu noĝa debari ĝerarorini kavana.

⁶ Bema vavine ta debana asi ekumu-ĝauni nai tu, debana ĝwina beĝene fakosi-vaĝiri, (mata-boraĝa vavineri kavana). Ma bema vavine ta ĝwina fakosi-vaĝina o raro-vaĝina bemaikaiiani nai tu, debana bene kumu-ĝauna.

⁷ A tau tu debana asi bene kumu-ĝauna, korana ĝia tu Barau ĝitaĝitana kavana, ema ĝia na tu Barau marevana baregona evaĝa-foforiani. A vavine tu tau marevana.

⁸ Korana dia tau o Adamu tu vavine ĝenana eiagomato, senaĝi vavine o Eva tu tau ĝenana eiagomato.

⁹ Ema Barau na tau eveiato tu dia vavine ĝena, senaĝi vavine ĝia tu tau ĝena eveiato.

¹⁰ Moĝesi naima vavine na debari beĝene kumu-ĝauri, korana mo vetoĝa na ĝia bevaĝa-foforiani, ĝia tu ma ĝeri maoro Barau ĝena ĝauvei beĝe veiani, ema aneru na beĝene ĝita-vetoĝari ĝana.

¹¹ Senaĝi Vereĝauka ĝena maĝuri dabaranai tau tu dia ĝereĝari moĝo ĝetanuni, ma vavine maki dia ĝereĝari moĝo ĝetanuni. Asiĝina. Vavine tu tau ĝesi beĝe sebonani, ma tau tu vavine ĝesi beĝe sebonani.

¹² Korana tu vavine tau ĝenana eiagomato kavana, tau maki vavine ĝerina ĝeĝorani. Senaĝi dagara mabarari tu Barau ĝenana ĝeiaĝomani.

¹³ Gomi tauĝemi na ĝotuĝamaĝi-ĝinikaua. Vavine ta debana asi kumuĝauna neganai, Barau ĝenai beĝurigiurini tu namo ba?

¹⁴ Mai tanobara mabarana nuĝanai tau e vavine vetoĝara marevari na evaĝa-foforiani, tau ta ĝwina bevaĝa-gara maukaiani tu maiaka veiĝana beveiani tauĝena ĝenai.

¹⁵ Senaĝi bema vavine ĝwina bevaĝa-gara maukaiani nai, mo tu ĝia marevana bevaĝa-baregoani. Korana Barau na vavine ĝwina eviniato tu debana bene kumu-ĝauna ĝana.

¹⁶ Bema tarima ta beurani, mai guruḡa neḡarea betoni nai, au tu asi ḡegu guruḡa ta maia. Senaḡi ḡegu guruḡa sebona tu maiḡa: Gai ḡemai ema Barau ḡena ekalesia mabarabarari nuḡari ai veiḡa boruna ta tu asiḡina maia.

Vereḡauka ḡena anibou

¹⁷ Mai tu veiḡa tari ḡomi na boḡono korana-iaḡiri veigari ma nakira-varami. Senaḡi au na ḡomi tu asi avaga-raḡemini, ḡomi ḡemi raka-vegogo nuḡari ai tu vevaga-rakava tu barego ḡoveiani, a namo ta tu asi govaḡa-ḡoraiani.

¹⁸ Tovotovonai tu inigesi nakirami. Au aseḡaḡini, ḡomi ḡemi ekalesia raka-vegogori nuḡari ai tu dia nuḡa sebonai ḡogabini, a ḡomi tu ḡovevare-kirakirani, benamo tauḡemi ḡoveḡare-veḡareni. Au na mai guruḡa maiḡa tu kota avaga-moḡoniani.

¹⁹ Aba, ḡomi vefakami ai vevare-kirakira tu bene vetore veḡata, be Barau na deidei evaga-moḡonimito tarimami tu boḡono fofori.

²⁰ Gomi ḡoraka-vegogoni nai tu, dia Vereḡauka ḡena lavi ḡaniḡanina dokona o anibou ḡoḡani-vegogoani. Asiḡina.

²¹ Gomi ḡoḡaniḡanini nai, dei egabini ḡotoni, ḡoveraga-veragaiani, a karomi asi ḡovaḡa-nogarini. Ta tu vito etanuni, ma ta tu eniu-babobaboni.

²² Gomi tu asi ḡemi numa, be ḡemi numai asi boḡo ḡanini e boḡo niuni ḡotoni, ei? Ma Barau ḡena rubu tu dagara misina ḡotoni, ḡoḡita-ḡuiragiani, ema asi ḡeri-ḡari tarimari ḡovaḡa-maiakarini, ei? Au ḡomi ḡemi ai tu kara nakiravagi, navaḡa-raḡemi ba? Asiḡina ḡinavagi, au na gomi tu asi bavaga-raḡemini.

²³ Gomi mai avinimini guruḡana maiḡa tu Vereḡauka ḡenana aḡabiato guruḡana: Iesu Vereḡauka ḡerevaiato boḡinai beredi egabi-vaisiato,

²⁴ benamo Barau evaga-namoato murinai, etavi-kiraiato, benamo ekirato, “Goḡabia, ḡoḡania, mai tu au tauḡanigu, ḡomi urami ai ḡinitaḡo dagaranai eiaḡoto. Mai veiḡa boḡono veia-ḡoi, au tuḡamaḡi-iaḡigu ḡana.”

²⁵ Mo lavi ḡaniḡanina o anibou murinai, Iesu na beredi eveiato ilailanai kapusi ma eḡabi-vaisiato, benamo ekirato, “Mai kapusi tu Barau ḡena Ginitaḡo Variḡuna, au raragu na bevaga-moḡoniani. Mai kapusi ai boḡo niuani nai, au tuḡamaḡi-iaḡigu ḡana boḡono niu.”

²⁶ Korana mai beredi boḡo ḡaniani e mai kapusi ai vine nanuna boḡo niuani nai tu, vanaḡivanagi Vereḡauka ḡena mase bogo vari-fiuani mo, ḡia ma beḡenoḡoini.

²⁷ Moḡesina naima deikara na Vereḡauka asi begubakauani vau, mai beredi beḡaniani e Vereḡauka ḡena kapusi ai beniuni nai, mo tarima na Vereḡauka tauḡanina ema Vereḡauka rarana ḡenai vei-rakava beveini.

²⁸ Tarima ta ḡia nuḡana bene ragaḡi-guinea vau, mo beredi bene ḡania, ema mo kapusi vine nanuna bene niua.

²⁹ Korana deikara na Vereḡauka asi begubakauani vau beḡanini ema beniuni nai, mo beredi beḡaniani e mo kapusi ai vine nanuna beniuni nuḡanai tu, ḡia tauḡena moḡo bevekota-vinini e rakava metona ḡenai betore-kauani. Korana ḡia na Iesu tauḡanina tu asi etuḡamaḡi-doḡariani.

³⁰ Moḡesi naima ḡomi fakami ai ḡutuma tu tauḡanimi ḡemoirani e ḡokeveni, kotari maki varau ḡemaseto.

³¹ A bema ḡita tauḡera nuḡara bita vetau-guinerini nai tu, Barau na ḡita asi bekota-vinirani.

³² Senaḡi Vereḡauka na ḡita ḡera kerere bekiraḡirini nai tu, ḡia na bevaga-matakanirani. Vereḡauka ḡita moḡesina beveirani tarimara tu, tanobara maḡurinai ḡetanuni tarimari ḡesi asi bene vaga-rakava sebonara gana.

³³ Moḡesi naima, tarikakagu, anibou uranai boḡo raka-vegogoni nai, asi boḡono veigari-veigari, karomi tari maki boḡono vaga-nogari.

³⁴ Bema ta bevitoani nai tu, ḡena numai bene ḡaniḡani. Asi namo ḡemi raka-vegogo na tu ḡomi kota-vinimi dabarana maki bevaga-ḡoraiani. Guruḡa kotari tu roḡo bana iaḡosi vau, ma bana kira-varami.

12

Iauka Veaga ḡena varevare

¹ Tarikakagu mabarami, toma tu aurani, Iauka Veaga na ḡomi tata evinimini varevereri nakira-varami. Korana au aurani maiḡeri varevare ḡomi na boḡono ribari.

² Gomi ma ribami, Barau roḡosi roḡo boḡoro ribaia neganai, dagara kotari na asi ḡeguruḡani babauri ḡeri ai ḡeḡori-iaḡomito-ḡoi e ḡeḡori-taḡuitaḡuimito-ḡoi.

³ Moḡesi naima avaga-ribamini, Barau Iaukana na eḡori-kauani tarimana tu asi bekirani, “Iesu iatanai rakava barana bene tanu.” Ema tarima ta maki maiḡesi asi bekira-kavani, “Iesu tu Vereḡauka,” senaḡi Iauka Veaga na beboroḡiani tarimana tu moḡa.

⁴ Iauka ġena varevare tu irauirauri, senaġi Iauka sebona moġo ġenana ġeiaġomani.

⁵ Vetuġunaġi-iaġovini dabarari tu irauirau, senaġi Vereġauka tu sebona moġo ġenana ġeiaġomani.

⁶ Ġauvei veiveiri seġukari maki irauirau, senaġi Barau tu sebona na moġo ġena tarimarima mabarari nuġari ai evaġa-ġorarini.

⁷ Iauka Veaġa tu tarima tata ġeri ai efoforini, korana ekalesia mabarana vevaġa-kava beġene doġari uranai.

⁸ Tarima ta tu Iauka Veaġa na guruġa iaunegari eviniani, ma tarima ta tu mo Iauka Veaġa sebona na Barau ġena guruġa tauna korikori evaġa-ribaiani.

⁹ Ma mo Iauka Veaġa sebona na tarima ta tu veġabidadama eviniani, ma mo Iauka sebona na tarima ta tu keve tarimari vaġa-namori varevarena o seġukana eviniani.

¹⁰ Ma tarima ta tu nuġa-farevaġi veiġari boruri bene veiri varevarena o seġukana eviniani, ma tarima ta tu bene peroveta ġana seġuka eviniani, ma tarima ta tu Barau Iaukana o iauka rakavari boruri bene ribari varevarena o ribana eviniani, ma tarima ta tu garo irauirauri ai bene guruġa varevarena o ribana eviniani, ema tarima ta tu garo irauirauri ai beġe guruġani nai, guruġa aniri bene vaġa-vanaġiri varevarena o ribana eviniani.

¹¹ Maiġeri mabarari tu Iauka Veaġa sebona kwarigutu moġo ġena ġauvei. Ema mai Iauka Veaġa na ġena ura ilailanai varevare tarima tata evinirini.

Tauġani tu sebona, ma legana ġutuma gorogoro

¹² Tarima tauġanina tu sebona moġo, senaġi legana tu ġutuma gorogoro; ma mo tauġani legana tu asisebo, senaġi ġia mabarari na tu tauġani sebona kwarigutu ai moġo ġeiaġoto. Keriso maki moġesina.

¹³ Ġita kotari tu Iuda tarimara e tari tu irau bese tarimara, kotari tu tuġu-rakaorakao tarimara e tari tu fakai tatanuni tarimara, senaġi ġita mabarara tu Iauka Veaġa sebona na ebabatorato, benamo tauġani sebonai taiaġoto. Ema Barau na ġita mabarara ġerai Iauka Veaġa sebona evinirato, ġia na bene vaġa-vonura ġana.

¹⁴ Tauġani maki dia legana sebona na moġo eveiato, senaġi lega ġutuma gorogoro na.

¹⁵ Bema kwaku bere kira, "Au tu dia ġima, be au tu dia tauġani legana ta." Asigina, ġia tu roġo tauġani legana ta veġata.

¹⁶ Ma seġa ma bere kira, "Au tu dia mata, be au tu dia tauġani legana ta." Asigina, ġia tu tauġani legana ta veġata.

¹⁷ Bema tauġani mabarana tu bere mata moġo nai tu, kamasi vau bere seġaġi. Ma bema tauġani mabarana bere seġa moġo nai, dagara bonari tu kamasi vau bere noġori.

¹⁸ Senaġi Barau na lega tata tauġani ai etorerito. Barau na ġena ura gaburi tatai etorerito.

¹⁹ Bema tavi sebona moġo tauġani ai bere iaġo nai tu, tauġani mabarana tu kamasi?

²⁰ Senaġi tauġani moġesina tu asigina. Tauġani legana tu ġutuma, senaġi tauġani tu sebona moġo.

²¹ Moġesi naima mata na ġima maiġesi asi bekiraiani, "Au na ġoi asi aura-vinimuni," o deba na kwaku asi bekiraiani, "Au na ġoi asi aura-vinimuni."

²² Ma tavi ta reke ai bita ġitaiani tu, mo tauġani legari tari taġitarini asi kokoreri tatoni, senaġi bema moġeri lega asigina nai tu, tauġani asi bere ġauvei-ginikau.

²³ Ema tauġani legari tari tatuġamaġi-keirini, takirani, moġeri lega gubakauri tu kei tatoni, senaġi moġeri ġeri ai ġita ġera vegubakau tu barego tatoreani. Ma tauġani legari kotari ġitaġitari tu asi marevari, senaġi moġeri ġita na tu nuġara mabarari ġesi tanari-ginikaurini.

²⁴ Ma tauġani legari kotari ma marevari dagarari tu asi tatuġamaġi-baregorini. Senaġi Barau na tu tauġani legari irauirauri mabarari etore-sebonarito, benamo ġia na asi ġegubakaurini legari tu vegubakau barego iatari ai etore-kauato.

²⁵ Barau na moġesi eveiato korana tauġani legari kotari moġo asi bisini vaġa-namori ġana. Senaġi tauġani legari mabarari bisini ġitaġau-ilailari ġana.

²⁶ Bema lega sebona ta bemidigu-midiguni nai, lega mabarari ġia ġesi beġe midigu-midigu sebonani. Ema lega ta beġe matauraiani nai tu, lega mabarari mo lega ġesi beġe iaku-vegogoni.

²⁷ Gomi tata manigemi tu Keriso tauġanina legari tata ġia tauġanina nuġanai. Ma ġomi mabarani tu Keriso tauġanina sebonai ġoiaġoto.

²⁸ Benamo ekalesia nuġanai Barau na mabarari ġeri ġauvei tata evinirito. Eto-re-guinerito tarimari tu apostolo tarimari, ġia muriri ai vaġa-ruaruaana tu peroveta tarimari etorerito, ma ġia muriri ai vaġa-toitoina tu vevaġa-riba tarimari etorerito. Ma muriri ai tu nuġa-farevaġi veiġari beġene vei tarimari, ma muriri ai tu keve tarimari beġene

vaġa-namori varevarena o seġukana ġeġabiato tarimari, e beġene vevaġa-kava tarimari, e ġauvei tari beġene ġori-kauri tarimari, ema garo irauirau ai beġene guruġa tarimari.

²⁹ Tarimarima mabarari tu apostolo tarimari moġo ba? Tarimarima mabarari tu peroveta tarimari moġo ba? Tarimarima mabarari tu vevaġa-riba tarimari moġo ba? Tarimarima mabarari tu nuġa-farevaġi veġari ġeveirini tarimari moġo ba?

³⁰ Tarimarima mabarari keve tarimari ġevaġa-namori varevarena o seġukana ġeġabiato tarimari ba? Tarimarima mabarari garo irauirau ai ġeguruġani ba? Tarimarima mabarari garo irauirau ai ġeguruġani guruġari tauri ġekiraġi-foforirini tarimari ba?

³¹ Varevare baregona korikori boġono ura-dikadika-iaġia.

Veuravini

Maitoma dabara namo vedaureana au na ġomi ġemi avaġa-foforiani.

13

¹ Bema au tarimarima ġeri garo irauirau ai bara guruġa ema aneru garori ai maki bara guruġa, senaġi au asi ġegu veuravini, au ġegu guruġa tu auri ġekwariani o funu ruarua ġevaġa-vesekerini gururi ġeraġeni kavana.

² Bema peroveta varevarena o seġukana ġegu ai bere tanu, ema riba mabarari e vekuretoġa dagarari mabarari bara ribari. Ema ġegu veġabidadama barego bere tanu, be ġoro baregori maki bara vaġa-veraġa-raġeri, ma gabu boruri ai ma beġerea ruġa. Senaġi au asi ġegu veuravini nai, au tu asi ġegu namo ta.

³ Ema ġegu farefare mabarari asi ġeri-ġari tarimari bara viniri, e tauganigu tarimarima ġimari ai bara tore-kaua, benamo beġere gabua, senaġi au asi ġegu veuravini nai, au na dagara namona ta asi bara doġaria.

⁴ Ma ġena veuravini tarimana tu evevaġa-gwaġiġini. Veuravini tu vevetuġaġwa e vevaġa-kava na evonuto. Veuravini nuġanaġi mama asi etanuni. Veuravini nuġanaġi veiavi e vekiraġi-varaġevarage asi etanuni.

⁵ Veuravini na tarimarima vaġa-rakavari veġari asi eveirini, taugena ġena namo moġo asi evetauani, asi ebaru-ġariġarini, ta ġena rakava asi etuġamaġi-taġorini.

⁶ Vei-rakava asi eiaku-iaġirini, senaġi Barau ġena guruġa ema maġuri moġoniri moġo eiaku-iaġirini.

⁷ Veuravini tu ma manauna ġesi dagara mabarari nuġari ai eruġa-tarini, dagara mabarari nuġari ai Barau tu bevaġa-moġoniani, ema ġena vetuġamaġikau maki Barau ġenaġi roġo betoreani, meto mabarari ai bekokoreni.

⁸ Veuravini tu asi veġata ekorini, beruġa-taġo vanaġi-vanaġini. Peroveta guruġari mabarari neġi beġea korini, garo irauirau mabarari maki beġea magoni, riba mabarari beġea korini.

⁹ Korana ġita ġera riba tu koturi moġo e ġera peroveta maki koturi koturi moġo.

¹⁰ Senaġi mo dagara namo vedaureana beiaġomani nai, mo kotuna moġo namo taribarito dagarari tu beġe rekwa-rekwani.

¹¹ Au roġo mero misigu ai tu, mero misiri ġeri guruġa na aiagoto-ġoi, mero misiri ġeri tuġamaġi na aiagoto-ġoi, ema mero misiri ġeri tuġamaġi na atuġamaġito-ġoi. Senaġi au ama tau-doġadoġato nai tu, mero misimisiri ġeri tuġamaġi mabarari atore-veġitarito.

¹² Toma Barau ġena dagara tu vegia ai noġa taġita-vaguna vagunarini. A Barau ġoirana ema ġita ġoirara bita veġita-veġita karakarani, monai vauro Barau ġena dagara vetoġari korikorini bita ġita-ġinikaurini. Toma au na tu koturi moġo aribarini. Senaġi mo ġaro ai vau bariba-ġinikaurini, au Barau na eriba-ġinikauguto kavana.

¹³ Mai dagara toitoi tu beġe tanu-vanaġi vanaġini: Vegabidadama, vetuġamaġikau, ema veuravini. Senaġi mai dagara toitoi vekaravari ai tu veuravini moġo barego lelevaġi.

14

Iauka Veaġa ġena varevare dagarari tari ġauvei-iaġiri

¹ Veuravini maġurina boġono vetau-guinea! Ema Iauka Veaġa ġena varevare boġono uravini barego-iaġiri; a Iauka Veaġa ġena peroveta varevarena o seġukana tu boġono uravini barego-lelevaġia.

² Korana garo boruri ai eguruġani tarimana tu dia tarimarima evaġa-guruġaiani, senaġi ġia tu Barau moġo evaġa-guruġaiani. Moġoni, tarimarima na ġia kara bekiraġiani tu asi beġe tuġamaġi-doġariani, korana ġia tu Barau Iaukana na vekuretoġa dagarari ekiraġirini.

³ A eperovetani tarimana tu tarimarima evaġa-guruġarini. Ma ġia ġena peroveta guruġari na tu tarimarima evaġa-kokorerini, elaunaġirini, ema tarimarima nuġari evaġa-gwaġiġirini.

⁴ Garo boruri ai eguruḡani tarimana tu tauḡena ḡena veḡabidadama moḡo evaḡa-tubuani, a eperovetani tarimana na tu ekalesia mabarari ḡeri veḡabidadama evaḡa-kokorerini.

⁵ Au ḡegu ura tu ḡomi mabarami garo boruri ai boḡono guruḡa. Senaḡi au aura-baregoni ḡomi tu Barau ḡenana ḡeiaḡomani guruḡari boḡono peroveta-iaḡiri. Korana Barau ḡenana ḡeiaḡomani guruḡari eperoveta-iaḡirini tarimana na garo irauri ai eguruḡani tarimana evanaḡiani; senaḡi garo irauri ai beguruḡani tarimana beguruḡani guruḡari ma beḡe vaḡa-vanaḡirini e beḡe kiraḡi-fakarini tu lorinai. Korana beḡe vaḡa-vanaḡirini e beḡe kiraḡi-foforirini nai tu, ekalesia ḡeri veḡabidadamai kokore beḡe ḡabini.

⁶ Tarikakagu mabarami, bema au baiaḡosini ḡomi ḡemi ai ḡaronai tu, garo boruri ai basi vaḡa-guruḡamini, senaḡi guruḡa tauri tu asi bakiraḡi-foforirini; monana au ḡeguna namo ta boḡo ḡabiani ba? Asiḡina! Moḡoni, Barau na au evaḡa-ribaguni guruḡari ḡomi ḡemi ai bakiraḡi-foforirini o riba bavimimini, o baperovetani, o Barau ḡena guruḡa ḡemi ai baveḡa-riba iaḡiani, monai vauro au ḡeguna namo boḡo ḡoitḡoni.

⁷ Miusiki vaḡa-ḡereri dagarari boḡono tuḡamaḡiri, ilailana ivirikou o hap (ḡita kavana). Bema gururi asi beḡe raḡe-ginikauni nai tu, kamaso tarima na kamara mari ḡeḡere-iaḡiani bita seḡaḡi-leaiani? ḡia tu mo ivirikou o hap gururi beḡe raḡe-ginikauni vauro, kamara mari ḡeḡere-iaḡiani bita ribaiani.

⁸ Ema bema vetari kibina asi beḡe fururu-ginikauni nai tu, ta na tuari uranai asi berovina-toreni.

⁹ Gomi maki moḡesina kavana, bema garo boruri ai boḡo guruḡani nai, tarimarima tu kamara dabarai ḡomi na kara ḡokiraḡiani beḡe tuḡamaḡi-doḡariani? Gomi ḡemi guruḡa mo tu tano korinai boḡo kiraḡirini noḡa iavara boḡo vaḡa-guruḡaiani.

¹⁰ Mai tanobarai garo irauri au tu asisebo, ma ḡia mabarari ma tauri moḡo.

¹¹ Senaḡi bema garo ta anina asi ribagu, moḡa tauna tu, au tu dia mo garo borunai eguruḡani tarimana ḡena vanuḡa tarimagu, ema ḡia maki moḡesina, ḡia tu dia au ḡegu vanuḡa tarimana.

¹² Gomi ḡemi ai maki moḡesina. Gomi tu Iauka Veḡa ḡena varevare ḡouravini-barego iaḡirini; ma toma tu ekalesia ḡeri veḡabidadama vaḡa-kokorena varevarena ḡabigabina uranai boḡono kokore, be mo varevare ai tu boḡono tubu.

¹³ Moḡesi naima, garo boruri ai eguruḡani tarimana tu, ḡauḡau ai Barau bene noḡia, be kara bekiraḡirini guruḡari maki bene vaḡa-vanaḡiri e bene kiraḡi-foforiri.

¹⁴ Korana bema au garo boruri ai aguruḡani tu, au iaukagu moḡo eḡurigurini, a au ḡegu tuḡamaḡi ai tu asi atuḡamaḡi-doḡarini au tu kara akiraḡirini.

¹⁵ Be kara toma aveiani? Au tu iaukagu ḡenana bana ḡauḡau, ema batuguḡamaḡi-fakaiani garonai maki bana ḡurigurini. Au iaukagu ḡenana bana mari, ema batuguḡamaḡi-fakaiani garonai maki bana mari.

¹⁶ Bema ḡoi iaukamu na Barau mari ai ovaḡa-raḡeani nai tu, kamara dabarai mo garo asi ribana tarimana “Amen” betoni, ḡoi Barau ovaḡa-namoani nuḡanai, ei? ḡia tu “Amen” asi bekiraḡiani, korana ḡia asi beribani ḡoi kara okiraḡiani.

¹⁷ Moḡoni, ḡoi na Barau tu otanikiu-ginikauani, senaḡi mo sevimu tarimari ḡeri veḡabidadama tu asi ovaḡa-kokorerini.

¹⁸ Au na Barau atanikiuani, korana au garo boruri ai tu aguruḡa-iakuni, ḡomi mabarami avanaḡimini.

¹⁹ Senaḡi ekalesia ḡurigurini ḡeraka-vegoḡoni nai, namona tu beḡe tuḡamaḡi-fakaiani garonai guruḡa imaima moḡo bana kiraḡiri, tarimarima tari bana vaḡa-ribari. Moḡesina tu namo, a garo boruri ai guruḡa 10,000 bakiraḡirini tu asi ḡena namo ta.

²⁰ Tarikakagu mabarami, mero misimisiri ḡeri tuḡamaḡi ḡenana asi boḡono tuḡamaḡi. A vei-rakava ḡeri reke ai tu mero raraka-rarakari ilailari ai boḡono iaḡo. Senaḡi tuḡamaḡi-fakai tu tau-doḡadoga kavana boḡono vei.

²¹ Buka Veḡa nuḡanai tu maiḡesi etoreato, “Vereḡauka ekirani,

“Tarima garori boruri na

ema gabu boru tarimari mururi na

au na maiḡeri tarima bavaḡa-guruḡarini.

Senaḡi moḡesi maki asi veḡata beḡe seḡaḡi-viniguni.”

²² Moḡesi naima garo boruri ai ḡeguruḡani tu, Iesu asi ḡevaḡa-moḡoniani tarimari moḡo ḡeri ai tu vetoḡa ta, a dia Iesu ḡevaḡa-moḡoniani tarimari ḡeri vetoḡa. Senaḡi Barau ḡena guruḡa ḡeperoveta-iaḡirini tu, Iesu ḡevaḡa-moḡoniani tarimari moḡo ḡeri, a dia Iesu asi ḡevaḡa-moḡoniani tarimari ḡeri. (Mai tu, garo boruri ai ḡeguruḡani tu, Iesu asi ḡevaḡa-moḡoniani tarimari na vevaḡa-kava ta asi beḡe ḡoitḡoani. Senaḡi Barau ḡena

guruḡa ḡeperoveta-iaḡirini tu, Iesu asi ḡevaḡa-moḡoniani tarimari na vevaḡa-kava beḡe ḡoitaḡoani).

²³ Bema ekalesia mabarami gabu sebonai ḡoraka-vegogoni, benamo mabarabarami garo boruri boḡo guruḡani, ma nuḡanai tu ḡomi fakami ai asi ribana tarimana ta o Iesu asi evaḡa-moḡoniani tarimana ta bema raka-toḡani nai, bekirani, “Ḡomi tu debami beḡe rakava, boḡo babo!” betoni.

²⁴ Senaḡi bema mabarami boḡo perovetani nuḡanai, ḡomi fakami ai Keriso asi evaḡa-moḡoniani tarimana ta o asi etuḡamaḡi-fakani tarimana ta bema raka-toḡani nai tu, ḡomi mabarami na Barau ḡena guruḡa ḡoperoveta-iaḡiani guruḡari na mai tarima loruna begwanuani, benamo beribani, ḡia tu vei-rakava tarimana, ema mabarami na boḡo ḡita-viriḡiani.

²⁵ Mo tarima ḡena tuḡamaḡi vekuretoḡari mabarari boḡo kiraḡi-foforirini, benamo bevetui-tarini, Barau betoma-rakariḡo viniani, bekirani, “Moḡoni, Barau tu ḡomi ḡesi etanuni.”

Toma-rakariḡo veiḡari roroḡotori

²⁶ Mogesina naima, tarikakagu, guriguri boḡo raka-vegogoni nai, ḡomi mabarami tata ma ḡemi ḡauvei. Tari tu mari beḡe ḡabini, tari tu beḡe vevaḡa-ribani, tari tu garo boruri ai beḡe guruḡani, tari tu Barau ḡena guruḡa beḡe vaḡa-foforirini tarimari, tari garo boruri ai beḡe guruḡani guruḡari beḡe vaḡa-vanaḡirini e beḡe kiraḡi-foforirini. Dagara mabarari tu ekalesia ḡeri vegabidadama vaḡa-tubuna ḡana moḡo boḡono veiri.

²⁷ Bema tarima ta garo boruri ai eguruḡani nai, tarima ruarua o toitoi ma beḡene guruḡa. Namona tu tarima toitoi na beḡene guruḡa-karua, senaḡi tauri toitoi vaḡa-sebo asi beḡene guruḡa. Ta bene guruḡa-ḡosi murinai vauro ta ma bene guruḡa, ma ta maia. Benamo garo boruri ai beḡe guruḡa-ḡosini murinai tu, ekalesia ta na moḡesi guruḡa bene vaḡa-vanaḡiri, bene kiraḡi-foforiri.

²⁸ Senaḡi bema vaḡa-vanaḡi tarimana ta asiḡina nai tu, mo garo boruri ai eguruḡani tarimana tu rubu nuḡanai asi bene guruḡa. Gereḡana tauḡena vau bene guruḡa-vevini, ema Barau bene vaḡa-guruḡaia.

²⁹ Barau ḡena guruḡa ḡeperoveta-iaḡirini tarimari ruarua o toitoi beḡene peroveta, ma kotari na tu moḡeri guruḡa beḡene vetau-ginikauri.

³⁰ Bema Barau ḡena guruḡai etanu-tarini tarimana ḡenai efoforini, bene kiraḡi-foforia ḡana nai, eguruḡa-guineni tarimana ḡena guruḡa tu bene vaḡa-maḡoa.

³¹ Namona tu ḡomi seboni seboni boḡono peroveta, be kara ḡokiraḡiani mabarari beḡene riba ema mabarari beḡene launaḡiri.

³² Barau ḡenana peroveta guruḡari edoḡaririni tarimana tu, moḡeri guruḡa ḡena urai vau bekiraḡirini.

³³ Barau tu dia vei-veḡonu veḡonu evaḡa-ḡoraiani Barauna, senaḡi ḡia na tu maino evaḡa-ḡoraiani Barauna.

Ekalesia doḡorori mabarari ḡeveini kavana,

³⁴ ḡomi ḡemi vavine maki ekalesia vegogori ai asi beḡene guruḡa, korana ḡia tu asi ḡeri maoro ḡia beḡe guruḡani. Senaḡi ḡia tu Mose ḡena taravatu na ekiraḡiani ilailanai beḡene tanu tau gabureri ai.

³⁵ Bema dagara tari ḡeribari beḡe toni nai tu, ḡaraḡori numai vauro beḡenea danaḡiri. Korana vavine ekalesia vegogori ai beḡe guruḡani tu ma maiakana.

³⁶ Ḡomi na mai guruḡa asi ḡoḡabi-raḡeani? Barau ḡena guruḡa tu ḡomi ḡemina erefoto ba? Ba Barau ḡena guruḡa na tu ḡomi moḡo ema ḡoitaḡomito, ei?

³⁷ Bema tarima ta tauḡena evetuḡamaḡini ḡia tu peroveta ema ḡia tu Iauka Veaḡa na evonuvonu-raḡeto etoni tarimana tu, ḡomi mai atore-vinimimi guruḡari bene ḡabi-raḡeri, bene kira, mai tu moḡoni Vereḡauka ḡena taravatu guruḡari.

³⁸ Bema tarima ta maiḡeri guruḡa betuḡamaḡi-fitoḡarini, Barau na ḡia maki betuḡamaḡi-fitoḡaiani.

³⁹ Moḡesi naima, tarikakagu, peroveta uradikadikana tu boḡono vei, ma garo boruri ai guruḡa-iaḡiri ai tu asi boḡono vekiraḡoi.

⁴⁰ Senaḡi dagara mabarari boḡono ḡauvei-iaḡi ginikauri, ema dabara korikoriri ai boḡono veiri.

15

Iesu ḡena variḡisi-ḡenoḡoi

¹ Tarikakagu mabarami, au aurani, mo Vari Namona, ḡomi ḡemi aḡobata-iaḡiato moḡa, ḡemi tuḡamaḡi ai ma navaḡa-variḡu ḡenoḡoia. Mai Vari Namona ḡomi na tu ḡoḡabi-raḡeato, ema ḡomi tu mai Vari Namonai ḡoruḡa-gwaḡiḡini.

² Bema au na mo aḡobata-vinimito guruḡana moḡa roḡo boḡo ḡabi-gwaḡiḡiani nai, ḡomi tu mo Vari Namona ḡenana Barau na bevaḡa-maḡurimini. A bema asiḡina nai tu, ḡomi na ḡovaḡa-moḡoni-kavaiato.

³ Vereḡauka ḡenana au na kara adoḡariato guruḡana tu, ḡomi ma akira-varamito. Mo guruḡa moḡa tu guruḡa giniguinena e guruḡa baregona. Mo guruḡa tu Buka Veaḡai ḡetoreato guruḡana ilailanai, ekirani: Keriso ḡita ḡera rakava bene ḡabi-vaḡiri uranai emaseto;

⁴ ma ḡeguriato, ma ḡaro vaḡa-toitoinai mase na ma evariḡisi-ḡenoḡoito, Buka Veaḡai ḡetoreato ilailanai.

⁵ Benamo Petero ḡenai evevaḡa-foforito, ma murinai tu ḡena mero gabanana ruarua (12) ḡeri ai maki.

⁶ Moḡa murinai tu veḡabi-dadama nuḡanai tarikaka mabarari sinau imaima (500) ḡevevogoto nuḡanai ḡeri ai efororito; tari varau ḡemaseto, a ḡutuma tu roḡo maḡuri.

⁷ Ma murinai tu Iakobo (o Iames) ḡenai efororito, ma murinai tu apostolo mabarari ḡeri ai maki.

⁸ Ma magona korikorinai tu, au, noḡa moḡo amaḡuri-rakavato tarimagu, ḡegu ai ema foforito.

⁹ Korana au tu apostolo mabarari ḡeri dokona korikori tarimagu, ma au tu asi ḡegu namo ta moḡo, tarimarima na au apostolo tarimagu ai beḡe kiragḡuni. Korana au na Barau ḡena ekalesia avaḡa-midigu midigurito-ḡoi, e alai-lausilausirito-ḡoi.

¹⁰ Senaḡi Barau ḡena namo e varevare-barai, au tu mai ḡegu apostolo tarimagu ai ama iaḡoto. Ema Barau ḡena namo e varevare-bara au ḡegu ai tu asi etore-kavaiato. Moḡoni, au na ḡauvei tu barego lelevaḡi aveiato, a apostolo kotari tu asiḡina. Senaḡi mo tu dia au tauḡegu ḡegu kokore ai moḡeri ḡauvei aveirito. Asiḡina. Mo tu Barau ḡena namo e varevare-barai kokore eviniguto, benamo mo ḡauvei aveirito.

¹¹ Moḡesina naima au aḡobatato o apostolo tari ḡeḡobatato, asi ḡena irau ta, korana vari tu sebona moḡo ḡaḡobata-iaḡiato, ma ḡomi na maki mo vari sebona, moḡa moḡo govaḡa-moḡoniato.

Ḡita ḡera variḡisi-ḡenoḡoi

¹² Senaḡi bema Keriso ḡaḡobata-iaḡiani nai, ḡakirani, Keriso tu Barau na mase na ma evaḡa-variḡisi ḡenoḡoiato ḡatoni, kamasi nai ḡomi fakami ai ḡomi kotari tu ḡokirani, mase tarimari tu asi ma beḡe variḡisi-ḡenoḡoini?

¹³ Bema mase na variḡisi-ḡenoḡoi tu asiḡi, moḡa tauna tu, Keriso mase na tu asi ma evariḡisi-ḡenoḡoito.

¹⁴ Ema bema Keriso mase na asi evariḡisi-ḡenoḡoito, moḡa anina, ḡai ḡema ḡobata tu asi tauri, ema ḡomi ḡemi veḡabidadama maki asi tauri.

¹⁵ Moḡesi tu ḡai beḡere ribama, Barau na asi eveiato dagarana ḡai na tu ḡakiraḡi-moḡoni moḡoni-kavaiani, ḡaḡofaḡofani. Korana ḡai na Barau varina ḡafuani, ḡakirani, Barau na Keriso mase na ma evaḡa-variḡisi ḡenoḡoiato ḡatoni nuḡanai, Barau na Keriso mase na tu asi evaḡa-variḡisi ḡenoḡoiato. Ma guruḡa moḡonina tu, mase tarimari mase na tu asi ma ḡevariḡisi-ḡenoḡoini.

¹⁶ Aba, bema mase tarimari mase na asi ma ḡevariḡisi-ḡenoḡoini, moḡa anina tu Barau na Keriso tu mase na asi ma evaḡa-variḡisi ḡenoḡoiato.

¹⁷ Ema bema Barau na Keriso mase na tu asi ma evaḡa-variḡisi ḡenoḡoiato, ḡomi ḡemi veḡabidadama tu asi aniri e ḡomi tu roḡo rakava nuḡanai ḡotanuni.

¹⁸ Ema mo deikara Keriso ḡevaḡa-moḡoniato tarimari ḡemaseto tu, rakava voina beḡe ḡabiani.

¹⁹ Ma bema mai tamaḡuri-taḡoni maḡurina ḡena namo moḡo uranai Keriso ḡenai tavetuḡamaḡikauni nai tu, tarimarima mabarabarari vefakari ai ḡita kika vetuḡara tu barego lelevaḡi.

²⁰ Senaḡi Keriso tu moḡoni mase na evariḡisi-ḡenoḡoito, ema ḡia tu ḡemaseto tarimari mabarari fakari ai ḡia tu evariḡisi-ḡenoḡoi guineto, ilailana ḡau ḡwaḡwari ḡeḡora-guineni kavana.

²¹ Mase tu tarima sebona, Adamu, ḡenana evesinato. Moḡa ilailanai variḡisi-ḡenoḡoi maki tarima sebona, Keriso, ḡenana evesinani.

²² Vaḡa-ilailana, tarimarima mabara-barari tu Adamu ḡenana ḡeiaḡomani, moḡa lorinai beḡe maseni veḡata; senaḡi Iesu Keriso ḡesi beḡe sebonani neganai, Barau na ma bevaḡa-maḡuri ḡenoḡoirini.

²³ Senaḡi ḡita mabarara tata ḡera ḡaro korikori loriri ai bita variḡisi-ḡenoḡoini: Giniguine tu Keriso, ḡia tu evariḡisi-ḡenoḡoi guineto. Ma ḡia ma beiaḡomani ḡaronai tu, ḡia ḡena tarimarima mabarari ma beḡe variḡisi-ḡenoḡoini.

²⁴ Maiġa murinai Keriso na Barau ġevetari-viniani iaukari ġeri veġitaġau e maoro ema seġuka mabarari asi ġeri kokore ai bevaġa-iaġorini e bevaġa-rakavarini, benamo Barau ġena Basileia o veġitaġau seġukana Tamana Barau ġimanai betore-kauani. Benamo tanobara dokona beiaġomani.

²⁵ Korana Keriso tu roġo bevereni, ġena veġitaġau tu betanuni roġo, beiaġoni mo, ġia ġevetari-viniani iaukari e tarimari mabarari ġia kwakuna fanafana gaburenai befana-taririni.

²⁶ Keriso na evetari-viniani dagarana ta, magona korikori ai vauro bevaġa-keto-moġovaġiani, tu mase.

²⁷ Korana Buka Veaġai tu iniġesi ekirani, “Barau na dagara mabarari ġia kwakuna gaburenai etorerito, mai tu ġena veġitaġau gaburenai etorerito.” Senaġi ekirato, “dagara mabarari ġia kwakuna gaburenai etorerito,” etato nai, Barau tu asi eiavi-kauato, korana tu Barau na dagara mabarari Keriso kwakuna gaburenai etore-toġarito.

²⁸ Dagara mabarari Keriso ġena veġitaġau gaburenai Barau na betorerini, moġa murinai tu Barau Natuna tauġena maia Barau ġena veġitaġau gaburenai bevetore-toġani. Moġo tauna tu, Barau na dagara mabarabarari bedebbarini.

²⁹ Bema varigġisi-ġenoġoi asiġina, mai tarima kotari ġemase-guineto tarimari urari ai babatiso ġeġabini tu kamasi beġe veini, ei? Ġia tu kara dainai ġemase-guineto tarimari urari ai babatiso ġeġabini? Betaġu ġia na varigġisi-ġenoġoi ġevaġa-moġoniani nai, mo veigġa ġeveiani.

³⁰ Ema ġai maki, kara dainai tu hora mabarari ai dori moġo ġevaġi-masemani senaġi roġo ġaġiġiraġeni, bema varigġisi-ġenoġoi asiġina nai tu?

³¹ Tarikakagu mabarami, moġoni, ġaro vanaġivanaġi au ġegu mase ġekiraġiani. Senaġi maiġa maki moġoni, ġomi na Iesu ġoġabi-raġeato nai, ġera Vereġauka Keriso Iesu ġoiranai au tu averere-baregoni.

³² Bema au vaġa-ilailana mai tarimarima ġeri tuġamaġi babobabori noġa moġo Efeso ai boga bairi rakavari kavana bara vaġa-vevaġiri, au tu kara dagara namona ġegu ai bere ġora? Bema varigġisi-ġenoġoi asiġina nai, au tu moġesi asi bara vei, asiġina ġinavaġi. Bema Barau na mase na asi ma bevaġa-varigġisi ġenoġoirani nai tu, maiġesi tara kira, “Siġaniġani ema siniuniu, korana boinani tu bita maseni bene.”

³³ Tarima ta na asi bene ġofami! “Tarima rakavari bita kakorini nai tu, ġera maġuri namori beġe rakava-kwaikwaini.”

³⁴ Gotataġa, veigġa iobukaiobukari ġoveiri, vei-rakava ġovaġa-dokoa. Korana ġomi kotari Barau tu asi ribami roġo. Mai tu ġomi beġene maiakami ġana agurugani.

Varigġisi-ġenoġoi tauġanina tu irauna

³⁵ Senaġi kotari tu beġe vedanaġini, beġe kirani, “Mase tarimari tu kamasi ma beġe varigġisi-ġenoġoini? Ma beġe varigġisini nai, tauġaniri tu aiġesina?”

³⁶ Babo! Goi na kara tano ai ovaroani tu, asi roġo etubuni mo, ovaroani dagarana bemaseni vau.

³⁷ Widi o dagara ta novaroa otoni nai tu, dia tauġani oġabiani, benamo ovaroani. Asiġina, ġoi na mo widi o kara novaroa otoni dagarana tu ġutuna ġuena oġabiani, ma ovaroani.

³⁸ Ma Barau tauġena na ġena ura ilailana mo widi o kara ġovaroani, moġeri tata tauġaniri korikori evinirini.

³⁹ Tauġani mabarari viriġori tu irauirau. Tarimarima viriġori irau, kwakuri vasivasi ġemaġurini dagarari vaġa-ilailana bai, boromakau, mamoe, e kotari viriġori irau, maġanikone viriġori irau ema manu maki viriġori irau.

⁴⁰ Guba dagarari tauġaniri tu ta, ma tanobara ġetanuni tarimari e dagarari maki irau. Guba tauġanina marevana ta ema mai tanobara tauġanina marevana maki ta.

⁴¹ Ġaro marevana ta ema ġue marevana ta, ema visiġu marevari maki irauri. Visiġu tata maki marevari irauirau.

⁴² Mase na varigġisi-ġenoġoi maki moġesi. Beġe guriani tauġanina tu beboragaġni, a Barau na ma bevaġa-varigġisi ġenoġoiani tauġanina tu asi ma beboragaġ-ġenoġoini.

⁴³ Beġe guriani tauġanina tu vetoġana asi namo, ema tarimarima na asi beġe urani ġitaġitana, a Barau na ma bevaġa-varigġisi ġenoġoiani tauġanina tu ma marevana. Beġe guriani nai tu, moiramoiri asi kokorena, a Barau na mo tauġanina ma bevaġa-varigġisi ġenoġoiani nai tu, ma seġukana.

⁴⁴ Geguriani nai tu, tanobara tauġanina, a Barau na evaġa-varigġisi ġenoġoiani nai tu, iauka tauġanina. Tanobara tauġanina tu ta etanuni, moġa lorinai iauka tauġanina maki ta etanuni.

⁴⁵ Buka Veāga nuānai ekirani, “Tarima guinena, Adamu, Barau na eveiato tu maāuri tarimani evaāga-iaāoato.” A Adamu magona, Keriso, tu maāuri bevinini laukanai evaāga-iaāoato.

⁴⁶ Tanobara tauānina tu eguinetu, a dia iauka tauānina. Tanobara tauānina murina na vauro, iauka tauānina eiaāomato.

⁴⁷ Tarima guinena, Adamu, tu tanobara āenana eiaāomato, Barau na tano kauna na eveiato, a tarima vaāa-ruaruana tu Keriso, guba na emariāoto tarimana.

⁴⁸ Barau na tano kauna na eveiritu tarimari tauāniri tu Adamu tauānina kavana, mo tu ma tano kauna na eveiato tarimana tauānina kavana, ema guba tauānina beāe āabiani tarimari maki Keriso tauānina kavana, mo tu guba na eiaāomato tarimana tauānina kavana.

⁴⁹ Initoma āita tu Barau na mo tano kauna na eveiato tarimana vetoāana kavana. A gabi vau mai guba na eiaāomato tarimana vetoāana ilailanai bita iaāoni.

⁵⁰ Tarikakagu mabarani, au na kara akiraāiani tauna tu maīāa, tarimarima, mai tanobarai āetanuni kavana, ma tauāniri, ma virigori, ema ma rarari tu, Barau āena Basileia nuānai asi beāe raka-toāani. Ema ma beborāāani dagarana tu tanu-vanaāi vanaāi Basileiana nuānai asi betanuni riba.

⁵¹ Goseāāi, vekuretoāa guruāana ta akira-varamini: Gita mabarara tu asi bita maseni, senaāi āita mabarabarara tauānira tu Barau na bekurevorini.

⁵² Mo tu asikauna moāo beāorani, noāa matara iaāataāo nunaāa ta vaāa-kafurina mo ma taraga-keorini kavana, asi kwaibona. Kibi dokona guruna beāāeni, benamo āemaseto tarimari ma beāe variāisi-āenoāoini, benamo tauāni asi ma beāe rakava-āenoāoini. Ma āita roāosi bitana mase tarimara maki tauānira beāe vekurevoni, mo tu tauāni variāuri bita āabirini.

⁵³ Korana mai ma beborāāani tauānina tu bene vekurevo, benamo asi ma beborāāani tauānina bene vetore-fofori, ema mai ma bemaseni tauānina tu bene vekurevo, benamo asi bemaseni tauānina ma bene vetore-rosi.

⁵⁴ Aba, mai ma beborāāani tauānina tu bene vekurevo, benamo asi ma beborāāani tauānina bene vetore-rosi, ema mai ma bemaseni tauānina tu bene vekurevo, ma asi ma bemaseni tauānina ma bene vetore-rosi. Mai dabarai Buka Veāai evetoretu guruāana bemoāonini,

“Mase tu Barau āena kokore na varau evaāa-darereato.

⁵⁵ Mase o, āoi āemu kokore tu aiāea?

Mase o, āoi na tarimarima ogwanurini garaāotana tu ainai?”

⁵⁶ Mase egwanurini garaāotana tu vei-rakava ema vei-rakava āena seāuka tu taravatu āenana eiaāomani.

⁵⁷ Senaāi Barau tatanikiuani, korana āita na āita āena Vereāauka Iesu Keriso āenana kokore evinirani.

⁵⁸ Moāa lorinai, tarikakagu, au na aura-vinimini tarimami, āemi veāabidadamai boāono ruāa-gigitari, tarima ta o dagara ta na asi bene vei-āareva āarevami, vanaāivanaāi Vereāauka āena āauvei boāono veia ma kokoremi āesi. Korana boāono riba, āomi āemi āauvei Vereāauka nuānai tu asi āovei-taāuiani, senaāi ma voimi.

16

Ierusalemā ekalesia tarimari vaāa-kavari āana moni vaāa-vegogo

¹ Maitoma tu Ierusalemā veāa o ekalesia tarimari vaāa-kavari uranai moni boāono vaāa-vegogo guruāari akiraāini. Mai guruāa tu Galatia ekalesia mabarari akirarito, beāene veia atato guruāana, āomi akira-varamini. Au aurani tu āomi maki mai veia boāono veia.

² Fura āarona giniginenai o Sandei vanaāivanaāi āomi tata tu āemi doāari ilailari ai moni ta boāono tore-toāia. Moāeri moni tu boāono tore-vegogo vegogori, be au baiāāosini āaronai tu, moni mabarana bene rovinatore, asi ma bisini vaāa-vegogo.

³ Ema au basi votuni nai tu, āomi na boāo vaāa-moāonirini tarimari bavimirini, benamo Ierusalemā āana beāe āabi-iaāorini. Beāe iaāoni nai tu, au na guruāa-fofori fefana ta maki batoreani, be beāe āwa-kauani.

⁴ Bema baāitaiani au tauāegu baiāāoni tu namo nai tu, au āesi baāa iaāoni.

Paulo āena ura Korinto āana bene iaāo

⁵ Au baiāāosini basi-āitamini, Makedonia tanona na nuāna na baraka-vanaāini nai, korana au tu Makedonia tanona nuāna na baraka-vanaāini bene. (Makedonia ekalesiari bana raka-āitari, senaāi monai asi batanuni, baraka-vanaāini moāo).

⁶ A au baiāgosini nai tu, atuḡamaḡini, ḡomi ḡesi kota roḡo bita tanuni banaḡu. Betaḡu faraka e iavara ḡueri maki maninai bita ḡabiani ḡomi ḡesi. Bere namo, ḡegu iaḡoiāḡo ai baura-vinirini dagarari tu ḡomi na boḡono vaḡa-kavaḡu.

⁷ Au tu asi aurani taimi misina moḡo ḡomi ḡesi bana tanu, benamo ma bana iaḡuimi maia. Au ḡegu tuḡamaḡi ai tu aurani, ḡomi ḡesi bitana tanu-mauka, senaḡi mo tu bema Barau na maoro beviniguni vauro.

⁸ A au tu Efeso ai batanuni mo Pentekoste ḡarona,

⁹ korana Barau ḡena ḡauvei bana veia dabarana tu varau bekeoa, be toma ḡegu ḡauvei tu barego lelevaḡi. Senaḡi tarimarima vovoka na maki ḡekouguni, ḡauvei asi bana veia ḡetoni.

¹⁰ Bema Timoteo beiaḡosini nai tu, boḡono nari-ginikaua, be ḡomi ḡesi betanuni nai, asi bene tanu-garigari. Ġia maki au kavana Vereḡauka ḡena ḡauvei eveiani.

¹¹ Moḡa lorinai tarima ta na asi bene ḡita-ḡuirāḡia. Senaḡi boḡono vaḡa-kavaia e maino ai boḡono tuḡua, au ḡegu ai ma bene ḡenoḡoi-iaḡoma. Korana au tu tarikaka kotari ḡesi ḡia ḡanariani.

¹² Ma tarikakara Apolos tu au na alaunaḡiato, tarikakara tari ḡesi be ḡomi ḡemi ai bene iaḡosi atato. Senaḡi ekirato, maitoma tu asi ilaila beiaḡosini, a ḡaro namona tai vauro beiaḡosini.

Guruḡa dokona

¹³ Tauḡemi boḡono venari-ginikau, ḡemi veḡabidadamai boḡono ruḡa-gwaḡiḡi, nuḡami beḡene gwaḡiḡi, boḡono kokore.

¹⁴ Dagara mabarari boḡo veirini nai tu, veuravini ai moḡo boḡono veiri.

¹⁵ Tarikakagu mabarami, ḡomi Stefanas ḡena numa tarimari mabarari tu ma ribami. Ḡomi ma ribami, ḡia na Iesu Keriso ḡeḡabi-raḡeato nai tu, ta maki roḡosi roḡo bere ekalesia Akaia nuḡanai. Ma ḡia tu veaḡa o ekalesia tarimari ḡeri ḡauvei ai ḡevekiraḡikauto, ḡevaḡa-kavarito. Moḡa lorinai anoḡimini,

¹⁶ ḡomi maki moḡesi tarimari garori boḡono seḡaḡi-viniri, ema ḡai ḡesi ḡeḡauveini e ḡevkwarāḡini tarimari mabarari maki.

¹⁷ Aiakuni, korana Stefanas e Fotunato ema Akaiko au ḡegu ai ḡeiaḡomato nai. Asi ilaila baiāgosini, ḡomi ḡesi bita tanuni nuḡanai, mai tauri toitoi na ḡomi gabumi ḡeḡabirito, moḡesi nai au nuḡagu egena-tarito.

¹⁸ Ema ḡia na au nuḡagu ḡevaḡa-iaku ḡenoḡoiato, ema ḡomi maki nuḡami ḡevaḡa-iaku ḡenoḡoirito. Moḡesi naima ḡia tu boḡono ḡabi-raḡeri.

¹⁹ Asia ruburi na ḡomi ḡemi vevaḡa-namo ḡetuḡuni. Akwila e Priskila na ema ekalesia ḡia ḡeri numai ḡetanuni mabarari na nuḡari mabarari ḡesi ḡevaḡa-namomini Vereḡauka aranai.

²⁰ Tarikaka mabarari na ḡevaḡa-namomini. Ḡomi maki karomi tata vetarikaka verauna na boḡono vaḡa-namori.

²¹ Au Paulo ḡimagu na mai vevaḡa-namo guruḡari atorerini.

²² Bema tarima ta na Vereḡauka asi eura-viniani tu, ḡia iatanai rakava baregona bene tanu mo vanaḡivanāḡi. Gera Vereḡauka o, noiaḡoma.

²³ Gera Vereḡauka Iesu Keriso ḡena namo e varevare-bara ḡomi ḡemi ai bene tanu.

²⁴ Au ḡegu veuravini ḡomi ḡesi bene tanu. Keriso Iesu ḡenana ḡita tu doḡoro sebona tarimara.

PAULO ĜENA TORETORE VAĜA-RUARUANA KORINTO EKALESIARI ĜERI

2 Korinto vaĝa-foforina guruĝari

Mai fefa vaĝa-ruaruana tu vevaĝa-gwaĝiĝi fefana Paulo na etoreato. Paulo na mai fefa tu Makedonia na Korinto ekalesiari etore-vinirito. Mai fefa tu laĝani 55 ema 57 fakari ai etoreato, mo tu Iesu maki emaseto murinai vau.

Mai fefa nuĝanai siri baregori tu karoa 1:3-4 ema 5:18.

Paulo na mai fefa etoreato korana tari tu maiĝeri: 1) Ĝofaĝofa tarimari na ĝia ĝena apostolo ĝauveina ĝevaĝa-rakavaia ĝetato-ĝoi moĝeri guruĝari eveito. 2) Ierusalemaj Barau ĝena tarima veaĝari ĝetanuni moĝeri ĝeri moni tari beĝene tore-vegogo etato (9:1-5). 3) Mo ĝena fefa ĝiniguinena monai mo vei-rakava tarimana ma beĝene ĝabi-raĝea e beĝene ura-vinia etato (2:5-11).

Paulo na mai fefa tu maiĝesina eboioĝaiato:

1. Ma veĝabi-sebona ĝenoĝoi guruĝari - karoa 1-7
2. Ierusalemaj ekalesiari varevare viniri guruĝari - karoa 8-9
3. Korinto nuĝanai apostolo tarimari ĝofaĝofari na Paulo ĝena apostolo ĝauveina ĝekira-rakavaiaio nai, Paulo tauĝena evekiraĝi-maĝatato guruĝari - karoa 10-13

¹ Au Paulo, Barau ĝena ura lorinai Keriso Iesu ĝena apostolo ai evaĝa-iaĝoguto, ema ĝita tarikakara veĝabidadama nuĝanai Timoteo ĝesi ĝemana mai fefa eiaĝosini.

Ĝomi Barau ĝena ekalesia Korinto nuĝanai, ema veaĝa tarimami mabarabarami, Akaija tanona mabarana nuĝanai ĝotanuni tarimami, ĝemi atore-vinimini.

² Barau ĝita Tamara ema Vereĝauka Iesu Keriso ĝerina varevare-bara ema maino ĝemi ai bene tanu.

Paulo na Barau etanikiuato

³ Barau sivaĝa-namoa, ĝia tu ĝita ĝera Vereĝauka Iesu Keriso Tamana. Ĝia tu vevetuĝaĝwa Tamana e vevaĝa-kava Barauna korikori.

⁴ Barau na ĝai ĝema midigumidigu e dabara doko nuĝari ai evaĝa-kavamani. Moĝesi naima ĝai na maki tarima kotari ĝeri meto ai baĝa vaĝa-kavarini riba, Barau na ĝai evaĝa-kavamani ilailanai.

⁵ Moĝoni, Keriso na eĝabiato midiguna ĝai ĝemai tu barego-lelevaĝi; ma ĝai ĝema vevaĝa-kava Keriso ĝenana maki barego lelevaĝi.

⁶ Ĝai baĝa midigu-midiguni tu ĝomi vevaĝa-kava ema vevaĝa-maĝuri boĝono ĝabia ĝana. Ĝai Barau na evaĝa-kavamani tu ĝomi vevaĝa-kava boĝono ĝabi ĝana. Ma mai vevaĝa-kava boĝo ĝabiani mainana ĝomi nuĝami bevaĝa-gwaĝiĝirini, benamo ĝai ĝamidigu-midiguni kavana midigumidiguri boĝo ĝabirini nai tu, boĝo kokoreni.

⁷ Ĝai ĝema vetuĝamaĝikau ĝomi ĝemi ai tu barego ĝatoreani, korana tu ĝaribani, ĝomi tu ĝai ĝesi tamidigumidigu-sebonani, ema vevaĝa-kava maki ĝai ĝesi taĝabi-sebonaiani.

⁸ Tarikaka mabarami, ĝai Asia tanonai aigesi meto ĝaĝoitaĝoto maki ĝaurani baĝana vaĝa-ribami. Ĝai Asia ai tu meto barego lelevaĝi ĝadoĝariato, ĝema gwada e riba mabarari maki ĝekorito, be ĝema tuĝamaĝi tu benamo, asi baĝa maĝurini, baĝa maseni.

⁹ Moĝoni, ĝai ĝema vemamiraĝi tu, ĝai beĝene vaĝi-masema dabarana tu varau ĝevaĝa-moĝoniato. Senaĝi asiĝina. Ĝai ĝemai moĝeri veĝa ĝeĝorato tauna tu, ĝai tauĝema ĝema kokore ai asi baĝana veĝabidadama, senaĝi mase na maki evaĝa-vaisi-raĝerini Barauna ĝenai moĝo baĝana veĝabidadama.

¹⁰ Ĝia na mase nuĝari na evaĝa-maĝurimato, ma roĝo ma bevaĝa-maĝurimani. Ĝai ĝema vetuĝamaĝikau tu Barau ĝenai ĝatore-kauani, goirai maki ĝia na ma bene vaĝa-maĝurima ĝana.

¹¹ Mo tu ĝomi na maki ĝauĝau ai roĝo boĝo vaĝa-kavamani nai. Benamo Barau na tarimarima vovoka ĝemi ĝauĝau dainai, ĝai bevaĝa-kavamani. Mo vevaĝa-kava tarimarima vovoka na beĝe ĝitaiani, benamo ĝai na mo namo ĝadoĝariani bakunai, mabarari na Barau beĝe tanikiuani.

Paulo ĝena boioĝa ekefoato

¹² Ĝai ĝema vekokoroku anina tu maiĝa: Ĝai nuĝamai ĝamamiraĝiani, ĝai ĝema maĝuri e veĝa mai tanobarai, o sikira, ĝema vegaragara ĝomi ĝesi tu dabara veaĝanai ema moĝoninai. Maiĝeri veĝa veaĝari ema moĝoniri tu Barau ĝena varevare-bara ĝenana ĝeiaĝosini, a dia tanobara tarimari ĝeri iauneganai ĝeveirito-ĝoi.

¹³ Ğai na ġomi fefa ġatore-vinimini tu dia fefa gwaġġgiri ġatore-vinimini. Asiġina. Ğai ġema fefai kara ġakiraġirini guruġari tu ġomi na boġo iavirini ema fefa tauri maki boġo tuġamaġi-doġaririni fefari moġo.

¹⁴ Moġoni, kotuna varau ġotuġamaġi-doġarimato. Ema atuġa-maġini, gabi vau boġo tuġamaġi-doġari korikorimani. Benamo Iesu Vereġauka beġenogoini ġaronai, ġomi na ġai boġo vaġa-raġemani, ġai na ġomi baġa vaġa-raġemini kavana.

¹⁵ Au ariba-maoroto, ġai boġo riba-ginikaumani ema ġemai boġo tuġamaġikauni naima, au na boioġa aveiato tu banasi rakaġita-ġuinemi, be vaġa-ruarua ġomi bana vaġa-kavami.

¹⁶ Au ġegu boioġa ġuina tu Makedonia ġana baiaġoni nai, banasi raka-ġitami ema Makedonia na ma baġenogoini nuġanai maki, ma banasi raka-ġitami atato. Ma manina na vau Iudea ġana baiaġoni nai, au ġegu iaġoiġo ai beġene vaġa-kavagu farefareri tari boġono vinigu vauro boġono tuġugu.

¹⁷ Ğomi ġotuġa-maġini, au tu dia nuġagu mabarana ġesi maġesi aboioġato ei? Ba ġomi ġotuġamaġini, au tu mai tanobara maġurinai roġo ġetanuni tarimari ġeri veiġa na aiaġoni, be murugu na tu, "Oi, oi" atato, a nuġagu gabigabinau tu "Asiġina, asi baiaġoni," atato.

¹⁸ Barau guruġa moġoninai moġo etanuni kavana, ġai maki moġesina; ġomi ġemi ai vari ġaġobata-iaġiani nai, dia murumai tu "Oi" ġatoni, ma nuġamai tu "Asiġi" ġatoni.

¹⁹ Korana Barau Natuna, Iesu Keriso, ġomi fakami ai au, e Silas, ema Timoteo, na ġaġobata-iaġiato-ġoi tu dia muruma na moġo ġakirato-ġoi, "Iesu varina tu Oi, moġoni," ma nuġama gabigabiri na tu "Asiġi, ġofaġofa" ġatato-ġoi. Asiġina. Ğia ġena maġuri nuġanai tu "Oi, moġoni" moġo etanuni vanaġivanaġi.

²⁰ Barau ġena kiraġitore mabarari eveirito tu "Oi moġoni" moġo, Keriso ġena maġuri nuġanai ġemoġonito. Moġesi nai ġai na Keriso ġenana Barau ġavaġa-raġe-baregoani, ġakirani, "Oi, mo tu moġoni" ġatoni.

²¹ Ğomi ema ġai tu Barau taġena na evaġa-kokorerani e evaġa-ruġa gwaġġirani Keriso ġena maġuri nuġanai. Ğia na eġabirato, evaġa-veaġarato,

²² ema evaġa-moġonirato, ġita tu ġia ġena tarimarima, ġena vetoġa o maka maki ġita ġerai etoreato, ema ġita lorura ġutunai ġia Iaukana etore-toġaiato, mo Iauka ġenana ġita evaġa-riba ginikaurato, ġia ġena vevaġa-namo mabarana maki vauro bita ġabiani veġata.

²³ Barau ma ribana mai kara akiraġirini tu mabarari moġoni, e au nuġagu o lorugu ġutuna maki ġia ma ribana; au mo Korinto ġana asi aiagosito tauna korikori tu maġa: Au asi aurato, ġomi ġemi vei-rakava banasi kiraġi-fofori fororiri, benamo monana ġomi nuġami bana vaġa-metori.

²⁴ Au tu dia ġomi ġemi vere, be ġomi ġemi mani veġabidadama nuġanai tu ġai na kara baġa kiraġirini veiġari moġo boġono veiri. Asiġina. Mai tu ġomi ema ġai taġauvei-sebonani, ġomi boġono iaku tuġamaġinai. Korana ġomi mani tu taugemi ġemi veġabidadamai lorinai ġoruġa-gigitarini.

2

¹ Moġesi naima nuġagu aroriato akirato, asi ma banasi raka-ġitami, korana bavaġa-guruġa gwaġġimini, benamo nuġami beġe metoni ġarina.

² Korana bema au ġegu guruġa na ġomi nuġami beġere vaġa-metori nai, au tu dei na ma beġere vaġa-iakugu? Korana au boġoro vaġa-iakugu tarimami tu varau nuġami bavaġa-metori.

³ Moġesi naima au na mo fefa gwaġġina moġa atore-vinimito. Au asi aurato, au bana iaġosi tu, boġo vaġa-iakuguni tarimami na au boġono vaġa-nuġa midigumidigu, korana au ma ribagu au aiakuni gabunai tu ġomi maki au ġesi, be taiaiku-sebonani.

⁴ Moġoni, au nuġagu tu ma metona ġesi ema ġegu vetuġamaġi maki ebarego-rakavato e ataġito maki, mo fefa ġomi ġemi atoreato-ġoi nai. Mo fefa gwaġġina atore-vinimito tu dia ġomi nuġami bana vaġa-metori ġana. Asiġina. Au na mo fefa moġesina atore-vinimito anina tu, au aurato ġomi boġono riba, au na ġomi tu auravini-rakavamini.

Vei-rakava tarimana ġena rakava boġono tuġamaġi-fitoġaia

⁵ Bema ġomi ta na nuġa-midigumidigu evaġa-ġoraiani nai, au mo gabu ai tu asi ġegu nuġameto. Aba, gabu tari tu asi aiaku-iaġirito, senaġi ġomi mabarami tu nuġameto barego evinimito, o sikira, ġomi ġutuma, korana au asi aurani, ġomi ġemi ai mo veiġa guruġana bana kiraġi-meto lelevaġia.

⁶ Ğomi ġutuma na mani tarima na mo veiġa eveiato voina metona baregona ġoviniano, ma mo tu ġenai ilaila be benamo, meto asi ma boġono vini-lelevaġia.

⁷ Ma toma tu ġena rakava boġono tuġamaġi-fitoġaia ema boġono launaġia kekei. Asi namo tuġamaġi midigumidiguna na mai tarima bevaġa-ketoani ġena veġabidadama ġenana.

⁸ Moġesina naima, au na ġomi anoġimini, mai tarima boġono kiravara-ginikaua, ġia tu moġoni ġoura-viniani.

⁹ Au na mo fefai atore-vinimito korana aurato, ġomi bana riba-ginikaumi, moġoni au na avaga-ribamito dagarari mabarari ġokorana-iaġi korikoririni ba?

¹⁰ Bema ġomi na tarima ta ġena rakava ġotugaġi-fitoġaiati tu, au na mo tarima ġena vei-rakava maki atuġamaġi-fitoġaiati. Ma bema rakava ta au na atuġamaġiato, mo rakava tu Keriso ġoiranai au na varau atuġamaġi-fitoġaiato ġomi ġemi namo uranai.

¹¹ Moġesi aveito anina tu, Satani na ġita beġofarani, benamo mo meto misina bevaġa-barego lelevaġiani garina. Korana Satani eġauveini dabarari ġita tu ma ribara.

Paulo ġena ura baregona Tito bene doġaria

¹² Troas vanuġana ġana aiaġoto, Keriso Varina Namona bana vari-fiua ġana. Au Troas vanuġanai aragasito, benamo ariba-maoroto, Vereġauka na mo vanuġai Vari Namona bana fiua ġatama-bokana tu ġegu ekeoato.

¹³ Senaġi au nuġagu ai maino tu asi aġabiato-ġoi, nuġagu evekwaraġito-ġoi, korana au tarigu Tito Troas ai tu asi adoġariato. Moġesi naima Troas tarimari aġabi-tuġurito moġo, benamo Makedonia ġana ma aiaġoto.

Keriso ekokoreto lorinai ġita takokoreni

¹⁴ Barau atanikiu-viniani, korana vanaġivanaġi ġia na ġena seġuka kokorenai Iesu Keriso ġena maġuri nuġanai ġai eġori-kaumani. Benamo ġai ġemana Keriso varina tu noġamo muramura bonana namona na tanobara mabarana ġeġabiani, benamo ġeribaiani.

¹⁵ Moġoni, Barau ġoiranai ġai tu Keriso varina bonana namona, Barau na rakava ġenana evaġa-maġuririto tarimari fakari na ema vei-rakava tarimari mase dabaranai ġerakani tarimari fakari ai.

¹⁶ Mase dabaranai ġerakani tarimari ġeri, ġai tu mase boraġari bonari, mase bevaġa-ġoraiani dagarana. A Barau na evaġa-maġuririto tarimari ġeri ai, ġai tu maġuri muramura bonana namona, maġuri evaġa-ġoraiani dagarana. Senaġi dei na mai ġauvei baregona beveiani riba?

¹⁷ Ġai dia tarima tari kavana, be Barau ġena guruġa ġeġobata-iaġiani tu moni beġene doġari ġana; a ġai tu dia Barau ġena guruġa ġaġobata-iaġiani tu moni na beġene voima ġana. Asiġina. Ġai tu Barau na etuġumato, mai ġauvei baġana veia etato. Ġai tu Keriso ġesi ġasebonato, ma Barau ġoiranai ġai tu nuġama maoro e moġoni ai Barau ġena guruġa ġakiraġiani.

3

Taravatu e Iauka

¹ Ġai mai guruġa ġakiraġirini tu, ġai tauġema moġo ma ġavevaġa-raġe ġenoġoini, ġakirani, “Ġai tu moġoni vei-jobukaiobuka tarimama korikori,” gatoni ba? Ba tarima kotari ġeveini kavana ġaurani tarimarima na ġema vevaġa-moġoni fefana ta ġomi ġemi beġene torea, beġene kira, “Ġai tu tarima namoma, be boġono gabi-ragama.” O ġomi na ġai boġono ġabi-raġema uranai ġema vevaġa-moġoni fefana ta boġono torea ġatoni?

² Ġomi manġemi tu ġai ġema fefa, ġai vaga-moġonima fefami, ġai lorumai Keriso na eberarito, ma tarimarima mabarari na ġeribamini ema ġeivimini.

³ Ġomi ġemi maġuri na evaġa-fofori ginikauani, ġomi tu Keriso ġena fefa, ġai ġema ġauvei ġenana eberamini o etoremni, (ma tarimarima na ġeiviani). Ġomi tu Keriso ġena fefa, dia bairo na eberamito fefami, senaġi maġuri vanaġivanaġi Barauna Iaukana na eberamito fefami. Ma ġomi Keriso na tu dia fore lefalefari iatari ai ebera-kaumito, senaġi ġomi tu tarimarima loruri ai ebera-toġaiato.

⁴ Ġai na maġeri guruġa ġakiraġirini, korana ġai tu Keriso ġenana ma ġema tuġamaġikau Barau ġenai. (Korana ġia na evaġa-kavamani ġena ġauvei veiveinai).

⁵ Aba, ġai tauġema ġereġama na maġeri veġa tu asi ilaila baġa veirini. Moġesi naima ġai na dagara ta ġavaġa-ġoraiato tu asi gatoni. Asiġina. Ġai tu Barau na ġereġana na moġo kokore ema riba ġai evinimani nai mai ġauvei ġaveirini.

⁶ Barau na kokore ema riba evinimani nai, ġia ġena kiragiġore o ginitaġo variġuna ġavarifuani. Mo tu dia taravatu bukanai ġetorerito dagarari ġavari-fiurini, asiġina, ġai tu Iauka Veaġa na tarimarima ġeri maġuri ai kara eveiani ġavari-fiurani. Korana taravatu bukanai etorerito vevaġa-naġiri na tu tarima ġevaġi-maserini, bema asi ġekorana-iaġiani nai; senaġi Barau Iaukana na tu tarimarima maġuri evinirini.

Barau ġena ginitaġo variġuna marevana baregona

⁷ Ġoseġaġi, Mose na Barau ġena taravatu tu Isaraela tarimari evaġa-ribarito-ġoi, moġeri na tu mase maki ġevaġa-ġoraiato-ġoi. Mo taravatu moġeri tu Barau na fore iatanai

eberarito, ma marevari mamari tu barego rakava. Moġeri taravatu Barau na fore ai eberarito dagarari Mose na eġabi-iaġomarito-ġoi nai, Mose tu ġoirana maki emamoto-ġoi, be Isaraela tarimari Mose ġoiranai maki asi ġeboġekau-maukato-ġoi, korana mo mareva mamana na matari efai-fitogarito-ġoi nai. Senaġina mo taravatu mamari marevana baregona moġa tu asikauna ma erekwarekwato-ġoi.

⁸ Bema taravatu mamana marevana baregona tu moġesi neganai, Barau Iaukana ġena ġauvei mamana marevana ema seġukana tu barego lelevaġi.

⁹ Bema mase maki evaġa-ġoraiani ġauveina mamana marevana tu barego, vei-iobukaiobuka evaġa-ġoraiani ġauveina mamana marevana ema seġukana tu barego lelevaġi.

¹⁰ Toma taravatu mamana marevana baregona moġa tu asi marevana, korana Barau Iaukana mamana marevana ema seġukana tu barego lelevaġi.

¹¹ Ma bema Mose na mo asi betanu-maukani taravatuna moġa eġabi-iaġomaiato, mamana marevana tu barego nai tu, betanu-vanaġi vanaġini dabarana mamana marevana ema seġukana tu barego lelevaġi veġata.

¹² Ġai tu mai dabara variġuna o ginitaġo variġuna ġenai ġavetuġa-maġikauni, naima asi ġagarini, ma kokorema ġesi ġakiraġiani.

¹³ Ġai tu dia Mose kavana, be ġoirama ġakou-ġaurini. Mose tu ġoira kouġau dabuġana na ġoirana ekou-ġauato, korana Isaraela tarimari na ġia ġoirana na mo mama marevana erekwa-rekwato-ġoi moġa asi beġene ġeġitaia ġana.

¹⁴ Senaġi Isaraela tarimari nuġari e ġeri tuġamaġi Barau na evaġa-mukunarito. Korana tu mo ġaro na beiaġoma mo maitoma, mo kouġau dabuġana ġia nuġari e ġeri tuġamaġi evaġa-mukunarito dabuġana tu roġo etanuni, be ginitaġo guinena bukana ġeiaviani nai, asi ġetuġamaġi-doġariani. Mo ġia nuġari ema ġeri tuġamaġi ekou-ġaurini dabuġana tu Keriso ġesi beġe sebonani vauro bevekeo-fakani.

¹⁵ Toma maki Mose ġena taravatu guruġari ġeiavirini nai, ġia nuġari tu kouġau dabuġana na ekou-ġauani.

¹⁶ Senaġi tarima ta betuġamaġi-kureni, benamo Vereġauka ġenai ma beiaġoni tarimana ġenana mo kouġau dabuġana tu bekoki-fitogaiani.

¹⁷ Ma mai Vereġauka tu Iauka Veaġa ekiraġiani. Be Vereġauka Iaukana ainai eġauveini gabuna, ġeġabi-raġeani tarimari tu dagara ta na asi ebarubarurini. Asigina, ġia tu fakai ġetanuni.

¹⁸ Ma ġita ġoirara tu kouġau dabuġana na asi kouġau, be Vereġauka mamana e marevana baregona ġita ġerana veġiana noġa efoforini, tarimarima na ġeġitaiani. Vereġauka tu Iauka Veaġa, ma ġia ġenai mo mama e marevana baregona eiaġomani. Monana esenisirani Vereġauka kavanai tiaiġoni, ema ġia mamana e marevana barego lelevaġina ġita maki evini-vanaġi vanaġirani.

4

Iauka farefarena gwaġutu nuġanai

¹ Barau ġena vevetuġaġwai moġo mai ġauvei ġai evinimato. Moġa lorinai ġai tu asi ġatuġamaġi-moirani mai ġauvei veiveinai.

² Ġai tu maiaka veigari vekuretoġari, tarimarima na asi ġeġita-learini veigari, tu ġiaiaġuirito. Ema ġai tu asi ġoġofogaiani e Barau ġena guruġa anina maki ġai na tu asi ġakefoani. Asigina. Ġai na Barau ġena vari moġonina tu tauna korikori moġo ġakiraġi-fofori ġinikauani. Monana tarimarima beġene riba, ġai tu ma moġonima ġesi Barau ġena ġauvei ġaveiani ġia ġoiranai.

³ Senaġi bema ġai na mai Vari Namona ġavari-fiuni maigra vekuretoġa nai tu, mai vari maigra tu mase koufanai ġerakani tarimari moġo ġeri ai vekuretoġa.

⁴ Maigari tarima, Keriso asi ġevaġa-moġoniani tarimari, tu mai tanobara barauna arana Satani na ġeri tuġamaġi evei-mukunarito, naima mai Vari Namona mamana emamani tu asi ġeġitaiani. Mai Vari Namona mamana maigra tu Keriso mamana marevana baregona emamani. Ma mai Keriso maigra tu Barau vetoġana korikori.

⁵ Ġai tu dia ġai tauġema varima ġafurini. Asigina. Ġai na tu Iesu Keriso ġaġobata-iaġiani, ġakirani, Keriso tu Vereġauka korikori. Ma ġai tu ġomi ġemi vetuġunaġi tarimamai ġavevaġa-iaġoni Iesu ġagubakauani lorinai.

⁶ Korana Barau tovtovonai ekirato, “Mukuna furufuru nuġana na nemama-rovorovo,” etato. Ma mo Barau sebona na ġai nuġamai ema vaġa-mama rovorovoato korana tu, Barau mamana baregona Iesu Keriso ġoiranai emamoto moġa bene vaġa-foforia, benamo baġana ribaia e baġana tuġamaġi-fakaia ġana.

⁷ Senaḡi mai farefare namo vedaureana tu ḡai tauḡanima nuḡanai maiḡea, mai tauḡanima tu noḡa tano na ḡevairini gwaḡuturi, ma beḡe korini, monana tarimarima mabarari na beḡene ḡitaia, ma beḡene riba maki, mai seḡuka barego lelevaḡina ḡai ḡemai maiḡa tu Barau ḡenana eiaḡomani, ma dia ḡai ḡemana.

⁸ Gai tu reketa-reketa na ḡeḡaru-ḡeḡeraḡimani, ḡevaḡa-midigu midigumani e meto maki barego ḡevinimani, senaḡi ḡema kokore tu asi ekorini. Garo kotari tu ḡadaradarani, asi ribama kara ma baḡa veiani, korana maḡuri tu gwaḡiḡi, senaḡi ḡema tuḡamaḡikau Barau ḡenai tu asi emoirani veḡata.

⁹ Tarimarima na asi ḡeura-vinimani, ḡevaḡa-midigumidigu baregomani, senaḡi Barau tu ḡai sevisevimai moḡo etanuni, asi eiaḡuimani; semo na ḡekwari-ketomani, senaḡi asi ḡamaseni.

¹⁰ Iesu emaseto, mo mase moḡa tu vanaḡivanaḡi ḡai tauḡanimai ḡaḡwarakao-rakaoani. ḡaribani, ḡai maki, Iesu ḡevaḡi-maseato kavana, beḡe vaḡi-masemani. Moḡesi eḡorani korana tu, Iesu ḡena maḡuri maki vanaḡivanaḡi ḡai tauḡanima na bene fofori, be tarimarima na beḡene ḡitaia.

¹¹ Gai roḡo maḡuri ḡatanuni apostoloma tu, vanaḡivanaḡi beḡene vaḡi-masema ḡetoni, Iesu varina ḡakiraḡiani ḡaramanai. Mai veiḡa eḡorani tauna korikori tu, Iesu ḡena maḡuri, (mo tu Iesu emaguri-ḡenoḡoito mo maḡuri moḡa), seḡukana ḡai tauḡanima na bene fofori, be tarimarima na beḡene ḡitaia ḡana.

¹² Moḡesi naima mase ḡena ḡauvei tu ḡai (apostolo) ḡemai eveiani, senaḡi maḡuri tu ḡomi ḡemi maḡuri nuḡanai eḡauveini.

¹³ Buka Veḡaḡi ekirani, “Au na Barau avaga-moḡoniato, moḡesina naima aguruḡato.” ḡai maki mo vegabidadama sebona moga nugana naima gakirani, Barau gavaḡa-moḡoniani nai ḡaguruḡani.

¹⁴ Korana ḡai ribama, Iesu Vereḡauka mase na evaḡa-varigisi ḡenoḡoito Barauna na ḡai maki ma bevaḡa-varigisi ḡenoḡoimani Iesu kavana, benamo ḡai ema ḡomi, mabarara beḡabi-iaḡomarani ḡia goiranai bea vaḡa-ruga-tarirani.

¹⁵ Gai na midigumidigu e meto ḡaḡabirini tu, ḡomi na namona boḡono doḡaria ḡana, ema monana tarimarima ḡutuma gorogoro na Barau ḡena namo ema varevare-bara beḡene doḡaria. Benamo mai Barau ḡena namo ema varevare-bara dainai, tarimarima ḡutuma na Barau beḡene tanikiu-vini-baregoa e ḡia marevana e mamana baregona beḡene vava-raḡea.

Veḡabidadamai moḡo bitana tanu

¹⁶ Moḡa lorinai ḡai tu asi kota maki ḡatuḡamaḡi-moirani. Aba, tauḡanima tu eḡaukani, bemoira-iaḡoni, senaḡi iaukama tu ḡaro loriri ai evaḡa-varigurini.

¹⁷ Ema maiḡeri midigumidigu e meto misiri asikauna na beḡe raga-korini dagarari voiri beḡe foforini tu barego lelevaḡi. Barau na maiḡeri voiri tu marevana barego lelevaḡina, betanu-vanaḡi vanaḡini dagarana, bevinimani.

¹⁸ Moḡesi naima ḡai matama na tu dia toma ḡeḡorani matara na taḡitarini dagarari ḡaḡita-karakararini. Asiḡina. Gai matama na tu, toma matara na asi taḡitarini dagarari, ḡaḡita-karakararini. Korana toma matara na taḡitarini dagarari tu asikauna ma beḡe korini, senaḡi kara toma asi taḡitaiani dagarana tu betanu-vanaḡi vanaḡini, asi bekorini dagarana.

5

Guba tauḡanima e mai tanobarai tatanuni tauḡanima

¹ ḡai ribama, mai tanobarai ḡatanu-iaḡiani foutana o tauḡanima berakavani mase ai nai, gubai asi ḡima veiveina numana ta Barau ḡenana baḡa ḡabiani, tanu-vanaḡivanaḡi numana.

² Mai tanobara tauḡani numanai ḡatanuni tu ḡataḡitaḡini ḡaḡabaḡabani, korana midigu-midigu e meto barego ḡaḡoitaḡoni dainai. Be ḡai ḡema ura baregona tu, Barau na guba na beiaḡomani tauḡanima na nevaḡa-dabuḡama.

³ Korana guba tauḡanima na bedabuḡa-ḡaumani tarimarima kavana nai, ḡai tu dia iauka moḡo baḡa rakao-rakaoni ḡia goiranai gubai, senaḡi ḡai iaukama tu kouḡau initoma kavana.

⁴ Korana ḡai roḡo mai tanobara tauḡanima numanai ḡatanuni tu, ḡaḡabaḡabani e meto barego ḡevinimani. Maiḡa tauna tu, asi ḡaurani mai tanobara tauḡanima maiḡa ḡakoki-vaḡia o ḡamase ḡatoni. Asiḡina. Gai ḡema ura tu Barau na guba tauḡanima numana variḡuna na bene vaḡa-dabuḡa-ḡauma, be maḡuri tauḡanima na ma beḡe maseni tauḡanima moḡo gabuna bere borogita ḡatoni.

⁵ Barau tauġena na ġita tu mai maġuri variguna maiġa bitana ġabia ġana erovinatorerato. Moġesi naima ġia na Iauka Veaġa tu evini-guinerato. Barau na mai Iauka Veaġa evini-guinerato anina tu, ġita bitana riba-ginikau, tauġani variguri maki bevinirani.

⁶ Moġesi naima vanaġivanagi ġai nuġama tu gwaġigi, asi ġatuġamaġi-iauvoiauvoni. Ma ġai ribama, mai tanobara tauġanina numanai roġo ġatanuni nai tu, ġai Vereġauka ġesi vanuġa korikori gubai tu asi ġatanu-vegogoni.

⁷ Ġai vegabidadamai moġo ġatanuni, dia matama na ġaġitarini dagarari na ġeġori-kaumani.

⁸ Au mo bakira kavana, ġai tu asi ġagarini, ma tuġamaġikauma ġesi ġaurani, mai tauġani ġenana baġana veġita, benamo Vereġauka ġesi baġana tanu, Vereġauka etanuni vanuġanai.

⁹ Moġesi naima ġai ġema ura barego sebona moġo ġoiramai ġatoreani tu, ġia iauna moġo baġana vaġa-namoa. Mo tu mai tanobara tauġanina nuġanai baġa tanuni, o mai tanobara tauġanina numana na baġa raka-vaġini, benamo Vereġauka ġesi gubai baġa tanuni, ġai ġema ura tu, ġia iauna moġo baġana vaġa-namoa.

¹⁰ Korana ġita mabarara Keriso ġena Kota seana ġoiranai tu bita ruġa-rosini veġata. Monai ġita mabarara tata mai tanobara tauġaninai tatanuni nai, veġa namori o rakavari taveirini, maiġeri voiri ilailari bita ġabirini.

Keriso na Barau ġatanai evaġa-iaġorato

¹¹ Ġai ma ribama, Vereġauka tu ma garina, korana tu ġoiranai bita ruġa-tarini. Moġesi naima ġai na tarimarima ġasisiba-vinirini, beġene tuġamaġi-vekefo ġana. Ġai nuġama e ġema tuġamaġi kaması tu Barau ma ribana ginikau, ema au atuġamaġini, ġomi maki ġai nuġami ai ġoribamani.

¹² Maiġesi ġaguruġani tu, dia ġai tauġema ġomi ġoirami ai ġakirani, ġai tu moġoni vei-iobukaiobuka tarimama korikori. Asiġina. Maiġeri guruġa ġakira-varamini tauna korikori tu, ġai boġono veiavi-iaġima, be tanobara iaunegari e ribari ġevokokoroku-iaġirini tarimari boġono vaġa-veseri ġana. Maniġeri tarimarima tu matari na ġeġitarini dagarari ġevokokoroku-iaġirini, a tarimarima nuġari ai ġetanuni dagarari tu asi ġeġitarini.

¹³ Bema ġai tu ġababo-rakaoni gotoni nai, mo tu Barau ġena ġauvei ġaveiani dainai; o bema ġema tuġamaġi maoro nai, mo tu ġomi namo boġono ġabia ġana.

¹⁴ Ġai tu Keriso ġena veuravini na elaunaġi-naġimani, ema ġai moġoni ġariba-ginikauni, Keriso tu tarimarima mabarara ġera vei-rakava dainai emaseto. Moġesi naima, tarimarima mabarara maki ġia ġena mase ai tamase-vegogoto.

¹⁵ Keriso tu ġita tarimarima mabarara ġera vei-rakava lorinai emaseto naima, ġita inította tamaġuri-tanuni tarimara mabarara tu, dia ġita tata tauġera ġera ura loriri ai moġo bitana tanu. Asiġina. Ġita mabarara tu Keriso ġenai moġo bisini tanu, korana tu ġia ġita urarai emaseto, ma Barau na mase na ma evaġa-varigisi ġenogoiato.

¹⁶ Moġesina naima ġai na maitoma tarimarima tu dia tauġanina rekenai ġena maġuri ġaġitaiani. Aba, tovotovonai tu: Barau na Keriso maki tauġanina rekenai ġatuġamaġiato-ġoi, senaġi toma moġesi tu asi ġatuġamaġiani.

¹⁷ Moġesi naima bema tarima ta Keriso ġena maġuri nuġanai etanuni, mo tarima tu tarimarima varigü geragerana. Mo maġuri guinena etanu-iaġiato-ġoi moġa tu ekorito, ġia tu maġuri varigü geragerana eġabiato, ma mai maġuri varigunai etanuni.

¹⁸ Maiġeri dagara mabarari tu Barau na ġita ġera evinirani. Barau tavetari-viniato-ġoi, senaġi Keriso ġena mase ġenana ġia na ma eġabiraġe-ġenoġoirani. Ema ġai maki Barau na mai ġauvei evinimato, mo tu tarimarima baġana kira-varari, Barau na maino ġabigabina dabarana tu varau eveiato, be ġia ema Barau maino beġe ġabiani riba.

¹⁹ Mai guruġa anina tu: Barau na Keriso tanobara ġana etugu-iaġomaiato, benamo ema maseto. Keriso ġena mase ġenana Barau tu tanobara tarimari mabarari ġesi maino ġeġabiato: Tarimarima ġeri rakava asi ma etuġamaġi-taġorini, senaġi etuġamaġi-fituġarini. Barau na mai ġauvei ġai evinimato, maino guruġana maiġa baġana ġobata-iaġia.

²⁰ Moġesi naima ġai tu Keriso ġaruġa-boroġiani mai tanobarai. Ma Keriso ġena vari ġavari-fiuanı nai tu, noġa Barau tauġena ġai ġemana tarimarima eura-maġirini, ġia ġesi maino beġene ġabia. Ġai na Keriso aranai ġomi ġanoġimini, “Barau ġesi maino boġono ġabia.”

²¹ Korana Keriso tu enabe asi ġena rakava, senaġi ġita ġera vei-rakava lorinai, Barau na ġia noġa moġo vei-rakava tarimanai evaġa-iaġoato. Barau na mo veġa eveiato korana tu, Keriso ġesi bita sebonani ġenana, ġita mabarabarara tu vei-iobukaiobuka tarimari ai bitana iaġo ġana Barau ġoiranai.

6

¹ Ĝai tu Barau ĝesi ĝaĝauvei-vegogoni, moĝesina naima ĝalaunaĝimini, Barau ĝena namo e varevare baregona ĝoĝabi-raĝeato maniga tu boĝono ĝabi-gigitaria, asi boĝono vaĝa-rakavaia.

² Korana Barau tu maĝesi ekirani ĝena bukai,
 “Au na baiu-namomini ma baĝabi-raĝemini ĝarona beĝabiani nai tu,
 ĝemi noĝinoĝi baĝabi-raĝerini,
 ema vevaĝa-maĝuri ĝaronai tu,
 au na bavaga-kavamini.”

Au na avaga-guruĝamini, maitoma ĝarona tu Barau na tarimarima beiau-namorini ema beĝabi-raĝerini. Ma maitoma ĝarona tu Barau na tarimarima bevaga-maĝuririni ĝarona!

³ Ĝai tu asi ĝaurani, tarima ta na ĝai ĝema ĝauvei nuĝanai kerere ta bene ĝoitaĝoa ma beĝene vaĝa-dagama, moĝa lorinai ĝai na tarima ta vaĝa-vedaĝa-raĝena veigana ta asi ĝaveiani.

⁴ Moĝesi naima ĝema veigā e guruĝa mabarari ai ĝavevaĝa-foforini, ĝai tu moĝoni Barau ĝena vetuĝunaĝi-iaĝovinina tarimama. Meto nuĝari ai ĝavevaĝa-gwaĝiĝini; tarimarima na ĝevaĝa-midigu midigumani; ĝema ĝauvei nuĝanai maĝuri gwaĝiĝiri ĝadoĝaririni; tarimarima na ĝevaĝa-dabara dokomani;

⁵ ĝekwarimani, ĝediburamani, ĝutuma-bara na ĝeĝaru-ĝeĝeraĝimani ĝefarara-farara vinimani; ĝauvei ai ĝavekwaragi-rakavani, asi ĝagenani, asi ĝaĝaniĝanini.

⁶ Ĝema maĝuri e veiga tarimarima e Barau ĝoirari ai ĝenamo-vedaureani; Barau ĝena maĝuri e ĝena vari ĝaribaiani; maĝuri metori ĝaĝoitaĝorini, senaĝi ĝatuĝamaĝi-gwaĝiĝini; ĝevaĝa-rakavamani tarimari asi ĝabaru-vinirini, senaĝi ĝaiu-namorini; lauka Veaga na evaĝa-kavamani dabara mabarari ai, ma nuĝama mabarari ĝesi tarimarima ĝaura-vinirini.

⁷ Barau ĝena guruĝa moĝonina moĝo ĝaĝobata-iaĝiani Barau ĝena seĝukai; vei-iobukaiobuka farefareri tu ĝimama aroribamai ema ĝimama kaurimai ĝerina ĝavetarini.

⁸ Ĝai tu ĝaruga-gwaĝiĝini, tarimarima na ĝevaĝa-raĝemani o ĝevaĝa-rakavamani nuĝari ai, varima ĝevaĝa-rakavarini o ĝevaĝa-namorini nuĝari ai; ĝekiramani, ĝai na tarimarima ĝaĝofa-taĝui-taĝuirini ĝetoni, senaĝi ĝai tu guruĝa moĝoniri moĝo ĝakiraĝirini.

⁹ Ĝekirani, ĝia tu asi ribari ĝai ĝetoni, senaĝi ĝai tu ĝeĝita-leamani, ĝia ma ribari ĝinikau ĝai tu dei. Gevaĝimani, be ĝamaseni, senaĝi roĝo ma ĝamaĝurini. Ĝebotamani, senaĝi asi ĝamaseni.

¹⁰ Ĝevaĝa-nuĝa midigu-midigumani, senaĝi vanaĝivanaĝi ĝaiakuni ĝavererēni. Asi ĝema asi ĝama, senaĝi tarimarima vovoka ĝavaĝa-taĝarini. Dagara ta asi ĝaĝwa-tanuani, senaĝi Barau na ĝena tarimarima evinirito dagarari mabarari tu ĝai ĝema.

¹¹ Korinto tarimami, ĝai ĝomi ĝemi ai tu ĝaguruĝa-fiu-iaĝoni moĝo, asi ĝagarini, ema nuĝama maki ĝakeorini, ĝaura-vinimini nai.

¹² Ĝai na ĝomi tu ĝaura-vinimini, senaĝi ĝomi na neĝi ĝai asi ĝoura-vinimani.

¹³ Au na ĝomi tu natugu kavana avaga-guruĝamini: Ĝomi nuĝami asi boĝono kouri, nuĝami boĝono keori, be ĝai na ĝomi ĝaura-vinimini kavana, ĝomi na maki ĝai moĝesi boĝono ura-vinima.

Keriso asi ĝevaĝa-moĝoniani tarimari ĝesi asi boĝono vekako

¹⁴ Keriso asi ĝevaĝa-moĝoniani tarimari ĝesi asiĝina ĝinavaĝi boĝono veĝata e asi boĝono vekako. Korana kamara dabarai vei-iobukaiobuka e vei-rakava veigari beĝe veĝatani ema beĝe sebonani, ei? Asi ilaila! Ema kamara dabarai mama ema mukuna furufuru beĝe veĝatani ema beĝe sebonani, ei? Asi ilaila!

¹⁵ Keriso ema Satani tu kamara dabarai beĝe nuĝa-sebonani, ei? Ema veĝabidadama tarimana ema asi eveĝabidadamani tarimana tu kamara dabarai ĝia tauri ruarua ĝeri tuĝamaĝi beĝe sebonani?

¹⁶ O Barau ĝena Rubu Veaga e babarau ĝeri rubu tu kamara dabarai Rubu Veaga sebonai moĝo beĝe iaĝoni, ma Barau sebona moĝo beĝe toma-rakariĝoani? Ĝita mabarara tu Barau ĝena Rubu Veaga. Ma Barau ekirato,

“Au tu ĝia nuĝari ai batanuni,
 ma ĝia vekaravari ai barakaorakaoni.
 Au tu ĝia ĝeri Barau ai baiaĝoni,
 ma ĝia tu au ĝegu tarimari ai beĝe iaĝoni.”

¹⁷ Moĝa lorinai Vereĝauka ma ekirato,
 “Vei-rakava tarimari
 vekaravari na ĝoma-rakarosi,
 ma ĝia seviri na ĝoraka-veĝita.
 Asi iareva dagarari asi boĝono ĝabi-karari,

moġesi tu baġabi-raġemini.”

¹⁸ Iaru-korokoro Vereġaukana tu maiġesi ekirani,
“Au tu ġomi Tamami ai baiaġoni,
ma ġomi tu au natugu taumi
ema vavinemi ai bavaġa-iaġomini.”

7

¹ Ġatagu mabarami, ġoseġaġi, Barau na mai gुरुġatore maiġeri tu ġita ġera ekiraġirito. Moġa lorinai tauġanira ema iaukara ġevaġa-rakavarini dagarari mabarari ġita ġerana si-iareva-fitoġari. Be Barau ġenai ma vegubakaura ġesi tatanuni nuġanai, ġera maġuri tu namo ema veaġa korikori.

Paulo ġena iaku tu asikei, korana Korinto tarimari ġevetuġamaġi-kureto

² Nuġami ai ġai ġema faka kota boġono veia. Ġai tu tarima ta ġenai veiġa rakavana ta asi ġaveiato. Ġai na tarima ta ġena maġuri asi ġavaġa-rakavaiato. Ġai na tarima ta ġofaġofa dabaranai ġena dagara ta asi ġaġabiato.

³ Au maiġesi akirani tu, dia ġomi ġemi ai meto atore-kauani. Asiġina. Au varau baguruġa-guine, ġomi tu ġai loruma ġuturi ai ġotanuni, ġauravini-rakavamini. Be ġomi ġesi bita tanuni o bita maseni, ġai ġema veuravini ġomi ġemi ai tu asi bedokoni, roġo betanuni.

⁴ Au ġegu tuġamaġikau tu barego lelevaġi etanuni ġomi ġemi ai, korana ġemi veġabidadamai ġoruġa-gwaġiġini. Moġesi naima au na ġomi avaġa-veiavimini tarimarima ġoirari ai, ma au maki ġolaunaġi-baregoguni. Meto baregori ġaġoitaġorini mabarari nuġari ai maki, au ġegu iaku tu roġo etanuni, asi kota edokoni o ekeini.

⁵ Makedonia tanobaranaġi ġaraka-toġato nai, ġai tauġanima tu asi kota maki ġeiġaraġito meto e midigumidigu ġerina. Gabu mabarari ġana ġaiġoto-ġoi tu, meto e midigumidigu ġaġoitaġoto-ġoi, tarimarima na ġevaġa-veġare veġaremato-ġoi e ġekoumato-ġoi. Ema nuġama ġeraġeto-ġoi.

⁶ Senaġina Barau na tu meto e midigumidigu na nuġari ġevaġa-moirarini tarimari evaġa-kavarini. Ġia na nuġama evaġa-gwaġiġirito, Tito etuġu-iaġomaiato nai.

⁷ Ma ġai tu dia ġia eiaġomato nai moġo, nuġama ġevwaġiġito. Senaġi ġomi na aiġesi ġovaġa-kavaiato moġeri variri ġema ema kiraġito, moġeri na maki ġelaunaġi-baregomato. Evaġa-ribaguto, ġomi ġemi ura baregona au boġonoasi ġitagu. Ema ġemi nuġa-midigumidigu e au ġoura-viniguni e ġourani au gogobagu boġono raga, ema au ġegu guruġa ġokorana-iaġiririni variri mabarari ema kiraġirito. Moġa lorinai au ġegu iaku ebarego-lelevaġito.

⁸ Ribagu, au na fefa atore-iaġoato, monana evaġa-nuġa midigumidigu-mito, senaġi au tu asi adaradarato. Aba, tovtovonavi tu adaradarato, korana ariba-maoroto, au na fefa na nuġami evaġa-metorito, senaġi mo tu ġemi nuġameto tu asi etanu-maukato.

⁹ Ma inította au tu averereni, dia ġomi nuġami avaġa-metorito nai, senaġi mo ġemi nuġa-midigumidigu ġenana ġovetuġamaġi-kureto, benamo Barau ġenai ġoġenoġoito. Ġai na ġomi ġemi ai rakava metona ta asi ġaveiato, senaġi Barau ġena ura veġata ġomi boġono nuġa-midigumidigu, korana ġemi veiġa ġekerereto nai.

¹⁰ Barau ġenana eiaġomani nuġa-midigumidiguna tu asi tuġamaġi vevaġa-ġwana. Korana tu mo nuġa-midigumidigu ema vetuġamaġina tu vetuġamaġi-kure evaġa-ġoraiani. Mai dabarai vetuġamaġi-kure eġorani vau Barau na tarimarima evaġa-maġuririni. A mai tanobara maġurina ġenana eiaġomani nuġa-midigumidigu e vetuġamaġina na tu mase evaġa-ġoraiani.

¹¹ Mai Barau ġenana eiaġomani nuġa-midigumidigu e vetuġamaġina na kara ġomi ġemi ai bevaġa-ġorari ġotuġamaġi-ginikaua. Maniġa ġenana ġomi toma ġemi tuġamaġi beġe maoro, ma ġoura-rakavani veiġa namori ai boġono veiri. Ema ġemi ura baregona tauġemi boġono veiareva-faka meto tari ġerina. Ma mo kerere eveito tarimana ġenai asi ġoiakuto, ma au ġarigu ġoveito, ma ġemi ura baregona ġemi ai ma bana iaġosi, ma ġemi ura baregona maki mo kerere eveito tarimana ġena maġuri bene maoro veġata, ma ġemi ura ġia tu ġena veiġa rakavana vojna metona bene ġabia veġata. Ġomi na maiġeri veiġa mabarari ġoveirini ġerina ġovevaġa-moġonini, ġomi tu mo veiġa rakavana ġenana boġo veġabi-vaġi, ma asi ġemi kerere ta.

¹² Au na mo fefa ġomi ġemi atoreato-ġoi nuġanai tu, dia mo kerere eveito tarimana ġena maġuri totomaorona tuġamaġina aveito-ġoi, o mai tarima na nuġari evaġa-metorito tarimari atuġamaġirito-ġoi. Asiġina. Au na mo fefa atore-iaġosiato anina tu, Barau ġoiranaġi ġomi tauġemi boġono riba-maoro, ġomi na ġai tu moġoni nuġami mabarari ġesi ġai ġoġabi-raġemani e ġogubakaumani.

¹³ Ġai tu ġomi ġemi veiġa mai bakiraġiri veiġari na ġelaunaġi-baregomani.

Senāgi mo ġemi veiġa na ġelaunaġimato, ma kokore barego ġaġabiato-ġoi, moġa iakunai tu ma ġaiaku-rakavato maia, korana Tito ekirato, maninai ġomi na ġia tu ġoġabiraġe-ginikauato, ema nuġana egenagena-tarito.

¹⁴ Au na ġomi ġia ġoiranai tu avaġa-veiavimito, ma tauġemi ġemi veiġa na ġovevaġa-foforito ġoiranai, be eġitamito, moġesi naima aiakuni, korana asi ġovaġa-maiakaguto. Ema mo ġemi veiġa na ġovevaġa-foforito, ġai na Tito ġoiranai ġomi ġavaġa-veiavimito guruġari tu moġoni veġata, asi ġofaġofa.

¹⁵ Ma Tito na ġomi ġemi seġaġi etuġamaġirini, ema ġomi na ġia ma nuġa-raġemi e nuġa-ġoġogoġomi ġesi ġoġabi-raġeato, moġeri ma etuġamaġi-iaġosirini nai, ġia ġena veuravini ġomi ġemi ai tu ebarego-lelevaġini moġo.

¹⁶ Au tu averereni, korana moġoni ama ribani asi adaradarani, ġomi na tu veiġa namori ema iobukaiobukari moġo ġoveirini bene.

8

Ekalesia na moni ġevaġa-vegogorito Ierusalemā ekalesiari ġeri

¹ Tarikaka mabarami, maitoma ġai ġema ura tu, Barau ġena namo e varevare-bara Makedonia ai ekalesia doġorori iatari ai etoreato boġono ribaia.

² Ġia ġeri ai tu meto e midigumidigu barego eraġasito, senāgi ġia nuġari tu iaku e verere na ġevonuvonu-raġeto. Ġia tu moġoni ogoġami, asi ġeri-ġari, senāgi ġia ġeri varevare tu barego rakava ġeveiato.

³ Au na ġomi ġemi ai akiraġi-fofori korikoriani, ġia ġeri ġoitaġo tu kei, a ġeri vini tu barego-rakava tarikakari tari vaġa-kavari ai; ma ġia ġeri ai doġari-doġariri maki gwaġiġi, a farefareri e moniri maki benamo ġevini-fitoġarito moġo. Ma mo veiġa tauġeri ġeri urai moġo ġeveiato.

⁴ Ġia tauġeri na ġeri-ġari na ġai ġenoġi-ginikaumato, ġeurato, ġia maki ġai beġene ruġa-karoma, be mai ġauvei mainai tarima veaġari beġene vaġa-kavari.

⁵ Ġai ġema tuġamaġi, ġia ġeri varevare monina tu misina moġo beġe vinini. Senāgi ġia ġeri vini ġaġitaiao tu barego vedaurea, ġai na kara tovtovonai ġatuġamaġiato, moġa maki ġevanagiato. Ġia tovtovonai tu tauġeri roġo Vereġauka ġenai ġevevinito, ma moġa murinai tu Barau ġena ura ġekorana-iaġiato, be ġai ġemai maki tauġeri ġevevinito.

⁶ Moġesina naima ġai na Tito ġanoġiato, ġakirato, ġomi ġemi veuravini varevarena moniri egogorito kwari, moġeri tu tauġena na bene gogo-vaġiri. Korana tovtovonai maninai moni-gogo ġauveina tu ġia na esinaiao.

⁷ Ġomi Korinto ekalesiana dagara mabarari ai ġomi tu moġoni ġoiaruto: Ġemi veġabadadama e ġemi guruġai, ġemi riba iauka maġurinai, ġemi ura barego lelevaġina Barau ġena ġauvei nuġanai boġono vevaġa-kava, ema ġemi veuravini ġai ġemai tu barego lelevaġi. Ġai ġema velaunaġi ġomi ġemi ai tu, mai veuravini varevareri vini maki boġono vaġa-baregoa.

⁸ Mai veuravini varevareri boġono vini atoni maiaġa tu, dia akirani, boġono veia veġata atoni. Senāgi maiaġesi akiramini tauna tu maiaġa: Tarikaka kotari tu ġeiaġo-ginikauni karori tari vaġa-kavari ai. Moġesi naima au na ġomi atovo-naġimini, ġomi ġemi veuravini tarikaka tari ġeri ai tu aiġesina naribaia atoni.

⁹ Ġita ġera Vereġauka Iesu Keriso ġena namo e varevare-bara ġomi tu ma ribami. Ġia tu taġa verena, senāgi ġomi urami ai asi ġena farefare tarimanai ema vevaġa-iaġoto. Iesu asi ġena farefare ai ema iaġoto anina tu, ġomi farefare vovoka tarimami ai boġono iaġo ġana.

¹⁰ Ġemi vini au na maki ġomi na boġono doġaria ġana, au ġegu vevaġa-gwada guruġana tu maiaġa: Ġoraġani laġaninai ġomi na tu dia moni vaġa-vegogo moġo ġosinaiao, senāgi ġomi tu gourato, mai veiġa maki boġono veia veġata.

¹¹ Moġesi naima ġosinaiao ġauveina boġono vaġa-kori ginikaua. Moġesina tu mai boġono veia veġata ġotato ġauveina tu boġo vaġa-kori ginikauani, monana bevaġa-moġoni korikoriani. Boġo vinini nai tu, ġemi ai kara manġeri ilailari ai moġo boġono vini.

¹² Bema nuġami mabarari ġesi ġemi ai kara ġetanuni manġeri ilailari ai boġo vinini dagarari tu, Barau na beiakua-iaġirini e beġabi-raġerini. A ġemi ai asi ġetanuni dagarari asi boġo vinini, moġeri Barau na tu asi benuġameto-iaġirini, ema ġomi maki asi bebaru-vinimini.

¹³ Ġai asi ġaurani, tari ġovaġa-kavari uranai, ġomi tauġemi iatami ai meto baregona boġono tore-kaua, asi ġemi-ġami ai boġono vevaġa-iaġo. Asiaġina. Ġai ġaurani tu, ġomi ema ġovaġa-kavarini tarimari boġono ilaila moni e farefare rekenai ġatoni.

¹⁴ Mai taimi ai tu ġomi na ġia ġeri ura dagarari boġo vinirini, korana ġomi ġemi-ġami tu vovoka tabutabu. Be ġomi na ġia ġeri rabu ai ġovinirini kavana, ġomi ġemi rabu ai maki ma beġe vinimini. Mo dabarai ta asi berabuni.

¹⁵ Buka Veaġai ekirani kavana, “Ġutuma egogo-vegogoto tarimana ġana tu dia eġutuma-lelevaġito, ma kotuna moġo egogo-vegogoato tarimana ġana tu dia misina korokoro, senaġi taunai.”

Paulo na Tito Korinto ġana etuġuato

¹⁶ Au na Barau atanikiu-viniani, korana tu au ġegu nuġa-vekwaraġi ġomi ġemi ai etanuni, mai nuġa-vekwaraġi sebona maiġa tu Barau na Tito nuġana maki etoreato.

¹⁷ Korana ġia tu dia ġai na ġanogġato dainai moġo easi raka-ġitamini. Asiġina. Ġia taugena maki nuġana mabarabarana eura-rakavani veġata bene iaġosi, ġomi bene raka-ġitami.

¹⁸ Ġai tarikakama ta maki Tito ġesi ġatuġu-iaġosiani. Mai tarikaka maiġa tu ekalesia doġorori mabarari na ġavaġa-raġeani, korana ġia na Vari Namona eġobata-iaġiani ma nuġana mabarana ġesi.

¹⁹ Ema mai tarikaka maiġa tu ekalesia doġorori mabarari na ġeġabi-viriġiato, ġai bene kavama mai varevare moniri baġa ġwa-iaġorini nai ġetato. Mai ġauvei ġaveiani korana tu, tarimarima mabarari na Vereġauka beġene vaġa-raġe baregoa ġana, ema ġai ġaurani tarimarima baġana vaġa-kavari ġatoni maġurina baġana vaġa-foforia ġana.

²⁰ Ġai asi ġaurani, tarima na ġai beġene rori-torema ruarua tu ġeme vaġa-rakavama. Moġesina naima mai veuravini ai ġevinito monina maiġa tu dabara namonai ġaġauvei-iaġiani.

²¹ Korana ġai ġema ura baregona tu, veġa roroġotona baġana veia, dia Barau ġoiranai moġo, senaġi tarimarima maki ġoirari ai.

²² Ma ġita tarikakara ta maki ġia ġesi ġatuġu-iaġosiani, ġia bekavarini. Mai tarikaka maiġa tu ġai na ġaġitaiani, ġia tu moġoni eura-baregoni, Barau vetuġunaġina bene iaġo-vini etoni. Ema ġia tu moġoni ma ġena vetuġamaġikau ġomi ġemi ai maki.

²³ Tito maniġa maki apostolo na kavana, ma ġai tauma ruarua tu ġeme vekaravami ai ġaġauvei-vegogoni. A mani ġita tarikakara ruarua maniġeri tu ekalesia doġorori tata arari ai beġe iaġosi, ma ġia tauri ruarua tu ġeri ġauvei ema veġai Keriso ġevaġa-raġe baregoni.

²⁴ Moġesina naima, ġemi veuravini vetoġana korikori ema ġai na ġomi ġavaġa-raġemini tauna korikori, ġia ġoirari ai boġono vaġa-fofori korikoria, be ekalesia doġorori mabarari na beġene ġitaia ema beġene vaġa-moġonimi.

9

¹ Au na aġitaiani tu, asi korana ta moġo ġomi na Barau ġena tarima veaġari moni ġovarevare-vinirini guruġari au na ma bakiraġirini.

² Korana ġomi ġemi ura boġono vaġa-kavari veġata ġotato moġa tu ribaġo, be moġa tu Makedonia tarimari ġoirari ai maki ġomi aveiavi-iaġimito. Au na ġia avaġa-guruġarito, akirato, ġomi Akaia ai ġotanuni tarimami tu, ġoragani laġanina na veġata beiaġoma mo toma ġorovina-toreto boġono vini ġana. Ma ġomi na tarimarima boġono vaġa-kavari nuġa-vekwaraġina ġoveini guruġana mani ġesegaġiato, benamo Makedonia tarimari kotari maki ġeura-dikadikato, ġia maki beġene vevaġa-kava veġata ġetato.

³ A au na mai tarikakara maġeri atuġu-iaġosirini tauna korikori tu, beġene riba, ġai na ġavaġa-veiavimini guruġari tu dia guruġa koriri moġo. Be au aurani, ġomi ġemi varevare moniri tu boġono gogo-toreri vauro boġono venari-taġo, au na ġia akira-vararito ilailanai.

⁴ Asi namo Makedonia tarimari kotari au ġesi beġe rakakauni, benamo ġomi beġe ġitamini tu, dia ġai na ġaveiavi-iaġimini gabunai beġe goitaġomini, ġomi ġemi varevare moniri tu asi gogotore. Gomi tu asi bakiraġimi, senaġi ġai tu beġe maiaka-korukorumani, korana ġai ġomi ġemi ai tu ġatuġamaġi-dadamagi-baregoni nai.

⁵ Moġesina naima au batuġamaġi, mai tarikakara maġeri namona tu nanoġiri, be beġene iaġosi-guine; be ġomi ġemi veuravini varevarena moniri, mo ġokiraġi-torerito moniri tu beġene kirami, ma boġono tore-vegogo guineri vauro, ġai boġono nari-taġoma. Benamo ġai baġana votu nai, ġemi veuravini varevarena moniri tu toretaġo. Monana bevaġa-foforiani ġomi ma ġemi veuravini ġesi ġia ġeri ġovinini, a dia nuġami asi iakuri ġesi ġovarevareni.

Vovoka bevaroni tarimana

⁶ Mai guruġa akiraġiani maiġa tu boġono tuġamaġi-taġoa: Ġaniġani ġueri asi vovoka bevaroni tarimana tu, kwakwai maki ġaniġani asi vovoka bedoġarini. A ġaniġani ġueri ġutuma gorogoro bevaroni tarimana tu, kwakwai maki ġaniġani ġutuma lelevaġi bedoġarini.

⁷ Tarima ta nuġana i evaġa-moġoniani ilailanai bene vini. A dia nuġana ma daradarana ġesi bene vini, o dia tarimarima ġekirani beġene tore veġata ġetoni naima beġene vini. Korana nuġana faka ema ma iakuna ġesi evinini tarimana tu Barau na eura-viniani.

⁸ Ma Barau ġena namo e varevare-bara lelevaġina gomi iatami ai betorerini. Benamo monana ġaro mabarari ai ġemi ura dagarari mabarabarari boġo ġoitaġorini, ema dia ġoura-vinirini dagarari moġo, senaġi dagara kotari maki. Ema monana ġauvei namori maki barego lelevaġi boġo veirini.

⁹ Buka Veaġai ekirani kavana,

“Barau na ġena varevare tu asi-ġeri e asi-ġari tarimari barego lelevaġi evinirini, ġena vei-iobukaiobuka tu betanu-vanaġi vanaġini.”

¹⁰ Barau na ġaniġani ġueri vamoka vei tarimari evinirini beġene varori ġana, ema tarimarima ġaniġani evinirini beġene ġaniri ġana. Mai Barau sebna mainana ġemi ġaniġani ġueri ġovarorito moġeri bevaġa-vovoka tabutaburini, ema ġemi veiġa namori ġwaġwari beġe ġutuma-gorogoroni.

¹¹ Ma dabara mabarari ai gomi bevaġa-taġamini, ma monana nuġami sebonai e ma veuravinimi ġesi varevare mabarari boġo vinini. Benamo ġai ġemana boġo tugurini varevareri tarimarima na beġe ġoitaġorini nai, mabarari na Barau ma beġe tanikiu-viniani.

¹² Korana mai ġauvei gomi na ġoveiani maiġa tu, dia Barau ġena tarimarima veaġari na ġeura-vinirini dagarari moġo ġovinirini, senaġi mai gomi ġemi varevare bakuri ai, tarimarima vovoka na Barau ġetanikiu-vini baregoani.

¹³ Korana mai tarimarima ġovaġa-kavarini ġauveiri, mainana gomi ġemi veiġa namori bevaġa-fofori ġinikaurini. Ma tarimarima beġe ribani, gomi na Vari Namona tu dia murumi korina na moġo ġokiraġiani, senaġi ġokorana-iaġiani maki. Ema gomi ġemi farefare e moni maki ma veuravinimi ġesi ġia e tarimarima mabarari ġesi ġovare-barabararini beġe ġitarini. Maiġeri veiġa namori loriri ai tarimarima na Barau beġe vonevone-raġeani.

¹⁴ Benamo ġia na gomi beġe tuġamaġi-baregomini, ma iatami ai beġe ġauġauni. Moġesi beġe veini anina tu, Barau ġena namo e varevare barego lelevaġina gomi iatami ai etanuni dainai.

¹⁵ Barau sitanikiu-vinia, korana ġia ġena varevare barego lelevaġina ġita evinirato bene.

10

Paulo na ġena ġauvei ġevaġa-rakavaia ġetato tarimari guruġari eveito

¹ Maitoma au Paulo tauġegu na nuġagu ma manauna e maranana ġesi gomi anoġimini. Mai nuġa manau e marana tu Keriso ġenana ġeiaġomani dagarari. Gomi fakami ai tarima kotari na tu maiġesina ġeġofaġofa-iaġiguni, ġekirani, au gomi ġoirami ai tu manau e agarini, a gomi sevimi na araka-ġerevaġini, irau ai atanuni, gomi tu guruġa gwaġġiri e metori atore-vinimini, ġetoni.

² Au na gomi anoġimini, mani ġofaġofa guruġari asi boġono ġabi-raġeri, be gomi asi bana vaġa-guruġa gwaġġigimi au baiaġosini nai. Korana au baiaġosini nai tu, au atuġamaġini, ġai ġeġofaġofa-iaġimani tarimari tu basi vaġa-guruġa gwaġġi-vinirini. Maiġeri tarima na ġai ġeġofaġofa-iaġimani tu ġekirani, ġai tu roġo tanobara maġurinai ġatanuni tarimari ġeri veiġai ġaiaġoni.

³ Oba, ġai tu moġoni roġo tanobarai ġatanuni, senaġi ġai tu dia mai tanobara tarimari ġevetarini kavana ġavetarini.

⁴ Ġai ġema vetari farefareri tu dia tarimarima ġimari na ġevairini dagarari. Asigina. Ġai ġema vetari farefareri tu kokore e seġuka baregori, Barau ġenana ġeiaġomani dagarari. Maiġeri na ġavetari-vinirini seġukari ema iaunegari baġa vaġa-rakavarini riba.

⁵ Ma maiġeri vetari farefareri na Barau ema ġena riba ġekoukou-ġaurini veġere-veġareri e veiġari mabarari ġavaġa-rakavarini. Ema tarimarima ġeri tuġamaġi irauirauri mabarari ġakira-fitogarinini. Ma tarimarima ġakirarini, ġeri tuġamaġi tu Keriso moġo beġene korana-iaġia.

⁶ Ma gomi mabarami na Keriso moġoni boġo korana-iaġi korikoriani, moġa murinai vauro ġai na mani ġeseġafore-foreni tarimari ġeri rakava voiri metori baġa vinirini riba.

⁷ Gomi tarimarima tu tauġanina vetoġana ġereġana moġo ġoġitaiani. Bema tarima ta tauġena evekiraġini, ġia tu moġoni Keriso ġena tarima korikori nai tu, bene riba, ġai maki Keriso ġena tarimarima ġia kavana.

⁸ Au tu Veregāuka na maoro e seḡuka eviniguto, ḡomi ḡemi maḡuri e veḡabidadama bana vaḡa-ruḡa gwagīgiri ḡana, a dia bana vaḡa-rakavari ḡana. Ma au mai ḡauvei aveiani nuḡanai, havekokorokuni tu asi bemaiaakaguni.

⁹ Au tu asi aurani ḡomi inīgesi boḡono tuḡamaḡi, au na ḡomi tu vevaḡa-gari fefari moḡo atore-vinimini.

¹⁰ Au moḡesi akirani, korana tarima kotari ḡekirani, “Paulo na fefa etorerini nai, guruḡa tu baregori e ma seḡukari etorerini, senaḡi ḡia tauḡena ema fororini ḡita ḡerai, ḡia ḡitaḡitana tu asi garina e ḡena guruḡa maki asi guguraḡiri, ema asi mamiraḡiri maki.”

¹¹ Manīgesina ḡeguruḡani tarimari tu beḡene riba-maoro, ḡai irau gabu na fefa kamasi ḡatore-iaḡosini vetoḡari ema mami-raḡiri aiḡesi, ḡai baḡasi fororini tauḡanima korikoriri ai, ḡema veīḡa o ḡauvei seḡukari ema guruḡari maki moḡesi moḡo ilaila, fefai ḡomami-raḡirini kavana.

¹² Ḡai mani tauḡeri moḡo ḡevevaḡa-raḡeni tarimari ḡesi tu asi baḡa vevaḡa-vetovoni, ema ḡai ḡema ḡauvei maki ḡia na kara ḡeveiani ḡauveina ḡesi asi ilaila ḡauvei sebomai baḡa kiragiani. Asiḡina ḡinavaḡi. Manīgeri tarima tu tauḡeri moḡo ma ḡevevaḡa-vetovoni, karori tari ḡeri riba e veīḡa ḡesi. Ema ḡia tu tauḡeri moḡo ta evariḡisini, tauḡena ḡena veīḡa karona ta ḡenai evaḡa-ilailai. Ḡia manīgesi ḡeveini tauna korikoriri, ḡia tu moḡoni asi iaunegari.

¹³ Senaḡi ḡai tu Barau na evinimato maorori e gaburi makari, moḡeri nuḡari ai moḡo baḡa vekokoroku-iaḡirini. Ma ḡomi mani ḡotanuni tanona maki Barau na ḡai evinimato tanona makana nuḡanai.

¹⁴ Barau na ḡai maoro evinimato, ḡomi mani ḡotanuni tanona maninai, Vari Namona baḡa vari-fiuani e baḡa vevaḡa-riba-iaḡiani. Moḡesi naima maninai ḡaḡauveini vekokorokuna ḡaveini tu ḡamaoroni, korana ḡai tu ḡomi ḡemi ai ḡasi-raḡasito. Moḡa lorinai ḡomi mani ḡotanuni maniḡa tu, ḡai ḡema ḡauvei tanona nuḡanai, korana tu ḡai na Keriso ḡena Vari Namona maninai ḡasi-ḡwa-raḡasiato.

¹⁵ Ḡai tu Barau na evinimato tanori e maorori asi ḡavanaḡirini. Ema ḡai tu dia tarima boruri na ḡauvei ḡeveiato vekokorokuri ḡaveirini. Asiḡina. Gomi tu Keriso Varina Namona tu ḡai na ḡavaḡa-ribamito. Ma ḡai ḡema tuḡamaḡi baregona tu, ḡomi ḡemi veḡabidadama bebarego-iaḡoni, benamo ḡai ḡema ḡauvei ḡomi vekaravami ai maki bebarego-lelevaḡini.

¹⁶ Moḡa murinana tu mani gabu maninana, tanobara kotari ḡana ma baḡa iaḡoni, monai Vari Namona ma baḡa ḡobata-iaḡiani. Korana ḡai tu asi ḡaurani, tarima tari na varau ḡeḡauvei-iaḡirito gaburi, ḡai na baḡana vekokoroku-iaḡiri.

¹⁷ Buka Veḡa ekirani, “Bema tarima ta eurani bene vekokoroku nai tu, Veregāuka moḡo bene veiavi-iaḡia.”

¹⁸ Korana dia tauḡeri ḡevkiraḡi-varaḡe varaḡeni tarimari Barau na evaḡa-moḡoniani. Asiḡina. Veregāuka na evaḡa-raḡeani tarimana moḡo, Barau na evaḡa-moḡoniani.

11

Paulo ema apostolo ḡofaḡofari

¹ Au ḡegu ura sebomai tu, au ḡegu guruḡa babori kota roḡo boḡoro seḡaḡiri e boḡoro ḡabi-raḡeri. Mani ḡemi veīḡa ḡoḡabi-raḡegu.

² Au ḡegu ura barego vedaureana ḡomi tu Keriso nuḡanai moḡo boḡono tanu, ma Barau ḡena ura baregona ḡomi ḡemi ai maki moḡesi. Au tu moḡa dainai ḡomi ḡemi ai amamani, mai tu Barau na eḡabi-raḡeani mamana. Au na ḡomi tu tau sebomai moḡo ḡana akirakaumito, mo tu Keriso. Moḡesi naima au na ḡomi anari-ginikaumini. Korana au ḡegu ura tu, Keriso ema ekalesia ḡeri veḡaraḡo ḡaronai, ḡomi tu noḡa ḡuiato ta futua ta ḡesi asi ekima-karato ḡuiatona kavana, namo vedaurea e vinuba, ḡaraḡori Keriso ḡoirana ḡana bana tuḡu-kavimi.

³ Senaḡi au tu agarini, korana mota na ḡena ḡofaḡofa iaunegari na Eva eḡofaiato, benamo Barau ḡena guruḡa asi ekorana-iaḡiati kavana, boḡo veini garina. Gomi maki ḡofaḡofa guruḡari na ḡemi tuḡamaḡi beḡe vei-veḡonurini, benamo Keriso ḡokorana-iaḡi korikoriani maḡurina na boḡo raka-veḡitani.

⁴ Au na ḡomi agari-vinimini anina tu maiḡa, bema tarima ta eiaḡosini, benamo ḡomi ḡemi ai Keriso boruna ta eḡobata-iaḡiani, dia ḡai na ḡaḡobata-iaḡiati Kerisona; o iauka boruna ta ma ḡoḡabia ḡetomini, dia ḡai na ḡomi iatami ai ḡimama ḡatore-kaurito, benamo ḡoḡitaḡoato iauka Veḡana; o Vari Namona boruna ḡemi ḡeḡobata-iaḡiani, dia ḡai ḡemana ḡoseḡaḡiati ma ḡoḡabi-raḡeato Vari Namona neganai, ḡomi na moḡeri tarima tu ḡoseḡaḡirini, ma ḡeri guruḡai ḡoḡabi-raḡerini moḡo.

⁵ Senaḡi au tuḡamaḡini, mani ḡevkiraḡini apostolo irauri veḡata barego lelevaḡiri ḡetoni tarimari na, au tu asi ḡevanaḡiguto.

⁶ Aba, au guruḡa-ḡitaḡita dabarana tu asi aribaiato, senaḡi riba au ḡegu ai tu etanuni. Ma maiḡa tu dabara mabarari nuḡari ai ḡemi ai ḡavaḡa-fofori ginikaurito.

⁷ ḡomi ma ribami, au na ḡomi ḡemi ai Barau ḡena Vari Namona aḡobata-iaḡiato tu asi voina, be mo ḡauvei voina ḡomi na tu asi ḡoviniguto. Ma mo maḡuri aveiato tu, au tauḡegu avetore-varigoto, ḡomi bana tore-varaḡemi uranai. Ma ḡomi ḡotuḡamaḡini, mo veiḡa au na aveiato tu avei-rakavato, ei?

⁸ Gomi Vari Namona avaḡa-ribamito-ḡoi ḡauveina voina tu, ekalesia doḡorori tari na ḡeviniguto-ḡoi, noḡa moḡo alemarito-ḡoi.

⁹ Ma au ḡomi ḡesi tatanuto-ḡoi nuḡanai, dagara kotari aurato-ḡoi nai, au na ḡomi tu asi avaḡa-doḡe ganiganimito-ḡoi. Korana tu tarikaka tari, Makedonia na ḡeiaḡomato tarimari, ḡia na aura-vinirini dagarari ḡema-viniguto. Au tu ḡomi vavaḡa-doḡe-ganiganimi maḡurina ta asi aveiato. Moḡesi moḡo bavei-iaḡoni, asi bavaḡa-doḡe ganiganimini.

¹⁰ Keriso ḡena guruḡa moḡonina tu aribaiato, ma nuḡagu ai etanuni. Moḡesi naima au baveiavini nai tu, mai Akaia tanona nuḡanai etanuni tarimana ta asi bekira-ḡoiguni riba.

¹¹ Au na mai veiḡa aveiani tu, ḡomi asi aura-vinimini nai ba? Moḡoni, Barau ma ribana au na ḡomi tu auravini-baregomini.

¹² Ma ḡomi na au moni e farefare na asi boḡono vavaḡa-kavagu atoni veiḡana tu, roḡo bavei-iaḡoani-ḡoi. Mai veiḡa aveiani korana tu, mani apostolo ḡofaḡofari maniḡeri beḡene fofori-ginikau ḡana. Mai tu noḡa ḡia kwakuri ai ḡeruḡa-taḡoni tanona gaburena akwaiiani, beḡene fana-kafua, benamo beḡene keto-ḡura, ma monana ḡomi boḡono riba-korikori, ḡia tu moḡoni dia ḡai ḡesi ḡauvei sebona ḡaveiani. Korana ḡia na kara ḡeveiani tu ḡeveiavi-iaḡiani, ḡeri ura ḡomi na boḡono vavaḡa-moḡoniri, boḡono kira, ḡia tu moḡoni ḡai ḡesi ḡauvei sebona moḡo ḡaveiani boḡonosi ḡana.

¹³ Maniḡeri tarima tu apostolo ḡofaḡofari, ḡauvei ḡofaḡofari ḡeveirini. ḡia maniḡeri tu tauḡeri moḡo ḡevekiragini, Keriso ḡena apostolo ḡetoni, senaḡi mani tu ḡeḡofaḡofani, ḡia tu dia Keriso ḡena apostolo korikoriri.

¹⁴ Mani veiḡa maninana au nuḡagu tu asi efarevaḡini, korana Satani tauḡena maki vetoḡana kefoani, noḡa Barau ḡena mama aneruna noḡa moḡo eveini, benamo tarimarima eḡofarini.

¹⁵ Moḡesina naima Satani ḡena vetuḡunaḡi ḡeiaḡo-vinini tarimari maki tauḡeri moḡo tarimarima ḡoirari ai beḡe vekiraḡini, ḡia tu Barau ḡena vetuḡunaḡi tarimari. ḡia tu Barau na vau ḡeri veiḡa voiri bevinirini.

Paulo na ḡena apostolo ḡauveina ḡaramanai midigumidigu barego eḡabiato-ḡoi

¹⁶ Mo guruḡa ma akiraḡi-ḡoiani. Tarima ta asi bene kira au tu babo. Senaḡi bema ḡomi na au boḡo kira-baboguni nai tu, babo tarimari ḡoḡabi-raḡerini e ḡoseḡaḡi-vinirini kavana, au maki boḡono ḡabi-raḡegu e boḡono seḡaḡi-vinigu, be au maki kota bana vekokoroku.

¹⁷ Mai kara akiraḡiani tu, dia Vereḡauka na maoro eviniguni nai, maiḡesi ḡena guruḡa na aiaḡoni. Asiḡina. Mai tu naveiavini uranai, babo tarimari ḡeri veiḡa na aiaḡoni.

¹⁸ Korana tarima ḡutuma tu tanobara maḡurinai ḡetanuni tarimari ḡeri vekokoroku na ḡeiaḡoni. Moḡesi naima au maki baveiavini.

¹⁹ Gomi na mani babo tarimari ḡeri vevaḡa-riba ḡoḡabi-raḡerini e ḡoseḡaḡirini, korana ḡomi tauḡemi moḡo ḡoveḡita-tarini, benamo ḡokirani, “ḡomi tu moḡoni ma iaunegami,” ḡotoni.

²⁰ Moḡoni, ḡomi tu tarima ta ḡomi ḡemi ai eiaḡosini, benamo ḡena tuḡu-rakaorakao tarimami ai evaḡa-iaḡomini, o ḡemi-ḡami everari-verari vaḡirini, o kara eura-vinirini dagarari tu ḡomi ḡemina eḡabini moḡo, e tauḡena moḡo evetore-varaḡe varaḡeni, ema ḡoirami eforo-bubuḡaurini, mo tu ḡena veiḡa na e guruḡa na, tarimana tu ḡoḡabi-raḡeani ema ḡoseḡaḡiani maki.

²¹ Au tu nakira emaiakaguni, korana ḡai nuḡama tu asi gwaḡiḡi, be maiḡeri veiḡa ḡomi ḡemi ai tu asi ḡaveirito-ḡoi.

Bema tarima ta ḡia na eveirito veigari eveiavi-iaḡiani nai tu, au maki au na aveirito veigari havekokoroku-iaḡiani riba. Au maiḡesi aguruḡani tu, babo ḡeri guruḡa na aiaḡoni.

²² ḡia tu Heberu tarimari ḡetoni, ei? Au maki Heberu tarimagu. ḡia Isaraela besena ḡetoni, ei? Au maki Isaraela besena. ḡia Aberahamo tubuna ḡatana ḡetoni, ei? Au maki Aberahamo tubuna ḡatana.

²³ ḡia Keriso ḡena vetuḡunaḡi ḡeiaḡo-vinini tarimari ḡetoni, ei? Au na Keriso vetuḡunaḡina tu nuḡagu e tauḡanigu mabarabarana ḡesi Keriso vetuḡunaḡina aiaḡo-viniani. Au tu ababoni, maiḡeri guruḡa akiraḡirini, senaḡi ḡomi na roḡo ḡolaunaḡi-naḡiguni naima maiḡesi aguruḡani. Au tu avekwaraghi-lelevaḡito, a ḡia tu asiḡi; ḡaro vovoka ḡediburaguto, ḡekwari-rakava rakavaguto, ema ḡaro ḡutuma dori amaseto-ḡoi.

²⁴ Iuda tarimari na vaġa-40 ġevewkari-iaġiani varona na tauġanigu ai vaġa-39 veġata ġekwariato.

²⁵ Vaġa-toitoi oro kwarina na ġeribiguto, vaġa-sebona fore na ġetakiguto, vaġa-toitoi davara nuġanai au araġeto boutina eġwa-kirakiraiato, be dori amaseto, ma ġaro ta tu davarai boġi vinubana ta e ġaro vinubana ta arei-iaġiato tuba ta iatanai.

²⁶ Au tu gabu sebonai moġo asi atanuni, vanaġivanāġi gabu boruri na arakanaġi-rakanaġini, Keriso Varina Namona avari-fiuan. Ġaro tari ai tu ġarukai dori areini, ma ġaro tari ai tu seġafore tarimari na vefakari ai araka-ġurani, ma ġaro tari ai tu ġegu tanobara tarimari korikori na dori ġevaġiguni e ġevaġa-rakavaguni, ġaro tari irau bese tarimari na dori ġevaġiguni; ma ġaro tari vanuġa barari ai meto barego araka-ġoitaġorini, ma ġaro tari tu tano fakana nuġanai meto barego aġoitaġoni, ma ġaro tari tu davara nuġari ai dori amaseni; ma ġaro tari tu ġevetarikaka-ġofoġofani tarimari na ġevaġa-rakavagu ġetoni.

²⁷ Gauvei metori aveini e avekwaraġi-rakavani, boġi ġutuma asi agenani; avito-maseni, ananu-maseni; ġaro vovoka tu ġaniġani aruġarini, korana aġani-veaġani bene, ma ġaro tari asi ġegu dabuġa, kefigu kori moġo, be enagureguni.

²⁸ Ma maiġeri dagara ġutuma ma bakiraġirini riba; senaġi iniġa moġo nakiraġia: Ġaro vanaġivanāġi rubu mabarari gabu tatai ġetanuni anuġa-vekwaraġi iaġi-baregorini.

²⁹ Ekalesia ta Iauka rekenai emoirani nai tu, au maki ġia ġesi amoira-sebonani. Ma ekalesia ta tarima ta na eġori-veġonuani, benamo rakava eveini nai, au tu abaru-rakavani.

³⁰ Bema au asi ġegu dabara ta, ma navekokoroku batoni nai, au tu ġegu moira ġevaġa-ġorarinini gaburi moġeri moġo bavaġa-veiavirini.

³¹ Ġita ġera Vereġauka Iesu Keriso Tamana Barau ma ribana au tu asi aġofoġofani. Barau bitana vaġa-raġea mo vanaġivanāġi.

³² Damaseko ai atanuto-ġoi nai tu, Kini Areta ġena gavana na vetari tarimari ekirarito, vanuġa barana maġuna mabarana beġene nari-ġaua, au beġene gabi-tarigu ġana.

³³ Senaġi au tu tarikaka tari na boseġa baregonai ġevaġa-tanu-ġuraguto, benamo vanuġa maġuna windoana na varoseina ġetuġu-riġoguto, benamo mo gavana ġimana na araga-maġurito.

12

Paulo ġena mata-vanaġi

¹ Vekokoroku ai tu kara namona ta asi badoġariani, senaġi haveiavini roġo. Mata-vanaġi ai Vereġauka na evaġa-foforirito dagarari aġitarito ema aseġaġirito guruġari roġo nakiraġiri.

² Au tarima ta Keriso nuġanai ma ribagu; ġia tu Barau na eġabi-varaġeato guba vaġa-toitoina ġana. Mo veġa eġorato negana na beiaġoma mo initoma tu laġani gabanana vasivasi (14). Mo tau guba vaġa-toitoina ġana tu iaukana roġo tauġanina nuġanai, o iaukana tauġanina na eveġitato, ma iaukana ġereġana moġo eġabi-varaġeato, moġa tu au asi ribagu, a Barau ġereġana moġo ma ribana.

³ Mo tarima au tu ma ribagu. A mo tarima tu iaukana roġo tauġanina nuġanai o iaukana tauġanina na eraka-veġitato vau mo maġuri eġorato, moġa au tu asi ribagu, senaġi Barau ġereġana moġa ma ribana.

⁴ Mai tarima akiraġiani maiġa tu, paradaiso ġana eġabi-varaġeato. Benamo monai dagara tari ġita na asi ilaila bita kiraġi-fofori ginikaurini, ema dagara ta ġesi maki asi bita vaġa-vetovorini dagarari, Vereġauka na ekiraġirito, eseġaġirito. Moġeri dagara tu tarima ta na asi ilaila bekiraġi-foforirini dagarari.

⁵ Au na tu moġesina tarimana ġereġana moġo bavaġa-veiaviani. A au tauġegu tu asi havekokorokuni, au tu ġegu moiramoira gaburi moġeri haveiavi-iaġirini, (korana tu moġeri dairi ai tarima na asi ġevaġa-raġeguni).

⁶ Au navekokoroku barasi maki, au tu dia babo ġeri veġa na bara iaġo, korana au tu guruġa moġoniri moġo bara kiraġiri bene. Senaġi au tu asi veġata aurani moġeri bana kiraġi-rosiri, korana asi ġegu ura moġeri dairi ai, au tarimarima na beġene tugamaġi-varaġe varaġegu. A au aurani tu, kara aveiani maiġa, tarimarima na beġene ġitaia vauro beġene riba-maoro, au tu tarima kamasigu.

⁷ Au tu Vereġauka na dagara iaru-korokorori evaġa-foforirito, benamo aġitarito e aseġaġirito, senaġi moġeri bakuri ai au tauġegu havekiraġi-varaġe varaġeni garinai tu, Barau na midigumidigu ta au tauġanigu ai etore-toġaiato. Moġa tu noġa gini masikona ta au viriġogu nuġanai etanuni. Mo gini masikona moġa tu iauka rakavana ta. Ġia tu Satani ġena vetuġunaġi eiāġo-vinini iaukana, au bene vaġa-midigu midigugu, benamo au asi bana vekiraġi-varaġe varaġe ġana au ġegu ai etanuni.

⁸ Veregauka tu vaġa-toitoina veġata anōġiati, mai Satani ġena vetuġunaġi-iaġovini iaukana au ġeguna bene koki-vaġia ġana.

⁹ Senaġina Veregauka na maiġesina ekiraguto, “Au ġegu namo e varevare-barana ġereġana moġo dagara baregona ġoi na oura-viniani, korana au ġegu seġuka tu moiramoira tarimana ġenana vauro efofori-korikorini.” Moġesina naima au na tu ġegu moiramoira gaburi moġeri moġo haveiavi-iaġirini, Keriso ġena seġuka au ġegu ai bene tanu ġana.

¹⁰ Moġesi naima Keriso bakunai ġegu ġauvei nuġanai amoiramoirani, o tarima na guruġa e veġġa rakavari ġegu ai ġeveirini, o avekwaragġini nai, o ġevaġa-midġu midġuguni nai, o ġegu dabara doko ġarori ai, au tu aiakuni averereni moġo, korana amoirani negari ai tu, kokore barego vedaureana ma aġoitagġoni.

Paulo ġena ura sebona tu Korinto ekalesiana doġorona bene vaġa-kavaia

¹¹ Au tu tauġegu babo ai havevaġa-iaġo, maiġesi aguruġani, senaġi mai dia au tauġegu nuġagu siga moġo maiġesi aveini, au ġomi na ġotuġu-naġinaġiguni naima, babo ai avevaġa-iaġoni. Au tu ġomi na namogu boġoro kiragġi, senaġi ġomi na au tu gokure-toġaguni. Aba, au tu moġoni asi aragu, senaġi mani ġemi “apostolo iaru-korokorori” na au tu asi beġe vanagġuni.

¹² Apostolo korikoriri vetoġari tu vevaġa-gwaġġi ai, vetoġa boruri ai, nuġa-farevaġi veigari ai, ema seġuka veigari boruri ai ġevaġa-foforirito ġomi goirami ai, be ġogitarito maniġeri.

¹³ Ġomi tu kamara veġġai au na ġomi asi atuġamaġikau-baregomini, ekalesia doġorori kotari atuġamaġikau-baregorini kavana, ei? Asi veġġa tai. Asiġina. Au na ġomi tu moġoni, ġomi ġesi tatanuto-ġoi, monai moġo asi aurato-ġoi, au uragu ai boġono vekwaragġi. Benamo moġa moġo. Ma bema mai veġġa maġa ġomi na ġoġitaiani asi namo nai tu, benamo anoġimini, ġegu mai vei-rakava boġono tuġamaġi-fitogġaia.

¹⁴ Au toma tu havei-kavi, naiagġosi atoni. Mai ma baiagġosini maġa tu ġomi rakaġitami avaġa-toitoini maġa. Mai ma baiagġosini mainai maki, asi ma bavaġa-vekwaragġimini, korana au tu dia ġomi ġemi farefare e moni urari na baiagġosini, asiġina, au tu ġomi moġo urami na baiagġosini. Au na ġomi maiġesina aveimini tauna korikori tu maġa, dia natu na tama sina ġeri farefare e moni etore-ġerevaġirini. Asiġina. Tama sina na naturi ġeri farefare e moni ġetore-ġerevaġirini.

¹⁵ Moġesina naima au baiagġosini nai, ma iakugu ġesi, kara ġegu ai maiġeri mabarari ġomi bavinimini, ema au maki nuġagu mabarana ġesi bavinimini, ġomi bana vaġa-kavami ġana. Bema au na ġomi tu auravini-baregomini, karase nai ġomi na au tu asi ġouravini-baregoguni?

¹⁶ Kotari na maki ġevaġa-moġoniguni, au ġomi tu asi avaġa-vekwariġimito-ġoi, senaġi maiġesi ma ġekiraguni. Au tu iaunega rakavarakava, be au na ġomi ġemi ai moni tu ġofaġofa dabarari tari na aġabirito-ġoi ġetoni.

¹⁷ Be mo tarima tari ġomi ġemi ai atuġu-iaġosirito, moġeri tu akirarito, ġomi ġemi ai au ġegu moni maki beġene gogo atato ba?

¹⁸ Au na Tito anōġiati, ġomi beneasi raka-ġitami atato nai tu, ġita tarikakara ta maki atuġuato, be Tito ekavaiaato, ġeiaġosito. Ma Tito eiaġosito nai tu, ġomi ġemi moni easi ġofaġofa-iaġirito, ei? Tito ema au tu iauka sebona nuġanai moġo ġaġauveini, ema dabara sebona na moġo ġaraka-iaġoni.

¹⁹ Ba ġomi vanaġivanagġi ġotuġa-maġini, ġai tu bakuma ġabiġauri guruġari ġomi ġemi ai ġakiraġini ġotoni, ei? Moġoni, ġai tu Keriso nuġanai ema ġai kara ġakiraġirini tu Barau ġoiranai ġaguruġani. Au na aura-vinimini tarimami, ġoseġaġi, ġai na mai kara ġaveirini dagarari mabarari maiġeri tu ġomi boġono kokore uranai ġaveirini.

²⁰ Au tu aġarini, korana au basi-raġasini nai, ġomi tu dia au na aura-vinirini veġġari ġovei-tanurini basi-ġoitagġomini, benamo ġomi na ġoura-viniani veġġana au ġegu ai asi boġo doġariani garina. Au aġarini, ġomi tu roġo ġovevaneni, ġomamani, ġovebaruvini rakava-rakavani, ġomata-ġaniġanini, karomi guruġa asi namori ġovinirini, ġoveroritoreni, ġoveivini, nuġami e ġemi tuġamaġi dia gabu sebonai, senaġi iraurau.

²¹ Ma au aġarini, au basi-votuni nai tu, au ġegu Barau na au bevaġa-maiakaguni ġomi goirami ai, benamo matagu gorari beġe riġoni, korana ġevei-rakavato tarimari tu asi ġevetuġamaġi-kureto veġġa rakavari ġerina, kima maġurina na ema mata-boraġa veġġari na. Maiġeri veġġa ġerina ġia ġevemiro-fatafatani.

¹ Mai tu vaġa-toitoina au ġomi ġemi ai mai aiāġosini. Ma Buka Veāġai ekirani kavana, “Tarima ruarua o toitoi na beġe vaġa-moġonirini guruġari tu moġoni korikori.”

² Au vaġa-ruaruana ġomi asi-raka-ġitamito nai tu, ġevei-rakavani tarimari e tarima kotari maki au na akira-toreġaurito, au na kara haveiani au baiāġosini nai. Ma maitoma tu au manaġai roġo mai-ġegu nuġanai, ma avaġa-guruġamito kavana ma akira-toreġaurini. Bema au ma baiāġosi-ġenogoini nai, deikara roġo rakava veġari evei-tanuni tarimana tu, gwaina asi basi-ġabiani, ġena vei-rakava voina metona baviniani.

³ Korana ġomi ġemi ura tu boġono vaġa-moġonia veġata, Keriso tu moġoni au ġeguna eguruġani ba asiġina. Goseġaġi, Keriso ġomi ġemi ai tu asi emoirani, asiġi. Ġia kara ġomi fakami ai neveia betoni seġukana tu barego lelevaġi.

⁴ Aba, Keriso, mo tu tauġanina ġena moiramoira lorinai, satauro tuġunai ġeikoko-kauato, benamo emaseto, senaġi ġia inította tu Barau ġena seġukai emaguri-tanuni. Iesu Keriso nuġanai ġai maki tauġani ai tu moiramoira Iesu kavana, senaġi Barau ġena seġukai ġamaġuri-tanuni Keriso ġesi. Ema ġomi ġemi ai ġai na kara baġa veiani tu mai Barau ġena seġukai.

⁵ Gomi tauġemi nuġami ema ġemi maġuri boġono ragaġi-ġinikauri, ġomi tu moġoni ġoveġabidadamani ba asiġina. Gomi tauġemi ġemi maġuri na ema ġemi veġa na boġono vevaġa-fofori korikori! Ba ġomi tauġemi tu asi ġoriba-maoroni, Keriso Iesu tu ġomi nuġami ai etanuni ba? Bema moġoni tauġemi ġovetovo-naġini, benamo ġoribani, Keriso tu dia ġomi nuġami ai, monai vauro ġomi tu moġoni asi ġoveġabi-dadama-korikorini.

⁶ Au moġoni aribani, ġomi tauġemi na ġai boġo riba-maoromani, ġai tu moġoni Keriso vetuġunaġina ġaiāġo-vinini, a dia Barau na asi evaġa-moġonimato tarimama.

⁷ Ma ġai ġema ġauġau ai Barau ġanoġiani, ġakirani, ġomi bene vaġa-kavami, be veġa rakavana ta asi boġono veia. Ġai tu dia ġaġuriġurini, ġakirani, tarimarima na ġai vetovonaġi ai ġakokoreto, moġa beġene ġitaia ġatoni. Asiġina. Au ġegu ura ġomi tu vei-iobuka-iobuka tarimami ai boġono iaġo. A tarima-rima beġe kirani, ġai tu ġaketoto beġe toni, moġa ġai na tu asi ġatuġa-maġiani.

⁸ Korana tu ġai na guruġa moġonina kouġauna veġana ta tu asi ilaila baġa veiani, a ġai na tu guruġa moġonina moġo baġa vaġa-foforiani.

⁹ Ġai ġamoirani nuġanai, ġomi ġokokoreni tu, ġai ġema iaku ebaregoni. Ema ġai ġema ġauġau baregona ġaveiani tu, ġomi boġono kokore-korikori ġemi veġabidadamai.

¹⁰ Moġesina naima mai fefai maiġeri guruġa atore-vinimini, au mainai roġo maiġegu nuġanai. Korana au asi aurani, au banasi-raġasi nai tu, ġomi bana vaġa-guruġa gwaġiġimi. Korana Vereġauka na au mai maoro baregona eviniguto tu, ġomi ġemi veġabidadama bana vaġa-kokoreni, a dia bana vaġa-rakavari ġana.

Veġabituġu dokona

¹¹ Tarikakagu, ġegu guruġa magona tu maiġa, boġono gena. Tuġamaġi barana ġoirami ai boġono torea tu, boġono namo-vedaurea, ġegu guruġa mabarari boġono korana-iaġiri. Nuġami beġene gwaġiġi, mabarabarami tuġamaġi sebona moġo boġono ġabia, maino ai boġono tanu, ema veuravini e maino Barauna ġomi sevisevimi ai bene tanu.

¹² Karomi tata vetarikaka verauna na boġono vaġa-namori.

¹³ Veāġa o ekalesia tarimari mabarari na ġeri vevaġa-namo ġemi ai ġetuġu-iaġosiani.

¹⁴ Vereġauka Iesu Keriso gena namo e varevare-bara ema Barau ġena veuravini ema Iauka Veāġa ġena vekako namona, ġomi mabara-barami iatami ai bene tanu.

PAULO ĜENA TORETORE GALATIA EKALESIARI ĜERI

Galatia vaĝa-foforina guruĝari

Paulo na mai fefa tu betaĝu Antioka, Efeso o Makedonia ai etanuto-ĝoi nuĝanai etoreato. Mai tu laĝani 48 ema 58 fakari ai ta etoreato. Mo tu Iesu maki emaseto murinai vau. Ĝia ĝena guruĝa baregori mai fefa nuĝanai tu karoa 2:19-21; 3:2-3; 3:11; 5:1 ekiraĝirito.

Paulo na mai fefa etoreato korana tu Iuda tarimari tari ĝe-ekalesiato moĝeri na Galatia ekalesiari vevaĝa-riba kerereri ĝevinirito-ĝoi naima. Ĝia ĝekirato-ĝoi, tarimarima tu Mose ĝena taravatu guruĝari beĝe korana-iaĝirini vauro vevaĝa-maĝuri korikori beĝe ĝoitaĝoani. Moĝesi naima evaĝa-guruĝa gwaĝiĝirito, ekirarito, maĝuri ema vei-iobukaibuka tu vegabidadama ĝeregana ĝenana moĝo Barau ĝena namo ema varevare-bara nuĝanai bita ĝabiani, a dia ĝera ĝauvei e veiĝa ĝerina. Ema ekirarito, ĝita tu Keriso ĝena mase na taravatu ĝena seguka na eruga-vaĝirato, ema ĝita tu lauka Veaĝa varau taĝabiatu, be lauka na bene ĝori-kaura.

Paulo na ĝena fefa tu maĝesi eboioĝaiato:

1. Paulo tauĝena na Vari Namona guruĝana ekiraĝiato - karoa 1-2
2. Vevaĝa-maĝuri tu taravatu ĝenana ba Barau ĝena namo e varevare-bara ĝenana eiaĝomani - karoa 3-4
3. Veiĝa rakavari ĝerina bitana raka-faka ba roĝo bitana veiri - karoa 5-6

¹ Au Paulo, apostolo tarimagu na mai fefa tu ĝomi Galatia nuĝanai ekalesia doĝoromi ĝemi atore-iaĝosiani. Au tu dia tarimarima ĝeri urai mai ĝauvei aveiani, e dia tarima ta na etuĝuguto, mai apostolo ĝauveina bana veia etato. Asiĝina. Au tu Iesu Keriso ema Tamara Barau na etuĝuguto nai, mai apostolo ĝauveina aveiani. Iesu Keriso tu Barau na mase na ma evaĝa-variĝisi ĝenoĝoio.

² Gegu vevaĝa-namo tu tarikakara mabarari au ĝesi mainai ĝatanuni ĝesi, ĝomi Galatia nuĝanai ekalesia doĝoromi ĝemi ĝatuĝu-iaĝosiani.

³ Barau ĝita Tamara ema Vereĝauka Iesu Keriso ĝerina namo e varevare-bara ema maino ĝomi ĝemi ai bene tanu.

⁴ Iesu Keriso na ĝita ĝera Barau ema Tamara ĝena ura ekorana-iaĝirito, ĝia tauĝena ĝena maĝuri ĝita ĝera rakava dainai etore-tariato. Mo veiĝa evelato anina tu, ĝita toma mai tanobarai etanuni rakavana ĝenana bene vaĝa-maĝurira uranai.

⁵ Tamara Barau arana bitana vaĝa-raĝea vanaĝivanaĝi! Amen.

Vari Namona tu sebona kwariĝutu moĝo

⁶ Ĝomi na mani maĝuri bogo veia nai, au tu badaradara-rakava moĝo. Korana ĝomi tu Keriso ĝena namo e varevare-bara lorinai, Barau na ekeamito, ĝena tarimarimai boĝono iaĝo ĝana. Ma nuĝanai ĝomi tu asikauna ĝia ĝenana ma boĝo ragaraka-veĝita, benamo vari boruna ta ma boĝo ĝabi-raĝea.

⁷ Mani vau bogo ĝabi-raĝea manĝa tu dia Vari Namona. Asiĝina ĝinavaĝi moĝo. Ĝomi mani tu moĝoni, tarima kotari na ĝeĝofa-veĝonumini. Ĝia ĝeurani tu, Keriso Varina Namona beĝene vei-veĝonua veĝata ĝetoni.

⁸ Senaĝi ĝai na ĝomi tu Keriso Varina Namona moĝo ĝemi ĝaĝobata-iaĝiato, ma vari boruna ta tu asiĝina. Bema ĝai o guba aneruna ta vari boruna ta ĝemi ma baĝa ĝobata-iaĝiani nai, dei moĝesina beveini tarimana tu, rakava baregona ĝenai betanu-vanaĝi vanaĝini.

⁹ Mai guruĝa tu bita kiraĝia, senaĝi au na mai akiraĝi-ĝenoĝoiani. Bema tarima ta na ĝemi ai "Vari Namona" easi-ĝobata iaĝiani, senaĝi ĝia na eĝobata-iaĝiani varina tu mo ĝoĝabi-raĝeato varina moĝa ĝesi asi ilaila nai tu, mo tarima ĝenai rakava metona baregona bene tanu-vanaĝi vanaĝi.

¹⁰ Au maĝesina aguruĝani tu, tarimarima na beĝene ĝabi-raĝegu ĝana, ba Barau na bene ĝabi-raĝegu? Ba mai tarimarima iauri navaĝa-namori ĝana aguruĝani? Bema tarimarima iauri inította maki roĝo navaĝa-namori barasi, au toma Keriso ĝena vetuĝunaĝi ai tu asi bara iaĝo.

Paulo apostolo tarimanai eiaĝoto varina

¹¹ Tarikakagu mabarami, au na ĝomi avaĝa-guruĝa korikorimini. Mo Vari Namona na ĝomi ĝemi ai aĝobata-iaĝiato, moĝa tu dia tarima ta ĝenana erefo-taĝuito moĝo varina.

¹² Mai Vari Namona maiĝa, au na tu dia tarima ta ĝenana aĝabiatu, ema dia tarima ta na evaĝa-ribaguto. Asiĝina ĝinavaĝi. Mai Vari Namona maiĝa tu Iesu Keriso tauĝena na ĝegu ai evaĝa-foforiato vau aribaiato.

¹³ Au guinenai Iuda ġeri doġoro nuġanai atanuto-ġoi nai, kara aveirito-ġoi variri tu ġoseġaġirito, be ġomi ma ribami. Barau ġena ekalesia doġorona aiġesi avaġa-midigu midigurito-ġoi e alai-lausilausirito-ġoi bana vaġa-rakavari veġata atato-ġoi variri tu ma ribami.

¹⁴ Au na Iuda seneri ġeri maġuri mabarabarari akorana-iaġi ginikaurito-ġoi. Ma au na mai maġuri aveiato-ġoi nuġanai tu, Iuda tarimari au ġuru karogu tauri mabarari au na aguine-iaġirito-ġoi.

¹⁵ Senaġi au tu roġo sinagu legana nuġanai, Barau na eġabi-viriġiguto, ema ġena namo e varevare-bara lorinai ekeaguto, ġia ġena ġauvei bana veia etato. Benamo Barau na eura-viniato ġaronai,

¹⁶ Natuna au ġegu ai evaġa-foforiato. Keriso au ġegu ai, Barau na evaġa-foforiato, anina tu, ġia eurato, au na Natuna Varina Namona irau bese tarimari ġeri ai bana ġobata-iaġia ġana. Barau na Natuna ġegu ai evaġa-foforiato nai tu, tarima ta ġenai asi ma avedanagiato.

¹⁷ Ierusalemna ġana ġeapostolo-ġuineto tarimari ġeri ai vedanaġi maki asi avaraġeto. A au mo veġa aġoitaġoato murinai tu, maoromaoro Arabia ġana aiaġoto. Ma monana ma aġenoġoi-iaġoto Damaseko ġana.

¹⁸ Monai, laġani toitoi (3) ġevanaġito murinai vau, Ierusalemna ġana avaraġeto, Petero ġesi baġana guruġa-ġuruġa uranai. Petero ġesi Ierusalemai ġaro gabanana imaima (15) ġatanuto.

¹⁹ Au mo negai apostolo boruna ta tu asi aġitaiato. Au tu Vereġauka tarina Iakobo (o Iames) moġo aġitaiato.

²⁰ Barau ġoiranai au na ġomi mai tu guruġa moġoniri atore-vinimini, asi aġofaġofani.

²¹ Ierusalemna araga-kwaneato tu, Siria ema Kilikia tanori ġana aiaġoto.

²² Keriso ġena tarimarima, Iudea tanonai ġetanuni ekalesiari, au ġitaġitagu ġia tu asi ribari.

²³ Senaġi ġia na au tu varigu korina moġo maiġesi eragato ġeseġaġiato-ġoi, ġekirato-ġoi, “Ġita guinenai evaġa-midigu midigurato-ġoi e elai-lausilausirato-ġoi tarimana, toma tu nevaġa-rakavaia etato-ġoi veġabidadamana ma eġobata-iaġiani.”

²⁴ Benamo Barau na kara au ġegu ai eveiato, moġa ġeseġaġiato nai tu, Barau ġevaga-raġeato.

2

Apostolo tarimari na Paulo ġena ġauvei ġevaġa-moġoniatu

¹ Laġani gabanana vasisi (14) ġekorito murinai vau, Banabas ġesi Ierusalemna ġana ma ġaġenoġoi-iaġoto. Tito maki au na aġori-kauato, be ġia maki ġaiagiato.

² Au tu Barau na ġegu ai evaġa-foforiato, naima aiaġoto Ierusalemna ġana. Ma monai Vari Namona, irau bese tarimari ġeri aġobataiato-ġoi varina, Ierusalemna ekalesia ġeri akiraġiato. Ma mo Vari Namona tu veġorikau tarimari baregori ġereġari ġeri ai maki akiraġiato, ġia na ġegu ġauvei beġene vaġa-moġonia ġana; korana agarito, akirato, asi namo au ġegu ġauvei guinena moġa, o mai ġauvei variguna aveirini maġa asi tauri ai beġe iaġoni ġariri.

³ Tito tu Grik tarimana, ma au Ierusalemna neganai, ġia tu au ġesi, senaġi ġia tauġanina kefina beġene lama-vaġia ġiġiraġena tu asi ġeveito.

⁴ Senaġi ekalesia o tarikaka ġofaġofari tari ġai fakamai ġerakatoġa-ġairito, ġeurato tu, Tito tauġanina kefina beġene lama-vaġia veġata ġetato. Ġia ġai fakamai ġema-rakatoġa-ġairito, korana ġeurato, ġai Keriso Iesu ġesi ġasebonato nai, ġai ġema maġuri namona e fakana maġa, beġene ġita-lemma uranai. Korana ġia ġeri ura tu, Iuda ġeri sene taravaturi na ġai ma beġene barubaruma maia.

⁵ Senaġi hora misina nuġanai ta maki ġia ġarori tu asigina ġinavaġi veġata ġaseġaġirito. Ġai moġesina ġaveito tauna korikori tu, Vari Namona guruġana moġonina ġomi rekemi ai bene tanu-vesirigu uranai.

⁶ Veġorikau tarimari baregori tu ma arari, a asi arari au ġegu ai, ġia tu ilaila moġo. Barau na tarimarima tu dia tauġanina murikana vetoġana eġitaini. Maniġeri veġorikau tarimari na guruġa ta auna vari iatanai tu asi ġetore-kauato.

⁷ Senaġi ġeġitaguto, Barau na au ġauvei eviniguto tu, mero tauġaniri kefiri asi ġelama-vaġirito tarimari ġeri, mo tu irau bese tarimari ġeri, Vari Namona bana ġobata-iaġia etato, ilailana Petero mero tauġaniri kefiri ġelama-vaġirito tarimari ġeri ai, mo tu Iuda tarimari ġeri ai, Vari Namona bene ġobata-iaġia etato kavana.

⁸ Korana Barau Iuda tarimari ġeri apostolo tarimana Petero ġena ġauvei nuġanai eġauveito-ġoi kavana tu, au irau bese tarimari ġeri apostolo tarimagu ġegu ġauvei nuġanai maki eġauveini.

⁹ Iakobo (o James), Petero ema Ioane tu rubu duġuna tarimari monai. Ġia na au ġegu ai Barau ġena namo e varevare-bara ġeġita-leaiato, benamo ġimari aroribari na au e Banabas ġeġabi-rukumato. Moġa anina tu, ġia ma nuġari mabarari ġesi ġekirato, Banabas ema au tu irau bese tarimari ġeri ai, ma ġia tu Iuda tarimari ġeri ai beġe iaġoni.

¹⁰ Guruġa sebona moġo ġai ġevinimato tu ġekirato, asi ġeri-ġari tarimari baġana tuġamaġiri e baġana vaġa-kavari ġetato. Senaġi mai veiġa tu au tauġegu na maki bana veia veia atoni veigana.

Paulo na Petero ekira-feiato, korana veiġa ġofaġofana eveiato nai

¹¹ Petero Antioka ġana eiaġomato neganai tu, au na ġoirana ġutu-ġutunai akira-matana matanaiato, korana ġia na veiġa eleaiato nai.

¹² Tovotovonai Iakobo na etuġurito tarimari Petero ġenai roġosi roġo beġere laġasi neganai, Petero tu irau bese tarimari ġesi ġeġaniġani vegogoto-ġoi. Senaġi Iakobo na etuġurito Iuda tarimari ġevotuto nai, ġia tu irau bese tarimari fakari na ma eraka-veġitato. Petero irau bese tarimari fakari na eraka-veġitato, korana mero tauġaniri ġelama-vaġirini veigana ġekorana-iaġiani tarimari, Iuda tarimari, gariri eveito nai.

¹³ Iuda tarimari kotari maki Petero ġesi ġesebonato, be Petero ġena mo veiġa ġofaġofana ġeveiato. Ma Banabas maki ġia ġeri mai ġofaġofa maġurina na, be ġia maki ġeġofa-darreato.

¹⁴ Senaġi au ġegu ġitaġitai ġia tu Vari Namona maġurina korikorinai tu asi ġerakato-ġoi naima ġia mabarabarari matari ġutuġuturi ai au na Petero akira-matana matanaiato, akirato, "Goi tu Iuda tarimamu, senaġi Iuda tarimari ġeri sene maġurinai tu asi otanuni, a ġoi tu irau bese tarimari ġeri tanu-maġurinai otanuni. Ma kara dainai tu irau bese tarimari ovaġa-naġirini, Iuda tarimari seneri ġeri taravatu lorinai beġene tanu otoni, ei?"

Iesu bevaġa-moġoniani tarimana na moġo, Barau na vei-iobukaibuka tarimana bekiraġiani

¹⁵ Aba, ġita Iuda tarimara tu Iuda korikoriri ġerina taġorato. Ġita tu dia irau bese tarimari ġerina taġorato. Irau bese tarimari tu vei-rakava tarimari.

¹⁶ Ma ġita Iuda tarimara tu ribara, Barau na tarimarima tu dia taravatu na ekiraġirini veigari ġekorana-iaġi ginikaurini nai, ekirarini, asi ġeri vei-rakava etorini. Asigina. Ġia tu Keriso ġenai ġeveġabidadamani naima ekirarini, asi ġeri vei-rakava etoni. Ġita maki moġesi. Keriso Iesu tavaġa-moġoniato naima Barau ekirato, asi ġera rakava etato. Dia taravatu na ekiraġirini veigari takorana-iaġi ginikaurini dainai. Asigina. Keriso ġenai taveġabi-dadamato nai. Korana tu taravatu ekorana-iaġi ginikauani tarimana ta Barau na tu asigina ġinavaġi beġabi-raġeani. Asigina moġo.

¹⁷ Bema ġita Iuda tarimara tavekwaragini, taurani, Keriso ġesi bitana sebona, be Barau na bene ġabi-roġera tatonai nai tu, ġita tauġera tavevaġa-foforini, ġita tu vei-rakava tarimara. Moġa anina tu, Keriso eiaġomato vei-rakava benema vaġa-baregoa ba? Asigina ġinavaġi!

¹⁸ Bema au na mo taravatu, asi tauri ai avaġa-iaġorito dagarari, ma navaġa-ruġa ġenoġoiri atoni nai, au tu moġoni vei-rakava tarimagu, taravatu asi akorana-iaġiani.

¹⁹ Korana taravatu akorana-iaġirito-ġoi maġurinai au tu varau amaseto, be taravatu au na asi ma bakorana-iaġi ġenoġoiani. Taravatu akorana-iaġiato-ġoi maġurinai au tu amaseto anina tu, Barau ġena moġo bana tanu uranai.

²⁰ Au tu Keriso ġesi ġesatauro-sebonaguto; dagara sebona tu, roġo maġuri atanuni, senaġi mai tu dia au tauġegu ġegu maġuri. Asigina. Mai tu Keriso au nuġagu ai maġuri etanuni. Au mai tauġani nuġanai mai maġuri atanu-iaġiani maġa tu, Barau Natuna ġenai aveġabidadamani lorinai atanuni. Mai Barau Natuna na au eura-viniguto, ma au maġuri bana ġabia ġana, tauġena ġena maġuri evini-fitogaiato.

²¹ Au na Barau ġena namo e varevare-bara tu asi atore-veġitaiani. Asigina ġinavaġi. Korana bema tarima ta na taravatu bekorana-iaġiani nai, vei-iobukaibuka tarimanai beiaġoni neganai, Keriso tu bere mase-kava, asi ġena namo ta.

3

Taravatu tana korana-iaġia, ba veġabidadamai moġo bisini tanu

¹ Ġomi Galatia tarimami babomi! Iesu Keriso satauro ai ġeikoko-kauato varina tu au ġegu ġobatai, be matami ġutuġutunai akiraġi-fofori ginikauato. Ma ġomi mai tu kamara ġora tarimana na ġemi tuġamaġi bemeġa-veġonuri maia, ei?

² Au aurani, mai dagara sebona ġomi na ġokira-varagu: Gomi na Iauka Veaġa tu taravatu ġokorana-iaġi ginikauato nai ġoġabiato, ba Keriso Varina Namona ġoseġaġiato, benamo ġovaġa-moġoniato nai ġoġabiato?

³ Ğomi tu moğoni boğo babo-korikori, ei? Ğomi mağuri variğuna dabaranai raka tu Iauka Veaga ğena seğukai ğosinaiato, maitoma ğomi ğourani, magona tauğemi ğemi kokore ai boğono ğoitagoa ğotoni?

⁴ Be, ğomi mo meto ma midigumidigu tu ğoğoitago-kavarito, asi ğeri namo ta? Senaği mo meto ma midigumidigu, au ribagu tu, asi ğoğwa-kavarito.

⁵ Ma nadanağimi atoni, Barau na ğomi Iauka Veaga evinimini e fakami ai nuğa-farevaği veğari boruri eveirini, korana ğomi na taravatu ğokorana-iaği ginikauani nai ba? Ba Keriso Varina Namona ğoseğagiani, benamo ğovağa-moğoniani dainai?

⁶ Ğotuğamaği-ğenoğoi, Aberahamo ğotuğamağia: “Ğia tu Barau na ekiraği-toreato guruğana evağa-moğoniato naima, Barau ekirato, ğia tu vei-iobukaibuka tarimana, etato.”

⁷ Moğesina naima boğono riba, Barau ğeğabidadama-viniani tarimari ğereğari moğo Aberahamo natuna.

⁸ Buka Veagai etore-guineato guruğana na ekirağiani, ekirani, ğoirai Barau na irau bese tarimari tu ğeri veğabidadama ğerina vau bekirarini, asi ğeri rakava betoni. Moğesina naima, Aberahamo ğenai Vari Namona tu ekiraği-fofori guineato, ekirato, “Tanobara mabarabarari beseri tu, ğoi ğemuna vau vevağa-namo beğe doğariani.”

⁹ Aberahamo na Barau eğabidadama-viniato, benamo Barau ğenana vevağa-namo eğoitagoato. Moğa ilailanai Barau ğenai ğeveğabi-dadamani tarimari mabarabarari tu, Barau ğena vevağa-namo beğe ğabiani.

¹⁰ Taravatu ğekorana-iaği ginikauani vau, Barau ğoiranai vei-iobukaibuka tarimari ai beğe iağoni ğetoni tarimari mabarari iatari ai tu rakava metona lelevağina etanuni. Korana Buka Veagai tu mağesina ekirani, “Taravatu bukanai ğetorerito gurugari asi ğekorana-iaği vanaği-vanağirini tarimari iatari ai tu rakava metona lelevağina betanuni.”

¹¹ Buka Veaga na bevağa-fofori ginikaua, taravatu bekorana-iağiani tarimana Barau ğoiranai tu dia vei-iobukaibuka tarimana. Korana “Barau beğabidadama-viniani tarimana tu vei-iobukaibuka tarimanai beiağoni, be bemagurini.”

¹² Taravatu tu irau veğata, ğia tu dia veğabidadama ğenana eiağomani. Korana Buka Veaga ekirani, “Taravatu ekorana-iaği ginikauani tarimana tu taravatu ğenana moğo mağuri beğabiani.”

¹³ Senaği ğita tu taravatu ğena rakava metona lelevağina ğenana Keriso na varau evoi-vağirato. Ğita tu ğia tauğena na eruğa-boroğirato, benamo mo rakava meto lelevağina tu ğia na eğabiato. Korana Buka Veagai etoreato, ekirani, “Ğau ai ğetou-kaurini, ğemaseni tarimari mabarabarari iatari ai tu Barau na rakava meto lelevağina etore-kauani.”

¹⁴ Keriso na ğita taravatu ğena rakava meto lelevağina ğenana evoi-vağirato, tauna korikori tu, Barau na Aberahamo vevağa-namo eviniato, mo vevağa-namo moğa tu irau bese tarimari na maki Iesu Keriso ğenana beğene ğabia uranai. Korana mo dabarai tu, Barau na ekiraği-toreato Iaukana tu Iesu Keriso beğe vağa-moğoniani tarimari mabarari na maki beğe ğabiani.

Barau ğena taravatu na Barau ğena guruğatore guinena asi ilaila bekoki-fitogaiani

¹⁵ Tarikakagu mabarami, tarimarima ğera tanu-mağurina ruğuğa vağa-ilailana ta nakirağia. Vağa-ilailana tarimarima ğera kirağitore guruğana emoğonini, benamo tavağa-ruğaiani nai tu, mo guruğatore moğa tarima ta na asi ma bekira-fitogaiani o iatanai guruğa boruna ta asi ma betore-kauani.

¹⁶ Barau na mo guruğatore guruğari tu Aberahamo ema Aberahamo besena sebona moğo ğeri ai ekirağirito. Buka Veagai etoreato guruğana tu dia mağesi ekirani, “Ğoi besemu ğutumari ğeri,” korana moğesi bere kira tu tarimarima ğutuma bere kirağiri; senaği ğia tu ekirani, “Ğoi besemu sebona ğenai.” Mai tu tarima sebona kwariğutu moğo ekirağiani, mo tu Keriso ğereğana moğo ekirağiani.

¹⁷ Au na kara akirağiani tu iniğa: Barau ğena guruğatore guruğana Aberahamo tu evini-guineato; ma lağani sinau vasivasi ma gabana toitoi (430) evanağiato murinai vau, Barau na taravatu evağa-ruğaiato. Ma vau ema ruğato taravatuna na Barau ğena guruğatore guinena moğa tu asiğina ğinavaği bekoki-fitogaiani, benamo Barau ğena guruğatore moğa tu asi taunai bevağa-iağoani. Asiğina ğinavaği veğata.

¹⁸ Bema Barau na evinirato dagarana tu taravatu bita korana-iaği ginikauani vau bita ğabiani nai tu, mo bita doğariani dagarana moğa tu, ribara, dia ekiraği-toreato mağurina bita doğariani. Senaği Barau tu ğena namo e varevare-barai eguruğa-toreto, ma Aberahamo eviniato.

¹⁹ Bema moğesi nai tu, kara dainai taravatu eiağomato? Taravatu eiağomato anina tu, tarimarima na Barau ğekira-sirivağiato-ğoi mağurina, moğa tu taravatu na bene vağa-fofori ginikaua. Ma Barau na mai taravatu tu dia betanu-vanaği vanağini etato. Asiğina.

Mai taravatu tu betanu-iaĝoni mo, Aberahamo natuna bemaĝurini vau bea magoni. Korana Barau ĝena mo guruĝatore tu ĝia ĝenai eveiato. Mai taravatu tu Barau na aneru ta eviniato. Benamo mo aneru na tu Barau ma tarimarima vefakari ai eruĝato tarimana eviniato. Ma mo vefakari ai eruĝato tarimana na tu, ĝita ĝerai ekiraĝi-foforiato, bitana korana-iaĝia ĝana.

²⁰ Bema tarima sebona moĝo eĝauveini nai tu, vefakari eruĝani tarimana tu asi ĝena ĝauvei. Ma Barau mainai tu ĝereĝana moĝo, e ĝereĝana moĝo eguruĝa-toreto.

Taravatu anina tu kara?

²¹ Be, moĝa tauna tu, taravatu na Barau ĝena guruĝatore guruĝana ekira-fitoĝaiani? Asiĝina ĝinavaĝi. Korana bere Barau na tarimarima taravatu ta bere viniri, benamo mo taravatu ĝenana tarima maĝuri beĝere doĝaria nai tu, moĝoni, ĝita tu taravatu korana-iaĝi-ĝinikauna ĝenana, vei-iobukaibuka tarimarai bitara iaĝo.

²² Senaĝi Buka Veaĝai etoreato guruĝana na ekiraĝi-foforiani, ekirani, “Mai tanobara mabarabarana tu vei-rakava ĝena seĝuka gaburenai etanuni.” Moĝa lorinai kara Barau na ekiraĝi-toreato dagarana, moĝa tu Iesu Keriso ĝenai bita veĝabidadamani vau bita doĝariani. Moĝa tauna tu, Keriso bevaĝa-moĝoniani tarimana tu Barau na ekiraĝi-toreato varevarena beviniani.

²³ Iesu ĝenai veĝabidadama maiĝa roĝosi roĝo bere fofori nuĝanai, tovotovonai ĝita tu taravatu ĝena seĝuka gaburenai tatanuto-ĝoi, taravatu na ebiri-ĝaurato mo, Iesu ĝenai veĝabidadama Barau na ma ema vaĝa-foforiato.

²⁴ Be, taravatu na tu ĝita eguine-iaĝirato mo, Keriso eiaĝomato, benamo ekorito. Moĝa anina, ĝita tu Iesu ĝenai bita veĝabidadamani vau, Barau bekirani, ĝita tu asi ĝera rakava betoni.

²⁵ Initoma tu veĝabidadama ĝena nega bevaĝasi, naima taravatu na ĝita tu asi ma beĝori-kaurani.

Veĝabidadamai Barau natunai bita iaĝoni

²⁶ Gomi mabarabarami tu Barau natuna, korana tu Keriso Iesu ĝenai ĝoveĝabidadamani bene.

²⁷ Gomi babatiso ĝoĝabiato tarimami mabarami, Keriso ĝesi ĝosebonato, be Keriso nuĝanai ĝotanuni.

²⁸ Gomi mabarami fakami ai ta tu asi ĝemu irau ta. Ĝoi tu Iuda tarimamu o irau bese tarimamu, tuĝu-rakaorakao tarimamu o fakai otanuni tarimamu, vavine o tau, senaĝi ĝomi mabarami tu sebona moĝo. Keriso Iesu ĝesi ĝosebonato nai, ĝomi mabarami tu sebona kwarigutu moĝo.

²⁹ Bema ĝomi Keriso ĝena tarimarima nai, ĝomi tu Aberahamo besena, ema Barau na ekiraĝi-toreato dagarana maki boĝo ĝabiani.

4

Vetuĝunaĝi tauna tu irau, ma natuna korikoriri maki irau

¹ Au tu iniĝesi akirani: Mero misina ta, bema ĝia roĝo mero kei neganai, tamana na eviniato dagarari mabarabarari asi roĝo beĝaunarini. Aba, mo dagara mabarabarari tu ĝia ĝena farefare, senaĝi ĝia tu roĝo mero kei, naima ĝia na asi roĝo beĝaunarini. A ĝia tu tuĝu-rakaorakao tarimana kavana roĝo betanuni.

² Mo mero misina benariani tarimari, ema mo ĝena dagara beĝe ĝita-ĝaurini tarimari ĝeri veĝitaĝau gaburenai roĝo betanuni, beiaĝoni mo, tamana na ekiraĝi-toreato ĝarona bea ĝabiani.

³ Ĝita maki moĝesina, roĝo mero misira e kekenira misira negari ai tu, taravatu irauirau e tanobara barauri ĝeri tuĝu-rakaorakao merora e kekenirai taiaĝoto.

⁴ Senaĝi Barau na evirigiato ĝarona evotuto nai, Barau na Natuna etuĝu-iaĝomaiato, vavine ta ĝenana ema maĝurito. Barau Natuna etuĝu-iaĝomaiato maiĝa tu, taravatu ĝena seĝuka gaburenai ema maĝurito.

⁵ Ĝia taravatu ĝena seĝuka gaburenai ema maĝurito korana tu, taravatu ĝena seĝuka gaburenai tatanuni tarimarimara benema voi-ĝenoĝoira, benamo Barau natunai bisini iaĝo ĝana.

⁶ Ĝomi tu moĝoni Barau natuna. Moĝesi naima Barau na Natuna Iaukana etuĝu-mariĝoato, ĝita tata lorurai o nuĝarai eraka-toĝato, ma etanuni. Mo Iauka moĝa ĝita lorura ĝuturi na ekea-rosini, ekirani, “Tamagai, Tamagai!” etoni.

⁷ Moĝesi naima ĝomi toma tu dia taravatu ĝena tuĝu-rakaorakao tarimami. Asiĝina. Ĝomi toma tu Barau natuna. Ĝomi tu moĝoni Barau natuna lorinai, Barau na natuna bevinirini dagarari mabarabarari tu ĝomi na maki boĝo ĝabirini.

Paulo na Galatia tarimari etuḡamaḡi-baregorito

⁸ Guinenai ḡomi na Barau roḡosi roḡo boḡoro ribaia neganai, ḡomi tu ḡofaḡofa barauri ḡotoma-rakarigo vinirito-ḡoi, (ḡia tu ḡima veiveiri dagarari moḡo), ḡia ḡeri tuḡu-rakaorakao tarimari ai ḡoiḡoto.

⁹ Senaḡi toma tu, Barau boḡoma ribaia, ba nakira, Barau na ḡomi bema ribami. Ma kamasi nai tu taravatu moiramoirari, asi tauri dagarari ma ḡokorana-iaḡi ḡenoḡoiri ḡotoni? Ḗomi ḡourani tu, maniḡeri taravatu na ma beḡene barubaru-tarimi ḡotoni, ei?

¹⁰ Gomi tu ḡaro e ḡue, vereko ḡarori e laḡani tari ḡotuḡamaḡi-baregorini e ḡokorana-iaḡi baregorini.

¹¹ Au ḡomi ḡemi veiḡa aḡitarini tu, mai ama tuḡamaḡi-garini. Akirani, au ḡomi ḡemi ai tu, betaḡu avekwaragi-kavato banaḡu atoni.

¹² Tarikakagu mabarami, anoḡimini, au kavana boḡono vei, korana au maki taravatu aiḡuiato nai, ḡomi kavana aveito bene. Ḗomi na au ḡegu ai veiḡa rakavana ta tu asi ḡoveiato.

¹³ Ḗomi maki ma ribami, au tovotovonai ḡomi Vari Namona au na aḡobata-vinimito tu, mo keve ta na eḡabiguto, benamo maninai tatanuto-ḡoi nai.

¹⁴ Aba, au ḡegu ai mo keve moḡa tu, ḡomi ḡemi ai vetovonaḡi baregona ta, senaḡi asi ḡoḡita-fitoḡaguto, e asi ḡoragakwane-moḡovaḡiguto. A ḡomi na au tu Barau ḡena aneru ta boḡoro ḡabi-raḡea ilailanai ḡoḡabi-raḡeguto. Ma au tu noḡa moḡo Keriso Iesu tauḡanina korikorina noḡa ḡoveiguto.

¹⁵ Gomi ḡemi iaku e verere maki barego. A toma tu kamasi, mo iaku e verere tu aiḡeri, ei? Mai tu moḡoni aguruḡani, mo negai bema boḡoro ura, matami ḡoḡibo-vaḡiri, benamo au ḡovinigu boḡoro si nai tu, goro ḡibo-vaḡiri, benamo boḡoro vinigu.

¹⁶ Toma tu kamasi? Guruḡa moḡoniri akira-varamini nuḡanai tu, ḡemi vetari tarimanai ma boḡo vaḡa-iaḡogu?

¹⁷ Maniḡeri ḡofaḡofa tarimari na ḡomi ḡemi ai ura tu barego lelevaḡina ḡetoreani, senaḡi ḡia ḡeri tuḡamaḡi e ura tu asi rorogoto. Ḗia ḡeri ura baregona ḡeveiani tu, ḡomi ḡai ḡemana moḡo boḡono raka-veḡita, benamo ḡia ḡeri ai beḡene ḡabi-vanaḡimi ḡetoni. Ma ḡia na beḡene gabi-vanaḡimi, be ḡia boḡono ura-viniri ḡetoni.

¹⁸ Vanaḡivanaḡi tarimarima namo beḡene ḡabia uranai, bita uravini-baregorini tu namo vedaurea. Ma namo bene gora ḡana, tarimarima bouravini-baregorini magurina tu, dia au ḡoiragu ai moḡo boḡono veia. Asigina.

¹⁹ Natugu, ḡomi tu au na atuḡamaḡi-kaumini. Au tu ḡomi urami ai, be noḡa vavine ma baniri na mero ḡeruḡu-vaḡirini ḡetoni nai, midigu ḡeḡabirini kavana, au midigu aḡanini. Mai midigumidigu tu baḡabi-iaḡoani mo, Keriso vetogana korikori ḡomi ḡemi ai bevetoreni.

²⁰ Initoma au ḡegu ura barana tu, ḡomi sevimi ai barasi ruḡa-tari, be garogu bara kefoa, bara vaḡa-kava ginikaumi. Korana au ḡomi ḡemi ai tu mai ama daradarani, asi aribani, kamasi bavaga-kavamini.

Hagar ma Sara

²¹ Ḗomi taravatu gaburenai tanu ura-dikana ḡoveini tarimami na ḡokira-varagu. Ḗomi taravatu na kara ekiraḡiani guruḡana tu ḡoseḡaḡi-ginikauani ba?

²² Buka Veaga tu maḡesi etoreato: Aberahamo natuna tu ruarua, ta tuḡu-rakaorakao vavinena ḡenana emaḡurito, ma ta tu vavine fakana, dia tuḡu-rakaorakao vavinena, ḡenana.

²³ Tuḡu-rakaorakao vavinena ḡenana emaḡurito merona tu, Aberahamo e Hagar ḡegenavegogoto, monana eḡorato. Senaḡi vavine fakana ḡenana emaḡurito merona tu, Barau ḡena guruḡatore lorinai emaḡurito.

²⁴ Mai vetoḡa maḡeri tu guruḡa vaḡa-ilailari veḡari moḡo. Mai vavine ruarua maḡeri tu, Barau ḡena kiraḡitore ruarua ḡevaḡa-foforirini. Hagar tu Barau ḡena kiraḡitore ta Sinai Ḗorona na eiḡomato dagarana ekiraḡiani, ma ḡia na eruḡa-vaḡirito tarimari tu tuḡu-rakaorakao tarimari.

²⁵ Mai guruḡa “Hagar” tu Arabia tarimari na Sinai Ḗoronai ḡekiraḡiani. Ema Hagar maki toma etanuni Ierusalemata vetoḡana kavana. Korana mai Ierusalemata sitina e Ierusalemata tarimari tu tuḡu-rakaorakao tarimari.

²⁶ Senaḡi gubai etanuni Ierusalemata tu faka. Ma ḡia tu ḡita sinara.

²⁷ Buka Veagai tu maḡesina ekirani,

“Vavine gabanimu,
mero asi oḡabini vavinemu,
e mero ḡabi midiguna asi ribamu vavinemu,
noiaku e noverere!

Korana tu ƒaraƒona na eiaƒuiato vavinena natuna tu ƒutuma gorogoro, ma ƒaraƒona na asi eiaƒuiato vavinena natuna tu asi vovoka.”

²⁸ Tarikakagu mabarami, gomi tu Isako kavana. Barau ƒena gurutatore lorinai, Barau natunai ƒoiagoto.

²⁹ Mo negai Aberahamo e Hagar ƒegenavegogoto nai, egorato merona na Iauka Veaga ƒena seƒukai emagurito merona evaƒa-midigu midiguato, moƒesi kavana maitoma maki mo veiga sebona eƒorani.

³⁰ Senaƒi Buka Veaga etoreato guruƒana tu kara etoni? ƒia tu ekirani, “Mani tuƒu-rakaorakao vavinena ma natuna ƒesi tu ƒomi sevimi na boƒono lai-veƒitari. Korana vavine fakana natuna ƒena farefare mani tuƒu-rakaorakao vavinena natuna ƒesi tu asi veƒata beƒe ƒauna-veƒogoi.”

³¹ Ma, tarikakagu, ƒita tu dia tuƒu-rakaorakao vavinena natuna. Asigina. ƒita tu vavine fakana natuna.

5

Taravatu irauirauri ƒeri tuƒu-rakaorakao tarimari ai asi ma boƒono iaƒo

¹ ƒita tu bitana faka uranai, Keriso na taravatu misimisiri ƒerina eruƒa-vaƒirato. Be boƒono ruƒa-gigitari. Ma tauƒemi mani Iuda tarimari ƒeri taravatu misimisiri e vereko irauirauri ƒeri tuƒu-rakaorakao tarimami ai asi ma boƒono vevaƒa-iaƒo.

² ƒoseƒaƒi! Au Paulo na akiramini, bema ƒomi tauƒaniami keƒiri beƒe lama-vaƒirini nai tu, Keriso na ƒita bene ruƒa-vaƒira ƒana, kara eveiato, moƒa tu asi ƒena seƒuka ƒomi ƒemi ai.

³ Ema mani deidei tauƒaniri keƒiri beƒe lama-vaƒirini tarimami tu navaƒa-guruƒami, ƒoseƒaƒi. ƒomi tu taravatu mabarari misikose boƒono korana-iaƒi ginikauri veƒata.

⁴ Bema ƒomi ƒokirani, taravatu boƒono korana-iaƒi ginikaua, be Barau goiranai vei-iobukaiobuka tarimami ai boƒono iaƒo ƒotoni tu, tauƒemi moƒo Keriso ƒenana ƒoveƒabi-ƒerevaƒini. Ema ƒomi tu Barau ƒena namo e varevare-bara ƒenana ƒoveƒgitani.

⁵ Iauka Veaga ƒena seƒukai Barau ƒenai taveƒabidadamani, ema tavaƒa-nogani, Barau na vei-iobukaiobuka tarimara benesi ƒana.

⁶ Keriso Iesu ƒesi esebonato tarimana tu tauƒanina keƒina ƒelama-vaƒiato ba asi ƒelama-vaƒiato tu asi ƒeri irau ta; mai veiga ruarua ƒerina namo ta asi beƒorani. Dagara baregona korikori tu veƒabidadama, mo veƒabidadama na veuravini evaƒa-foforiani.

⁷ ƒomi tu raga-iruiru ai ƒoraga-ginikauto-goi. Ma kamara deikara na goirami easi-kouƒauato, benamo toma tu guruƒa moƒonina asi ma ƒokorana-iaƒiani?

⁸ Mani vevaƒa-ura veiga ƒenai ƒomi ekeamito Barauna ƒenana eiaƒomani.

⁹ Boƒono riba, farao evaƒa-tuburini muramurana kotuna na farao evaƒa-tubu baregoani.

¹⁰ Barau ƒenai ƒegu tuƒamaƒi tu atorekau-gwaƒigiani, korana ribagu, ƒia na bevaƒa-kavamini, benamo iaunega boruna ta asi ma boƒo ƒabi-raƒeani. Mani ƒomi evaƒa-tuƒamaƒi daradaramini tarimana maniƒa tu, ƒena veiga voina metona beƒoƒariani veƒata.

¹¹ Tarikakagu mabarami, bema au na mero tauƒaniri keƒiri lamavaƒi veiga initoma roƒo aƒobata-iaƒiani nai, au karase nai tu roƒo ƒevaƒa-midigu midiguguni? Bema au na mero tauƒaniri keƒiri lamavaƒi veiga roƒo bara ƒobata-iaƒia nai tu, Keriso ƒevaƒa-satauroato varina aƒobata-iaƒiani, mainana tarimarima nuƒari tu asi bere vaga-metori.

¹² ƒomi ƒemi tuƒamaƒi ƒevei-veƒonu veƒonurini tarimari maniƒeri, namona tu tauƒeri na seuri beƒene farari.

¹³ Moƒoni, tarikakagu, gomi Barau na ekeamito tu, taravatu irauirau korana-iaƒiri ƒerina boƒono raka-faka ƒana. Ma ƒomi tata tu dia taravatu gaburenai ƒotanuni, senaƒi fakai ƒotanuni. Mani fakai ƒotanuni dainai tu, tauƒani ƒena ura rakavari boƒono korana-iaƒiri ba? Asigina ƒinavaƒi! ƒomi tu ma veuravinimi ƒesi karomi ƒesi boƒono vevaƒa-kava, e karomi ƒeri vetuƒunaƒi boƒono iago-vini.

¹⁴ Taravatu mabarabarari tu taravatu guruƒana sebonai moƒo Barau na evaƒa-iaƒoato, ekirato, “Sevimu tarimana bono ura-vinia, goi tauƒemu oveura-vinini ilailanai.”

¹⁵ Bema ƒomi tauƒemi karomi tata ƒesi moƒo boƒo vekira-ƒarama ƒaramani e boƒo vevaneni nai tu, boƒono venari, korana karomi ƒesi tauƒemi moƒo boƒo vevaƒa-rakavani, benamo veƒabidadama na boƒo ketoni garina.

Tauƒani ƒena veiga e Iauka ƒena veiga

¹⁶ Au tu iniƒesina akirani: Iauka Veaga na ƒemi maƒuri bene guine-iaƒiri, be tauƒani ƒena ura rakavari asi boƒono korana-iaƒiri.

¹⁷ Ġita ribara, tauġani na euravini-baregorini veigari, Iauka na tu asi eura-vinirini, ema Iauka na euravini-baregorini veigari, tauġani na tu asi eura-vinirini. Ġia tauri ruarua tu ġevevaġini. Moġesina naima, ġoi na veigā namori bono veiri otoni veigari tu asi oveirini.

¹⁸ A bema ġoi Iauka na eġori-kaumuni nai, ġoi tu dia taravatu gaburenai otanuni.

¹⁹ Tauġani na euravini-iaġirini veigari tu maiġeri: Mata-boraġa veigari, veigā mirori, kima veigari,

²⁰ kwaivakuku toma-rakarigo, ġora e meġameġa, vebaruvinu, vevane, mama, niaraniara, arana beġene vaġa-raġea etoni veigari, veġareveġare, vevare-kirakira veigari,

²¹ dagara mata-kifakifari o mata-ġaniġaniri, niuniu ema ġoreġore, ma veigā irauirau maiġesi kavari. Guinenai akira-toreġaumito kavana, toma maki akira-toreġaumi, maiġesi veigari beġe veini tarimari tu, asiġina ġinavaġi Barau ġena Basileia nuġanai beġea raka-toġani.

²² Senaġi Iauka ġwaġwana tu maiġeri: Veuravini, iaku, maino, vevaġa-gwaġiġi, veiaunamo, nuġa-namo, vetuġamaġikau,

²³ nuġa-ġavemuko o manau, ema nuġa-gwaġiġi. Maiġeri veigā tu taravatu na asi ekourini, asi taravaturo.

²⁴ Keriso Iesu ġena tarimarima korikori vetoġana tu maiġesi: Ġia tu tauġani na eġabiraġe-baregorini dagarari e euravini-iaġirini dagarari mabarabarari eikoko-kaurito satauro tuġunai Keriso ġesi.

²⁵ Bema ġita Iauka Veaġa na ġera maġuri eguine-iaġirini nai tu, Iauka Veaġa ġena dabarai maki bisini raka.

²⁶ Ġita tauġera asi sivekiraġi-varaġevaraġe, e karora nuġari asi sivei-barubaruri, ema karora tata ġeri ai dagara tari moġeri asi simata-ġaniġani-iaġiri.

6

Ekalesia karomi ġesi boġono vevaġa-kava

¹ Tarikakagu mabarami, bema fakami ai tarima ta na veigā eleaiani ġoġitaiani nai tu, Iauka Veaġa na ġemu maġuri eguine-iaġiani tarimamu na nuġamu ma manauna ġesi bono vaġa-kavaia, ġena maġuri bono toto-iobukaia maia. Senaġi ġoi tauġemu maki bono venari. Asi namo Satani na ġoi maki beriba-ġanimuni ġesi.

² Karomi tata ġesi boġono vevaġa-kava, ġemi meto boġono ġwa-barabarari, korana moġesi boġo veini tu, Keriso ġena taravatu bogo korana-iaġi ġitakauani.

³ Bema tarima ta tauġena bevetuġa-maġini, ġia tu tarima korikori betoni, a nuġanai ġia tu asi ġeiviani tarimana. Ġia tu tauġena kekei moġo eveġofaġofa-iaġini kekei.

⁴ Tarimarima mabarari tu tata ġeri veigā e maġuri beġene vetau-ġinikauri. Benamo moġa murinai vauro tata ġia tauġena ġena maġuri namona iakuna bene vei. A dia ġia ġena maġuri namona tarima ta ġena maġuri ġesi bene vaġa-vetovoa.

⁵ Korana tu tarima tata ġereġana na ġena maruna metona bene ġwaia.

⁶ Tarima ta deikara riba eġabini Barau ġena guruġai tarimana tu, ġia ġenai kara etanuni dagarari kota ġena vevaġa-riba tarimana bene varevere-vinia.

⁷ Tuġamaġi kerereri na asi beġene ġabimi. Barau tu asi boġo ġofaiani. Tarimarima tu kara ġuena evaroani, benamo moġa ġwaġwana ġereġana mogo eġabiani.

⁸ Tauġani ġena ura rakavari ekorana-iaġirini tarimana tu, tauġani ġena ura rakavari ġerina maġuri rakava kwaikwaina e mase bedoġaririni. A Iauka Veaġa ġena veigā namori ekorana-iaġirini tarimana tu, Iauka Veaġa ġena veigā namori ġerina maġuri vanaġivanvaġi begabiani.

⁹ Moġesina naima veigā namori veiveiri ai asi bitana gau. Korana veigā namori veiveiri asi bita vaġa-ketoani nai tu, kwakwa negana korikorinai tu ġaniġani bita kwa-dogarini.

¹⁰ Moġa lorinai ġita ġera mai nega namonai tu tarimarima mabarabarari ġeri ai veigā namori bisini veiri. Ma mai veigā namori tu Keriso ġenai ġeveġabidadamani besena mabarabarari ġeri ai tu bisini veiri veġata.

Dia kefi lamavaġi ġenana maġuri boġoitaġoani

¹¹ Mai fefa tu au tauġegu na batorea ġomi ġemi. Ġoġitaiani, mai guruġa-matari baregori atorerini mai fefai.

¹² Goseġaġi, ġomi tauġanimi kefiru beġene lama-vaġiri guruġari ġevei-gwadarini tarimari, maniġeri tu tauġani murika na dagarari koriri ġevekokoroku-iaġirini tarimari. Mani tarimarima maniġeri tu Keriso ġena satauro dainai beġe vaġa-midigu midigurini ġarinai maniġesi ġeveini.

¹³ Tauġaniri kefiru ġelama-vaġirini tarimari na taravatu tu asi ġekorana-iaġiani. A ġia tu ġeura-baregoni, ġomi tauġanimi kefiru beġene lama-vaġiri ġetoni. Ġia ġeura-dikani tauna korikori tu, ġomi tauġanimi kefiru beġe lama-vaġirini nai, beġene veiavi ġana.

¹⁴ Au dagara ta vekokorokuna tu asiġina ġinavaġi baveini, a au tu ġita ġera Vereġauka Iesu Keriso ġena satauro moġo havekokoroku-iaġiani. Korana mai satauro ġenana tanobara dagarari au ġegu ai tu ġemaseto satauro tuġunai, ema au maki tanobara dagarari ġeri ai tu amaseto satauro tuġunai.

¹⁵ Mero tauġaniri kefiru ġelama-vaġirini nai, namo ta asi beġorani, ema mero tauġaniri kefiru asi beġe lama-vaġirini nai, maki namo ta asi beġorani. Korana dagara baregona sebona Barau ġenai tu, Barau na tarima variġu geragerarai evaġa-iaġorani.

¹⁶ Mai maġuri maiġa beġe tuġamaġiani e beġe korana-iaġiani tarimari tu Barau ġena tarimarima o Isaraela tarimari korikori; ġia iatari ai maino e vevetuġaġwa bene tanu.

¹⁷ Maitoma beiaġoni, tarima ta na au meto asi ma bene vinigu, korana Iesu ġebaru-viniani tarimari na ġekwariguto, be ġegu giri tauġanigu ai aġwa-rakaorini, moġeri na ġevaġa-foforinai, au tu Iesu Vereġauka ġena vetuġunaġi tarimana korikorina.

¹⁸ Tarikakagu mabarami, ġita ġera Vereġauka Iesu Keriso ġena namo ma varevare-bara ġomi mabarami iaukami ġesi bene tanu. Amen.

PAULO ĜENA TORETORE EFESO EKALESIARI ĜERI

Efeso vaĝa-foforina guruĝari

Paulo na mai fefa tu Romai dibura numanai etanuto-ĝoi nuĝanai etoreato (Apostolo 28). Mai fefa tu betaĝu laĝani 60 o 61 ai etoreato, mo tu Iesu maki emaseto murinai. Mai fefa anina baregona tu, "Ekalesia doĝorona tu Keriso Tauĝanina," ema mai fefa ĝeĝori-kauani siriri tu karao 4:1-4.

Paulo na mai fefa etoreato ĝena ura baregona tu, Efeso ema Asia Keina (o Asia Minor) mabarana nuĝanai maki Iesu Keriso ĝevaga-moĝoniani tarimari, 1) ĝeri veuravini ema veĝabidadama Keriso ĝenai ma beĝene tore-sirivaĝia ĝana; 2) bene launaĝiri, tarima guinena ma ĝena maĝuri rakavari ĝesi beĝene koki-fitogaia, ma tarima varigu geragerana beĝene tore-kaua; 3) bene vaĝa-ribari, Keriso tauĝanina nuĝanai Iuda tarimari ema irau bese tarimari tu sebona moĝo, asi ĝeri irau ta; 4) Keriso ema ekalesia doĝorona nuĝari ai kara vekuretoĝana etanuni bene vaĝa-foforia ĝana.

Paulo na mai fefa tu maiĝesina eboioĝaiato:

1. Ĝita ĝera farefare ĝena barego Keriso ĝena maĝuri nuĝanai - karao 1-3
2. Ĝita Keriso ĝena maĝuri nuĝanai tu aĝesina bitana tanu - karao 4-6

¹ Au Paulo, Barau ĝena ura lorinai Keriso Iesu ĝena apostolo tarimagu ai aiaĝoto. Mai fefa tu Efeso ai Barau ĝena veaĝa tarimami, Keriso Iesu ĝenai ma ĝemi vetuĝamaĝikau tarimami, atore-vinimini.

² Barau ĝita Tamara ema Vereĝauka Iesu Keriso ĝerina varevare-bara e maino ĝemi ai bene tanu.

Keriso ĝena maĝuri nuĝanai Barau na namo iauka rekenai evinirani dagarari

³ Barau, ĝita ĝera Vereĝauka Iesu Keriso Tamana, sivaĝa-raĝea, korana Keriso ĝesi tasebonato maĝurina nuĝanai, ĝia na iauka rekenai gubai ĝetanuni dagarari namori moĝeri mabarari ĝita evinirato.

⁴ Tanobara roĝosi roĝo bere veia ĝaronai veĝata, Keriso na vevaĝa-maĝuri ĝauveina beveiani bakunai, Barau na ĝita ĝia ĝena eĝabi-virigirato. Ĝita eĝabi-hidirato tu, ĝia ĝoiranai bitana veaĝa e asi ĝera vei-rakava ta bitana tanu ĝana. Barau ĝena veuravini lorinai,

⁵ ĝia na mai maĝuri eboioĝa-guineato, ekirato, ĝita tu Keriso ĝenana ĝia natunai bevaĝa-iaĝorani. Mai tu ĝia tauĝena ĝena nuĝa-namo ai ĝena ura eveiato veigana.

⁶ Barau ĝena namo e varevare baregona marevana namo vedaureana sivaĝa-raĝea. Korana mai namo e varevare-bara maĝa tu Barau na ĝita evini-kavarato moĝo, euravini-baregoani merona, Iesu Keriso, ĝena maĝuri nuĝanai.

⁷ Ĝita tu, Keriso emaseto nai, rarana na evoi-ĝenoĝoirato, e ĝera rakava maki etuĝamaĝi-fitogaĝarito. Mai tu Barau ĝena namo e varevare-bara namo vedaureana veigana,

⁸ ĝita ĝerai barego lelevaĝi evaĝa-foforiato, ema iaunega e tuĝamaĝi-faka evinirato.

⁹ Barau ĝena ura Keriso ĝenana beveiani veigana tu vekuretoĝa, senaĝi tauĝena ĝena nuĝa-namo ai ĝita evaĝa-ribarato.

¹⁰ Mai Barau ĝena ura o boioĝa maĝa tu ekiraĝi-toreato ĝarona beĝabiani vauro bevaĝa-foforiani. Mo tu gubai ĝetanuni dagarari e tanobarai ĝetanuni dagarari mabarari Keriso kwakuna koranai beĝabi-vegogorini. Benamo Keriso na moĝeri dagara mabarari beĝuine-iaĝirini.

¹¹ Ĝita tu Keriso bakunai Barau na ĝena eĝabi-virigirato, tauĝena na tovotovonai veĝata eboioĝaiato ilailanai. Ma dagara mabarari maki ĝia tauĝena na eura-iaĝirni dabarari ai eĝauvei-iaĝirini.

¹² Moĝa lorinai ĝai Iuda tarimama, deiri Keriso ĝavaĝa-moĝoniato ma ĝenai ĝavetuĝa-maĝikau-guineto tarimama na Barau marevana baregona baĝana vaĝa-raĝea.

¹³ Ma ĝomi irau bese tarimami na maki mai guruĝa moĝonina tu ĝovaĝa-moĝoniato, mo tu Barau na ĝomi bevaĝa-maĝurimini Varina Namona guruĝana. Gomi mai guruĝa ĝoseĝaĝiato nai tu, ĝovaĝa-moĝoniato, benamo Keriso ĝenai ĝovetuĝamaĝikauto. Moĝesina naima Barau na ĝomi maki ĝia ĝena tarimarimai evaĝa-iaĝomito. Barau na ĝomi eĝabi-raĝemito vetogaĝa ĝemi ai eveiato tu, Iauka Veaĝa, ekiraĝi-toreato Iaukana, evinimito.

¹⁴ Ĝita na Iauka Veaĝa tu varau taĝabiato, moĝesi naima ribara, Barau na ĝena tarimarima ĝeri ekiraĝi-toreato dagarana tu ĝita na maki bita ĝabiani. Initoma tu roĝo tavenarini, beiaĝoni mo, Barau na ĝena tarimarima beĝabi-iaĝorini ĝia sevina ĝana. Barau marevana baregona sivaĝa-raĝea.

Paulo ġena ġauġau

¹⁵ Moġesina naima, au tu Iesu Vereġauka ġoġabidadama-viniani e Barau ġena tarimarima veaġari ġoura-vinirini varina ama seġaġiato ġarona na veġata,

¹⁶ Barau tanikiu-vinina ġomi bakumi ai tu asi аваġa-magoani, e iatami ai aġauġauni.

¹⁷ Akirani, ġera Vereġauka Iesu Keriso ġena Barau na iaunega ema vevaġa-fofori Iaukana bene vinimi, be Barau boġono riba-ġinikaua. Barau tu Tamara, ma ġia marevana ma mamana tu iaru-korokoro.

¹⁸ Ma Barau anoġiani, akirani, ġemi tuġamaġi mama bene vinimi, ġena vevaġa-namo irau vedaureana, voina baregona dagarana boġono ġabia uranai ekeamito ġotuġamaġikauani, moġa tu boġono riba-ġinikaua. Be Barau ġena tarimarima veaġari na dagara namo vedaureari beġe ġabirini, moġeri tu boġono ribari.

¹⁹ Ema Barau tavaġa-moġoniani tarimara nuġarai Barau ġena seġuka iaru-korokorona eġauveini maiġa maki boġono ribaia. Barau ġena mai seġuka maiġa ġena ġauvei kokorena tu barego lelevaġi.

²⁰ Ġia na tu mai seġuka kokorena Keriso ġenai evaġa-foforiato nai, Keriso mase na evaġa-varigiġi ġenoġoiato, e gubai ġia ġimana aroribanai evaġa-tanuato.

²¹ Keriso tu monai tuġunai etanuni e evereni. Ġia tu iauka rakavari mabarari, ġeveġitaġauni iaukari, e ġeri maoro barego lelevaġi iaukari, e ma ġeri seġuka iaukari, ma seġuka lelevaġi aneruri, ema ara ġekiraġirini arari mabarari iata-raġeri ai evereni. Mai tu dia mai tatanuni neganai moġo, asiġina, mai tu ġoirai vau mani eiaġomani neganai maki ġia tu bevereni veġata.

²² Barau na dagara mabarari Keriso kwakuna fanafanana gaburenai etorerito, e Barau na ġia tu ekalesia mabarana bene debaia etato.

²³ Ekalesia tu Keriso tauganina. Ma mai tauganina maiġa tu Keriso taugena ġena maġuri na evaġa-vonu-raġeato, ema dagara mabarari maki gabu mabarari ai evaġa-vonurito.

2*Barau na Keriso ġesi ma bevaġa-maġurirani*

¹ Guinenai ġomi iaukami tu mase ġotanuto-ġoi, korana ġemi kira-sirivaġi e veġa rakavari ai bene.

² Mo negai ġomi na mai tanobara ġena veġa rakavari ġoveirito-ġoi, ema iauka rakavari eġita-ġaurini iaukana gokorana-iaġiato-ġoi. Mai veġitaġau iaukana maiġa ġena basileia o veġitaġau seġukana tu barego lelevaġi guba e tanobara fakari ai. Ma ġia toma tu Barau asi ġeseġaġi-viniani tarimari nuġari ai etanuni e eġauveini.

³ Guinenai ġita mabarara maki ġia kavana taveito-ġoi, taugani ġena veġa rakavari tavaġa-moġonirito-ġoi. Tauganira e nuġara ġeri ura e tuġamaġi rakavari takorana-iaġirito-ġoi. Moġa lorinai ġita maki tarimarima kotari kavari Barau ġena baru baregona tu ġita iatarai etanuto-ġoi.

⁴5 Moġoni, ġita iaukara tu mase ġera kira-sirivaġi lorinai, senaġi vevetuġaġwa-bara Barauna ġena veuravini barego vedaurea lorinai, Keriso ġesi ma evaġa-maġuri ġenoġoi-sebonarato. Boġono riba, ġita tu Barau ġena namo e varevare-bara moġo bakunai evaġa-maġurirato.

⁶ Keriso Iesu ġena maġuri nuġanai, ġita tu Barau na Keriso ġesi mase na evaġa-varigiġi sebonarato, ma Keriso ġesi ġena vere seanai evaġa-tanu sebonarato guba vanuġanai.

⁷ Moġesi eveito korana tu, ġoirai ġia ġena veiau-namo vetoġana, ġena namo e varevare-bara barego lelevaġina ġerana bene vaġa-foforia uranai. Mai Barau ġena veiau-namo vetoġana, ġena namo e varevare-bara na efoforito maiġa tu, Keriso Iesu ġesi tasebonato nuġanai, ġita ġerai evaġa-foforiato.

⁸ Ġomi tu ġemi veġabidadama ġenana Barau na ġena namo e varevare-barai evaġa-maġurimito. Gomi tu dia taugemi ġemi kokore na govevaġa-maġurito. Asiġina, mai tu Barau ġena varevare ġita evinirato.

⁹ E dia ġomi ġemi ġauvei dairi ai voimi ġoġabiato dagarana, be moġa veivavina tarima ta asi bene vei.

¹⁰ Ġita tu Barau ġimana veiveina tarimara. Barau na Keriso Iesu ġenana tarima variġurai evaġa-iaġorato, ġauvei e veġa namori bisini veiri ġana. Mai ġauvei e veġa namori tu Barau na varau erovina-torerito, ġita na bisini veiri ġana.

Keriso na bese ruarua evaġa-sebonarito

¹¹ Ġomi boġono tuġamaġi, guinenai ġomi irau bese tarimami Iuda tarimari na ġekiraġimito-ġoi "kefimi asi lamavaġi tarimami". Iuda tarimari tauganiri kefirri tu lamavaġi. Ġia na mai mero tauganiri kefirri lamavaġi veġana tu taugeri ġimari na ġeveiani veigana.

¹²Boĝono tuĝamaĝi, ĝomi mo negai Keriso ĝesi tu ma fakami, e Isaraela besena nuĝanai maki ĝomi tu vanuĝa boru tarimami nai asi ĝegabi-raĝemito, ema Barau ĝena kiraĝitore eveirito nuĝanai, eguruĝa-toreto dagarari maki ĝomi na tu asi boĝo doĝaririni. Ema ĝomi mai tanobara nuĝanai tu asi ĝemi Barau ema dagara namona ta ĝoirai asi ĝotuĝamaĝi-kauani.

¹³Gomi guinenai tu manaĝa rakava, senaĝi toma Keriso Iesu ĝesi ĝosebonato nai, ĝoma kavinaĝito Barau ĝenai. Gomi Keriso rarana na ema ĝabi-kavinaĝimito.

¹⁴Korana Keriso tauĝena tu ĝita ĝera maino evaĝa-ĝoraiani tarimana. Ĝia na ĝita bese ruarua bese sebonai moĝo evaĝa-iaĝorato. Korana ĝai Iuda besena ema gomi irau bese tarimami vekaravarai ĝita evare-kirarani kobena tu Keriso tauĝanina satauro ai emaseto nai evare-kiraiato, benamo evaĝa-rakava-ĝosiĝosiatu.

¹⁵Ĝia na Mose ĝena taravatu nuĝanai velaunaĝi guruĝari ĝetanuni dagarari mabarari maki erovorito. Keriso na mo veiĝa eveiatio anina tu, ĝia ĝena ura ĝita bese ruarua ĝerana ĝia tauĝena ĝesi bene vaĝa-sebonara, tarima variĝuna sebona moĝo bene veia ĝana; ema ĝita fakaraĝi maki maino bene vaĝa-ĝoraia ĝana.

¹⁶Ĝia satauro ai emaseto korana tu, mai bese ruarua tauĝani sebonai moĝo bene vaĝa-sebonari, benamo Barau ĝenai ma bene ĝabi-ĝenoĝoiri ĝana. Ema ĝia fakari ai ĝeri veiaurakava maki, satauro ai emaseto nai, evaĝa-koririto.

¹⁷Keriso eiaĝomato tu, maino varina ema ĝobata-iaĝiato. Mai maino varina ĝomi irau bese, Barau ĝesi fakami manaĝa tarimami ĝemi, e Iuda tauri, Barau ĝesi fakari kavinaĝi tarimari ĝeri, ema vari-fiuato.

¹⁸Ĝita mabarara, irau bese tarimami e Iuda tarimama, tu Keriso ĝenana lauka sebona nuĝanai moĝo Tamara ĝenai bita iaĝoni.

¹⁹Tauna moĝa, ĝomi toma tu dia tanukau e vanuĝa boru tarimami. Asiĝina, toma ĝomi tu Barau ĝena tarimari ĝesi vanuĝa sebona e Barau ĝena numa tarimami.

²⁰Gomi tu numa, fore iatanai ĝeragarini kavana. Barau na ĝomi tu apostolo tarimari e peroveta tarimari iatari ai eraga-kaumito, ma Keriso Iesu tu ĝemi numa daĝunina o duĝuna forena baregona.

²¹Keriso ĝena maĝuri nuĝanai mo numa ĝauna mabarana evaĝa-tubu-tubukau ginikauato, ma ebaregoni Rubu Veagai eiaĝoni Vereĝauka ĝena maĝuri nuĝanai.

²²Keriso ĝesi ĝosebonato nai, ĝomi maki Barau na tarimarima tari ĝesi eĝabi-veĝogomini, benamo Barau ĝena tanu numanai ĝoiĝoni lauka nuĝanai.

3

Paulo ĝena ekalesia ĝauveina irau bese tarimari fakari ai

¹Tauna moĝa, au Paulo na Vari Namona ĝomi irau bese tarimami ĝemi aĝobata-iaĝiani ĝaramanai, dibura numai atanuni maiĝegu. Au tu Keriso Iesu ĝena dibura tarimanai iaĝoto, ma ĝomi iatami ai Barau ĝenai aĝuriguirini.

²Au atuĝamaĝini, ĝomi tu varau ĝoseĝaĝito, au Barau na ĝena namo lorinai mai ĝauvei eviniguto, Vari Namona, varevare-bara varina, ĝomi irau bese tarimami ĝemi bana ĝobata-iaĝia ĝana.

³Mai vari vekuretoĝana, (mai tu ĝomi irau bese tarimami maki Barau ĝena tarimarimai ĝoiĝoto varina), Barau na au ĝegu ai evaĝa-foforiato. Mai vari maiĝea tu kotuna varau batorea ini fefa nuĝanai.

⁴Mai fefa maiĝa boĝo iavianai nai tu, boĝo riba-maoroni, au Keriso varina vekure-toĝana tu ma ribagu.

⁵Barau na mai vari vekuretoĝana maiĝa guinenai ĝetanu-iaĝomato-ĝoi tarimari tu asi evaĝa-ribarito. Senaĝi toma tu Barau na lauka Veaga ĝenana ĝena apostolo veaĝari e peroveta tarimari veaĝari ĝeri ai ema vaĝa-foforiato.

⁶Mai vari vekuretoĝana Barau na ema vaĝa-foforiato varina tu maiĝa: Irau bese tarimari maki Vari Namona ĝenana Iuda tarimari ĝesi bese sebonai e tauĝani sebonai moĝo beĝe iaĝoni. Benamo mabarabarari na Barau na ekiraĝi-toreato dagarana Keriso Iesu ĝenana beĝe ĝabiani.

⁷Barau ĝena namo e varevare-bara lorinai, mai Vari Namona maiĝa bana varifurakao rakaoa etato. Barau ĝena mai namo e varevare-bara varevarena tu ĝia ĝena seĝuka eĝauveini ĝenana au eviniguto.

⁸Aba, au tu Barau ĝena tarimarima mabarari ĝeri dokodokona tarimagu, senaĝi Barau na ĝena namo lorinai mai ĝauvei eviniguto, irau bese tarimari ĝoirari ai Vari Namona bana ĝobata-iaĝia etato. Mai Vari Namona maiĝa tu Keriso ĝenai maĝuri e dagara namo vedaureari tarimarima tauĝera na asi bita ĝoiĝorini dagarari ekiraĝirini.

⁹ Ema tarimarima mabarari ġeri ai bana kiraġi-fofori ginikau, Barau ġena ura e boioġa tu, irau bese tarimari maki ġeri vevaġa-maġuri taunai bene iaġo. Mai boioġa o tuġamaġi maiġa tu tanobara evesinato monana veġata dagara mabarari eveirito Barauna ġenai vekuretoġa etanuni.

¹⁰ Barau ġena tuġamaġi tu, maitoma vauro ekalesia ġenana ġia ġena iaunega e tuġamaġi iraurauri, ġeveġitaġauni iaukari e ġeri maoro barego lelevaġi iaukari ġeri ai bene vaġa-foforiri etato. Mai iauka maiġeri tu guba fakanai ġetanuni iaukari.

¹¹ Mai tu Barau ġenai vanaġivanaġi etanuni boioġana. Barau na mai ġena boioġa maiġa tu ġita ġera Vereġauka Keriso Iesu ġenana vauro ema vaġa-foforiato.

¹² Ġita tu Keriso ġena maġuri nuġanai tatanuni, ema ġia ġenai taveġabidadamani lorinai, Barau sevina ġana tu asi garina ġesi e nuġara gwaġiġi bita raka-kavini.

¹³ Moġa lorinai au ġegu ura baregona tu asi boġono tuġamaġi-moiramoira, au amidigu-midiguni nai. Au midigu-midigu aġoitaġoni tu, ġomi namo boġono ġoitaġo ġana.

Paulo Efeso ekalesiari ġeri eġauġato

¹⁴ Au na moġeri mabarari Tamara na eveirito dagarari atuġamaġirini nai, ġoiranai avetui-tarini ma aġuri-ġurini.

¹⁵ Ġia tu bese sebona tarimari gubai e tanobarai ġetanuni Tamari. Ma ġia na mai bese sebona arana eturaiato.

¹⁶ Barau mamana marevana tu irau veġata ma barego lelevaġi naima, au na anoġiani, akirani: Ġia ġena mama marevana asikeikeina na ġia taugenā iaukana ġenana seguka bene vinimi, be nuġami e iaukami bene vaġa-kokoreri.

¹⁷ Korana mo dabarai tu Keriso maki ġemi vegabidadama lorinai, be ġomi nuġami ai betanuni. Ema Barau anoġiani, ġomi maki ġau ġokana e lamuna tano nuġana ġana ġevariġoni, benamo ġevelamulamu-tarini nai, ġau tano iatanai eruga-gwaġiġini ilailanai, ġomi maki moġesina nuġami veuravini na bene vaġa-vonuri, be veuravini ai boġono ruġa-gigitari.

¹⁸ Be Barau ġena tarimarima veaġari mabarari ġesi Keriso ġena veuravini barego lelevaġina, rababana, e maukana, e varagenā, ema dodokuna boġono ribaia,

¹⁹ ema boġono riba, mai Keriso ġena veuravini tu riba mabarari maki evanaġirini. Mai veuravini boġono ribaia, be Barau taugenā ema ġena maġuri mabarana na ġomi bene vaġa-vonuvonu-raġemi.

²⁰ Barau ġena seguka ġita ġerai eġauveini tu, dagara barego lelevaġiri eveirini; ġita na ġia tanoġiani dagarari ema ġita na tatuġamaġirini dagarari mabarari maki evanaġirini.

²¹ Moġa lorinai ġita ekalesia nuġanai tarimara e Keriso Iesu ġena maġuri nuġanai tarimarimara ġuruna ġuruna na mabarabarara na Barau moġo bitana vaġa-raġea vanaġivanaġi. Mai tu guruġa mogonina. Amen!

4

Ekalesia mabarara tu Keriso nuġanai taugani sebona

¹ Au Paulo tu dibura numai atanuni, korana Vereġauka vetuġunaġina aiaġo-viniani nai. Au na ġomi alaunaġimini, Barau na ekeamito maġurinai moġo boġono tanu, boġono tanu-namonamo moġo.

² Karomi vekaravari ai ġomi tu boġono vetore-varioġo, ema manau ai boġono tanu, boġono vevaġa-gwaġiġi. Ma karomi tari na veġa ġelearini nai tu, veuravini ai nuġami boġono vaġa-gwaġiġiri karomi ġeri ai, be karomi tata ġesi asi boġono vebaru-vini, a boġono veiau-namo moġo.

³ Ġita tu Iauka Veaġa na eġabi-vegogorato, be tasebonato, ma maino varona na ebaru-vegogorato, be maino ai tatanuni. Moġa lorinai mai tasebonato ma maino ai tatanuni maġurina maiġa tu boġono kokore, be boġono ġabi-gigitaria.

⁴ Ġita mabarara tu taugani sebona moġo, ema Iauka maki sebona moġo ġerai etanuni. Ma Barau na ġomi ekeamito maki dagara sebona moġo uranai ekeamito, ma ġita toma tu mo dagara sebona moġo tatuġamaġi-kauani, (mo tu maġuri vanaġivanaġi).

⁵ Vereġauka sebona etanuni, veġabidadama sebona etanuni, babatiso veġana sebona moġo etanuni.

⁶ Barau maki sebona etanuni, ma ġia tu ġita mabarabarara Tamara; e ġia tu barego ma tarimarima mabarara iata-raġerai etanuni, eġita-ġaurani, ema tarimarima mabarara fakarai eġauveini, ma tarimarima mabarara nuġarai etanuni.

⁷ Ma ġita tata tu Keriso na varevare evinirato, ġia ġena namo e varevare-bara ilailari ai bene vinira etato kavana.

⁸ Moġesina naima Buka Veaġai Keriso varina maiġesi ekirani, "Ġia guba ġana ma evaraġeto nai tu,

dibura tarimari ebarubarurito, benamo ġia murinai evaġa-rakarito, ma eġori-kaurito, benamo tarimarima varevare evinirito.”

⁹ Mai guruġa, “Ġia ma evaraġeto,” anina tu kara? Mai guruġa, “Ġia ma evaraġeto,” na ġita evaġa-ribarani, Keriso tu dia evaraġeto moġo. Asiġina. Ġia tovotovonai tu tanobara gabigabina ġana roġo evariġoto.

¹⁰ Mo evariġoto tarimana moġa, ġereġana guba mabarari tu evanaġirito, ġia tu tuġuna vanigerena ġana evaraġeto. Ġia moġesi evaraġeto anina tu, guba e tanobara mabarana ġia na tauġena laukana na bene vaġa-vonua ġana.

¹¹ Ma ġia tauġena na kotari tu apostolo ġauveina evinirito, (mai tu ekalesia vaġa-ruġana ġauveina), tari tu peroveta ġauveina evinirito, tari tu evanelia ġauveina evinirito, tari tu ekalesia nari ġauveina e Barau ġena guruġa vaġa-riba-iaġina ġauveina evinirito.

¹² Moġeri ġauvei evinirito tauna korikori tu, Barau ġena tarimarima veaġari bene rovina-toreri, ġena ġauvei beġene veiri, e Keriso tauġanina beġene vaġa-tubu ginikaua,

¹³ bene iaġo mo, ġita ġera veġabiddama ema ġera riba Barau Natuna ġenai beġea baregoni e bita sebona-korikorini, benamo bita barego-ginikauni, ema Keriso ġena veiġa e maġuri mabarana maki ġita na bita ġabiani.

¹⁴ Benamo mo dabarai ġita tu dia mero raraka-rarakari kavari, be vevaġa-riba irairauri na e tarimarima ġeri iaunega ġofaġofari na ema tuġamaġi rakavari na asi beġene gofa-iaġora e gofa-iaġomara; noġa moġo ġasi iavara ema ureure na ekwari-iaġoani ekwari-iaġomaiani kavana.

¹⁵ Senaġi ġita tu veuravini ai guruġa moġoniri bitana kiragi, be Keriso ġena maġuri nuġanai dagara mabarari ai tu bitana barego. Keriso tu ġita edebarani.

¹⁶ Keriso tu tauġani debana, ma tauġani mabarana tu ġia ġena seġukai legana tata ġia na etorerito gaburi ai ġeġauveini. Ma ġia ġena seġukai komukomuri evaġa-tubukau gwaġiġirini varovarori na turiġa komukomuri evaġa-tubutubu-kaurini, ema evaġa-tubutubukau gigitaririni. Benamo monana tauġani legana irairau tauġani nuġanai tata ġena ġauvei ġeveiani, benamo tauġani ebaregoni, ema ma veuravinina ġesi tauġena etubu-baregoni.

Barau ġena doġoro tarimari ġeri tanu dabarana

¹⁷ Tauna moġa, au aurani, mai guruġa ta nakira-varami Vereġauka aranai. Au ġegu ura baregona, ġomi tu roġo mukunai ġetanuni tarimari ġeri tanu maġurinai tu asi ma boġono tanu-ġenoġi. Korana ġia ġeri tuġamaġi tu asi aniri dagarari ġeri ai ġetorerini.

¹⁸ Ġia ġeri tuġamaġi tu mukuna furufuru, be asi ġeri tuġamaġi-faka dabarari. Barau ġena maġuri ai maki ġia tu murikanai ġetanuni, korana ġia tu asi ribari ġeri nuġa-bubu ai bene.

¹⁹ Ġia tu veiġa namori mamiraġiri ema veiġa rakavari mamiraġiri maki asiġina ġinavaġi ġemami-raġirini. Ġia tu tauġeri ġevivini-fitoġato rakava ġena, vei-taġuitaġui dabarari ai ġerakani e mata-boraġa veiġari ġeuravini-baregorini.

²⁰ Senaġi ġomi na Keriso ġena maġuri tu dia moġesina ġoribaiato.

²¹ Ġomi na ġia varina tu moġoni ġoseġaġiato, ema Iesu ġena maġuri nuġanai guruġa moġonina Iesu ġenai etanuni tu ġevaġa-riba-iaġimito.

²² Ġevaġa-ribamito tarimari ġekirato: Ġemi maġuri guineri boġono koki-fitoġari, dabuġa guineri ġokoki-fitoġarini kavana. Mo tu tarima guinena ġekiraġiato. Ġia tu dagara tari na ġeġofaiani, ma moġeri mata-ġaniġaniri ai be erakava-kwaikwaini. Ġia tu boġono koki-fitoġaia.

²³ Be ġemi tuġamaġi mabarana ma bene veiareva-ġenoġi.

²⁴ Ema tarima varिġuna ma boġono riġo-kaua, dabuġa varिġuna ġoriġo-kauani kavana. Mai tarima varिġuna tu Barau ilailana iobukaibuka e veaġa eveiato.

²⁵ Moġa lorinai ġomi tata na veiġa ġofaġofari ġemina boġono tore-veġitari, benamo sevimi tarimari ġesi guruġa moġoniri moġo boġono kiragi. Moġesi boġono vei, korana ġita mabarara tu tauġani sebona legana tata.

²⁶ Boġo baruni, senaġi vei-rakava tu asi boġono vei; e ġemi baru asi bene iaġo mo, ġaro benea keto-firiġo.

²⁷ Diabolo faka ta asi boġono vinya.

²⁸ Elemani tarimana asi ma bene lema-ġenoġi, a bene iaġo, benea ġauvei. Ġia tauġena ġimana na ġauvei namori bene veiri, be bene ġoitagori dagarari kotari tu asi ġeri-ġari tarimari bene vaġa-kava-iaġiri.

²⁹ Bokami na guruġa rakavari asi beġene raka-rosi. Senaġi vevaġa-kokore guruġari moġo boġono kiragi, moira tarimari vaġa-kavari ġana, be beġe seġaġirini nai, kokore beġene ġabi.

³⁰ Ema Barau ġena Iauka Veaġa asi boġono vaġa-nuġa-metoa. Korana Iauka Veaġa tu Barau ġena vetoġa o maka ġomi ġemi ai etanuni. Moġa anina ġomi tu ġia ġena. Mani maka ġomi ġemi ai tu betanuni, beiaġoni mo, Barau na ġomi bevaġa-maġuri korikorimini ġaroni.

³¹ Nuġa ġirimaġirima, baru e baru-rakavarakava, vevane ema vevaġi, e tarima vaġa-rakavari tuġamaġiri, ema guruġa rakavari mabarari boġono tore-veġitari ġemina.

³² Karomi ġesi boġono veiau-namo ema boġono veveura-vini. Tata karomi ġeri ai veiġa rakavari ġoveirini moġeri boġono tuġamaġi-fitoġari, Keriso ġena maġuri nuġana! Barau na ġemi rakava etuġamaġi-fitoġarito kavana.

5

Mamai boġono tanu

¹ Gomi tu Barau natuna, euravini-baregomini, moġa lorinai ġia boġono tovtotova.

² Veuravini ai boġono tanu Keriso kavana. Ġita eura-vinirato lorinai, tauġena tauġanina e ġena maġuri etore-tariato ġita urarai. Ġia na tauġanina tu varevare dagarana bonana namo vedaureana dagarana! evaġa-iaġoato, ema Barau ġena ginitaġo mamoenai evaġa-iaġoato.

³ Ġomi tu Barau ġena tarima veaġami ai ġoiaġoto lorinai, kima ema mata-boraġa guruġari, veiġa mirori guruġari, e mata-ġaniġani guruġari ġomi fakami ai asi boġono kiraġiri.

⁴ Guruġa mirori, guruġa babori, ema vaseva rakavari maki asi boġono kiraġiri, korana maġeri tu asi namo, senaġi ġomi tu Barau moġo boġono tanikiu-vinia.

⁵ Korana dagara sebona boġono riba: Ekimani tarimana, e veiġa mirori eveini tarimana, e emata-ġaniġanini tarimana tu Keriso ema Barau ġeri Basileiai ġia tu asi voina e asi ġena gabu. Mata-ġaniġani veigana tu noġa moġo kwaivakuku toma-rakariġo-vinina veigana kavana.

⁶ Tarimarima ġeri ġofaġofa guruġari na asi bene ġofami, korana Barau ġena baru-baregona tu manigeri veiġa ġaramari ai ġeseġaforeni tarimari iatari ai bema vaġa-foforiani.

⁷ Moġa lorinai moġesi ġeveini tarimari ġesi asi boġono vekako.

⁸ Gomi guinenai maki mukuna furufuru tarimari, senaġi toma ġomi Vereġauka ġena maġuri nuġana! tu mama tarimari. Ġomi tu mama natuna, be mama maġurinai boġono tanu ema boġono raka.

⁹ Mama ġwaġwana tu veiġa e tuġamaġi namori, veiġa iobukaibukari, ema guruġa e maġuri moġoniri nuġari ai etanuni.

¹⁰ Vereġauka na kamara maġuri ema veiġa euravini-baregorini boġono vetauri, be boġono ribari.

¹¹ Mukuna veigari ema ġauveiri tu asi ġwaġwari namori, be asi boġono veiri ema asi boġono ġauvei-iaġiri. A ġomi na moġeri veiġa e ġauvei tu boġono vaġa-foforiri, mo tu veirakava veigari.

¹² Korana mai seġafore tarimari na kara ġevei-vekuretoġarini, moġeri tu bokiraġirini ai moġo bemaiakamuni.

¹³ Senaġi mama na tu moġeri dagara mabarari evaġa-fofori ginikaurini, be mamai tu vetoġari korikori ġefoforini,

¹⁴ Korana mama na vauro dagara vetoġari korikori evaġa-foforirini. Moġesi naima ġera guruġa ta ekirani,

“Roġo ogenani tarimamu notataġa!

Mase na novariġisi!

Be Keriso na bene mama-tarimu.”

¹⁵ Moġa lorinai, ġemi veiġa loriri boġono toreri, babo tarimari kavari asi boġono vei, senaġi iaunega tarimari boġono tovtotovori.

¹⁶ Gemi taimi mabarana boġono ġauvei-iaġi ginikauri, a ta asi boġono fitoġa-kavaia, korana toma tu nega rakava-kwaikwaina.

¹⁷ Tauna moġa, asi boġono vei-babobabo, senaġi Vereġauka ġena ura tu kara, moġeri boġono tuġamaġi-fakari, be boġono ribari.

¹⁸ Wain asi boġono niu-lelevaġi, bevaġa-babomini ġesi. Mo veiġa na ġemi maġuri bevaġa-rakavaiani. A ġomi tu Iauka Veaġa na neġi bene vaġa-vonuvonu-raġemi.

¹⁹ Karomi Salamo ai e Barau vaġa-raġena mariri ai ema Iauka Veaġa na evinimini mariri ai boġono vaġa-guruġari. Boġono mari ema nuġami mabarari ma iakumi ġesi Vereġauka boġono vaġa-raġea.

²⁰ Vanaġivanagħi ġera Vereġauka Iesu Keriso aranai Tamara Barau boġono tanikiu-vinia dagarana mabarari dairi ai.

²¹ Karomi gabureri ai boĝono tanu, moĝesi boĝo veini tu Keriso boĝo gubakauani.

Veĝaraĝo vavineri ema tauri

²² Veĝaraĝo vavinemi, Vereĝauka ĝena veĝitaĝau gaburenai ĝotanuni kavana, ĝaraĝomi ĝeri veĝitaĝau gaburenai boĝono tanu.

²³ Korana tau tu ĝaraĝona vavinena ĝena deba tarimana, Keriso ekalesia ĝena deba tarimana kavana. Keriso tu ekalesia ĝena vevaĝa-maĝuri tarimana. Ekalesia tu Keriso tauĝanina.

²⁴ Vaĝa-ilailana ekalesia Keriso ĝena veĝitaĝau gaburenai etanuni kavana, vavine maki ĝaraĝori tauri ĝeri veĝitaĝau gabureri ai beĝene tanu dagara mabarari ai.

²⁵ Tau, ĝaraĝomi vavineri boĝono ura-viniri, Keriso na ekalesia eura-viniato ilailanai, benamo ĝia uranai Keriso tauĝena ĝena maĝuri etore-tariato.

²⁶ Keriso moĝesina eveito tu, ekalesia bene vaĝa-veaĝaia, ĝena tarimarimai beĝene iaĝo ĝana. Ĝia na ĝena guruĝa na e nanu na eĝuriĝiato, evaĝa-veaĝaiato.

²⁷ Benamo Keriso tauĝena ĝoirana ekalesia marevana baregona na benema vaĝa-ruĝa-taria ĝana. Benamo ekalesia ĝia ĝoiranai bene ruĝa tu, ĝenai miro misina ta maki asiĝina, kefi ĝemakuku-makukuni kavari maki asiĝina, ema rakava misina ta maki asiĝina ĝinavaĝi. Senaĝi ekalesia Keriso ĝoiranai tu veaĝa ema vaĝa-daĝana kererena misina ta maki asiĝina ĝinavaĝi bene ruĝa-tari.

²⁸ Mai dabara sebonai tau na ĝaraĝori vavineri beĝene ura-viniri. Beĝene ura-viniri tauĝeri tauĝaniri ĝeura-vinirini ilailanai. Ĝaraĝona vavinena eura-viniani tarimana tu ĝia tauĝena maki eveura-vinini.

²⁹ Korana tau ta na ĝia tauĝena tauĝanina vaĝa-rakavana tu asi eurani, senaĝi eĝubuani e eĝitaĝau-ginikauani, Keriso na ĝena ekalesia eveiani kavana.

³⁰ Korana ĝita tu ĝia tauĝanina legana.

³¹ (Tau e vavine tu tauĝanina sebona, Buka Veaĝai ekirani kavana, ekirani), “Moĝesi naima tau na tamana e sinana beraga-kwanerini, benamo ĝaraĝona vavinena ĝenai bema-kafakauni, benamo tauri ruarua tauĝani sebonai beĝe iaĝoni.”

³² Mai guruĝa ema maĝuri maiĝa tu vekure-toĝa, ma anina tu barego lelevaĝi. Au na Keriso ema ekalesia ĝeri veĝaraĝo akiraĝirini.

³³ Senaĝi ma nakira: Gomi tata na maki ĝaraĝomi vavineri boĝono ura-viniri, tauĝemi tauĝanimi ĝoura-vinirini kavana. Vavine na maki ĝaraĝomi tauri boĝono gubakauri.

6

Natu e tama sina

¹ Natu, tamami e sinami garori boĝono seĝaĝiri Vereĝauka ĝena maĝuri nuĝanai ĝotanuni nai, korana mo tu veĝa maorona.

² “Tamamu e sinamu bono gubakauri,” korana mai tu taravatu giniginena ma kiraĝi-torena ĝesi dagarana:

³ “Be ĝemu tanu maĝurina bene namo ema mai tanobarai ĝemu tanu-maĝuriri beĝene mauka.”

⁴ Ma tama na maki, natumi asi boĝono vaĝa-baruri, senaĝi Vereĝauka ĝena vevaĝa-riba guruĝari ema sisiba guruĝari boĝono viniri. Be moĝeri guruĝa e veĝa beĝene korana-iaĝiri ĝeri tanu ĝarori mabarari ai.

Tuĝu-rakaorakao merori e ĝeri baregori

⁵ Tuĝu-rakaorakao meromi, ma vegubakaumi e ma garimi ĝesi mai tanobarai ĝeĝita-ĝaumini tarimari garori boĝono seĝaĝiri. Gomi ĝeĝita-ĝaumini tarimari maniĝeri tu ma nuĝami mabarari ĝesi boĝono seĝaĝi-viniri, Keriso nuĝami mabarari ĝesi boĝoro seĝaĝi-vinia ilailanai boĝono seĝaĝi-viniri.

⁶ Tarima tari tu ĝeĝita-ĝaurini tarimari iauri ĝevaĝa-namori ĝana tu ĝoirari ai ĝeĝauvei-ginikauni, senaĝi ĝeĝita-ĝaurini tarimari ĝeraka-doĝe-muriĝini tu asi ĝeĝauvei-kokoreni. Ĝia ĝeri veĝa na asi boĝono iaĝo. Ĝomi tu Keriso ĝena vetuĝunaĝi tarimami lorinai, ma nuĝami mabarari ĝesi Barau ĝena ura boĝono veia.

⁷ Nuĝami mabarari ma namori ĝesi vetuĝunaĝi boĝono iaĝo-vini, Vereĝauka ĝenai boĝoro veia kavana, a dia tarimarima ĝeri.

⁸ Korana ribami, Vereĝauka na ĝemi ĝauvei namori ĝoveirini voiri tata bevinimini. Enabe ĝomi tu tuĝu-rakaorakao tarimami o fakai e maĝuri namonai ĝotanuni tarimami, voimi tata bevinimini veĝata.

⁹ Gomi veĝitaĝau tarimami maki, ĝemi tuĝu-rakaorakao merori ĝeri ai veĝa namori boĝono vei. Veĝa metori e vaĝa-gariri veĝari ĝeri ai asi boĝono vei, korana ĝomi ma ribami, ĝia ema ĝomi eĝita-ĝaumini Verena baregona tu gubai etanuni. Ema na

ribami maki, ġia na tarimarima ġeri vetoġai tu asi eġabi-raġerini, ġia ġenai tarimarima tu mabarari ilaila moġo.

Vetari dabuġari

¹⁰ Gegu guruġa magona tu maġa: Boġono kokore Vereġauka ġena maġuri nuġanai, ema Vereġauka ġena seġuka na bene vaġa-kokoremi.

¹¹ Barau ġena vetari dabuġari mabarari boġono veiri, be Diabolo ġena iaunega boioġari ġofaġofari eveirini nai, boġono kokore, be boġono tore-ġauri.

¹² Korana ġita tu dia tarimarima ġesi tavetarini. Asigina. Ġita tu ġeveġitaġauni iaukari bareġori, e ġeri maoro barego iaukari, e mai tanobarai mukuna ġeġita-ġauani iaukari, ema iauka rakavari asisebo guba gaburi ai ġetanuni iaukari ġesi tavevaġini.

¹³ Moġa lorinai Barau ġena vetari dabuġari mabarari na ġovedabuġa, be ġaro rakava kwaikwaina bene iaġoma nai, ġomi tu boġono ruġa-gigitari, ema ġauvei mabarari boġo vei-ġosirini murinai, ġomi tu roġo boġono ritoġo-gwaġiġi.

¹⁴ Be, boġono ruġa-gigitari, ma maġesi boġono vedabuġa: Gabakami ai guruġa moġonina boġono toua, gabaġau gabakami ai ġotouani kavana. Vei-iobukaiobuka tu koba kouġauna ġana, funu dabuġa kavana kobami ai boġono kafa-kauri.

¹⁵ Ema kwakumi ai tu maino varina namona boġono fiua veiġana boġono veia, tamaka ġoveirini kavana.

¹⁶ Moġeri muriri ai tu veġabidadama ġesina boġono ġabi-vaisia, monana Diabolo ġena veiġa rakavari na bedibamini dibari ma karava-karavari ġesi boġo kourini e boġo laubusebuserini riba.

¹⁷ Ema vevaġa-maġuri boġono ġabia, ġemi kwaraġau ai boġono vaġa-iaġoa. Ema Barau ġena guruġa boġono ġabi-vaisia vetari baġana kavana, Barau ġena guruġa tu Iauka Veaġa ġena vetari baġana.

¹⁸ Iauka Veaġa ġena seġuka nuġanai boġono ġauġau-vanaġi vanaġi. Ġemi ġauġau ai tu ġauġau dabarari irauirauri ai boġono ġurigiuri ema ġemi ura dagarari mabarari noġinoġiri boġono vei. Tauġemi lorimi maki boġono vetore e rakava boġono vaġa-darereri, ema Barau ġena tarima veaġari mabarari iatari ai boġono ġauġau-vanaġivanaġi.

¹⁹ Au maki iatagu ai boġono ġurigiuri. Be naguruġa ġana, bokagu bana keoa tu, Iauka Veaġa na guruġa bene vinigu, be mai Vari Namona vekuretoġana tu asi garigu ġesi tarimarima bana kira-varari.

²⁰ Au tu mai Vari Namona maġa bana fiua ġana tarimagu. Ma au tu mai Vari Namona uranai dibura numai ma seinigu atanuni. Boġono ġauġau, be Barau na bana kiraġia etoni ilailanai, asi garigu ġesi bana kiraġi-foforia.

Guruġa magona

²¹ Tikiko tu ġita tarikakara namona ta ema ġia tu ma ġena vetuġamaġikau Vereġauka ġena maġuri nuġanai. Dagara mabarari, au aiġesina atanuni e kara aveini variri mabarari tu boġono ribari ġana, be Tikiko na vauro beasi kira-varamini.

²² Au na ġia tu moġesina naima atugu-iaġosiani. Bene iaġosi, be gai ġema tanu maġurina mainai tu aiġesina boġonoasi ribari, ema beneasi vaġa-gwaġiġimi.

²³ Maino tarikaka mabarami ġesi bene tanu. Tamara Barau ema Vereġauka Iesu Keriso ġerina eiāġomani veuravinina ma veġabidadamana ġesi maki tarikaka mabarari ġesi bene tanu.

²⁴ Barau ġena namo e varevare-bara tu, ġera Vereġauka Iesu Keriso asi ekorini veuravinina na ġeuravini-vanaġi vanaġiani tarimari mabarari iatari ai bene tanu.

PAULO ĜENA TORETORE FILIPI EKALESIARI ĜERI

Filipi vaĝa-foforina guruĝari

Ekalesia doĝorona Filipi ai tu Paulo ema Silas ĝerina eĝorato, mo tu Paulo ĝena evanelia varivarina vaĝa-ruaruana eveiato taiminai (Apostolo 16).

Paulo na mai fefa tu Romai ediburato-ĝoi nuĝanai etoreato. Mai fefa tu laĝani 60 beiaĝo 61 fakanai ta etoreato, mo tu Iesu emaseto murinai.

Mai buka anina baregona tu "Iaku ema verere", ema ĝena siri baregona tu karoa 4:4. Mai fefa nuĝanai "iaku" tu ĝutuma boiavi-ĝoitaĝorini: 1:4-6; 1:14-18; 1:25-26; 2:2; 2:14-16; 2:17-18; 2:25-29; 3:1-3; 4:4; 4:10-12; ema veĝabidadama, veuravini, nuĝa-sebona ema vetore-variĝo o vevaĝa-manau boĝo ĝitaiani tu iaku ĝenana etubu-raĝeni.

Mai fefa etoreato tu, 1) ekalesia doĝorona bene tanikiuri, ĝevarevare-viniato lorinai, ema bene vaĝa-ribari bevarivaririni; 2) bene launaĝiri, Keriso ĝena tuĝamaĝi beĝene tovtotovo, ĝeri tuĝamaĝi sebonai moĝo beĝene torea; 3) bene launaĝiri, taimi namori ai o rakavari ai beĝene iaku moĝo ema ĝeri vetarikaka Iesu Keriso ĝesi tu bene tanu asi bene iagalaga.

Paulo na mai fefa tu maiĝesina eboioĝaiato:

1. Keriso tu ĝita ĝera maĝuri - karoa 1
2. Keriso tu ĝita ĝera tuĝamaĝi ai bene tanu - karoa 2
3. Keriso ĝenai matara bene tubukau - karoa 3
4. Keriso tu ĝita ĝera kokore korana - karoa 4

¹ Au Paulo ema Timoteo, Keriso Iesu ĝena vetuĝunaĝi tauma, na ĝomi Filipi ai Barau ĝena tarimarima veaĝari ma ĝemi ekalesia guine-iaĝina tarimari ema vevaĝa-kava tarimari ĝesi atore-vinimini. Gomi tu Keriso Iesu ĝesi varau ĝosebonato.

² Barau ĝita Tamara ema ĝera Vereĝauka Iesu Keriso ĝerina varevare-bara ema maino ĝemi ai bene tanu.

Paulo na Barau evaĝa-namoato

³ Ĝomi atuĝamaĝimini negari mabarari ai, ĝegu Barau atanikiu-viniani.

⁴ Ĝegu ĝauĝau ai vanaĝivanaĝi ĝomi mabarami iatami ai aĝuriĝurini ma iakugu ĝesi,

⁵ korana ĝemi vevaĝa-kava dabarari namori na ĝovaĝa-kavaguto Vari Namona varifinai, Vari Namona ĝoĝabi-raĝeato ĝarona na beiaĝoma mo initoma.

⁶ Ma ribagu maoro, Barau na mai ĝauvei namona, nuĝami ai evaĝa-foforiato ĝauveina tu, bevesiriĝuni, beiaĝoni mo, Keriso Iesu ĝena ĝenoĝoi ĝaronai vau bevaĝa-kori ginikauani.

⁷ Gomi mabarami ĝegu vemamiraĝi na evaĝa-moĝoniani, ĝomi tu au nuĝagu ai roĝo ĝotanuni. Aba, dibura numai atanuni nuĝanai, o Kota ĝeseĝaĝini tarimari ĝoirari ai Vari Namona akiraĝi-foforiani e gogobana aragani nuĝanai maki, ĝomi tu au nuĝagu ai veĝata. Korana ĝomi mabarami maki Barau na ĝena varevare-bara evinimito, au eviniguto kavana.

⁸ Barau ma ribana vedaurea, au ĝomi akiramini, au ĝegu veuravini ĝomi mabarami ĝemi ai tu barego vedaurea, Keriso Iesu na euravini-baregomini kavana.

⁹ Barau anoĝiani, ĝemi ai veuravini bene tubu-barego vedaurea, ma riba ema iaunega bene vinimi, be Barau ĝena ura boĝono riba-ginikauri.

¹⁰ Monana vauro boĝo ribani, dagara namori tu aiĝeri na ĝemi tanu beĝe vaĝa-namorini rakava mabarari ĝerina, benamo Iesu Keriso ma beĝenoĝoi-iaĝomani ĝaronai, ĝomi tu asi vetoukaumi e asi ĝemi kerere ta maki.

¹¹ Ema veĝa namori e iobukaiobukari mabarari, Iesu Keriso ĝenana ĝeiaĝomani dagarari, ĝomi ĝemi ai beĝe tanuni, Barau vevato-iaĝina e vaĝa-raĝena ĝana.

Paulo tu dibura numai etanuni, senaĝi Vari Namona ebaregoni

¹² Tarikakagu, ĝegu ura boĝono riba, au beĝe diburagu o kara beĝe ĝora ĝegu ai dagarari na Vari Namona ĝena tubu tu asi beĝe vaĝa-rakavaia. Asiĝina. Moĝeri na tu Vari Namona ĝena tubu beĝe vaĝa-baregoa.

¹³ Mai maĝuri ĝenana Kaisara, Roma ĝeri vere, ĝena numa ĝeĝita-ĝauani tauri ema tarimarima mabarari maki beĝe riba, au tu Iesu Keriso ĝena vetuĝunaĝi aiaĝo-vinini ĝaramanai, dibura numai atanuni.

¹⁴ Ma ĝegu tanu dibura numai ĝenana maki au tarikakagu ĝutuma ĝeri veĝabidadama Vereĝauka ĝenai beĝe gwaĝiĝi naima, Barau ĝena guruĝa ma kokoreri ĝesi ĝeĝobata-iaĝiani.

¹⁵ Moğoni, tarima kotari na ġegu ġauvei namo dainai, ġemama-viniguni. Ġeri ura tu au ġevaġa-rakavagu ġetoni, naima Keriso ġeġobata-iaġiani. Senaġi kotari na tu nuġa-namo ai ġeġobata-iaġiani.

¹⁶ Maġeri tu veuravini ġenana ġeġobatani, korana ribari, au diburai atanuni tu, Vari Namona gogobana bana raga ġana Kota tarimari ġoirari ai.

¹⁷ A tarima kotari na Keriso ġeġobata-iaġiani tu dia nuġa-namo ai, senaġi tauġeri arari beġene vaġa-raġeri ġana. Ġeri tuġamaġi tu, au dibura numanai roġo atanuni nuġanai, ġegu meto ġevaġa-baregoa ġetoni.

¹⁸ Bevaitovo, au ġegu iaku tu ebaregoni. Korana nuġa-namo ai Keriso ġeġobata-iaġiani ba asiġina, senaġi dagara baregona tu Keriso varina bene fiu-rovorovo dabara mabarari ai. Ma ġegu iaku maki bebarego-iaġoni moġo.

¹⁹ Korana ġemi ġauġau ai Barau ġonoġiani ema Iesu Keriso Iaukana na evaġa-kavaguni. Moġa lorinai au ribagu, au tu maġuri badoġariani.

²⁰ Ġegu ura baregona ema dabaragu mabarana ġesi akirani, au tu asiġina ġinavaġi bana moira ġegu ġauvei nuġanai. Moġesi nai initoma dibura numai vanaġivanaġi akokoreni kavana bana kokore, be au taugu mabarana ġesi Iesu Keriso arana ma bana vaġa-raġea ġegu maġuri ġenana o ġegu mase ġenana.

²¹ Be au ġegu ai maġuri tu kara? Iesu Keriso moġo! Moġa lorinai mase au ġegu ai tu dagara namona.

²² Betaġu bema roġo bamaġuri-taġoni nai, ribagu Keriso ġena ġauvei roġo baveiani, senaġi asi aribani, aiġa bara ġabia, mase ba maġuri?

²³ Au tu dagara ruarua auravini-baregorini: Ġegu ura mai maġuri bara raga-kwanea, be Keriso sevinai bara tanu tu dagara namo vedaureana moġo;

²⁴ senaġi namona tu ġomi bana vaġa-kavami ġana, be mai tauġani nuġanai roġo bana tanu.

²⁵ Au tu ribagu, au roġo maġuri batanuni. Ġomi ġesi roġo bita tanuni, korana ġemi veġabidadama vaġa-tuburi ema ġemi iaku vaġa-baregori ġana.

²⁶ Au ma baiaġosini neganai, ġomi tu boġo iakuni au ġegu ai, ema Keriso Iesu boġo vaġa-raġeani.

Ġemi tanu

²⁷ Dagara sebona tu Keriso ġena Vari Namona na ekiraġiani ilailanai boġono tanu. Baiaġosini ġitagitami ba manaġa na moġo varimi baseġaġini, baribani, ġomi tu nuġa-namo ai ġoritogo-gigitarini ema nuġa sebonai Vari Namona ġoveseġaġi-vevini-iaġiani ma kokoremi ġesi.

²⁸ Gebaru-vinimini tarimari na asiġina ġinavaġi beġene vaġa-garimi. Monana ġeri ai vetoġa beveiani, ġia tu Barau na bevaġa-rakava kwaikwairini, a ġomi tu Barau na bevaġa-maġurimini.

²⁹ Ġomi tu dia Keriso ġena varevare-bara e namo lorinai Keriso ġovaġa-moġoniani tarimami ai ġoiagoato moġo, senaġi ġomi tu Keriso ġena midigumidigu ai maki boġono midigu ġana ġia arana.

³⁰ Ġomi maki initoma au ġesi bisini vetari-vegogo. Mai vetari tu vetari guinena ġoġitaato-ġoi vetarina ini roġo ma ġoseġaġiani vetarina roġo avetari-iaġiani.

2

Keriso ġena vevaġa-manau ema iar-u-korokoro

¹ Ġemi maġuri Keriso nuġanai monana evaġa-kokoremimi ba? Ema ġena veuravini na ġemi tuġamaġi evaġa-gwaġiġirini ba? Ġomi na Iauka Veaġa ġatami ai ġovaġa-iaġoato ma ġotanu-vegogoni ba? Ma ġemi vevetuġaġwa ema vevaġa-kava ġatami tata ġeri ai goveirini ba?

² Moġa lorinai anoġimini, boġono vaġa-iaku korikorigu, ġemi tuġamaġi vegogo ai, veuravini sebonai ema nuġami e iaukami maki sebonai boġono tanu.

³ Dagara ta asi boġono veia vevaġa-raġe tuġamaġina maġurina ema veiavi maġuriri ai, senaġi ġomi tauġemi boġono vevaġa-varigo tata fakami ai, a karomi boġono ġabi-ġesitaġori.

⁴ Karomi ġeri namo maki boġono vetau, a dia ġomi tauġemi ġereġami ġemi namo moġo.

⁵ Ġemi veiġai Keriso Iesu kavana boġono vei, ġena tuġamaġi boġono ġabia:

⁶ Ġia tu dagara mabarari ai

Barau ġesi ilaila,

senaġi asi etuġamaġito,

mo maġuri moġa bene ġabi-taria.

⁷ Ġia tu tauġena evekiraġi-fitoġato,

benamo vetuḡunaḡi merona kavanai eiaḡoto.

Ĝia maki tarimarima kavana eḡorato,
benamo ḡita fakarai ema tanuto.

⁸ Ĝia tu eveḡwa-variḡoto ema Barau eseḡaḡi-viniato-ḡoi mo ḡena mase,
aba, satauro ai emaseto noḡa moḡo vei-rakava tarimana ta kavana.

⁹ Moḡa lorinai Barau na eḡabi-vaisiatio guba tuḡunai,
ma ara namo vedaureana eviniatio.

Mo ara tu ara ta ḡesi asi ilaila.

¹⁰ Iesu arana bakunai guba aneruri,
e tanobarai ḡetanuni tarimari,

ema tanobara gaburenai o mase gabunai ḡetanuni tarimari mabarari beḡene vetuitui-tari
ḡia ḡoiranai.

¹¹ Ema mea mabarari na Iesu Keriso beḡene kiraḡia “Vereḡauka”,
Barau ḡita Tamara vevato-iaḡina ḡana.

Bitana mama-rovorovo tanobara ḡena mama

¹² Au ḡatagu mabarami, vanaḡivanaḡi au ḡoseḡaḡi-viniguto-ḡoi ḡera ḡauvei vegogo ai
kavana murigu ai maki boḡono seḡaḡi-vinigu veḡata. Boḡono ḡauvei ma garimi ema ma
ḡoḡo-ḡoḡomi ḡesi, maḡuri boḡono doḡaria uranai.

¹³ Korana Barau tu ḡomi nuḡami ai eḡauveini, ḡomi elaunaḡimini e kokore evinimini, ḡena
ura boḡono veiri ḡana.

¹⁴ ḡauvei mabarari asi mugumugumi ema asi vanevanemi ḡesi boḡono ḡauvei-iaḡiri.

¹⁵ Be ḡomi tu Barau natuna asi vetoukaumi ema namo vedaureami ai boḡono iaḡo, mai
tanobara rakava kwaikwai ema ḡevei-rakava-moḡovaḡini tarimari fakari ai; be boḡono
mama-rovorovo, noḡa moḡo visiḡu boḡi ai ḡemamani kavana.

¹⁶ Mo tu bema maḡuri guruḡana boḡo korana-iaḡiani e boḡo vari-fiuanai. Moḡa boḡo
veiani nai, au tu ma ḡegu maoro havekokorokuni ḡomi ḡemi ai Keriso ma beḡenoḡoi-
iaḡomani ḡaronai. Korana mo ḡaro ai au tu baribani, au ḡegu vekwaraḡi ema ḡauvei ai
tu asi avekwaraḡi-kavato.

¹⁷ Bere au bara mase, ma raragu bere vebubu-rovorovo, noḡa moḡo ḡomi ḡemi
veḡabadadama varevarena Barau ḡoviniani kavana. Irau moḡesi nai, au tu aiakuni, ema
ḡegu verere maki ḡomi ḡesi tavei-sebonaiani.

¹⁸ Mai dabara sebonai ḡomi maki boḡono verere, be mabarara bitana verere-vegogo.

Timoteo batuḡu-iaḡosiani

¹⁹ Bema Iesu Vereḡauka ḡena ura nai tu, atuḡamaḡini, Timoteo tu batuḡu-iaḡosiani; be
ḡomi varimi banama seḡaḡia nai, au nuḡagu benema gena-tari.

²⁰ Timoteo ḡereḡana na moḡo au ḡegu vemamiraḡi eribaiani, ema ḡomi ḡobimi ve-
tuḡamaḡina evei-baregoni.

²¹ Tarimarima mabarari tu tauḡeri ḡeri maḡuri moḡo loriri ḡetorerini, a Iesu Keriso ḡena
ḡauvei tu asi ḡevetauani.

²² ḡomi tu ribami ginikau, ḡia vetoḡana ema ḡena vetuḡamaḡikau, kamasi ḡia e au, noḡa
tama ma natuna ḡeḡauvei-vegogoni kavana, Vari Namona ḡaḡobata-iaḡiani.

²³ Moḡa lorinai bana tuḡu-iaḡosi-ḡarimoḡia, maḡuri mainai kamasi bevetoreni ḡegu ai
bana riba vau.

²⁴ A ḡegu vetuḡamaḡikau Vereḡauka ḡenai atoreani, au maki vau mani ma baiaḡosini
ḡemi ai.

Epafrodito ḡena iaḡosi

²⁵ ḡegu tuḡamaḡi ai akirani, namona tu tarikakara Epafrodito ma bana tuḡu-ḡenoḡoi-
iaḡosia. Ĝia maki au ḡesi ḡaḡauveito e Keriso ḡena vetari ai ḡavetari-vegogoto tauna. Gomi
maki vetuḡunaḡimi eveito, au ḡegu ai ḡotuḡuato nai, ḡemi varevare dagarari na bene vaḡa-
kavagu ḡana.

²⁶ Ĝia maki eura-baregoni ḡomi bene ḡitami. Ema enuḡa-vekwaraḡini ḡemi ai, korana
ḡena keve varina ḡoseḡaḡiatio nai.

²⁷ Moḡoni veḡata, ḡia tu ekeve-rakavato, dori emaseto, senaḡi Barau ḡena vevetuḡaḡwa
ḡia iatanai, ema dia ḡia iatanai moḡo, senaḡi au iatagu ai maki, korana ḡegu nuḡa-meto
bebaregoni garina.

²⁸ Moḡa lorinai ḡegu ura baregona bana ragatuḡu-iaḡosia ḡemi ai, be boḡono ḡitaia ma
boḡono iaku, benamo au ḡegu nuḡa-vekwaraḡi bene meraḡa kekei.

²⁹ Boḡono ḡabi-raḡea ma iakumi ḡesi ḡera Vereḡauka aranai, ema ḡemi vegubakau
marevana bene fofori tarima maiḡesiri ḡeri ai.

³⁰ Korana ġena maġuri ġaramana asi eveito, ema dori emaseto, korana Keriso Varina Namona ġaramanai. Vetoga maġesina ġegu vevaġa-kava ġomi na ġoro vinigu kavana tu ġia na au ema vaġa-kavaguto.

3

Keriso evaġa-moġoniani tauna tu vei-iobukaiobuka tarimana

¹ Tarikakagu mabarami, ġegu guruġa magona nuġanai maġesi nakira: Boġono iaku, korana Vereġauka ġesi ġokaro-vekafani nai. Asi bagauni, guruġa guineri batuġu-ġenoġoi ġenoġoini, korana ġomi ġobimi toretoreri ġana.

² Lorimi boġono vetore ekalesia vaġa-rakavana tauri gariri. Ġia tu kwaiva rakavari kavana, ġeri tuġamaġi tu ġita mabarara tauġanira kefiru bitana lama-vagiri ġetoni, Isaraela besena ġeveini kavana.

³ Senaġi tauġani kefiru lamavaġi veigana korikorina tu ġita na taġabiato, a ġia tu asigi: Ġita tu Iauka Veaġa ġena seġukai Barau tatutuġu-tari viniani, ema Keriso Iesu ġenai tavetuġa-maġikauni, ema ġera veġabidadama tu dia tauġani ai vetoga ġeveini moġeri ai tatoreani.

⁴ Bere tauġani ġena vetoga ema ġera veigā dagara baregori nai, ġegu veġabidadama tu tauġani ġena vetoga dagarari ema ġegu veigā ġeri ai bara torea riba. Bema ta ġena veġabidadama tauġanina ġena vetoga dagarari ema ġena veigā ġeri ai bene torea etoni nai, au tu ma ġegu maoro moġeri dagarai bara veġabidadama.

⁵ Amagurito, garo vaġa-imaima toitoinali (8) tauġanigu kefina ġelama-vagiato. Au tu Isaraela tarimagu, Beniamina ġena doġoro tarimagu, Heberu rarari tarimagu korikori. Iuda tarimari ġeri taravatu akorana-iaġi ġinikauato-ġoi, korana au tu Farisea tarimagu.

⁶ Barau ġena taravatu bana korana-iaġi ġinikaua ġaramanai tu, ekalesia doġorona avaġa-midigu midigurito. Ema Iuda ġeri taravatu mabarabarari akorana-iaġi ġinikau ġinikaurito-ġoi, asi ġegu vei-rakava ta.

⁷ Moġeri dagara mabarari guinenai tu atuġamaġi-baregorito-ġoi; senaġi initoma Keriso ama ribaiato nai, mo dagara guineri mabarari aġitarini tu asi ġeri namo ta maki.

⁸ Moġoni veġata, dagara mabarari tu asi tauri dagarari, senaġi dagara baregona sebona moġo tu Keriso Iesu, ġegu Vereġauka, bana riba-ġinikaua. Oba, dagara mabarari momo ai ġeiaġoto au ġegu ai, Keriso moġo bana ġabi-ġigitaria ġana uranai.

⁹ Ġegu ura ġia ġesi bana sebona-korikori, korana ribagu, taravatu ekorana-iaġi ġinikauani tarimana Barau goiranai ġia tu dia vei-iobukaiobuka tarimana, senaġi Keriso evaġa-moġoniani tarimana moġo; korana Barau na vei-iobukaiobuka tarimarai beki-ragirani dabarana sebona tu veġabidadama ġenana moġo.

¹⁰ Ġegu ura baregona tu Keriso bana riba-ġinikaua, ema mase na evaġa-vaisi-raġeato seġukana bana ġabia; ema emidiguto midiguna maki bana mami-tovoa, ma ġia ġena mase kavanai au maki bana mase.

¹¹ Mainana vau atuġamaġini, au maki mase na bavaisiraġe-ġenoġoini.

¹² Au asi akirani, moġeri mabarari varau aġabirito, o varau anamo-vedaureato, asiġina. Senaġi au tu avekwarāġi-rakavani, auna bana ġabia ġana, korana Keriso Iesu ġena kwalimu ai au maki eġabiguto ġia ġena.

¹³ Moġoni, tarikakagu, asi akirani varau akwalimuto atoni, asiġina. Dagara sebona moġo tu, maġuri guineri atuġarekwarito, ma ġoiragu dagarana bana ġoitaġoa kokorena moġo avetauani.

¹⁴ Initoma tu araga-maoromaoroni, kiraġitore makana aiaġo-viniani, mo kwalimu voina bana ġabia uranai, dagarana tu Barau ġena maġuri gubai. Korana Barau na Keriso Iesu ġenana ekeaguto, mo maġuri bana ġabia ġana.

¹⁵ Ġita ġera veġabidadamai taruġa-gwaġiġito taura tu maġesi bisini tuġamaġi-vegogo. A ġomi betaġu dagara tari ai ġemi tuġamaġi tu irau nai, Barau na vau tuġamaġi-faka bene vinimi.

¹⁶ Dagara sebona, iauka maġuriri namori ġita na varau taġabirito moġeri bitana ġabi-ġigitariri.

¹⁷ Tarikakagu mabarami, au boġono tovtovogou. Veigā namo ġeveini tarimari boġono marereri e boġono tovtovori maki, vevaġa-ġita namori evaġa-ġitamini kavana.

¹⁸ Korana varau avaġa-guruġa ġenoġoi-ġenoġoimito-ġoi, senaġi ini tu ma avaġa-guruġamini ma taġigu ġesi: Gutuma ġekirani, Keriso murinali ġerakani ġetoni, senaġi ġeġofaġofani, Iesu Keriso ġena satauro ġevetari-viniani.

¹⁹ Ġia varau rakava gabuna ġana ġeiaġoni, korana ġeri barau tu ġia tauġaniri na ġeiau-iaġirini dagarari. Ġeri veigā rakavari, ġere maiaka-iaġiri veigari, ġeveiavi-iaġirini. Ema mai tanobara dagarari moġo ġetuġamaġi-ġigitaririni.

²⁰ A ġita tu Guba Basileia tarimara. Moġa lorinai ġera vevaġa-maġuri tauna, ġera Vereġauka Iesu Keriso ma iakura ġesi tanariani, guba tuġuna na beiaġomani.

²¹ Ġia na ġita mai tauġanira moiramoirari maiġeri bekvorevorini, benamo ġia tauġanina namo vedaureana kavanai beġe iaġoni. Korana ġia seġukana na dagara mabarari ġia ġena veġitaġau gaburenai beġe tanuni.

4

Sisiba guruġari tari

¹ Tauna moġa, tarikakagu, Vereġauka ġena maġuri nuġanai boġono ruġa-gwaġiġi. Au na auravini-baregomini ema bana ġitami veġata atoni, korana ġomi tu au ġegu verere korana e ġegu kwalimu vetoġana.

² Euodia ema Sintike, anoġimini, nuġami beġene sebona, korana ġomi tu Vereġauka ġena doġoro vavinemi.

³ Goi maki, Sisigo, au karogu namona, anoġimuni, mani vavine kika bono vaġa-kavari, ġia maki au ġesi ġaġauvei-vegogoto-ġoi Vari Namona fiufiunai, e Klement ema ġita karora tari maki. Ġia arari tu Barau ġena maġuri vanaġivanaġi bukanai varau etorerito.

⁴ Vereġauka ġena maġuri nuġanai ġaro mabarari ai boġono iaku. Ma nakira: Boġono iaku.

⁵ Ġemi manau e nuġa-marana boġono vevaġa-ġita-iaġiri tarimarima ġeri ai. Korana Vereġauka ġena iaġoma bekvinaġi-rakava.

⁶ Dagara ta tuġamaġi-vekwaraġina asi boġono vei, senaġi vanaġivanaġi ġemi rabu dagarari ġauġau ai Barau boġono nogia ma tanikiumi ġesi.

⁷ Benamo Barau na ġena maino, ġita mabarara ġera riba e tuġamaġi-faka evanaġiato mainona, bevinimini, ma mo maino na gomi lorumi ema ġemi tuġamaġi mabarari benariginikaurini, Keriso Iesu ġena maġuri nuġanai ġotanuni dainai.

⁸ Tarikakagu mabarami, ġegu toretore magona rekenai nakira, vanaġivanaġi veġa maiġesi kavari boġono tuġamaġi-iaġiri: Maġuri moġoniri, dagara marevana irau veġata, vei-iobuka-iobuka, veġa namo vedaureari, veuravini veġari, ema vegubaku maġuriri. Dagara namori ema tarimarima na ġevaġa-raġerini veġari mabarari boġono tuġamaġi-iaġiri.

⁹ Ġegu ġobata na ġoribarito guruġari ema ġegu veġa na ġodoġaririto veġari mabarari ġemi maġuri ai boġono ġauvei-iaġiri e boġono korana-iaġiri. Benamo maino evinirani Barauna ġomi ġemi ai bene tanu.

Filipi tarimari ġeri vevaġa-kava

¹⁰ Ġegu iaku tu asikei ema Vereġauka avaġa-namoani nuġagu mabarana ġesi, korana ġemi vevaġa-kava varevarena ma boġo tuġu-iaġomaia nai. Au ribagu, asi ġotuġarekwaguni, ġemi ura vanaġivanaġi boġono vaġa-kavagu, senaġi gabu manaġai atanuni nai, asi ġemi dabara ta au vaġa-kavagu.

¹¹ Au tu dia dagara tai akubini naima maiġesi aguruġani. Asiġina. Au tu ġegu-ġagu vovoka o asiġina, senaġi badukuani ilaila.

¹² Au tu akubini vetoġana ma ribagu, ema ġegu-ġagu ġevovokani vetoġana maki ma ribagu, be taimi tai gabu tai maiġeri maġuri baraga-ġoitaġorini nai, aiġesina badukurini tu ribagu. Mai riba vekuretoġana tu varau aribaiato. Moġesina nai au tu beġe ġubumaseguni o bevitoguni, ġegu-ġagu vovoka o bakubini au ġegu ai tu ilaila moġo.

¹³ Maġuri aiġesina ġegu ai evetoreni, senaġina asi ġegu daradara, korana Keriso na ġena seġuka eviniguni nai.

¹⁴ Senaġi aiakuni, korana ġemi vevaġa-kava barego mai ġegu meto nuġanai bama doġaria.

¹⁵ Gomi Filipi tarimami tu ribami: Makedonia aiaġuiato, tovtovonai Vari Namona aġobata-iaġiato-ġoi nai, ekalesia doġorona ta na asi evaġa-kavaguto-ġoi ġeri moni e farefare na, ġomi moġo ġereġami.

¹⁶ Gomi na vevaġa-kava dagarari vovoka ġotuġu-tuġukauto-ġoi au Tesalonika vanuġanai atanuto-ġoi nuġanai.

¹⁷ Au asi atuġamaġini, au ġomi ġemina vevaġa-kava dagarari bana doġari, senaġi ġegu ura baregona tu, ġomi ġemi ai ġemi vini auna bene barego bana ġitaia.

¹⁸ Au ġegu ai ġomi ġemi varevare dagarari ġotuġu-iaġomarito tu mabarari maiġeri, be ġegu-ġagu tu vovoka ema ilaila. Ribagu, aura-vinirini dagarari mabarari maiġeri Epafrodito na eġwa-iaġomarito ġegu ai. Ġemi varevare dagarari bonari irau veġata Barau na eġabi-raġerini ġinitaġo varevareri, Barau ġevaġa-iaukuani dagarari.

¹⁹ Ġegu Barau na ġena farefare namori ema vovoka tabutaburi Keriso Iesu ġenana bevarevare-vini ġinikaumini ġemi rabu ġarori ai.

²⁰ Tamara Barau bitana vaḡa-raḡea vanaḡivanaḡi, Amen.

Vevaḡa-namo guruḡari

²¹ Iesu Keriso ḡena tarimarima mabarari ḡeri vevaḡa-namo ḡeguna eiaḡosini. Ġita tarikakara au ḡesi ḡatanuni na ḡemi vevaḡa-namo beḡe tuḡu.

²² Barau ḡena veaḡa tarimari mabarari ḡerina vevaḡa-namo beḡe tuḡu ḡemi, ema Kaisara, Roma ḡeri vere, ḡena numa tarimari na maki ḡemi vevaḡa-namo baregona beḡe tuḡua.

²³ Vereḡauka Iesu Keriso ḡena namo ema varevare-bara ḡomi tata iatami ai bene tanu.

PAULO ĜENA TORETORE KOLOSE EKALESIARI ĜERI

Kolose vaĝa-foforina guruhari

Paulo na mai fefa tu Romai ediburato-ĝoi nuĝanai etoreato. Mai fefa tu laĝani 60 beiaĝo 61 nuĝanai etoreato, mo tu Iesu emaseto murinai.

Mai fefa siri baregori tu karao 2:9-10.

Paulo na mai fefa etoreato korana tu tarima tari na Kolose ai ekalesia doĝorori ĝeri veĝabidadama ĝevei-vegonuato-ĝoi nai. Mogesi naima Paulo na mai fefa etoreato tu Kolose ekalesiari evaĝa-guruĝa-toreĝaurito ema maĝeri evaĝa-ribarito, 1) tarimarima ĝeri iaunega ema vevaga-riba gofaĝofari tu aĝeri ema Keriso ĝena maĝuri korikorina tu aĝa; 2) Keriso tu moĝoni ekalesia doĝorona debana veĝata; 3) tarima guinena ma ĝena maĝuri rakavari ĝesi beĝene koki-fitogaia, ma tarima variguna beĝene torekaua; 4) tarimarima ĝeri taravatu veĝari ema ĝeri ura asi beĝene ĝabi-raĝeri e asi beĝene korana-iaĝiri.

Paulo na mai fefa tu maĝesina eboioĝaiato:

1. Deba, Keriso, ĝena mareva baregona - karao 1:1-2:5

2. Tauĝani, ekalesia doĝorona, aiĝesina bene tanu ema bene ĝauvei - karao 2:6-4:18

¹ Au Paulo, Barau ĝena ura lorinai Keriso Iesu ĝena apostolo tarimagu ai evaĝa-iaĝoguto, ema ĝita tarikakara veĝabidadama nuĝanai Timoteo ĝesi, ĝemana mai fefa eiaĝosini,

² ĝomi tarikakama Kolose nuĝanai ĝotanuni ĝemi. Keriso ĝena maĝuri nuĝanai ĝita tu tarikaka. Gomi tu Barau ĝena tarima veaĝami ema ma ĝemi vetuĝamaĝikau maki. Gita Tamara Barau ĝena varevare-bara ema maino ĝomi ĝemi ai bene tanu.

Kolose tarimari na Keriso ĝeĝabidadama-vini korikoriatu

³ Ĝai vanaĝivanagi ĝomi iatami ai ĝaĝauĝauni nai, ĝera Vereĝauka Iesu Keriso Tamana, Barau, tu ĝatanikiu-viniani.

⁴ Korana tu, ĝai tauma ruarua na ĝomi varimi tu maĝesi ĝaseĝaĝiato: Ĝomi na tovtovonai Vari Namona ĝenana eiaĝomato guruĝana, guruĝa moĝonina, ĝoseĝaĝiato nai tu, dagara namona Barau na gubai etore-taĝoani ĝemi, moĝa varina tu ĝovaĝa-moĝoni korikoriatu. Ma ĝomi na tu moĝesina naima Keriso Iesu ĝoĝabidadama-vini korikoriani, ema Barau ĝena veaĝa o ekalesia tarimari mabarari maki ĝoura-vinirini. Mani Vari Namona ĝomi ĝemi ai eraĝasito, maniĝa tu tanobara mabaranaĝi ĝevarifiu-rakao rakaoani, ma ĝwana namori maki ĝeĝorani, e tarimarima maki ĝutuma lelevaĝi na maki ĝeĝabi-raĝeani. Mai Vari Namona ĝwaĝwana namona evetoreni tanobara mabaranaĝi, ilailana ĝomi na mani Vari Namona ĝoseĝaĝiato e Barau ĝena namo e varevare-bara korikorina ĝoribiaĝo ĝarona na veĝata ĝomi fakami ai evesinato, ma eiaĝomani, maniĝa kavana evetoreni.

⁷ Ĝomi tu Epafras na mai Vari Namona easi vaĝa-ribamito. Ĝia tu ĝai karoma namona, ema ĝai ĝesi Keriso ĝena vetuĝunaĝi ĝaiĝo-vinirini tarimana ta. Epafras tu Keriso ĝena ĝauvei tarimana namona, ma ĝena vetuĝamaĝikau, ma ĝomi maki evaĝa-kava ginikaumini.

⁸ Ĝomi ĝemi veuravini Iauka Veaĝa na evinimini, maniĝa maki Epafras na ema kira-varamato.

Paulo ĝena ĝauĝau Kolose ekalesia tarimari iatari ai

⁹ Moĝesi naima ĝai tu ĝomi varimi ĝaseĝaĝiato ĝarona na beiaĝoma mo toma, ĝomi iatami ai ĝema ĝuriĝuri asi ĝavaĝa-ketoani. Vanaĝivanagi Barau ĝanoĝiani, ĝakirani, ĝia ĝena ura mabarana bene vaĝa-riba ĝitakaumi, ema Iauka Veaĝa ĝenana eiaĝomani iaunegana e tuĝamaĝi-fakana maki mabarana boĝono ĝabia.

¹⁰ Ĝai maĝesina ĝaĝauĝauni anina tu, Vereĝauka na eura-viniani maĝurinai boĝono tanu ĝana, ema ĝemi veĝa e maĝuri mabarabarari ai maki ĝia boĝono vaĝa-vererea ĝana. Aba, ĝemi veĝa namori mabarari ĝwaĝwari beĝene fofori, ema Barau maki boĝono riba-ĝinikaua.

¹¹ E ĝema ĝuriĝuri tu, Barau ĝena seĝuka iaru-korokorona na seĝuka bene vinimi, be boĝono kokore-koru. Korana mo kokore na tu meto ĝoĝoitaĝorini maĝeri nuĝari ai boĝo ruĝa-gwaĝiĝini e boĝo vevaĝa-gwaĝiĝini. E ma iakumi ĝesi

¹² Tamara Barau boĝo tanikiu-viniani. Korana ĝomi tu varau eĝabi-raĝemito, be ĝia ĝena tarima veaĝari na ĝena Basileia ma mamana baregona nuĝanai kara beĝe ĝaunarini dagarari ĝomi na maki boĝo ĝaunarini.

¹³ Gita mabarara Barau na tu mukuna ġena seġuka barana nuġana na evaġa-maġurirato, ma Natuna ġena veġitaġau seġukana nuġana itore-toġarato. Mo Natuna tu Barau na euravini-baregoani.

¹⁴ Gita tu Barau Natuna na evoi-ġenoġoirato, ma Barau na ġia bakunai ġera rakava etuġamaġi-fituġarito.

Keriso ġena ġauvei

¹⁵ Barau tu asi taġitaiani, senaġi Barau vetoġana korikorina tu Natuna ġenana efororito. Ma mai Barau Natuna maġa tu Barau ġimana veiveiri dagarari mabarari fakari ai ġia tu ġuine, emaġuri-ġuinetto merona kavana.

¹⁶ Korana Keriso ġenana Barau na gubai ġetanuni dagarari mabarari ema tanobarai ġetanuni dagarari mabarari eveirito. Taġitarini dagarari ema asi taġitarini dagarari eveirito. Seġuka lelevaġi iaukari mabarari, e seġuka lelevaġi aneruri, e veġorikau iaukari, ema ġeri seġuka e maoro barego lelevaġi iaukari eveirito. Dagara mabarabarari tu Barau na Keriso ġenana eveirito, ma Keriso ġena moġo eveirito.

¹⁷ Keriso tu maiġeri dagara mabarari roġosi beġere ġora nuġana veġata etanuto-ġoi. Ma dagara mabarari maki ġia ġena seġuka na eġabi-taġorini.

¹⁸ Ekalesia doġorona debana tu Keriso, ema ekalesia doġorona tu ġia tauġanina. Ekalesia ġena maġuri korikori tu ġia ġenana eiaġomato, ema ġia tu mero ġuinenana, mase tarimari mabarari fakari na Barau na mase seġukana na evaġa-maġuriato. Korana dagara mabarari ġia ġena veġitaġau gaburenai beġene tanu ġana.

¹⁹ Korana Barau ġena ura baregona, Keriso ġenai ġia ġena maġuri e mareva mabarana bene tanu.

²⁰ Ma Barau ġena ura dagarari mabarari Keriso ġenana ġia ġenai ma bene ġabi-ġenoġoiri etato, mai tu tanobarai ġetanuni dagarari mabarari ema gubai ġetanuni dagarari mabarari. Moġesina naima Keriso rarana satauro ai eriġoto, benamo Barau na maino eveiato dagara mabarari ġesi.

²¹ Ġomi ġuinenai Barau ġesi fakami tu manaġa rakava, e ġemi tuġamaġi ai maki Barau tu ġovetari-viniato-ġoi, korana ġomi tu veġa rakavari goveirito-ġoi.

²² Senaġi toma tu Keriso tauġanina korikori ġevaġi-maseato, monana ġomi ġia ġenai ma eġabi-ġenoġoimato. Barau na Keriso ġena mase ġenana vau tauġena ġenai eġabi-kavamito, korana tu eurato, ġia ġoiranai tu veaġa tarimari bene vaġa-ruġa-tarimi, e asi ġemi kerere misina ta maki, e tarima ta na maki asi bene vaka-dagami.

²³ Senaġi ġomi tu ġemi veġabidadamai boġono kokore e boġono ruġa-gigitari, ema Vari Namona ġoseġaġiato nai, ġemi tuġamaġikau ġovaġa-ruġaiato, monana ta na asi bene ġori-ġerevaġimi. Ġomi na tu mai Vari Namona maġa ġoseġaġiato. Ma tanobarai ġetanuni tarimarimari mabarari ġeri maki mai Vari Namona maġa ġevari-fuato. Au Paulo maki mai Vari Namona vetuġunaġina aiaġo-viniani e aġobata-iaġiani.

Paulo ġena ġauvei ekalesia urari ai

²⁴ Maitoma au tu aiakuni, korana au tu ġomi urami ai amidigu-midiguto. Ekalesia tu Keriso tauġanina, ma Keriso tu mai tauġanina maġa uranai emidigu-midiguto. Ma au toma mai tauġanigu ai mai midigumidigu aġwaiiani tu, Keriso ġena ekalesia navaġa-kavaia uranai. Au tauġanigu ai midigumidigu roġo aġwaiiani, korana tu Keriso ġena ekalesia uranai mo midigumidigu Keriso na eġwaiato moġa tu roġosi roġo bene kori nai.

²⁵ Au tu Barau na evaġa-ruġaguto, ekalesia ġena vetuġunaġi bana iaġo-vini etato. Barau na mai ġauvei eviniguto tu, ġomi ġemi ai Barau ġena guruġa mabarana bana vaġa-fofori korikorina ġana.

²⁶ Ġuinenana na veġata ema ġuru mabarari ġerina veġata mai maġuri vekuretoġana maġa tu vekuretoġa, beiaġoma mo, Barau ġena tarimarima veaġari ġeri ai vauro bema vaġa-foforia.

²⁷ Irau bese tarimari vekaravari ai, Barau eurato, ġena tarimarima veaġari ġeri ai mai maġuri vekuretoġana marevana barego lelevaġina bene vaġa-foforia etato. Mai maġuri vekuretoġana marevana barego lelevaġina bene vaġa-foforia etato maġurina tu maġea: Keriso ġomi nuġami ai etanuni. Gita na mareva baregona tatuġamaġi-dadamaġiani marevana tu maġa.

²⁸ Ġai na tu mai Keriso maġa ġaġobata-iaġiani. Ema iaunega iraurauri ġerina tarimarima mabarabarari ġakira-toreġaurini e ġavaġa-ribarini, korana ġaurani, tarimarima mabarari Keriso ġena maġuri nuġana tu beġene namo-vedaurea vauro, Barau ġenai baġana ġori-iaġori.

²⁹ Moġa uranai avekwarraġi-rakavani. Keriso ġena kokore au nuġagu ai eġauveini seġukana tu barego lelevaġi. Moġesina naima au tu Keriso ġena kokore ai mai ġauvei aveiani.

2

¹ Au aurani, ġomi tu boġono riba, au tu avekwaragi-rakavani, ġomi Kolose ekalesiami, e Laodikea ekalesiari, ema au goiraġu roġosi roġo beġene ġitaia ekalesiari vovoka, mabarabarami navaġa-kavami uranai.

² Au ġegu ura baregona sebona tu, ġia nuġari beġene gwaġġi, ema mabarari veuravini sebina moġo beġene iaġo. Korana tu moġesi beġe veini vauro beġe tuġamaġi-faka ġinikauni, benamo Barau ġena vekuretoġa dagarana beġe ribaiani. Barau ġena veikuretoġa dagarana tu Keriso.

³ Iaunega ema riba vonu-fokafokana mabarana tu Keriso ġenai vekuretoġa ġetanuni.
⁴ Maiġeri guruġa akira-maġuri nuġanai korana tu, irau tarima ta na nuġa-ġani guruġari namori na beġofa-veġonumini ġarina.

⁵ Au tu moġoni tauġanigu ġomi fakami ai tu asiġina. Senaġi iauka rekenai au tu ġomi sevimi ai, be ġauvei ġovei-ġinikaurini ema Keriso ġenai ġemi veġabidadama tu roġo barego aġitaiani, moġa lorinai averere-rakavani.

Keriso ġesi bisini sebona, be maġuri bisini ġabia

⁶ Keriso Iesu tu ġomi na ġoġabi-raġeato, benamo ġemi Vereġaukai ġovaġa-iaġoato. Moġa lorinai ġomi tu ġia ġena maġuri nuġanai moġo boġono raka e boġono tanu.

⁷ Ġomi ġemi maġuri tu ġau ġokana tano nuġana ġana evariġo-korikorini kavana, Keriso ġenai beġene variġo. E numa fore iatanai ġeraġaiani kavana, Keriso iatanai ġemi maġuri boġono vaġa-ruġakauri e boġono raġari. Ema ġevaġa-ribamito ilailanai ġemi veġabidadama beġene kokore-korikori, ma vanaġivanagi Barau tu boġono tanikiu-vinia.

⁸ Lorimi boġono vetore, asi namo tarima ta na tarimarima ġeri iaunega ġofaġofari koriri na ġomi nuġami beġanirini, benamo beġori-dareremini ġarina. Mai tarimarima ġeri iaunega ġofaġofari tu tarimarima na ġevaġa-ruġarini maġuriri e veiġari ġeri ai; senaġina moġeri tuġamaġi veġonuri tu tanobara barauri ġerina ġeiaġomani, a dia Keriso ġenana ġeiaġomani.

⁹ Korana Barau ġena maġuri e veiġa mabarari tu Keriso tauġanina nuġanai ġetanuni.

¹⁰ Ma Keriso nuġanai mai maġuri ġomi na ġoġabiato. Keriso tu veġorikau iaukari e aneruri mabarari ema ġeri maoro barego lelevaġi iaukari mabarari fakari ai ġeri Vere.

¹¹ Ġomi Keriso ġesi ġosebonato nai tu, tauġanimi kefirri ġelama-vaġirito, senaġi mai tu dia tarimarima ġimari na ġeveiani veiġana akiraġiani. Asiġina. Mai tu Keriso ġena kefil-mavaġi veiġana. Moġa tauna tu, tauġani ġena veiġa rakavari ġomi ġemi na ġokoki-fitogarito.

¹² Korana babatiso ġoġabiato neganai, ġomi tu noġa Keriso ġesi ġeguri-sebonamito; ema Barau na Keriso ġesi evaġa-vaisiraġe ġenoġoimito, korana Barau ġena ġauvei seġukana ġovaġa-moġoniato nai. Mo seġuka na Barau na Keriso mase na ma evaġa-variġisi ġenoġoiato.

¹³ Ġuinenai ġomi iaukami tu mase, korana ġemi kira-sirivaġi e vei-rakava bene, ema tauġani ġena veiġa rakavari maki ġomi tauġanimi ġerina roġosi beġere lama-fitogari. Senaġi toma ġomi iaukami tu Keriso ġesi Barau na evaġa-maġuri ġenoġoirito. Ġita ġera rakava mabarari tu Barau na etuġamaġi-fitogarito.

¹⁴ Taravatu guruġari ema taravatu asi takorana-iaġiato voiri metori ġita iatarai ġetanuni, moġeri tu mabarari Barau na asi tauri ai evaġa-iaġorito, be ekoki-fitogarito. Barau na mo taravatu moġeri ġeri seġuka tu eġabi-vaġiato, benamo Keriso ġena satauro ai eikoko-kauato.

¹⁵ Ema Barau na veġorikau iaukari rakavari e ġeri maoro barego lelevaġi iaukari, ġeri kokore mabarari asi tauri ai evaġa-iaġorito e evaġa-rakavarito. Keriso ġena satauro seġukana na iauka rakavari Barau na evaġa-ketorito, ma tarimarima ġoirari ġutuġuturi ai evaġa-maiakarito, ma muriri ai evaġa-rakarito.

¹⁶ Moġesina naima ġaniġani e niuniu dagarari taravaturi irauirauri ġaramari ai tarima ta na asi bene ġau-fitogami. Ema tarima ta na Barau tuġamaġi-iaġina verekona, o ġue variġuna verekona, o Sabadi ġarona ġaramanai maki asi bene ġau-fitogami.

¹⁷ Mai dagara maiġeri tu ġoirai vau beġea ġorani dagarari laulauri moġo. A maġuri korikorina tu Keriso ġenana bita ġabiani.

¹⁸ Bema tarima ta ġoġitaiani, tauġena manau tarimanai evevaġa-iaġo ġofa-kauni e aneru etoma-rakariġo-vinirini, ema nuvi o mata-vanaġi ai asi eġitarini dagarari eguruġa-iaġirini nai tu, ġarona asi boġono seġaġia. Ġia mani ġena tuġamaġi maniġa tu eveġonu-fatafatato. Maniġesina tarimarima na tu ġomi moġo beġe ġofa-dareremini, benamo voimi namona asi boġo ġabiani.

¹⁹ Keriso tu deba; ma mani tarima tu deba ġenana ġeraka-veġitato, be deba ġenai ġia tu asi ġetubukauni. Mai deba na tauġani mabarana ġaniġani eviniani, ema tauġani nuġanai

turiġa evaġa-tubukau gigitaririni, ema tauġani mabarana evaġa-tubu vegogoani, Barau ġena ura lorinai.

²⁰ Ġomi tu Keriso ġesi ġomase-sebonato, be ġomi na taravatu irauirau e tanobara barauri tu asi ma boġo korana-iaġirini. Ma kara dainai tu mai tanobara maġurinai ġotanuni tarimari noġa maiġeri taravatu ma ġokorana-iaġirini, ei?

²¹ Ġokirani, “Asi ġoġabi-karaia; asi ġomami-tovoa; ġimami na asi ġoġabi-tovoa,” ġotoni.

²² Senaġi mani dagara maniġeri tu boġono ġaniri e boġono ġauvei-iaġiri ġana. A maniġeri taravatu ema vevaġa-riba tu tarimarima ġerina moġo ġeiaġomani dagarari.

²³ Moġoni, maniġeri taravatu na tu ġita ġerai Barau toma-rakarigona tuġamaġina bevaġa-ġoraiani, e manau veiġana ġerai bevaġa-ġoraiani, tauġani vaġa-midigu-midiguna bevaġa-ġoraiani. Moġesi naima tarima kotari ġetuġamaġini, maiġeri taravatu tu iaunega tarimari ġerina ġeiaġomani. Senaġi maiġeri taravatu na tu ġita asi bevaġa-kavarani, ma tauġani ġena ura rakavari asi bevaġa-ketorini.

3

Keriso ġesi tasebonani nai tu, maġuri variguna taġabiani

¹ Ġomi tu Barau na Keriso ġesi evaġa-maġuri ġenoġoimito, naima gubai ġetanuni dagarari boġono vetau-baregori, e nuġami maki monai boġono toreri. Keriso tu monai Barau ġimana aroribana rekenai etanu-taġoni teronai.

² Vanaġivanaġi ġemi tuġamaġi ai tu gubai ġetanuni dagarari boġono tuġamaġi-taġori, a tanobara dagarari tu asi boġono tuġamaġiri.

³ Korana ġomi tu varau ġomaseto tanobara maġurina ġenai, ma ġemi maġuri korikori tu vekuretoġai etanuni Keriso ġesi, Barau ġenai.

⁴ Keriso tu ġomi ġemi maġuri korikorina. Ġia ma befoforini ġaronai, ġomi maki Keriso ġesi boġo fofori-sebonani, ema ġena mareva ma mamana baregona boġo ġabiani.

⁵ Moġa lorinai tauġanina ġena veiġa e maġuri rakavari ġemi ai roġo ġetanuni, maniġeri mabarari boġono vaġi-maseri. Tauġanina ġena veiġa e maġuri rakavari tu maiġeri: Mata-boraġa veiġari, veiġa mirori, kima veiġari, matabara e veiġa rakavari uravini-baregori maġurina, ema mata-ġaniġani maġuriri. Mata-ġaniġani maġurina tu babarau toma-rakarigori veiġana. Maiġeri mabarari ġerina boġono raka-veġita.

⁶ Korana mai veiġa maiġeri ġaramari ai Barau ġena baru o Kota baregona seġafore tarimari ġeri ai bema vaġa-foforiani.

⁷ Guinenai ġomi maki tanobara ġena veiġa e maġuri rakavari nuġari ai ġotanuto-ġoi nai tu, moġeri veiġa rakavari ġomi na maki goveirito-ġoi.

⁸ Senaġi toma mai veiġa maiġeri ġomi ġemina tu boġono tore-veġitari: Tuġamaġi-baru, baru rakavarakava, tarima vaġa-rakavari tuġamaġiri e veiġari, guruġa rakavari kiraġikiraġiri ema sivarai mirori kiraġikiraġiri.

⁹ Tauġemi fakami ai guruġa o veiġa ġofaġofari ai ta na ta asi bene ġofaia. Korana ġomi na ġemi maġuri guinena ma ġena veiġa rakavari ġesi tu dabuġa rakavana ġokoki-fitoġaiani kavana ġokoki-fitoġarito,

¹⁰ ma tarima varigū geragerana ġoriġo-kauato, dabuġa varigū geragerana ġoriġo-kauani ilailanai. Ma ġia maiġa tu Barau na vanaġivanaġi evaġa-varigū ġenoġoiani, eveiato Barauna vetoġana korikori bene ġabia e bene riba-ginikaua ġana.

¹¹ Mai maġuri variguna taġabiato mainai tarima ta asi irau. Be iniġesi asi bisini kira, ġai tu Iuda tarimama, a ġia tu irau bese tarimari; ġai tu mero tauġaniri kefirri ġalama-vaġini doġorona, a ġia tu mero tauġaniri kefirri asi ġelama-vaġini doġorona; asi bisini kira maki, ġia tu asi ġesikulito tarimari e maġuri mamana roġosi roġo beġene ġitaia tarimari; ġai tu asi tuġu-rakaorakao tarimama, a ġia tu tuġu-rakaorakao tarimari. Asiġina, maiġesi asi bitana guruġa. Korana Keriso ġereġana moġo barego ema ġita mabarara nuġarai etanuni.

¹² Ġomi tu Barau na varau eġabi-viriġimito tarimami, e ġena vevaġa tarimami, ema Barau na euravini-rakavamini tarimami. Moġa lorinai vevetugaġwa, veviau-namo, manau, marana, ema vevaġa-gwaġiġi maġuriri na boġono vedabuġa.

¹³ Meto o maġuri gwaġiġiri tari ġoġoitaġorini karomi tari ġerina nai tu, boġono vevaġa-gwaġiġi karomi ġeri ai. Bema tarima ta ġomi fakami ai karona ta na evaġa-veġare veġareani nai tu, mo rakava moġa bene tuġamaġi-fitoġaia, Keriso na ġomi ġemi vei-rakava etuġamaġi-fitoġarito kavana.

¹⁴ Maiġeri mabarari iatari ai tu vevravini na boġono vedabuġa. Korana tu mai maġuri namori mabarari tu vevravini na vauro ebaru-sebona ginikaurini, benamo ġeġauvei-ġitakauni.

¹⁵ Keriso ġena maino na nuġami bene ġori-kauri. Korana Barau na ġomi ekeavegogomito anina tu, tauġani sebonai boġono iaġo, benamo maino ai moġo boġono tanu. Ema Barau boġono tanikiu-vinia.

¹⁶ Keriso ġena guruġa tauri korikori e ġeri seġuka ġomi nuġami ai tu beġene vonuvonuraġe. Monana karomi tata ġesi Keriso ġena guruġa iaunega korikorina na boġono vevaġa-riba e boġono vekira-toreġau. Ma nuġami ai Barau ġotanikiu-viniani nai tu, Salamo boġono mari, e Barau vaġa-raġena mariri boġono mariri, ema Iauka Veaġa na evinimini mariri boġono mariri.

¹⁷ Kamara ġauvei boġo veiani nai, guruġai boġo veiani o veiġai boġo veiani, mabarabarari Iesu Vereġauka aranai moġo boġono veiri. Ma ġia ġenanana Tamara Barau boġono tanikiu-vinia.

Ekalesia tarimana ma ġaraġona e natuna ema ġena tuġu-rakaorakao tarimari ġesi ġeri tanu maġurina korikori

¹⁸ Veġaraġo vavinemi, ġomi tu ġaraġomi ġeri veġitaġau seġukana gaburenai boġono tanu. Korana mai maġuri maiġa Vereġauka ġoiranai tu maġuri namona.

¹⁹ Veġaraġo taumi, ġaraġomi boġono uravini-baregori, e ġaraġomi ġeri ai nuġami asi boġono vei-ġirimaiġirimari.

²⁰ Natu, dagara mabarari ai tamami e sinami tu garori boġono seġaġi-viniri. Korana mai veiġa tu Vereġauka iauna evaġa-namoani.

²¹ Tama, natumi asi boġono vaġa-baruri, korana beġe tuġamaġi-moirani, asi beġe kokoreni garina.

²² Tuġu-rakaorakao tarimami, mai tanobarai ġeri vetuġunaġi ġoiġo-vinini tarimari garori boġono seġaġiri. Ġia tu dagara mabarari ai garori boġono seġaġiri. Dia ġia ġoirari ai moġo, tarima iauri beġene vaġa-namori ġetoni nai ġevei-ġofakauni tarimari kavari. Asiġina. Ġomi tu Vereġauka gubakauna maġurinai nuġami ma raġeri ġesi ema nuġami mabarari ġesi boġono seġaġi-viniri.

²³ Ma kamara ġauvei boġo veiani nai, boġono veia nuġami mabarari ġesi. Ġauvei tu asi tarimarima ġeri ġauvei ġoveiani noġa boġono veia. Asiġina. Ġomi na tu Vereġauka ġena ġauvei ġoveiani maġurinai boġono veia.

²⁴ Ġomi tu ma ribami, Vereġauka na vau voimi bevinimini, korana ġomi na tu Keriso Vereġauka ġena vetuġunaġi ġoiġo-viniani.

²⁵ A tarima ta na veiġa beleaiani nai, mo veiġa beleaiani voina tu beġabiani veġata. Korana Vereġauka ġoiranai tarima mabarari tu ilaila moġo, dia ta tu egubakauani, ma ta tu asi egubakauani.

4

¹ Ġomi vetuġunaġi veremi, mani ġemi tuġu-rakaorakao tarimari maniġeri ġeri-ġari tu, ġeura-vinirini ilallari ai boġono viniri. Ġia ma ġeri maoro kara ġomi ġemina beġere ġoiġaġori dagarari tu boġono viniri veġata, ema veiġa namori e moġoniri ġeri ai boġono veiri. Korana ġomi maki boġono riba, ġomi eġita-ġaumini Verena maki etanuni gubai.

Vevaġa-riba guruġari kotari maia

² Ġauġau asi boġono vaġa-ketoe. Vanaġivanaġi boġono ġurigiuri. Ġemi ġauġau ai boġono venari maki, e Barau boġono tanikiu-vinia.

³ Ma ġai ġema maki boġono ġurigiuri, be Vari Namona baġana vari-fiua ġana, Barau na ġatama-boka gabu tari ai bene keori. Be mo ġana baġana iaġo, ma Keriso varina vekuretoġana monai baġana vari-fiua. Au tu mai Keriso varina vekuretoġana maiġa ġaramanai seiini na ġebarubaruguto.

⁴ Boġono ġauġau, be au na mai vari vekuretoġana maiġa bana kiraġi-fofori ġitakaua, Barau ekirato bana kiraġi-fofori ġinikaua etato ilailanai.

⁵ Keriso roġosi beġene ġabi-dadama-vinia, roġo murikai ġetanuni tarimari ġeri ai tu, veiġa iaunegari e namori boġono veiri. Ema ġia vefakari ai boġo raka-ġurani negari ai, moġeri mabarari tu asi boġono vaġa-rakavari, korana ġia boġo vaġa-kavarini negana tu kubi moġo bene.

⁶ Vanaġivanaġi boġo guruġani nai, boġono garo-namo. Ġemi guruġa maki ma damenari boġono kiraġiri e boġono guruġa-ġitaġita, be ġemi guruġa tarimarima na beġene ura-viniri e ġeseġaġi-namori moġo beġene si. Moġesina boġo veini nai, tarima sebori sebori aiġesina boġo vaġa-veserini dabarari boġo ribarini.

Veġabituġu guruġari

⁷ Au varigu mabarana tu tarikakara namona, Tikiko, na vauro beasi kira-varamini. Ĝia Keriso ĝena maĝuri nuĝanai tu ma vetuĝamaĝi-kauna ĝesi evevaĝa-kavani, ema ĝia tu au ĝesi Vereĝauka ĝena vetuĝu-naĝi ĝiaiaĝo-viniani.

⁸ Au na Tikiko ĝomi ĝemi ai atuĝu-iaĝosiani tauna korikori tu, ĝai mainai kamasi ĝatanuni maĝurina beneasi vaĝa-ribami ĝana. Ĝia na ĝai ĝema tanu maĝurina bene kira-varami, be ĝomi nuĝami bene vaĝa-gwaĝiĝiri uranai.

⁹ Ĝia tu Onesimo ĝesi eiaĝosini. Onesimo tu ma ĝena vetuĝamaĝikau, ema ĝia tu ĝai tarikakama namona ta. Ĝia maki ĝomi ĝemi tarima ta. Ĝia tauri ruarua na mainai kara ĝeĝorani dagarari mabarabarari beĝeasi vaĝa-ribamini.

¹⁰ Aristako na ĝena vevaĝa-namo ĝomi ĝemi ai etuĝu-iaĝosiani. Ĝia tu au ĝesi ĝadiburato, be dibura numai ĝatanuni mainai. Banabas tarikakana Mareko na maki ĝemi vevaĝa-namo betuĝu. Mareko ma Banabas tu tarikaka, senaĝi ĝia sinari e tamari tu irau, dia sebona. Mareko ĝomi ĝemi ai beiaĝosini nai, boĝono ĝabi-raĝea ĝana guruĝari tu varau asi-kira-varamito.

¹¹ Ema Iesu, arana ta ĝekiraĝiani Iusto, na maki ĝemi vevaĝa-namo betuĝu. A Iuda tarimari fakari ai au ĝesi Barau ĝena Basileia ĝauveina ĝaveiani tarimari tu maĝeri moĝo. Ĝia na au ĝevaĝa-kava ginikauguni.

¹² Gomi karomi ta, Keriso Iesu ĝena vetuĝunaĝi eiaĝo-vinini tarimana, arana Epafras, na maki ĝemi vevaĝa-namo betuĝua. Ĝia tu vanaĝivanaĝi ĝomi urami ai evekwaragiĝi ĝauĝau ai. Ĝia ĝena noĝinoĝi baregona Barau ĝenai eveiani tu, Barau na ĝomi ĝia ĝena urai bene vaĝa-ruĝatari korikorimi. Ema Barau ĝena ura ĝomi na nuĝami mabarari ĝesi boĝono vaĝa-moĝonia, ema boĝono korana-iaĝi ginikaua.

¹³ Au aguruĝa-fofori korikorini, moĝoni, Epafras tu ĝomi maniĝemi, e Laodikea tarimari, e Hierapoli tarimari mabarami urami ai moĝoni evekwaragi-rakavato.

¹⁴ Ĝita ĝatara namona Luka, doketa tarimana, ema Dema, tauri ruarua na ĝemi vevaĝa-namo beĝe tuĝu. Luka tu doketa tarimana.

¹⁵ Au ĝegu vevaĝa-namo ĝita tarikakara Laodikea ai ĝetanuni tarimari boĝono viniri. E ĝegu vevaĝa-namo Nimfa boĝono vinia, e Nimfa na numai ekalesia doĝorona ĝeraka-vegogoni maniĝeri maki boĝono viniri.

¹⁶ Mai fefa ĝomi ĝemi ai boĝo iavi-ĝosiani murinai tu, boĝono tuĝu-iaĝoa, ma Laodikea ekalesiari ĝeri ma beĝenea iavi-foforia. Ma Laodikea ekalesiari atore-vinirito fefana maki ĝomi fakami ai boĝono iavi-foforia.

¹⁷ Ma Arekipo maĝesi boĝono kiraia, boĝono kira, "Vereĝauka ĝena maĝuri nuĝanai ĝauvei oĝabiato maniĝa tu bono ĝauvei-iaĝi ginikaua."

¹⁸ Mai vevaĝa-namo guruĝari tu au Paulo tauĝegu ĝimagu na atorerini. Au boĝono tuĝamaĝigu, au tu roĝo ma seinigu diburai. Barau ĝena namo e vavare-bara ĝomi iatami ai bene tanu.

PAULO ĜENA TORETORE GINIGUINENA TESALONIKA EKALESIARI ĜERI

1 Tesalonika vaĝa-foforina guruĝari

Mai fefa ĝena tuĝamaĝi baregona tu Iesu ĝena ĝenoĝoi-iaĝoma vaĝa-ruaruana. Korana tu Iesu ĝena iaĝoma vaĝa-ruaruana mai fefai tu ekiraĝi-ĝutumaiato.

Paulo na mai fefa tu Korinto na etore-iaĝoato, mo tu ĝena evanelia varivarina vaĝa-ruaruana nuĝanai (Apostolo 17:1-14). Mai fefa Paulo na tu laĝani 50 ema 51 nuĝanai ta etoreato, mo tu Keriso maki emaseto murinai vau.

Mai fefai siri baregori tu karoa 4:15-18.

Paulo na mai fefa giniguinena etoreato korana eurato, Tesalonika ekalesiari 1) bene launaĝiri, Barau na ĝeri ai eveirito veĝari tarimarima ĝoirari ai beĝene vaĝa-foforiri; 2) bene vaĝa-ribari, Iesu ma beiaĝomani; 3) bene launaĝiri, Barau korana-iaĝina maĝurina korikorinai beĝene tanu.

Paulo na mai fefa tu maĝesi eboioĝaiato:

1. Ĝia aiĝesi vevaĝa-maĝuri ĝeĝoitaĝoto - karoa 1-3
2. Ĝia aiĝesina beĝene tanu mo maĝuri variĝunai - karoa 4-5

¹ Ĝai tauma toitoi, Paulo, Silas, e Timoteo, na Tamara Barau ema Vereĝauka Iesu Keriso ĝena ekalesia Tesalonika nuĝanai ĝatore-vinimini.

Varevare-bara ema maino ĝemi ai bene tanu.

Tesalonika tarimari ĝeri maĝuri

² Ĝai tu ĝaro mabarari ai Barau ĝavaĝa-namoani ĝomi mabarami daimi ai, ema ĝema ĝurigiuri nuĝari ai ĝakiraĝimini.

³ Korana Barau, ĝita Tamara, ĝoiranai ĝavetuĝamaĝi-taĝoni, ĝomi ĝemi veĝabidadama kamasi ĝotovo-naĝirini, e ĝemi veuravini ai kamasi ĝoĝunaĝaveni, ema ĝemi vetuĝamaĝikau ĝita ĝera Vereĝauka Iesu Keriso ĝenai kamasi ĝovaĝa-gwaĝigirini.

⁴ Tarikakama mabarami, ĝai ribama ĝomi tu Barau na eura-vinimini ema ĝia na evirigimito ĝia ĝena.

⁵ Korana Vari Namona ĝai na ĝavinimito tu dia guruĝai moĝo, senaĝi Iauka Veaĝa ma seĝukana e ma moĝonina ĝesi. Gomi maki ma ribami, ĝomi ĝemi namo uranai ĝai tu kamasi ĝatanuto ĝomi fakami ai.

⁶ Benamo ĝomi na maki ĝai ĝototovomatato ema Vereĝauka ĝototovovoato enabe ĝevaĝa-midigu midigumito, senaĝi Barau ĝena guruĝa ĝoĝabi-raĝeato ma vereremi ĝesi. Mo verere Iauka Veaĝa na evinimito.

⁷ Tauna moĝa ĝomi tu vevaĝa-ĝita namonai ĝoiaĝoto veĝabidadama tarimari mabarari Makedonia ema Akaia ĝeri.

⁸ Korana ĝomi ĝemina Vereĝauka ĝena guruĝa eraka-rosito tu dia Makedonia ema Akaia nuĝari ai moĝo, senaĝi ĝomi ĝemi veĝabidadama Barau ĝenai tu gabu mabaranaĝi beĝe ribaia. Moĝa lorinai monai ĝai na guruĝa ta tu asi ma baĝa kiraĝiani.

⁹ Ĝia tauĝeri maki ĝevakiraĝito ĝai na ĝavarivarimito nai, ĝomi na ĝai kamasi ĝoĝabi-raĝemato, ema kamasi babarau ĝoiaĝuirito, Barau maĝurina ema moĝonina vetuĝunaĝina boĝono iaĝo-vini ĝana,

¹⁰ ema Natuna Iesu ĝonariani guba na ma beĝenoĝoi-iaĝomani. Ĝia tu Barau na mase na ma evaĝa-variĝisi ĝenoĝoiaato, ema ĝena baru bevaĝa-foforiani o tarimarima bevaĝa-kotarini ĝaronai, Iesu na bevaĝa-maĝurirani.

2

Paulo ĝena ĝauvei Tesalonika ai

¹ Tarikakama mabarami, ĝomi tauĝemi ma ribami, ĝemi ai ĝaiaĝosito nai, asi ĝaĝauvei-kavato.

² Ĝomi ribami maki, ĝai Tesalonika ĝana roĝosi roĝo baĝana iaĝosi nai, Filipi ai ĝevaĝa-midigu midigumato e ĝekira-fitoĝamato. Moĝoni, ĝeiaĝoma-vini baregomato, senaĝina Barau na evaĝa-kokoremato, ĝena Vari Namona baĝana kira-varami ĝana.

³ Ĝai ĝema velaunaĝi ĝomi ĝemi ai tu dia guruĝa babobabo ai, dia tuĝamaĝi rakavari ai, e dia ta baĝana ĝofaia ĝana.

⁴ Senaĝi Barau na evaĝa-moĝonimato Vari Namona baĝana fiua. Moĝa lorinai ĝakiraĝiani, dia tarimarima baĝana vaĝa-iakuri ĝana, senaĝi Barau baĝana vaĝa-iakua ĝana. Ĝia na ĝai nuĝama evetaurini.

⁵ Ğomi ribami, e Barau maki ġoiranai, ġai ġaiagħosito nai tu, dia nuġa-ġani ai ġavaġa-raġe ġofakaumito-ġoi, e mata-ġaniġani ai ġaguruġa-ġofakauto-ġoi.

⁶ Ğai tu asi ġomi na boġono vaġa-raġema, o tarima tari na beġene vaġa-raġema ġatato.

⁷ Ğai tu Keriso ġena apostolo tarimama, be ma ġema maoro, ġema-ġama ġomi ġemi ai baġara kiraġi. Senaġi ġomi ġesi tatanuto-ġoi neganai, ġai tu marana, sina ta na natuna eġita-ġaurini kavana.

⁸ Ġauravini-rakavamito lorinai ġaurato, dia Barau ġena Vari Namona moġo ġemi baġana kiraġi, senaġi ġema maġuri maki ġatore-taririto, korana ġema veuravini ġemi ai tu barego lelevaġi.

⁹ Tarikakama mabarami, ġai kamasi ġaġauveito-ġoi ema ġavekwaraġito-ġoi roġo ġotuġamaġi-taġorini, ene? Barau ġena Vari Namona ġaġobata-vinimito-ġoi nuġanai, boġilaġani ġaġauveito-ġoi, ġema-ġama baġana doġari uranai, baġa vaġa-doġe-ġanimini garina.

¹⁰ Ğomi na ġoġitamato ema Barau na maki eġitamato ġai kamasi ġaveaġato, ġavei-maoromaoroto ema asi ġema kerere ta ġomi vaġa-moġoni tarimami fakami ai.

¹¹ Ğomi ma ribami, ġai na ġomi tata ġaveimito-ġoi tu tama na natuna korikorina eveiani kavana.

¹² Ğai na ġavaġa-kokoremito-ġoi, ġemi tuġamaġi ġavaġa-gwaġiġirito-ġoi, ema ġalau-naġimito-ġoi Barau vaġa-iaikuna veiġari boġono veiri ġana. Ġia na ekeamini, ġena Basileia ma marevana baregona bene vinimi ġana.

¹³ Ğai na Barau ġatanikiu-viniani ġaro mabarari ai, korana ta tu, ġena guruġa ġaġabi-iaġosiato neganai, ġomi na ġoseġaġiato ema ġoġabi-raġeato tu dia tarimarima ġeri guruġa, senaġi guruġa moġonina korikori, Barau ġena guruġa. Mo guruġa tu ġovaġa-moġoniani tarimami nuġami ai eġauveini.

¹⁴ Tarikakama mabarami, ġomi tu Barau ġena ekalesia Keriso Iesu nuġanai Iudea ġesi boġo ilaila, korana Iuda tarimari na ġia ġevaġa-midigu midigurito ilailanai, ġomi maki ġemi doġoro tarimari na ġevaġa-midigu midigumini.

¹⁵ Iuda tarimari na Iesu Vereġauka ema peroveta tarimari ġevaġirito, ema ġai maki ġelaimato. Barau tu asi ġevaġa-iaikuani, ema tarimarima mabarari ġekira-sirivaġi vinirini.

¹⁶ Ğai maki ġekira-ġoimani irau bese tarimari ġeri ai Vari Namona asi baġana kiraġia, korana maġuri vanaġivanaġi beġe ġabiani garina. Moġesi ġeri rakava vanaġivanaġi ġevaġa-baregorini. Senaġi Barau ġema baru maki iatari ai tu varau bevotu.

Paulo ġena ura baregona Tesalonika tarimari ma bene ġitari

¹⁷ Tarikakama mabarami, nega kotari roġo ġai ġomi sevimi na ġeinu-veġitamato, dia tuġamaġi ai, senaġi tauġani ai, asi ma ġaġitamini. Ġema ura baregona ġoirami baġana ġitari.

¹⁸ Ğai ġaurato tu ma baġana iaġosi ġomi ġemi ai. Moġoni, au Paulo, vaġa-vira akirato, senaġi Satani na ġema dabara ekouato.

¹⁹ Baġana ġenoġoi veġata, korana ġomi tu ġai ġema tuġamaġikau, ġema verere e ġema kokore voina ġera Vereġauka Iesu ġoiranai ġia ma beiaġomani ġaronai.

²⁰ Moġoni, ġai ġema veiavi e verere korana tu ġomi.

3

Paulo na Timoteo etuġuato Tesalonika ġana

¹ Ğai ġema vevaġa-gwaġiġi ġekorito, benamo ġakirato, namona tu ġai tauma ruarua moġo Atena ai baġana tanu,

² a ġai tarikakama Timoteo tu baġana tuġua ġomi ġemi ai. Ġia tu ġai ġesi Barau ġena vetuġunaġi ġaiaġo-viniani, Keriso ġena Vari Namona ġaġobata-iaġiani. Ġia na bene vaġa-kokoremi ema ġemi tuġamaġi bene vaġa-gwaġiġiri ġemi veġabidadama nuġanai.

³ Be, ġomi ta na ġena veġabidadama asi bene raga-kwanea manni midigumidigu ġoġoitaġorini nuġanai. Ğomi ribami, manġeri tu bita ġoitaġorini veġata.

⁴ Ğai roġo ġomi ġesi tatanuto-ġoi nai, ġakiramito-ġoi, ġita tu beġe vaġa-midigu midigurani, benamo moġeri ġefofoforito, be ġoribarito.

⁵ Moġa lorinai, ġegu vevaġa-gwaġiġi ekorito, benamo Timoteo atuġu-iaġosiato, ġia ġenana banama riba, ġemi veġabidadama tu kamasi ġotoreani. Korana irau dabara tari ai veribaġani tauna na beriba-ġanimini, benamo ġai ġema vekwaraġi asi taunai beiaġoni garina.

Timoteo ġena vevarifitu

⁶ Toma Timoteo tu ġomi ġemina beġenoġoi, ġomi ġemi veġabidadama e veuravini variri namona bema kiraġiri. Bekirama, ġomi na ġai roġo ġotuġamaġi-taġomani, ema ġourani boġono ġitama, ġai na ġomi baġana ġitami ġatoni kavana.

⁷ Moġa lorinai, tarikakama, ġema midigumidigu ema dabara doko mabarari nuġari ai ġemi veġabidadama na ġevaġa-kokoremato.

⁸ Korana ġomi Vereġauka ġenai boġo ruġa-gigitarini neganai, ġai ġema maġuri toma tu moġoni beġe namoni.

⁹ Barau ġomi daimi ai kamasi baġa tanikiu-viniani, korana ġai ġema verere tu asiikeikaina ġomi ġemi ai Barau ġoiranai.

¹⁰ Boġi-laġani ma nuġama mabarari ġesi ġaġauġauni, ġomi ġoirami ma baġana ġitari ema ġemi veġabidadamai ġorabuni dagarari na baġana vaġa-kavami ġana.

¹¹ Bere namo ġita Tamara Barau tauġena na ema ġera Vereġauka Iesu na ġema dabara beġene veia, ġomi ġemi ai baġana iaġosi.

¹² Ġera Vereġauka na maki ġomi veuravini na bene vaġa-vonuvonu-raġemi, karomi tata ema tarimarima mabarari boġono ura-viniri uranai, ġai na ġomi ġaura-vinimini kavana.

¹³ Barau na nuġami bene vaġa-kokoreri, benamo asi ġemi vei-rakava ta e ma veaġami ġesi Tamara Barau ġoiranai boġono ruġa, ġera Vereġauka Iesu ma beiaġomani ma ġena veaġa tarimarimari mabarari ġesi ġaronai. Amen.

4

Barau na eura-viniani maġurina

¹ Tarikakama mabarami, ġegu guruġa vaġa-magona tu maiġa. Barau vaġa-iakuna ġana aiġesi boġono tanu tu ġavaġa-ribamito. Moġoni, ġomi tu moġesi ġomaġurini. Iesu Vereġauka aranai ġanoġimini e ġalaunaġimini, ma boġono kokore-iaġiri ġana.

² Korana vevaġa-riba guruġari Iesu Vereġauka ġena maoro na ġavinimito tu ġomi ma ribami.

³ Barau ġena ura tu boġono vevaġa, mata-boraġa e veġura-vanaġi veiġari ġerina boġono raka-veġita.

⁴ Ġomi tau tata maki ġaraġomi ġesi boġono tanu ma vevaġami e ma vegubakaumi ġesi.

⁵ Dia mata-boraġa na bene ġori-kaumi noġa Barau asi ribari beseri kavana.

⁶ Ema mo veiġa rekenai tau ta na tarikakana asi bene ġofaġofa-iaġia ema ġena ura bene veia. Ġai na ma nuġama mabarari ġesi ġakira-guinemito: Moġesi eveini tarimana tu Vereġauka na ġena rakava voina beviniani.

⁷ Korana Barau na ekearato tu dia tana mata-boraġa e tana veġura-vanaġi, senaġi tana vevaġa ġana.

⁸ Moġa lorinai, dei na mo vevaġa-riba ġekira-fitoġaiani tu dia tarimarima ġekira-fitoġarini, senaġi Iauka Vevaġa evinimini Barauna ekira-fitoġaiani.

⁹ Au na tarikaka uraviniri guruġari tu toma asi batore-vinimini, korana Barau na evaġa-ribamito, ġomi tata boġono veura-vevini.

¹⁰ Moġoni, ġomi na tu tarikaka mabarari Makedonia nuġanai ġoura-vinirini. Senaġi tarikakama, ġai na ma ġavaġa-naġimini, mani veiġa boġono vaġa-baregoa.

¹¹ Dagara baregona ġomi kamasi boġono tanu tu maiġesi: Asi boġono guru-raġe. Tauġemi ġemi gauvei boġono vei, ema tauġemi ġimami na boġono gauvei ġemi-ġami boġono doġari ġana, ġai na ġakiramito ilailanai.

¹² Monana vau asi ekalesia tarimari na beġe gubakaumini, ema ta ġenai asi boġo tuġamaġikauni, korana dagara tai asi boġo rabuni.

Iesu ġena ġenoġoi ġarona

¹³ Tarikakama mabarami, ġai ġaurani boġono riba, ġemaseto tarimari tu kamasi. Be, asi boġono tuġamaġi-meto, asi ġeri tuġamaġi-dadamagi tarimari kavana.

¹⁴ Ġita na tavaġa-moġoniani tu Iesu emaseto, murinai tu ma evariġisi-ġenoġoito. Moġesi nai ma tavaġa-moġoniani deikara Iesu ġeġabidadama-viniato-ġoi nuġanai ġemaseto tarimari tu Barau na ma bevaġa-variġisi ġeno-ġoirini, Iesu ġesi beġabi-vegogorini.

¹⁵ Ġai na kara ġavaġa-ribamini dagarari tu Vereġauka ġena guruġa: Vereġauka beġenoġoini ġaronai, ġita deidei roġo maġuri tatanuni tarimara na ġemase-guineto tarimari asi bita raga-kwanerini, asi bita guineni Vereġauka ġesi veġoitaġo.

¹⁶ Barau beguruġani ma seġukana ġesi, aneru baregona maki bekeakeani, ema Barau ġena dudu befururuani ġaronai, Vereġauka tauġena guba na bemarkoni. Benamo deikarari ġemaseto, Keriso ġevaġa-moġoniato-ġoi nuġanai ġemaseto tarimari, beġe variġisi-guineni.

¹⁷ Moġa murinai, ġita roġo tamaġurini ema roġo tatanuni tarimara Barau na ġia ġeri ai ma bevaġa-raka-kaurani magube nuġari ai Vereġauka ġesi bitana vedoġari ġana, guba e tanobara fakari ai. Benamo Vereġauka ġesi bita tanu-vanaġi vanaġini.

¹⁸ Moġa lorinai maiġeri guruġa ġerina ġomi tata boġono vevaġa-kokore-vevini.

5

Boĝono rovina-tore Vereĝauka ma beiĝomani

¹ Tarikakama mabarami, ĝai na ĝomi asi ma baĝa tore-vinimini, aitoma mo nega e hora beĝe foforini.

² Korana ĝomi tauĝemi ma ribami ĝitakau, Vereĝauka ĝena iaĝoma ĝaronai tu lema tarimana, boĝi eiĝomani kavana, beiĝomani.

³ Tarimarima beĝe kirani, "Maino ema dagara mabarari namo moĝo." Nuĝanai tu asikauna kerere baregona na begabirini, noĝa vavine ma banina diana eguruni kavana. Tarima ta asi beraga-maĝurini.

⁴ Senaĝi tarikakama, ĝomi tu dia mukuna nuĝanai ĝotanuni tarimami, be mo ĝaro na nuĝami tu asi bene vaĝa-farevaĝiri lema tarimana kavana.

⁵ Ĝomi mabarami tu mama e laĝani tarimami. Ĝita tu dia boĝi e mukuna ĝeri tarimarima.

⁶ Moĝa lorinai ĝita tu asi bitana ĝena, asi bitana tanu-kava, tarima tari ĝeveini kavana, senaĝi bitana tataĝa, bitana boĝeboĝe, ema ĝera tuĝamaĝi beĝene maoro.

⁷ Gegenani tarimari tu boĝi ai ĝegenani, ema ĝeniuni tarimari maki boĝi ai ĝeniuniuni.

⁸ Senaĝi ĝita tu laĝani ĝena tarimarima dainai, ĝera tuĝamaĝi beĝene maoro. Ĝita tu veĝabidadama e veuravini ĝesiri kobarai bitana toreri, ema vevaĝa-maĝuri vetuĝamaĝina debara kwaragaunai tana vaĝa-iaĝoa.

⁹ Korana Barau na eĝabi-viriĝirato tu dia ĝia ĝena baru na tana midigumidigu ĝana, senaĝi vevaĝa-maĝuri bitana ĝabia ĝera Vereĝauka Iesu Keriso ĝenana.

¹⁰ Ĝia ĝita urarai emaseto tu, ĝia ĝesi bitana tanu-vanaĝi vanaĝi ĝana, enabe ĝita roĝo maĝuri o mase ĝia ma beiĝomani ĝaronai.

¹¹ Moĝa lorinai ĝomi tata boĝono vevaĝa-kokore-vevini e boĝono vevaĝa-kava-vevini, maitoma ĝoveini kavana.

Vevaĝa-riba guruĝari tari

¹² Tarikakama mabarami, ĝanoĝimini, ĝomi fakami ai ĝeĝauvei-kokoreni, Vereĝauka aranai ĝenarimini e dabara korikori ai ĝevaĝa-ribamini tarimari boĝono gubakauri.

¹³ Ĝeri ĝauvei dainai boĝono gubakau-baregori ema boĝono ura-viniri. Ma mainomi ĝesi boĝono tanu.

¹⁴ Tarikakama mabarami, ĝavaĝa-naĝimini, ĝauvei asi ĝeveini tarimari boĝono sisibaviniri, ĝegarini tarimari boĝono vaĝa-kokoreri. Moira tarimari boĝono vaĝa-kavari, tarimarima mabarari ĝeri ai boĝono vevaĝa-gwaĝiĝi.

¹⁵ Boĝono boĝeboĝe, tarima ta na rakava na rakava voina asi bene veia, senaĝi vanaĝivanaĝi ĝomi tata ĝemi ai ema tarimarima mabarari ĝeri ai maki veĝa namori moĝo boĝono veiri.

¹⁶ Ĝaro mabarari ai boĝono verere.

¹⁷ Ĝaro vanaĝivanaĝi boĝono ĝauĝau.

¹⁸ Barau boĝono tanikiu-vinia dagara mabarari ĝeri ai. Korana mani tu Barau ĝena ura ĝomi Keriso Iesu ĝesi ĝomaĝurini nuĝanai.

¹⁹ Iauka Veĝa karavana asi boĝono vei-busea.

²⁰ Peroveta guruĝari asi boĝono kira-fitoĝari.

²¹ Dagara mabarari boĝono riba-ĝinikauri; namori moĝo boĝono ĝabi-raĝeri.

²² Rakava dagarari mabarari ĝerina boĝono raka-veĝita.

Vevaĝa-namo guruĝari

²³ Maino Barauna na bene vaĝa-veaĝa ĝinikaumi. Iaukumi, e ĝemi maĝuri, ema tauĝanimi mabarari ĝia na bene nariri, kerere ta na maki asi bene ĝabimi, bene iaĝo mo, ĝera Vereĝauka Iesu Keriso ĝena iaĝoma ĝaronai.

²⁴ Ĝomi ekeamito Barauna ĝena guruĝa mabarari tu moĝoni, ĝia na beveirini.

²⁵ Tarikakama mabarami, ĝai maki iatamai boĝono ĝurigiuri.

²⁶ Tarikaka mabarari vetarikaka verauna na boĝono vaĝa-namori.

²⁷ Alaunaĝimini Vereĝauka aranai mai fefa boĝono iavi-foforia tarikaka mabarari ĝoirari ai.

²⁸ Ĝera Vereĝauka Iesu Keriso ĝena varevare-bara ĝomi ĝemi ai bene tanu.

PAULO ĜENA TORETORE VAĜA-RUARUANA TESALONIKA EKALESIARI ĜERI

2 Tesalonika vaĝa-foforina guruhari

Paulo na mai fefa vaĝa-ruaruana tu mo fefa giniguinena etoreato ma ĝue imaima sebona (6) evanaĝiato murinai ma etoreato. Mo tu ĝia roĝo Korinto ai etanuto-ĝoi nuĝanai etoreato.

Mai fefa nuĝanai siri baregona tu karoa 2:3.

Paulo na mai ĝena fefa vaĝa-ruaruana etoreato mainai tu Tesalonika ekalesiari 1) ĝevaĝa-midigu midigurito-ĝoi nuĝanai evaĝa-gwadarito; 2) Iesu ĝena ĝenoĝoi-iaĝoma vaĝa-ruaruana guruhari kotari ma ekira-vararito; 3) evaĝa-naĝirito, ĝeri veĝabidadamai beĝene ruĝa-gwaĝiĝi bene iaĝo mo, Iesu Vereĝauka bene ĝenoĝoi, ema elaunaĝirito maki, asi beĝene ĝubulefi.

Paulo na ĝena fefa vaĝa-ruaruana tu maĝesi eboioĝaĝiato:

1. Nuĝari evaĝa-gwaĝiĝirito, ekirarito, Keriso tu ma beiaĝomani - karoa 1
2. Loriri beĝene vetore korana Keriso ĝofaĝofana tu beiaĝoma-guineni roĝo - karoa 2
3. Ekalesia aiĝesina beĝene tanu maĝurina - karoa 3

¹ Ĝai tauma toitoi, Paulo, Silas, e Timoteo na Tamara Barau ema Vereĝauka Iesu Keriso ĝena ekalesia Tesalonika nuĝanai ĝatore-vinimini.

² Barau ĝita Tamara ema Vereĝauka Iesu Keriso ĝerina varevare-bara e maino ĝemi ai bene tanu.

Keriso ma beiaĝomani ĝaronai, Barau na tarimarima ĝeri rakava voiri bevinirini

³ Tarikakama mabarami, ĝai na tu Barau baĝana tanikiu-vinia ĝaro mabarari ai ĝomi daimi ai. Moĝesi baĝa veini tu maoro, korana ĝemi veĝabidadama ebarego-rakavani, ema ĝemi veuravini karomi mabarari ĝeri ai maki ebaregoni.

⁴ Moĝa lorinai ĝomi gavaĝa-raĝemini Barau ĝena ekalesia nuĝari ai. Gavaĝa-raĝemini korana ĝomi tu enabe ĝelaimini e ĝevaĝa-midigu midigumini, senaĝi ĝemi veĝabidadama ĝoĝabi-gigitariani.

⁵ Mo veĝa mabarari na Barau ĝena vevaĝa-maoro vetoĝana namona ĝevaĝa-moĝoniani, moĝa anina ĝomi tu ilaila ĝia ĝena Basileia boĝo ĝabiani, korana mo Basileia dainai ĝomidigu-midiguni.

⁶ Barau tu maoro veĝari moĝo beveini: Ĝomi dei na ĝevaĝa-midigu midigumini tarimari ĝia na ma bevaĝa-midigu midigurini.

⁷ Ema ĝemi midigumidigu ĝerina bevaĝa-iaĝaraĝimini ema ĝai maki. Moĝesi beveirani Iesu Vereĝauka ma ĝena aneru ma seĝuka baregori ĝesi guba na beĝe mariĝoni ĝaronai.

⁸ Ma karava moremorena ĝesi beiaĝomani; Barau asi ĝekorana-iaĝiani tarimari ema ĝera Vereĝauka Iesu ĝena Vari Namona asi ĝeĝabi-raĝeani tarimari ĝeri rakava voiri bema vinirini.

⁹ Ĝeri rakava voiri tu maĝa: Ĝia tu Vereĝauka ĝenana e ĝena mama seĝukana ĝenana ma fakari beĝe tanuni, midigu vanaĝivanagi beĝe ĝabini.

¹⁰ Mo tu beĝorani Keriso na beiaĝomani ĝaronai, ĝena tarimarima mabarari na beĝene vaĝa-raĝea, ema ĝevaĝa-moĝoniani tarimari na beĝene vaĝa-namoa ĝana. Gomi maki ĝia ĝesi, korana ĝaĝobata-vinimito, ĝoĝabi-raĝeato nai.

¹¹ Moĝa lorinai vanaĝivanaĝi ĝomi iatami ai ĝaĝurigiurini. Ĝera Barau ĝanogiani, ĝemi maĝuri bene vaĝa-namori, korana ĝia na ekeamito tu boĝono maĝuri ĝana. Ĝia seĝukana na ĝemi ura namori mabarari ai bene vaĝa-ĝaunani, ema ĝemi veĝabidadama dainai ĝoveirini ĝauveiri e veĝari bene vaĝa-ĝuĝururi.

¹² Monana, Iesu Vereĝauka arana beĝene vaĝa-raĝea ĝomi daimi ai, ema ĝomi beĝene vaĝa-raĝemi ĝia bakunai. Ĝita ĝera Barau e Vereĝauka Iesu Keriso na ĝeri varevare-bara ĝerina moĝeri dagara mabarari beĝene vaĝa-ĝorari.

2

Taravatu ekira-fitoĝaiani tarimana

¹ Tarikakama mabarami, ĝai na ĝanogimini, ĝera Vereĝauka Iesu Keriso ĝena iaĝoma rekenai ema ĝera veĝoitaĝo e raka-vegogo ĝia ĝesi:

² Nuĝami asi beĝene veĝonu-ĝarimoĝi, o beĝe kirani Vereĝauka ĝena ĝenoĝoi ĝarona tu bevotu beĝe toni neganai, nuĝami asi beĝene meto. Mo guruĝa asi boĝono vaĝa-moĝonia, enabe beĝe kirani, mo tu peroveta guruĝana, o ĝobatai ĝekiraĝiato guruĝana, o ĝai na fefa nuĝanai ĝatoreato guruĝana.

³ Tarima ta na veiga irauri ai asi bene gofami. Korana Veregauka gena goro tu asi rogo beragasini, beiaḡoni mo, tarimarima gutuma geri veḡabidadama beḡe raga-kwanerini, ema taravatu ekira-fitoḡaiani tarimana befororini. Gia tu Barau na karava gabunai bea toreani.

⁴ Tarimarima ḡetoma-rakarigo vinirini e ḡeguba-kaurini dagara veaḡari mabarari mo tarima na bekira-fitoḡarini, ema gia tauḡena bevetore-varaḡeni. Gia beiaḡoni Barau gena Rubu Veaḡa nuḡanai betanu-tarini, benamo bekirani, “Au tu Barau,” betoni.

⁵ Au ḡomi ḡesi rogo tatanuto-ḡoi nai, moḡeri mabarari akira-varamito. Gomi na asi gotuḡamaḡi-tagorini?

⁶ Taravatu ekira-fitoḡaiani tarimana tu toma bere fofori, senaḡi dagara ta na elau-ḡauani, ḡomi tu ma ribami kara. Garona korikorinai vau mo taravatu ekira-fitoḡaiani tarimana befororini.

⁷ Taravatu ekira-fitoḡaiani tarimana gena veiga vekuretoḡari initoma kota ḡefororini, senaḡi kara beḡe ḡorani dagarari tu asi rogo beḡe ḡorani, beiaḡoni mo, eruḡa-ḡaurini tarimana na dabara bekeoani.

⁸ Monai vau taravatu ekira-fitoḡaiani tarimana befororini, senaḡi Iesu Veregauka ma beiaḡomani ḡaronai, muruna seḡukana na bevaḡiani, ema ekimore-kimoreni mamana ḡesi beiaḡomani, benamo bevaḡa-rakavaiani.

⁹ Taravatu ekira-fitoḡaiani tarimana tu Satani gena seḡukai beiaḡomani, ḡofaḡofa veiga boruri e nuḡa-farevaḡi veigari mabarari beveirini.

¹⁰ Ema gena veiga ḡeḡevari na mase dabaranai ḡerakani tarimari beḡofarini. Gia tu beḡe rekwa-rekwani, korana beḡene maḡuri ḡana guruḡa moḡonina tu asi ḡeḡabi-raḡeato e asi ḡeura-viniato.

¹¹ Moḡa lorinai Barau na tuḡamaḡi veḡonuri gia nuḡari ai bevaḡa-raka-toḡarini, ḡofaḡofa beḡene vaḡa-moḡoniri ḡana.

¹² Moḡa tauna tu, deikara na guruḡa moḡonina asi ḡeḡabi-raḡeato, senaḡi rakava ḡeiaku-viniato tarimari mabarari tu, Barau na geri rakava voiri beviniirini.

Maḡuri boḡono ḡabia ḡana Barau na eḡabi-viriḡimito

¹³ Tarikakama mabarami, ḡai na tu Barau baḡana tanikiu-vinia ḡaro mabarari ai, moḡesi baḡa veini tu maoro, korana gia na eura-vinimini, ema tovtovonai eviriḡimito bene vaḡa-maḡurimi ḡana. Mo maḡuri boḡo doḡariani, korana Iauka Veaḡa gena seḡuka na evaḡa-maḡurimini, Barau gena tarima veaḡami ai evaḡa-iaḡomini, ema Veregauka gena guruḡa moḡonina ḡovaḡa-moḡoniani.

¹⁴ Barau na ekeamito Vari Monona ḡaḡobata-vinimito ḡenana. Gomi ekeamito ḡera Veregauka Iesu Keriso gena mareva baregona boḡono ḡabia ḡana.

¹⁵ Moḡa lorinai, tarikakama, boḡono ruḡa-gigitari, ḡaḡobata-vinimito ema fefai ḡatore-vinimito vevaḡa-riba guruḡari mabarari boḡono korana-iaḡiri.

¹⁶ Gera Veregauka Iesu Keriso tauḡena ema Barau ḡita Tamara na ḡeura-vinirani. Ema gena varevare-bara ḡenana ḡita tata nuḡara evaḡa-kokorerini ema evaḡa-kavarani gera vetuḡamaḡikau gia ḡenai tatoreani nuḡanai, toma bene iaḡo vanaḡivanaḡi.

¹⁷ Gia ḡanoḡiani, nuḡami bene vaḡa-kokoreri, ema bene vaḡa-kavami guruḡa e veiga namori boḡono veiri ḡana.

3

Ḡema boḡono ḡuriḡuri

¹ Tarikakama mabarami, ḡema guruḡa magonai tu, ḡema boḡono ḡauḡau, benamo Veregauka gena guruḡa bene raga-rovorovo, ema gabu mabarari ai tarimarima na beḡene ḡabi-raḡea ma vaḡa-namona ḡesi Barau ḡenai, ḡomi ḡemi ai eḡorato kavana.

² Barau boḡono noḡia maki, ḡia na rakava kwaikwai tarimari ḡerina bene vaḡa-maḡurima. Korana dia tarimarima mabarari na Veregauka gena guruḡa ḡevaḡa-moḡoniani.

³ Senaḡi Veregauka tu ma ḡena vetuḡamaḡikau ḡomi ḡemi ai. Gia na bevaḡa-kokoremini, ema Satani ḡenana bevaḡa-maḡurimini.

⁴ Ḡai ḡema veḡabidadama ḡomi ḡemi ai tu Barau na evinimato, e ḡaribani, ḡakiramito veigari ḡoveirini ema rogo boḡo vei-vesiriḡurini.

⁵ Veregauka na ḡemi tuḡamaḡi e ura mabarari bene ḡori-kauri, be Barau gena veuravini ema Iesu Keriso na evinimini vevaḡa-gwaḡiḡina boḡono riba-ḡitakauri.

Ḡauvei tu dagara baregona

⁶ Tarikakama mabarami, Veregauka Iesu Keriso aranai gākiramini, ekalesia tarimari gubulefiri, gavaḡa-ribarito guruḡari asi gēkorana-iaḡirini tarimari, ḡerina boḡono raka-veḡita.

⁷ Gomi ribami ginikau, ḡomi tu ḡai ḡaveito kavana boḡono vei. ḡai tu asi ḡavei-gubulefito gomi ḡesi tatanuto-ḡoi nai.

⁸ Tarima ta ḡena-ḡana asi ḡaḡabi-raḡe kavarito-ḡoi, senaḡi ḡavoirito-ḡoi. ḡai tu boḡi-laḡani ḡaḡauveito-ḡoi, ḡavekwarāḡito-ḡoi, korana ḡomi ta baḡa vaḡa-doḡe-ganimini garina.

⁹ ḡai ma ḡema maoro, ḡomi ḡemi ai ḡema-ḡama baḡa kiraḡini. Senaḡi ḡema ura tu vevaḡa-ḡita namonai baḡana iaḡo, ema ḡai boḡono tovtovoma uranai moḡesi ḡaveito-ḡoi.

¹⁰ ḡai ḡomi ḡesi tatanuto-ḡoi nai, vevaḡa-riba guruḡana ta ḡavinimito tu maiḡesi: “Bema tarima ta ḡauvei asi eurani nai, ḡaniḡani ta maki asi boḡono vinia.”

¹¹ Moḡesi gākirani, korana ḡaseḡaḡini tarima tari ḡomi fakami ai tu gubulefi ḡetanuni, ḡauvei asi ḡeveini, senaḡi tarima tari ḡeri ḡauvei ai ḡevekougou-ḡauni.

¹² Veregauka Iesu Keriso aranai gavaḡa-guruḡa gwaḡiḡirini e ḡasisiba-vinirini, beḡene tanu-ḡitakau, asi beḡene raka-taḡuitaḡui, senaḡi tauḡeri beḡene ḡauvei, ḡeri-ḡari beḡene doḡari ḡana.

¹³ Senaḡi ḡomi, tarikakama, akiramini, asi boḡono gau, veiḡa namori veiveiri ai.

¹⁴ Bema tarima ta na mai fefai ḡatore-iaḡosirini guruḡari asi eurani bene seḡaḡiri nai, nuḡami ai bene tanu, ḡia ḡesi asi boḡono vekako, be bene maiakaia.

¹⁵ Gami vetari tarimanai asi boḡono vaḡa-iaḡoa, senaḡi tarikakami ḡoveirini ilailanai boḡono vaḡa-ribaia.

Vevaḡa-namo guruḡari

¹⁶ Veregauka, ḡita ḡera maino korana, ḡia na ḡaro vanaḡivanaḡi ḡena maino bene vinimi ḡemi maḡuri tata nuḡari ai. Veregauka ḡomi mabarami ḡesi bene tanu.

¹⁷ Mai vevaḡa-namo guruḡana au, Paulo, tauḡegu na atoreani. ḡegu fefa dokori ai vevaḡa-namo guruḡari maiḡesi kavana ḡimaḡu na atoririni. Mo tu au ḡegu fefa vaḡa-moḡoniri vetoḡana.

¹⁸ Gera Veregauka Iesu Keriso ḡena varevare-bara ḡomi mabarami ḡemi ai bene tanu.

PAULO ĜENA TORETORE GINIGUINENA TIMOTEO ĜENA

1 Timoteo vaĝa-foforina guruĝari

Paulo na mai fefa maĝa tu dia ekalesia doĝorona ta ĝena etoreato, mai tu tarima sebona arana Timoteo moĝo ĝena etoreato. Timoteo tu betaĝu Paulo ĝena evanelia ĝauveina nuĝanai emaguri-ĝenoĝoito (Apostolo 14; 1 Timoteo 1:2).

Paulo na mai fefa Timoteo ĝena tu laĝani 61 ma 65 fakari ai ta etoreato, mo tu Iesu emaseto murinai.

Mai fefa nuĝanai siri baregori tu karoa 3:15; 4:12; 6:11-12.

Paulo na mai fefa etoreato tu, 1) Timoteo evaĝa-guruĝa toreĝauato, vevaĝa-riba tarimari ĝofaĝofari na beĝe ĝofaiani garina; 2) ekalesia doĝorona ĝorikauri tarimari ema diakono tu aiĝesina tarimari bene ĝabiri; 3) vevaĝa-riba moĝoniri bene vevaĝa-riba-iaĝi; 4) Timoteo elaunagiato, Vari Namona eribiaiato moĝa ĝobina bene torea ema bene ĝobata-iaĝia.

Ĝena toretore tu maĝesina eboiĝaĝoito:

1. Vevaĝa-riba guruĝari moĝoniri bene ĝabi-gigitariri - karoa 1
2. Ĝauĝau e toma-rakarigo gurugari - karoa 2
3. Veĝitaĝau tarimari baregori ema diakono tu kamasiri beĝene ruĝa - karoa 3
4. Vevaĝa-riba tarimari ĝofaĝofari - karoa 4
5. Vetuĝunaĝi-iaĝovini tarimana e ekalesia doĝorona aiĝesi beĝene tanu - karoa 5-6

¹ Au Paulo, Keriso Iesu ĝena apostolo tarimagu, ĝeguna mai fefa eiaĝosini. Mai apostolo ĝauveina aveiani tu ĝita ĝera vaĝa-maĝuri Barauna ema Keriso Iesu ĝeri guruĝa lorinai. Ĝita tu Keriso Iesu ĝenai moĝo tavetuĝamaĝikauni.

² Timoteo, ĝoi atore-vinimuni, natugu korikori veĝabidadama nuĝanai. Barau ĝita Tamara ema Keriso Iesu ĝita ĝera Vereĝauka ĝerina varevare-bara, vevetuĝaĝwa, e maino ĝemu ai bene tanu.

Vevaĝa-riba ĝofaĝofa tarimari loriri bono toreri

³ Makedonia ĝana najaĝo atato nai, ĝoi avaĝa-guruĝamuto, akirato, Efeso ai bono tanu. Korana tarima tari monai tu guruĝa ĝofaĝofari ĝevevaĝa-riba iaĝirini. Ĝoi na moĝeri tarima bonoa kirari, beĝene doko.

⁴ Bono kirari, sinasina e tuburi ĝatari arari tu asi beĝene vetauri, korana moĝeri na tu veĝareveĝare moĝo beĝe vaĝa-ĝorarin. Ema moĝeri maki ĝia ĝeri veĝabidadama asi beĝe vaĝa-kavarini, ema Barau na ĝita ĝerai kara neveia etoni dagarana asi beĝe ribaiani.

⁵ Au ĝegu mai guruĝa tauna korikori tu ĝegu ura veuravini bene fofori. Mo veuravini tu nuĝa namo vedaureana, tuĝamaĝi iobukaibokana, ema veĝabidadama moĝonina ĝerina eiaĝomani.

⁶ Tarima tari tu moĝeri na ĝeraka-veĝitato, benamo guruĝa babori, asi tauri guruĝari ĝekiraĝirini.

⁷ Ĝia ĝeurani tu Barau ĝena taravatu vevaĝa-riba-iaĝiri tarimari ai beĝene iaĝo, senaĝina ĝia tauĝeri ĝeri guruĝa tu asi ĝetuĝamaĝi-fakarini, ĝeguruĝa-iaĝirini dagarari tauri korikori maki vekuretoĝa rakava, asi ribari.

⁸ Ĝita ribara, taravatu tu namo bema tarima na beĝauvei-iaĝi ginikauani nai.

⁹ Maĝa maki ma ribara: Taravatu ĝeveirito tu dia vei-iobukaibokana tarimari ĝeri, senaĝi taravatu asi ĝekorana-iaĝirini tarimari ĝeri, ema kira-sirivaĝi tarimari ĝeri, Barau garina asi ĝegarini e vei-rakava tarimari ĝeri, asi veaĝa tarimari ema Barau asi ĝegubakauani tarimari, sinari e tamari ĝevaĝirini ema vaĝivaĝi tarimari.

¹⁰ Mata-boraĝa e veĝuravanaĝi tarimari, tau o vavine karori ĝesi ĝekimani tarimari, tarimarima ĝelemarini benamo ma ĝeivoivoi-iaĝirini tarimari, ĝofaĝofa tarimari Kota nuĝanai ĝofaĝofa guruĝari ĝekiraĝini. Ema veĝa rakavari ĝutuma ĝeveini vevaĝa-riba guruĝari moĝoniri ĝesi asi ilaila. Taravatu tu moĝeri tarimarima ĝeri ĝeveirito.

¹¹ Mo vevaĝa-riba guruĝari moĝoniri tu Vari Namona nuĝanai, Barau na au eviniguto bana kiraĝi-foforiri ĝana. Mo Vari Namona tu mareva namo Barauna ĝena mama e seĝuka varina.

Paulo na Keriso etanikiu-viniato

¹² Ĝera Vereĝauka Keriso Iesu na kokore eviniguto, ema etuĝamaĝiguto ma ĝegu vetuĝamaĝikau ĝena vetuĝunaĝi baiaĝo-vinini. Moĝesina naima etoreguto, ĝena vetuĝunaĝi bana iaĝo-vinia ĝana. Moĝa lorinai atanikiu-viniani.

¹³ Moĝoni, guinenai au na Keriso tu aguruĝa-rakava viniato-ĝoi, alai-veĝitaiato-ĝoi ema avei-veĝareveĝare rakavaiato-ĝoi. Senaĝi Barau na evetuĝa-ĝwaguto, korana mo negai kara aveiato-ĝoi tu au asi ribagu, ema Keriso asi аваĝa-moĝoniato-ĝoi.

¹⁴ Gera Vereĝauka ĝena varevare-bara barego lelevaĝi au iatagu ai ebubu-kauato, veĝabidadama e veuravini ĝesi. Mo veĝabidadama e veuravini tu Keriso Iesu ĝesi bita sebonani vau bita ĝabirini dagarari.

¹⁵ Mai guruĝa tu moĝoni, ema tarimarima mabarari na beĝene ĝabi-raĝea e beĝene vaĝa-moĝonia tu namo: Keriso Iesu tanobara ĝana eiaĝomato tu vei-rakava tarimari vaĝa-maĝuriri ĝana. Vei-rakava tarimari mabarari fakari ai rakava kwaikwai tarimana tu au.

¹⁶ Senaĝi Barau ĝena vevetuĝaĝwa au, rakava kwaikwai tarimagu, ĝegu ai etoreato, korana Keriso Iesu ĝena vevaĝa-gwaĝiĝi bene vaĝa-foforia ĝana. Vevaĝa-ĝita namonai bene vaĝa-iaĝogu, tarimarima na beĝene vaĝa-moĝonia vau, ĝia ĝenai beĝene veĝabidadama, maĝuri vanaĝivanagi beĝene ĝabia ĝana.

¹⁷ Barau tu tanu-vanaĝivanagi Verena, ĝia mase asi ribana, asi ĝitaĝitana, ĝia ĝereĝana kwariĝutu moĝo Barau. Ĝia moĝo bitana gubakaua, bitana vaĝa-raĝea toma bene iaĝo mo vanaĝivanagi. Amen.

Timoteo na vetari namona bene vetari-iaĝia

¹⁸ Timoteo, natugu o, au mai vaĝa-naĝi ĝoi avinimuni, peroveta tarimari na ĝeperoveta-iaĝimuto ilailanai, moĝeri bono tuĝamaĝi-taĝori. Mo peroveta guruĝari bono korana-iaĝiri, be Barau ĝena vetari nuĝanai vevaĝi namona bono veia.

¹⁹ Ĝemu veĝabidadama bono ĝabi-gigitaria, ema nuĝamu iauna namo bene tanu. Tarima tari na nuĝari garori asi ĝeseĝaĝi-vinirito, benamo ĝeri veĝabidadama tu noĝa bouti fore ai ĝevaĝa-daĝi-kauani, benamo eĝwa-kirakiraiani kavana.

²⁰ Moĝesi ĝeveito tarimari ta tu Himenaio ma ta tu Alesanda. Ĝia tauri ruarua tu Satani ĝimana nuĝanai atorerito. Korana ĝia beĝene riba, be Barau asi ma beĝene vei-veĝare veĝarea ĝana.

2

Rubu toma-rakarigo dabarana korikori

¹ Au ĝegu sisiba giniguinena tu maiĝa: Tarimarima mabarari urari ai Barau boĝono noĝi-vinia, boĝono ĝauĝau, tarimarima urari ai Barau e tarima vekaravari ai boĝono ruĝa, Barau boĝono noĝia ema boĝono tanikiu-vinia.

² Kini e gavamani mabarari ĝeri maki boĝono ĝuriĝuri, be bitana tanu-ginikau ma mainora ĝesi, ema Barau bitana korana-iaĝia ma moĝonira ĝesi.

³ Moĝesi tu namo, ema Barau ĝera vevaĝa-maĝuri tarimana bita vaĝa-verereani.

⁴ Barau eurani tarimarima mabarari beĝene maĝuri ema guruĝa moĝonina beĝene ribaia.

⁵ Korana Barau tu sebona kwariĝutu moĝo; ema Barau e tarimarima vefakari ai eruĝani tarimana maki sebona moĝo, Keriso Iesu.

⁶ Ĝia tauĝena ĝena maĝuri evinito, tarimarima mabarari bene voi-ĝenoĝoiri ĝana. Barau ĝena vevaĝa-moĝoni na tu mo ĝaro eĝabi-viriĝiato, monai vau ema foforito.

⁷ Moĝesina nai au etoreguto, apostolo e ĝobata tarimagu. Mai tu moĝoni, asi aĝofamini. Au etoreguto tu, irau bese tarimari ĝeri ai veĝabidadama korikorina bana vevaĝa-riba-iaĝiri.

⁸ Au aurani gabu mabarari ai tau tu ĝimari veaĝari beĝene ĝabi-vaisiri ĝauĝau nuĝanai. Senaĝi ĝauĝau ai ĝimari veaĝari beĝe ĝabi-vaisirini nai tu, nuĝari tu asi baruri ema asi daradarari ĝesi.

⁹ Au aurani vavine maki beĝene vedabuĝa-ginikau, ma vegubakauri ĝesi dabuĝa beĝene riĝo. Ĝuri asi beĝene fego-irairauri, ema golo o aĝeva ma marevari irairau na asi beĝene vera, ema voiri baregori dabuĝari na maki asi beĝene vedabuĝa.

¹⁰ Senaĝi veiga namori ema rorogotori mabarari veravera noĝa beĝene veiri. Korana Barau ĝegubakauani vavineri ĝeri veiga korikori tu moĝesina.

¹¹ Vavine na Barau ĝena guruĝa beĝene seĝaĝi-viniri ma nuĝa ĝave-mukori ĝesi, asi beĝene guru-raĝe.

¹² Au asi aurani vavine vevaĝa-riba ĝauveina beĝene vei, ema veĝorikau maĝurinaĝi ĝia na tau asi beĝene guine-iaĝiri, ema asi beĝene guru-raĝe.

¹³ Korana Barau na Adamu evei-guineato, murinaĝi vauro Eva ma eveiato.

¹⁴ Ema Satani na tu dia Adamu eĝofaiato, senaĝi Eva eĝofaiato, benamo evei-rakavato.

¹⁵ Senaĝina vavine tu mero beĝene ĝabi. Korana monana vavine vevaĝa-maĝuri beĝe ĝabiani. Mo tu bema ĝeri veĝabidadama e veuravini beĝe ĝabi-taririni ema beĝe veaĝani e beĝe tanu-ginikauni.

3

Veġorikau tarimari rubu nuġana

¹ Mai guruġa tu moġoni: Bema tarima ta eura-rakavani, ekalesia ġorikauna dagina bene ġabia etoni, ġia tu ġauvei namo vedaureana eura-viniani.

² Ekalesia ġorikauna tarimana tu maiġesi bene tanu: Ġia tu vei-iobukaiobuka tarimana, rakava ta ġenai asi boġoiġaġoani. Ġia tu ġaraġona vavine sebona moġo, vevaġa-gwaġġi tarimana, ġena tuġamaġi e veiġa maki roroġoto. Tarima boruri eġabi-raġerini ġena numai ema vevaġa-riba ġauveiri ma ribana tarimana.

³ Asi niuniu rakava-rakava tarimana ema asi eniara-niarani tarimana, senaġi manau ema maino tarimana; moni asi emata-ġaniġanini tarimana.

⁴ Ġena numa tarimari eġitaġau-ginikaurini tarimana ema natuna keikeiri na garona ġeseġaġi-viniani ma vegubakauri ġesi tarimana.

⁵ Korana bema tarima ta na ġena numa tarimari korikori asi beġitaġau-ginikaurini nai tu, kamara dabarai Barau ġena ekalesia doġorona beġita-ġauani?

⁶ Ekalesia varिġuna na veġorikau dagina asi bene ġabia, korana beveivavini ġesi. Korana bevekoroġuni nai, Barau na vevaġa-maoro bevei-viniani Diabolo evei-viniato kavana.

⁷ Ġia tu asi ekalesia na maki ġegubakauani tarimana, ma tari na guruġa rakavari asi beġe kiraġini ġenai, ma Diabolo ġena rigirigi ai maki asi bea toġani.

Diakono tarimari

⁸ Diakono maki moġesi, tarimarima na ġeri veiġa namori lorinai ġegubakaurini tarimari, ema dia dagara ta kiraġi-iaġinai tu tarima ta ġenai tu guruġa ta ġea kiraġiani, ma ta ġenai tu guruġa boruna ta ma ġea kiraġiani tarimari. Wain asi ġeniu-gutumaiani, ema moni e farefare asi ġemata-ġaniġani-iaġirini, ema veiġa ġofaġofari ġerina moni o farefare asi ġeġabinini tarimari.

⁹ Ġia na guruġa moġoniri korikori vekuretoġari Barau na ġita taveġabidadamani tarimara ġerai ema vaġa-foforirito, moġeri ġeġabi-gigitaririni nuġari ma iobukaiobukari ġesi.

¹⁰ Ġia tu boġono tovonai-ġuineri. Bema ġeri ai vetoukau ta asi boġo ġoitaġoani nai, diakono dagina beġene ġabi.

¹¹ Garaġori vavineri maki tarimarima na ġegubakaurini vavineri, asi ġeverori-toreni, ma vevaġa-gwaġġi ribari e ma ġeri vetuġamaġikau dagara mabarari ġeri ai.

¹² Diakono tu ġaraġona vavine sebona moġo, natuna ema ġena numa tarimari ġitaġauri ma ribana.

¹³ Korana diakono ġauveina ġevei-ginikauani tarimari tu tarimarima na beġe gubakaurini, ema ġia tauġeri maki nuġari ma kokoreri ġesi Keriso Iesu ġenai ġeri vegabidadama beġe vaġa-ruġarini.

Guruġa vekuretoġa mabarana

¹⁴ Oba, au ġegu tuġamaġi tu bana raga-iaġosi, be banasi ġitamau, senaġina mai guruġa tu atore-vinimuni.

¹⁵ Bema bakwaiġboni nai, mai guruġa na bene vaġa-ribamu, tarimarima Barau ġena bese nuġana tu kamasi beġene tanu. Barau ġena bese tarimari tu maġuri Barauna ġena ekalesia, ema ġia tu guruġa moġonina duġuna baregona ema korana.

¹⁶ Moġoni, Barau korana-iaġina tu vekuretoġa ema dobu-masemase, Barau na evaġa-foforiato tu maġa:

Ġia tu eforirito tarima tauġaninai,

Iauka Veaġa na iobukaiobukana ekiraġiato,

aneri na ġeġitaġato.

Tanobara mabarari fakari ai ġeġobata-iaġiani,

tanobarai tarimarima na ġevaġa-moġoniani,

ġena mareva baregonai Barau na eġabi-varaġeato.

4

Vevaġa-riba ġofaġofa tarimari

¹ Iauka Veaġa na ekiraġi-foforiani, tarima tari ġoirara ġarori ai Keriso ġabidadama-vinina beġe raga-kwaneani, benamo ġofaġofa iaukari beġe seġaġi-vinirini, ema iauka rakavari ġeri vevaġa-riba beġe ġabi-raġerini.

² Mo vevaġa-riba tu guruġa ġofaġofa tarimari na beġe kiraġirini. Ġia ġeri tuġamaġi iobukaiobuka dabarana tu emaseto, noġa moġo auri seġuka lelevaġi na ġegabu-maserito kavana.

³ Mo tarima na tarimarima ġekira-ġoirini asi beġene veġaraġo, ema ġaniġani tari beġe kiragiirini tu asi beġene ġani. A mo ġaniġani tu Barau na eveirito dagarari. Keriso ġevaġa-moġoniani e guruġa moġonina ġeribaiaato tarimari na beġene ġaniri vaġa-namo ġauġauna murinai.

⁴ Korana tu dagara mabarari Barau na eveirito tu namo moġo. Ma ġaniġani ta tu asi bitana ruġaia, bema Barau tatanikiu-viniani vau taġabi-raġerini nai.

⁵ Korana mo tu Barau ġena guruġa na ema ġuriġuri na ġevaġa-veaġarini Barau ġoiranai.

Keriso ġena vetuġunaġi tarimana namona

⁶ Bema ġoi na moġeri guruġa tarikakara bovaġa-ribarini nai, ġoi tu Keriso Iesu ġena vetuġunaġi tarimamu namomu ta. Ema Iesu ġabidadama-vinina guruġari moġoniri ema vevaġa-riba guruġari namori okorana-iaġirini, maniġeri tu iauka ġaniġaniri, ġoi ġeġubuviaġimuni.

⁷ Sinasina babori ġerina tu bono veġita ema bono raga-kwaneri. Barau korana-iaġi-korikorinai bono kokore.

⁸ Tauġanina vaġa-kokorena veġari ġeri namo tu misina moġo, senaġi Barau korana-iaġina ġena namo tu barego lelevaġi dabara mabarari ai tu-na. Korana monana tu namo bita doġariani mai maġuri nuġanai ema ġoira maġurinai.

⁹ Mo tu guruġa moġonina, be bitana ġabiraġe-ġinikaua.

¹⁰ Moġa uranai tavekwaragiema ema tamidigu-midiguni, korana tu maġuri Barauna ġenai ġera tuġamaġikau tatore-kauani. Ġia tu tarimarima mabarari ġeri vevaġa-maġuri Barauna, ma ġia tu ġevaġa-moġoniani tarimari ġeri vevaġa-maġuri Barauna korikorina.

¹¹ Mai guruġa maġeri bono velaunaġi-iaġiri e bono vevaġa-riba-iaġiri.

¹² Ta na ġoi asi bene ġita-fitoġamu, korana ġoi tu maraġa varigu moġo, senaġi vevaġa-ġita-iaġi tarimamu namomu ai bono iaġo ġemu guruġai, veġai, veuravini ai, veġabidadamai, ema maġuri namo vedaureanai.

¹³ Buka Veaga bono iavi-foforia tarimarima ġeri ai, bono ġobata-iaġia, bono vevaġa-riba-iaġia, bene iaġo mo, au bana iaġosi.

¹⁴ Barau na evinimuto varevarena ġauvei-iaġinai asi bono moira. Mo varevare o seġuka tu peroveta guruġari ġerina oġabiato dagarana, ekalesia ġorikauna tarimari ġimari ġoi debamu ai ġetore-kaurito ġaronai.

¹⁵ Moġeri dagara bono ġauvei-iaġi ġitakauri. Mai ġauvei bono kokore-iaġia nuġamu e tauġanimu mabarari ġesi, be ġemu kokore tarimarima mabarari na beġene ġitaia.

¹⁶ Ġemu maġuri ġobina bono torea, ema ġemu vevaġa-riba guruġari loriri bono toreri. Mai veġa maġeri bono vei-vanaġi vanaġiri. Korana bema moġesi boveini nai, tauġemu bovevaġa-maġurini ema ġeseġaġi-vinimuni tarimari maki bovaġa-maġuririni.

5

Ġauvei veġabidadama tarimari rekeri ai

¹ Tarima baregona ta asi bono kira-feia; senaġi bono vaġa-guruġa ġaveġavea tamamu kavana. Maraġa varigu tu bono vaġa-guruġari tarikakamu kavana.

² Vavine baregori sinamu kavana bono veiri, ema vavine varigu tobanu kavana bono veiri, ma nuġa namo vedaureana ġesi.

³ Vabu ġereġari kwariġutu moġo nai tu bono gubakauri.

⁴ Senaġina vabu ta bema ġia tu ma natuna, o ma tubuna nai tu, ġia guine tu Barau korana-iaġina veġana ġeri bese nuġanai roġo beġene riba-iaġia e beġene vaġa-foforia. Mo tu ġeri bese ġobiri beġene toreri ema vaġa-kavari. Moġesina veġari ai tu tamari e sinari ma tuburi ġaukari ġeri vekwaragi ġevaġa-voi ġenoġoirini. Ma maġesi veġari na tu Barau ġevaġa-iakuani.

⁵ A vabu, ġereġana moġo asi tau ġitaġauna, ġena tuġamaġikau tu Barau ġenai moġo betoreani. Boġi-laġani beġauġauni, Barau benoġiani bene vaġa-kavaia ġana.

⁶ Senaġi tauġanina vaġa-vererena moġo veġana eveiani vabuna tu varau emaseto, enabe roġo maġuri etanuni.

⁷ Mai guruġa tu vabu mabarari bono viniri, be ta ġenai rakava ta asi beġene doġaria.

⁸ Senaġi bema tarima ta na garagarana, o sikira ġena numa tarimari korikori, ġeri-ġari asi eġwaġwa-raġasini e eġburini nai, ġia ġena veġabidadama Keriso ġenai tu ekuretoġaiani. Ġia ġena rakava na tu asi eveġabidadamani tarimana ġena rakava maki evanaġiani.

⁹ Vabu ta arana asi bono torea roġo, vabu mabarari arari otorerini bukanai. Senaġina bema ġia ġena maġuri laġanina 60 evanaġiato, ema tau sebona moġo eġaraġoato.

¹⁰ Ema ġena veġa namo lorinai tarimarima na ġeribaiani, e natuna ġobiri etore-ġinikaurini, varivari tarimari eġabi-raġerini ġena numai, vevaġa o ekalesia tarimari

kwakuri eġurigirini, (moġa anina tu tauġena evetore-riġoni), ġevaġa-midigu midigurini tarimari evaġa-kavarini, ema veiġa namori ai ekokoreni vabuna moġo arana bono torea.

¹¹ Senaġi vabu variguri tu arari asi bono toreri, korana ġeri tuġamaġi rakavari na beġe ġori-kaurini, benamo Keriso ġenana beġe raka-veġitani, benamo ma beġe veġaraġoni.

¹² Benamo metona tauġeri na beġe ġabiani, korana ġeri guruġatore guinena Keriso ġenai ġefitogaiani lorinai.

¹³ Gubulefi beġe ribaiani ema numa loriri ai beġe raġekau-raġe-kauni. Dia ġubulefi moġo, senaġina beġe mugumuguni, raka-boġeraġe boġeraġe ema asi ġere kiraġiri guruġari beġe kiraġirini.

¹⁴ Moġa lorinai au aurani vabu variguri tu beġene veġaraġo, be naturi beġene vaġa-ġorari, ema ġeri numa beġene ġita-ġauri, benamo evetari-vinirani iaukana faka ta asi beġene vinia ġita bene ġofaġofa-iaġira ġana.

¹⁵ Korana vabu tari tu varau Iesu ġena dabara na beġe raka-veġita, benamo Satani murinai ġerakani.

¹⁶ Senaġi bema Iesu evaġa-moġoniani vavinena ta ġena numai vabu tari ġetanuni, mo vavine na mo vabu bene ġitaġau-ginikauri, be ekalesia iatanai meto asi beġene tore-kausa. Moġesi tu vau ekalesia na tu ġereġari ġetanuni vaburi moġo beġita-ġaurini.

¹⁷ Ekalesia ġeġori-kauani tarimari, ekalesia ġauveina ġevei-ginikaurini tarimari, tu boġono gubakau-baregori, ema voiri iatari ai boġono torekau. Mai tu Barau ġena guruġa ġeġobata-iaġirini e ġevevaġa-riba-iaġirini tarimari akiraġirini.

¹⁸ Korana Buka Veaġa tu maġesina ekirani, “Boromakau na widi efanafana-iaġirini nai tu, muruna asi bono barubarua.” Ma ekirani, “Ġauvei tarimana ġena ġauvei tu voina bene ġabia, moġesina tu maoro.”

¹⁹ Bema tarima ta na ekalesia eġori-kauani tarimana ekiraiani, ġia tu ekerereni nai tu, asi bono segaġi-viniri, bene iaġo mo, tarima ruarua o toitoi na beġe vaġa-moġoniani vau.

²⁰ Gevei-rakavani tarimari tu ekalesia tarimari ġoirari ai bono vaneri, be tarimarima maki beġene gari.

²¹ Barau e Keriso Iesu ema aneru veaġari ġoirari ai au ġoi avaġa-guruġamuni, mai vevaġa-naġi guruġari bono segaġi-viniri nuġamu sebonai. Tarima baregori ema garagaramu moġo asi bono ġabi-raġeri.

²² Gimamu tarima ta tubuanai asi bono torekau-ġarimoġia, tari ġeri veiġa rakavai asi bono vei-rakava, tauġemu lorimu bono vetore, bono namo-vedaurea.

²³ Nanu korikori moġo asi bono niu, senaġi wain koturi kota maki bono niu, korana nuġamu bene iarevaia, okeve-kinikini ġutumani bene.

²⁴ Tarimarima tari ġeri rakava tu fofori-ginikau, ma moġeri rakava na ġia tu ġeraga-kwanerini, benamo ġeiaġo-guineni Barau ġena Kota gabuna ġana. Senaġi tari ġeri rakava tu vekuretoġa, gabivau muriri na ġerakanāġi-rakanāġini.

²⁵ Moġesina moġo veiġa namori maki maġatai foforitaġo. Senaġina veiġa namori tari asi ġefofori-ġariġarini dagarari tu vekuretoġa moġo asi beġe tanuni, senaġi beġe foforini.

6

¹ Tuġunaġi ġeiaġo-viniri tarimari na ġeri baregona tu beġene gubakaua ema ġena veġorikau gaburenai beġene tanu. Moġesina beġe veini nai tu, ġeri baregona na Barau arana ema ġita ġera vevaġa-riba iatari ai guruġa rakavari asi bekiraġini.

² Bema tuġunaġi ġeiaġo-viniri tarimari ġeri baregori tu Iesu ġevaġa-moġoniani tarimari nai tu, maġesi asi beġene tuġamaġi, “Mai tu au tarikakagu, be garona asi naseġaġia e asi nagubakaua.” Asiġina! Ġia tu maġesi neġi beġene vei, ġeri baregori ġeri vetuġunaġi misikose mabarari beġene iaġovini-ginikau. Korana ġia ġeri ġauvei ġena namo tu ġeri baregori, Iesu ġevaġa-moġoniani tarimari, na beġe ġabiani; moġeri tu ġia ġatari namori.

Vevaġa-riba ġofaġofa ema farefare moġoniri

Maġeri dagara ġia bono vaġa-ribari ema bono launaġi-iaġiri.

³ Bema tarima ta vevaġa-riba gofaġofari bevevaġa-riba iaġirini, ema ġena vevaġa-riba ġita ġera Vereġauka Iesu Keriso ġena guruġa moġonina ġesi asi besebonani, ma Barau ġena maġuri asi bevaġa-ribarani,

⁴ ġia tu veiavi tarimana, ema dagara ta asi etuġa-maġi-fakaiani. Ġia tu vedanaġi iraurauri beveini, ema Barau ġena guruġa bevevane-iaġirini. Moġeri na tu mama, vevane, guruġa rakavari, tarimarima ġeri ai vevaġa-daġa tuġa-maġiri rakavari beġe vaġa-ġorarinai,

⁵ ema vanaġivanaġi veġareveġare maki asi ġedokoni. Moġesina ġeveini tarimari ġeri tuġamaġi tu rakava kwaikwai, ema guruġa moġonina na ġeraka-veġitato; ġia mataboru ġetuġamaġini, Barau korana-iaġina tu farefare ġutuma bodoġarini dabarana.

⁶ Moḡoni, Barau ḡekorana-iaḡiani, ema farefare voḡori na ma asi ḡeiaḡoni tarimari tu farefare gutuma lelevaḡiri beḡe ḡoitaḡoni.

⁷ Korana dagara ta tanobara ḡana asi taḡabi-iaḡomaiaato, ema dagara ta maki tanobara na asi bita ḡabi-iaḡoani, asiḡina!

⁸ Moḡa lorinai, bema ḡita ma ḡara ḡaniḡani e ma ḡera dabuḡa nai tu, bitana kira, maiḡeri tu ilaila ḡemai.

⁹ Tarimarima deikara ḡeurani farefare ḡutuma lelevaḡi beḡene doḡari ḡetoni tarimari tu veribaḡani na egabirini, ḡeri ura babori ema ura rakavari na evaḡa-daḡa-raḡerini, monana einu-riḡorini rakava ḡana ema karava gabuna ḡana.

¹⁰ Korana moni uravinina tu rakava mabarari lamuna. Tarimarima tari moni ḡeuravini-baregoani tu Iesu ḡabi-dadama-vinina na ḡeraka-veḡitato, ema nuḡa midigumidigu vovoka na nuḡari egwanurini.

Paulo ḡena vevaḡa-riba guruḡari Timoteo ḡenai

¹¹ Senaḡi ḡoi, Barau ḡena tarima, moḡeri dagara mabarari bono raga-kwaneri! Benamo veḡa iobukaiobukari, Barau korana-iaḡina, veḡabidadama, veuravini, vevaḡa-gwaḡiḡi, nuḡa manau bono vetauri ma kokoremu ḡesi.

¹² Veḡabidadama vetarinai bono kokore. Maḡuri vanaḡivanaḡi bono ḡabi-taria, korana mai maḡuri uranai tu Barau na ḡoi maki ekeamuto, tarimarima ḡutuma ḡoirari ai ḡemu veḡabidadama okiraḡi-foforiato ḡaronai.

¹³ Barau na dagara mabarari maḡuri evinirini, ema Keriso Iesu Pontio Pilato ḡoiranai evevarifuto tu guruḡa namona ekiraḡiatio. Mai Barau e Keriso Iesu ḡoirari ai ḡoi avaḡa-naḡimuni:

¹⁴ Mai taravatu guruḡari mabarari bono korana-iaḡiri nuḡamu asi vetoukauna ta ḡesi ema kerere ta ḡemu ai maki asiḡina, roroḡoto moḡo, bene iaḡo mo, ḡita ḡera Vereḡauka Iesu Keriso ḡena iaḡoma ḡarona.

¹⁵ Barau tauḡena ḡena ḡaro korikori beraḡasini ai vau, Iesu Keriso befoforini. Barau ḡereḡana moḡo Vere namo vedaureana, Veḡitaḡau Tarimana sebona kwariḡutu tu, kini ḡeri Kini ema vere ḡeri Vere.

¹⁶ ḡia moḡo ḡereḡana etanu-vanaḡi vanaḡini; ḡia tu mama barego lelevaḡina nuḡanai etanuni, moḡa lorinai ta na asi beraka-kaviani riba; ḡia tu ta na asi eḡitaioato ema ta na asi beḡitaiani riba. ḡia ḡenai vegubakau ema seḡuka bene tanu mo vanaḡivanaḡi. Amen.

¹⁷ Farefare ḡutuma tarimari mai tanobarai bono kirari, asi beḡene veiavi, tanobara farefareri ḡeri ai ḡeri tuḡamaḡi-dadamaḡi asi beḡene torea, korana moḡeri mabarari beḡe korini, senaḡi Barau ḡenai beḡene vetuḡamaḡikau; ḡia na dagara namori ḡutuma evinirani ḡera verere ḡari.

¹⁸ Bono kirari, veḡa namori beḡene vei, veḡa namori ḡeri farefare namori ai beḡene vaḡa-iaḡori. Veḡabiraḡe tarimari ai beḡene iaḡo ema ḡeri farefare tarima tari maki kota beḡene viniri ma verereri ḡesi.

¹⁹ Mo dabarai ḡia ḡeri farefare namori beḡe vaḡa-vegogo-torerini ḡoirari ḡarori ḡana, ema maḡuri korikori beḡe ḡabiani.

²⁰ Timoteo, Barau na evinimuto guruḡari bono ḡabi-tariri, guruḡa rakavari e guruḡa babori ema iaunega ḡofaḡofari vevaneri ai asi bono raka-toḡa. Tarima tari na mo iaunega ḡekiraḡirini, “Riba”. Mo tu ḡeḡofaḡofani.

²¹ Tarimarima tari na mo “Riba” ḡetoni moḡa ḡeḡabi-raḡerito, benamo ḡeri veḡabidadama Iesu ḡenai ḡeiaḡuiato.

Barau ḡena namo e varevare-bara ḡomi ḡemi ai bene tanu.

PAULO ĜENA TORETORE VAĜA-RUARUANA TIMOTEO ĜENA

2 Timoteo vaĝa-foforina guruĝari

Paulo na Timoteo ĝena mai feŝa vaĝa-ruaruana tu Paulo Romai ediburato taiminai etoreato. Etoreato laĝanina tu 66 ma 67 fakari ai ta etoreato, mo tu Iesu emaseto murinai. Mai feŝa nuĝanai siri baregori tu karoa 1:13-14; 2:15; 4:1-5.

Paulo na mai feŝa vaĝa-ruaruana etoreato, ĝena ura tu, 1) Timoteo maĝuri moĝoni ai moĝo bene tanu; 2) meto baregori beĝoitaĝoni nuĝanai asi bene moira, senaĝi vetuĝunaĝi ĝauveina bene kokore-iaĝia.

Paulo na mai feŝa tu maiĝesina eboioĝaiato:

1. Keriso varina moĝonina Timoteo na bene ĝabi-gigitaria - karoa 1
2. Keriso ĝena vetuĝunaĝi ĝauveina bene korana-iaĝia - karoa 2
3. Keriso ĝenana beĝe veĝitani tarimari guruĝari ekiraĝito - karoa 3
4. Keriso ĝena guruĝa ĝereĝana moĝo bene ĝobata-iaĝia - karoa 4:1-5
5. Paulo ĝena veĝabituĝu guruĝari etuĝuto - karoa 4:6-22

¹ Au Paulo, Keriso Iesu ĝena apostolo tarimagu, Barau ĝena ura lorinai; ĝeguna mai feŝa eiaĝosini. Barau na etuĝuguto, ekiraĝi-toreato maĝurina Keriso Iesu ĝenana bita doĝariani maĝurina bana ĝobata-iaĝia ĝana.

² Timoteo, ĝoi atore-vinimuni, natugu, aura-vinimuni. Barau ĝita Tamara ema Keriso Iesu ĝita ĝera Vereĝauka ĝerina vevarevare-bara, vevetuĝaĝwa, e maino ĝemu ai bene tanu.

Paulo ĝena vevaĝa-namo e vevaĝa-kokore guruĝari

³ Boĝi e laĝani vanaĝivanagaĝi ĝegu ĝurigaĝi nuĝari ai ĝoi atuĝamaĝimuni. Ĝegu ĝauĝau nuĝari ai tu Barau, ma nuĝagu iau-namona ĝesi vetuĝunaĝina aiaĝo-viniani Barauna, atanikiu-viniani. Barau tu au tubugu ĝataĝu na maki vetuĝunaĝina ĝeiaĝo-viniato.

⁴ Otaĝito atuĝamaĝiani, ema ĝegu ura baregona ĝoi ma bana ĝitam, ĝegu iaku bene barego ĝana.

⁵ Ĝoi ĝemu veĝabidadama moĝonina ma atuĝamaĝi-ĝenoĝoiani. Mani veĝabi-dadama maniĝa tu tovtovonai tubumu vavinena Lois e sinamu Eunike ĝeri ai maki etanuto-ĝoi. Au aribani, mo veĝabidadama sebona tu ĝoi ĝemu ai etanuni.

⁶ Moĝesina nai avaga-vetuĝamaĝi ĝenoĝoimuni, Barau na evinimuto varevarena, au ĝimagu itatamu ai atore-kauato nai, oĝabiato dagarana, bono ĝauvei-iaĝia.

⁷ Korana Barau na ĝita evinirato Iaukana na tu nuĝara asi bevaĝa-ĝaririni Iaukana, senaĝi kokore, veuravini, e nuĝa-gwaĝiĝi evinirani Iaukana.

⁸ Ĝita ĝera Vereĝauka ĝena guruĝa kiragaĝi-foforinai asi bene maiakamu, ema au Keriso ĝaramanai dibura numai atanuni nai maki, maiakagu na asi bene maiakamu. Senaĝi Barau ĝena kokore ai bono vevaĝa-gwaĝiĝi ema au ĝesi bono sebona, be Vari Namona ĝaramanai bitana midigumidigu.

⁹ Ĝia na evaga-maĝurirato ema ĝena keakea veaĝana na ekearato ĝena tarimarimai bitana iaĝo ĝana. Moĝesi eveito tu, dia ĝita ĝera veiaĝa e ĝauvei namo naima, senaĝi ĝia tauĝena ĝena ura e ĝena varevare-bara na moĝo. Mo varevare-bara tu tovtovonai veĝata, guba e tanobara roĝosi roĝo bere veia nuĝanai, Barau na Keriso Iesu ĝenana evinirato.

¹⁰ Senaĝi maitoma tu ĝita ĝerai Vevaĝa-maĝuri Tarimana Keriso Iesu eiaĝomato lorinai, mai varevare-bara ĝita ĝerai ema foforito. Keriso na mase ĝena seĝuka evaĝa-koriato, ema Vari Namona ĝenana maĝuri e tanu-vanaĝivanagaĝi evaĝa-foforiato.

¹¹ Barau na au etoreguto tu mai Vari Namona bana ĝobata-iaĝia, bana ĝwa-rosia, ema bana vevaĝa-riba-iaĝia ĝana.

¹² Mo ĝauvei ĝaramanai au maiĝesi amidigu-midiguni. Senaĝi au tu asi emaiakaguni, korana aĝabi-dadama-viniani tarimana tu ribagu ginikau. Ema au maki ribagu ĝitakau, mai ĝauvei ĝimagu ai etoreato maiaĝa tu beĝitaĝau-ginikauani beiaĝoni mo Kota baregona ĝarona beraĝasini.

¹³ Guruĝa moĝoniri au ĝeguna oseĝaĝirito guruĝari bono ĝabi-gigitariri e bono korana-iaĝiri veĝabi-dadamai e veuravini ai. Mo veĝabidadama e veuravini tu Keriso Iesu ĝenana ĝeiaĝomani.

¹⁴ Barau na evinimuto varevarena bono ĝita-ĝaua. Ĝita nuĝarai etanuni Iauka Vevaĝana na mo varevare ĝitaĝaunai bene vaĝa-kavamu.

¹⁵ Ĝoi ma ribamu Asia tanonai ĝetanuni tarimari mabarari tu au ĝeguna ĝeraka-veĝitato, Figelo e Hemogenes maki.

¹⁶ Onesiforo ma ġena numa tarimari ġesi tu Vereġauka na ġena vevetuġaġwa iatari ai bene torea, korana ġia na nega ġutuma au nuġagu evaġa-gwaġiġiato-ġoi. Ema au dibura numai atanuto maiakana na asi emaiakaiato.

¹⁷ Ġia Romai eraġasito ġaronai tu, au evetau-kokore kokoreguto mo edoġariguto.

¹⁸ Vereġauka na ġena vevetuġaġwa iatanai bene torea mo, Kota baregona ġaronai! Ema ġoi ma ribamu ginikau Efeso ai au vetuġunagi au aġesi eiaġo-viniato.

2

Keriso Iesu ġena vetari tarimana moġonina

¹ Moġa lorinai, natugu, ġoi tu Keriso Iesu ġena varevare-bara nuġanai bono kokore.

² Tarimarima vovoka goirari ai au ġeguna kara oseġaġirito dagarari vetuġamaġikau tarimari bono vaġa-ribari. Benamo moġeri na maki tarima tari ġeri ma beġenea kiraġi.

³ Keriso Iesu ġena vetari tarimana namonai bono iaġo, ema midigumidigu nuġanai bono vevaġa-gwaġiġi au aveini kavana.

⁴ Vetari tarimana ġena maġuri ma ribamu. Evetarini nuġanai, ġauvei tari asi beveirini riba. Senaġina ġia ġena ura tu eġabi-toġaiato vetari verena vaġa-iakuna veġana moġo bene veia.

⁵ Raga-iruiru baranai eragani tarimana, asi bekokoreni riba o korona asi beġabiani riba, bema raga-iruiru taravatuna asi bekorana-iaġiani nai tu.

⁶ Vamoka vei tarimana beġauvei-kokoreni tu tauġena roġo voina bene ġabi-guinea kwakwa garonai.

⁷ Vereġauka na vau tuġamaġi-faka bevinimuni, benamo mo guruġa mabarari bakiraġiri boriba-ginikaurini.

⁸ Maġa tu bono tuġamaġi-taġoa. Iesu Keriso tu Davida senena, mase na evariġisi-ġenoġoito. Au na tu maġesina akiraġiani Vari Namona aġobata-iaġiani nai.

⁹ Moġesina naima ġevaġa-midigu midiguguni, dibura numai maki seini na ġebarubaruguni noġa vevaġideba o lema tarimagu. Senaġina Barau ġena guruġa tu asi barutari.

¹⁰ Moġa lorinai midigumidigu mabarari avevaġa-gwaġiġi-iaġirini Barau na eġabi-viriġirito tarimari dairi ai, be ġia maki Keriso Iesu ġenana eiaġomani vevaġa-maġurina, ema etanu-vanaġi vanagi marevana baregona beġene ġabia uranai.

¹¹ Mai tu guruġa moġonina:

“Bema ġita Keriso ġesi tamaseto nai tu, ġia ġesi maki bita maġurini.

¹² Bema tavevaġa-gwaġiġini nai, ġia ġesi maki bita veġorikau-sebonani.

Bema ġia takira-ġuniġauani nai, ġia na maki ġita bekira-ġuniġaurani.

¹³ Bema ġita asi tavetuġamaġikauni, ġia tu roġo gabunai ma ġena vetuġamaġikau beruġa-taġoni;

Korana ġia tauġena tu asi bevekira-ġuniġauni, (mai tu ġena kiraġitore guruġari ġia na asiġina ġinavaġi bekeforini).”

Ġauvei tarimana namona

¹⁴ Mo guruġa ma bono vaġa-riba ġenoġoiri, ema Barau ġoiranai bono kira-toreġauri, guruġa koriri veġare-veġareri asi beġene vevaġi. Korana monana namo ta asi bevaġa-ġoraiani, senaġi beġe seġaġini tarimari ġeri maġuri moġo bevaġa-rakavarini.

¹⁵ Bono ġauvei-ġunaġave, be Barau ġoiranai bono fofori nai, bene vaġa-moġonimu, ġauvei tarimana asi emaiakaiani tarimana kavana. Korana ġia na tu Barau ġena guruġa moġonina evevaġa-riba ginikauani.

¹⁶ Sisiba rakavari e babori asi bono kiraġi, ema ġerina bono veġita, korana mo sisiba ġekiraġirini tarimari tu Barau ġenana ġeraka-manaġani.

¹⁷ Guruġa moġesina ġekiraġirini tu noġa manuġa rakavari ġebakarini kavana. Himenao e Fileto tu moġesina tarimari.

¹⁸ Ġia tauri ruarua na tu guruġa moġonina dabarana ġeraga-kwaneato. Ġekirani variġisi-ġenoġoi tu evetoreto, be ekorito. Moġesina ġeguruġani nai, tarima tari ġeri veġabadadama ġevaġa-rakavarini.

¹⁹ Senaġi Barau ġena guruġa korana tu eruġa-gwaġiġini fore baregona noġa, asi beġareva-ġarevani. Iatanai tu mai guruġa etoreato, “Vereġauka ma ribana deikara tu ġia ġena.” Ma ekirani, “Deikara ekirani ġia tu Vereġauka ġena etoni tarimana tu vei-rakava ġenana bene raka-veġita.”

²⁰ Numa baregona nuḡanai tu mereki irauirauri moḡeri, dia mabarari golo e silva na ḡeveirito dagarari moḡo, senaḡi ḡau e tano na ḡeveirito dagarari maki moḡeri. Tari tu ḡaro baregori ai vau beḡe ḡauvei-laḡirini, a tari tu ḡeḡauvei-iaḡi vanaḡivanaḡirini ḡaniḡani ḡari o momo fitoḡa dagarari.

²¹ Bema maḡeri veḡiḡa rakavari ḡerina tauḡena eveiarevani tarimana tu, ḡauvei namori ḡauvei-iaḡiri tarimanai Vereḡauka na bevaḡa-iaḡoani ema bevaḡa-veaḡaiani. Gia tu eḡita-ḡauani tarimana ḡena ḡauvei tarimana aroribanai beiaḡoni ḡauvei namori mabarari veiveiri ḡana.

²² Guru varigu ḡeri ura rakavari mabarari bono raga-kwaneri, ema maḡeri bono korana-iaḡiri: Vei-iobukaiobuka, veḡabidadama, veuravini, ema maino. Ma nuḡari namo vedaureari Vereḡauka ḡenoḡiani bene vaḡa-kavari ḡana tarimari ḡesi bono sebona.

²³ Vedanaḡi e veḡareveḡare babori ḡerina bono raka-veḡita, korana ḡoi ribamu moḡeri na tu vevane beḡe vaḡa-ḡorari.

²⁴ Vereḡauka ḡena vetuḡunaḡi tarimana tu asi bene vevane, senaḡi tarimarima mabarari bene iaunamo-viniri, bene vevaḡa-riba ginikau, asi bene baru.

²⁵ Gekira-fitogaiani tarimari bene kira-rogori ma manauna ḡesi, betaḡu Barau na bevaḡa-vetuḡamaḡi kurerini, benamo guruḡa moḡonina beḡe ribani.

²⁶ Benamo ḡia ḡeri tuḡamaḡi beḡe roroḡoto-ḡenoḡoni ema Diabolo ḡena rigirigi na beḡe raga-veḡitani, korana ḡia na roḡo eḡabi-taririni ḡena ura beḡene veiri ḡana.

3

Ḡaro maḡori ai

¹ Ema maḡa maki bono ribaia: Ḡaro dokori ai tu rakava ḡutuma beḡe ḡorani.

² Tarima tu tauḡeri moḡo beḡe veura-vevinini, moni beḡe mata-ḡaniḡani iaḡirini, beḡe vekiraḡi-varaḡe varaḡeni, beḡe veiavini, ḡeri guruḡa beḡe rakavani, tamari sinari beḡe kira-sirivaḡi vinirini, tanikiu maki asi beḡe toni, ema asi beḡe veaḡani.

³ Asi beḡe veura-vini, tarima ḡeri rakava asi beḡe tuḡamaḡi-fitogaiani, beḡe verori-toreni, asi beḡe vevaḡa-ḡwaḡigini, beḡe niara-niararini, beḡe kira-sirivaḡini.

⁴ Gia tu beḡe revani, ḡeri tuḡamaḡi rakavari ilailari ai beḡe vei-taḡuitaḡuini, nuḡari veiavi na beḡe vonuni, tanobara iaḡuri e verereri beḡe ura-vinirini, a Barau tu asi beḡe ura-viniani.

⁵ Barau korana-iaḡina tu tauna korikori iouiouna murikana rekenai moḡo ḡetovotovoani, a ḡia tauna korikori seḡukana tu ḡeruḡaiani. Mo tarimarima ḡerina tu bono raka-veḡita.

⁶ Moḡesina tarimari tu tarimarima ḡeri numa nuḡari ai ḡeraka-toḡani, benamo nuḡari moira vavineri ḡeḡofarini. Mo nuḡari moira vavineri tu ḡeri veḡa rakavari metori na ḡelaulau-taririni, ema ḡeri ura rakavari na ḡeḡori-kaurini.

⁷ Moḡeri vavineri tu vanaḡivanaḡi riba ḡevetauni, senaḡina guruḡa moḡonina tu asi ḡedoḡariani.

⁸ Iane e Iambre, Aigupito ḡeri ḡora tarimari, na Mose ḡelaulau-ḡauato kavana, mai vevaḡa-riba ḡofaḡofa tarimari na guruḡa moḡonina ḡelau-ḡauani. Gia ḡeri tuḡamaḡi tu rakava kwaikwai, ema ḡia tu ḡeri veḡabidadamai asi ḡekokoreto, ḡeketoto.

⁹ Senaḡi asi beḡe raga-kwareḡani, korana tarimarima mabarari na ḡeri babo beḡe ḡita-dogaiani, Iane e Iambre ḡeri ai eḡorato kavana.

Vevaḡa-naḡi maḡori

¹⁰ Senaḡi ḡoi na tu au ḡegu vevaḡa-riba guruḡari mabarari okorana-iaḡirito, ḡegu veḡiḡa, ḡegu ura tauri, ḡegu veḡabidadama, ḡegu vevaḡa-ḡwaḡigi, ḡegu veuravini, ḡegu ruḡa-ḡwaḡigi otovovorito.

¹¹ Gelai-veḡitaḡuto, ḡevaḡa-midigu midiguguto, ḡegu midigumidigu maḡeri mabarari au ḡegu ai ḡeḡorato Antioka, e Ikonja, ema Listera ai. Gevaḡa-midigu midiguguto nuḡanai avevaḡa-ḡwaḡigito. Vereḡauka na moḡeri mabarari ḡerina eḡabi-maḡuriguto.

¹² Moḡoni, Keriso Iesu nuḡanai Barau korana-iaḡina beḡe urani tarimari mabarari tu moḡesina beḡe vaḡa-midigu midigurini.

¹³ Ma vei-rakava tarimari e ḡofaḡofa tarimari tu moḡesi moḡo beḡe vei-iaḡoni, rakava ḡenana rakava lelevaḡinai beḡe raḡasini, tarima tari beḡe ḡofarini, ema ḡia maki Diabolo na beḡofarini.

¹⁴ Senaḡi ḡoi tu kara oribaiato ema oḡabi-raḡeato maniḡa moḡo bono korana-iaḡia. Korana ḡevaḡa-ribamuto tarimari ḡoi tu ma ribamu,

¹⁵ ema keimu na beiaḡoma maitoma Buka Veḡa guruḡari ma ribamu; maḡeri Buka Veḡa guruḡari na iaunega beḡe vinimuni, benamo Keriso Iesu ḡenai boveḡabidadamani vevaḡa-maḡuri ḡabiḡabina ḡana.

¹⁶ Buka Veāga guruḡari mabarari tu Barau nuḡana na ḡeraka-rosito, benamo tarimarima nuḡari ai Iauka Veāga na evaḡa-raka-toḡarito. Ma ḡia tu ma ḡeri namo guruḡa moḡoniri vevaḡa-riba-iaḡiri ḡana, rakava vaḡa-foforiri, rakava vaḡa-roroḡotori ḡana, ema dabara iobuka-iobukana vevaḡa-riba-iaḡina ḡana.

¹⁷ Mo guruḡa ḡerina Barau ḡena tarimarima beḡene riba-ginikau, benamo veiḡa namori mabarari beḡene veiri.

4

¹ Barau e Keriso Iesu ḡoirari ai avāḡa-guruḡa gwaḡiḡimuni. Iesu beḡenoḡoini ḡaronai tu, ḡena veḡitaḡau gaburenai maḡuri tarimari e mase tarimari viriḡiviriḡi bea vei-vinirini.

² Barau ḡena guruḡa bono ḡobata-iaḡia, ḡaro namori ai e ḡaro rakavari ai. Tarimarima ḡeri veiḡa rakavari na bono vaḡa-roroḡotori, bono kira-feiri, bono launaḡiri, bono vaḡa-ribari ma vevaḡa-gwaḡiḡimu ḡesi.

³ Korana ḡaro ta beiaḡomani, monai tarimarima na vevaḡa-riba moḡonina tu asi beḡe seḡaḡi-viniani, a ḡeri ura rakavari loriri ai vevaḡa-riba tarimari ḡutumari ma beḡe ḡabirini, ḡia na ḡeuravini-rakavarini guruḡari beḡene seḡaḡiri ḡana.

⁴ Guruḡa moḡonina seḡaḡi-seḡaḡina ḡenana beḡe raka-veḡitani, a ḡia tu sinasina guruḡari vau beḡe ura-baregoni.

⁵ Senaḡi ḡoi tu bono veḡitaḡau dagara mabarari ḡeri ai, midigumidigu nuḡanai bono vevaḡa-gwaḡiḡi, Vari Namona ḡobata-iaḡina ḡauveina bono veia, Barau ḡena vetuḡunaḡi ḡauveina mabarana bono gauvei-iaḡi ḡitakaua.

⁶ Korana au tu dori amaseni, ema au raragu tu bevebubuni noḡa vine nanuna Barau ḡevarevare-viniani nai ḡebubuani kavana. Au ḡegu rakaveḡita ḡarona tu berāḡasi.

⁷ Vetari nuḡanai avevaḡi-ḡitakauto, au ḡegu raga-iruiru tu varau bavaḡa-koria, ḡegu veḡabidadama tu roḡo aḡabi-tariani.

⁸ Toma ḡegu vei-iobuka-iobuka korona evei-toreato, etanuni mo Kota baregona ḡarona berāḡasini nai, Vereḡauka, Kota Tarimana Iobuka-iobukana, na beviniguni. Dia au moḡo, senaḡi mo deikara-deikara ḡia bema foforini ḡaronai ḡeura-viniani tarimari maki bevinirini.

Veḡabituḡu guruḡari

⁹ Bono kokore, be au ḡegu ai bono iaḡoma-ḡarimoḡi.

¹⁰ Korana Dema na tu mai tanobara maḡurina euravini-baregoani, benamo au eraga-kwaneguto, Tesalonika ḡana eiaḡoto. Kreske tu Galatia ḡana eiaḡoto, ema Tito tu Dalmatia ḡana.

¹¹ Luka ḡereḡana moḡo au ḡesi. Mareko bono ḡoria, ḡoi ḡesi boḡono iaḡoma, korana ḡia tu ḡunaḡave e au ḡegu ḡauvei nuḡanai bevaḡa-kavaguni riba.

¹² Tikiko tu Efeso ḡana atuḡuato.

¹³ ḡoi boiaḡomani nai tu, auna koudi bono ḡwa-kaua, Troas vanuḡanai Karpo ḡenai araga-kwaneato, ema ḡegu buka maki bono ḡwa-kauri, dagara baregona tu mamoe e nanigosi kefiri na ḡeveirito toretore ḡana dagarari, asi bono tuḡa-rewkari.

¹⁴ Alesanda, auri eḡauvei-iaḡirini tarimana, na au evaḡa-rakava baregoguto. Mo kara eveiato tu Vereḡauka na vau voina beviniani.

¹⁵ ḡia ḡenai tu tauḡemu bono venari, korana ḡia tu ḡai ḡema vevaḡa-riba guruḡari ekira-fitoga rakavarito.

¹⁶ Totovonai Kota tarimari ḡoirari ai aruḡato nai tu, ta sevigu ai asi eruḡa-tarito, asi evaḡa-kavaguto, mabarari na ḡeraga-kwaneguto. Aḡau-ḡauni, Barau na moḡeri vei-rakava voiri asi bene viniri.

¹⁷ Senaḡina Vereḡauka tu au sevigu ai eruḡa-tarito, benamo kokore eviniguto. Moḡesina eveiguto korana tu, Vari Namona au na bana kiraḡi-foforia, benamo irau bese tarimari mabarari na beḡene seḡaḡia ḡana. Ema au tu Barau na laion bokana na evaḡa-maḡuriguto.

¹⁸ Vereḡauka na rakava mabarari ḡerina beḡabi-maḡuriguni, ema ḡena Guba Basileia ḡana beḡori-ginikauguni. ḡia arana bitana vaḡa-raḡea bene iaḡo vanaḡivanaḡi, asi magona. Amen.

Vevaḡa-namo dokona

¹⁹ Au ḡegu vevaḡa-namo atuḡuani Priska (o Priskila) e Akwila ḡeri ai, ema Onesiforo ma ḡena numa tarimari ḡeri ai.

²⁰ Erasto tu Korinto ai betanu, ema Trofimo tu Mileto ai baraga-kwaneana, korana ekeveni nai.

²¹ Bono kokore, be bono iaḡoma-ḡarimoḡi, faraka e iavara ḡueri roḡosi bene ḡabia nuḡanai.

Eubulo, Pude, Lino, e Klaudia ġeri vevaġa-namo ġetuġuani, ema ekalesia tarikaka mabarari na maki.

²² Vereġauka tu ġoi iaukamu ġesi bene tanu. Barau ġena namo e varevare-bara ġomi ġemi ai bene tanu.

PAULO ĜENA TORETTORE TITO ĜENA

Tito vaĝa-foforina guruĝari

Mai fefa tu Paulo na Tito ĝeregana ĝena etoreato. Mai fefa Paulo tu Roma dibura numana na etoreato. Mai fefa etoreato laĝanina tu 64 ma 65 fakari nuĝanai ta, mo tu Iesu maki emaseto murinai vau.

Mai fefai siri baregori tu karoa 2:11-14; 3:8.

Paulo na mai fefa etoreato korana ĝena ura, 1) Tito bene kiraia, ekalesia doĝorori ĝorikauri tarimari tu kamasiri bene ĝabiri; 2) Tito bene vaĝa-ribaia, Barau ĝena namo ema varevare-bara nuĝanai Barau korana-iaĝina maĝurina tu aiĝesina bene tanu-iaĝia; 3) Tito bene launaĝia, vevaĝa-riba guruĝari mogoniri bene vevaĝa-riba-iaĝiri. Mai fefa Paulo na tu maiĝesina eboioĝaiato:

1. Barau korana-iaĝina maĝurina ekalesia doĝorona nuĝanai - karoa 1
2. Barau korana-iaĝina maĝurina numa tatai - karoa 2
3. Barau korana-iaĝina maĝurina tanobara mabarana - karoa 3

¹ Au Paulo, Barau ĝena vetuĝu-naĝi tarimagu ema Iesu Keriso ĝena apostolo, ĝeguna mai fefa ei-aĝosini. Au tu Barau na etuĝuguto, Barau na eĝabi-hidirito tarimari ĝeri veĝabidadamai bana vaĝa-kavari, e guruĝa ema maĝuri mogonina bana vaĝa-ribari ĝana. Mai guruĝa ema maĝuri mogonina beĝe ribaiani tu, Barau beĝe korana-iaĝi-korikoriani.

² Korana monana vauro maĝuri vanaĝivanaĝi beĝe tuĝamaĝi-dadamaĝiani e beĝe ĝabiani. Mai maĝuri vanaĝivanaĝi maĝurina maĝa tu tanobara roĝosi bene vesina nuĝanai veĝata, Barau na ekiraĝi-toreato. Ĝia tu asi eĝofaĝofani Barauna.

³ Senaĝi maitoma vauro Barau tauĝena na eĝabi-toreato ĝaronai tauĝena na bema vaĝa-foforia. Mai Vari Namona maĝa tu ĝita ĝera Vevaĝa-maĝuri Barauna ĝena guruĝa lorinai au ĝegu ĝobatai akiraĝi-foforiani.

⁴ Tito, mai fefa tu ĝoi ĝemu atore-iaĝosiani. Ĝoi tu au natugu korikori ĝita ĝera mai veĝabidadama sebona maĝa nuĝanai:

Tamara Barau ema Keriso Iesu ĝita ĝera Vevaĝa-maĝuri Verena ĝerina varevare-bara ema maino ĝemu ai bene tanu.

Tito ĝena ĝauvei Krete motumotunai

⁵ Au na ĝoi Krete ai araga-kwanemuto korana tu, kara maninai roĝosi bana veiri dagarari bono veiri ĝana. Ema vanuĝa baregori mabarari ai ekalesia ĝorikauri tarimari tari bono vaĝa-ruĝari mo akiramuto kavana.

⁶ Ekalesia ĝorikauna tarimana tu veĝa namori moĝo eveini, rakava ta ĝenai asi boĝoitaĝoani tarimana. Garaĝona tu sebona moĝo; natuna na Iesu Keriso ĝevaĝa-mogoniani, asi ĝeniara-kava niara-kavani, e asi ĝeseĝaforeni, ema guruĝa veroro asi ĝeseĝaĝini merori.

⁷ Korana ekalesia eguine-iaĝirini tarimana tu Barau ĝena ĝauvei eĝita-ĝauani tarimana. Moĝesina naima ĝia tu veĝa namori moĝo bene vei, a rakava ta ĝenai asi bene tanu, asi bene kira, ĝia tu tarima baregona, benamo tarimarima na tu ĝia ĝeregana ĝena ura moĝo beĝene korana-iaĝia benesi, asiĝi. Asi bene baru-ĝarimoĝi, dia niuniu rakava-rakava tarimana, dia nuga-ĝirima-ĝirima tarimana, dia ĝofaĝofa veĝari ai ĝena-ĝana egoitaĝoni tarimana.

⁸ Ĝia tu veĝabiraĝe tarimana, veĝa namori eura-vinirini tarimana, vevaĝa-gwaĝiĝi tarimana, vei-iobukaiobuka e veaĝa tarimana, ema nuga-gwaĝiĝi tarimana.

⁹ Guruĝa mogonina vevaĝa-ribaĝo guruĝari bene ĝabi-gigitariri, be ĝia na moĝeri vevaĝa-riba mogonina bene ĝabi-iaĝoa, benamo tarima kotari ma benea launaĝiri, e vevaĝa-riba mogonina ĝekira-fitogaiani tarimari maki bene vaĝa-guruĝa gwaĝiĝiri, be ĝeri kerere gaburi beĝene ĝita-doĝariri.

Krete motumotunai tu vevaĝa-riba tarimari ĝofaĝofari vovoka moĝeri

¹⁰ Guruĝa mogonina asi ĝekorana-iaĝiani, ĝekira-sirivaĝini tarimari, e guruĝa asi tauri ĝekiraĝirini tarimari, ema vevaĝa-riba babori na tarimarima ĝeĝofarini tarimari tu asisebo maniĝeri. Iuda tarimari fakari ai ekalesia nuĝanai ĝeraka-toĝato tarimari tu maniĝesina ĝeveini.

¹¹ Maniĝeri tarima tu boĝono kira-ĝoiri. Korana ĝia na tu bese mabarari ĝeri veĝabidadama ĝevaĝa-rakavarini. Ĝia tu asi ĝere vevaĝa-riba-iaĝiri dagarari ĝevaĝa-riba-iaĝirini. Ema ĝia mani-ĝeri tu moni e farefare beĝene viniri uranai ĝevei-ĝofakauni.

¹² Ĝia fakari ai ĝeri peroveta tarimana ta tu maiĝesi ekirato, "Krete tarimari tu vanaĝivanaĝi ĝeĝofaĝofani, boĝa bairi rakava kwaikwairi, ĝubulefi ma boĝeka tarimari."

¹³ Ĝia ekiraĝirito guruĝana maiĝa tu moĝoni. Moĝa lorinai bono kira-matana matanari, be nuĝari mabarari ĝesi e ma moĝoniri ai beĝene veĝabidadama.

¹⁴ Ema Iuda seneri ĝeri sinasina asi beĝene seĝaĝiri, ema Barau ĝena guruĝa moĝonina ĝenana ĝeraka-veĝitani tarimari ĝeri taravatu maki asi beĝene korana-iaĝiri.

¹⁵ Nuĝa namo vedaurea tarimari ĝeri ai dagara mabarari tu namo vedaurea e veiareva. Senaĝi nuĝa asi veiareva ema Keriso asi ĝevaĝa-moĝoniani tarimari ĝeri ai dagara ta tu veiareva asi betanuni. Asiĝina ĝinavaĝi. Korana ĝia tu ĝeri tuĝamaĝi e nuĝari tu rakava kwaikwai bene.

¹⁶ Moĝeri tarima ĝekirani, ĝia tu Barau ma ribari ĝetoni, senaĝi ĝeri veiĝa na evaĝa-foforiani, ĝia tu Barau asiĝina ĝinavaĝi ribari. Maĝeri tarima tu vei-rakava ma kira-sirivaĝi tarimari, ema veiĝa namori veiveiri ĝia ĝeri ai tu gwaĝiĝi foroforo.

2

Vevaĝa-riba moĝonina e iobukaibukana

¹ Senaĝi ĝoi na tu vevaĝa-riba moĝonina bono vaĝa-ribari.

² Tarima ĝaukari bono kirari, nuĝari beĝene ĝabi-tariri, beĝene tuĝamaĝi-roroĝoto e beĝene vevaĝa-gwaĝiĝi. Nuĝari mabarari e ma moĝoniri ĝesi beĝene veĝabidadama, e beĝene veura-vini, ema beĝene ruĝa-gwaĝiĝi.

³ Vavine ĝaukari maki mai vevaĝa-riba sebona moĝo bono viniri. Bono kirari, ĝia ĝeri maĝuri ema veiĝa beĝene veaĝa. Tarimarima arari asi beĝene vaĝa-rakava-kavari, e asi beĝene niu-babobabo. A ĝia tu veiĝa namori moĝo beĝene vevaĝa-riba-iaĝiri.

⁴ Benamo ĝia ĝeri mo vevaĝa-riba ĝerina vavine variĝuri na ĝaraĝori ema naturi beĝe ura-vinirini.

⁵ E beĝe vevaĝa-gwaĝiĝini, Barau ĝoiranai beĝe namo-vedaureani, ema ĝeri numa beĝe ĝita-ĝaurini, ema ĝauveiri maki beĝe vei-ĝinikaurini, ma vavine namori ai beĝe iaĝoni e ĝaraĝori beĝe gubakaurini ema beĝe seĝaĝi-vinirini. Maĝesi veiĝari beĝe veirini nai tu, Barau ĝena guruĝa tarimarima na asi beĝe kira-fitoĝiani.

⁶ Tau maraĝa variĝuri maki mai velaunaĝi sebona moĝo bono viniri. Bono kirari, beĝene vevaĝa-gwaĝiĝi.

⁷ Dagara mabarari veiveiri ai tu ĝoi tauĝemu na vevaĝa-ĝita-iaĝi veiĝari namori bono veiri, be beĝene ĝitari. Bovevaĝa-ribani nuĝanai maki ĝere ai asi bono guruĝa, senaĝi guruĝa moĝoniri, guruĝa korikoriri,

⁸ ema guruĝa iobukaibukari bono kiraĝiri, be tarima ta na ĝemu guruĝa asi bene ĝaoo. Moĝesina boveini tu, ĝoi ĝekira-fitoĝamuni tarimari beĝe maiakarini, benamo ĝita iatarai guruĝa rakavana ta asi beĝe kiraĝiani.

⁹ Tuĝu-rakaorakao tarimari bono launaĝiri, ĝeri baregori garori beĝene seĝaĝiri ema beĝene vaĝa-verereri ĝeri vetuĝunaĝi mabarari ĝeiaĝo-vinirini nuĝari ai. A asi beĝene guruga-vaĝa-voiri bonosi.

¹⁰ E bono kirari, ĝeri baregori ĝeri farefare asi beĝene lemalema-vaĝiri. Senaĝi ĝeri veiĝa namori moĝo beĝene vaĝa-foforiri. Ma mo veiĝa namori na ĝeri baregori beĝene vaĝa-ĝitari, ĝia ĝeri ai asi beĝene daradara, senaĝi beĝene tuĝamaĝikau. Maĝesi beĝe veini tu, ĝita ĝera Vevaĝa-maĝuri Barauna ĝena vevaĝa-riba, tarimarima na tu beĝe vaĝa-raĝeani dabara mabarari nuĝari ai.

¹¹ Korana Barau ĝena namo e varevare-bara ĝenana vevaĝa-maĝuri eiaĝomato, mo vevaĝa-maĝuri tu tarimarima mabarari ĝeri ai ema foroforo.

¹² Barau ĝena namo e varevare-bara na ĝita evaĝa-ribarani, Barau asi takorana-iaĝi korikoriani maĝurina tu bitana fitoĝari. A ĝita mai tanobarai tatanuni tu, vevaĝa-gwaĝiĝi maĝurina bitana tanu, veiĝa iobukaibukari bitana vei ema Barau bitana korana-iaĝi korikoria,

¹³ ĝaro baregona e namona tanari-taĝoani nuĝanai tu. Ĝita initiba tu Iesu Keriso tanari-taĝoani; ĝia tu ĝita ĝera Barau baregona e ĝera Vevaĝa-maĝuri Tarimana; ĝena iaĝoma ma marevana asikeikeina ĝesi moĝo tanari-vegogo-taĝoani.

¹⁴ Iesu Keriso ĝita urarai tauĝena evevinito, ĝita veiĝa rakava kwaikwairi nuĝari na bene voi-vaĝira ĝana uranai. Ema ĝita tu ĝia ĝereĝana ĝena moĝo bene vaĝa-namo vedaureara, benamo bene tore-ĝerevaĝira, ĝena tarimarima namori ai bisini iaĝo, ma ĝauvei namori moĝo veiveiri bisini uradika ĝana.

¹⁵ Goi na tu maĝeri maĝuri e veiĝa bono vevaĝa-riba-iaĝiri. Ĝemu maoro baregona maniga bono ĝauvei-iaĝia, tarimarima bono launaĝiri, ema ĝeseĝaforeni tarimari bono kira-feifeiri. Tarima ta na asi bene kira-fitoĝamu.

3

Aigesi ekalesia gere tanu

¹ Ĝemu tarimarima ma bono vaĝa-guruĝari, bono kirari, kini e gavamani ĝeri veĝitaĝau gaburenai beĝene tanu e beĝene seĝaĝi-viniri. Ema vanaĝivanaĝi beĝene venari-taĝo, veĝa namori beĝene veiri ĝana.

² Tarima ta ĝenai guruĝa rakavana ta asi beĝene kiragiā, ta ĝesi asi beĝene vekira o vevane. A ĝia tu manau ai moĝo beĝene tanu ema tarimarima mabarari veĝa namori moĝo beĝene vei-viniri.

³ Korana tu ĝita maiĝera maki guinenai tu babo, Barau asi ribara, Barau taseĝafore-viniato-ĝoi, Satani na egofarato-ĝoi, be Barau ĝena dabarai asi tarakato-ĝoi. Ĝita moĝeri negari ai tu veĝa rakavari irauirauri taura-vinirito-ĝoi, e taugani korina vaĝa-vererena veĝari irauirau ĝeri tuĝu-rakaorakao tarimari ai tavevaĝa-iaĝoto. Tarima vaĝa-midigumidiguri e vaĝa-vedaĝa-raĝeri tuĝamaĝiri taĝabito-ĝoi ema tarima ĝeri ai tamamato-ĝoi, baru na tavonuvonu-raĝeto-ĝoi e karora ĝesi taveiau-rakavato-ĝoi.

⁴ Senaĝi ĝita ĝera Vevaĝa-maĝuri Barauna ĝena veiau-namo ema ĝena veuravini ĝita tarimara ĝerai ema fororito nai tu,

⁵ ĝita ema vaĝa-maĝurirato. Ĝita tu dia ĝera vei-iobukaiobuka dainai ema vaĝa-maĝurirato. Asigina. Ĝia tauĝena ĝena vevetuĝaĝwai moĝo ema vaĝa-maĝurirato. Eĝurigi-matamatarato tamaĝuri-ĝenoĝoito ĝaronai, ema Iauka Veaĝa na ĝera maĝuri ma evaĝa-variĝu ĝenoĝoiriti.

⁶ Mai Iauka Veaĝa tu Iesu Keriso ĝita ĝera Vevaĝa-maĝuri Tarimana ĝenana Barau na ĝita iatarai ebubu-kauato.

⁷ Keriso na mai maĝuri eveiato, korana ĝita tu ĝia ĝena namo e varevare-bara ĝenana moĝo vei-iobukaiobuka tarimarai evaĝa-iaĝorato Barau ĝoiranai. Ema maĝuri vanaĝivanaĝi tatuĝamaĝi-dadamaĝiani maĝurina maki Barau na bevinirani, benamo bita ĝabiani.

⁸ Mai velaunaĝi guruĝari maiĝeri tu moĝoni korikori. Be au aurani, ĝoi na mai veĝa namori maiĝeri tarimarima ĝeri ai bono kiragi-baregori, be mani Barau ĝenai ĝeveĝabidadamani tarimari maniĝeri tu ĝeri maĝuri beĝene nariri; ema ĝauvei namori ĝeveini maniĝeri tu roĝo beĝene vei-iaĝori. Korana mani veĝa maniĝeri tu veĝa namori ema maniĝeri na tarimarima mabarari maki beĝe vaĝa-kavarini.

⁹ A vedanaĝi babori e tubu ĝata o sene ainana ĝeiaĝomato moĝeri kiragi-ginikau ginikauri e veĝareveĝare, ema Mose ĝena taravatu vevaneri mabarari ĝerina tu bono veĝita. Korana maniĝeri na vevaĝa-kava namona ta tu asi bodoĝariani. Mani tu asi tauri dagarari.

¹⁰ Ekalesia doĝorona nuĝanai vetavi-kirakira veĝana eveiani tarimana tu bono kira-toreĝaua, bono kiraia, mo veĝa asi bene veia. Besegaforeni, benamo mo veĝa roĝo beveiani nai, vaĝa-ruaruana ma bono kira-toreĝaua. Moĝa murinai roĝo eĝiĝirageni nai tu, bono ĝita-fitoĝaia moĝo.

¹¹ Korana maniĝesi vetavi-kirakira veĝari eveirini tarimana tu bono riba, ĝia ĝena maĝuri tu rakava kwaikwai ema vei-rakava nuĝanai etanuni. Ĝia tu tauĝena ĝena vei-rakava na evaĝa-moĝoniani, ĝia tu moĝoni rakava tarimana.

Vevaĝa-riba guruĝari magori

¹² Au na Ateamas o Tikiko ĝoi ĝemu ai batuĝu-iaĝosiani nai tu, dabara ta bono vetaua, benamo au ĝegu ai bono iaĝoma Nikopoli ĝana. Korana au tu akirato, faraka e iavara ĝueri nuĝari ai tu monai baĝabiani atato bene.

¹³ Taravatu tarimana Senas e Apolos ĝeri dabara bono raga-vei, be bono ragatuĝu-iaĝomari. Botuĝu-iaĝomarini nai tu, ĝeri ura dagarari mabarari maki bono vini-ginikauri.

¹⁴ Ĝita ĝera tarimarima mabarari ĝauvei namori veiveiri ai asi beĝene biga dabarari bono vaĝa-ribari, be beĝene ribari. Korana moĝeri dabara beĝe ribarini nai tu, ĝaro vanaĝivanaĝi ĝeri-ĝari tu tauĝeri beĝe ĝauveini, benamo beĝe ĝoitaĝoni, ema ĝeri ĝauvei maki ĝwaĝwari beĝe vetoreni.

¹⁵ Mainai au karogu mabarari na ĝemi vevaĝa-namo beĝe tuĝu. Ĝema vevaĝa-namo maki veĝabidadama nuĝanai ĝai ĝeura-vinimani tarimari bono viniri.

Barau ĝena namo e varevare-bara ĝomi mabarami ĝemi ai bene tanu.

PAULO ĜENA TORETORE FILEMONA ĜENA

Filemona vaĝa-foforina guruhari

Paulo na mai fefa tu Filemona ĝena Roma dibura gabuna na etoreato. Mai fefa tu laĝani 60 ma 61 fakari nuĝanai ta etoreato, mo tu Iesu emaseto murinai vau.

Mai fefa anina baregona tu “Veĝabi-raĝe ĝenoĝoi”. Ma siri baregori mai fefai tu siri 15 ema 16.

Paulo na Filemona mai fefa etore-viniato korana tu ĝena ura, 1) Filemona bene kiraia, Onesimo ma bene ĝabi-raĝea tarikaka maĝurinai; 2) Filemona bene kira-varaia, ĝia tu dibura na dori eraka-rosini, ma beraka-rosini ĝaronai tu Filemona bea raka-ĝitaiani.

Paulo na Filemona ĝena mai fefa tu maĝesina eboloĝaiaito:

1. Paulo na Filemona evaĝa-veiaviato - siri 1-7
2. Paulo na Onesimo iatanai Filemona enoĝiato - siri 8-21
3. Veĝabituĝu guruhari ekiraĝirito - siri 22-25

¹ Au Paulo, Keriso Iesu ĝaramanai diburai atanuni tarimagu, ema tarikakara Timoteo, ĝemana eiaĝosini.

Ĝauvei sebona ĝaveiani tarimana e ĝatama namona Filemona ĝemu atore-vinimuni.

² Ema tobara Afia, ema ĝatara namona, Barau ĝena vetari nuĝanai iauka rekenai, Arekipo, ema ĝoina numai ĝevegogoni ekalesiari ĝeri atore-vinirini.

³ Tamara Barau ema Vereĝauka Iesu Keriso gerina maino ema varevare-bara ĝemi ai bene tanu.

Filemona ĝena veuravini ema veĝabidadama

⁴ Filemona, ĝegu Barau atanikiu-viniani ema vanaĝivanaĝi ĝegu ĝauĝau ai akiraĝimuni,

⁵ korana ĝemu veĝabidadama Vereĝauka Iesu ĝenai ema ĝemu veuravini Barau ĝena veaĝa tarimari mabarari ĝeri ai aseĝaĝimuni nai.

⁶ Moĝa lorinai aĝurigurini ĝemu veĝabidadama bono vari-fiua tarima tari ĝeri ĝana, be dagara namori taĝaunarini Keriso ĝenai taveĝabidadamani lorinai, bono riba-ĝitakauri.

⁷ Moĝoni, tarikakagu, ĝemu veuravini na evaĝa-iaku rakavaguto ema elaunaĝi-rakavaguto, korana ĝoi na veaĝa tarimari nuĝari ovaĝa-kokorerito.

Paulo ĝena noĝinoĝi

⁸ Au tu nuĝagu gwaĝiĝi Keriso nuĝanai ĝoi bara kiramu kara boro vei,

⁹ senaĝi veuravini nuĝanai moĝo anoĝimuni ĝemu veuravini dainai. Mai tu au, Paulo, baĝauka ema Keriso Iesu ĝaramanai diburai maĝegu.

¹⁰ Onesimo, au natugu, uranai anoĝimuni. Ĝia tu Keriso nuĝanai au natugu ai eiaĝoto, korana au roĝo dibura numana nuĝanai, iaukai ĝia tamanai aiaĝoto.

¹¹ Guinenai ĝia tu asi namo ĝoi ĝemu ai, senaĝina toma vetuĝunaĝi iaĝovininaĝi ĝia tu ilaila nai, ĝoi na oura-viniani ema au na maki aura-viniani.

¹² Ĝia tu au lorugu ĝutuna, mai atuĝu-iaĝosi ĝenoĝoiani, be bono ĝabi-raĝea.

¹³ Au ĝegu ura ĝia tu mainai bana ĝabi-taria au sevigu ai, be ĝoi gabumu bene ĝabia au bere vaĝa-kavagu, au Vari Namona ĝaramanai roĝo diburai nuĝanai.

¹⁴ Senaĝi ĝegu ura ĝoi na maoro boro vinigu vau bara ĝabi-taria, moĝesi naima asi aĝabi-tariato. Au asi auranai maki ĝoi bana kiramu kara bono veia. Au ĝegu tugamaĝi, bema veĝa namori tari au durudurugu ĝana bourani veiveiri nai tu, nuĝamu sigai moĝo bono veiri.

¹⁵ Betaĝu ĝoi ĝemuna Onesimo eveĝitato ĝaro kotuna anina tu, ma boĝabi-ĝenoĝoiani nai tu, ĝoi ĝesi bene tanu-vanaĝi vanaĝi ĝana.

¹⁶ Dia ĝemu tuĝu-rakaorakao tarimana asi voina moĝo. Asigina. Moĝoni, ĝia tu ĝemu vetuĝunaĝi tarimana, senaĝi ĝia toma tu ĝoi tarikakamu moĝoninaĝi beiaĝo, naima bono ura-vinia. Au na ĝia tu anari-ĝitakauani nuĝagu mabarana ĝesi, ema ĝoi na maki bouravini-lelevaĝiani nuĝamu mabarana ĝesi. Ĝia boura-viniani ema boĝabi-raĝeani tarima ta ema Vereĝauka nuĝanai tarikaka ta.

¹⁷ Bema au oĝabi-raĝeguni ĝoi ĝatamu, Onesimo maki bono ĝabi-raĝea au boĝabi-raĝeguni ilailanai.

¹⁸ Bema kerere ta eveiato ĝoi ĝemu ai o ma ĝena ĝabitore ĝoi ĝemu ai nai tu, au aragu ai bono toreri.

¹⁹ Au Paulo ĝimagu na mai fefa atoreani. Mo ĝabitore tu voiri mabarari bavini-ĝenoĝoimuni. Goi maki ma ĝemu ĝabitore au ĝegu ai. Goi maĝuri tu au ĝeguna oĝoitaĝoato, senaĝi maniĝeri tu asi bita kiraĝirini.

²⁰ Be, tarikakagu Vereḡauka nuḡanai, mani ḡemu veīḡa ḡegu noḡinoḡi bono ḡabi-raḡea. ḡita taura ruarua tu Keriso nuḡanai tatanuni, be bono vaḡa-iakugu.

²¹ ḡemu seḡaḡi ai avetuḡa-maḡikauni nai batore-vinimu. Au ribagu, dia anoḡimuni veīḡari moḡo boveirini, senaḡi veīḡa namori boruri maki boveini.

²² Dagara ta maia. ḡegu gena daiḡutuna ta bono ḡabi-torea, korana atuḡamaḡini, Barau na ḡemi ḡauḡau beḡabi-raḡeani, be beḡabi-iaḡosiguni ḡemi ai.

Vevaḡa-namo guruḡari

²³ Epafras, Keriso Iesu ḡaramanai au ḡesi dibura numanai ḡatanuni, ḡia na evaḡa-namomuni.

²⁴ Ema Mareko, Aristako, Dema ema Luka au ḡesi ḡaḡauvei-sebonani tarimari, ḡia na maki ḡeri vevaḡa-namo ḡevinimuni.

²⁵ Vereḡauka Iesu Keriso ḡena varevare-bara mabarami ḡemi ai bene tanu.

HEBERU

Heberu vaġa-foforina guruġari

Mai fefa toretorena tarimana ta tu asi ribana. Tari ġekirani tu Luka na etoreato, tari ġekirani tu Apolos, o Banabas, o Priskila, o Akwila, o Paulo na etoreato ġetoni. Gutuma ġekirani tu Paulo ġetoni korana fefa tu Paulo ġena fefa tore maġurinaġ ġetoreato. Mai fefa tu laġani 60 ema 70 fakari nuġanai ta ġetoreato, mo tu Iesu emaseto murinai.

Mai fefai siri baregori tu karoa 1:3; 4:14-16.

Mai fefa etoreato tarimana ġena ura baregona tu, 1) Heberu ekalesiari bene kirari, ekalesia maġurina korikorinai beġene tanu, a Iuda ġeri sene taravaturo ema maġuriri ġerina tu beġene raka-veġita ma ġeri ai asi ma beġene ġenoġoi-iaġo, maġuri vanaġivanaġi asi beġe dogariani garina (2:1; 6:4-6; 10:26); 2) Iesu Keriso bene vaġa-foforia, ġia tu moġoni Barau vetoġana korikori ema foforito tanobarai; 3) Barau ġena Ginitaġo Variġuna Iesu ġenai emoġonito moġa bene vaġa-fofori ginikaua etato.

Mai fefa tu maiġesina eboioġaiato:

1. Vevaġa-riba-iaġi guruġari - karoa 1-10:18
2. Ekalesia tanutanuna maġuriri - karoa 10:19-13:25

Barau ġena guruġa Natuna ġenana

¹ Guinenai, ġaro vovoka e dabara ġutumai Barau na peroveta tarimari ġerina senera evaġa-guruġarito.

² Senaġi toma, mai ġaro dokori ai, tu Natuna ġenana ema vaġa-guruġarato. Barau na dagara mabarari tu Natuna eviniato bene ġaunari. Ema ġia ġenana maki Barau na guba e tanobara eveirito.

³ Ġia tu Barau marevana e mamana baregona evaġa-foforiani, ema ġia tu Barau tauġena kavana. Ġia ġena guruġa seġukana na dagara mabarari eġabi-taġorini. Ġia tauġena na ġera rakava ġuriġivaġiri dabarana evei-ġitakauato murinai, Barau Iaru-korokoro aroribanai ea tanu-tarito gubai.

Barau Natuna tu barego vedaurea, aneru maki evanaġirito

⁴ Barau na Natuna tu etore-varaġeato, aneru evanaġirito. Korana tu arana eviniato maki varaġe lelevaġina, aneru arari evanaġirito.

⁵ Korana Barau na aneru ta tu asi ekiraiato, ekirato,

“Ġoi tu au Natugu,

toma au tu ġoi Tamamu ai baiaġo.”

O maiġesi maki asi ma ekiraiato, ekirato,

“Au tu ġia Tamanai baiaġoni,

ema ġia maki au Natugu ai beiaġoni.”

⁶ Ema Barau na Natuna guinena tanobara ġana ma beġori-iaġomaiani nai tu bekirani,

“Barau ġena aneru mabarami na boġono toma-rakariġo vinia.”

⁷ Aneru ekiraġirito nai tu ekirato,

“Barau na ġena aneru eveirito iavara kavana,

ġena vetuġunaġi tarimari karava emoreni noġa.”

⁸ Senaġina Natuna ekiraġiani tu ekirani,

“Barau o, ġoi ġemu Vere dagina tu betanu-vanaġi vanaġini,

ġemu Basileia tu ma iobukaiobukamu ġesi oġori-kauani.

⁹ Vei-iobukaiobuka tu oura-vinirini,

ma veġa rakavari tu asi oura-vinirini.

Moga lorinai, Barau o,

ġemu Barau na maki karomu fakari ai ġoi eġabi-viriġimuto,

debamu ai diġa esisiato,

iaku na evaġa-vonumuto.”

¹⁰ Ema ma ekiraiato, ekirato,

“Vere o, tovtovonai tu

ġoi na tanobara oveiato,

ema guba maki ġoi ġimamu veiveina.

¹¹ Ġia tu beġe korini,

senaġi ġoi tu botanuni;

mabarari dabuġa kavana beġe rakavani.

¹² Ġoi na koudi noġa boiokurini,

dabuġa kavana vetoġari beġe irauni,

senāgi ǵoi vetoǵamu tu asi beirauni,
ema ǵoi ǵemu maǵuri laǵaniri maki
asi beǵe magoni.”

¹³ Barau na aneru ta maki asi ekiraiato,

“Aroribagu ai noma tanu,

bene iaǵo mo, ǵoi ǵevetari-vinimuni tarimari ǵoi kwakumu fanakauna dagaranai batore-
taririni.”

¹⁴ Aneru mabarari tu vetuǵunaǵi iaukari moǵo, Barau na etuǵurito deikara vevaǵa-
maǵuri beǵe ǵabiani tarimari vaǵa-kavari ǵana.

2

Vevaǵa-maǵuri baregona

¹ Moǵa lorinai kara taseǵaǵirito guruǵari tu tana ǵabi-gigitariri, asi namo ǵerana beǵe
rekwarekwani, benamo taiǵo-viniani gabuna bita leaiani.

² Korana aneru na ǵita senera ǵeri ǵevari-fiurito guruǵari tu moǵoni veǵata, ma mo
guruǵa moǵeri ǵekira-sirivaǵi-iaǵirito e asi ǵekorana-iaǵirito tarimari tu ǵeri vei-rakava
ilailari ai metona ǵeǵabiato,

³ a ǵita tu kamasi bita raga-maǵurini, bema mai vevaǵa-maǵuri baregona bita ǵita-
ǵuirāǵiani nai tu? Mai vevaǵa-maǵuri tu tovotovonai Vereǵauka tauǵena na evari-fiuato.
Moǵa murinai tu ǵesegāǵiato tarimari na ǵai ǵema-kiravaramato mo tu moǵoni.

⁴ Barau na maki evaǵa-moǵoniato vetoǵa boruri ai, e nuǵa-farevaǵi veigari ai, e seǵuka
veigari boruri dabara irauirauri ai, ema lauka Veaǵa ǵena varevare dagarari na. Mo lauka
Veaǵa ǵena varevare dagarari tu Barau ǵena ura lorinai veǵabidadama tarimari evinirito.

Iesu na vevaǵa-maǵuri gabuna ǵana eǵori-iaǵorani

⁵ Mo tanobara beiaǵomani ǵai na ǵakiraǵiani tu Barau na dia aneru ǵeri veǵitaǵau
gaburenai etoreato.

⁶ Senāǵina Buka Veaǵa nuǵanai gabu tai tarima ta evarifiuto, ekirato,

“Barau o, tarimarima tu dei,

be ǵoi na otuǵamaǵi-gwaǵiǵiani?

O Tarimarima Natuna tu dei,

be ǵoi na oraka-ǵitaiani?

⁷ Ǵoi na kota otore-variǵoato aneru gabureri ǵana;

murinai mareva baregona e vegubakau koronana ǵenai otore-kauato,

⁸ ema dagara mabarari ǵia kwakuna gaburenai otorerito.”

Korana Barau na dagara mabarari tu ǵia ǵena veǵitaǵau gaburenai etorerito. Moǵoni,
Barau na dagara ta tu asi etore-ragakwaneato, ǵia ǵena veǵitaǵau gabuna murikanai.
Senāǵina maitoma dagara mabarari tu dia ǵia ǵena veǵitaǵau gaburenai taǵitarini.

⁹ Senāǵi Iesu taǵitaiani, ǵia tu Barau na mo faka kotunai etore-variǵoato aneru gabureri
ǵana, korana Barau ǵena varevare-bara ǵenana tarimarima mabarari urari ai bene mase.
Toma Iesu tu taǵitaiani, iatanai Barau na mareva e vegubakau baregona etore-kauato,
korana tu midigumidigu ai emaseto.

¹⁰ Dagara mabarari eveirito e eǵaunarito Barauna, ǵena ura tu Iesu roǵo midigumidigu
ǵenana asi vetoukaunai bene iaǵo-guine. Moǵa murinai vauro natuna ǵutumari ma bene
ǵori-iaǵomari, benamo ǵia marevana e mamana baregona beǵene ǵabia. Barau ǵenai
dabara roroǵotona sebona tu moǵa moǵo. Korana Iesu tu Barau natuna ǵeri vevaǵa-
maǵuri tarimana baregona.

¹¹ Tarimarima evaǵa-veaǵarini tauna, Iesu, ema Iesu na evaǵa-veaǵarito tarimari
Tamari tu sebona. Moǵa lorinai Iesu tu asi emaiakaiani mo evaǵa-veaǵarito tarimari
ekiraǵirini ǵia tarikakana.

¹² Ǵia na Barau ekiraiani, ekirani,

“Ǵoi aramu tu au tarikakagu ǵeri ai bakiraǵi-foforiani;

ekalesia nuǵanai ǵoi mari ai bavonevone-raǵemuni.”

¹³ Ma ekirato,

“Barau ǵenai baveǵabidadamani.”

Ema ma ekirato maki,

“Au tu maiǵegu Barau na eviniguto doǵorona natuna ǵesi.”

¹⁴ Korana Barau natuna mabarari tu ma viriǵori e ma rarari nai, ǵia tauǵena maki
ǵia ilailari ai eiaǵoto. Moǵesi eveito korana tu, ǵena mase ǵenana mase seǵukana eǵabi-
taǵoani tarimana, Diabolo, bene vaǵa-rakavaia ǵana.

¹⁵ Ema tarimarima deikara ǵeri maǵuri nuǵanai mase garina na eǵuǵuvirito bene vaǵa-
maǵuriri ǵana.

¹⁶ Moğoni, Iesu na tu dia aneru evağa-kavarito, senaği Aberahamo besena.

¹⁷ Moğa lorinai Barau na Iesu tu dabara mabarari ai tarina doğoro ilailari ai eveirito. Korana mo dabarai vau vevetuğağwa e vetuğamağikau Rubu Veğa verena baregonai beiağoni. Ema Barau vetuğunağina beiağō-vinini, tarimarima ġeri rakava na bene voi-vağiri ġana.

¹⁸ Korana Iesu tauğena na veribağani midigumidiguna mamina eğabiato, toma kamara deikara veribağani beğoitagōni nai tu bevağa-kavaiani riba.

3

Iesu ġena seğuka na Mose ġena seğuka evanağiato

¹ Moğa lorinai, tarikakagu veağami, ġomi tu Barau na ekeamito guba na. Ġemi tuğamaği boğono tore-gwağiğia Iesu ġenai. Ġia tu Barau na etuğato Rubu Veğa verena barana. Ġita na tu ġia takiraği-foforiani.

² Iesu tu Barau na evağa-ruğaiato Rubu Veğa verena. Ema ġia tu ma ġena vetuğamağikau Barau ġenai, ilailana Mose ma ġena vetuğamağikau Barau ġena numai kavana.

³ Numa eragaiani tarimana tu ġegubakau-baregoani, a eveiani numana tu ġegubakau-keiani. Moğesi kavana Barau na Iesu tu mareva baregona eviniato, Mose na eğabiato marevana evanağiato.

⁴ Numa mabarari tu ma ragaragari tarimari, senağina dagara mabarari veiveiri tu Barau ġereğana.

⁵ Mose tu vetuğunaği-iağovini tarimana, ġia ma ġena vetuğamağikau Barau ġena numai. Ema ġena ġauvei tu ġoirai Barau na kara bekirağirini guruğari ekiraği-foforirito-ğoi.

⁶ Senağina Keriso, Barau Natuna, tu Barau ġena numa eğita-ğauani. Ġita tu ġia ġena numa, bema ma kokorera e ma iakura ġesi taveiavi-iağiani tuğamağikaunai bita veğabi-gwağiğini beiağoni mo magona.

Barau ġena tarimarima ġeri iağaraği

⁷ Moğa lorinai Iauka Veğa ekirani kavana bitana vei, mağesi ekirani, “Toma bema Barau garona boğō seğağiani nai tu,

⁸ nuğami asi boğono vağa-gwağiği foroforori, senemi tanobara fakanai veribağani ġaronai ġeseğaforeto kavana.

⁹ Oba, tamami na lağani gabana vasivasi (40) tanobara fakanai ġegu ġauvei ġeğitaiaato, senağina ġeribağaniguto e ġevağa-uraguto.

¹⁰ Moğa lorinai mo bese abaru-vinirito, benamo akirato, ‘Ġia nuğari tu vanağivanaği au ġeguna ġeveğitani, ema au ġegu veğa maki asi ġeribarini.’

¹¹ Moğa lorinai ma barugu ġesi aguruğa-foforito, ‘Ġia au ġegu iağaraği ai tu asi beğe raka-toğani.’”

¹² Tarikakagu mabarami, boğono venari. Asi namo tarikaka ta ġomi fakami ai loruna ġutunai vei-rakava betanuni, ema Barau ġena guruğa asi bevağa-moğoniani, benamo mağuri Barauna ġenana beraka-veğitani.

¹³ Toma mai ġaro mağa Barau ekirani, “Tomağaro” etoni ġiranai, karomi tata ġesi boğono velaunagi, be vei-rakava ġena ġofağofa na ta nuğamu asi bene vağa-gwağiğia.

¹⁴ Ġita tu Keriso ġesi tasebonato, bema tovtovonai tağabi-rağeato veğabidadamana moğa bita ġabitari-gwağiğiani beiağoni mo magona.

¹⁵ Buka Veğa ekirani kavana,

“Tomağaro ai bema garona boğō seğağiani nai, nuğami asi boğono vağa-gwağiğiri, ġuinenaği ġomi senemi seğafore ai ġeveito kavana.”

¹⁶ Dei na tu Barau garona ġeseğağiato, senaği ġena guruğa ġekira-fitoğarito, benamo ġevağa-baruato? Mo tu Mose na Aigupito na eğori-rosirito tarimari mabarari, ene?

¹⁷ Ema deikarari tu Barau na mo lağani gabana vasivasi (40) nuğanaği ebaru-vinirito? Tarimari tu moğeri, rakava ġeveito, benamo tano fakanai ġeketoto, benamo ġemaseto, ene?

¹⁸ Ema Barau na tu deikarari ekirarito, ekirato, “Au ġegu iağaraği gabunai tu asi beğe raka-toğani.” Ġeseğaforeto tarimari ekirarito, ene?

¹⁹ Moğa lorinai ġita taribani, ġia tu asi ġeraka-toğato, korana Barau asi ġevağa-moğoniato-ğoi nai.

4

¹ Barau ġena iaġaraġi ai bita raka-toġani guruġatorena tu roġo eruġa-taġoni. Moġa lorinai bitana venari, ġita fakarai ta mo iaġaraġi ai asi beraka-toġani garina.

² Korana mo Vari Namona ġita ġera ġeġobata-iaġiato tu Isaraela tarimari ġeri maki ġeġobata-iaġiato. Senaġi mo guruġa ġeseġaġirito ġerina namo ta asi ġeġoitaġoato, korana tu ġeseġaġirito moġo, ma asi ġevaġa-moġonirito.

³ Senaġi ġita Barau tavaġa-moġoniani tarimara tu, mo iaġaraġi ai bita raka-toġani ġena guruġa ilailanai, ekirato,

“Au ġegu baru ai kiraġitore guruġana gwaġiġina akiraġi-foforiato, akirato,

‘Au ġegu iaġaraġi ai tu

asi beġe raka-toġani.’”

Moġoni, Barau tu moġesi ekirato, senaġina ġia na tanobara eveiato nai, ġena ġauvei mabarari tu varau evaġa-koririto.

⁴ Gabu tai Buka Veaġa nuġanai ġaro vaġa-imaima ruaruana (7) ekiraġiato nai tu, maiġesina ekirani, “Ġaro vaġa-imaima ruaruanai (7) Barau tu ġena ġauvei mabarari ġerina eiaġaraġito.”

⁵ Ema mai vau bita kiraġia gabunai maki ekirato, “Ġia au ġegu iaġaraġi ai tu asi beġe raka-toġani.”

⁶ Senaġina tari mo iaġaraġi ai beġe raka-toġani guruġatorena tu roġo eruġani gabunai. Ma Isaraela tarimari, Vari Namona ġeseġaġi-guineato tarimari, tu mo iaġaraġi ai asi ġeraka-toġato, korana tu ġeseġaforeto nai.

⁷ Moġa lorinai Barau na ġaro ta ma eġabi-viriġiato, “Tomaġaro” ekiraġiato. Ma laġani vovoka ġekorito murinai, Barau, Davida ġenana maiġesi eguruġato, ekirato,

“Toma, bema Barau garona

boġo seġaġiani nai,

nuġami asi boġono vaġa-gwaġiġiri.”

⁸ Bema Iosua na iaġaraġi bere viniri, Barau na moġa murinai iaġaraġi ġarona ta tu asi ma bere kiraġia.

⁹ Moġa lorinai Barau ġena tarimarima ġeri iaġaraġi tu roġo goirai eruġa-taġoni.

¹⁰ Korana Barau ġena iaġaraġi ai eraka-toġani tarimana tu ġena ġauvei na eiaġaraġini, ilailana Barau ġena ġauvei na eiaġaraġito kavana.

¹¹ Moġa lorinai sikokore, Barau ġena iaġaraġi ai tana raka-toġa uranai. Ma ġita fakarai ta asi bene keto, guinenai ġeseġaforeto tarimari kavari.

¹² Barau ġena guruġa tu maġuri e ma seġukana. Matana maki raga-rakava, vetari baġana ta matana ruarua maki evanaġiato, erakatoga-korikorini maġuri ma iauka vekaravarina, ema turiġa komukumuri ruarua ġeraga-sebonato vekaravarina. Tarima loruna ġutuna ġena ura e tuġamaġi maki eriba-viriġiani.

¹³ Barau na eveirito dagarari mabarari tu ta asi vekuretoġa ġia matanai. Ema ġia goiranai ġita mabarara ġera maġuri bita vari-fiurini.

Iesu Rubu Veaġa verena barego vedaureana

¹⁴ Barau Natuna Iesu tu ġita ġera Rubu Veaġa verena barego vedaureana; ġia tu guba eraka-vanaġirito. Moġa lorinai ġera veġabidadamai tana veġabi-gwaġiġi. Mo tu ġita na takiraġi-foforiani veġabidadamana.

¹⁵ Ġita ġera Rubu Veaġa verena baregona tu ġita ġera moiramoiro ġia na maki emami-raġirini. Korana tu ġia maki ġenai veribaġani irauirau mabarari ġefoforito ġita ġerai kavana. Senaġi ġia tu asi evei-rakavato.

¹⁶ Moġa lorinai ma kokorera ġesi Barau ġena namo e varevare-bara terona ġana sirakakavi-iaġo. Monai Barau ġena vevetuġaġwa bitana ġabia, ema ġena varevare-bara tana goitaġoa, be bita ura-viniani nai, bene vaġa-kavara.

5

¹ Rubu Veaġa vereri baregori mabarari tu tarimarima fakari na Barau na eġabi-viriġirito, benamo evaġa-ruġarito, tarimarima arari ai Barau ġena ġauvei beġene veia ġana. Ġia ġeri ġauvei tu tarimarima ġeri rakava voi-vaġiri ġana varevare dagarari Barau beġene vinya ema boromakau, mamoe, e manu beġene vaġiri, benamo beġene gaburi, Barau na bonari bene noġori ġana.

² Rubu Veaġa verena baregona tauġena maki ma ġena moira gaburi, naima ġia na asi ribari tarimari ema Barau ġena dabara na ġeraka-veġitani tarimari bevetuġa-ġwarini riba.

³ Ġia tauġena maki ma ġena moira lorinai, ġia na rakava voi-vaġiri varevareri tu ġia ġena evinini, ema tarimarima ġeri maki evinini.

⁴ Rubu Veāga verena baregona dagina eḡabini tarimana tu arana barego. Tarima ta na mai ginitaḡo ḡauveina tauḡena na asi beḡabi-kavaiani, senaḡi ḡia tu Barau na bene keaia vau, vaḡa-ilailana Arona ekeaiato kavana.

⁵ Keriso maki moḡesi, dia tauḡena eveḡabi-vaḡaḡeto Rubu Veāga verena baregonai evetoreto, senaḡina Barau na evaḡa-ruḡaiato, ekiraiato, ekirato,

“Goi tu au Natugu,

toma au tu goi Tamamu ai baiaḡo.”

⁶ Gabu tai maki ekirani,

“Goi tu Rubu Veāga verenai

botanu-vanaḡi vanaḡini

Melkisedek kavana.”

⁷ Iesu tanobarai etanuto-ḡoi ḡarori ai tu ma taḡi-koḡokoḡona ema matana ma nanuri ḡesi Barau ḡenai eḡurigurito-ḡoi, ema enoḡi-raḡeto-ḡoi. Korana tu Barau na ḡereḡana na moḡo mase ḡenana bevaḡa-maḡuriani. Barau na eseḡaḡiato, korana tu ma vegubakauna ḡesi Barau garina eveito-ḡoi nai.

⁸ ḡia tu Barau Natuna, senaḡi ḡena midigumidigu na vau seḡaḡi dabarana eribaiato.

⁹ Enamo-vedaureato murinai vau, ḡia beḡe seḡaḡi-viniani tarimari mabarari ḡeri maḡuri vanaḡivanaḡi vaḡa-ḡorana tarimanai eiaḡoto.

¹⁰ Ema Barau na evaḡa-ruḡaiato Rubu Veāga verena baregona Melkisedek kavana.

Asi boḡono mero-kaukau

¹¹ ḡia varina tu vovoka bita kiragirini, senaḡina moḡeri kiragī-virigivirigiri tu gwaḡiḡi, korana ḡomi tu asi ḡotuḡamaḡi-faka ḡarimoḡini.

¹² Mai nega mainai gomi tu vevaḡa-riba tarimami ai ḡoro iaḡo, be ḡoro vevaḡa-riba-ḡoi. Senaḡina ḡomi tu roḡo ḡourani ta na Barau ḡena guruḡa moḡoniri korari na ma bene vaḡa-ribami ḡotoni. Gomi tu roḡo lata ḡourani, ḡaniḡani gwaḡiḡiri tu asiḡina.

¹³ Deikara lata roḡo eruruni tu roḡo mero keina. ḡia tu veiḡa iobukaiobukari ema veiḡa asi rorogotori vetoḡari tu roḡo asi ribana.

¹⁴ A ḡaniḡani gwaḡiḡiri tu tarima baregori ḡari. ḡia na tu ḡeḡauvei-iaḡi vanaḡivanaḡirini. ḡeḡauvei-iaḡirini ḡarori ai tu tauḡeri maki ḡevevaḡa-ribani namo e rakava vetoḡari beḡene ḡita-leari ḡana.

6

¹ Moḡa lorinai namona tu Keriso ḡena vevaḡa-riba guruḡari tovtovonai riba guineri ḡeḡorani dagarari tu si-iaḡuiri. Benamo ḡia ḡena vevaḡa-riba baregori ḡana si-iaḡo. Tovtovonai riba guineri ḡeḡorani dagarari moḡo asi bitana vevaḡa-riba-iaḡi ḡenoḡoi-ḡenoḡoiri. Mo tu vei-rakava ḡerina tuḡamaḡi-kure ma raka-kure e Barau ḡenai veḡabidadama.

² Babatiso vevaḡa-ribari e ḡima tarima iatari ai torekau, mase na varigisi-ḡenoḡoi e vevaḡa-rorogoto vanaḡivanaḡi.

³ Moḡa tu bita veiani bema Barau na bevaḡa-moḡoniani nai.

⁴ Bema tarima ta ḡena veḡabidadama beraga-kwaneani tu, kamara dabarai ma beve-tuḡamaḡi-kureni? ḡia nuḡana tu evaḡa-mamaḡiato, ema guba na eiaḡomato varevarena emami-tovoato, ema Iauka Veāga maki eḡabiato.

⁵ Ema Barau ḡena guruḡa namona edoḡariato e vau ma beiaḡomani tanobarana seḡukari maki emamirito.

⁶ Bema ḡia veḡabidadama na ma beketo-veḡitani, ḡia tu Barau Natuna ma evaḡa-satauro ḡenoḡoiani, ema ḡutuma barai ma tore-rosiani e evaḡa-maiakaiani. ḡia ma novaḡa-vetuḡamaḡi-kurea ḡana tu asi dabarana ta.

⁷ ḡaro vovoka ḡura eraguni, benamo tano na mo nanu erimaiani. Benamo bema mo tano iatanai ḡevaroni tarimari ḡari ḡaniḡani namori bevaḡa-ḡorarini nai tu, Barau na mo tano namo beviniani.

⁸ Senaḡina ḡau ma giniri ema ḡauḡa ma ḡiniginiri evaḡa-gararini tanona tu asi ḡena namo; Barau na mo tano bekiraḡiani tu tano rakavana, ema dokonai tu begabuani.

⁹ Gataḡu mabarami, moḡoni, maiḡesina ḡovaḡa-guruḡa gwaḡiḡimini, senaḡina ḡatuḡamaḡi-gwaḡiḡini, ḡomi tu namo baregona ema vevaḡa-maḡuri boḡoa ḡoitaḡoani.

¹⁰ Barau ḡena veiḡa tu asi ḡeḡeva. Barau ḡemi ḡauvei ema ḡia arana ḡoura-viniani nai, ḡena tarimarima ḡovaḡa-kavarito ema initoma roḡo ḡovaḡa-kavarini tu asi betuḡa-rekwarini.

¹¹ ḡai ḡema ura baregona tu ḡomi tata maniḡesi moḡo boḡono ḡauvei-kokore-iaḡo, ḡemi tuḡamaḡikau beḡenea moḡoni bene iaḡo mo dokonai.

¹² Be asi beġene ġubulefimi, senaġina mo tarimarima ġeri veġabidadama e ġeri vevaġa-gwaġiġi ġerina mo kiraġitore ġeġabiani, boġono tovotovori.

Barau ġena kiraġitore

¹³ Barau ġena kiraġitore guruġana Aberahamo ġenai eveiato tu tauġena aranai eguruġa-toreto, korana tu tarima ta ma asi varaġe ġia iatanai, aranai beguruġa-toreni lorinai.

¹⁴ Ekirato, “Mogoni, ġoi tu bavaġa-namomuni ema besemu ġutuma bavinimuni.”

¹⁵ Benamo Aberahamo evevaġa-gwaġiġito, asi eġubulefito mo Barau na ekiraġi-torerito dagarari ġenai ġefoforito.

¹⁶ Tarimarima guruġatore gwaġiġiri mabarari ġeveini nai tu, tarima baregona ta ġia iatarageri ai aranai ġeguruġa-toreni. Monana mo guruġa-tore guruġana gwaġiġina evaġa-mogoniani, benamo veġareveġare guruġari mabarari elauġaurini.

¹⁷ Guinenai Barau ġena kiraġitore tu guruġatore guruġana gwaġiġinai eveiato. Korana ġia ġena ura ġia na kiraġitore beġe ġaunaiani tarimari beġene riba-ġinikau, ġia ġena kiraġitore tu asi bevekefoni.

¹⁸ Mo guruġatore ruarua tu beġe tanuni, asi beġe vekefoni. Ema mo dagara ruarua ġerina ġita taribani, Barau tu asi beġofaġofani riba. Be ġita deidei rakava ġenana taraga-veġitato, benamo Barau ġenai taiaġomato tarimara tana kokore-korikori, be mo tuġamaġikau ġoirarai eruġa-taġoni tana ġabia.

¹⁹ Mo tuġamaġikau taġbiato tu ġita ġera maġuri eġabi-tariani dagarana. Mai tuġamaġikau tu moġonina e asi eirauni. ġia tu vekouġau dabuġana na murina ġana erakatoġani, eiaġoni mo, veaġa lelevaġi daiġutuna nuġana ġana.

²⁰ Mo ġana tu Iesu eiaġo-ġuinetto ġita bene vaġa-maġurira uranai. ġia tu Melkisedek ġena dabarai Rubu Veaġa verena baregonai betanu-vanaġi vanaġini.

7

Melkisedek tu Rubu Veaġa verena baregona

¹ Mai Melkisedek tu Salem vanuġa barana verena, ema ġia tu Iaru-korokoro Barauna ġena Rubu Veaġa verena. ġia na Aberahamo edoġariato, vanuġa barari ġeri vere baregori o kini tari vetari ai evaġirito, benamo eġenoġoito-ġoi nuġanai, Aberahamo evaġa-namoato.

² Ema Aberahamo na vetari ai eġabirito farefareri, karava gabanana (10) eveirito, benamo karava ta Melkisedek eviniato. Melkisedek arana anina ġiniguinena tu “Veġa Iobukaiobuka Verena”, ma arana ta tu “Salem Verena”, moġa anina tu “Maino Verena”.

³ ġia asi tamana, asi sinana, asi besena ta, ema ġena maġuri evesinato ġarona e ġena maġuri emagoto ġarona maki asiġina. ġia tu Barau Natuna kavana etanuni, Rubu Veaġa verena vanaġivanuġi.

⁴ Melkisedek ġoġitaia, ġia tu tarima arana barego lelevaġi, korana Aberahamo tu senera baregona na maki vetari ai eġabirito farefareri karava gabanana (10) ġerina ta ġia eviniato.

⁵ Taravatu ekirani, Levi besena Rubu Veaġa verena dagina beġe ġabiani tarimari tu karava gabanana ġerina ta beġene gogo Isaraela tarimari ġerina, mo tu tarikaka ġerina. Moġoni, tarikakari maki Aberahamo ġena bese tarimari, senaġina ġia ġerina beġene gogo.

⁶ Melkisedek senena tu dia Levi ġenana eiaġomato, senaġina Aberahamo ġenana karava ta eġabiato. Ma ġia na Barau ġena kiraġitore eġabiato tarimana evaġa-namoato.

⁷ Asi bita daradara-iaġiani, tarima baregona na tarima keina vevaġa-namo eviniani.

⁸ Levi senena, karava gabanana ġerina ta ġeġabiato doġorori, tu ma ġemaseto-ġoi. A Melkisedek na maki karava ta eġabiato, senaġi ġia tu Buka Veaġa na ekiraġiani asi emaseto.

⁹ Benamo maiġesi ma nakira, Levi maki karava gabanana ġerina ta ġeġabiato-ġoi tarimana. ġia na Aberahamo ġenana Melkisedek karava ta ma evini-ġoiato.

¹⁰ Korana Melkisedek na Aberahamo eġoitaġoato ġaronai tu, Levi tu roġosi roġo bene maġuri, roġo ġatana Aberahamo tauġaninai.

Iesu tu Melkisedek kavana

¹¹ Guinenai Barau na Isaraela tarimari taravatu evinirito. Mo taravatu ekirani, Levi besena na ġinitaġo veaġa ġauveina beġene veia. Senaġi bema Levi besena ġeri Rubu Veaġa verena ġenana e ġeri ġauvei seġukana na mo namo vedaurea beġere ġabia nai tu, kara dainai Barau tu ma ekirato, Rubu Veaġa verena ta ma betuġuani Melkisedek ilailanai, ma dia Arona kavana?

¹² Korana bema ġinitaġo ġauveina ġeveiani tarimari ġeri doġoro ġesenisito nai tu, taravatu maki besenisini.

¹³ Korana Iesu mai takiraġiani tarimana tu irau doġoro. Ġia ġena doġoro tarimana ta fata veaġana iatanai ginitaġo ġauveina asi eveito.

¹⁴ Korana ribara, ġita ġera Vereġauka tu Iuda besena na emagurito. Ma Mose na Rubu Veaġa vereri ekiraġirito-ġoi nai tu, Iuda doġorona tu asi ekiraġiato.

¹⁵ Ema kara bita kiraġia toma tu bita ġitafaka-ginikauani, korana Rubu Veaġa verena ta ma befori Melkisedek kavana.

¹⁶ Ġia tu dia senena kavari, taravatu seġukanai Rubu Veaġa verenai eiaġoto, senaġina maġuri vanaġivanagġi ġenana eiaġomani seġukana na Rubu Veaġa verenai eiaġoto.

¹⁷ Korana Barau na maġesi ekiraiato, ekirato,

“Goi tu Rubu Veaġa verenai
botanu-vanaġi vanaġini
Melkisedek kavana.”

¹⁸ Mo taravatu guinena tu etore-veġitaiato, korana ġia tu asi seġukana ema asi bevevaġa-maġurini riba.

¹⁹ Korana Mose ġena taravatu na dagara ta tu asi evaġa-namo vedaureaiato. Moġesina naima Barau na tuġamaġikau lagilagina ta ma etore-rosiato, moġa ġenana ġita Barau sevina ġana bita raka-kavini.

²⁰ Barau na Iesu tu guruġatore guruġana gwaġiġina eveiato vau, Rubu Veaġa verenai etoreato! A Rubu Veaġa vereri mabarari ġeri ai tu guruġatore ta asi eveiato.

²¹ Senaġi Iesu Rubu Veaġa verenai eiaġoto tu Barau na guruġatore gwaġiġina eveiato vau. Barau na maġesi ekiraiato,

“Vereġauka tu eguruġa-foforito
ma ġena tuġamaġi asi ma bekefoani:
‘Goi tu Rubu Veaġa verenai botanu-vanaġi vanaġini.’”

²² Mai guruġatore guruġa gwaġiġina lorinai, Iesu tu ginitaġo variġuna ma namona korikori vaġa-moġoninai eiaġoto.

²³ Guinenai Rubu Veaġa vereri tu vovoka, korana tu ġemaseto-ġoi, be ta Rubu Veaġa verenai asi etanu-rovaġito.

²⁴ A Iesu tu etanu-vanaġi vanaġini lorinai, ġia tu Rubu Veaġa verenai betanu-rovaġini.

²⁵ Moġa lorinai deikara ġia ġenana Barau ġenai beġe iaġoni tu bevaġa-maġurini riba. Korana Iesu tu ġia urari ai Barau ġenai bene ġauġau ġana etanu-vanaġi vanaġini.

²⁶ Maġesi Rubu Veaġa verena baregona na ġita ġera ura dagarari evinirani. Ġia tu veaġa, asi ġena vei-rakava, vetoukau ta ġenai asiġina, namo vedaurea; ġia tu vei-rakava tarimari kavana asiġi. Ma Barau na guba tuġuna korikorinai ea toreto.

²⁷ Ġia tu dia guinenai Rubu Veaġa vereri baregori kavana, ġoro korikoriri ai varevare dagarari bevinini. Guine tu ġia ġena vei-rakava Barau na bene tuġamaġi-fitoġari ġana evinito, ma moġa murinai tu tarimarima ġeri rakava Barau na bene tuġamaġi-fitoġari ġana. Ġia tu vaġa-sebona moġo tarimarima ġeri vei-rakava ġana ginitaġo varevarena eviniato. Moġa tu ġia tauġena ginitaġo varevarenai eiaġoto, benamo Barau ġenai evevini-raġeto.

²⁸ Mose ġena taravatu na tu ma ġeri moira tarimari Rubu Veaġa verena baregonai etorerito-ġoi. Senaġina Barau ġena guruġatore guruġana gwaġiġina, Mose ġena taravatu murinai ema foforito dagarana, na tu Barau Natuna evaġa-ruġaiato. Ġia tu Barau na evaġa-namo vedaureaiato, ma namo vedaurea betanu-vanaġi vanaġini.

8

Iesu tu ġita ġera Rubu Veaġa verena baregona

¹ Ġai na kara ġakiraġiani tu maġa. Ġita tu ma ġera Rubu Veaġa verena baregona. Ġia tu gubai Iaru-korokoro Barauna ġena terona aroribanai etanu-tarito.

² Barau ġena veaġa gabuna nuġanai eġauveini. Mo tu farai rubuna korikori Vereġauka na eragaiato, dia tarimarima na ġeragaiato.

³ Rubu Veaġa vereri baregori mabarari tu ġevaġa-ruġarito, varevare dagarari ema boromakau, mamoe, manu beġene vini ġana. Moġa lorinai mai Rubu Veaġa verena baregona, Keriso, maki ma ġena dagara tari, bene vini ġana.

⁴ Bema ġia tanobarai bere tanu tu, Rubu Veaġa verenai asi bere iaġo, korana tu maġa, Rubu Veaġa vereri tu varau ġetorerito maġeri, varevare dagarari ġevini-tanuni, Iuda ġeri taravatu ekiraġiato ilailanai.

⁵ Ġia varevare dagarari mainai veaġa lelevaġi daiġutunai ġevinini tu, gubai mo veaġa lelevaġi daiġutuna kavana e vetoġana moġo. Moġesina nai Barau na Mose toma-rakarigo ġana farai rubuna bene ragaia ġana, naima ekira-toreġauato, ekirato, “Bono ġitai, dagara mabarari boveirini nai tu, ġoro ai avaġa-ġitamuto ilailanai moġo bono veiri.”

⁶ Senaġina toma Iesu na ginitaġo varevareri vini-toreġau veigana guinenai Rubu Veaġa vereri ġeri ġauvei evanaġiato. Korana Barau ġena kiraġitore varigunai Iesu tu Barau e tarimarima vekaravari ai eruġani, ginitaġo variguna bene vaġa-seġukaia ġana, ma mai ginitaġo na mo ginitaġo guinena seġukana evanaġiani. Ema Barau ġena kiraġitore variguna na mo ginitaġo guinena kiraġitorenna maki evanaġiato.

⁷ Bema mo ginitaġo guinena asi ġena rakava tu, Barau na ginitaġo variguna ta asi ma bere kiragġia.

⁸ Senaġina Barau na tarimarima ġeri ai rakava eġoitaġoto naima ekirato,

“Vereġauka eguruġa-foforini,
‘Boġono seġaġi, ġaro ta mani eiaġomani,
au na ginitaġo variguna ta ma haveiani,
Isaraela besena e Iuda besena ġeri.

⁹ 1 Mai ginitaġo tu dia guinenai ġia seneri ġeri aveiato moġa kavana.

Dia mo ġaro ai ġimari ai aġabito,
benamo Aigupito na aġori-rosirito ginitaġona kavana.
Korana ġia tu au ġegu ginitaġo ġenai
asi ġevetuġamaġikauni naima,
au na araga-kwanerito,’

Vereġauka tu moġesina eguruġani.

¹⁰ Vereġauka ma ekirani,

‘Ġoira ġarori ai au na mai ginitaġo Isaraela besena ġeri ma haveiani:
Au ġegu taravatu ġia debari ai batore-toġarini ema ġia nuġari ai batorerini.
Au tu ġia ġeri Barau ai baiaġoni ema ġia maki au ġegu tarimarimai beġe iaġoni.

¹¹ Tarima ta na sevina etanuni tarimana asi ma bevaġa-ribaiani,
ema tarima ta tarikakana asi bekiraiani,

‘Vereġauka noribaia!’

Korana mabarari na beġe ribaġuni,

misina na beiaġoni mo baregona.

¹² Ġeri kira-sirivaġi batuġamaġi-fitogari,
ema ġeri rakava mabarari asi ma batuġamaġirini.’ ”

¹³ Barau na mai ginitaġo maiġa ekiraġiani, “ginitaġo variguna” etoni nai tu, ġia na mo ginitaġo tovotovonai moġa tu guinena na ekiraġiani. Ma kara eguinenani e erakavani tu asikauna berekwarekwani.

9

¹ Ginitaġo guinena tu ma ġena taravatu misimisiri toma-rakarigo ġana, ema ma ġena gabu veaġana maki. Mo gabu veaġana tu tanobarai etanuni dagarana.

² Barau toma-rakarigona ġana farai rubuna ta ġeragaġiato. Mo farai rubuna nuġanai daiġutu giniguinena tu Veaġa Gabuna ġetato. Ġia nuġanai tu lamefa torekauna dagarana, teġolo e Barau ġeviniato berediri.

³ Kouġau dabuġana vaġa-ruaruana murinai tu daiġutu ta maia. Moġa tu Veaġa Lelevaġi Gabuna ġetato.

⁴ Ġia nuġanai tu golo fatana, goġu ma bonana iatanai beġene vei ġana, ema Kiraġitore Mauġana; ġia murikana mabarana tu golo na ġeveiato. Ma mauġa nuġanai tu golo ġurona ta, nuġana ma manana e Arona ġena toġoi, egarakauto dagarana, ema fore ruarua Barau na iatari ai taravatu etoreto foreri.

⁵ Mo mauġa iatanai tu kerubi ruarua ġevaġa-ruġa veġoirarito. Mo kerubi tu ġau garagarari, vetogari tu aneru kavari. Ta tavi ta dudu ai ġevaġa-ruġaġiato, ma ta maki tavi ta dudu ai, ma faneri ġekeorito, benamo rakava voivaġiri gabuna ġegoru-tariato. Mo kerubi ruarua na tu Barau ġena mareva baregona ġekiraġiani. Senaġi maiġeri dagara misikoseri mabarari tu toma asi baġa kiragġirini.

⁶ Dagara mabarari moġesi ġeveirito murinai, Rubu Veaġa vereri ġaro vanaġivanagġi daiġutu giniguinena nuġanai eraka-toġato-ġoi, benamo ġeri ġauvei ġeveirito-ġoi.

⁷ Senaġi rubu verena baregona ġereġana moġo laġani ta nuġanai vaġa-sebona daiġutu vaġa-ruaruana nuġanai eraka-toġato-ġoi. Ġena rakatoġa ġarori mabarari ai tu rara maki eġabi-taġoato-ġoi. Mo rara ġia na tu rakava tuġamaġi-fitogari ġana ginitaġo dagarana evaġa-iaġoato-ġoi. Guine tu ġia ġena rakava ġana evinito-ġoi ema murinai tu tarimarima ġeri rakava ġana. Mo rakava tu asi ribari nai ġeveirito-ġoi rakavari.

⁸ Iauka Veaġa na maiġeri veġa mabarari ġerina ġita tu maiġesina evaġa-guruġarani: Bema Barau toma-rakarigona ġana farai rubuna giniguinena roġo evaġa-taġoni nai tu, Veaġa Lelevaġi Gabuna rakatoġa dabarana tu roġosi roġo bene vekeo.

⁹ Mo farai rubuna tu toma mai negai kara beġe ġorani evaġa-foforiani. Mai farai rubuna nuġanai varevare dagarari e ginitaġo dagarari vaġa-ilailana boromakau, mamoe, manu Barau ġeviniato-ġoi dagarari mabarari na ġetoma-rakarigoto-ġoi tarimari nuġari asi ilaila beġe iarevarini.

¹⁰ Korana mo Barau ġeviniato-ġoi dagarari tu ġaniġani e niuniu dagarari, ema tarima beġene iareva ġana veġuriġi maġuriri irauirau. Mai tu mabarari tauġani taravaturi moġo. Barau na tarimarima evinirito beġene korana-iaġiri, bene iaġo mo, ġaro ta, dabara variġuna bevaġa-ruġaiani.

Iesu rarana

¹¹ Senaġi Keriso tu dagara namori ġema-foforito ġeri Rubu Veaġa verena baregona. Ġia tu farai rubuna barana e namo vedaureana nuġana na eraka-toġato. Dia tarimarima na ġeraġaiato farai rubuna, korana mo farai rubuna tu dia mai tanobara dagarana.

¹² Keriso tu dia nanigosi o boromakau naturi rarari seġukari ai mo rubu ai eraka-toġato. Senaġi ġia tu ġia rarana seġukanai Veaġa Lelevaġi Gabuna nuġanai vaġa-sebona moġo eraka-toġato. Benamo ġita eġabivaġi-moġovaġirato rakava ġena seġuka na.

¹³ Nanigosi ma boromakau rarari ema boromakau natuna variġuna ġeġabuato kauna, Rubu Veaġa vereri na vei-rakavai ġemiroto-ġoi tarimari iatari ai misimisiri ġefiu-kaurito-ġoi. Moġesina ġeveirito-ġoi tu tarimarima tauġaniri ġevaġa-veaġarito-ġoi Barau ġoiranai.

¹⁴ Senaġi Keriso rarana na moġeri evanaġirito. Korana ġita nuġara, mase ġevaġa-ġoraiani ġauveiri ġerina, eiarevarato, maġuri Barauna ġena vetuġunaġi bitana iaġo-vini ġana. Keriso tu asi vetoukauna ta, tauġena tanu-vanaġivanagi Iaukana ġenana evevinito Barau ġenai.

¹⁵ Ginitaġo variġuna nuġanai Keriso tu Barau e tarimarima fakari ai eruġani. Korana tu Barau na ekearito tarimari mabarari na ekiraġi-toreato maġuri vanaġivanaġina beġene ġabia. Moġesi nai Keriso emaseto, tovotovona ginitaġona nuġanai tarimarima ġevei-rakavato ġeri rakava na bene ruġa-vaġiri ġana.

¹⁶ Tarima ta roġosi bene mase nuġanai, beurani bene guruġa-fofori, bemaseni nai tu, natuna na ġena farefare bene ġabiri. Mo ura o guruġa-fofori tu fefai betoreani ġia ġena kiraġitore guruġana. Natuna na mo farefare asi roġo beġabirini bene iaġo mo, tamana ġena mase tarimarima ġoirari ai bevaġa-moġoniani vau.

¹⁷ Korana tu mo ura ġetoreani fefana tu eguruġa-foforini tarimana bemaseni vau ma ġena seġuka, a bema ġia roġo maġuri tu, mo ura ġetoreani fefana tu asi seġukana.

¹⁸ Moġesina nai ginitaġo ġiniginena maki rarana vau evaġa-seġukaiato-ġoi.

¹⁹ Korana Mose na taravatu guruġari mabarari tarimarima ġeri evarifiu-ġosiatto-ġoi murinai, boromakau naturi variġuri e nanigosi rarari eġabirito-ġoi, benamo nanu ġesi egiro-sebonarito-ġoi. Moġa murinai isopo legana vulu kakakakana na ġebaruato dagarana mo rara ma nanunai eferieiatto-ġoi. Benamo Mose na mo isopo legana ma vulunai rara tu taravatu bukana e tarimarima iatari ai efiu-kaurito-ġoi.

²⁰ Mose ekirato, "Mai rara tu ginitaġo vaġa-moġonina dagarana Barau na ekiramito boġono korana-iaġia."

²¹ Farai rubuna ema mo rubu nuġanai toma-rakarigo ai ġeġauvei-iaġirito-ġoi farefareri mabarari iatari ai veġa sebona eveiatto-ġoi. Iatari ai rara misimisiri efiufukauto-ġoi.

²² Moġoni, taravatu ekirani ilailanai, dori dagara mabarari tu rara na beġe iarevani. Korana rara asi berigoni nai tu, vei-rakava tuġamaġi-fitoġari maki asiġina.

²³ Senaġina maiġeri mai tu guba dagarari iouiouri moġo maiġesi ġeiarevarini. A gubai korikoriri ġetanuni dagarari iareva-iarevari ġana ginitaġo varevarena tu namona lelevaġi. Maiġeri ginitaġo varevareri evanaġirini.

²⁴ Korana Keriso tu dia tarimarima na ġeveiatto veaġa lelevaġi daiġutuna nuġanai eraka-toġato. Iesu tu guba korikorinai eraka-toġato. Ma maitoma tu ġita urarai Barau ġoiranai efoforini. Mo tarima na ġeveiatto moġa tu gubai veaġa lelevaġi daiġutuna moġo ġevaġa-ilailaiato.

²⁵ Rubu Veaġa verena baregona tu laġani tata nuġari ai Veaġa Lelevaġi Gabunai rara eġabi-toġato-ġoi. Keriso moġesina tu asi eveini. Ġia tu dia gubai eraka-toġato murinai vau vanaġivanaġi tauġena ginitaġo varevarenai eiaġoni, benamo Barau ġenai evevinini.

²⁶ Moġesina tu tanobara evesinato na veġata bene midigumidigi. Senaġi mai tanobara magona eġabi-iaġoani, mainai vau vaġa-sebona moġo ema fororito. Mo tu ginitaġo varevarenai evevaġa-iaġoto rakava bene ġabi-veġitari ġana.

²⁷ Evetoreto, tarimarima mabarari tu vaġa-sebona moġo beġe maseni, ma murinai tu Barau na bevaġa-kotarini.

²⁸ Keriso kavana vaġa-sebona moġo ginitaġo dagarana eiaġoto, tarimarima mabarari ġeri rakava bene ġabi-veġitari ġana. Senaġi ġia tu ma bema-fofori ġenoġoini. Mo tu dia

rakava ma benema ġabi-vaġiri ġana, senaġina deikara ġia ġenari-taġoani tarimari vaġa-maġuriri ġana.

10

Ginitaġo guinena na rakava asi beġabi-veġitarini

¹ Mose ġena taravatu tu dagara namori vau beġe ġorani iouiouri moġo, dia dagara tauri korikori. Ġia na mo ginitaġo dagarari laġani laġani ġevinito-ġoi, senaġina mo ginitaġo dagarari na toma-rakarigo ġeaiġoto-ġoi tarimari asi evaġa-namo vedaurearito.

² Bema mo ginitaġo dagarari na ġetoma rakariġoto-ġoi tarimari beġere vaġa-namo vedaureari nai tu, asi ma beġere ginitaġo-ġenogoi. Korana ġia tu ġere iareva-moġovagi, ema ma ġeri vei-rakava ġuineri mamiraġiri asi ma ġere ġabi-ġenoġoiri.

³ Senaġi mo ginitaġo veigari laġani tatai ġeveirito-ġoi veigari na tu mo laġani tata nuġari ai ġevei-rakavato-ġoi, moġeri ġekira-vararito-ġoi.

⁴ Korana tu boromakau e nanigosi rarari na rakava tu asi ilaila beġabi-veġitarini.

⁵ Moġa lorinai Keriso tanobara ġana eiaġomato nai tu ekirato, "Ġoi tu ginitaġo dagarari vaġa-ilailana boromakau, mamoe, nanigosi ema varevare dagarari asi ourani,

senaġi tauġani ta ovei-toreato au ġegu.

⁶ Karava na boromakau, mamoe, nanigosi eġararini, ema vei-rakava bono ġabi-vaġiri ġana ginitaġo varevareri ġeveini ġeri ai maki asi oiakuni.

⁷ Moġesi naima au akirato,

'Barau o, au tu inġegu,

Buka Veaġai tu au ġekiraġiguto, au baiaġoma tu ġoi ġemu ura bana veia ġana.' "

⁸ Keriso ġena guruġa ġinġuinena tu maġa, "Ġoi tu ginitaġo dagarari e varevare dagarari asi ourani. Karavai ġegaburini varevareri e vei-rakava bono ġabi-vaġiri ġana ginitaġo varevareri ġeveini maki asi oura-vinirini, ema ġeri ai asi oiakuni." Maġeri veġa tu taravatu na ekiraġirini ilailanai, senaġi ġoi na tu asi oiaku-iaġirini.

⁹ Moġesi nai ma ekirato, "Barau o, au tu inġegu, au baiaġoma tu ġoi ġemu ura veigana bana veia ġana." Benamo ginitaġo veigana ġinġuinena etore-veġitaġo, benamo moġa gabunai tu ta ma evaġa-ruġaġo.

¹⁰ Benamo Barau ġena ura lorinai, Iesu Keriso tauġanina ginitaġo dagaranai evaġa-iaġoato vaġa-sebona moġo. Benamo monana ġita evaġa-veaġarato.

¹¹ Rubu Veaġa vereri mabarari ġaro vanaġivanaġi tata ġeruġa-tarito-ġoi, benamo mo ginitaġo ġauveiri ġeveirito-ġoi. Senaġi ġeri ginitaġo dagarari tu dagara sebori moġo ġevinito-ġoi vanaġivanaġi. Ema mo ginitaġo dagarari na rakava tu asi ġeġabi-veġitarito-ġoi.

¹² Senaġi Keriso na rakava ġabivaġiri ġana tu ginitaġo sebona moġo eveiato ġaro mabarari ġana. Benamo moġa murinai Barau ġimana aroribanai ea tanu-tarito.

¹³ Mo negai beiaġoma maitoma tu evenarini, beiaġoni mo, ġia ġevetari-viniani tarimari mabarari Barau na ġia kwakuna fanakauna dagaranai betore-taririni.

¹⁴ Korana ginitaġo dagarana sebona na moġo evaġa-veaġarito tarimari evaġa-namo vedaurearito. Ma ġia tu namo vedaurea beġe tanuni, vanaġivanaġi.

¹⁵ Iauka Veaġa na maki evaġa-ribarani. Guine tu ekirato,

¹⁶ "Vereġauka ekirani,

'Moġeri ġaro muriri ai, au ġia ġeri tu mai ginitaġo baveiani.

Au ġegu taravatu ġia nuġari ai batore-toġarini, ema ġia debari ai baberarini.' "

¹⁷ Ema ma ekirato,

"Ġia ġeri vei-rakava e veġa ġeġevaġeġevari asi ma batuġamaġi-ġenoġoirini."

¹⁸ Maġeri etuġamaġi-fitoġarito nai tu, rakava ġabi-veġitari ġana varevare dagarana ta tu asiġina maia.

Barau sevina ġana siraka-kavi ma tuġamaġi kokorera ġesi

¹⁹ Moġa lorinai, tarikakagu, ġita tu nuġara gwaġiġi Iesu rarana ġenana Veaġa Lelevaġi Gabunai bita raka-toġani.

²⁰ Mo vekouġau dabuġana o ketin evedare-kikimato, monana Keriso na ġita ġera maġuri dabarana variġuna ekeo-fakaġo. Mo vekouġau dabuġana tu Keriso tauġanina.

²¹ Ġita tu ma ġera Rubu Veaġa verena baregona, Barau ġena numa eġita-taġoani.

²² Ġita nuġara tu eiarevarito rakava mamiraġiri ġerina, ema tauġanira maki nanu namo vedaureana na eġuriġirito. Moġesi naima Barau ġenai siraka-kavinaġi nuġara ma moġoniri ġesi e ma ġera vegabidadama korikoriri ġesi.

²³ Ĝera tuĝamaĝikau tavaĝa-moĝoniani dagarana ĝenai tana veĝabi-gigitari, asi tana ĝareva-ĝareva. Korana Barau na kara ekiraĝi-toreato tu beveiani.

²⁴ Ema karora bitana tuĝamaĝiri kamasi tata bita vaĝa-kavarini, benamo beĝe veura-vinini, ema ĝauvei namori beĝe veini.

²⁵ Gita ĝera raka-vegogo ai bitana fofori-ĝoi, asi bitana tanu, tari ĝeveini kavana. Senaĝi karora ĝesi velaunagi bitana vaĝa-baregoa. Korana tu tauĝemi na varau ĝoĝitaiani, Keriso ĝena iaĝoma ĝarona tu mai ekavinagi-rakavani.

²⁶ Bema guruĝa moĝonina taribaiani murinai, ma taĝigiraĝeni, benamo tavei-rakavani nai tu, bitana riba, rakava ĝabi-veĝitari ĝana, ginitaĝo dagarana ta tu asiĝina maia.

²⁷ Senaĝi ma garira ĝesi kara ĝoirai ĝerai beĝorani, moĝa moĝo bitana nari-taĝo. Mo tu Barau ĝena Kota Baregona, ema Barau ĝevetari-viniani tarimari e iaukari beĝararini karavana.

²⁸ Tarima ta na Mose ĝena taravatu asi ekorana-iaĝiato-ĝoi, benamo ĝeĝita-kauato-ĝoi tarimari ruarua o toitoi na ĝekiraĝi-foforiato-ĝoi. Mo tarima tu ĝevaĝi-maseato-ĝoi, asi ĝevetuĝa-ĝwaiato-ĝoi.

²⁹ Gomi ĝotuĝamaĝini, Barau Natuna deikara na kwakuna fanakauna dagaranai evaĝa-iaĝoani tarimana tu kamasi? Mai tarima tu rakava voina baregona beĝabiani. Ĝia na tu mo ginitaĝo rarana, ĝia evaĝa-veaĝiato dagarana, asi evaĝa rarana evaĝa-iaĝoani. Ema varevare-bara Iaukana ĝenai maki veĝa rakava kwaikwaina eveiani.

³⁰ Korana ĝita ma ribara Barau ekirato, "Rakava voina tu au na bavaĝa-voiani, au na bavini-ĝenoĝoiani." Ema ma ekirato, "Vereĝauka na ĝena tarimarima beĝita-virigirini."

³¹ Maĝuri Barauna ĝimanai boketo-raĝeni tu garina maki asikeikeina.

³² Ĝaro guineri ĝotuĝamaĝi-ĝenoĝoiri. Barau ĝena mama ĝoĝabiato murinai, midigu-midigu barego ĝodoĝarito, senaĝi ĝoruĝa-gigitarito.

³³ Negatari ai tu ĝutuma bara ĝoirai ai ĝevaĝa-maiakamito-ĝoi, ma ĝevaĝa-midigu midigumito-ĝoi. Ema negatari ai tu ĝomi kavana ĝevaĝa-midigu midigurito-ĝoi tarimari seviri ai ĝoruĝa-tarito-ĝoi, ĝoruĝa-duku dukurito-ĝoi.

³⁴ Gediburarito tarimari ĝesi ĝomidigumidigu sebonato-ĝoi, ema ĝemi farefare ĝeverarimito-ĝoi maki ĝoiaku-iaĝirito-ĝoi moĝo. Korana na ribami, ĝomi tu ma ĝemi farefare namori, beĝe tanu-vanaĝi vanaĝini dagarari.

³⁵ Moĝa lorinai ĝemi tuĝamaĝi kokore maniĝa asi boĝono fitoĝari. Korana maniĝa voina tu barego lelevaĝina boĝoa ĝabiani.

³⁶ Boĝono vevaĝa-gwaĝiĝi, korana Barau ĝena ura veĝana boĝo vaĝa-koriani murinai tu, kara ekiraĝi-toreato mabarana boĝo ĝabiani.

³⁷ Korana Buka Veaĝa ekirani,

"Nega tu misina moĝo,

ma beiaĝomani etoni tarimana tu beiaĝomani, asi bekwaiboni.

³⁸ Au ĝegu vei-iobukaibuka tarimana tu ĝena veĝabidadama lorinai bemaĝurini.

Senaĝi murina ĝana ma beraka-ĝenoĝoini nai,

au tu asi baiakuni ĝia ĝenai."

³⁹ Senaĝi ĝita tu murira ĝana asi ma bita raka-ĝenoĝoini, benamo bita rekwarekwani. Asiĝina, ĝita tu ma ĝera veĝabidadama, be maĝuri bita ĝabiani.

11

Veĝabidadama tarimari

¹ Veĝabidadama anina tu mai-ĝesi. Tatuĝamaĝi-dadamaĝirini dagarari tavaĝa-moĝoni korikoririni. Matarai roĝosi bitana ĝitari, senaĝina tavaĝa-moĝoni korikoririni, moĝeri dagara tu moĝoni ema bita ĝabirini.

² Sene tarimari tu ĝeri veĝabidadama lorinai, Barau na eĝabi-raĝerito.

³ Taveĝabidadamani lorinai taribani, Barau eguruĝato, benamo guba e tanobara evetoreto. Moĝa lorinai mai taĝitarini dagarari tu Barau na asi taĝitarini dagarari ĝerina eveirito.

⁴ Abela tu ma ĝena veĝabidadama Barau ĝenai lorinai, Barau eviniato varevare dagarana na Kaino ĝena varevare dagarana evanaĝiato. E ma ĝena veĝabidadama lorinai, Barau na ĝena varevare dagarana ekiraĝiato varevare namona ema Barau na evaĝa-moĝoniato ĝia tu vei-iobukaibuka tarimana. Ma Abela tu varau emaseto, senaĝina ĝena veĝabidadama lorinai roĝo eguruĝani.

Abela, Enoka, Noa

⁵ Enoka ma ĝena veĝabidadama lorinai, Barau na eĝabi-varaĝeato moĝo, asi emaseto. Ma tarimarima na maki asi ĝedoĝariato, korana Barau na eĝabi-vaĝiato. Roĝosi bene ĝabi-veĝitaia nuĝanai, Barau ĝena bukai ekirani, Enoka na Barau iauna evaĝa-iaukuato.

⁶ Asi ġena veġabidadama tarimana na Barau tu asiġina ġinavaġi bevaġa-iakuani. Korana deikara Barau ġenai eiaġomani tarimana tu bene vaġa-moġoni Barau tu maġuri etanuni. Ema Barau ġevetauani tarimari mabarari tu voiri namori Barau na bevinirini.

⁷ Noa ma ġena veġabidadama lorinai, Barau na ġoirai beġe ġorani dagarari ekira-toreġaato. Mo tu Noa na roġosi bene ġitari dagarari. Noa na Barau evaġa-moġoniato, benamo ma garina ġesi bouti ta eragaiato, ġaraġona e natuna bene vaġa-maġuriri ġana. Ġia ġena veġabidadama na tanobara tarimari ekiraġi-foforirini rakava tarimari. Ma ġia tu ġena veġabidadama lorinai Barau na ekiraiato vei-jobukaibuka tarimana. Mai vei-jobukaibuka tu veġabidadama ġenana eiaġomani dagarana.

Aberahamo

⁸ Aberahamo ma ġena veġabidadama lorinai, Barau na ekeaiato nai eseġaġiato. Barau na ekeaiato tu ġena vanuġa bene raga-kwanea, ma Barau na tanobara ta ma beviniani, mo ġana bene iaġo. Benamo Aberahamo eraka-rosito moġo, asi ribana aiġana eiaġoni senaġi eiaġoto moġo.

⁹ Ma ġena veġabidadama lorinai, Barau na ekiraġi-toreato tanobaranaei ea vanuġato. Ma monai tu noġa moġo tanukau tarimana ta tanobara borunai etanuni kavana. Isako e Iakobo kavana farai numari ai ġetanuto-ġoi. Maiġeri tarima toitoi tu Barau ġena kiraġitore ġeġabiato.

¹⁰ Korana Aberahamo tu vanuġa baregona evaġa-nogaġiato-ġoi. Mo vanuġa tu fore baregona iatanai beruġakauni. Mo vanuġa tu Barau tauġena na beboiġaiani e beragaiani.

¹¹ Veġabidadama lorinai Sara na kokore eġabiato bene ġabi ġana, ema eġauka-rakavato, senaġi mero keina evaġa-maġuriato. Ġia ma ribana, Barau na kara ekiraġi-toreato dagarana tu beġorani.

¹² Benamo mai tarima sebona eġauka-rakavato, senaġi ġia ġenana senena ġemaġurito tu guba visiġuri kavana vovoka tabutabu, ema kone mirina kavana asi iavi-iavina.

¹³ Maiġeri tarimarima mabarari tu veġabidadamaġi ġetanuto-ġoi nuġanai ġemaseto. Barau na ekiraġi-torerito dagarari ġia na tu asi ġeġabito, senaġi manaġai moġo ġeġita-ġuinerito, benamo ġeġabi-raġerito. Ema ġeġuruġa-foforito ġia tu tanobara boruna tarimari. Ġia mai tanobarai tu ġetanukauni moġo.

¹⁴ Moġesina ġeġuruġani tarimari tu ġeri guruġa na ġevaġa-foforirini, ġia tu ġeri tanobara korikorina ġevetauani.

¹⁵ Bema ġeraga-kwaneato tanobarana ġere tuġamaġi-ġenoġoia nai tu, ma dabara ġere ġenoġoi.

¹⁶ Senaġi ġia tu tanobara namo vedaureana ġeuravini-rakavaġiato-ġoi. Mo tu gubai etanuni dagarana. Moġa lorinai Barau tu asi emaiakaiani, ġia ġeri Barau ġetoni nai, korana Barau na ġeri vanuġa baregona ta eraga-toreato.

¹⁷ Aberahamo tu ma ġena veġabidadama. Moġesina nai Barau na etovonaġiato nai tu, natuna Isako ġinitaġo dagaranaei evaġa-iaġoato, benamo Barau ma evarevare-viniato. Aberahamo ribana, Barau na kiraġitore tu ġia eviniato, senaġina ġia natuna sebona kwarġutu moġo tu ġinitaġo dagarana ġana bene vaġia etato.

¹⁸ Barau na Aberahamo maki maiġesina ekiraiato, ekirato, "Isako ġenana moġo ġoi senemu beġe maġurini."

¹⁹ Aberahamo etuġamaġito tu Barau na Isako ma bevaġa-maġuri ġenoġoiani riba. Moġesina naima iniġesina ma sikiraġia: Aberahamo na Isako mase na eġabi-ġenoġoiato.

Isako, Iakobo, Iosefa

²⁰ Isako ma ġena veġabidadama lorinai, Iakobo e Esau evaġa-namorito, ema ġeri ai vau beġea ġorani dagarari ekiraġirito.

²¹ Iakobo ma ġena veġabidadama lorinai, dori emaseto-ġoi nuġanai tu Iosefa natuna ruarua evaġa-namorito, ema ġena togoi ġenai eveġabi-ritoġoto, benamo Barau etomarakariġo viniato.

²² Iosefa ma ġena veġabidadama lorinai, eġauka-dorudoruto, dori emaseto-ġoi nuġanai tu, Isaraela tarimari Aigupito na beġe raka-vaġini ekiraġiato, ema turiġana kamasi beġene veia guruġana evinirito.

Mose

²³ Mose tamana e sinana Barau ġenai tu ma ġeri veġabidadama. Moġa lorinai Mose emaġurito ġaronai ġeġitaġiato mero keina namona korikori, benamo kini ġena guruġa garina tu asi ġeveito. Senaġi tamana e sinana na ġeġabiato, benamo numa nuġanai ġue toitoi ġetore-gumuato.

²⁴ Mose ma ġena veġabidadama lorinai, ebaregato nai tu asi eurato beġene kira, ġia tu Phrao natuna ġuiatona natuna merona.

²⁵ Gia taūgena eurato, Barau ġena tarimarima ġesi beġene vaġa-midigumidigu sebonaia. Ma asi eurato, vei-rakava nuġanai asi beġe tanu-maukani verereri ai bene tanu-namo.

²⁶ Gia na etuġamaġiato tu, Keriso uranai beġe vaġa-maiakaiani voina tu barego lelevaġi, Aigupito ai farefare voiri bevanagħirini. Korana ġia tu eboġequine-iaġoto, ġoirai voina eġita-iaġoato.

²⁷ Mose ma ġena veġabidadama lorinai, Aigupito na eraka-veġitato, Aigupito verena bebaruni garina asi egarito. Ġia tu ekokoreto, korana tu asi taġitaiani Barauna ġia na tu matana na noġa moġo eġitaiao.

²⁸ Ma ġena veġabidadama lorinai, Rubu Veaġa verekona ekorana-iaġiato ema Isaraela tarimari ekirarito, rara ġeri ġatama-boka koberi murikari ai beġene dau. Benamo mase aneruna na naturi, ġemaġuri-guineto merori, asi bene vaġiri.

Isaraela tarimari na Barau ġeġabidadama-viniato

²⁹ Isaraela tarimari na Barau ġeġabidadama-viniato lorinai, Davara Kakakakana nuġana na tanobara kaukauna na noġa moġo ġeraka-vanaġito. Ma Aigupito tarimari maki ġevanaġi ġetato nai tu, davara na eġutu-ġaurito.

³⁰ Isaraela tarimari ma ġeri veġabidadama lorinai, Ieriko vanuġa maġuna ġaro vaġa-imaima ruarua (7) ġeraka-ġeġeraġiato murinai eketoto.

³¹ Mata-boraġa ġuiatona Rahaba Barau ġenai eveġabidadamato lorinai, Isaraela ġeri maramara tarimari eġabi-raġerito, benamo Barau ġeseġafore-viniato-ġoi tarimari ġesi asi ġevaġi-sebonaiao.

³² Ma kara ma bakiraġiani? Asi ġegu taimi Gideona, Barak, Samson, Iefeta, Davida, Samuela ema peroveta tarimari variri bakiraġirini.

³³ Ġia tu ma ġeri veġabidadama lorinai, tanobara basileiari ġevetari-vinirito nai, ġekokoreto-ġoi. Veiġa iobukaibokari ġeveito-ġoi, ema kiraġitore dagarari ġeġabirito laion bokari ġekou-ġaurito.

³⁴ Karava seġuka rakava ema-moreni ġevei-buserito, ema vetari baġari matari na ġeraġa-maġurito. Ġeri moiramaira nuġari ai ġekokoreto; vetari ai tu guruġari maki seġuka rakava, ema ġevetari-vinirito-ġoi doġorori ġevaġa-ketorito-ġoi.

³⁵ Ġemaseto-ġoi tarimari ma ġevaġa-maġuri ġenoġoirito-ġoi, benamo sinari na ma ġeġabi-ġenoġoirito-ġoi. Ma tari tu dibura numai tauġaniri ġekwari-rakava kwaikwairito-ġoi ma dori ġemaseto-ġoi, senaġi asi ġeurato-ġoi Barau beġene kira-ġuniġaua, benamo dibura numana na beġene ruġa-vagħiri. Korana ġeri ura tu vaġa-varigħisi ġenoġoi namona beġene ġabia.

³⁶ Ma tari tu ġevaseva-vaseva iaġirito-ġoi, ġekwaririto-ġoi, ma tari tu seini na ġebarurito-ġoi, benamo dibura numanai ġetorerito-ġoi.

³⁷ Fore na ġetakirito-ġoi; ma tari tu ġesoa-ġuturito-ġoi; ma tari tu vetari baġari na ġevaġirito-ġoi. Mamoe kefirri e nanigosi kefirri ġevei-rakaoto-ġoi, asi ġeri-ġari, ġevaġa-midigu midigurito-ġoi, ema tarimarima na veiġa asi namori ġeri ai ġevei-vinirito-ġoi.

³⁸ Tanobara ġia ġeri ai tu asi namo moġo. Tanobara fakari na e ġoro tuġuri na, tano kouġari na, ema guri na ġetanu-rakaoto-ġoi.

³⁹ Maġeri tarimarima mabarari ġeri veġabidadama loriri ai, Barau na evaġa-maġuririto. Senaġina ta na Barau na ekiraġi-toreato dagarana ta tu asi eġabiao.

⁴⁰ Korana Barau na dabara namona ta ġita ġera eboiġaiao. Ġia ġena ura ġia maki ġita ġesi vaġa-sebo vau bene vaġa-namo vedaureara.

12

¹ Mo veġabidadama tarimari, ġita ġeġita-taġorani tarimari, tu ġutuma lelevaġi, magube na noġa moġo beġe ġeġeraġira. Moġa lorinai ġita ġekoukou-ġaurani dagarari, ema vei-rakava ġita ġebarubaru-tarirani dagarari mabarari sifitogari. Benamo ma kokorera ġesi ġoirarai Barau na etoreato raga-iruirunai siraga.

² Matara Iesu ġenai sitore-kauri. Korana Iesu na ġita ġera veġabidadama esinaiao, ema bevaġa-ġuġuruani. Ġia na ġoiranai mo iaku e verere etuġamaġiato nai, satauro maiakana asi etuġamaġiato. Benamo Barau ġena terona aroribanai etanu-tarito.

³ Iesu situġamaġia. Ġia tu vei-rakava tarimari na asi ġeġabi-raġeato, ġeseġafore-viniato, senaġina ekokoreto. Moġa lorinai asi boġono tuġamaġi-moira, e asi boġono ruġa-ġuiragħi.

⁴ Gomi tu rakava ġesi ġovevaġi-tanuni. Senaġina ġomi mani vevaġi nuġanai tu, ta raramu roġosi roġo here riġo.

⁵ Ema ġomi tu Barau na ekeamito ġia natuna, senaġi mai velaunaġi guruġana tu gotuġarekwaiao, ekirato,

“Natugu, Vereġauka na vevaġa-riba veiġari gwaġiġiri evinimuni nai, asi bono ġabi-meraġari,

ema bekira-feimuni nai,
nuḡamu asi bono vaḡa-moiraia.

⁶ Korana Vereḡauka na eura-vinirini tarimari tu vevaḡa-riba gwaḡigiri evinirini, ema ḡia natunai evaḡa-iaḡorini tarimari mabarari tu ekwaririni.”

⁷ Moḡa lorinai matakani veigari ḡemi ai beḡe ḡorani nai tu boḡono kokore. Korana ḡomi tu Barau natuna naima moḡesina eveimini. Ma siḡitaia, kamara mero keina tu tamana na asi evaḡa-matakaniani?

⁸ Tama mabarari na naturi ḡevaḡa-matakanirini. Ma bema ḡomi Barau na asi evaḡa-matakanimini, moḡa anina ḡomi tu dia Barau natuna korikori, ḡomi tu gara meromi.

⁹ Vaḡa-ilailana tauḡani rekenai ḡita tamara korikoriri na ḡevaḡa-matakanirani, benamo moḡeri korari ai tamara taḡubakaurini. Moḡesina kavana namona tu ḡita tata iaukara Tamari Barau maki tana gubakaua, benamo bitana maḡuri.

¹⁰ ḡita tamara na tu ḡaro kotunai moḡo ḡevaḡa-matakanirani. Mo tu ḡia tauḡeri na ḡetuḡamaḡiani namo ḡetoni ḡarori ai moḡo. Senaḡi Barau na evaḡa-matakanirani tu ḡita ḡera namo ḡana, ema ḡia ḡesi bitana veaḡa-vegogo ḡana.

¹¹ Maitoma matakani veigari ḡeiaḡomani tu ma midigumidiguri, asi iakuri. Senaḡina murinai vau mo matakani veigari ḡerina beribani tarimana tu vei-iobukaioibuka ema maino tarimanai beiaḡoni.

Nuḡara bitana vaḡa-kokoreri ema bitana ruḡa-gigitari

¹² Moḡa lorinai ḡimami beḡe ḡeroḡero-riḡo, ḡoḡabi-vaisiri, ema tuimi beḡe moira ḡeḡoḡo-ḡoḡorini, ḡovaḡa-kokoreri.

¹³ Benamo kwakumi na ḡoraka-iaḡirini fanari ḡovei-roroḡotori, be kwaku rakava tarimana kwakuna asi bene rakava-lelevaḡi, senaḡi bene namo.

¹⁴ Boḡono kokore-korikori, tarimarima mabarari ḡesi maino ai boḡono tanu uranai. Be ḡemi maḡuri beḡene veaḡa e asi vetoukaunai beḡene iaḡo bene. Korana tu ma vetoukauna e asi veaḡa tarimana na Vereḡauka tu asi beḡitaiani.

¹⁵ Boḡono venari, be tarima ta Barau ḡena varevare-bara ḡenana asi bene raka-veḡita, ma nuḡa-ḡirima ḡokana nuḡanai asi bene tubu-raḡe. Korana nuḡa-ḡirima ḡokana betubuni, ḡokana mamakina na ḡomi fakami ai rakava bevaḡa-ḡoraiani, benamo tarimarima vovoka bevaḡa-rakavarini Barau ḡoiranai.

¹⁶ Boḡono ḡitaia, ta ḡomi fakami ai mata-boraḡa veigari asi bene veiri, ema Esau na Barau asi ekorana-iaḡiato kavana asi bene vei. Esau na tu ḡena maḡuri guine seḡukana ḡanigani digu sebona moḡo uranai evare-fitogaiato.

¹⁷ Moḡa murinai ḡomi ma ribami, mo maḡuri guine vevaḡa-namona tamana ḡenana neḡabia etato tu tamana na asi egabi-raḡeato. Moḡoni, tamana ma taḡina ḡesi enoḡiato, senaḡi tamana asi ma etuḡamaḡi-ḡenoḡoito.

¹⁸ Gomi tu dia ḡimami na boḡo ḡabi-karaiani ḡorona ḡana boḡo iaḡoma, Isaraela tarimari kavana. ḡia tu Sinai ḡorona sevina korikorinai ḡeruḡato, benamo karava emoretoto ḡeḡitaiao, ema mukuna dubara kiukiuna e iavara barego lelevaḡina;

¹⁹ ema kibi guruna asikeikeina eraḡeto e garo baregona eguruḡato ḡeseḡaḡirito. Isaraela tarimari na mo garo ḡeseḡaḡiato nai tu, Mose ḡenoḡiato mo garo na asi ma bene vaḡa-guruḡari.

²⁰ Korana Barau na taravatu guruḡari evinirito nai tu, ḡegari-rakavato, Barau tu ekirato, “Bema tarima ta na o boromakau ta o nanigosi ta na mo ḡoro bea vei-karaiani nai tu, fore na boḡono taki-masea.”

²¹ Moḡeri vetoḡa ḡefoforito gariri tu asikeikeiri, benamo Mose ekirato, “Au tu eḡoḡo-ḡoḡoguni, aḡari-rakava rakavani.”

²² Senaḡina ḡomi tu Siona ḡorona ḡana boḡo iaḡoma e guba Ierusalemama maḡuri Barauna ḡena vanuḡa baregona ḡana, ema aneru ḡutuma gorogoro asi iavi-iaviri ḡeri ai boḡo iaḡoma.

²³ Gomi tu vegogo baregona ḡena e Barau natuna ḡemaḡuri-guineto ekalesiari ḡeri ai boḡo iaḡoma. ḡia arari tu Barau na gubai etorerito. Ema ḡomi tu tarimarima mabarari Kotai beḡita-virigirini Barauna ḡenai e vei-iobukaioibuka tarimari iaukari, Barau na evaḡa-namo vedaurearito iaukari, ḡeri ai boḡo iaḡoma.

²⁴ Ema Iesu ḡenai boḡo iaḡoma. Iesu ḡinitaḡo variḡunai tu Barau e tarimarima fakari ai eruḡani. Ema ḡia rarana ḡenai boḡo iaḡoma. Iesu rarana tu ḡomi ḡemi ai eketokauto. Ma Iesu rarana na ekiraḡiani guruḡana seḡukana na Abela rarana ḡena guruḡa seḡukana evanaḡiani.

²⁵ Boḡono venari, Barau na evaḡa-guruḡamini nai, garona asi boḡono kira-sirivaḡi-vinia. Korana tanobarai Barau na ekira-toreḡaurito tarimari ḡekira-sirivaḡito nai tu, asi ḡeraga-maḡurito. Geri kira-sirivaḡi voina ḡeḡabiato. ḡita tu kamasi bita raga-maḡurini? Barau

toma tu gubai etanuni, benamo monana ġita ekira-toreġaurani. Bema ġia ġenana bita raka-veġitani nai tu, kamasi bita raga-maġurini.

²⁶ Moġeri ġaro ai Barau garona na tanobara eruku-iagaiagaiato. Senaġina toma Barau tu eguruġa-toreto, ekirani, “Au na tanobara vaġa-sebona maia barukuani. Dia tanobara ġereġana moġo barukuani, senaġina guba maki barukuani.”

²⁷ Mai guruġa “vaġa-sebona maia” anina tu, guinenai Barau na eveirito dagarari beġe iagaiagani nai tu bekoki-veġitarini. Korana tu asi beġe iagaiagani dagarari moġo beġene tanu ġana.

²⁸ Ġita na taġabiani basileiana tu asi beġareva-ġarevani. Moġa lorinai Barau sitanikiu-vinia, ema Barau na eura-viniani maġurina sitoma-rakarigo vinia ma vegubakaura e ma garira ġesi.

²⁹ Korana ġita ġera Barau tu karava ġaraġara.

13

Barau vaġa-iaġuna veiġari

¹ Ġomi fakami ai tarikaka veuravinina bene tanu-vanaġi vanaġi.

² Tarima boruri ġabiraġeri asi boġono tuġa-rekwaia, korana tarima tari maniġesi ġeveito-ġoi nai tu, aneru ġeġabi-raġerito. Senaġi ġia tu asi ġeriba-maoroto mo tu aneru ġeġabi-raġerini.

³ Dibura numanai ġetanuni tarimari boġono tuġamaġiri. Boġono tuġamaġi, ġomi maki ġia ġesi dibura numanai ġoro tanu-vegogo. Ema ġevaġa-midigu midigurini tarimari boġono tuġamaġiri. Boġono tuġamaġi ġomi maki ġere vaga-midigu midigumi.

⁴ Tarimarima mabarari na veġaraġo beġene gubakaua, ema veġaraġo tarimari ġeri genagena gabuna bene namo-vedaurea. Korana ma ġaraġona, senaġina ekima-rakaoni, o ma eveġaraġo-sirivaġini tarimana, ema mata-boraġa veiġari ġeveini tarimari mabarari tu Barau na ġeri rakava voiri bevinirini.

⁵ Moni asi boġono uravini-lelevaġiri. Kara dagara ġemi ai maniġeri boġono ġabi-raġeri ma iakumi ġesi. Boġono kira, mai dagara ġemai maiġeri tu ġemai ilaila. Korana Barau tu ekirato,

“Au na asiġina ġinavaġi baraga-kwanemini, ema ġereġami asiġina ġinavaġi baiaġuimini.”

⁶ Moġa lorinai nuġara ma kokoreri ġesi bitana kira,

“Vereġauka na au bevaġa-kavaġuni,

be au asi bagarini.

Tarimarima na tu kara beġe veiani au ġegu ai?”

⁷ Ġotuġamaġi-ġenoġoi, ġeguine-iaġimito-ġoi tarimari ġotuġamaġiri. Ġia na Barau ġena guruġa ġemi ġekiraġito. Ġia ġeri maġuri na kara ġefoforito eiaġoto mo ġea maseto boġono tuġamaġiri, ema ġia ġeri vegabidadama boġono tovtovori.

⁸ Iesu Keriso tu ġoraġani, toma, ema vanaġivanaġi asi beirauni.

⁹ Vevaġa-riba irairauri na dabara moġonina na asi beġene ġori-veġitami. Namona tu Barau ġena varevare-bara na ġita iaukara bene vaġa-kokoreri. Ġaniġani taravaturi irairauri na ġita iaukara tu asi beġe vaga-kokorerini. Moġeri taravatu ġekorana-iaġirito-ġoi tarimari tu namo ta asi ġeġoitaġoato.

¹⁰ Ġita tu ma ġera fata veaġana. Senaġina Barau toma-rakarigona ġana farai rubuna nuġanai ginitaġo ġauveiri ġeveito-ġoi tarimari tu mai fatai asi beġe ġaniġanini.

¹¹ Rubu Veaġa verena baregona na boromakau, nanigosi, mamoe evaġirito-ġoi nai, tauganiri tu eġabi-rosirito-ġoi Isaraela tarimari ġeri totoġa gabuna na, benamo murikai vau ea gaburito-ġoi. Rarari moġo Veaġa Lelevaġi Gabunai eġabi-toġarito-ġoi, rakava ġabiveġitari varevarena bene vei-iaġiri ġana.

¹² Moġesina naima Iesu maki rarana na tarimarima bene vaġa-veaġari ġana tu, Ierusalemna vanuġa barana maġuna murikanai emidigu-midiguto.

¹³ Moġa lorinai ġita maki Iesu ġenai totoġa murikana ġana siraka-rosi. Be, ġia na eġabiato maiakana ġita na maki bitana ġabia.

¹⁴ Korana mainai ġita tu asi ġera tanu-vanaġivanaġi vanuġana. A ġita tu vanuġa vau ma beiaġomani dagarana tavetauani.

¹⁵ Moġa lorinai vanaġivanaġi Barau vonevone-raġena varevareri Iesu ġenana bitana vini-raġea Barau ġenai. Barau arana vonevone-raġena tu ġita murura ġwaġwana.

¹⁶ Veiġa namori veiveiri asi boġono tuġa-rekwari, ema ġemi ai guruġa moġoniri maniġeri karomi ġeri maki boġono kiraġi. Korana tu maniġesina veiġari tu ginitaġo dagarari namori Barau na eiaku-iaġirini.

¹⁷ Ġeguine-iaġimini tarimari garori boġono seġaġiri, ema ġeri veġorikau maorona gaburenai boġono tanu. Korana ġia na tu ġomi ġemi maġuri ġeġita-ġaurini, ema ġomi ġemi maġuri aiġesina Barau ġenai beġea kiraġirini. Garori boġono seġaġiri, be ma iakuri ġesi ġeri ġauvei beġene veia, a dia nuġari ma metori ġesi. Korana bema nuġari ma metori ġesi ġomi beġe narimini nai tu, ġomi na namo ta asi boġo doġariani.

¹⁸ Ġema boġono ġuriġuri. Ġai ribama ġai nuġama tu veiareva Barau ġoiranai, ema ġema ura barana tu vegubakau ai moġo baġana tanu.

¹⁹ Ġegu noġinoġi barego lelevaġina ġomi ġemi ai tu boġono ġauġau, be ġemi ai ma bana ġenoġoi-ġariġari.

²⁰ Maino Barauna na ġera Vereġauka Iesu tu betanu-vanaġi vanaġini ġinitaġo rarana ġenana ma evaġa-maġuri ġenoġoiato. Iesu tu mamoe nari tarimana baregona.

²¹ Mai maino Barauna na dagara namori mabarari bene vinimi, ġena ura boġono veia ġana. Ema kara ġia na eiaku-iaġirini dagarari Iesu Keriso ġenana ġita nuġarai bene ġauvei-iaġiri. Mareva baregona tu ġia ġena bene iaġo mo vanaġivanaġi. Amen.

²² Tarikakagu mabarami, anoġimini, ġegu vevaġa-naġi guruġari maiġeri boġono ġabi-raġeri ma nuġami namori ġesi; korana fefa tu kubina moġo batorea.

²³ Au aurani navaġa-ribami, ġita tarikakara Timoteo tu dibura numana na beġe tuġu-vaġia. Bema ġia bema raġasi-ġarimoġini tu, tauma ruarua baġa iaġosini ġitaġitami.

²⁴ Ġema vevaġa-namo ġemi veġorikau tarimari ema Barau ġena tarimarima veaġari mabarari boġono viniri. Itali tarimari na maki ġemi vevaġa-namo beġe tuġu.

²⁵ Barau ġena namo e varevare-bara mabarami ġemi ai bene tanu.

IAKOBO (O IAMES) ĠENA TORETORE

Iakobo (o Iames) vaġa-foforina guruġari

Mai fefa tu Iakobo (o Iames), Iesu tarina, na etoreato. Ġia tu Ierusalemka ekalesia ġorikauna tarimana ta. Mai fefa etoreato laġanina tu 45 ma 49 fakari nuġanai ta, mo tu Iesu emaseto murinai.

Mai fefa etoreato korana tu, 1) Heberu ekalesiari veribaġani ema meto baregori ġeġoitaġoto-ġoi nai, nuġari bene vaġa-gwaġġigiri etato; 2) Heberu ekalesiari vefakari ai tu veiġa ema maġuri asi roroġotori tari ġeġorato-ġoi, naima moġeri bene vei-roroġotori ġana uranai; 3) Heberu ekalesiari bene kira-varari, veġabidadama korikorina tu veiġa namori na bevaġa-foforiani.

Iakobo na mai fefa tu ma iġesi eboioġaiato:

1. Veġabidadama veribaġani na betovo-naġiani ema bevaġa-foforiani - karoa 1:1-18
2. Veġabidadama ġera ġauvei e veiġa na bevaġa-foforiani - karoa 1:19-2:26
3. Veġabidadama ġera guruġa na bevaġa-foforiani - karoa 3
4. Veġabidadama Barau korana-iaġina maġurina korikorina na bevaġa-foforiani - karoa 4-5

¹ Au Iakobo (o Iames), Barau e Vereġauka Iesu Keriso ġeri vetuġunaġi tarimagu, ġeguna mai fefa eiagosini, ġomi Isaraela doġoromi gabanana ruarua (12) tanobara boruri ai ġotanau-lausilausini ġemi ai. Avaġa-namomini.

Veribaġani ġenana veġabidadama bekokoreni

² Tarikakagu mabarami, veribaġani irauirau boġo ġoitaġorini nai, boġono iaku-iaġiri moġo.

³ Korana ġomi ribami, veribaġani na ġemi veġabidadama etovo-naġirini nai, kokore ema vevaġa-gwaġġi evaġa-ġorarinai.

⁴ Benamo kokore ema vevaġa-gwaġġi ġemi ai bene barego-korikori, be ġemi ai maki kerere ta asi bene tanu e vetoukau ta maki asiġina, ema dagara tai asi boġono rabu.

⁵ Senaġi bema ġomi fakami ai ta asi iaunegana nai tu, Barau bene noġia, ġia na beviniani, korana Barau tu nuġana mabarana ema nuġana ma iakuna ġesi ġia ġenogiani tarimari mabarari evinirini.

⁶ Senaġi enoġini nai tu veġabidadamai moġo bene noġi, nuġana asi bene daradara. Korana eiauvo-iauvoni tarimana tu davara ureurena iavara na ekwari-iaġo kwari-iaġomaiani kavana.

⁷ Moġesi tarimana tu bene riba, ġia Vereġauka ġenana dagara ta tu asi bedoġariani.

⁸ Etuġamaġi-ruaruani tarimana tu ġena ġauvei mabarari ai asi eruġa-gigitarini.

Asi ġena-ġana tarimana ema ma ġena-ġana tarimana

⁹ Tarikaka ta asi ġena e asi ġana tu bene iaku, korana Barau ġenai ġia tu barego.

¹⁰ Ema ma ġena ma ġana tarimana maki bene iaku, Barau na betore-varigoani neganai. Korana berekwa-rekwani boġa veraverari kavana.

¹¹ Garo emaraġeni nai, ekirini gugurana na ġauġa etunu-maraiani, benamo veraverana eketo-vaġini, ġitaġitana marevana ekorini. Ġena-ġana vovoka tarimana maki moġesina kavana berekwa-rekwani ġena taġa ġauveiri iaġoviniri nuġanai.

Vetovonaġi ema veribaġani ainana eiaġomani

¹² Veribaġani nuġari ai evevaġa-gwaġġini tarimana tu bene iaku, korana mo vetovonaġi bekorini nai, roġo beruġa-taġoni tu maġuri koronana beġabiani. Mo maġuri tu Barau na ekiraġi-toreato ġia ġeura-viniani tarimari ġeri.

¹³ Bema tarima ta veribaġani edoġariani nai, asi bene kira, "Mai veribaġani tu Barau ġenana eiaġomani." Korana Barau tu veiġa rakavari na asi beġe tovo-naġiani riba, ema ġia na tarima ta maki asi eriba-ġaniani.

¹⁴ Senaġi tarimarima veribaġani edoġariani tu bema ġia eveġwa-veġitani, benamo tuġamaġi rakavari na nuġana ġeġaniani, ġeġofaiani.

¹⁵ Ġena ura rakavari na nuġana ġevaġa-vonuani, benamo rakava ġevaġa-ġoraiani. Ema rakava etubu-baregoni nai tu mase evaġa-ġoraiani.

¹⁶ Tarikakagu namomi, ta na asi bene ġofami.

¹⁷ Vevaġa-ġauna dagarari namori mabarari ema varevare roroġotori dagarari mabarari tu tuġuna na ġeiaġomani, Mama Tamana, guba mamana eveiato Barauna, ġenana ġemariġoni. Guba mamana eirauni, senaġi ġia tu asi eirauni o mukuna na maki asi eġabiani.

¹⁸ Ĝia tauĝena ĝena urai moĝo ĝena guruĝa moĝonina ĝenana evaĝa-maĝurirato, korana tarimarima ema ĝemaĝurini dagarari tari ĝimana na eveirito dagarari mabarari fakari ai bitana guine ĝana.

Seĝaĝi e veiĝa

¹⁹ Tarikakagu namomi, maĝa tu boĝono ribaia: Ĝomi tata guruĝa seĝaĝi-seĝaĝiri ai boĝono ĝarimoĝi, senaĝi guruĝai boĝono veĝabitari, ema asi boĝono baru-ĝariĝari.

²⁰ Korana tarimarima ĝeri baru ĝerina Barau ĝena veiĝa roroĝotori asi beĝe fororini.

²¹ Moĝa lorinai maĝuri rakavari ema veiĝa mirori mabarari boĝono fitoĝari. Barau na nuĝami ai evaroato guruĝana boĝono ĝabi-raĝea ma manaumi ĝesi. Korana mani guruĝa na bevaĝa-maĝurimini riba.

²² Ĝena guruĝa tu asi boĝono seĝaĝiri moĝo, senaĝi ĝoseĝaĝirini guruĝari tu ĝemi veiĝai boĝono vaĝa-foforia, tauĝemi boĝo veĝofani garina.

²³ Deikara Barau ĝena guruĝa eseĝaĝiani moĝo, senaĝi veiĝana tu asi eveiani tu veĝia ai tauĝena ĝoirana eĝitaĝini kavana.

²⁴ Tauĝena veĝiai eveĝitani, benamo eraka-veĝitani nai tu ma evetuĝa-rekwani ĝia vetogana tu aiĝesana.

²⁵ Senaĝi deikara taravatu namo vedaureana, tarimarima ĝeri rakava eruĝa-vaĝirini taravatuna, eĝita-ĝinikauani, eseĝaĝi-vanaĝi vanaĝiani ema asi eseĝaĝi-taĝuini, senaĝi ĝena veiĝai evaĝa-foforiani, ĝia tu Barau na ĝena ĝauvei mabarari nuĝari ai bevaĝa-namoani.

²⁶ Bema tarima ta tauĝena evekiragini tu Barau ekorana-iaĝiani etoni, senaĝi meana tu asi enariani, mani tarima tu tauĝena moĝo eveĝofaĝofa-iaĝini ema Barau korana-iaĝina veiĝana maki asi tauna.

²⁷ Ĝita Tamara Barau na ekalesia tarimana namo vedaureana e moĝonina maĝesi etuĝamaĝiani: Gara e vabu ĝeri taĝitaĝi ai eĝita-ĝaurini ema tauĝena evenarinini tanobara mirona na bevemironi garina.

2

Ekalesia mabarari tu ilaila moĝo

¹ Tarikakagu mabarami, ĝera Vereĝauka Iesu Keriso mamana e seĝukana tu barego, ĝia ĝovaĝa-moĝoniani tarimami, tarimarima mabarari boĝono ĝabiraĝe-ilailari, dia ĝeri vetoĝai boĝono ĝabi-raĝeri.

² Bema tarima ta, ĝimana ma golo aĝevana e ĝena dabuĝa maki irau moĝo, bema raka-toĝani ĝemi vegogo nuĝanai, ema asi ĝena-ĝana tarimana ta ĝena dabuĝa tu kitakata bema raka-ĝurani.

³ Benamo ĝomi na dabuĝa ma marevana eveiani tarimana tu boĝo gubakau-baregoani, benamo boĝo vaĝa-guruĝaĝiani, boĝo kirani, “Mai tanutanu namonai noma tanu,” a asi ĝena-ĝana tarimana tu boĝo kiraiani, “Iomonai noa ruĝa,” o, “Mai kurabo ai noma tanu au kwakugu koranai.”

⁴ Moĝa ĝenana ĝomi tu tauĝemi moĝo ĝovevaĝa-irauni ema vevaĝa-maoro maki ĝoveiani ĝemi tuĝamaĝi rakavari ĝerina.

⁵ Ĝoseĝaĝi, tarikakagu namomi, Barau na mai tanobarai asi ĝeri asi ĝari tarimari eĝabi-viriĝirito, veĝabadadama na beĝene vonuvonu-raĝe, ema ĝena Basileia beĝene ĝabia uranai. Mo Basileia tu Barau na ekiraĝi-toreato, ĝia ĝeura-viniani tarimari moĝo beĝe raka-toĝani.

⁶ Senaĝi ĝomi na asi ĝeri ema asi ĝari tarimari tu ĝoĝita-ĝuiragirini. Dei na ĝomi evaĝa-rakavamini, ema einu-iaĝomini Kota gabuna ĝana? Ma ĝeri-ĝari tarimari maniĝesi ĝeveini, ene?

⁷ Ĝia na mani ara namona, ĝomi na ĝovaĝa-moĝoniani tarimana arana Keriso, ĝekiraĝi-rakava rakavaiani.

⁸ Dagara namona tu maĝa: Barau ĝena Basileia taravatuna boĝono korana-iaĝia, Buka Veaĝai ĝetoreato maĝesi ekirani, “Sevimu tarimana bono ura-vinia tauĝemu oveuravinini kavana.” Maniĝa ĝokorana-iaĝi korikoriani nai tu maorona ĝoveiani.

⁹ Senaĝi bema ĝomi na tarimarima ĝeri vedabuĝa o dagi ilailari ai moĝo ĝoĝabi-raĝerini nai, ĝomi tu rakava ĝoveiani, ema taravatu na maki ekiramini, ĝomi tu taravatu ĝokira-fitoĝaĝiani tarimami.

¹⁰ Korana mo deikara na taravatu mabarana ekorana-iaĝiani, senaĝi sebona moĝo eketoni, ĝia na taravatu mabarana ekira-fitoĝaĝiani.

¹¹ Korana mo Barau sebona ekirato, “Asi bono veĝura-vanaĝi,” ma ekirato, “Asi bono vaĝivaĝi.” Moĝa lorinai bema ĝoi asi boveĝura-vanaĝini, senaĝi bovaĝivaĝini nai, ĝoi tu taravatu okira-fitoĝaĝiani tarimamu.

¹² Ğoguruġani ema veiġa ġoveirini nai, Barau ġena taravatu boġono tuġamaġia, korana mo tu ma seġukana tarimarima ġeri rakava ġerina beruġa-vaġirini. Moġa maki bea vevaġa-maoro vinimini.

¹³ Deikara tarimarima asi evetuġa-ġwarini tu, Barau na maki ġia asi bevetuġa-ġwaiiani ġena Kota baregona ġaronai. Senaġi deikara ta na tarimarima evetuġa-ġwarini, Kota garina asi bene vei, korana vevetuġaġwa na vevaġa-maoro evanaġiani.

Veġabidadama ma veiġana

¹⁴ Tarikakagu mabarami, tarima ta bekirani, ġia tu ma ġena veġabidadama, senaġi bema ġena veiġa na asi evaġa-moġoniani nai, kara namona bevaġa-ġoraiiani? Mo veġabidadama na bevaġa-maġuriani riba ba?

¹⁵ Vaġa-ilailana, bema tarikaka tauna ta o vavinena ta asi ġena dabuġa ema asi ġana ġaniġiani.

¹⁶ Benamo ġomi ta na bokiraiani, bokirani, “Ma nuġa namomu ġesi noiaġo. Bono veseġo, be asi bene naguremu e bono ġanimase-ġinikau!” Senaġi tauġanina eura-vinirini dagarari tu asi oviniani, ġena namo tu kara?

¹⁷ Veġabidadama maki moġesi, bema veġabidadama ġereġana moġo ema veiġana asi evaġa-foforiani nai tu mase, asi tauna.

¹⁸ Senaġi tarima ta ma bekirani, “Ġoi tu ma ġemu veġabidadama, senaġi veiġa tu au ġegu ai.” Benamo au ġegu vevaġa-vese tu iniġesi, “Ġemu veġabidadama naġitaia. Kamara dabarai bovaga-ġitaġuni bema veiġa asi evaġa-foforiani nai? Senaġi au ġegu veġabidadama tu fofori, ġegu veiġa na evaġa-ġitamuni.”

¹⁹ Ġoi na ovaġa-moġoniani, Barau tu sebona moġo. Namo! Senaġina iauka rakavari na maki ġevaġa-moġoniani, benamo ġeġoġo-ġoġorini korana ġegarini.

²⁰ Ġoi babo! Ġoi ourani tauna korikori noġitaia veġabidadama veiġana asi evaġa-foforiani tu asi tauna.

²¹ Ġita senera Aberhamo tu kamasi nai Barau na evaġa-moġoniato ġia tu veiġa iobukaiobuka tarimana? Ġia tu ġena veiġa na natuna Isako fata veaġa iatanai Barau evarevare-viniato.

²² Be oġitaiani, ġia ġena veġabidadama ema ġena veiġa tu ġeġauvei-vegogoto; ġena veġabidadama tu ġena veiġa na ġevaġa-moġoniato.

²³ Benamo Buka Veaġai ġetoreato guruġana emoġonito, maġesi ekirani, “Aberhamo na Barau evaġa-moġoniato, benamo Barau na eġabi-raġeato ġia tu vei-iobukaiobuka tarimana.” Ema Barau na maki ekiraiato, ekirato, “Au ġatagu.”

²⁴ Ġoġitaiani, tarimarima tu ġena veiġa na Barau na eġabi-raġeani, dia ġena veġabidadama ġenana moġo.

²⁵ Rahaba mata-boraġa vavinena maki moġesi. Ġia tu ġena veiġa ġenana Barau na eġabi-raġeato. Isaraela rivirivi tarimari ġena numai eġabi-raġerito ema dabara boruna ma etuġu-rosirito.

²⁶ Vaġa-ilailana tauġani asi iaukana tu mase, veġabidadama maki moġesi, bema asi veiġana tu mase.

3

Murumi boġono nariri

¹ Tarikakagu mabarami, ġomi ġutuma tu vevaġa-riba tarimami ai asi boġono iaġo. Korana ma ribami, Barau ġena Kota ġaronai ġia na ġai, vevaġa-riba tarimama, ġema veiġa tu bevetau-ġitakaurini, dia ekalesia tarimari tari kavana.

² Ġita mabarara ġaro ġutuma kerere taveini. Senaġi bema tarima ta kerere ta asi eveiani ġena guruġai nai, ġia tu asi vetoukauna ema tauġanina mabarana benariani riba.

³ Hosi bokanai taritari aurina tatore-toġaiani, korana taurani bene seġaġira; moġesi tauġanina mabarana bita tariiani riba.

⁴ Lagatoui ġotugaġia: Asikeikeina, iavara baregona na vau ekwari-ragaiani, senaġi tarina tu misina korokoro. Mo tari misina korokorona na etariani tarimana ġena ura gaburi mabarari ġana etari-iaġoani.

⁵ Moġa ilailanai mea makina: Misina korokoro, senaġi dagara baregori eveiavi-iaġirini. Boġa maki aiġa baregona, senaġi karava misina na beġara-ġosiani.

⁶ Mea maki karava kavana. Tauġanira mabarari fakari ai ġia tu rakava gabuna tauġanira mabarana evaġa-miroani. Tauġanira ema iaukara evaġa-rakavarini. Ġera tanu dabarari mabarari mea na bevaġa-kerererini riba, korana ġia tu karava kavana ġita eġararani. Mo karava tu eġara-vanaġi vanaġini gabuna na eġabini.

⁷ Tarimarima tu vevaġa-marana ma ribana, ema ġemaġurini dagarari iraurirau maki mabarari evaġa-maranarini e evaġa-maranarito-ġoi ilailana manu, mota, davara dagarari, ema boġa bairi maki.

⁸ Senaġi tarima ta na mea tu roġosi roġo bene vaġa-maranaia. Ġia tu rakava ema asi vaġa-maranana, vevaġa-mase nanuna rakavana na evonuvonu-raġeto.

⁹ Ġita meara na ġera Vereġauka ema Tamara tavaġa-namoani, ema meara na maki Barau na ġia vetoġana kavana eveirito tarimarimari tavaġa-rakavarini.

¹⁰ Mo muru sebona na vevaġa-namo guruġari ema vevaġa-rakava guruġari ġeraka-vaġini. Tarikakagu mabarami, maniġesi veiġa asi bene ġora.

¹¹ Nanu gurina sebona na nanu ma mamina ema nanu mamakina asi beraka-vaġini, ene?

¹² Tarikakagu, figi ġaunai olive asi beġwani ema olive ġaunai maki figi asi beġwani. Moġa ilailanai damena nanuna na ġaruka nanuna asi beraka-rosini riba.

Barau ġenana eiaġomani iaunegana

¹³ Deikara ġomi fakami ai tu ma iaunegana ema etuġamaġi-fakani? Ġena maġuri namori na bene vaġa-moġonia, ema ġena veiġa namori bene veiri ma iaunegana e manauna ġesi.

¹⁴ Senaġi bema ġomi nuġami ai mama, baru, ema veiavi ġetanuni nai, asi boġono kira, “Ġai tu ma iaunegama!” Moġesina ġomi na guruġa moġonina ġokure-toġaiani.

¹⁵ Mani iaunega tu dia guba na o Barau ġenana ġemarigoni, senaġi ġia tu tanobara ġena, tarimarima nuġari na ġemaragani ema iauka rakavari ġerina ġeiaġomani.

¹⁶ Korana mama ema veiavi ġetanuni gaburi tu daradara etanuni, ema veiġa rakavari mabarari maki ġetanuni.

¹⁷ Senaġi guba na eiaġomani iaunegana tu asi mirona e asi vetoukauna ta. Beġabi-raġeani tarimana ġena veiġa tu maigā: Maino, garo-namo, veġata. Ġia tu ma ġena vevetuġaġwa ema ġwaġwana maki namori. Veira-veira ema vei-ġofakau asi ribana.

¹⁸ Maino ai ġetanuni tarimari tu noġa moġo varovaro ġueri ġevaroni kavana. Maino na veiġa namori ġutuma evaġa-ġorarinini. Moġeri veiġa namori tu tarimarima ġeri maġuri ai ġefoforini noġa kwakwa ġaronai dagarara namori ġedoġaririni kavana.

4

Tanobara veġatana

¹ Vevaġi e vevane ġomi fakami ai tu kara na ġevaġa-ġorarinini? Mani tu ġemi ura rakavari nuġami ai tauġeri tata ġevevaġini ġerina ġeiaġomani.

² Dagara kota ġourani, senaġi asi ġoġabirini, benamo ġovaġi-vaġini. Dagara kota ġouravini-rakavarini, senaġi asi ġodoġaririni, benamo ġovevaneni e ġovevaġini. Ġouravirinini dagarari asi ġodoġaririni, korana Barau asi ġonoġiani nai.

³ Ema ġonoġinoġini maki asi ġoġoitaġoni, korana ġemi tuġamaġi tu rakava; ġourani kara ġonoġirini dagarari tu ġereġami na boġono ġaunari.

⁴ Ġomi veġuravanaġi tarimami, (Barau ġenana ġoveġitato tarimami)! Ġomi asi ribami tanobara ġesi boġo veġatani tu Barau asi boġo ura-viniani? Deikara eurani tanobara ġesi bene veġata etoni tarimana na tu Barau evetari-viniani.

⁵ Buka Veaġai guruġa ta tu maigesi ekirani, “Barau na ġita nuġarai etoreato Iauka Veaġana eura-rakavani, ġia na bene ġuine-iaġira.” Ġomi ġotuġamaġini mo guruġa ġetore-kavaiato?

⁶ Senaġi Barau ġena varevare-bara tu barego ġita ġerai. Moġa lorinai ġena Buka Veaġai maigesi ekirani, “Eveiavini tarimana tu Barau na etore-veġitaiani, a manau tarimana tu ġena varevare-bara eviniani.”

⁷ Moġa lorinai boġono vevaġa-manau, Barau gaburenai boġono tanu. Satani boġono kira-ġoia, benamo ġomi ġemi na beraga-kwareġani.

⁸ Barau ġenai boġono raka-kavi, benamo ġia maki ġomi ġemi ai beraka-kavini. Ġimami boġono ġuriġiri, ġomi rakava tarimami! Nuġami boġono iarevari ġomi tuġamaġi ruarua tarimami!

⁹ Boġono dabara-doko, boġono nuġa-midigumidigu, ema boġono taġi. Ġemi riki tu nuġa midigumidigu ai bene iaġo, ema ġemi iaku tu nuġameto ai bene iaġo!

¹⁰ Vereġauka ġoiranai boġono tutuġu-tari, benamo ġia na bene ġabi-vaisimi.

Asi boġono vekira-rakava

¹¹ Tarikakagu mabarami, ġomi tata asi boġono vekira-rakava. Deikara na tarikakana ta ekira-rakavaiani o vevaġa-maoro evei-viniani tu Barau ġena taravatu ekira-rakavaiani ema vevaġa-maoro evei-viniani. Bema ġoi na taravatu vevaġa-maoro ovei-viniani nai, ġoi na tu asi okorana-iaġiani, senaġi vevaġa-maoro tarimanai oiaġoni.

¹² Barau ġereġana moġo tu taravatu evini-riġoni e vevaġa-maoro evinini tarimana. Ġia ġereġana moġo ma seġukana bevaġa-maġurini ema bevaġa-rakavani. Goi tu deikara, be sevimu tarimana vevaġa-maoro ovei-viniani?

Asi boġono veiavi o vekokoroku

¹³ Goseġaġi, ġomi deikara maiġesi ġokirani, “Toma o boinani ġita tu bita iaġoni mai taoni o iomo taoni ġana. Monai laġani sebona bita tanuni, benamo bisinesi bita ġwa-raqaiani, moni asi gadara bita doġarini.”

¹⁴ Gomi asi ribami ġemi maġuri boinani tu kamasi bevetoreni. Gomi ġemi maġuri tu kara? Ġomi tu goġu kavana, eberer-rosini negakotuna, benamo ma erekwarekwani.

¹⁵ Gomi tu maiġesi boġoro kira, “Bema Vereġauka beurani nai tu bita maġurini ema maiġesi o moġesi bita veini.”

¹⁶ Senaġi ġomi tu ġovevaġa-raġeni ema ġoveiavini; moġesi vevaġa-raġeri tu rakava.

¹⁷ Moġa lorinai, kamara tarima ma ribana, ġia na veiġa namona bere veia dagarana, senaġi asi eveiani nai, ġia tu veiġa rakava tarimana.

5

Farefare ġutuma tarimami lorimi boġono vetore

¹ Ma ġemi farefare ġutuma tarimami, ġoseġaġi! Boġono taġi, boġono taġi-koġokoġo, korana midigumidigu asikeikeina ġemi ai mani eiagomani.

² Ġemi farefare mabarari tu beġe boraġa, ema ġemi dabuġa tu faro na beġe ġaniri.

³ Ġemi golo ema ġemi silva tu beġe lala-lala o rasta. Mo lala-lala na tu ġomi bekiraġi-rosimini, ema viriġomi beġanirini karava kavana. Mai ġaro dokori ġana ġemi taġa ġosenurito.

⁴ Ġoseġaġi, ġemi vamokai ġeġauveito tarimari ġomi na voiri asi ġovinirito. Geri nuġa-vekwaraġi ġoseġaġi! Mo ġemi ġaniġani ġevaġa-vegogorito tarimari ġeri taġi tu varau Iarukorokoro Vereġaukana na bea seġaġia.

⁵ Gomi ġemi maġuri mai tanobarai tu taġa e iaku verere nuġanai, ema ġoġoreġore-rakavani. Boġo ġanimase ema boġo goba-rakava, vaġivaġimi ġarona tu varau bevotu.

⁶ Gomi na asi ġeri rakava tarimari ġovaġa-daġa-kavarito ema ġovaġi-maserito, ġia na asi ġeġabi-iaunaġimito.

Vevaġa-gwaġiġi ema ġuriġuri

⁷ Tarikakagu mabarami, boġono vevaġa-gwaġiġi bene iaġo mo, Vereġauka bene iaġoma. Iaraġa tarimana ġoġitaia, evaġa-nogani, ġena vamokai varovaro dagarari tauri namori enaririni, evevaġa-gwaġiġini eiaġoni mo, ġura guinena e ġura ma beragu-gabini ġurana eraguni.

⁸ Gomi maki boġono vevaġa-gwaġiġi. Nuġami beġene kokore, korana Vereġauka ġena iaġoma maki varau bekavināġi.

⁹ Tarikakagu mabarami, tauġemi fakami ai asi boġono verori-tore, Barau na vevaġa-maoro bevinimini garina. Goseġaġi, Kota eseġaġini tarimana tu varau ġatama-bokai eruġa-taġoni.

¹⁰ Tarikakagu mabarami, Vereġauka aranai ġeguruġato-ġoi peroveta tarimari ġotuġamaġiri. Geri midigumidigu nuġari ai ġevevaġa-gwaġiġito-ġoi. Gomi maki moġesi boġono vevaġa-gwaġiġi.

¹¹ Goġitaiani, ġita na tavaġa-raġerini, korana ġevevaġa-gwaġiġito nai. Iobu ġena vevaġa-gwaġiġi varina tu ġoseġaġiato, ema ġomi ma ribami, Vereġauka na kamasi dokonai voina namona eviniato, korana Vereġauka ġena veuravini ema ġena vevetuġaġwa tu barego vedaurea.

¹² Tarikakagu mabarami, dagara barego vedaureana tu maiġa: Guruġa gwaġiġiri na asi boġono kiraġi-tore ġemi guruġa vaġa-moġoniri ġana. Guba o tanobara o dagara boruna ta aranai asi boġono kiraġi-tore. Bema “Oi” ġotoni nai tu, oi moġo boġono si, a “Asiġina” ġotoni nai maki, asiġina moġo boġono si. Moġesi tu Barau na asi bekiramini ġomi tu kerere.

Ġuriġuri ma seġukana

¹³ Gomi fakami ai ta emidigumidiguni ba? Bene ġuriġuri. Ta eiakuni ba? Barau vaġa-raġena mariri bene ġabi.

¹⁴ Ta ekeveni ba? Ġia tu ekalesia ġeġori-kauani tarimari vetuġuri bene vei, beġenema ġuriġuri ġia iatanai ema diġa na beġenema daua Vereġauka aranai.

¹⁵ Benamo ġauġau ma veġabidadamari ġesi nai tu, keve tarimana benamoni. Barau na ġena keve bevaġa-namoani, ema bema rakava eveito nai, ġena rakava betuġamaġi-fitoġarini.

¹⁶ Moġa lorinai, ġemi rakava karomi tata ġeri ai boġono kiraġi-foforiri, ema tata ġeri boġono ġuriguri, be ġemi keve na boġono namo. Barau ġena ura eveirini tarimana ġena ġauġau tu seġuka rakava.

¹⁷ Elia tu tarimarima ġita kavana. Ġia eġuriguri-gwadagwadato ġura asi bene ragu ġana, benamo tanobarai ġura laġani toitoi (3) ma ġue imaima sebona (6) asi eraguto.

¹⁸ Ma eġuriguri-ġenoġoito, benamo guba evekeo-fakato, ġura ma eraguto; benamo tano na ġaniġani ma evaġa-ġoraiato.

¹⁹ Tarikakagu mabarami, bema ġomi ta Barau ġena guruġa moġonina ġenana berakaveġitani, benamo ta na ma bea ġori-ġenoġoiani nai tu, veġa namona beveiani.

²⁰ Boġono riba, deikara na veġa rakava tarimana ġena dabara ġeġevana na eġori-ġenoġoiani nai tu, ġia na mo veġa rakava tarimana iaukana mase ġenana evaġa-maġuriani, ema rakava ġutuma maki Barau na etuġamaġi-fitoġarini.

PETERO ĜENA TORETORE GINIGUINENA

1 Petero vaĝa-foforina guruĝari

Petero tu kone ai maina tarimana, ma ĝia tu Iesu ĝena mo mero gabanana ruarua (12) nuĝanai maki. Mai fefa Petero na tu betagu Romai etoreato laĝani 62 ma 64 fakari nuĝanai ta. Mo tu Iesu maki emaseto murinai vau.

Siri baregori mai fefai tu karoa 1:7; 4:12-13.

Mai fefa etoreato nuĝanai ĝia ĝena ura tu Iuda ekalesiari ema irau bese ekalesiari 1) bene vaĝa-kokoreri, be tarimarima na ĝevaĝa-midigu midigurito-ĝoi nuĝanai beĝene ruĝa-gwaĝiĝi; 2) ĝoirai veribaĝani baregori beĝe raga-ĝoitaĝorini moĝeri ĝana erovina-torerito; 3) ĝoirai Barau ĝena mareva baregona ĝeĝoira-taĝoani moĝa ĝeri evaĝa-foforiato; 4) bene launaĝiri, be ekalesia ĝauveiri korikori beĝene veiri.

Petero na ĝena fefa tu maiĝesina eboioĝaiato:

1. Barau ĝena vevaĝa-maĝuri ma ekiraĝi-varigu-ĝoiato - karoa 1:1-2:10
2. Midigumidigu nuĝanai aiĝesina beĝene tanu - karoa 2:11-4:11
3. Midigumidigu nuĝanai ĝeri veiĝa ĝobiri beĝene toreri - karoa 4:12-5:11

¹ Au Petero, Iesu Keriso ĝena apostolo taugu, na mai fefa atore-iaĝosiani. Ĝomi, Barau ĝena ĝabi-viriĝi tarimami, ĝemi gabu korikori ĝoraga-kwanerito, toma tu Ponto ai, Galatia ai, Kapadokia ai, Asia ai, ema Bitinia tano boruri ai ĝotanu-lausilausini tarimami ĝemi ai.

² Ĝomi tu Barau, ĝita Tamara, na eriba-guinemito ema eĝabi-hidimito, ĝena tarimarimai boĝo iaĝoni. E ĝia Iaukana na evaĝa-veaĝamito korana tu, Iesu Keriso boĝono seĝaĝi-vinia ema ĝia rarana na bene ĝurigiĝi ĝana, be veiareva boĝono tanu Barau ĝoiranai.

Barau ĝena varevare-bara ema maino na bene vaĝa-vonuvonu-raĝemi.

Maĝuri vanaĝivanagi

³ Barau, ĝita ĝera Vereĝauka Iesu Keriso Tamana, sivaĝa-namoa! Korana ĝena vevetuĝaĝwa barego vedaureana lorinai, maĝuri variguna ĝita evinirato, Iesu Keriso mase na evaĝa-varigiĝi ĝenogoiato ĝenana. Mai veiĝa ĝenana ĝita nuĝara tu maĝuri vanaĝivanagi tatugaĝi-kauani dagarana na evaĝa-vonurini.

⁴ E Barau na ĝena tarimarima ĝeri etore-rogoani vevaĝa-namo baregona, bitana ĝabia dagarana, tu ĝoirai tagita-iaĝoani. Barau na gubai etore-rogorini ĝomi ĝemi, korana monai tu asi beĝe boraĝani, asi beĝe rakavani, e asi beĝe verumuni.

⁵ Ĝomi tu ĝemi veĝabidadama dainai Barau seĝukana na eĝita-ĝaumini, beiaĝoni mo, ĝia na varau erovina-toreato vevaĝa-maĝurina nega magonai bevaĝa-foforiani, matami na boĝo ĝitaiani e boĝo ĝabiani.

⁶ Ĝomi toma kotunai tu midigumidigu barego ĝoĝanini, korana veribaĝani irauirauri ĝoĝoitaĝoni bene. Senaĝi ĝemi iaku tu bene barego-lelevaĝi, korana Barau ĝena vevaĝa-maĝuri boĝo ĝabiani bene.

⁷ Maĝeri veribaĝani irauirauri ĝeiaĝomani tu, Barau na ĝomi ĝemi veĝabidadama etotio-buka iobukarini, korana Iesu Keriso befoforini ĝaronai tu, Barau ĝenana vevaĝa-raĝe e mareva namona ema vegubakau bogo doĝariani. Golo karava na evaĝa-namo vedaureaiani ma voina evarage-lelevaĝini, senaĝi ĝomi ĝemi veĝabidadama voina tu ma varage lelevaĝi.

⁸ Ĝomi na roĝosi roĝo maki ĝoro ĝitaia, senaĝi ĝoura-viniani. Initoma maki asi ĝoĝitaiani, senaĝi ĝogabidadama-viniani ema iaku na ĝovonu-vonu-raĝeni. Ĝemi iaku maki asi tau kirari vaĝa-namona ta.

⁹ Korana Keriso ĝenai ĝoveĝabidadamani voina tu, ĝomi vevaĝa-maĝuri ĝoĝoitaĝoni.

¹⁰ Mai vevaĝa-maĝuri maĝa tu peroveta tarimari na ĝevetau-ĝinikau ĝinikauato, ema ĝia na ĝekiraĝi-tore guineato, mai varevare dagarana tu Barau na ĝomi bevinimini, (Keriso beiaĝomani ĝaronai).

¹¹ Beiaĝomani ĝarona e kamasi beiaĝomani beĝene ribaia ĝana ĝetuĝamaĝi-vekwaraĝito-ĝoi. Mo negai Keriso Iaukana tu ĝia nuĝari ai eĝauveito-ĝoi ema ekira-vararito-ĝoi, Keriso tu ĝena midigumidigu bevevaĝa-gwaĝiĝi-iaĝiani, ma moĝa murinai vau ĝia marevana baregona beĝabiani.

¹² Barau na peroveta tarimari evaĝa-ribarito, ĝia na mo vari ĝeĝobata-iaĝiato-ĝoi tu dia ĝia tauĝeri ĝeri namo ĝana, senaĝi ĝomi ĝemi. Korana ĝia na mo dagara, ĝekiraĝirito dagarari, tu toma ĝena vetuĝunaĝi tarimari na Vari Namona ĝevari-fiuan guba na etuĝumariĝoato Iauka Veaĝana seĝukanai, be ĝoseĝaĝini. Maĝeri dagara tu aneru maki ĝeri ura baregona beĝene ribaia.

Boĝono vevaĝa

¹³ Moġa lorinai, nuġami beġene veiareva, boġono vevaġa-gwaġiġi. Iesu Keriso befoforini ġaronai Barau na bevinimini varevarena ġenai, nuġami mabarana ġesi boġono torea.

¹⁴ Barau natunai ġoiaġoto nai, ġia boġono seġaġi-vinia. Barau asi ribami negari ai tauġani ġena ura rakavari na ġeġori-ġeġevamito-ġoi veiġari asi ma boġono vei-ġenoġoiri.

¹⁵ Senaġi ekeamito Barauna tu veaġa, ilailanai ġomi maki boġono veaġa ġemi veiġa mabarari nuġari ai.

¹⁶ Korana Buka Veaġa nuġanai etoreato, Barau ekirato, “Boġono veaġa, korana au tu veaġa.”

¹⁷ Ġoġauġauni negari ai, Barau tu Tamami ai ġokiraġiani, ma ġia na tarimarima mabarari tu dabara sebonai moġo evaġa-maoro vinirini, tata ġeri veiġa ilailari ai; moġa lorinai mai tanobarai roġo ġotanukauni nuġanai tu, Barau boġono gubakaua e boġono seġaġi-vinia.

¹⁸ Korana ma ribami, senemi ġeri maġuri rakavari ġomaġuri-iaġirito-ġoi ġerina Barau na evaġa-maġurimito ginitaġo dagarana tu asi berakavani dagarana. Dia silva o golo kavari.

¹⁹ Senaġi evaġa-maġurimito ginitaġo dagarana tu Keriso rarana, rara namo vedaureana, Barau ġena mamoe natuna rarana asi mirona e kererena.

²⁰ Ġia tu Barau na tanobara roġosi bere veia neganai veġata, eġabi-viriġiato. Senaġi ġita vaġa-maġurira ġana mai nega gabiri ai ema vaġa-foforiato.

²¹ Ġia bakunai Barau ġoġabidadama-viniani. Barau na mase ġenana evaġa-varigi-ġenoġoiato, e marevana baregona eviniato. Moġa lorinai ġomi na Barau ġoġabidadama-viniani, ema ġemi tuġamaġikau ġia ġenai ġotoreani.

²² Toma, ġomi na guruġa moġonina ġoseġaġi-viniato lorinai, tauġemi goveiarevato, ema karomi veġabidadama tauri ġesi moġoni ai goveura-vevinini. Moġa lorinai boġono veura-vevini ma nuġami mabarari ġesi.

²³ Korana ġomi tu ġomaġuri-ġenoġoiato, tarima variġu geragerami ai ġoiaġoto, dia tama sina ġerina, ġia tu ġemaseni, senaġi Barau ġena maġuri guruġana, etanu-vanaġi vanaġini guruġana, ġenana evaġa-maġuri ġenoġoimito.

²⁴ Buka Veaġa ekirani kavana,
“Tarimarima mabarari tu reġi kavana,
ġia marevari tu reġi ġwaġwana kavana.

Reġi tu ġemaraini,

ema veravera maki ġeketoni,

²⁵ senaġi Vereġauka ġena guruġa tu
betanu-vanaġi vanaġini.”

Mai guruġa tu Vari Namona ġomi ġemi ai ġevari-fiuato.

2

Vereġauka tu maġuri forena, fore namo vedaureana

¹ Moġa lorinai, tuġamaġi rakavari mabarari, e ġofaġofa mabarari, e vemuriġoi mabarari, e mama, ema guruġa rakavari mabarari boġono fitoġa-kwareġari.

² Vau ġemaġurini mero keiri kavari boġono vei, vanaġivanagi iauka ratana boka-kokena boġono boka-koke, be moġa niuniunai boġono barego e vevaġa-maġuri boġono ġabia.

³ Korana ġomi tauġemi na ġodoġariato, Vereġauka ġena namo tu aiġesina.

⁴ Vereġauka ġenai ġoiaġoma, ġia tu maġuri forena, tarimarima na ġefitoġaiato, korana asi ġena namo ta ġetato. Senaġi Barau na eġabi-viriġiato, korana fore namo vedaureana ġia ġoiranai.

⁵ Maġuri foreri kavana ġoiaġoma, be ġomi maki Barau Iaukana na Rubu Veaġai bene raga-iaġimi. Monai Rubu Veaġa vereri veaġami ai boġono iaġo, ma Barau na Iesu Keriso bakunai eġabi-raġerini iauka varevareri, ġemi maġuri, boġono vinia.

⁶ Korana Buka Veaġa ekirani,
“Au na fore namo vedaureana ta aviriġiato,

ġia tu Sionai (o Ierusalemaj)

duġu forenai avaga-iaġoato.

Dei na ġia bevaġa-moġoniani
tarimana tu asi bemaiaikaiani.”

⁷ Ġovaġa-moġoniani tarimami ġemi ai mai fore tu namo vedaurea, senaġi asi ġevaġa-moġoniani tarimari ġeri ai tu,

“Numa ragaragana tarimari na
asi ġeura-viniato nai ġefitoġaiato,

ġekirato fore rakavana,

dagarana tu fore mabarari fakari ai fore namo vedaureana,

duḡu forenai eiaḡoto.”

⁸ Ma toretore tai ekirani,

“Mai fore na tarimarima bevaḡa-kake-naḡirini,
e bevaḡa-ketorini forena.”

Barau ḡena guruḡa asi ḡeseḡaḡiato dainai, ḡevেকে-kake-naḡito, mo tu Barau na ekiraḡi-guineato, moḡesi beḡe veiani.

⁹ Senaḡi ḡomi tu ḡabi-viriḡi besena, Kini ḡena Rubu Veaḡa veremi, bese veaḡana, Barau ḡena tarimarima. Eḡabi-viriḡimito, mukuna na ekea-rosimito, benamo ḡena mama namo vedaureanai etoremto, korana tu ḡia ḡena veiḡa namori boḡono kiraḡi-foforiri ḡana.

¹⁰ Guinenai ḡomi tu dia Barau ḡena tarimarima, senaḡi toma ḡomi tu ḡia ḡena tarimarima. Guinenai Barau ḡena vevetuḡaḡwa tu asi ribami, senaḡi toma ḡia ḡena vevetuḡaḡwa ḡodoḡariato.

Barau ḡena vetuḡunaḡi tarimari

¹¹ Ḡataḡu mabarami, anoḡi-gwaḡiḡimini, ḡomi tu tarima boru e tanokau tarimami mai tanobarai. Tauḡani ḡena ura rakavari asi boḡono veiri, maniḡeri na vanaḡivanaḡi ḡomi iaukami ḡevetari-vinirini.

¹² Senaḡi Barau asi ribari tarimari ḡoirari ai ḡemi veiḡa beḡene namo. Beḡe rori-toremimi, rakava-vei tarimami ai beḡe kiraḡimimi, senaḡi ḡemi veiḡa namori beḡe ḡitarini neganai, ḡia na Barau beḡe vaḡa-raḡeani, ḡia na tarimarima bekota-vinirini ḡaronai.

¹³ Vereḡauka govaḡa-moḡoniani nai, gavamani ḡeri taravatu mabarari boḡono korana-iaḡiri: Kini boḡono seḡaḡi-vinia, korana ḡia tu varaḡe vedaurea.

¹⁴ E gavana tauri boḡono seḡaḡi-viniri. Ḡia na veiḡa rakava tarimari beḡene vaḡa-rakavari, ema veiḡa namo tarimari beḡene vaḡa-namori ḡana eḡabi-torerito.

¹⁵ Korana Barau ḡena ura tu, ḡomi ḡemi veiḡa namori na asi ribari tarimari ḡeri guruḡa babobabori boḡono lautariri.

¹⁶ Kokore ai boḡono tanu, be dagara ta na asi bene barubarumi, Keriso na eruḡa-vaḡirito tarimari kavana. Senaḡi asi boḡono kira, “Ḡai tu maḡuri namonai e fakanai ḡatanuni, be veiḡa rakavari baḡa veirini tu asi kara ta.” Asiḡina. Barau ḡena vetuḡunaḡi tarimami ai boḡono tanu.

¹⁷ Tarima mabarari boḡono gubakauri. Karomi veḡabidadama tarimari boḡono ura-viniri. Barau boḡono vaḡa-raḡea, e kini boḡono gubakaua.

Keriso kwakuna gabunai boḡono raka

¹⁸ Tuḡu-rakaorakao tarimami asi voimi, ḡitaḡaumi tauri boḡono seḡaḡi-viniri, moḡoni ai boḡono gubakauri, dia veiḡa-namo e garo-namo tarimari moḡo, senaḡi niara-niara tauri maki.

¹⁹ Korana Barau na eura-viniani veiḡana tu maḡa: Barau ḡena ura ḡokorana-iaḡirini dainai, enabe asi ḡemi rakavai beḡe vaḡa-midigu midigumini, senaḡi boḡo vevaḡa-gwaḡiḡini.

²⁰ Ḡemi rakava dairi ai beḡe kwarimimi ma boḡo vevaḡa-gwaḡiḡini, moḡa ḡena namo ḡomi ḡemi ai tu kara? Senaḡi bema veiḡa namori ḡoveini nuḡanai beḡe vaḡa-midigu midigumini ma boḡo vevaḡa-gwaḡiḡini moḡo, Barau ḡoiranai tu namo eḡabi-raḡeani.

²¹ Ḡomi tu moḡesi boḡono vei ḡana, Barau na ekeamito. Korana ḡomi daimi ai Keriso tauḡena emidigu-midiguto, e ḡia na mai vevaḡa-ḡita ḡomi ḡemi ai eraga-kwaneato. Moḡa lorinai ḡomi tu ḡia kwakuna gabunai boḡono raka.

²² Ḡia na rakava ta asi eveiato, e ta na ḡia muruna na ḡofaḡofa guruḡana asi eseḡaḡiato.

²³ Geguruḡa-rakava-viniato, senaḡi guruḡa rakavari na asi evaḡa-voiritto; ḡevaḡa-midigu midiguato neganai, vaḡa-voi guruḡari asi ekiraḡirito. Ḡia ribana, Barau tu vevaḡa-maoro tauna iobukaiobukana, naima ḡia ḡimanai etoreato.

²⁴ Keriso tauḡena tauḡananai ḡita ḡera rakava eḡwa-raḡerito satauro tuḡuna ḡana. Moḡesi eveito tu, vei-rakava ḡenai bitana mase, asi ma bitana vei-ḡenoḡoia, ema vei-iobukaiobuka ḡenai bitana maḡuri, Barau ḡena ura bitana korana-iaḡiri. Boḡono tuḡamaḡi: Ḡia manuḡana dainai, ḡoi onamoto.

²⁵ Ḡomi tu rekwerekwa mamoori kavari ḡoraka-taḡui taḡuito-ḡoi. Senaḡi toma ḡomi tu iaukami nariḡauna e ḡitaḡauna tauna Keriso na ma beḡabi-ḡenoḡoimi.

3

Veḡaraḡo vavinemi ema taumi

¹ Ḡomi veḡaraḡo vavinemi maki moḡesi, ḡaraḡomi gabureri ai boḡono tanu. Moḡesi boḡo veini nai, tari ḡaraḡomi tu Barau ḡena guruḡa asi ḡevaḡa-moḡoniani tauri, senaḡi ḡemi

veiša namori na moĝo nuĝari beĝabirini, benamo beĝe vetuĝamaĝi-kureni; a Barau ĝena guruĝa ta ĝeri tu asi boĝo kiraĝiani.

² Korana ĝemi veiša roroĝotori ema ĝemi vegubakau ĝia ĝeri ai beĝe ĝitarini tu namo.

³ Marevami ĝenamo-vedaurea urari ai tauĝanimi asi boĝono vaĝa-veraverari. Ilailana, ĝuimi ĝovei-iraurini, golo ĝotoreni e dabuĝa namori vedaureari ĝoriĝorini.

⁴ Asiĝina, ĝomi tu lorumi ĝuturi neĝi boĝono vaĝa-veraverari, asi beĝe rakavani veraverari na, manau e nuĝa-namo. Moĝeri tu Barau ĝoiranai dagara baregori.

⁵ Guinenai, ĝita tubura ĝatara ĝeri negai maki vavine veaĝari, Barau ĝenai ĝeveĝabidadamato-ĝoi vavineri, tu moĝesi ĝevevaĝa-marevato-ĝoi, e ĝaraĝori gabureri ai ĝetanuto-ĝoi.

⁶ Sara kavana, ĝaraĝona eseĝaĝi-viniato-ĝoi; ĝaraĝona tu “Ĝegu vereĝauka” etato-ĝoi. Gomi toma tu ĝia natuna, bema ĝemi veiša tu namo e kara ta garina asi ĝoveini.

⁷ Ĝomi tau maki ĝaraĝomi ĝesi ĝotanuni nai, boĝono riba-ginikauri. Boĝono riba, ĝia tu asi fakosiri. Ĝaraĝomi boĝono gubakauri, korana Barau na maĝuri vanaĝivanaĝi tu ĝia e ĝomi bevaŝevare-vinimini. Moĝesi boĝono vei, be dagara ta na ĝemi ĝauĝau-vegogo asi bene vaĝa-rakavari.

Veiša namori ai bitana midigu-midigu

⁸ Guruĝa vaĝa-magona maiĝa: Mabarami nuĝami boĝono vaĝa-sebonari, boĝono vevaĝa-kava-vevini, e boĝono veura-vevini tarikaka kavari. Boĝono vevetuĝaĝwa-vevini e boĝono marana.

⁹ Veiša rakavari e garo rakavari asi boĝono vevaĝa-voi-vevini, senaĝi ĝevaĝa-rakavamini tarimari boĝono vaĝa-namori. Korana Barau na ekeamito tu moĝesi boĝono vei, benamo ĝomi na maki ĝena vevaĝa-namo boĝono ĝabia.

¹⁰ Korana Buka Veiša ekirani,

“Deikara maĝuri eurani e ĝaro namori bene ĝitari etoni tarimana tu meana bene naria, guruĝa rakavari asi bene kiraĝi,

e muruna na ĝofaĝofa guruĝari asi bene kiraĝiri.

¹¹ Rakava bene raga-kwanea,

veiša namori bene vei.

Maino bene vetaua nuĝana mabarana ĝesi.

¹² Korana Vereĝauka na tu vei-iobukaiobuka tarimari eĝita-ĝaurini,

e ĝeri ĝauĝau eseĝaĝirini.

Senāĝi vei-rakava tarimari tu

Vereĝauka na asi eura-vinirini.”

¹³ Veiša namori bouravini-baregorini nai tu, dei na ĝoi bevaĝa-rakavamuni?

¹⁴ Senāĝi irau beĝe vaĝa-mididqu midigumini ĝemi vei-iobukaiobuka dairi ai nai tu boĝono iaku. Tarima ta garina asi boĝono vei, e asi boĝono daradara.

¹⁵ Senāĝi nuĝami ai Keriso boĝono korana-iaĝia, boĝono vaĝa-raĝea, ĝia tu ĝomi ĝemi Vereĝauka. E vanaĝivanaĝi boĝono venari-taĝo, bema ta na bedanaĝimini, “Kara dainai Keriso ĝogabidadama-viniani” betoni nai, ĝena boĝono kiraĝi-ginikau.

¹⁶ Senāĝi manau ai e vegubakau ai ĝena boĝono kiraĝi-ginikau. Ĝemi veiša loriri boĝono toreri, asi namo gabivau boĝono riba ĝomi tu asi maoro. Keriso murinai ĝorakani ma veaĝami ĝesi dainai, ĝemugumugu-iaĝimini e rakavami ĝekiraĝini tarimari tu tauĝeri roĝo beĝe maiakarini.

¹⁷ Barau ĝena urai veiša namori ĝoveini dairi ai ĝomidigu-midiguni nai tu namo. A asi namo ĝemi veiša rakavari dairi ai boĝono midigu-midigu.

¹⁸ Keriso emaseto, ĝera rakava bene voi-vaĝiri ĝana. Ĝia tu nega sebona moĝo emaseto, asi ma bemaseni. Ĝia tu vei-iobukaiobuka tauna, ĝita rakava tarimara bene kurevora, be Barau ĝenai bene ĝori-iaĝora ĝana. Tauĝani maĝurinai tu ĝevaĝi-maseato, senāĝi iauka maĝurinai ĝia tu evariĝisi-ĝenoĝoito.

¹⁹ E iaukai ĝia eiaĝoto mase gabuna o dibura ĝana, monai ĝetanuni tarimari iaukari ĝeri ea ĝobatato.

²⁰ Ĝia tu guinenai ĝekira-sirivaĝito tarimari, Noa na ĝasi baregona eveiato neganai, benamo Barau na evaĝa-nogarito ma vevaĝa-gvaĝiĝina ĝesi, (ĝeri rakava ĝerina beĝene vetuĝamaĝi-kure ĝana). Senāĝi ĝasi baregona nuĝanai ĝeraka-toĝato tarimari tu asi ĝutuma. Tauri mabarari tu imaima toitoi (8) moĝo nanu na evaĝa-maĝuririto.

²¹ Mo nanu moĝa tu babatiso vetoĝana kavana, korana babatiso na toma ĝomi evaĝa-maĝurimini, dia tauĝani mirona ĝuriĝi-vaĝina, senāĝi Barau ĝonoĝiani nuĝami bene iarevari ĝana Barau ĝoiranai. Iesu Keriso mase na evaĝa-varigisi ĝenoĝoiato bakunai evaĝa-maĝurimini.

²² Ĝia tu gubai eraka-toĝato, Barau aroribana rekenai etanuni. Aneru, e ma ĝeri maoro baregona iaukari, ema seĝuka tauri mabarari tu ĝia gaburenai ĝetanuni.

4

Ekalesia maĝurina

¹ Keriso tu tauĝaninai emidigu-midiguto lorinai, ĝomi maki ĝemi tuĝamaĝi boĝono vaĝa-gwaĝigiri, ĝia ĝena tuĝamaĝi ĝesi beĝene ilaila; korana tauĝaninai emidigu-midiguni tarimana na veĝa rakavari eraga-kwanerini.

² Tauna moĝa, ĝomi roĝo mai tanobarai ĝotanuni nuĝanai tu, tauĝanimi ĝeri ura rakavari asi boĝono korana-iaĝiri, a Barau ĝena ura neĝi boĝono korana-iaĝia.

³ Gomi tu kai-vegata Barau asi ribari tarimari ilailari ai ĝotanuto-ĝoi, mata-boraĝa e veĝura-vanaĝi veĝari ĝoveito-ĝoi, ĝoniu-lelevaĝito-ĝoi, ĝovei-taĝuitaĝuito-ĝoi, ĝoniu-vegogoto-ĝoi, e barau ĝofaĝofari ĝotoma-rakarigo vinirito-ĝoi.

⁴ Toma, ĝia tu ĝeveiauni, korana ĝia ĝesi asi ĝovekakoni, e asi ĝovei-taĝuitaĝuini. Moĝa lorinai rakavami ĝekiraĝini.

⁵ Senaĝi ĝia tu maĝuri tarimari e mase tarimari vaĝa-maoro-viniri Barauna ĝoiranai beĝe ritoĝoni, ĝeri veĝa moĝeri beĝe kiraĝirini.

⁶ Moĝa lorinai Iesu na Vari Namona tu ĝemaseto tarimari iaukari ĝeri maki evari-fuato. Moĝesi eveito korana tu, enabe Barau na tauĝani ai evaĝa-maoro vinirito tarimarima mabarari kavana, (mai tu ĝemaseto), senaĝi iaukai tu roĝo beĝe maĝurini, Barau emaĝurini kavana.

Barau ĝena varevare dagarari ĝitaĝauri tarimari namori

⁷ Dagara mabarari maĝori tu bekavinaĝi. Boĝono venari-taĝo e boĝono vevaĝa-gwaĝigĝi, be ĝemi ĝauĝau asi boĝono vaĝa-ketoa.

⁸ Barego vedaureana tu, tata boĝono veura-vevini ma nuĝami mabarari ĝesi, korana veura-vevini na rakava ĝutuma elautaririni.

⁹ Karomi tata ĝesi veĝa namori boĝono vei-vevini, boĝono veĝabiraĝe-vevini, asi boĝono vemugu-mugu e veroritore.

¹⁰ Gomi tata mabarami tu, Barau na evaĝa-ĝaunamito varevare dagarari irauirau ĝitaĝauri tarimami namomi, moĝa lorinai karomi dairi ai boĝono ĝauvei-iaĝiri, kamara varevare dagarana Barau ĝenana ĝodoĝariato ilailanai.

¹¹ Deikara eĝobatani nai, ĝia tu Barau ĝena guruĝa bene vari-fiua. Deikara evevaĝa-kavani nai, ĝia tu Barau ĝena kokore na bene vevaĝa-kava. Mo dabarai dagara mabarari nuĝari ai Barau bita vaĝa-raĝeani, Iesu Keriso bakunai. Mareva namona e seĝuka tu ĝia ĝena, bene iaĝo mo vanaĝivanaĝi. Amen.

Ekalesia midigumidiguna

¹² Ĝatagu mabarami, midigumidigu karava mamiri noĝa ĝoĝabini nai tu, nuĝami asi beĝene farevaĝi, asi boĝono kira, dagara boruna ta ĝemi ai eĝorani. (Asiĝina, mani tu ĝomi tovenaĝimi dagarana moĝo).

¹³ Senaĝi Keriso emidigu-midiguto kavana ĝomidigu-midiguni dainai, boĝono iaku, gabivau ĝia marevana baregona bevaĝa-foforiani neganai vau ma boĝo iaku-sirivaĝini.

¹⁴ Keriso murinai ĝorakinai nai, rakavami beĝe kiraĝini neganai, boĝono iaku, korana monana boĝo ribani, Barau Iaukana, mareva-namo Iaukana, tu ĝomi iatami ai etanuni.

¹⁵ Bema ĝomi ta omidigu-midiguni nai, mani midigumidigu tu dia ovevaĝi-debani, o olemani, o seĝafore veĝana rakavana ta oveiani, o tarima ta ĝena ĝauvei metona oveiani nai omidigu-midiguni.

¹⁶ Senaĝi bema ĝoi tu Keriso murinai orakani dainai omidigu-midiguni neganai, asi bene maiakamu, senaĝi Barau bono vaĝa-raĝea, Keriso arana oĝwa-rakaoani nai.

¹⁷ Barau ĝena vevaĝa-maoro negana tu varau beraĝasi, e vevaĝa-maoro tu Barau ĝena tarimarima ĝeri ai bevesinani. Bema ĝita ĝerai bevesinani neganai, Barau ĝena Vari Namona asi ĝevaĝa-moĝoniani tarimari ĝeri ai tu kamasi bea ĝorani?

¹⁸ Korana Buka Veaĝa ekirani,

“Maĝuri ĝabiĝabina Barau ĝeseĝaĝi-viniani tarimari ĝeri ai tu gwaĝigĝi.

O Barau asi ĝevaĝa-moĝoniani e vei-rakava tarimari dabarari tu

kamasi bevetoreni? (Ĝia ĝeri ai tu meto lelevaĝi!)”

¹⁹ Tauna moĝa, Barau ĝena ura lorinai midigu ĝeĝanini tarimari tu veĝa namori moĝo beĝene vei, ema ĝeri maĝuri tu eveirito Barauna ĝimana nuĝanai beĝene toreri, korana ĝia na etuĝamaĝi-kaurini.

5

Ekalesia gorikauna tarimari

¹ Au na gomi fakami ai ekalesia gorikauna taumi avaga-guruḡamini. Au maki ekalesia gori-kauna taugu. Keriso emidigu-midiguto-goi au tu matagu na aḡitaiao, e ḡia marevana baregona bevaḡa-foforiani neganai, au tu ma augu. Moḡa lorinai au na ḡomi anoḡi-ḡwaḡḡimini:

² Barau ḡena mamoe serina boḡono ḡitaḡau-ginikaua. ḡia na ḡomi evinimito tu, nuḡami na eura-iaḡiani lorinai boḡono ḡita-ḡaua, ḡia ḡena ura ilailanai. Dia mugumugu ai, senaḡi nuḡami na eura-iaḡiani lorinai. Dia moni o farefare boḡono doḡari ḡana, senaḡi nuḡami ḡeri urai.

³ Barau na ḡomi ḡemi veḡitaḡau gaburenai etoreato mamoe serina (o ekalesia doḡorona) asi boḡono dori-naḡinaḡia noḡa moḡo vere baregori ḡevini kavana. Senaḡi ḡomi marevami boḡono vaḡa-ḡitari, be beḡene tovtovomi.

⁴ Moḡesi boḡo veini nai, mamoe ḡitaḡauri Tauna Baregona, Keriso, beḡoira-refoni ḡaronai, korona namo vedaureana, asi berakavani dagarana, boḡo ḡabiani, mo tu maḡuri vanaḡivanaḡi.

⁵ Moḡa ilailanai, ḡomi tarima variḡumi maki veḡitaḡau tauri boḡono seḡaḡi-viniri, ma ḡomi mabarami na manau dabuḡana boḡono vedabuḡa-iaḡia, boḡono vevaḡa-kava-vevini, korana Buka Veḡa ekirani, “Veiavi tarimari tu Barau na elautaririni, senaḡi manau tarimari tu ḡena namo e varevare-bara evinirini.”

⁶ Moḡa lorinai, tauḡemi boḡono vevaḡa-manau, Barau ḡimana seḡukana gaburenai, benamo ḡarona bene raḡasi neganai, ḡia na bene ḡabi-vaisimi.

⁷ Gemi nuḡa-vekwaraḡi dagarari mabarari ḡia ḡimanai boḡono toreri, korana ḡia na eḡita-ḡaumi.

⁸ Boḡono tuḡamaḡi-roroḡoto, boḡono venari! Korana vaḡa-rakavami tauna, Diabolo, tu erakao-rakaoni, laion noḡa emagarani, emaramarani, ta neḡania uranai.

⁹ Gemi veḡabidadamai boḡono ruḡa-gigitari, benamo Diabolo boḡono kora-ḡoia. Korana boḡono tuḡamaḡi, ḡoḡanini midiguri ilailari tu ḡomi karomi tanobara mabarana maki ḡeḡanini.

¹⁰ Senaḡi Barau, namo e varevare-bara mabarari na evonuto Barauna, na Keriso bakunai ekeamito, nega kotunai moḡo boḡo midigu-midiguni murinai, ḡena tanu-vanaḡivanaḡi marevana namona boḡono ḡabia ḡana. ḡia na vau bevaḡa-namo ginikaumini, bevaḡa-ruḡa gigitarimini, e bevaḡa-kokoremini.

¹¹ Seḡuka tu ḡia ḡena, bene iaḡo vanaḡivanaḡi! Amen.

Vevaḡa-namo magona

¹² Siluano, (mai tu Silas), na bevaḡa-kavagu, mai fefa kubina baḡa tore-iaḡosia ḡomi ḡemi. ḡia au na aḡitaiani tu, ḡita tarikakara ma ḡena vetuḡamaḡikau ekalesia nuḡanai. Mai fefa batorea korana tu ḡegu ura bana vaḡa-kokoremi e bana vaḡa-ribami, Barau ḡena namo e varevare-bara moḡonina tu maiga. Be mai namo e varevare-bara nuḡanai boḡono ruḡa-gigitari.

¹³ Gomi karomi ekalesia tarimari Babulona ai maiḡeri, (mai tu ekalesia tarimari Romai ekiraḡirini), ḡia maki Barau na eḡabi-viriḡirito tarimari, na ḡemi vevaḡa-namo beḡe tuḡu, e natugu Mareko na maki ḡemi vevaḡa-namo betuḡu.

¹⁴ Veuravini verauna na boḡono vevaḡa-namo-vevini.

Keriso nuḡanai ḡotanuni tarimami mabarami maino ḡemi ai bene tanu.

PETERO ĜENA TORETORE VAĜA-RUARUANA

2 Petero vaĝa-foforina guruĝari

Petero na mai fefa vaĝa-ruaruana maki betaĝu Roma na etoreato. Etoreato laĝanina tu 65 ma 67 fakari nuĝanai ta, mo tu Iesu emaseto murinai. Petero tu mai fefa etoreato murinai vauro ĝebaru-seiriĝoato, benamo ĝevaĝiato.

Mai fefa nuĝanai siri baregori tu karoa 3:17-18.

Petero na mai fefa etoreato tauna korikori tu, 1) Barau ĝena tarima veaĝari bene vaĝa-naĝiri, be Barau korana-iaĝina veigari korikori beĝene veiri ĝana; 2) vevaĝa-riba tarimari ĝofaĝofari na beĝe ĝofa-darererini garina ekira-toreĝaurito; 3) riba korikorina Barau ĝenana eiagomani tu aiĝesina ema Satani na riba ĝofaĝofana evaĝa-raka-rosiani ribana tu aiĝesina, moĝeri ekiraĝi-foforirito; 4) Vereĝauka ĝena ĝaro ai Kota baregona bevegabini moĝa ekiraĝi-fofori ĝinikauato.

Petero na mai fefa tu maiĝesina eboiĝaiato:

1. Barau ĝenana eiagomani ribana korikorina tu kamasina - karoa 1
2. Riba moĝonina na boraka-veĝitani tu kara rakavana beĝorani - karoa 2
3. Barau ĝena kiraĝitore moĝoniri - karoa 3

¹ Au, Simona Petero, Iesu Keriso ĝena vetuĝunaĝi ema ĝena apostolo tauĝu; ĝeguna mai fefa eiagosini.

Ĝomi ĝai ĝesi ĝera veĝabidadama sebona taĝabiato tarimami atore-vinimini. Ĝera Barau, ĝera Vevaĝa-maĝuri Tarimana Iesu Keriso, ĝena vei-iobukaibuka e vetuĝamaĝikau lorinai, ĝomi maki mo veĝabidadama namo vedaureana sebona ĝoĝabiato ĝai apostolo kavana.

² Ĝemi riba e tuĝamaĝi-faka Barau ĝenai ema ĝera Vereĝauka Iesu Keriso ĝenai beĝene barego. Monana vau vevare-bara e maino maki ĝemi ai beĝene barego.

Barau na ekeamito ĝia ĝena

³ Ĝena seĝuka na Iesu Keriso na ĝera maĝuri vaĝa-kokoreri dagarari mabarari varau evinirato, Barau ĝena ura bitana korana-iaĝi korikoriri ĝana. Korana Keriso ĝenana Barau tama ribaiato, ĝena mareva baregona e namo ĝerina ekearato tarimana.

⁴ Ĝena mareva baregona e namo ĝerina ĝena kiraĝitore baregori e namo vedaureari varau evinirato vaĝa-ilailana: Mai tanobara ĝena ura rakavari ema mase ĝevaĝa-ĝorarini veigari ĝerina bene vaĝa-maĝurira, ma Barau maĝurina korikorina bitana ĝabia.

⁵ Moĝa lorinai boĝono kokore, ĝemi veĝabidadama ĝenai veigā namo boĝono torekau; veigā namo ĝenai tuĝamaĝi-maĝata boĝono torekau;

⁶ tuĝamaĝi-maĝata ĝenai nuĝa-gwaĝiĝi boĝono torekau; nuĝa-gwaĝiĝi ĝenai vevaĝa-gwaĝiĝi boĝono torekau; vevaĝa-gwaĝiĝi ĝenai Barau korana-iaĝina boĝono torekau.

⁷ Barau korana-iaĝina ĝenai tarikakami veuraviniri boĝono torekau; ema tarikakami veuraviniri ĝenai veuravini tarimarima mabarari ĝeri ai boĝono torekau.

⁸ Maĝeri maĝuri tu ĝomi ĝemi ai beĝene tanu, ema beĝene barego, korana maĝeri na ĝomi beĝe launagi-naĝimini ema beĝe vaĝa-kokoremimi, benamo ĝemi riba Iesu Vereĝauka ĝenai tu asi beĝe tanu-kavani, senaĝi ĝwaĝwari namori vovoka beĝe vetoreni.

⁹ A bema maĝeri maĝuri ai erabuni tarimana, ĝia tu mata-bubu tarimana kavana, korana Barau na ĝena veigā rakavari guineri varau eĝurigi-fitoĝarito evetuĝarekwani.

¹⁰ Moĝa lorinai, tarikakagu, boĝono kokore, Barau na ekeamito e eviriĝimito maniĝa boĝono vaĝa-moĝonia. Moĝesi boĝo veini nai tu, asi boĝo ketoni.

¹¹ Moĝesi boĝo veini nai, Barau na beĝabiraĝe-ĝinikaumini, benamo ĝera Vereĝauka e Vevaĝa-maĝuri Tarimana Iesu Keriso ĝena tanu-vanaĝivanaĝi Basileiana nuĝanai boĝo raka-toĝani.

¹² Mo maĝuri namona tu ĝomi ĝoirami ai enarimini, moĝa lorinai au na ĝomi vanaĝivanaĝi basisiba-vini ĝenoĝoi-ĝenoĝoimimi. Moĝoni, maĝeri dagara mabarari varau ĝoribarito, ema Barau ĝena guruĝa moĝonina ĝoĝabiato ema ĝoĝabi-gigitariani maki.

¹³ Senaĝi au atuĝamaĝini, mai dabara namori ĝomi tu ĝemi vetuĝamaĝi-taĝo ai bana vaĝa-foforiri, au roĝo amaĝuri-taĝoni nuĝanai.

¹⁴ Korana au ribagu, au tauganigu korina tu dori atore-tariani, ĝita ĝera Vereĝauka Iesu Keriso na evaĝa-guruĝaguto ilailanai.

¹⁵ Moĝesi naima ĝegu ura mai dagara mabarari bana sisiba-vini ĝinikaumi. Benamo ĝegu mase murinai, ĝomi na boĝono tuĝamaĝi-taĝo vanaĝi-vanaĝiri ĝana.

Iesu marevana baregona matama na ĝaĝitaiato

¹⁶ Ĝai tu dia sinasina ĝofaĝofari na ĝita ĝera Vereĝauka Iesu Keriso ĝena seĝuka ema ĝena iaĝoma-ĝenoĝoi ĝomi ĝavaĝa-ribamito. Asiĝina! Ĝai tauĝema matama na ĝia marevana baregona ĝaĝitalato.

¹⁷ Ĝai matama ĝutuĝutunai Barau ĝita Tamara na ĝia ara baregona ema mama ma seĝukana eviniato. Mo mama baregona nuĝanai etanuni Barauna guba na ekea-riĝoto Iesu ĝenai, ekirato, “Mai tu au Natugu, aura-viniani; ema ĝia ĝenai aiaku-rakavani maki.”

¹⁸ Ĝai tauĝema na ĝaseĝaĝiato, mai garo guba na emariĝoto, ĝia ĝesi ĝoro veaĝanai ĝatanuto-ĝoi nai.

¹⁹ Moĝa lorinai ĝai tu peroveta tarimari na ĝekiraĝi-torerito guruĝari ĝaĝabi-gigitaririni. Ĝomi maki moĝeri guruĝa boĝo korana-iaĝirini tu namo, korana peroveta tarimari ĝeri guruĝa tu lamefa kavana, gabu mukunai emamani, beiaĝoni mo nega beaĝasini, Keriso, laĝani visiĝuna ĝomi nuĝami ai bemama-rovorovoni.

²⁰ Moĝeri mabarari iatari ai ini guruĝa asi boĝono tuĝarekwaia: Tarima ta ĝia ĝereĝana ĝena ribai peroveta guruĝari tauri asi bekiragiĝirini.

²¹ Korana peroveta guruĝari tu dia tarimarima ĝeri ura na ĝeiaĝomato, senaĝi Iauka Veaĝa na tarimarima evaĝa-naĝirito lorinai, ema guruĝa evinirito ilailanai, Barau ĝena guruĝa ĝeperoveta-iaĝirito-ĝoi.

2

Vevaĝa-riba tarimari ĝofaĝofari

¹ Guinenai peroveta tarimari ĝofaĝofari tu Isaraela tarimari fakari ai ĝefoforito-ĝoi. Mo dabara sebonai vevaĝa-riba tarimari ĝofaĝofari maki ĝomi fakami ai beĝe foforini. Ĝia na vekuretoĝai vevaĝa-riba ĝofaĝofari beĝe vaĝa-ribamini, ĝemi veĝabidadama vaĝa-rakavari uranai. Ema ĝeri Vereĝauka, evoirito tarimana, maki ĝia na beĝe ruĝaiani; moĝesi beĝe veini, ĝia tauĝeri na ĝeri mase beĝe vaĝa-ĝarimogiĝani.

² Ĝutuma na maki ĝia ĝeri veiĝa rakavari e mata-boraĝa veiĝari beĝe tovtovorini, moĝeri urari ai kotari na dabara mogonina tu dabara rakavanai beĝe kiragiĝani.

³ Ĝeri mata-ĝaniĝani ĝerina guruĝa ĝofaĝofari na nuĝami beĝe ĝanirini, beiaĝoni mo beĝea ĝabimini. Senaĝi ĝia tu kai-veĝata na vevaĝa-maoro-viniri tarimana tu enari-taĝoni, ema ĝia vaĝa-maseri tarimana tu eĝita-taĝorini.

⁴ Barau na ĝevei-rakavato aneruri maki asi evaĝa-maĝuririto, senaĝi rakava gabunai efiu-riĝorito. Monai seini na ebarubarurito mukuna furufuru nuĝanai, vevaĝa-maoro ĝarona ĝevaĝa-nogaiani.

⁵ Ema Barau na tanobara guinena maki asi evaĝa-maĝuriato, senaĝi ĝutuĝutu evaĝa-foforiato tu Barau asi ĝekorana-iaĝiato-ĝoi tarimari ĝeri ai; a Noa, vei-iobukaiobuka eĝobata-iaĝiato-ĝoi tarimana, ema tarima imaima ruarua (7) moĝo ĝia ĝesi evaĝa-maĝuririto.

⁶ Barau na Sodoma e Gomora maki evaĝa-maoro vinirito, karava na evaĝa-ĝara ĝosirito, kau ai ĝeiaĝoto. Mo veiĝa ĝenana Barau asi ĝekorana-iaĝiani tarimari matari bene vaĝa-kaniri ĝana.

⁷ A Lota moĝo eĝabi-maĝuriato, ĝia tu vei-iobukaiobuka tarimana, ĝia maki tarimarima ĝeri veiĝa rakavari e boraĝari tuĝamaĝiri ai eĝauto.

⁸ Mo tarima iobukaioubukana tu rakava tarimari fakari ai etanuto-ĝoi, ĝaro vanaĝivanaĝi enuĝa-midigu midiguto-ĝoi, korana ĝia na Barau ĝena taravatu kira-fitoĝari veiĝari eĝitarito-ĝoi ema eseĝaĝirito-ĝoi nai.

⁹ Boĝono tuĝamaĝi, Vereĝauka na tu ĝia ĝekorana-iaĝiani tarimari veribaĝani e vedaĝaraĝe nuĝari na beĝabi-maĝuririni riba, a vei-rakava tarimari bebiri-ĝaurini, beiaĝoni mo, Barau na bevaĝa-maoro vinirini ĝaronai.

¹⁰ Ma tarima kotari na rakava voina barego lelevaĝina beĝe doĝariani, mai tu tauĝanina ĝena ura boraĝari ĝeiaĝo-vinirini tarimari ema Barau ĝena guruĝa ĝekira-fitoĝaiani tarimari.

Mai vevaĝa-riba tarimari ĝofaĝofari tu veiavi e vekiraĝi-rakava rakava tarimari, iauka baregori asi ĝegubakaurini, ĝerikiriki-iaĝirini.

¹¹ Aneru tu kokore e seĝuka lelevaĝi, mai ĝofaĝofa tarimari ĝeri seĝuka ĝevanaĝirito, senaĝi aneru na iauka baregori tu asi ĝevaĝa-daĝarini e asi ĝevei-veĝare veĝarerini Vereĝauka ĝoiranai.

¹² A maiĝeri tarimarima tu asi ĝetuĝamaĝini, ĝeri vemamiraĝi na moĝo ĝeĝori-kaurini, noĝa moĝo boĝa bairi kavana, ĝemaĝurini tu beĝene vaĝiri moĝo ĝana kavari. Asi ĝeribarini dagarari ĝerikiriki-iaĝirini. Moĝa lorinai ĝia tu mo boĝa bairi kavari beĝe vaĝa-rakavarini e beĝe rekwarekwani.

¹³ Geri veiga rakavari voiri bege gabirini. Tauḡaniri vaḡa-iahuri veigari laḡani matabarai geveirini, asi gemaiaharini. Moḡeri tarima ḡomi ḡemi ḡanivegogo ḡoveirini nai, ḡia tu miro noḡa ḡomi fakami ai; korana ḡeri vevaḡa-riiba ḡofaḡofari tu ḡemi ḡanivegogo ai maki ḡekiraḡirini.

¹⁴ Vavine ta ḡeḡitaiani nai, mata-boraḡa tuḡamaḡiri moḡo ḡeveini; rakava veiveiri ai asi ḡegauni. Vegabidamari roḡosi beḡene ḡwaḡiḡi tarimari ḡevaḡa-toḡarini. ḡia nuḡari tu mata-ḡanigani ai ḡevaḡa-maranarito. Barau na ḡeri rakava voiri bevinirini veḡata.

¹⁵ ḡia na dabara maorona beḡe raga-kwanea, ḡeraka-taḡuitaḡuini, Balam, Beoro natuna, eveito kavana. ḡia tu moni uranai veiga rakavari eveirito-ḡoi.

¹⁶ Senaḡi ḡena veiga rakavari lorinai, doniki na evaḡa-guruḡaiato. Doniki tu asi guruḡa ribana, senaḡi tarimarima ḡarori ai evaḡa-guruḡaiato, naima mo tarima ḡena veiga babori veiveiri evaḡa-dokoato.

¹⁷ Moḡeri tarima tu nanu guriri kakorori kavana; ema magube iavara na ekwari-rakaorakorini kavana. Barau na mukuna furufuru gabuna ḡeri etoreato.

¹⁸ ḡeguruḡa-kavani ema ḡeveiavi-kavani, ma tarima kotari tu vau moḡo dabara moḡoninai asi ḡerakani tarimari fakari na ḡeraka-veḡitani, senaḡi ḡia na tu tauḡanina ḡena ura rakavari e mata-boraḡa veigari na ma ḡema-gagare-ḡaurini.

¹⁹ Tarima ḡeḡofarini, ḡekirani, maḡuri namona e fakana beḡe doḡariani ḡetoni, senaḡi ḡia tauḡeri tu ḡeri ura rakavari vetuḡunaḡiri ḡeiaḡo-vinini. Korana tarimarima tu veiga rakavana ta na eboroḡiani nai, ḡia tu mo veiga rakavana ḡena tuḡu-rakaorakao tarimana.

²⁰ Moḡoni, ḡia na ḡita ḡera Vereḡauka e Vevaḡa-maḡuri Tarimana Iesu Keriso ḡema-riibaioato dainai, tanobara ḡena miro e vei-rakava ḡenana ḡeraka-veḡitato; senaḡi moḡa murinai bema rakavana nuḡanai ma ḡeraka-toḡani, benamo ḡena seḡuka gaburenai ma ḡetanuni neganai, ḡia ḡeri maḡuri tu berakava-kwaikwaini dokonai, dia tovtovonai kavana.

²¹ ḡia tu dabara roroḡotona asi ḡere riba-guinea tu namo, a asi namo, ḡeribaioato murinai, taravatu vevaḡana, ḡeḡabiato dagarana, ma ḡeruḡa-dogemuriḡiani.

²² Moḡesi ḡeveini nai, ḡia na mai veḡausina o sisiba guruḡari ruarua maigeri ḡevaḡa-moḡonirini, ekirani, “Kwaiva na emumuta-vagiiani dagarana ma ea ḡani-ḡenoḡoiani,” ema, “ḡevaḡa-fouani baina tu ma eḡenoḡoini, ea vedokurani.”

3

Iesu Keriso ḡena ḡenoḡoi

¹ ḡatagu mabarami, maitoma tu fefa vaḡa-ruaruana mai atore-vinimini. Mai fefa ruarua ḡerina, au na ḡomi nuḡami ai tuḡamaḡi roroḡotori bana vaḡa-variḡu ḡenoḡoiri atoni.

² Au aurani peroveta vevaḡari na ḡekiraḡirito guruḡari guineri laḡaniri ai boḡono tuḡamaḡi-taḡori, ema apostolo tarimari na ḡera Vereḡauka e Vevaḡa-maḡuri Tarimana ḡena vevaḡa-naḡi ḡekira-varamito guruḡari maki.

³ Guine tu, ḡomi boḡono riba-maoro: ḡaro dokori ai vei-ḡareḡare tarimari beḡe foforini, ḡeri ura rakavari na beḡe guine-iaḡirini. ḡia na beḡe rikiriki-iaḡimini,

⁴ beḡe kirani, “Keriso eguruḡa-toreto, ma beḡenoḡoi-iaḡomani etato, nene? Be ḡia tu ainai? ḡita tamara ḡevaḡa-noga-kavato, kai-veḡata ḡemaseto, senaḡi dagara mabarari tu tanobara evesinato kavana roḡo gaburi ai ḡetanuni!”

⁵⁻⁶ Maigeri tarima asi ḡeurani mai guruḡa maiga beḡene seḡaḡia: Barau na tanobara guinena ḡutuḡutu nanuna na evaḡa-rakavaiaato. A guba e tanobara tu tovtovonai veḡata ḡena guruḡa ḡenana eveirito, ma tanobara tu nanu nuḡana na emaraḡeto ema nanu na etanu-ḡeḡeraḡiato.

⁷ Ma inītoma guba e tanobara roḡo ḡetanuni tu, Barau ḡena guruḡa sebona na eḡabi-taḡorini, karava na vau bene vaḡa-rakavaia tuḡamaḡinai. Barau asi ḡekorana-iaḡiani tarimari vaḡa-roroḡotori ema vaḡa-mouri ḡaronai vau bevaḡa-rakava sebonarini.

⁸ ḡatagu mabarami, mai dagara sebona asi boḡono tuḡarekwaia: Vereḡauka ḡenai taimi tu irau, ḡita ḡerai tu irau, korana ḡia ḡenai ḡaro sebona tu laḡani 1,000 kavana, ema laḡani 1,000 tu ḡaro sebona kavana.

⁹ Vereḡauka na ekiraḡi-torerito dagarari veiveiri ai tu asi ekwaiboni, tarima kotari ḡetuḡamaḡini kavana. Asigina, ḡia ḡomi ḡemi ai tu evevaḡa-ḡwaḡiḡini, korana ḡia asi eurani tarima ta bene rekwarekwa, senaḡi eurani mabarara ḡera rakava ḡerina bitana vetuḡamaḡi-kure ma bitana raka-kure.

Guba tanobara beḡe rekwarekwani

¹⁰ Senaḡi Vereḡauka ḡena ḡaro beraḡasini tu lema tarimana ta eraḡasini kavana. Mo ḡaro ai guba beḡe rekwa-rekwani ma gurugururi ḡesi. Gubai ḡetanuni dagarari mabarari

karava na bevaḡa-ḡara ḡosirini, ema tanobara ma iatanai ḡetanuni dagarari mabarari beḡe rekwa-rekwani.

¹¹ Boḡono tuḡamaḡi, maiḡeri dagara mabarari tu maiḡesi dabaranai beḡe rakavani, be ḡomi tu kamasi boḡono tanu ḡotoni? Gomi ḡemi maḡuri tu beḡene veaḡa ema Barau ḡena ura boḡono korana-iaḡiri.

¹² Barau ḡena ḡaro boḡono naria, ema ḡena raḡasi boḡono vaḡa-ḡarimoḡia. Mo ḡaro ai guba beḡe ḡararini e beḡe rakavani, ema gubai ḡetanuni dagarari seḡukana na bevaḡa-veverini.

¹³ Senaḡi ḡita tu Barau na ekiraḡi-toreato dagarana tavaḡa-nogaiani, guba e tanobara variguri, monai veḡa roroḡotori beḡe tanuni gabuna.

Velaunaḡi e vevaḡa-namo guruḡari

¹⁴ Moḡa lorinai, ḡatagu mabarami, alaunaḡimini, mo ḡaro ḡovaḡa-nogaiani nuḡanai, asi miromi e asi ḡemi kerere ta boḡono tanu Barau ḡoiranai, ema ḡia ḡesi maino ai boḡono tanu.

¹⁵ Gera Vereḡauka ḡena vevaḡa-gwaḡiḡi boḡono tuḡamaḡia, ḡia tu ḡomi evaḡa-nogamini bene ḡabi-maḡurimi tuḡamaḡinai. Barau na ḡita tarikakara namona Paulo iaunega eviniato, benamo ḡia na moḡesi ilailanai etore-vinimito.

¹⁶ ḡia ḡena fefa mabarari ai maki maniḡa ekiraḡiani. Dagara kotari ḡena fefa nuḡari ai tu gwaḡiḡi rakava, asi ribari tarimari ema ḡeri veḡabidadama asi gwaḡiḡi tarimari na ḡevevaḡa-riba-iaḡi ḡofaḡofarini. Buka Veaḡa nuḡanai maki toretore mabarari moḡesi ḡeḡofaḡofa-iaḡirini. Moḡesi ḡeveini nai, tauḡeri ḡeri maḡuri ḡevaḡa-rakavarini.

¹⁷ Senaḡi ḡomi, au ḡatagu namomi, tu varau ma ribami, maiḡeri dagarai lorimi boḡono vetore, be taravatu asi ḡekorana-iaḡiani tarimari na asi beḡene ḡofa-dareremi, ḡemi veḡabidadama namori na boḡo keto-firiḡoni garina.

¹⁸ A ḡita ḡera Vereḡauka e Vevaḡa-maḡuri Tarimana Iesu Keriso ḡena namo e veuravini ḡerai etoreani moḡa boḡono vaḡa-tubua-ḡoi, ema ḡia boḡono riba-ginikaua. ḡia marevana bisini vaḡa-raḡea toma bene iaḡo vanaḡivanaḡi! Amen.

IOANE ĜENA TORETORE GINIGUINENA

1 Ioane vaĝa-foforina guruĝari

Ioane na mai fefa giniguinena maĝa tu dia ekalesia ta ĝena o ekalesia doĝorona ta ĝena etoreato. Asigi. Mai tu irau bese ekalesia doĝorori tari, ema Keriso ĝevaga-moĝoniato-goi gabu mabarari ai ĝetanuni tarimari ĝeri. Ioane ĝena Vari Namona, e Ioane ĝena fefa toitoi, ema Apokalupo tu ĝia na etorerito. Ioane na mai fefa tu laĝani 85 ma 100 fakari nuĝanai ta etoreato, mo tu Iesu maki emaseto murinai vau.

Mai fefa nuĝanai siri baregori tu karoa 4:16; 5:13.

Ioane na mai fefa etoreato korana tu eurato, 1) ekalesia bene vaĝa-ribari, Barau ĝenana eiaĝomani ribana moĝonina eĝabiani tarimana tu Barau sevisevinai vanaĝivanagi etanuni; 2) tarikaka bene vaĝa-naĝiri, ĝia tata ĝeri veĝata Barau ĝesi, e tarikaka tari ĝesi, e tanobara tarimari ema dagarari ĝesi, ema vei-rakava tarimari ĝesi beĝene ĝita-ginikauri. Asi beĝene vekako mata-bubu; 3) Keriso ĝevetari-viniani tarimari ĝeri ĝofaĝofa veiĝari bene kiragi-foforiri.

Ioane na mai fefa tu maĝesina eboioĝaiato:

1. Barau tu lamefa mamana kavana emamani - karoa 1-2
2. Barau tu veuravini - karoa 3-4
3. Barau tu maĝuri - karoa 5

Maĝuri guruĝana

¹ Tovotovona na veĝata etanuto dagarana, ĝaseĝaĝiato, matama na ĝaĝitaiato, ĝenai ĝabogekauto, ema ĝiamama na ĝaĝabi-karaiato: Mai tu Maĝuri Guruĝana ĝavari-fiuani.

² Mo maĝuri efororito, benamo ĝai na ĝaĝitaiato. Moĝa lorinai ĝemi ĝavari-fiuani ema maĝuri vanaĝivanagi ĝakira-varamini. Mo maĝuri tu Tamara ĝesi etanuto-goi ema ĝai ĝemai ema fororito.

³ Ĝai na ĝaĝitaiato ema ĝaseĝaĝiato maĝurina ĝomi ĝemi ĝakiragi-foforiani, be ĝomi maki ĝai ĝesi bitana sebona uranai, korana ĝai tu Tamara ema ĝia Natuna Iesu Keriso ĝesi doĝoro sebona.

⁴ Mai guruĝa ĝatore-vinimini, korana ĝita nuĝara iaku na beĝene vonuvonu-raĝe ĝana.

Barau tu mama

⁵ Iesu ĝenana ĝaseĝaĝiato varina ĝemi ĝavari-fiuani tu maĝa: Barau tu mama, mukuna kotuna ta maki ĝia ĝenai asi etanuni.

⁶ Bema ĝita mukuna maĝurina roĝo tarakani nuĝanai bita kirani, ĝita tu Barau ĝesi tadoĝoro-sebonani, ĝita tu taĝofaĝofani ema guruĝa moĝonina asi takorana-iaĝiani.

⁷ Senaĝi bema mama nuĝanai bita rakani Barau kavana, ĝita tata tu doĝoro sebona tarimara, ema ĝia Natuna Iesu rarana na ĝita ĝera rakava mabarari beĝurigi-vaĝirini.

⁸ Bema ĝita bita kirani, ĝita tu asi ĝera vei-rakava, ĝita tu tauĝera taveĝofani, ema ĝita ĝerai guruĝa moĝonina tu asiĝina.

⁹ A bema ĝita ĝera vei-rakava bita kiragi-foforirini nai, ĝia tu ma ĝena vetuĝamaĝikau, ĝera veĝa rakavari mabarari betuĝamaĝi-fitoĝarini, ema ĝera veĝa ĝeĝevaĝeĝevari beĝurigi-vaĝirini.

¹⁰ Bema ĝita bita kirani, nega sebona maki asi tavei-rakavato, Barau tu ĝofaĝofa baraunai bita vaĝa-iaĝoani, ema ĝia ĝena guruĝa tu ĝita nuĝarai asi etanuni.

2

Keriso ĝita ĝera vevaĝa-kava tauna

¹ Natugu, mai guruĝa atore-vinimini tu ĝomi rakava asi boĝono vei ĝana. Senaĝi bema tarima ta bevei-rakavani nai, ĝita tu ma ĝera vevaĝa-kava tarimana Tamara ĝesi etanuni, Iesu Keriso, vei-iobukaioibuka tarimana.

² Keriso na ĝita ĝera rakava voivaĝiri ĝauveina eveiato, dia ĝita ĝera rakava moĝo, senaĝi tarimarima mabarari ĝeri rakava.

³ Bema ĝita Barau ĝena taravatu guruĝari bita korana-iaĝirini nai, monana bita ribani, ĝita tu moĝoni Barau taribaiaato.

⁴ Bema ta bekirani, "Au tu Barau ribagu," senaĝi ĝena taravatu guruĝari asi bekorana-iaĝirini, mo tarima tu ĝofaĝofa tarimana, guruĝa moĝonina ĝia nuĝanai asi etanuni.

⁵ Senaĝi deikara na Barau ĝena guruĝa ekorana-iaĝirini tu, Barau moĝoni eura-viniani ma nuĝana mabarana ĝesi. Monana vau taribani, ĝita tu ĝia ĝesi moĝoni sebona.

⁶ Deikara ekirani, ġia tu Barau ġesi doġoro sebona etoni tarimana tu, Iesu Keriso etanuto-ġoi kavana bene tanu.

Taravatu variguna

⁷ Ġataġu mabarami, mai taravatu atore-vinimini tu dia varigū, senaġi taravatu guinena, tovtovona na veġata ġoġabiato dagarana. Mai taravatu guinena tu ġoseġaġi-guineato taravatuna.

⁸ Senaġi mai taravatu atore-vinimini maki tu varigū; mo taravatu ġena moġoni tu Keriso ġenai ema ġomi ġemi ai maki efororini, korana mukuna tu mai ekorini ema mama moġonina tu varau emamani.

⁹ Tarima ta ekirani, ġia tu mama nuġanai etanuni, senaġi tarikakana tu ebaru-viniani, ġia tu roġo mukuna nuġanai etanuni.

¹⁰ Tarikakana eura-viniani tarimana tu mama nuġanai etanuni. Ġia bevaġa-vedaġa-raġeani dagarana ta ġenai asi etanuni.

¹¹ Senaġi tarikakana ebaru-viniani tarimana tu mukuna nuġanai etanuni e erakani. Ġia asi ribana aiġana eiaġoni, korana mukuna na matana evei-bubuani.

¹² Natugu, au na atore-vinimini korana tu, ġomi ġemi rakava tu Barau na etuġamaġi-fitoġarito Keriso aranai.

¹³ Tamagu, atore-vinimini korana tu, tovtovona na veġata etanuto tarimana tu ġoribaiato.

Maraga varigū, atore-vinimini korana tu, Satani ġovaġa-darereato.

¹⁴ Natugu, atore-vinimini korana tu, Tamara ġoribaiato.

Tamagu, atore-vinimini korana tu, tovtovona na veġata etanuto tarimana tu ġoribaiato.

Maraga varigū, atore-vinimini, korana ġomi tu ma gwadami; Barau ġena guruġa ġomi nuġami ai etanuni, ema ġomi na Satani ġovaġa-darereato.

¹⁵ Tanobara asi boġono ura-vinia, ema tanobara dagarari maki asi boġono ura-viniri. Bema tarima ta tanobara eura-viniani nai, Barau ġena veuravini ġia nuġanai tu asi etanuni.

¹⁶ Korana tu tanobara veigari mabarari, tauġani ġena ura rakavari, mata-ġaniġani, ema veiavi, tu dia Tamara Barau ġenana ġeiaġomani, senaġi tanobara ġenana ġeiaġomani.

¹⁷ Mai tanobara ema tarimarima na ġemata-ġaniġanirini dagarari mabarari tu beġe korini, senaġi Barau ġena ura eveiani tarimana tu betanu-vanaġi vanaġini.

Keriso evetari-viniani tarimana

¹⁸ Natugu, ġaro dokona tu maiġa. Ġoseġaġito ilailanai Keriso evetari-viniani tarimana tu beiaġomani, maitoma maki Keriso ġevetari-viniani tarimari vovoka beġe iaġoma. Moġesi nai taribani, mai tu hora magona.

¹⁹ Moġeri tarimarima tu ġita ġesi tavegogoto-ġoi, senaġi ġia tu dia ġita ġera doġoro korikori. Moġa lorinai ġita ġeraga-kwanerato. Bema ġia moġoni ġita ġera doġoro korikori nai tu, ġita ġesi roġo tara tanu. Senaġi ġita ġerana ġeveġitato. Monana evaġa-foforiani, ġia mabarari tu dia ġita ġera doġoro.

²⁰ A ġomi na tu Iauka Veaġa ġoġabiato, Keriso na eboroġimito, moġa lorinai ġomi mabarami guruġa moġonina tu ma ribami.

²¹ Au na atore-vinimini tu dia guruġa moġonina asi ribami nai, senaġi guruġa moġonina tu ma ribami dainai, ema ribami maki, ġofaġofa tu guruġa moġonina ġenana asi eiaġomani.

²² Ġofaġofa tarimana tu dei? Iesu tu dia Keriso, (Barau na ekiraġi-toreato vevaġa-maġuri tauna), etoni tarimana. Mo tarima tu Keriso evetari-viniani tauna. Ġia tu Tamara e Natuna ekira-fitoġarini tarimana.

²³ Natuna ekira-fitoġaiani tarimana tu Tamana maki ġia ġenai tu asiġina. A deikara na Natuna eġabi-raġeani tarimana tu, Tamana maki eġabi-raġeani, ema Tamana maki ġia ġenai etanuni.

²⁴ Tovtovona na veġata ġoseġaġiato guruġana nuġami ai bene tanu. Bema nuġami ai betanuni tu, ġomi maki Natuna e Tamana nuġari ai boġo tanuni.

²⁵ Ema mai maġuri vanaġivanaġi tu Keriso tauġena na ġita ġera ekiraġi-toreato dagarana.

²⁶ Maiġeri guruġa ġomi atore-vinimini tu, ġomi ġeġofa-veġitami ġetoni tarimari akiraġi-foforirini.

²⁷ Senaġi ġomi na Iauka Veaġa ġoġabiato Keriso ġenana tu nuġami ai etanuni. Moġa lorinai initoma vevaġa-riba tarimana ta ġomi bene vaġa-ribami ġana tu asi boġo ura-viniani. Korana mo Iauka Veaġa na dagara mabarari evaġa-ribamini, ema ġena guruġa tu moġoni, dia ġofaġofa. Moġa lorinai evaġa-ribamito ilailanai, Keriso nuġanai boġono tanu.

²⁸ Natugu, Keriso nuġanaġi boġono tanu. Be ġia beforini ġaronai tu nuġara ma kokoreri ema asi beġene maiakara ġia ġoiranaġi ġena ġenoġoi ai.

²⁹ Bema ġomi ma ribami Keriso ġena veġġa tu iobukaiobuka nai, boġo ribani, ġevei-iobuka iobukani tarimari mabarari tu Barau ġenana ġemaġurito.

3

Barau natuna

¹ Ġoġitaia, Tamara ġena veuravini tu asikeikeina ġita iatarai etoreato. Moġesi naima ġita ekiraġirani Barau natuna. Moġoni, ġita tu ġia natuna. Moġa lorinaġi tanobara na maki asi eribarani, korana Barau maki asi ġeribaiaġi.

² Ġatagu mabarami, maitoma ġita tu Barau natuna. Ġita kara ai bita iaġoni tu roġosi bene fori. Senaġi ġita ribara, Keriso beforini ġaronai, ġita tu ġia ilailanaġi bita iaġoni, korana ġia tu vetoġana korikorinaġi bita ġitaiani.

³ Tarimarima mabarari mai tuġamaġġikau ġeġġabiani tu, tauġeri ġevevaġa-iarevani, korana Keriso tu asi mirona e asi vetoukauna ta.

⁴ Rakava ġeveini tarimari mabarari tu Barau ġena taravatu ġekira-ġitoġaiani, korana vei-rakava tu taravatu ġekira-ġitoġaiani dagarana.

⁵ Senaġi ġomi tu ma ribami, Keriso eforito korana tu, ġita ġera rakava bene ġabi-veġġitari ġana. Ġia ġenai rakava ta tu asiġi.

⁶ Keriso nuġanaġi etanuni tarimana tu asi evei-rakava rovaġi-rovaġini. Rakava eveini tarimana na Keriso tu asi eġitaġioto ema asi eribaiaġi maki.

⁷ Natugu, ta na asi bene ġofami. Veġġa iobukaiobukari eveini tarimana tu vei-iobukaiobuka tarimana, vaġa-ilailana Keriso kavana vei-iobukaiobuka tarimana.

⁸ A vei-rakava eveini tarimana tu Diabolo ġena tarima, korana Diabolo tu tovotovona na veġġa roġo evei-rakava-iaġomani. Barau Natuna eforito korana tu, Diabolo ġena ġauvei benema vaġa-rakavaia ġana.

⁹ Barau ġenana emaġurito tarimana tu asi bevei-rakava rovaġi-rovaġini, korana Barau ġena maġuri tu ġia ġenai etanuni. Ġia tu vei-rakava asi ma bevei-ġenoġoini, korana Barau tu ġia Tamana.

¹⁰ Barau natuna ema Diabolo natuna vetoġari ġeri irau tu maġesi beġe fororini: Veġġa iobukaiobukari asi eveini tarimana ema tarikakana asi eura-vinirini tarimana tu dia Barau natuna.

Boġono veura-vevini

¹¹ Tovotovona na veġġata ġoseġaġiatio guruġana tu maġesi: Ġita tata bitana veura-vevini.

¹² Ġita tu Kaino eveito kavana tu asi bitana vei. Ġia tu Satani ġena tarima. Tarina korikorina Abela evaġi-maseato. Karase nai Kaino na evaġiatio? Korana ġia ġena veġġa tu rakava, a tarina ġena veġġa tu iobuka.

¹³ Tarikakagu mabarami, bema tanobara maġurinaġi ġetanuni tarimari na beiaurakavamini nai, nuġami asi beġene farevaġi.

¹⁴ Ġita ribara, ġita tu mase ġenana maġuri ġenai tavanaġito. Vetoġana tu tarikakara taura-vinirini. Tarikakana asi eura-viniani tarimana tu roġo mase nuġanaġi etanuni.

¹⁵ Deikara tarikakana eiaurakava-viniani tarimana tu vevaġideba tarimana. Gomi ribami, vevaġideba tarimana nuġanaġi tu maġuri vanaġivanāġi asi etanuni.

¹⁶ Keriso na ġena maġuri etore-tariato, ġita bitana maġuri ġana. Monai veuravini anina bita ribaiani. Moġa lorinaġi ġita na maki tarikakara dairi ai ġera maġuri bitana tore-tariri neġi namo.

¹⁷ Bema tarima ta ma ġena farefare vovoka, benamo tarikakana ta beġitaiani ġena rabu ai, senaġi asi ma bevetuġa-ġwaiani e asi bevaġa-kavaiani, kamara dabarai Barau ġena veuravini ġia nuġanaġi betanuni?

¹⁸ Natugu, ġera veuravini tu dia guruġa koriri ai moġo bitana kiraġiri, senaġi veġġai ema moġoni ai bitana vaġa-foforia.

¹⁹ Monana vau bita ribani, ġita tu Barau ġena guruġa moġonina na beġori-kaurani, ema Barau ġoiranaġi nuġara beġe kokoreni.

²⁰ Bema ġita nuġara beġe kirani, ġita tu kerere, bitana riba, Barau tu barego, a ġita nuġara tu kei, ema Barau tu dagara mabarari ma ribana.

²¹ Ġatagu mabarami, bema ġita nuġara na asi beġe kiraġi-kerererani nai tu, ġita nuġara tu ma gwadara ġesi Barau ġoiranaġi bita ruġa-tarini.

²² Ema bita noġiani dagarari mabarari Barau na bevinirani, korana ġena taravatu guruġari takorana-iaġirini ema Barau vaġa-iakuna veġġari taveirini nai.

²³ Ĝia ĝena taravatu guruĝana tu maiĝa: Ĝia Natuna Iesu Keriso arana bitana vaĝa-moĝonia, ema ĝita tata bitana veura-vevini, Keriso na taravatu guruĝana evinirato ilailanai.

²⁴ Barau ĝena taravatu guruĝari ekorana-iaĝirini tarimana tu Barau nuĝanai etanuni, ema Barau maki ĝia nuĝanai etanuni. Barau na Iauka Veaĝa evinirato, monana ĝita taribani, ĝia tu ĝita nuĝarai etanuni.

4

Iauka moĝonina ema ĝofaĝofa iaukana

¹ Ĝataĝu mabarami, iauka mabarari asi boĝono vaĝa-moĝoniri, senaĝi iauka boĝono ribari ĝana boĝono tovonagi-guineri. Ĝia tu Barau ĝenana ĝeiaĝomato ba? Korana peroveta tarimari ĝofaĝofari ĝutuma tanobarai ĝerakao-rakaoni.

² Barau Iaukana tu mai vetoĝai boĝo ribaiani: Iauka mabarari beĝe kirani, "Iesu Keriso tu tarimarimai eiaĝoto," ĝia tu moĝoni Barau ĝenana.

³ Ma iauka mabarari asi beĝe kirani, Iesu Keriso tu tarimarimai eiaĝoto, tu dia Barau ĝenana. Ĝia tu Iesu evetari-viniani iaukana. Goseĝaĝito, ĝia tu beiaĝomani, ema ĝia tu varau maiĝa tanobarai.

⁴ Natugu, ĝomi tu Barau ĝenana, ema ĝomi na peroveta tarimari ĝofaĝofari ĝovaĝa-darererito, korana ĝomi nuĝami ai etanuni Iaukana seĝukana na tanobara iaukari ĝeri seĝuka evanaĝirini.

⁵ Mo peroveta tarimari ĝofaĝofari tu tanobara ĝena, moĝesi naima ĝeri guruĝa tu tanobara ĝena dabarai ĝeguruĝani, ema tanobara na maki ĝia ĝeseĝaĝi-vinirini.

⁶ Senaĝi ĝita tu Barau ĝena. Be Barau ĝena tarimarima na tu beĝe seĝaĝi-vinirani, a Barau asi ĝekorana-iaĝiani tarimari na tu asi beĝe seĝaĝi-vinirani. Iauka moĝonina e ĝofaĝofa iaukana tu mo vetoĝai bita ĝita-learini.

Barau tu veuravini

⁷ Ĝataĝu mabarami, ĝita tata bitana veura-vevini, korana veuravini tu Barau ĝenana eiaĝomani. Eveura-vinini tarimana tu Barau ĝenana emaĝurito, ema ĝia ma ribana Barau.

⁸ Asi ĝena veuravini tarimana tu Barau asi ribana, korana Barau tu veuravini.

⁹ Barau ĝena veuravini ĝita ĝerai tu maiĝesi evaĝa-foforiato: Barau na Natuna ĝora-ĝereĝa tanobara ĝana etuĝuato, ĝia bakunai ĝita bitana maĝuri ĝana.

¹⁰ Veuravini anina tu maiĝa: Dia ĝita na Barau taura-viniato, senaĝi ĝia na ĝita eura-vinirato, benamo Natuna etuĝuato, ĝena mase ĝenana ĝita ĝera rakava benema voi-vaĝiri ĝana.

¹¹ Ĝataĝu mabarami, Barau na ĝita tu moĝesina eura-vinirato nai, ĝita maki tata bitana veura-vevini.

¹² Tarima ta na Barau asi eĝitaiaato. Senaĝi bema ĝita tata taveura-vevinini nai tu, Barau tu ĝita nuĝarai etanuni ema ĝena veuravini tu ebaregoni ĝita nuĝarai.

¹³ Ĝita ma ribara ĝita tu Barau nuĝanai tatanuni, ema Barau maki ĝita nuĝarai etanuni, korana ĝia Iaukana ĝita evinirato.

¹⁴ Ĝai na ĝaĝitaiaato, ema tari maki ĝakira-vararito, Tamara na tu Natuna etuĝuato tanobara ĝena vevaĝa-maĝuri tarimanai bene iaĝo ĝana.

¹⁵ Bema tarima ta bekirani, "Iesu tu Barau Natuna," ĝia nuĝanai tu Barau ema ĝia maki Barau nuĝanai etanuni.

¹⁶ Ema ĝita maki ribara e tavaĝa-moĝoniani, Barau na ĝita eura-vinirani.

Barau tu veuravini, ema veuravini ai etanuni tarimana tu Barau nuĝanai etanuni, ema Barau maki ĝia nuĝanai etanuni.

¹⁷ Moĝesi bita tanuni vau, Barau ĝena veuravini bebaregoni ĝita ĝerai, benamo Kota baregona ĝaronai ĝita tu ma kokorera ĝesi bita foforini. Korana ĝita ĝera maĝuri mai tanobarai tu Keriso ĝena maĝuri ĝesi ilaila.

¹⁸ Veuravini ai gari tu asi etanuni. Veuravini korikorina na gari elai-fitogaiani. Gari ai etanuni tarimana tu vei-rakava voina garina eveini. Bema tarima ta egarini, ĝia tu veuravini korikori ai roĝosi bene barego.

¹⁹ Ĝita taveura-vinini, korana Barau na ĝita euravini-guinerato.

²⁰ Bema tarima ta ekirani, "Au na Barau aura-viniani," senaĝi tarikakana tu ebaru-viniani, ĝia tu ĝofaĝofa tarimana. Korana bema ĝia tarikakana eĝitaiani, senaĝi asi eura-viniani, kamara dabarai asi eĝitaiani Barauna beura-viniani.

²¹ Keriso na mai taravatu guruĝana evinirato: Barau eura-viniani tarimana na tu tarikakana maki bene ura-vinia.

5

Ĝera kokore tanobara iatanai

¹ Deikara na evaĝa-moĝoniani Iesu tu moĝoni Keriso, (Barau na ekiraĝi-toreato vevaĝa-maĝuri tauna), ĝia tu Barau ĝenana emagurito. Ema Tamana eura-viniani tarimana na tu natuna maki eura-viniani.

² Barau taura-viniani ema ĝena taravatu guruĝari takorana-iaĝirini nai tu, moĝeri na ĝita bita ribani, Barau natuna taura-vinirini.

³ Barau taura-viniani nai tu ĝena taravatu guruĝari takorana-iaĝirini. Ĝia ĝena taravatu guruĝari korana-iaĝiri tu asi gwaĝiĝi.

⁴ Korana tu Barau natuna mabarari na tanobara ĝevaĝa-darereani. Ĝita tu ĝera veĝabidadama na tanobara tavaĝa-darereani.

⁵ Deikara na tanobara evaĝa-darereani? Iesu evaĝa-moĝoniani ĝia tu Barau Natuna etoni tarimana moĝo.

Barau na ĝia Natuna Iesu Keriso ekiraĝi-foforiani

⁶ Iesu Keriso tu eiaĝomato nanu na ebabatisoato, ema rarana eriĝoto satauro ai. Ĝia tu dia nanu ĝereĝana na moĝo eiaĝomato, senaĝi nanu e rara ĝerina. Iauka Veaĝa na moĝoni.

⁷ Dagara tu toitoi na ĝevaĝa-foforiani:

⁸ Iauka, nanu, ema rara. Ĝia toitoi ĝeri guruĝa-fofori tu sebona.

⁹ Tarimarima ĝeri vevaĝa-moĝoni guruĝari tu taĝabi-raĝerini, senaĝi Barau ĝena vevarifitu tu barego lelevaĝi, korana moĝa tu Barau ĝena vevaĝa-moĝoni, Natuna evaĝa-moĝoniani guruĝana.

¹⁰ Mo vevaĝa-moĝoni guruĝana tu Barau Natuna ĝevaĝa-moĝoniani tarimari nuĝari ai ĝetanuni. A Barau asi ĝevaĝa-moĝoniani tarimari na Barau tu ĝofaĝofa baraunai ĝevaĝa-iaĝoani, korana Barau na Natuna evari-fiuato guruĝana asi ĝevaĝa-moĝoniani.

¹¹ Guruĝa moĝonina tu maĝa: Barau na maĝuri vanaĝivanaĝi varau evinirato, ema mo maĝuri vanaĝivanaĝi tu ĝia Natuna nuĝanai.

¹² Barau Natuna eĝabi-raĝeato tarimana na maĝuri eĝabiato. A Barau Natuna asi eĝabi-raĝeato tarimana na maĝuri asi eĝabiato.

Maĝuri vanaĝivanaĝi

¹³ Maĝeri guruĝa tu ĝomi, Barau Natuna arana ĝovaĝa-moĝoniani tarimami, atorevinimini, korana tu boĝono riba, ĝomi tu varau maĝuri vanaĝivanaĝi ĝoĝabiato.

¹⁴ Ĝita nuĝara tu maĝesi vau ma kokoreri ĝesi Barau ĝoiranai bita ruĝani, mai tu bema dagara ta ĝia ĝena ura ilailanai bita noĝiani nai tu beseĝaĝirani.

¹⁵ Ĝita ribara, ĝia na ĝera noĝinoĝi mabarari eseĝaĝirini. Ema ĝita maki ribara, bita noĝini dagarari tu bita ĝabini ĝia ĝenana.

¹⁶ Bema tarima ta tarikakana eĝitaiani vei-rakava eveiani, senaĝi mo rakava na asi bevaĝa-maseani, tu bene ĝaugau ĝia ĝena, be Barau na maĝuri bene vinia. Moĝa tu evei-rakavani, senaĝi mo vei-rakava na asi bevaĝa-maseani tarimana akiraĝiani. Vei-rakavana ta tu mase evaĝa-ĝoraiani. Moĝa tu asi bene ĝaugau-iaĝia atoni.

¹⁷ Veĝa ĝeĝeva-ĝeĝeva mabarari tu vei-rakava, senaĝi vei-rakava tari tu mase asi ĝevaĝa-ĝorarini.

¹⁸ Ĝita ribara, Barau ĝenana ĝemaĝurito tarimari tu asi ĝevei-rakava rovaĝi-rovaĝini, korana Barau Natuna na enariĝau-ĝitakaurini, ema Diabolo na asi eĝabi-kararini.

¹⁹ Ĝita ribara, ĝita tu Barau natuna, ema tanobara mabarana tu Diabolo na eĝori-kauani.

²⁰ Ĝita ma ribara maki, Barau Natuna tu eiaĝomato, ĝia na tuĝamaĝi-faka evinirato, Barau moĝoni bitana ribaia ĝana. Ĝita tu Barau moĝonina nuĝanai tatanuni, korana ĝia Natuna Iesu Keriso nuĝanai tatanuni. Iesu Keriso tu Barau moĝonina ema ĝia tu maĝuri vanaĝivanaĝi.

²¹ Natugu, barau ĝofaĝofari ĝerina boĝono veĝita.

IOANE ĜENA TORETORE VAĜA-RUARUANA

2 Ioane vaĝa-foforina guruĝari

Ioane na mai fefa tu Barau na eĝabi-viriĝiato ekalesia vavinena ma natuna ĝeri etoreato, moĝa tu betaĝu rubu ta ma ekalesiari ekiraĝirini.

Mai fefa tu laĝani 85 ma 100 fakari nuĝanai ta Ioane na etoreato, mo tu Iesu maki emaseto murinai vau.

Mai fefa nuĝanai siri baregori tu siri 9 beiaĝo 11.

Ioane na mai fefa etoreato ĝena ura tu, 1) mo ekalesia Keriso ĝena vevaĝa-ribai beĝene ruĝatari-gigitari ema vanaĝivanagi moĝeri vevaĝa-riba guruĝari loriri ai beĝene raka; 2) ĝofaĝofa tarimari, dia Keriso Iaukana na eĝori-laĝomarini tarimari, beĝene ĝitari, beĝe ĝofa-darererini garina; 3) mo ĝofaĝofa tarimari ĝeiaĝomani nai tu, asiĝina ĝinavaĝi beĝene ĝabi-raĝeri etorito.

Ioane na mai fefa tu maiĝesi eboioĝaiato:

1. Vevaĝa-riba moĝonina lorina na moĝo ema veuravini ai beĝene raka - siri 1-6

2. Veĝa kerereri asi beĝene veiri - siri 7-13

¹ Au, ekalesia ĝorikauna taugu, na mai fefa Barau na eĝabi-viriĝimito vavinemu ma natumu ĝesi atore-vinimini. Gomi tu nuĝagu mabarana ĝesi aura-vinimini, dia au na moĝo aura-vinimini, senaĝi guruĝa moĝonina ĝeribaiato tarimari mabarari na maki ĝomi ĝeura-vinimini.

² Korana guruĝa moĝonina ĝita nuĝarai etanuni ema ĝita ĝesi betanu-vanaĝi vanaĝini.

³ Tamara Barau ema Iesu Keriso, Tamara Natuna, ĝerina varevare-bara, vevetuĝaĝwa, ema maino ĝemi ai bene tanu, moĝoni ai e veuravini ai.

Guruĝa moĝonina ema veuravini

⁴ Au tu averere-baregoni, korana ĝoi natumu tari adoĝaririto guruĝa moĝoninai ĝetanuni nai, ĝita Tamara na ekirarato ilailanai.

⁵ Vavine, maitoma ĝoi anoĝimuni tu, ĝita tata bisini veura-vevini. Dia taravatu variĝuna atore-vinimuni, senaĝi mo tu tovotovona na veĝata taĝabiato dagarana.

⁶ Veuravini tu maiĝesi: Barau ĝena taravatu guruĝari ilailari ai bitana raka. Tovotovona na veĝata ĝoseĝaĝiatio kavana, ĝia ĝena taravatu guruĝana tu veuravini ai boĝono raka.

⁷ Ĝofaĝofa tarimari tu ĝutuma tanobarai ĝerakao-rakaoni. Iesu Keriso tu tarimarimai eiaĝoto tu asi ĝevaĝa-moĝoniani e asi ĝekiraĝiani. Moĝesi tarimari tu ĝofaĝofa tarimari, ema Keriso ĝevetari-viniani tarimari.

⁸ Moĝesina nai, lorimi boĝono vetore, ĝemi vekwaraĝi ai kara ĝoĝoitaĝorito dagarari ĝomi ĝemina beĝe veĝitani garina. Namona tu ĝomi voimi mabarana boĝono ĝabi-ĝosiri.

⁹ Deikara na Keriso ĝena vevaĝa-riba guruĝari beraga-kwanerini, vevaĝa-riba tari beĝabi-raĝerini tarimana, ĝia ĝenai Barau asi etanuni. A deikara Keriso ĝena vevaĝa-riba guruĝari bekorana-iaĝirini tarimana tu, Tamana e Natuna tauri ruarua eĝabirito.

¹⁰ Bema tarima ta beiaĝosini, vevaĝa-riba guruĝari irauri bekiraĝirini tu, asi boĝono ĝabi-raĝea ĝemi numai, ema asi boĝono vaĝa-namoa maki.

¹¹ Korana tu bevaĝa-namoani tarimana tu mo tarima ĝena vei-rakava beĝabiani, benamo ĝia maki vei-rakava tarimanai beiaĝoni.

Guruĝa magona

¹² Au aurangi guruĝa ĝutuma bara tore-vinimi, senaĝi asi aurangi fefai bana toreri. Ĝegu ura tu bana iaĝosi ema ĝomi ĝesi bitana guruĝa-guruĝa, be ĝera verere bene barego-lelevaĝi.

¹³ Ĝoi tarikakamu vavinena, Barau na eĝabi-toreato vavinena, ĝia natuna na ĝeri vevaĝa-namo ĝetuĝuani ĝoi ĝemu.

IOANE ĜENA TORETORE VAĜA-TOITAINA

3 Ioane vaĝa-foforina guruĝari

Ioane na mai fefa vaĝa-toitoina tu ekalesia gwaĝigina ta arana Gaius ĝena etoreato.

Mai fefa tu laĝani 85 ma 100 fakari nuĝanai ta Ioane na etoreato, mo tu Iesu maki emaseto murinai vau.

Siri baregona tu siri 5.

Ioane na mai fefa etoreato ĝena ura tu, 1) Gaius bene launaĝia, mo tarikaka tari eĝabi-raĝerito moĝeri dairi ai; 2) Gaius bene vaĝa-ribaia, mo seĝafore tarimana arana Diotrefe tu Ioane tauĝena beiaĝoni vauro bea kira-feifeiani etato; 3) Demetrio ĝena veiĝa namori bene ĝitari etato.

Ioane na mai fefa tu maiĝesi eboioĝaiato:

1. Gaius evaĝa-naĝiato - siri 1-8
2. Diotrefe ekira-rakavaĝiato - siri 9-11
3. Demetrio evaĝa-raĝeato - siri 12-14

¹ Au, ekalesia ĝorikauna taugu, na ĝatagu namona Gaius atore-vinimuni. Ĝoi aura-vinimuni ma nuĝagu mabarana ĝesi.

² Ĝatagu namomu, Barau anoĝiani dagara mabarari oveirini tu namo beĝene vaĝa-ĝorari ĝana, ema ĝoi maki asi bono keve-misimisi, korana au ribagu ĝoi iaukamu tu namo, be namo e iaku ai moĝo bono tanu.

³ Tarikakara tari ĝeiaĝomato, benamo kamasi ĝoi guruĝa moĝonina okorana-iaĝiani e ĝemu vetuĝamaĝikau ĝema-varifuato. Moĝeri aseĝaĝirito nai, au tu aiaku-rakavato.

⁴ Aseĝaĝini, au natugu guruĝa moĝonina ĝekorana-iaĝiani nai, ĝegu iaku e verere ĝebarego-rakavani. Dagara tari iakuri oveini maki evanaĝirini.

Gaius ĝena ĝauvei ĝevaĝa-raĝeato

⁵ Ĝatagu namomu, ĝoi tu ma ĝemu vetuĝamaĝikau mani ĝauvei oveiani nai, korana tarikakara tari ĝeri iaĝoiaĝo ai oĝabi-raĝerini, enabe asi ribamu tarimari.

⁶ Ĝia na mai ekalesia ĝoirari ai ĝoi ĝemu veuravini ĝema-kiraĝi-foforirito. Mani ĝemu veiĝa ma bono vaĝa-kavari, be ĝeri iaĝoiaĝo beĝene iaĝo-vinia Barau ĝena ura dabarana ilailanai.

⁷ Korana tu Keriso arana dainai ĝeraka-rosito, ema ĝeri iaĝoiaĝo ai tu asi ekalesia tarimari ĝerina kara ta asi ĝeĝabi-raĝeato.

⁸ Ĝita na tu moĝesi tarimari bitana vaĝa-kavari, korana moĝesina tu guruĝa moĝonina varifuana uranai bita ĝauvei-vegogoni.

Diotrefe ĝena veiĝa tu rakava

⁹ Fefa kubina ta ekalesia doĝorona atore-viniato, senaĝi Diotrefe bene veĝorikau etoni tarimana na au na kara akiraĝirini tu asi eĝabi-raĝerini.

¹⁰ Moĝa lorinai au baiĝosini tu, ĝia na kara eveirini veĝari mabarari basi kiraĝi-foforirini, guruĝa rakavari ĝai ĝemai ekiraĝirini guruĝari ema eĝofaĝofani guruĝari! Dia moĝeri veiĝa moĝo, senaĝi tarikakara tari ĝema-varivarini maki asi eurani bene ĝabi-raĝeri. Mo varivari bene ĝabi-raĝeri etoni ekalesiari maki ekourini ema ekalesia na etore-veĝitarini.

Demetrio ĝena veiĝa tu namo

¹¹ Ĝatagu namomu, rakava veĝari asi bono tovtovori, senaĝi veĝa namori moĝo. Veĝa namori eveini tarimana tu Barau ĝena tarima, a veĝa rakavari eveini tarimana tu Barau asi eĝitaiato.

¹² Tarimarima mabarari ĝekirani, Demetrio tu tarima namona ĝetoni; Barau ĝena guruĝa moĝonina na maki evaĝa-foforiani tu tarima namona. Ĝai na maki ĝia tu moĝesi ĝakiraĝiani, ema ĝoi tu ma ribamu, ĝai ĝema guruĝa tu moĝoni.

Dokona guruĝari

¹³ Au aurani guruĝa ĝutuma bara tore-vinimi, senaĝi asi aurani fefai bana toreri.

¹⁴ Au ĝegu tuĝamaĝi tu bana iaĝosi, be taura ruarua tana tanu-veĝoira vau tana guruĝa-guruĝa.

¹⁵ Maino ĝemu ai bene tanu. Ĝatara maiĝeri na ĝevaĝa-namomuni. Ĝatara maninai tata ĝegu vevaĝa-namo bono viniri.

IUDAS (O IUD) ĜENA TORETORE

Iudas (o Iud) vaga-foforina guruĝari

Mai fefa tu Iudas (o Iud), Iesu tarina, na etoreato. Mai fefa tu ekalesia mabarari ĝeri.

Iudas na mai fefa tu laĝani 65 ma 70 fakari nuĝanai ta etoreato, mo tu Iesu emaseto murinai.

Siri baregona tu siri 3.

Iudas na mai fefai ekalesia mabarari ekirarito, 1) ĝeri veĝabidadamai beĝene ruĝa-gwaĝiĝi; 2) beĝene venari, apostolo ĝofaĝofari na beĝe ĝofa-veĝonurini garina; 3) Barau ĝena vevaĝa-riba guruĝari beĝene korana-iaĝiri.

Iudas na mai fefa tu maiĝesina eboioĝaiato:

1. Veĝabidadama na ĝeveĝitani tarimari ĝeri veĝa - siri 1-16
2. Veĝabidadama beĝene ĝabi-gwaĝiĝia - siri 17-23

¹ Au Iudas, Iesu Vereĝauka ĝena vetuĝunaĝi tarimagu, ema Iakobo (o James) tarina, ĝeguna mai fefa eiaĝosini. Gomi Barau na ekeamito tarimami, Tamara Barau na eura-vinimini ema Iesu Keriso na eĝita-ĝaumin tarimami, atore-vinimini.

² Vevetuĝaĝwa, maino, ema veura-vini na boĝono vonuvonu-raĝe.

Vevaĝa-riba tarimari ĝofaĝofari

³ Ĝatagu mabarami, ĝegu ura baregona ĝera vevaĝa-maĝuri dabarana guruĝana bana tore-vinimi atato, senaĝi au na aĝitalato, namona tu ĝegu fefai bana launaĝimi, Barau ĝena veaĝa tarimari evinirito veĝabi-dadamana boĝono ĝabi-gigitaria.

⁴ Korana tarima kotari, Barau asi ĝekorana-iaĝiani tarimari, tu vekure-toĝai ĝomi fakami ai ĝerakatoĝa-ĝairito. Maniĝeri tarima na tu ĝita ĝera Barau ĝena varevare-bara ĝeĝabiani, ĝia ĝeri veĝa rakavari beĝene veiri ĝana dabaranai ĝevaĝa-iaĝoani, ema Iesu Keriso ĝera Vereĝauka e Vere Baregona sebona kwarigutu moĝo ĝekira-fitoĝaiani. Barau na kai-veĝata ĝena bukai etore-vanaĝiato, ĝeri rakava voiri beĝe doĝaririni.

⁵ Gomi Buka Veaĝa variri mabarari ĝoriba-guinerito, senaĝi aurangi ma navaĝa-riba ĝenogoi, Vereĝauka na Isaraela tarimari tu aĝesina evaĝa-maĝuririto Aigupito tanona na, senaĝi murinai asi ĝevaĝa-moĝoniato tarimari tu ma evaĝi-maserito.

⁶ Aneru tari maki gotuĝamaĝiri, ĝeri daĝi korikori asi ĝeĝabi-gwaĝiĝirito, ema ĝeri tanu gabuna ĝeraĝa-kwaneato. Moĝa lorinai Barau na mukuna gabunai etorerito, tanu-vanaĝivanagi seiniri na ebaru-taririto, ĝena Kota baregona ĝarona ĝana.

⁷ Sodoma e Gomora, ema seviri ai taoniri asi boĝono tuĝarekwari. Moĝeri tarima ĝeri veĝa maki aneru ĝeveito veĝari kavana ĝeveirito, ĝemata-boraĝato e veĝa boraĝari ĝeveito, benamo tanu-vanaĝivanagi karavana na eĝararito, mo tu ĝita ĝera ĝitaĝita ĝana.

⁸ Moĝesi veĝa ilailanai, mo nuvi tarimari na maki tauĝeri tauĝaniri moĝesi ĝevaĝa-rakavarini; Barau ĝena maoro ĝekira-fitoĝaiani, ema iauka baregori ĝevei-veĝare veĝarerini.

⁹ A Maikolo, aneru mabarari ĝeri vere ta, Diabolo ĝesi ĝevevaneto, Mose tauĝanina dei na bene ĝabia ĝaramanai nai, Maikolo na Diabolo guruĝa rakavari na asi evaneato, senaĝi ekiraiato, "Vereĝauka na bene kira-feimu!" etato.

¹⁰ Senaĝi moĝeri tarima tu asi ĝetuĝamaĝi-maĝatarini dagarari ĝevei-veĝare veĝarerini; ema ĝeri vemamiraĝi ai ĝeribarini dagarari bai kavari, moĝeri dagara na ĝia ĝevaĝa-rakavarini.

¹¹ Vetuĝari kika! Ĝia tu Kaino ĝena veĝa beĝe ĝabia. Balam ekerereto kavana farefare boruri ragari beĝe vei. Kora eseĝa-foreto e tauĝena evevaĝa-rakavato kavana ĝia maki beĝe seĝafore e tauĝeri beĝe vevaĝa-rakava.

¹² Moĝeri tarima ĝomi ĝemi ĝanivegogo ĝoveirini nai, ĝia tu miro noĝa ĝomi fakami ai. Ĝia tauĝeri moĝo ĝevetuĝamaĝikauni. Ĝia tu magube asi gurari, iavara na egwara-rakarakao-kavarini kavana. Ema ĝau korukoru meramerai maki asi ĝwaĝwana kavana, ma ĝokaĝokari ĝelau-raĝerini, ĝemase-vaĝa-ruaruani.

¹³ Ĝia tu davara ureureri na kaburo-buro ĝefoforini noĝa, ĝeri maiaka veĝari ĝefoforini. Ĝia tu ĝeri dabara ĝeraĝa-kwanerito visiguri kavana, Barau na mukuna furufuru gabuna ĝeri etoreato etanu-vanaĝi vanaĝini.

¹⁴ Adamu besena vaĝa-imaima ruaruana (7), Enoka, ĝia na moĝeri tarima eperoveta-iaĝirito, ekirato, "Ĝoboĝe, Vereĝauka tu mai eiaĝomani ma ĝena aneru veaĝari asi gadaragadara ĝesi,

¹⁵ tarimarima mabarari vevaḡa-maoro bene viniri ḡana. Barau asi ḡekorana-iaḡiani tarimari ḡeri rakava nuḡanai Barau asi ḡekorana-iaḡiani veḡari ḡeveirini, ema vei-rakava tarimari, Barau asi ḡekorana-iaḡiani tarimari, na Barau guruḡa rakavari ḡeviniato, mabarari ḡeri vei-rakava voina bene kirāḡiri ḡana.”

¹⁶ Moḡeri tarima tu mugumugu e veroritore moḡo ribari. Gia tu ḡeri ura rakavari ḡeiaḡo-vinirini, tauḡeri ḡevevaḡa-raḡeni ema tarima tari ḡevaḡa-namo ḡofa-kaurini ḡia tauḡeri namo beḡene dogari uranai.

Velaunaḡi guruḡari

¹⁷ Senaḡi ḡomi, ḡatagu mabarami, ḡera Vereḡauka Iesu Keriso ḡena apostolo na ḡevaḡa-guruḡamito guruḡari boḡono tuḡamaḡi-taḡori.

¹⁸ Gevaḡa-guruḡamito, ḡekirato, “Garo dokori ai vei-veḡareveḡare tarimari beḡe fororini, Barau muriri ai beḡe toreani, benamo ḡeri ura rakavari beḡe iaḡo-vinirini.”

¹⁹ Moḡeri tarimarima na ḡomi fakami ai vetavi-kirakira ḡevaḡa-ḡoraiani. Gia tu ḡeri ura rakavari na ḡeguine-iaḡirini. Iauka Veaḡa ḡia ḡeri ai maki asigi.

²⁰ Senaḡi ḡomi, ḡatagu mabarami, ḡemi veḡabidadama veaḡana boḡono ḡabi-gigitaria, ma iatanai ḡemi maḡuri boḡono tore-varaḡea. Iauka Veaḡa seḡukanai boḡono ḡauḡau.

²¹ Barau ḡena veuravini nuḡanai boḡono tanu ema ḡera Vereḡauka Iesu Keriso ḡena vevetuḡaḡwa boḡono naria, korana ḡena vevetuḡaḡwai maḡuri vanaḡivanāḡi bevinimini.

²² Getuḡamaḡi-iauvoiauveni tarimari boḡono vetuḡaḡwari.

²³ Tarima kotari karava nuḡana na boḡono inu-vāḡiri, boḡono vaḡa-maḡuriri. Ma kotari boḡono vetuḡari, senaḡi ma garimi ḡesi, ḡeri miro na beḡe vaḡa-rakavamini garina.

Barau vaḡa-raḡena ḡuriḡurina

²⁴ Barau na benarimini riba, benamo asi boḡo ketoni, ema ḡia ḡena mareva baregonai bea toremini asi vetoukaumi e ma iakumi ḡesi.

²⁵ Gita ḡera Barau sebona, ḡera Vereḡauka Iesu Keriso bakunai evaḡa-maḡurirani Barauna, bitana vaḡa-raḡea. Gia tu iaru-korokoro ma marevana baregona, kokore e seḡuka mabarana tu ḡia ḡena, toma bene iaḡo vanaḡivanāḡi! Amen.

APOKALUPO

Apokalupo vaġa-foforina guruġari

Apokalipsis (o Apokalupo) Grik garo ai anina ta tu “vevaġa-fofori”. Mai buka tu Ioane na etoreato ekalesia doġorori imaima ruarua (7) ema Iesu ġevaġa-moġoniani tarimari tanobara mabarani ġetanuni tarimari ġeri.

Ioane na mai Apokalupo bukana tu motumotu tai arana Patmos ai ediburato-ġoi nuġanai etoreato. Mai buka tu laġani 90 ema 96 fakari nuġanai ta etoreato, mo tu Iesu maki emaseto murinai vau.

Siri baregori mai Apokalupo bukana nuġanai tu karoa 1:19; 21:5.

Iesu na Ioane ekiraiato, mai buka etoreato korana tu, Iesu ġena ura kara ġoirai dori ġeġorani dagarari tarimarima na beġene ribari. Mai buka Ioane na etoreato korana tari tu, 1) Keriso Iesu Vereġauka ġena ġauvei irauirauri tata bene vaġa-foforiri ġana uranai; 2) Asia Keina (o Minor) ai ekalesia doġorori imaima ruarua (7) moġeri bene kirari, e bene launaġiri, ema ġevei-rakavato-ġoi nai bene kira-feifeiri ġana; 3) Genese ai vevaġa-maġuri boioġana Barau na ekiraġiato moġa dokona bemoġonini e bevetore-korikorini bene vaġa-fofori ġinikaua ġana.

Ioane na mai Apokalupo bukana tu maġesi eboioġaiato:

1. Keriso Barau na mareva baregona eviniato varina - karoa 1
2. Keriso vetuġunaġi ġauveiri maitoma eveirini - karoa 2-3
3. Keriso ġena kokore varina - karoa 4-22

Ioane ġena mata-vanaġi guruġari

¹ Mai toretore maġa tu Iesu Keriso ġenai Barau na kara evaġa-foforiato guruġana. Barau na eviniato, korana tu eurato, Iesu na ġena vetuġunaġi tarimari dori moġo ġeġorani dagarari bene vaġa-ribari ġana. Keriso na aneru etuguato, ġena vetuġunaġi tarimana Ioane evaġa-ribaiato.

² Ioane na Barau ġena guruġa ema Iesu Keriso ġena vevarifju eġitarito dagarari mabarari evari-fiurito.

³ Mai peroveta guruġari beiaviani tarimana tu beverereni, ema mai peroveta guruġari, Ioane na etorerito maġeri, beġe seġaġirini ema beġe korana-iaġirini tarimari maki beġe verereni. Korana mai dagara mabarari beġe ġorani ġarona tu varau beragasi-rakava.

Ioane ġena vevaġa-namo guruġana ekalesia doġorori imaima ruarua (7) ġeri

⁴ Au Ioane, Asia tanobaranai ekalesia doġoromi imaima ruarua (7) atore-vinimini: Varevare-bara e maino tu ġomi ġemi ai bene tanu. Mo varevare-bara e maino tu etanuni, etanuto, ema ma beiaġomani Barauna ġenana eiaġomani, ema iauka imaima ruarua (7) Barau ġena terona ġoiranai ġeruġani ġerina eiaġomani,

⁵ ema Iesu Keriso ġenana eiaġomani. Ġia tu Barau ġena guruġa evaġa-moġoniani ema evaġa-foforiani ma vetuġamaġikauna ġesi. Ġia tu mero guinena mase na evarigisi-ġenoġoito, ema ġia tu tanobara vereri mabarari ġeri Vere.

Ġia na eura-vinirani e ġera rakava rarana na eġurigi-fitogaro.

⁶ benamo Barau ġena Basileia doġorona tarimarai evaġa-iaġorato, ema Rubu Veaġa vereri ai evaġa-iaġorato, ġia Tamana e ġena Barau vetuġunaġina bitana iaġo-vini ġana. Ġia ġenai mareva baregona e seġuka bene tanu vanaġivanaġi! Amen.

⁷ Gogitaia, ġia tu magube nuġana na eiaġomani, mata mabarari na beġe ġitaiani, ġegwanuato tarimari na maki. Ema tanobara tarimari mabarari ġia koranai beġe taġi-rakavani. Mo tu moġoni. Amen.

⁸ Vereġauka Barau ekirani, “Au tu Alefa ema Omega, (ġiniguinena ema dokona), atanuni, atanuto, e ma baiaġomani, Iaru-korokoro Barauna.”

Keriso Ioane ġenai efoforito

⁹ Au Ioane, ġomi tarikakami ema Vereġauka ġena ġauvei tavei-vegogoani tarimagu. Au tu ġomi ġesi Iesu ġena maġuri nuġanai tamidigu-midigu sebonani, e Barau ġena Basileia nuġanai tatanu-sebonani, ema meto nuġari ai tavevaġa-gwaġiġini e taruġa-gwaġiġini. Au Barau ġena guruġa aġobata-iaġiani ema Iesu varina guruġari avaġa-moġonirini e akiraġi-foforirini ġaramanai tu, Patmos motumotunai ġea tore-raga-kwaneguto.

¹⁰ Vereġauka ġena ġaro ai Barau Iaukana na eboroġiguto, benamo murigu ai garo baregona ta noġa moġo dudu guruna kavana aseġaġiato.

¹¹ Mo garo tu maġesina ekirato: “Kara boġitarini dagarari bukai bono tore-vanaġiri, benamo mai ekalesia doġorori imaima ruarua (7) maġeri ġeri bono tuġu-iaġori: Efeso, Smena, Pegamo, Taiatira, Sadis, Filadelfia ema Laodikea ġeri.”

¹² Aruġa-kureto, deikara na au evaġa-guruġaguto naġitaia ġana, benamo au na golo na lamefa torekauri ġeveirito dagarari vekaravari (7) aġitarito.

¹³ Mo lamefa torekauri dagarari vekaravari ai tu tarima ta noġa moġo Tarimarima Natuna kavana, ġena dabuġa tu mauka kenene evarigoto mo kwakuna fanafanana, ema kobana tu golo beletana na etore-ġeġeraġiato.

¹⁴ Ġia debana ema ġuina tu kurokuro vulu kavana, snou noġa kuro-ġaroġaro, ema matana tu karava moreri noġa moġo ekimore-kimoreato-ġoi.

¹⁵ Ġia kwakuna fanafanana tu auri boraborari karava na ġegaburini, benamo ġeveiginikaurini nai ġeveġia-veġiani kavana. Ma garona tu ġaruka vovoka ġeġaru-gwadani gururi kavana.

¹⁶ Ġia ġimana aroribanai tu visiġu imaima ruarua (7) eġabirito, ma bokana na tu vetari baġana matana reketa-reketa raga-rakava-rakava eraka-rosito. Ġia ġoirana ġitaġitana tu ġaroġota kirikiri, ġaro etorani mamana kavana.

¹⁷ Au na aġitaġato nai, kwakuna koranai aketo-tarito mase tarimana ta noġa moġo. Benamo ġia ġimana aroribana au iatagu ai etore-kauato, bena ekirato, "Asi nogari! Au tu ġiniguinena ema dokona.

¹⁸ Au tu maġuri atanuni. Amaseto, senaġi toma au tu maġuri batanu-vanaġi vanaġini. Ema Mase e mase tarimari iaukari ġetanuni Gabuna (o Hades) kina tu au ġegu ai.

¹⁹ Moġesina naima mai oġitarini dagarari mabarari bono tore-vanaġiri, mai tu initema ġetanuni dagarari ema ġoirai vauro beġea ġorani dagarari.

²⁰ Mai visiġu imaima ruarua (7) au ġimagu aroribanai boġitari ema lamefa torekauri dagarari golo na ġeveirito imaima ruarua (7) anina vekuretoġana tu maġa: Visiġu 7 tu ekalesia doġorori 7 ġeri aneru. Ma golo na lamefa torekauri ġeveirito dagarari 7 tu ekalesia doġorori 7."

2

Vevaġa-riba guruġana Efeso ai ekalesia doġorona ġena

¹ "Efeso ai ekalesia doġorona ġeri aneru tu maġesi bono tore-vinia:

Ġimana aroribanai visiġu imaima ruarua (7) eġabi-taġorini ema golo na lamefa torekauri ġeveirito dagarari 7 vekaravari na erakaoni tarimana ġena guruġa tu maġeri.

² Ġoi ġemu veġa namori, ġemu ġauvei nuġanai ġemu vekwaraġi ema ġemu vevaġa-gwaġiġi tu au ma ribagu. Ema au ribagu, tarima rakavari ġoi na asi bogabi-raġerini, ema asi apostolo tarimari, senaġi tauġeri moġo apostolo tarimari ai ġevevaġa-iaġoni tarimari, maki ġoi na otovo-naġirito, benamo oribarito ġia tu ġofaġofa tarimari.

³ Au aragu ġaramanai meto oġoitaġoto, senaġi ovevaġa-gwaġiġito ema okokoreto, asi kota maki oruga-moirato.

⁴ Senaġi mai dagara sebona moġo ġemu ai asi aura-viniani: Tovotovonai ġemu veuravini baregona au ġegu ai otoreato-ġoi, moġa tu oiaġuiato.

⁵ Bono tuġamaġi-ġenoġoi, ġoi tu kamasi oġabi-raġeguto, ma boketo tu ainai mani boa raġasi! Ġemu rakava ġenana bono vetuġamaġi-kure, be tovotovonai oveirito-ġoi veġiri ma bono veiri. Bema asi bovetuġamaġi-kureni ma asi boraka-kureni nai, au tu baiaġosini, benamo ġemu lamefa vaġa-ruġakauna dagarana gabuna na basi ġabi-veġitaiani.

⁶ Senaġi ġoi ġemu namo tu Nikolaita tarimari ġeri veġa rakavari asi oura-vinirini. Mogerri veġa tu au na maki asi aura-vinirini.

⁷ Ma seġana tarimana na Iauka Veaġa na ekalesia doġorori kara ekiravara-vinirini gurugari tu bene seġaġiri. Bekokoreni tarimana tu au na maoro baviniani, ġia maġuri ġauna, Barau ġena paradaiso ai etubuni dagarana, ġwaġwana beġaniani."

Vevaġa-riba guruġana Smena ai ekalesia doġorona ġena

⁸ Smena ai ekalesia doġorona ġeri aneru tu maġesina bono tore-vinia:

"Ġiniguinena ema dokona, e emaseto benamo ma emaġuri-ġenoġoito tarimana ġena guruġa tu maġeri:

⁹ Ġoi meto ema midigumidigu oġoitaġoni au ma ribagu, ema asi ġemu asi ġamu maki au ma ribagu. Senaġi moġoni veġata ġoi tu farefare vovoka tarimamu! Mani tauġeri moġo ġevekiragini Iuda tarimari ġetoni tarimari na ġoi iatamu ai guruġa rakavari ġekiraġirini gurugari tu au ma ribagu. Ġia tu dia Iuda tarimari korikori, a ġia tu Satani ġena doġoro tarimari.

¹⁰ Ġoirai midigumidigu tari dori oġoitaġorini, senaġi mo midigumidigu gariri asi bono vei. Bono ġitaia, ġomi kotari tu Diabolo na betovo-naġimini, be diburai betoremini, benamo monai ġaro gabanana (10) boġo midigu-midiguni. Monai maki enabe bomaseni, senaġi ġemu vetuġa-maġikau au ġegu ai tu bene tanu. Moġesina boveini nai tu, maġuri koronana bavinimuni.

11 Ma seġana tarimana na Iauka Veaġa na ekalesia doġorori kara ekiravara-vinirini gurutari bene seġaġiri. Bekokoreni tarimana tu mase vaġa-ruaruana na asi bevaġa-rakavaiani.”

Vevaġa-riba gurutari Pegamo ai ekalesia doġorona ġena

12 “Pegamo ai ekalesia doġorona ġeri aneru tu maiġesina bono tore-vinia:

Ġena vetari baġana matana reketa-reketa ma ragari tarimana ġena gurutari tu maiġeri:

13 Au ribagu ġoi ainai otanuni. Ġoi tu Satani ġena vere seana evaġa-ruġa-tariato vanuġanai otanuni. Senaġina ġoi na au aragu tu ma moġonimu ġesi okorana-iaġiani, ġemu veġabidadama au ġegu ai maki asi veġata oraga-kwaneato. Antipas ġomi ġemi vanuġa baregona nuġanai ġevaġi-maseato ġaronai maki, ġoi ġemu veġabidadama tu asi oraga-kwaneato. Antipas tu ma vetuġa-maġikauna ġesi au varigu evaġa-moġoniato-ġoi ema ekiragi-foforiato-ġoi. Satani tu mani ġomi ġemi vanuġa baregona nuġanai etanuni.

14 Senaġi dagara tari ġoi ġemu ai maniġeri au na tu asi aura-vinirini. Tarima kotari ġoi rekemu ai maniġeri tu Balam ġena vevaġa-riba veġari roġo ġekorana-iaġirini. Balam na vevaġa-riba kerereri Balak eviniato nai, Israela tarimari egorikau-darererito, bona rakava ġevito, kwaivakuku ġevinirito bureġari ġeganirito ema mata-boraġa veġari ġevirito-ġoi.

15 Moġa kavana ġoi rekemu ai tarima kotari maniġeri maki Nikolaita doġoro tarimari ġeri vevaġa-riba ġofaġofa veġari ġekorana-iaġirini.

16 Govetugamaġi-kure! Bema asiġina nai tu, au ġoi ġemu ai baiaġosi-ġarimogini, benamo vetari baġana au murugu ai mainana basi vaġa-vevaġirini.

17 Ma seġana tarimana na Iauka Veaġa na ekalesia doġorori kara ekiravara-vinirini gurutari bene seġaġiri. Bekokoreni tarimana tu, au na mana baviniani. Mai mana maiġa toma tu vekuretoġa etanuni. Ema ġia tu na au fore kurokurona ta baviniani. Mo fore kurokurona iatanai tu ara varigu ta etoreato, mo tu ta asi beribani, beġabiani tarimana na moġo beribaiani.”

Vevaġa-riba gurutari Taiatira ai ekalesia doġorona ġena

18 “Taiatira ai ekalesia doġorona ġeri aneru tu maiġesina bono tore-vinia:

Barau Natuna, matana tu karava moreri noġa moġo kimorekimore, ma kwakuna fanafanari tu auri boraborari karava na ġegaburini, benamo ġevei-ġinikaurini nai ġeveġia-veġiani kavana, ġena gurutari tu maiġeri:

19 Ġemu ġauvei, ġemu veuravini ema veġabidadama, ġemu vetuġunaġi iaġovini ema vevaġa-gwaġiġi, ema toma ġauvei oveiani tu barego lelevaġi, tovtovonai oveirito-ġoi moġeri tu ovanaġirini. Moġeri mabarari aġita-iaġomarini, be ribagu.

20 Senaġi mai dagara sebona ġoi ġemu ai maniġa tu asi veġata aura-viniani. Ġoi tu Iesebel, tauġena moġo evekiraġini peroveta vavinena etoni maniġa, ġoi na tu oġabi-raġeani. Mani vavine ġena vevaġa-riba na au ġegu vetuġunaġi-iaġovini tarimari ġemata-boraġani ema kwaivakuku ġevinirini bureġari ġeganirini.

21 Au na ġia tu ġena taimi aviniato, mo mata-boraġa veġari na bene vetuġamaġi-kure ġana. Senaġi ġia tu asi veġata eurani bene vetuġamaġi-kure.

22 Moġa lorinai ġia tu genagena gabunai bafu-kauani, monai bea midigu-midiguni. Ġia ġesi veġura-vanaġi veġari ġeveini tarimari maki ġia ġesi midigumidigu baregona beġe ġabi-sebonaiani. Bema ġia Iesebel ġena veġura-vanaġi veġari na asi beġe vetuġamaġi-kureni nai tu, mo midigumidigu beġe ġabiani.

23 Ġia natuna maki au na bavaġi-maserini. Benamo monana ekalesia doġorori mabarari beġe ribani, au tu tarimarima nuġari iaġasiri ema ġeri tuġamaġi aragaġirini tarimagu. Ema ġomi tata maki ġemi veġa ilailari ai voimi bavinimini.

24 Ġomi Taiatira ai ekalesia kotari tu Iesebel ġena vevaġa-riba rakavari asi ġokorana-iaġirini ema Satani ġena iaunega vekuretoġari, dobudoburi ġekiraġirini, tu asi ġoribarini. Ġomi mani ġemi tu avaġa-guruġa korikorimini, ġemi ai meto ta tu asiġina ġinavaġi batore-kauani.

25 Dagara baregona tu, mani kara ġemi ai maniġa, moġa boġono ġabi-gigitaria mo, au bana ġenoġi-iaġoma.

26 Bekokoreni ema au ġegu ura bekorana-iaġiani mo magona bea ġabiani tarimana tu, au na maoro baviniani, tanobara beseri beguine-iaġirini.

27 Ġia na tanobara beseri tu auri togoina na beġori-kaurini ma seġukana baregona ġesi, ma tano ġurori noġa bekwari-kira kirarini. Au na ġia seġuka baviniani, Tamagu ġenana seġuka aġabiato ilailanai.

28 Ema ġia tu au na laġani visigu baviniani, (mo seġuka vetoġana).

29 Ma seġana tarimana na Iauka Veaġa na ekalesia doġorori kara ekiravara-vinirini gurutari bene seġaġiri.”

3

Vevaġa-riba guruġana Sadis ai ekalesia doġorona ġena

1 “Sadis ai ekalesia doġorona ġeri aneru tu maiġesina bono tore-vinia:

Barau Iaukana imaima ruarua (7) ġia ġenai ġetanuni ema visiġu imaima ruarua (7) eġabi-taġorini tarimana ġena guruġa tu maiġeri: Goi na ġauvei oveirini tu au ma ribagu. Tarimarima na ġoi ġekiraġimuni, ġekirani, “Mani ekalesia tu maġuri” ġetoni, senaġi korikorina ġoi tu mase otanuni.

2 Notataġa, ġemu ai veġabidadama maġurina kotuna moġo dori emase-vaġini maniġea novaġa-kokorea. Korana au na ġoi ġemu ġauvei aġoitaġoato dia roroġoto au ġegu Barau goiranai.

3 Moġesina naima Vari Namona ġoseġaġiato ma ġoġabi-raġeato maniġa boġono tuġamaġia ema boġono korana-iaġia, be ġemi rakava ġerina ġovetuġamaġi-kure. Bema asi botataġani nai, au ġemu ai noġa moġo lema tarimana ta kavana baiaġosini. Be kamara taimi ai basi raġasini, moġa tu asi kota maki boribaiani.

4 Senaġi ġoi ġemu tarima kotari Sadis ai maniġeri, ġeri dabuġa asi kota maki ġevaġa-miro-kararito. ġia maniġeri tu au ġesi baġa rakao-rakao vegogoni, ma dabuġa kurokurori baġa riġorini, korana ġia ġeri veiġa tu iobukaiobuka bene.

5 Bekokoreni tarimana tu ġia kavari dabuġa kurokurori na bavaġa-dabuġaiani. Au na ġia arana maġuri bukana na asi barumu-fitoġaiani, a au Tamagu ma ġena aneru ġesi ġoirari ai ġia arana bakiraġi-foforiani.

6 Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġiri.”

Vevaġa-riba guruġana Filadelfia ai ekalesia doġorona ġena

7 “Filadelfia ai ekalesia doġorona ġeri aneru tu maiġesina bono tore-vinia:

Davida ġena ki, (vevaġa-maġuri kina), eġabi-taġoani tarimana, tarima veaġana ema moġoni korikorina. ġia na kara bekeo-fakaiani, tarima ta na asi ma bekou-ġauani riba, ema bekouani dagarana ta na asi ilaila ma bekeoani riba. Mai tarima ġena guruġa tu maiġesina:

8 Goi ġemu ġauvei oveirini au ma ribagu. Noboġe, ġoiramu noġitaia, ġoi ġoiramu ġatama bokana tu bakeo-fakaia, ma tarima ta asi ġena seġuka ma bekouani. Au ribagu ġoi ġemu kokore tu misina moġo, senaġi au ġegu guruġa tu oġabi-gigitariato, ema au aragu maki asi okira-ġuniġauato.

9 Bono ġitaia, mani Satani ġena rubu tarimari maniġeri tu tauġeri ġevetkiraġini Iuda tarimari ġetoni, senaġi ġia tu dia Iuda tarimari. ġia maniġeri tu au na baġabi-iaġosirini, ġoi kwakumu korana beġeasi tutuġu-tarini. Benamo beġe riba-maoroni, ġoi tu au na aura-vinimuni.

10 Goi tu au ġegu vevaġa-naġi guruġari okorana-iaġirito ma ovevaġa-gwaġiġito naima, tanobarai veribaġani taimina bevotuni nai, ġoi tu baġitaġau-ginikaumuni. Mo veribaġani na tu mai tanobara iatanai ġetanuni tarimari mabarari batovo-naġirini.

11 Au tu dori aiāġosini. Kara oġabiato maniġa tu bono ġabi-gigitaria, be tarima ta na ġemu korona, ġemu kokore auna, asi bene ġabia.

12 Bekokoreni tarimana tu au Tamagu ġena Rubu Vevaġana duġuna tarimanai bavaġa-iaġoani. Mo gabu asiġina ġinavaġi ma beiaġuiani. Au na ġia ġenai au ġegu Barau arana ema au ġegu Barau ġena vanuġa baregona o siti arana baberaiani. Ierusalemata variġuna tu au ġegu Barau ġena siti, ma mai siti maiġa tu guba na au Tamagu ġenana bemaġiġoni. Au aragu variġuna maki ġia ġenai batoreani.

13 Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġiri.”

Vevaġa-riba guruġana Laodikea ai ekalesia doġorona ġena

14 “Laodikea ai ekalesia doġorona ġeri aneru tu maiġesina bono tore-vinia:

Guruġa moġoni korikorina ekiraġiani tarimana arana Amen ġenana eiaġosini. ġia tu ma ġena vetuġamaġikau e Barau ġena guruġa evaġa-moġoni korikoriani ema ekiraġi-foforiani tarimana, ema Barau na eveirito dagarari mabarari ġenana ġeiaġomato tarimana ġena guruġa tu maiġeri:

15 Goi ġemu ġauvei oveirini au ma ribagu. Au ribagu, ġoi tu dia faraka ema dia seġuka. Au ġegu ura sebona ġoi tu boro faraka moġo o boro seġuka moġo!

16 Senaġi ġoi tu seġuseġu, a dia seġuka moġo o dia faraka moġo. Moġesina naima ġoi tu au bokagu na bakanunu-fitogaumuni.

¹⁷ Ğoi tu okirani, ‘Au tu ġegu farefare vovoka tabutabu, ġegu-ġagu ġutuma gorogoro bavaġa-vegogori, be au tu ilaila, kara ta asi ma atuġamaġiani.’ Senaġi ġoi tu asi oriba-maoroni ġoi tu madi kekei ma vetuġamu, asi ġemu asi ġamu, ġoi tu mata-bubu ema asi dabuġamu, korimu.

¹⁸ Au na ġoi asisiba-vinimuni, akiramuni, au ġeguna golo bono voi. Korana auna golo tu karava na evaġa-veveato, benamo momori mabarari tu ġeiarevarito. Be au ġegu ai mai golo bovoiani nai tu, botaġani. Ema dabuġa kurokurori maki bono voi, be bono vedabuġa-iaġi, kefimu korina maiakana bono kou-ġaua. Ema mata muramurana maki bono voi, be matamu ai bono torea, bena bono boġeboġe.

¹⁹ Au na aura-vinirini tarimari tu akira-feirini ema atoto-maororini. Moġesina naima ġemu maġuri ema veġa bono tuġamaġi-ginikaua, benamo bono vetuġamaġi-kure ma bono raka-kure.

²⁰ Noseġaġi! Au ġatama-bokai aruġa-taġoni ma afidifidini. Bema tarima ta na au garogu beseġaġiani, benamo ġatama-boka bekeo-fakaiani nai, au baraka-toġani, benamo ġia ġesi baġa ġaniġanini ema ġia maki au ġesi beġaniġanini.

²¹ Bekokoreni tarimana tu au na maoro haviniani, au ġesi ġegu teronai baġa tanuni. Au kavana, au akokoreto nai Tamagu ġena teronai Tamagu ġesi ġatanuni.

²² Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġi.”

4

Barau ġena terona gubai

¹ Maiġa murinai au aboġe-iaġoto tu, ġatama-boka vekeofaka-taġo guba vanuġanai aġitaiato. Benamo garo ta kibi guruna noġa, mo tovoovonai aseġaġiato garona moġa ekirato, “Maiġana noma raġe, be maiġa murinai kara dori ġeġorani dagarari nama vaġa-ġitamu.”

² Asikauna Iauka Veaġa na eboroġiguto, benamo ġoiragu ai tu tarima ta guba teronai etanu-taġoto-ġoi aġitaiato.

³ Mo teronai etanu-taġoto-ġoi tarimana vetoġana tu fore arana iaspa ġekimore-kimorerini marevari, ema fore kakakakari arana kanelia marevari kavana, marevana tu irau moġo. Ma mo terona tu kevau na eġeġeraġiato. Mo kevau vetoġana tu noġa moġo emeral forena kavana.

⁴ Mo terona moġa tu terona gabana ruarua ma vasivasi (24) na ġetore-ġeġeraġiato. Ma mo terona 24 ai tu veġitaġau tarimari baregori tata ġetanuto. Ġia mabarari tu dabuġa kurokurori moġo ġerigoto, ema tata debari ai tu golo koronari sebori sebori ġeveito.

⁵ Mo terona monana kiriku ekimoreato-ġoi, garo baregori ema ġaita eragato-ġoi. Ma mo terona ġoiranai tu lamefa imaima ruarua (7) ġeġarato-ġoi. Mo lamefa ġeġarato-ġoi moġeri, mo tu Barau iaukana imaima ruarua (7).

⁶ Ema mo terona ġoiranai maki davara veġiaveġiana, nega-vaġuravaġura aisi kavana.

Ma maġuri dagarari vasivasi (4) tu nuġana kiriku buroburonai, mo terona ġeruġa-ġeġeraġiato. Ġia ġoirari ema muriri tu matari tu ġutuma.

⁷ Mo maġuri dagarana guinena tu noġa moġo laion, vaġa-ruaruana dagarana tu noġa moġo boromakau tauna, vaġa-toitoina ġoirana tu tarimarima kavana, ema vaġa-vasivasina tu noġa moġo erovoni ugavana kavana.

⁸ Mai maġuri dagarari maiġeri tata faneri tu imaima sebona (6), ma mai faneri maiġeri mabarari tu mata na moġo ġevonuto, faneri nuġana rekeri dagarari maki mata moġo. Ġia tu vanaġivanaġi boġi-laġani asi ġeiaġaraġini, mai guruġa maiġa asi ġevaġa-ketoani, ġekirani:

“Veaġa, veaġa, veaġa,
Vereġauka, Barau tuġutuġu, tu veaġa,
guinenai etanuto-ġoi,
maitoma maki etanuni,
ema ma beiaġomani!”

⁹ Mai teronai etanu-taġoto-ġoi tarimana tu maġuri etanu-vanaġi vanaġini. Ma maiġeri maġuri dagarari na mo teronai etanu-taġoto-ġoi tarimana ġevaġa-raġeato-ġoi, e ma vegubakauri ġesi ġetoma-rakarigoato-ġoi, ema ġetanikiu-viniato-ġoi nai,

¹⁰ Mo veġitaġau tarimari baregori gabana ruarua ma vasivasi (24) tu mo teronai etanuni tarimana ġoiranai ġevetui-tarito-ġoi. Benamo mai maġuri etanu-vanaġi vanaġini tarimana ġetoma-rakarigo viniato-ġoi. Geri korona maki ġia ġoiranai ġetore-taririto-ġoi, benamo ġekirato-ġoi,

¹¹ “Ġai ġema Vereġauka ema Barau,

gōi tu iaru-korokoro,
 be tarimarima ema maḡuri dagarari mabarari na gōi tu beḡene vaḡa-raḡemu, beḡene
 gubakaumu,
 ema seḡuka maki mabarana gōi ḡemu.
 Korana dagara mabarari tu
 gōi na oveirito,
 ema gōi ḡemu urai moḡo oveirito
 ema initoma ḡetanuni.”

5

Mamoe natuna ema toretore fefana maukana

¹ Benamo aboḡeto, mo teronai etanu-taḡoto-gōi tarimana ḡimana aroribanai tu toretore fefana maukana ta aḡitaiato. Mo fefa tu tavita-tavitai ma toretorena, ḡeiokuato, ema vaḡa-imaima ruarua (7) veḡata ḡekada-ḡauato. Mo ḡekada-ḡaurito gaburi mabarari tu tabu vetoḡana ḡetoreato.

² Ma gwada rakavarakava aneruna ta aḡitaiato, garona tu asikeikeina eḡobatato, ekirato, “Deikara tu ilaila mai kumuka tabuna bekokiani riba, e mai fefa maukana ma toretorena bekeoani?”

³ Senaḡi tarima ta gubai o tanobarai o tanobara gaburenai ta asi ilaila veḡata mo fefa bekeo-fakaiani ema nuḡanai beboge-ḡurani.

⁴ Benamo ataḡi-rakava rakavato, korana tarima sebona kwarikwari ta maki asi veḡata ḡeḡoitaḡoato, mo fefa maukana ma toretorena bekeoani ma nuḡanai beboge-ḡurani.

⁵ Benamo mo veḡitaḡau tarimari baregori ta na ekiraguto, ekirato, “Asi notaḡi! Noboḡe! Iuda doḡorona ḡeri laion, Davida Natuna noḡitaia, ḡia tu ekokoreto. Gia na mani fefa maukana ma toretorena bekeoani bene, ema mani ḡekumuato kumukari taburi imaima ruarua (7) maki bekokirini bene.”

⁶ Benamo aboḡeto, Mamoe Natuna aḡitaiato. Gia tu terona nuḡana buroburonai eruḡa-taḡoto-gōi, mo maḡuri dagarari vasivasi (4) ema veḡitaḡau tarimari baregori tu ḡeruḡa-ḡeḡeragiato. Mamoe Natuna ḡitaḡitana tu tari na ḡevaḡi-maseato. Gia guduna tu imaima ruarua (7) ema matana maki 7. Mo tu Barau iaukana 7 ekiraḡirini. Gia tu Barau na tanobara mabarana ḡana etuḡu-iaḡorito.

⁷ Mamoe Natuna eiḡoto, benamo teronai etanu-taḡoto-gōi tarimana ḡimana aroribanai mo fefa maukana ma toretorena moḡa eḡabiato.

⁸ Fefa maukana ma toretorena eḡabiato nai, maḡuri dagarari vasivasi ema veḡitaḡau tarimari baregori 24 Mamoe Natuna ḡoiranai ḡevetui-tarito. Gia tata tu ma ḡeri hap (gita noḡa) ema golo ḡurori nuḡari ai tu muramura goḡuna ma bonari. Mo goḡu ma bonari tu Barau ḡena tarima veaḡari ḡeri ḡauḡau guruḡari.

⁹ Benamo ḡia na mari variḡuna ta maiḡesina ḡemariato, “Goi na fefa maukana ma toretorena bogabiani ilaila, ema ḡia kumuna ma taburi maki bokeo-fakarini ilaila, korana gōi tu ḡevaḡi-masemuto, ma gōi raramu na tau vavine Barau ḡena ovoi-vaḡirito doḡoro mabarari ḡerina, e garo mabarari ḡerina, ema bese mabarari ema tanobara mabarari na.

¹⁰ Goi na ḡia tu Barau ḡena Basileia doḡorona tarimari ai ovaḡa-iaḡorito, ema Barau vetuḡunaḡina beḡene iaḡo-vini ḡana Rubu Veaḡa vereri ai ovaḡa-iaḡorito. Gia tu tanobara mabarana iatanai beḡe veḡorikauni.”

¹¹ Ma aboḡe-iaḡoto, aneru garori asisebo-asisebo aseḡaḡirito. Moḡeri aneru tu asi iavi-iaiviri, milion ḡutuma maki ḡevanaḡirito. Gia na terona ema maḡuri dagarari vasivasi ema veḡitaḡau tarimari baregori ḡeruḡa-ḡeḡeragiato.

¹² Ma mai mari ḡemari-gigitariato, “Mamoe Natuna, ḡevaḡi-maseato dagarana, tu ma ḡena maoro, seḡuka beḡabiani, e farefare vovoka, e iaunega, ema kokore beḡabiani! Ema ḡia ma ḡena maoro tarimarima mabarari na beḡe gubakauani, ma beḡe vaḡa-raḡeani ema beḡe vonevone-raḡeani!”

¹³ Benamo Barau na eveirito dagarari mabarari guba nuḡanai, tanobara iatanai, tanobara gaburenai, e davara nuḡanai dagarari mabarari na mai mari ḡevaisiato aseḡaḡirito, “Teronai etanu-taḡoni Barauna

ema Mamoe Natuna,
 tauri ruarua na vevaġa-raġe,
 vegubakau, mareva baregona,
 ema seġuka beġene ġabiri,
 bene iaġo mo vanagivanagi asi magona!”

¹⁴ Benamo maġuri dagarari vasivasi na ġevaġa-moġoniato, ġekirato, “Amen!” Ema veġitaġau tarimari baregori 24 ġevetui-tarito, Barau ġetoma-rakarigo viniato.

6

Fefa maukana ma toretorena ġekumukaiato kadari o tabu vetoġari Mamoe Natuna na ekeorito

¹ Benamo au na Mamoe Natuna aġitaiato, fefa maukana ma toretorena vaġa-imaima ruarua (7) ġekada-tariato dagarana kadana ġiniginena ekeo-fakaiato. Moġa ekeoato-ġoi nuġanai tu, maġuri dagarari vasivasi fakari ai ġia ta eguruġato, garona tu noġa guba eguruato, ekirato, “Noiaġoma!”

² Aboġe-iaġoto nai tu, hosi kurokuro na aġitaiato, eraġeto tarimana ġimana tu ma fevana, ema ġia tu korona ta maki eviniato. Ġia eraka-rosito tu, vetari ai ekokoreto-ġoi ema eiaġoto tu ma bene kokore ġana.

³ Benamo Mamoe Natuna na kumuka vaġa-ruaruana kadana ekeo-fakaiato nai, maġuri dagarana vaġa-ruaruana aseġaġiato, ekirato, “Noiaġoma!”

⁴ Benamo hosi ta ma eraka-rosito. Moġa tu hosi kakakakana. Eraġeto tarimana tu seġuka eviniato, tanobara na maino bene ġabi-veġitaia, be tarimarima tauġeri beġene vevaġi-masemase ġana. Mo tarima tu vetari baġana asikeikeina ta eviniato.

⁵ Kumuka vaġa-toitoina kadana ekeo-fakaiato nai tu, maġuri dagarana vaġa-toitoina aseġaġiato, ekirato, “Noiaġoma!” Au aboġe-iaġoto nai, hosi dubadubana aġitaiato, eraġeto tarimana ġimanai tu dagara ġeri meto vaġa-foforiri o sikele dagarana ta eġabiato.

⁶ Benamo au na garo ta maġuri dagarari vasivasi (4) fakari na eiaġomato aseġaġiato, ekirato, “(Bita doġe be), widi kilo sebona davana tu ġaro sebona ġauveina voina, ema bali (widi kavana) kilo toitoi davana tu ġaro sebona ġauveina voina. Senagi olive diġana ema vine nanuna tu asi boġono vaġa-rakavari.”

⁷ Ma Mamoe Natuna na kumuka vaġa-vasivasina kadana ekeo-fakaiato nai tu, maġuri dagarana vaġa-vasivasina aseġaġiato, ekirato, “Noiaġoma!”

⁸ Aboġe-iaġoto nai tu, hosi ta aġitaiato, tauġanina ġitaġitana noġa kurokuro. Eraġeto tarimana arana tu Mase, ma mase tarimari iaukari ġetanuni Gabuna (o Hades) tu ġia murina na eraganagi-raganagi-toi-ġoi. Tauri ruarua seġuka evinirito, tanobara taviri vasivasi nuġanai tavi sebona beġene ġita-ġaua, be vetari ai, doġe ai, keve rakavari na, ema boġai ġetanuni veganiveġani dagarari na tarimarima beġene vaġi-maseri.

⁹ Ma kumuka vaġa-imaimana kadana ekeo-fakaiato nai tu, Barau ġena guruġa ġaramanai, e mo guruġa ġevaġa-moġoniato ema ġevari-fiuato ġaramanai ġevaġi-maserito tarimari iaukari maġuri fata veaġana gaburenai aġitarito.

¹⁰ Ġia mabarari ġekoġo-baregato, ġekirato, “Vere tuġutuġu, ġoi tu veaġa ema moġoni veġata, aitoma vau ġoi na tanobarai ġetanuni tarimari bovaġa-maoro vinirini, benamo ġai rarama ġevaġa-riġorito bovaġa-voirini?”

¹¹ Benamo ġia mabarari tata dabuġa kurokurori evinirito, ekirarito, negakota roġo ma beġene naritari etato. Beġene vaġa-noga mo, ġia karori toma vetuġunaġi ġeiaġo-vinini tarimari ema tarikakari kotari, ġia ġevaġirito kavana, beġe vaġi-maserini mo, ġeri numera korikori bene ġabia.

¹² Au na Mamoe Natuna aġitaiato, kumuka vaġa-imaima sebona (6) ekeo-fakaiato nuġanai, tano-iaga asikeikeina eragato, e ġaro eduba-dubato, dabuġa dubadubari noġa, e ġue evekurevoto, ekakarato rara kavana.

¹³ Ema guba na visiġu ġeketo-firiġoto tanobara ġana, noġa figi maġitari iavara na figi ġauna na eruku-keto ketorini kavana.

¹⁴ Guba maki erekwa-rekwato, noġa moġo fefa maukana, ġetoretore-iaġiani dagarana, ġeioquani kavana. Ma ġoro ema motumotu mabarari gaburi ekoki-veġitarito.

¹⁵ Benamo tanobara kiniri, e vereri, e vetari ġitaġauna tauri baregori, e ġeri farefare asisebo tarimari, e kokore rakavarakava tarimari, tuġu-rakaorakao tarimari ema maġuri namona e fakanai ġetanuni tarimari, ġia mabarari kouġa nuġari ai ema ġoro ai fore baregori vekaravari ai ġea gumuto.

¹⁶ Benamo ġoro ema fore baregori ġenoġirito, ġekirato, “Ġai iatamai ġoma ketokau, ġoma lautarima, be teronai etanuni Barauna ġoirana ġenana ema Mamoe Natuna ġena baru baregona ġenana ġoma kure-toġama!”

17 Korana ġia ġeri baru ġarona baregona tu varau bevotu, deikara beruġa-tarini riba?"

7

Barau ġena vetuġunaġi tarimari 144,000

1 Moġa murinai aneru vasivasi (4) aġitarito, tanobara daiguniri vasivasi ai ġeruġato. Mo aneru na tu tanobara iavarari vasivasi ġelautaririto, tanobarai e davarai asi beġene raga, ema ġau maki asi beġene kwari-ġarevari ġana.

2 Ma murinai tu aneru ta ma aġitaato, ġaro eraġeni rekena na emaraġeto. Mo aneru na maġuri Barauna ġena vevaġa-moġoni vetoġana o makana eġabi-taġoato-ġoi. Ġia na mo aneru vasivasi, Barau na seġuka evinirito tanobara ema davara beġene vaġa-rakavari aneruri, efarara-vinirito, ekirato,

3 "Tanobara, davara, ema ġau asi roġo boġono vaġa-rakavari, bene iaġo mo, Barau ġena vetuġunaġi tarimari bakuri ai ġia ġena vetoġa baġana toreri murinai vau."

4 Moġa murinai Barau ġena vetoġa bakuri ai ġetorerito tarimari mabarari tu 144,000 aseġaġiato. Ġia tu Isaraela doġorori gabanana ruarua (12) mabarari ġerina, doġorori tu maiġeri:

5 Iuda ġena doġoro tarimari - 12,000

Reubena ġena doġoro tarimari - 12,000

Gad ġena doġoro tarimari - 12,000

6 Asere ġena doġoro tarimari - 12,000

Naftali ġena doġoro tarimari - 12,000

Manase ġena doġoro tarimari - 12,000

7 Simeona ġena doġoro tarimari - 12,000

Levi ġena doġoro tarimari - 12,000

Isakara ġena doġoro tarimari - 12,000

8 Sebulun ġena doġoro tarimari - 12,000

Iosefa ġena doġoro tarimari - 12,000

Beniamina ġena doġoro tarimari - 12,000

Tarima ġutuma lelevaġi dabuġa kurokurori ġeveito

9 Moġa murinai aboġe-iaġoto, tarima ġutuma lelevaġi, asi tau iaviġosina, aġitarito. Mo tu tanobara irauirau mabarana tarimana, e doġoro irauirau mabarana tarimana, e bese irauirau mabarana tarimana, ema garo irauirau mabarana tarimana. Ġia mabarabarari tu terona ema Mamoe Natuna ġoirari ai ġeruġato. Ġia mabarari dabuġa maukari kurokurori ġeveito, ema ġimari ai tu galamo lauri noġa dagarari ġeġabito. (Mo tu ġia ġeri kokore vetoġari).

10 Ġia ġekoġo-baregato, ġekirato, "Vevaġa-maġuri tu ġita ġera Barau, teronai etanukauni Barauna, e Mamoe Natuna ġerina eiaġomani."

11 Ma aneru mabarari na tu terona e veġitaġau tarimari baregori ema maġuri dagarari vasivasi (4) ġeruġa-ġeġeraġirito. Benamo Barau ġena terona koranai ġevetui-tarito, ġoirari tano ai, Barau ġetoma-rakarigo viniato,

12 ġekirato, "Moġoni veġata! Vevaġa-raġe, e mareva baregona, e iaunega, e vevaġa-namo, e vegubakau, e seġuka, ema kokore tu ġita ġera Barau ġena toma bene iaġo vanagivanagġi, Amen!

13 Benamo veġitaġau tarimana baregona ta na edanaġiguto, ekirato, "Mai dabuġa kurokurori na beġe vedabuġa tarimari tu deikara, ema ġia tu ainana beġe iaġoma?"

14 Benamo avaġa-veseto, akirato, "Ġegu vere, au asi ribamu. A ġoi tu ribamu." Benamo ġia na ekira-varaguto, ekirato, "Mai tarima maiġeri tu midigumidigu baregori nuġari na ġeiaġomato. Geri dabuġa tu Mamoe Natuna, ginitaġo mamoe, rarana na ġevei-kurokuro-rito.

15 Moġesina naima, ġia tu Barau ġena terona ġoiranai ġeruġani, ema ġena Rubu Veaġa nuġanai boġi-laġani ġia vetuġunaġina ġeiaġo-vinini. Ema teronai etanuni Barauna na enari-ġaurini.

16 Ġia tu asi ma beġe vito-ġenoġoirini, e bokari asi ma beġe koke-ġenoġoini. Ġaro iatari ai asi ma bekirini ema ġaro seġukana na asi ma begugurari.

17 Korana terona nuġanai etanuni Mamoe Natuna na beġita-ġaurini. Ġia na beġori-iaġorini maġuri nanuna eġaruani gabuna ġana. Ema Barau na matari gorari mabarari bedau-vaġirini."

8

Kumuka vaġa-imaima ruaruana (7) kadana

¹ Mamoe Natuna na kumuka vaġa-imaima ruaruana (7) kadana ekeo-fakaiato nai, guba vanuġanai aoa tavina ta veġata guru ta maki asi eraġeto.

² Benamo Barau ġoiranai ġeruġato aneruri imaima ruarua (7) aġitarito, dudu 7 evinirito.

³ Benamo aneru ta ma eiaġomato, fata veaġana sevinai eruġato, ġimananai tu golo ġurona ta. Ġia tu muramura ma bonana barego lelevaġi ġeviniato, Barau ġena tarima veaġari ġeri ġau-ġau ġesi terona ġoiranai golo fatana veaġanai Barau bene varevare-vinia ġana.

⁴ Mo muramura goġuna ma bonana goġuna ema Barau ġena tarima veaġari ġeri ġauġau ġesi, mo aneru ġimana na ġevaraġeto Barau ġoirana ġana.

⁵ Moġa murinai aneru na golo ġurona eġabiato, fata veaġana karavana na evaġa-vonuato, benamo tanobara iatana ġana efiu-riġoato. Monana ġaita guruna eraġeto, garo ġururi tari ġeraġeto, e kiriku eragato, ema tano eiagato.

Aneru na ġeri dudu ġefurururito

⁶ Benamo aneru imaima ruarua (7) ġeri dudu ġegabi-torerito, beġene furururi ġana.

⁷ Aneru ġiniguinena na ġena dudu efururuato, benamo aisi foreri misimisiri ema karava rara ġesi ġesebonato ġevetoreto. Benamo moġeri mabarari tanobara ġana ebuburiġorito. Ma tanobara tavi toitoi nuġanai tavi sebona eġara-ġosiato, ġau toitoi nuġari ai tu sebori tu ġeġara-gosirito, e ġauġa ema reġi mabarari ġeġara-ġosirito.

⁸ Aneru vaġa-ruaruana na ġena dudu efururuato nai tu, dagara ta, ġoro-dagara-bara ta noġa ma karavana, davarai evefiu-reito. Benamo daġaru-bara tavi toitoi nuġanai tavi ta tu rarai eiaġoto.

⁹ E daġaru-bara maġuri dagarari toiri-toiri nuġari ai sebori tu ġemaseto, e bouti toiri-toiri nuġari ai sebori tu ġeburuto.

¹⁰ Aneru vaġa-toitoina ġena dudu efururuato nai tu, visiġu-dagara-bara ta kere morena kavana guba na eketoto, benamo ġaruka toiri nuġari ai sebori ai, e ġeġaruġarurini nanuri ai eketo-reito.

¹¹ Mo visiġu arana tu “Mamaki”. Nanu gaburi toiri nuġari ai sebori tu ġemamakito. Benamo tarimarima vovoka na mo nanu mamakiri ġeniurito nai ġemaseto.

¹² Aneru vaġa-vasivasina ġena dudu efururuato nai, ġaro e ġue ema visiġu tu taviri toitoiri nuġari ai tavi sebori tu ġesemorito, naima mo tavi toitoiri nuġari ai tavi sebori tu ġemukunato. Moġa lorinai ġaro mamana tavi toitoi nuġanai tavi sebona tu asi emamato, ema boġi tavi toitoi nuġanai tavi sebona ta ġue e visiġu tu asi emamato.

¹³ Benamo aboġeto, ugava ta guba tuġuna vanigerenai erovoto-ġoi aġitaiato, maiġesi ekea-fararato, ekirato, “Tanobarai ġotanuni tarimami, vetuġami kika! Vetuġami kika! Vetuġami kika! Korana tu aneru toitoi, ġeri dudu roġosi ġere furururi aneruri, na ġeri dudu beġe furururini ġururi ai tu, meto ema midigumidigu barego lelevaġina beġorani.

9

Dudu vaġa-imaimana (5)

¹ Aneru vaġa-imaimana na ġena dudu efururuato, benamo visiġu ta aġitaiato, guba na eketoto tanobarai. Mo visiġu tu guri varigo kwareġana, (iauka rakavari ġeri dibura), kina eviniato.

² Mo guri ekeo-fakaiato nai tu, goġu evebubu-rosito noġa moġo karava baregona goġuna kavana. Benamo mo guri goġuna na ġaro mamana ema guba fakana emukuna-ġaurito.

³ Goġu nuġana na madudu ġeraka-rosito tanobarai, ema seġuka evinirito, seġukana tu kavikavi seġukari kavana.

⁴ Ġia ekirarito, tanobarai ġauġa ta, e tanobarai ġetubuni dagarana ta, ema ġau ta asi beġene vaġa-rakavaia, senaġi deidei bakuri ai Barau ġena vetoġa o maka asi etanuni tarimari moġo beġene vaġa-rakavari etato.

⁵ Ekirarito maki, mo tarima asi beġene vaġi-maseri, senaġi ġue imaima (5) nuġanai beġene vaġa-midigu midiguri. Mo midigumidigu ġeganito moġeri tu kavikavi na tarima ekavirini midiguna kavana.

⁶ Mo ġue imaima nuġanai tarimarima tu ġemase ġana mase beġe vetauani, senaġi asi beġe maseni. Ġeri ura baregona ġemase beġe toni, senaġi mase ġerina beveġitani.

⁷ Mo madudu ġitaġitari tu hosi noġa, ġea vetari ġana ġeruġa-toreto. Ġia debari ai tu golo koronana noġa moġo dagarana ta, ema ġoirari ġitaġitari tu tarima ġoirari kavana.

⁸ Ġuri tu vavine ġuri noġa moġo, doġari tu laion doġari kavana.

⁹ Kobari kouġauri ġana dabuġana tu auri dabuġana kavana. Faineri ġururi tu hosi asisebo kwakuri ġururi ema kariota asisebo vetari nuġanai ġeraka-toġani ġururi kavana.

¹⁰ Ġia tu ma ġiġuri, ema ġiġuri bonari tu kavikavi ġiġuri bonari kavana. Ġiġuri nuġari ai tu tarimarima ġue imaima (5) beġene vaġa-midigu midiguri seġukana etanuni.

¹¹ Ĝia tu ma ĝeri vere baregona o kini. Ĝia na eĝita-ĝaurini. Ĝia dagarana tu mo guri variĝo kwareĝana aneruna. Mo aneru arana Heberu garori ai tu Abadon, ma Grik garori ai tu Apolion, (anina tu vaĝa-rakava kwaikwai tarimana).

¹² Rakava baregori giniguinena tu bekori moĝa, ma ruarua tu vau beĝe iaĝomani.

Aneru vaĝa-imaima sebona (6) na dudu efururuato

¹³ Aneru vaĝa-6 na ĝena dudu ma efururuato, benamo fata veaĝana daiguni vasivasi ai gudu vasivasi moĝeri ĝerina garo ta eiaĝomato aseĝaĝiato. Mo fata tu golo na ĝeveiato, ma Barau ĝena terona ĝoiranai etanuni.

¹⁴ Mo garo na aneru vaĝa-6 na ma ĝena dudu moĝa ekiraiato, ekirato, “Aneru vasivasi, garuka baregona arana Eufrate ai ĝebaru-taririto, moĝeri noruĝa-vaĝiri.”

¹⁵ Benamo mo aneru vasivasi eruĝa-vaĝirito, mai laĝani, mai ĝue, mai ĝaro, mai aoa ĝana Barau na eĝabi-torerito tu, tarima toitoiri nuĝanai sebona tu beĝene vaĝia.

¹⁶ Hosi tarimari hosi ai ĝeraĝeto ĝena numera tu milion sinau ruarua (200). Mai numera tu aseĝaĝiato.

¹⁷ Mo hosi e iatari ai ĝeraĝeto tarimari au ĝegu mata-vanaĝi ai vetoĝari tu maĝesina aĝitarito: Ĝia kobari kouĝauna ĝana auri dabuĝana tu karava ĝeĝarani kakakaka karavari kavana, e blu, ema karava moreri o salfa borabora kavana. Hosi debari tu laion debari kavana, e blu, ema karava moreri o salfa borabora kavana. Hosi debari tu laion debari kavana, e blu, ema karava moreri o salfa borabora kavana. Hosi debari tu laion debari kavana, e blu, ema karava moreri o salfa borabora kavana.

¹⁸ Mo tarimarima vaĝa-midigumidiguri dagarari toitoi moĝeri, karava, goĝu, ema karava moreri o salfa, hosi bokari na ĝeraka-rosito dagarari, na tarimarima toiri-toiri nuĝanai sebori-sebori tu ĝevaĝi-maserito.

¹⁹ Mo hosi ĝeri seĝuka tu bokari ai ema ĝiĝuri ai maki. Korana ĝiĝuri tu mota kavana, ma debari. Mo ĝiĝuri debari na tarimarima ĝevaĝa-midigu midigurito-ĝoi.

²⁰ Tarimarima oreri, mo vevaĝa-midigumidigu dagarari toitoi na asi ĝevaĝi-maserito tarimari, tu roĝo asi ĝevetuĝamaĝi-kureto ĝimari ĝauveiri ĝerina. Iauka rakavari toma-rakarigori ema asi ĝeboĝeboĝeni e asi ĝeseĝaĝini ema asi ĝerakani kwaivakukuri, golo, silva, auri boraborari, fore e ĝau na ĝeveirito dagarari toma-rakarigori asi ĝevaĝa-dokoato.

²¹ Ema ĝeri vevaĝideba, ĝeri meĝameĝa, ĝeri mata-boraĝa veiĝari, ema ĝeri lema ĝerina maki asi ĝevetuĝamaĝi-kureto ma asi ĝeraka-kureto.

10

Aneru ema toretore fefana maukana misina

¹ Benamo aneru ta, kokore lelevaĝi aneruna, guba na ma emariĝoto-ĝoi aĝitaiato. Ĝia tu magube na ĝevaĝa-dabuĝa maukaiato, ma debana iatanai tu kevau ta. Ĝia ĝoirana tu ĝaro mamana noĝa, ema kwakuna tu karava ĝemoreni kavana.

² Ĝimanai tu toretore fefana maukana misina ta vekeo eĝabitaĝoato-ĝoi. Ĝia kwakuna aroribana tu davarai etoreato, ma kwakuna kaurina tu tanobarai etoreato.

³ Benamo eĝaba-baregoto, laion eniarani nai eĝabani kavana. Ĝia eĝabato murinai, ĝaita imaima ruarua (7) garori ĝeguruĝato, (ĝia ĝevaĝa-veaseato).

⁴ Mo ĝaita 7 ĝeguruĝato moĝeri dori atore-vanaĝirito, senaĝi guba na garo ta eiaĝomato, ekirato, “Mani ĝaita 7 kara beĝe kiraĝiri maniĝeri tu nokure-toĝari, asi bono tore-vanaĝiri.”

⁵ Benamo mo aneru, davarai e tanobarai kwakuna etorerito aneruna, aĝitaiato, ĝimana aroribana eĝabi-vaĝiato, guba vanuĝana eduĝiato,

⁶ benamo tanu-vanaĝivanaĝi Barauna aranai guruĝa-fofori gwaĝiĝina eveiato. Guba ema nuĝari ai ĝetanuni dagarari mabarari, e tanobara ema nuĝari ai ĝetanuni dagarari mabarari, ema daĝaru-bara ema nuĝari ai ĝetanuni dagarari mabarari tu ĝia na eveirito. Ĝia aranai mai guruĝa-fofori gwaĝiĝina eveiato, ekirato, “Taimi varau bekori, Barau asi ma bevaĝa-nogani.

⁷ Senaĝina aneru vaĝa-imaima ruaruana (7) na ĝena dudu befururuani neganai, Barau ĝena guruĝa vekuretoĝari veiĝari ema boioĝari beĝe ĝorani, ĝena peroveta tarimari ĝeri ai ekiraĝi-foforirito ilailari ai.”

⁸ Benamo guba na aseĝaĝiato garona na ma evaĝa-guruĝaguto, ekirato, “Noiaĝo, mo aneru davarai e tanobarai eruĝani aneruna, ĝimanai toretore fefana maukana evekeo-taĝoni, moĝea noĝabia.”

⁹ Benamo aiaĝoto, mo aneru akiraiato, mani toretore fefana maukana misina nevinigui atato. Benamo ĝia na ekiraguto, ekirato, “Noĝabia, be noĝani-ĝosia! Bokamu ai mamina tu gode mamina maki bevanaĝiani, senaĝi nuĝamu tu bevemukini.”

¹⁰ Benamo toretore fefana maukana misina mo aneru ġimana na aġabiato, benamo aġaniato. Aġaniato mamina murugu ai tu gode mamina maki evanaġiato, senaġi aġani-ġosiatu nai, nuġagu tu evemukito.

¹¹ Benamo evaġa-guruġaguto, ekirato, “Tanobara beseri ġutuma, garo irauirau tarimari ema ġeri vere baregori o kini ġeri ai karakara beġe ġorani dagarari ma bono peroveta-iaġiri.”

11

Vevaġa-moġoni tarimari ruarua

¹ Benamo vaġa-vetovo ġauna ta, ġitaġitana togoi noġa, eviniguto, benamo ekiraguto, ekirato, “Noiaġo, Barau ġena Rubu Vevaġa ema fata vevaġana noa makaia, ema monai toma-rakarigo tarimari vira bono iaviri.

² Senaġi mani Rubu Vevaġa nuġanai Iuda tarimari ġeri toma-rakarigo gabuna maġuna murikana, maniga tu bono iaġuia, asi bono makaia, korana maniga tu irau bese tarimari ġeri (ġuriguri gabuna) evinirito, ġia na mai vanuġa baregona vevaġana ġue gabana vasivasi ma ruarua (42) nuġari ai beġe fanafana-tariani.

³ Au vaġa-moġonigu tarimari ruarua seġuka bavinirini, benamo ġaro mabarana 1,260 Barau na bevinirini gurugari beġe kiraġi-foforirini. ġia tu fuse-dabugari na beġe vedabuġani.”

⁴ Mai vaġa-moġonigu tauri ruarua tu mo olive ġauri ruarua ema mo lamefa torekauri dagarari ruarua, tanobara Verena ġoiranai ġeruġani moġeri.

⁵ Bema tarima ta na nevaġa-rakavari betoni nai tu, bokari na karava beġe raka-rosini, benamo inairi beġe vaġa-buataririni. ġia ġevaġa-rakavari beġe toni tarimana tu moġesina bemaseni.

⁶ Maġeri tarima ruarua tu ma seġukari guba beġe kou-ġauani, benamo ġia peroveta gurugari beġe kiraġirini ġarori ai tu, ġura asi beraguni. Ema ma seġukari maki, nanu beġe kurevoani, rarai beiaġoni, e beġe urani ġarori ai tarimarima vaġa-midigumidiguri dagarari irauirau tanobarai beġe vaġa-ġorarini.

⁷ Ġeri vevarifiu beġe vaġa-magoani ġaronai, vevaġa-rakava dagarana guri varigo kwareġana, (iauka rakavari ġeri dibura), nuġana na beraka-rosini, benamo ġia bevaga-veaġirini. ġia ġeri seġuka bevanagiani, benamo bevaġi-maserini.

⁸ Benamo ġia tauganiri tu vanuġa baregona dabarana nuġanai gena-fitari beġe tanuni. Guruġa veabanaġinai mo vanuġa barana arana ġekiraġiani tu Sodoma ema Aigupito. ġia tauri ruarua ġeri Vereġauka tu mo vanuġai ġevaġa-satauroato.

⁹ Ġaro toitoi ma kwana nuġari ai bese irauirau, doġoro irauirau, garo irauirau, e tanobara irauirau tarimari ġia tauganiri beġe gitarini, senaġi guriguriri tu asi beġe urani.

¹⁰ ġia ġeri mase dainai tanobarai ġetanuni tarimari tu beġe iakuni, beġe ġani-vegogoni e karori tata ġeri varevare beġe tuġuni; korana tu mai peroveta tarimari ruarua na tanobarai ġetanuni tarimari ġeri ai midigumidigu baregona ġevaġa-ġoraiato.

¹¹ Senaġi mo garo toitoi ma kwana ġekorito murinai, maġuri iaġana Barau ġenana ġia tauri ruarua nuġari ai eraka-toġato, benamo ġeruġa-vaisito. ġia tauri ruarua ġeġitarito tarimari mabarari ġeġari-rakavato.

¹² Benamo vevaġa-moġoni tauri ruarua na garo baregona ta ġeseġaġiato, guba na emariġoto, ġia evaġa-guruġarito, ekirato, “Maġana gomaraġel!” Benamo tauri ruarua maġube ta nuġanai guba ġana ġevaraġeto, ġari inai tarimari ġoirari ai.

¹³ Mo aoa nuġanai moġo tano-iaġa baregona eragato, benamo vanuġa baregona taviri gabanana (10) nuġanai tavi sebona tu evaġa-mouato, ma tarima mabarari 7,000 ġemaseto. Senaġi tarimarima oreri tu ġeġari-rakavato, benamo Guba Barauna vevaġa-raġeato.

¹⁴ Rakava vaġa-ruaruana tu bekori moġa, senaġi vaġa-toitoina tu dori eiaġomani.

Dudu vaġa-imaima ruaruana (7)

¹⁵ Aneru vaġa-imaima ruaruana (7) na ġena dudu efururuato, benamo garo baregori gubai ġeguruġato, ġekirato, “Tanobara basileiana o veġitaġau seġukana tu ġita ġera Vereġauka ema ġena Keriso ġeri basileiai beiaġo. Be ġia tu bevere-vanaġi vanagini!”

¹⁶ Benamo veġitaġau tauri gabana ruarua ma vasivasi (24), Barau ġoiranai ġeri teronai ġetanuni tarimari, ġevetui-tarito, ġoirari tano ai, Barau ġetoma-rakarigo viniato,

¹⁷ ġekirato,
 “Vereġauka o, Iaru-korokoro Baraumu,
 otanuni, e otanuto-ġoi,
 ġai na ġoi ġatanikiu-vinimuni,
 korana ġoi ġemu seġuka baregona oġabiato,
 e ġemu Basileia o veġitaġau tu varau osinaiato.

¹⁸ Tanobara irauirau beseri ġebaruto, benamo ġoi ġemu baru ma beraġasi. Mase tarimari kota-viniri taimina, ema mo peroveta tauri, ġoi ġemu vetuġunaġi tarimari, e ġemu tarima veaġari, ema ġoi aramu ġematauraiani tarimari keiri baregori voiri viniviniri ġarona, ema tanobara ġevaġa-rakavaiato tarimari vaġa-rakavari ġarona beiaġoma.”

¹⁹ Benamo Barau ġena Rubu Veaġa guba nuġanai evekeoto, benamo ġena Kiragħitore Mauġana Rubu Veaġa nuġanai eforito aġitaiato. Benamo kiriku-ġaita, e ġaro gururi tari, e guba eguruato guruna baregona, e tano-iaġa, ema aisi foreri asikeikeiri ġeiaġomato.

12

Vavine ema ġuġaia kavana dagarana asikeikeina

¹ Benamo nuġa-farevaġi vetoġana baregona ta gubai eforito: Vavine ta, ġaro na evedabuġato, ma ġue tu kwakuna gaburieri ai, ema visiġu gabanana ruarua (12) tu korona noġa, ġia debanai ġevetore-ġeġeraġito.

² Ġia tu ma banina, ma dori eġabito-ġoi, moġesina nai mero-ġabi midiguna eġabiato, be eġabato-ġoi.

³ Benamo nuġa-farevaġi vetoġana ta gubai ma eforito: Ġuġaia kavana dagarana asikeikeina ta, kakakakana, debana mabarari tu imaima ruarua (7), guduna mabarari tu gabanana (10), ema korona maki 7 debana tata iatari sebori-sebori torekau.

⁴ Ġia ġiġuna guba visiġuri toiri-toiri ġerina sebori-sebori tu tanobara ġana eiari-firiġorito. Ġia tu mo vavine, dori eġabito-ġoi, ġoiranai eruġato, beġabini nai, asikauna mero misina bene ġabia, bene ġania uranai.

⁵ Vavine eġabito nai tu, mero evaġa-ġoraiato. Mo mero na tanobara irauirau beseri mabarari auri togoina na roġo beġori-kaurini ma seġkana baregona ġesi. Benamo mero emaġurito nai ġeraga-ġabi-veġitaiato, Barau e ġena terona ġoirana ġana ġeġwa-iaġoato.

⁶ Mo vavine tu Barau na ġena erovina-toreato gabuna tano fakana ġana egari-iaġoto. Monai beġe nariani e beġe ġubuani ġaro mabarari 1260 nuġari ai.

⁷ Benamo gubai vetari ta eġorato: Maikolo ma ġena aneru ġesi ġuġaia kavana dagarana asikeikeina ġevetari-viniato, benamo ġuġaia ma ġena aneru na maki ġia ma ġevetari-vinirito.

⁸ Senaġi ġuġaia kavana dagarana tu asi ekokoreto, naima gubai asi ġeri gabu ai ġevaġa-iaġorito.

⁹ Mo ġuġaia kavana dagarana asikeikeina, irau laġani veġata motana, arana “Diabolo” o “Satani”, tanobara mabarana eġofaiato dagarana, tu ġedori-rosiato, e tanobarai ġefiu-riġoato. Ġena aneru mabarari maki ġia ġesi ġefiu-riġorito.

¹⁰ Benamo gubai ġaro baregona ta eguruġato aseġaġiato, ekirato, “Toma ġita ġera Barau ġena vevaġa-maġuri, e ġena seġuka, e ġena veġitaġau baregona, ema ġena Keriso ġena maoro baregona varau beraġasi. Korana Barau ġoiranai ġita tari-kakara boġi-laġani evaġa-daġarito-ġoi dagarana tu varau beġe fiu-riġoa.

¹¹ Ġia tu tarikakara na Mamoe Natuna, (ġinitaġo mamoen), rarana ema ġia ġena guruġa moġoniri ġevari-fiurito-ġoi, moġerina ġekokoreto, be ġevaġa-ketoato. Ġeri maġuri asi ġetugamaġi-kaurito, eiagoto mo, ġea maseto.

¹² Guba o, ema gubai ġotanuni tarimami o, boġono iaku! Senaġi tanobara e daġaru-bara ġomi tu vetuġami kika! Korana Satani tu ġomi ġemi ai varau bevariġosi, nuġana tu baru na bevonuvonu-raġe, korana ribana, ġia ġena nega tu varau bekubi-rakava.”

¹³ Mo ġuġaia kavana dagarana eribato, ġia tu tanobarai ġefiu-riġoato neganai, mero evaġa-ġoraiato vavinena murina na ekureto.

¹⁴ Senaġi mo vavine tu ugava asikeikeina fanena ruarua Barau na eviniato, mo tano fakana, erovina-toreato gabuna, ġana bene rovo-iaġo uranai. Ġia monai tu laġani toitoi ma kwana beġene naria ema beġene ġubu-tanua ġana. Korana monai tu ġuġaia, mo mota rakavana, na asi ilaila beġabi-karaini.

¹⁵ Benamo ġuġaia, mota rakavana, bokana na nanu evaġa-ġaru rosiato noġa ġabata kavana. Ġia eurato mo vavine tu mo ġabata na bene ġaru-kwareġaia etato.

¹⁶ Senaġi tano na mo vavine evaġa-kavaiato, korana tano evekeoto, benamo ġuġaia bokana na eraka-roso to ġarukana mabarana eboġeato.

¹⁷ Benamo ġuġaia kavana dagarana na mo vavine ebaruvini-rakavaiato, benamo eiagoto, mo vavine besena, Barau ġena taravatu guruġari ġekorana-iaġirito-ġoi ema Iesu ġena vevarifiu guruġari ġevaġa-moġonirito-ġoi tarimari mabarari evetari-vinirito.

¹⁸ Benamo ġuġaia tu kone ai ea ruġato.

13

Davara na vevaġa-rakava dagarana ebere-rosito, moġa tu Keriso ġofaġofana

¹ Benamo au na vevaġa-rakava dagarana ta aġitaiato, daġaru-bara na eraka-raġeto. Ġia guduna mabarari tu gabanana (10), e debana mabarari tu imaima ruarua (7). Korona mabarari tu gabanana (10). Moġeri korona tu ġia guduna tata ġeri ai, ma debana tata ġeri ai tu Barau vaġa-rakavana arana.

² Mo vevaġa-rakava dagarana aġitaiato, moġa ġitaġitana tu lepadi noġa. (lepadi tu taiga noġa), a kwakuna tu bea kwakuri kavana, ema bokana tu laion bokari kavana. Benamo ġuġaia kavana dagarana asikeikeina tauġena ġena seġuka, ġena terona, ema ġena maoro eġbirito, mo vevaġa-rakava dagarana eviniato.

³ Vevaġa-rakava dagarana debana tai tu giri baregona ta, ġevaġi-maseato girina, senaġi mo manuġa baregona tu enamoto. Tanobara tarimari mabarana mo vevaġa-rakava dagarana ġenai nuġari ġefarevaġi-rakavato, benamo ġia murinai ġerakato.

⁴ Tarimarima mabarari na ġuġaia ġetoma-rakarigo viniato, korana ġia ġena seġuka tu mo vevaġa-rakava dagarana eviniato. Ema vevaġa-rakava dagarana maki ġetoma-rakarigo viniato, ġevedanaġito, ġekirato, “Dei tu mai vevaġa-rakava dagarana kavana? Dei na ġia bevetari-viniani riba?”

⁵ Mo vevaġa-rakava dagarana tu maoro eviniato tu, veiavi guruġari ema Barau vaġa-rakavana guruġari bene kiraġiri ġana, ema ġue gabana vasivasi ma ruarua (42) nuġari ai ġena maoro bene ġauvei-iaġiri.

⁶ Benamo muruna ekeoato, ma Barau vaġa-rakavana guruġari ekiraġi-matamato; Barau arana ema ġena tanu gabuna ekira-rakavarito, ema gubai ġetanuni tarimari mabarari evaġa-rakavarito.

⁷ E maoro eviniato, Barau ġena veaġa tarimari bene vetari-viniri nuġanai bene kokore, be ġia bene vaġa-darereri ġana. Ema seġuka eviniato, doġoro mabarari, e bese mabarari, e garo mabarari, ema tanobara mabarari bene ġori-kauri ġana.

⁸ Tanobarai ġetanuni tarimari mabarari na ġia beġe toma-rakarigo viniani. Maiġeri tarima tu, Barau na tanobara roġosi bere veia veġata, arari mo Mamoe Natuna, ġevaġiato dagarana, ġena maġuri bukanai arari asi etorerito tarimari.

⁹ Ma segana tarimana tu bene segaġi.

¹⁰ Barau beurani dibura numanai beġene baru-taria betoni tarimana tu, dibura numanai beġe baru-tariani veġata. Barau beurani vetari baġana na beġene vaġi-masea betoni tarimana tu, vetari baġana na beġe vaġi-maseani. Maiġeri guruġa na Barau ġena tarima veaġari evaġa-guruġarini, beġene vevaġa-gwaġiġi, ema ma ġeri vetuġamagikau ġesi beġene tanu.

Vevaġa-rakava dagarana vaġa-ruaruana, moġa tu peroveta tarimana ġofaġofana

¹¹ Moġa murinai au na vevaġa-rakava dagarana ta ma aġitaiato, tano na everaġa-raġeto. Ġia guduna tu ruarua, Mamoe Natuna guduna kavana, ema ġia tu ġuġaia kavana eguruġato-ġoi.

¹² Ġia na vevaġa-rakava dagarana giniguinena moġa aranai ġena maoro e seġuka mabarari eġauvei-iaġirito. Ma ġia na tanobara tanu-iaġina tarimari mabarari elau-naġirito, mo vevaġa-rakava dagarana giniguinena, debana giri baregona, ġevaġi-maseato girina, manuġana enamoto dagarana, beġene toma-rakarigo vinia etato.

¹³ Mai vevaġa-rakava dagarana vaġa-ruaruana mainana veiġa boruri baregori ema vetoġa irauri tari eveirito-ġoi. Ta tu, ġia na tarimarima mabarari ġoirari ġutuġutunai karava guba na evaġa-marigoato.

¹⁴ Ġia tu vetoġa boruri kotari eviniato, mo vevaġa-rakava dagarana giniguinena ġoiranai eveirito, tanobarai ġetanuni tarimari eġofa-darererito. Ma ekirarito, mo vetari baġana na ġevaġa-beroato, ma toma roġo emaġuri-tanuni vevaġa-rakava dagarana, moġa gubakauna ġana tu vetoġana dagarana o laulauna ta beġene veia, benamo ġene vaġa-ruġa-vaisia etato.

¹⁵ Mo vevaġa-rakava dagarana vaġa-ruaruana tu seġuka eviniato, vevaġa-rakava dagarana laulauna giniguinena moġa iaġa bene vinia, be bene guruġa, ema mo vevaġa-rakava dagarana laulauna asi ġeurani toma-rakarigo-vinina tarimari mabarari bene vaġi-maseri ġana.

¹⁶ Benamo tarimarima mabarari, misiri e baregori, ma ġeri farefare ġutuma tarimari e asi ġeri farefare tarimari, tuġu-rakaorakao tarimari e fakai ġetanuni o dia tuġu-rakaorakao tarimari, etuġu-naġinaġirito vetoġa o maka ta ġimari aroribari ai o bakuri ai beġene ġabia etato.

¹⁷ Moġesi beġene vei, be tarima ta dagara ta asi bene voivoi-kava o asi bene voivoi-iaġi-kavaia, senaġi mo vevaġa-rakava dagarana giniginena ġena vetoġa o maka, mai tu ġia arana o arana eruġa-boroġiato numerana, ġenai tarimana ġereġana moġo dagara bene voi e bene ġwa-voivoi.

¹⁸ Iaunega tu maiġa: Nuġa-mama o tuġamaġi-faka tarimana na mo vevaġa-rakava dagarana numerana bene vaġa-gaua, korana mo numerata tu tarima ta numerana. Numerana tu maiġa: 666.

14

Ginitaġo mamoea na evoi-vaġirito tarimari ġeri mari

¹ Benamo aboġeto tu, Mamoe Natuna ġoiragu ai aġitaiato, Siona Ġoronai eruġa-taġoto-ġoi, ema ġia sevina tarimarima 144,000 ġeruġa-taġoto-ġoi. Bakuri ai tu ġia arana ema Tamana arana ġevetoreto.

² Benamo guba na garo ta ġaruka vovoka ġeġaru-gwadani gururi ema guba eguruani guruna noġa aseġaġirito. Mo guru tu noġamo hap ġelauni tarimari na ġeri hap ġelaurito-ġoi gururi kavana.

³ Ġia tu mo terona, e maġuri dagarari vasivasi (4), ema veġitaġau tarimari baregori ġoirari ai mari variguna ta ġemariato. Tarima ta na mo mari moġa marimarina tu asi bedoġariani riba, senaġi mo tanobara na ginitaġo mamoea na evoi-vaġirito tarimari 144,000 ġereġari na moġo.

⁴ Mai tarima maiġeri tu vavine ġesi asi ġekimato o asi ġeveġura-vanaġito, be asi ġemiroto, ġia tu tauġeri ġevenaumato, be ġia tu namo vedaurea. Ġia tu Mamoe Natuna aiġana aiġana eiaġoni nai, murina na ġerakani. Tarimarima vekaravari ai ġia tu Barau na evoirito, ma Barau ema Mamoe Natuna ġeri tarimarima giniguineri ai ġeiaġoto.

⁵ Mururi na ġofaġofa guruġana ta asi ġekiraġiato, ġia ġeri ai rakava misina ta maki asiġina ġinavaġi.

Aneru toitoi

⁶ Benamo au na aneru ta maia guba e tano fakari na erovoto-ġoi aġitaiato. Ġia ġenai tu Vari Namona, betanu-vanaġi vanaġini varina. Ġia na mai Vari Namona tu tanobara mabarari, e doġoro mabarari, e garo mabarari, ema bese mabarari tanobarai ġetanuni ġeri beġene vari-fiua ġana.

⁷ Eguruġa-fararato, ekirato, “Barau garina boġono vei ema Barau boġono vaġa-raġea! Korana tu ġia ġena vevaġa-kota aeana tu varau beraġasi. Guba, e tanobara, e daġarubara, ema nanu eġaruani gaburi eveirito Barauna boġono toma-rakarigo vinia.”

⁸ Aneru vaġa-ruaruana murina na eiaġomato, benamo ekirato, “Beketo, Babulona baregona varau beketo. Ġia na tanobara iraurau beseri mabarari ġia ġena veġura-vanaġi wainina gwaġigina evaġa-niurito.”

⁹ Ma aneru vaġa-toitoina ġia murina na eiaġomato, benamo eguruġa-fararato, ekirato, “Bema tarima ta na mo vevaġa-rakava dagarana ema iouiouna dagarana betomarakarigo viniani, ema ġena maka bakunai o ġimanai beġabi-raġeani tu,

¹⁰ ġia maki Barau ġena baru baregona wainina beniuani. Mo baru baregona wainina gwaġigina moġa tu mabarana Barau ġena baru kapusina nuġanai ebubu-ġurajato. Ġia tu aneru veaġari ema Mamoe Natuna ġoirari ai karava morena e salfa nuġanai bemedigumidiguni.

¹¹ Ġia mo karava moreri nuġanai beġe midigu-midiguni goġuna tu beraġe-vanaġi vanaġini asi magona. Ma vevaġa-rakava dagarana ema ġia vetoġana o laulauna dagarana beġe toma-rakarigo viniani tarimari o ġia arana makana beġe ġabiani tarimari tu, boġilaġani asi beġe iaġaraġini.”

¹² Mainana Barau ġena tarimarima veaġari, Barau ġena taravatu ġekorana-iaġiani ema Iesu ġenai ġevetuġamaġikauni tarimari, evaġa-guruġarini, beġene vevaġa-gwaġigi ema beġene kokore.

¹³ Benamo guba na garo ta ma aseġaġiato, ekirato, “Maġeri guruġa notoreri: Maitoma beiaġoni tu, Vereġauka ġena maġuri nuġanai ġetanuni tarimari beġe maseni tu beġene iaku.” Iauka Veaġa evaġa-veseto, “Oi, ġia tu ġeri ġauvei e vekwaraġi na beġe iaġaraġini, korana tu ġeri veġa namori ġia ġesi beġe iaġo-sebonani.” (Moġa anina tu, ġeri vekwaraġi voina namona beġe doġariani veġata).

Tanobarai kwakwa ġarona

¹⁴ Benamo aboġe-iaġoto, magube kurokurona ta aġitaiato, ma mo magube kurokurona iatanai tu Tarimarima Natuna noġa tarimana etanuto. Ġia debanai tu golo koronana ta, ma ġimanai tu baġa ġeġevana masikona ta.

¹⁵ Benamo aneru ta maia Rubu Veāga na ema raka-rosito, bena magube kurokurona iatanai etanuto tarimana ekea-farara viniato, ekirato, “Gemu baġa ġeġevana noġabivaisia, benamo ġaniġani dagarari nobasi-vaġiri! Korana kwakwa o basibasi ġarona varau beraġasi, tanobarai ġaniġani tu beġe maġe-ġosi.”

¹⁶ Benamo mo magube iatanai etanuto tarimana ġena baġa ġeġevana tanobara iatana na edave-vanaġiato, benamo tanobara ġaniġanina ebasi-vaġiato, eġabiato.

¹⁷ Aneru ta maia guba na Rubu Veāga nuġana na ema raka-rosito. Ġia maki ġimanai tu baġa ġeġevana masikona ta.

¹⁸ Aneru ta maia fata veaġana na eiaġomato. Ġia tu karava eġita-ġauato-ġoi aneruna. Ġia eiaġomato, benamo baġa ġeġevana masikona eġabiato aneruna ekea-farara viniato, ekirato, “Gemu baġa ġeġevana masikona noġabia, ma tanobara vinena ġwari ġureri nokari-vegogori, korana vine ġwari (o grapes) tu varau beġe maġe.

¹⁹ Benamo mo aneru na ġena baġa ġeġevana moġa vaġa-sebona edaveato, benamo tanobara iatana vine ġwari mabarari ebasi-vaġa-vegogorito. Benamo moġesi mabarabarari eġabirito, ma vine ġwari ġefanarini gabunai ea hubu-toġarito. Mo vine ġwari ġefanarini gabuna moġa, mo tu Barau ġena baru ekiraġiani gabuna.

²⁰ Mo vine ġwari mabarari vanuġa baregona murikanai vine ġwari ġefanarini gabunai ġefanafana-taririto-ġoi gorari beġene riġo ġana. Benamo vine ġwari ġefanarini gabuna na rara eġaru-rosito. Rara eġaru-rosito ġena geboka tu tano bevaraġe mo, hosi muruna dokona, ma ġena mauka tu stadia 1,600 o 300 kilomita.

15

Aneru imaima ruarua (7) ġeri ai vevaġa-midigumidigu dagarari rakavari 7

¹ Benamo gubai vetoġa baregona ta, nuġa-farevaġi dagarana aġitaiato: Aneru 7 aġitarito, ġeri ai tu dagara rakava kwaikwairi 7, tarimarima vaġa-midigumidiguri dagarari. Mo tu dagara rakavari magona. Korana moġeri na Barau ġena baru bevaġa-korinikauani.

² Ma davara ta veġia kavana ma karavana aġitaiato. Mo davara sevina tu mo tarimarima, vevaġa-rakava dagarana ema ġia laulauna dagarana ema ġia arana ekiraġiani numerana ġevaġa-ketorito tarimari, ġeruġa taġoto-ġoi aġitarito. Ġia ġimari ai tu Barau na evinirito hapiri ġeġabi-taġorito-ġoi,

³ ma Barau ġena vetuġunaġi tarimana, Mose, ġena mari ema Mamoe Natuna ġena mari ġemariato-ġoi,

“Vereġauka o, ġoi tu
Iaru-korokoro Barauna,
ġemu ġauvei tu barego,
asi tau vaġa-ilailana

ema namo vedaurea. Guru mabarari ġeri Vere o,
ġoi ġemu dabara tu iobukaibuka ema moġoni veġata.

⁴ Vereġauka o, deikara na ġoi asi begari-vinimuni,
ma ġoi aramu asi bevaġa-raġeani?

Korana tu ġoi moġo ġereġamu veaġa.

Tanobara mabarari tarimari beġe iaġomani,
benamo ġoi beġema toma-rakarigo vinimuni.

Korana tu ġemu veġa iobukaibukari varau beġema fofori.”

⁵ Maġa murinai au aboġe-iaġoto, benamo gubai Rubu Veāga, mo tu Barau na ġena ġeruġa moġoniri evaġa-foforirini farai numana veaġana, evekeoto aġitaiato.

⁶ Mo aneru imaima ruarua (7), ġeri ai tu tarimarima vaġa-midigumidiguri dagarari rakavari; farai numana veaġana na ġeraka-rosito, dabuġa gwaġigiri namori ema veġia-veġiari na ġevedabuġato, ema kobari ai tu golo beletari ġetore-ġeġeraġirito.

⁷ Benamo mo maġuri dagarari vasivasi vekaravari ai ta na mo aneru 7 golo diġuri 7 evinirito. Mo golo diġuri tu tanu-vanaġivanaġi Barauna ġena baru na evaġa-vonu fokafokarito.

⁸ Benamo mo Rubu Veāga tu Barau marevana goġuna ema seġukana goġuna na evaġa-vonuato. Tarima ta Rubu Veāga nuġana asi roġo beraka-toġani riba, beiaġoni mo, tarimarima vaġa-midigu-midiguri dagarari rakavari 7 beġe korini vau.

16

Barau ġena baru diġu imaima ruarua (7) nuġari ai

¹ Benamo garo baregona ta Rubu Veāga nuāana na eiaāomato aseāāgiato. Mo garo na tu aneru 7 evaāga-guruāarito, ekirato, “Goiāgo, Barau ġena baru na evaāga-vonurito diāuri 7 manīgeri tanobara iatanai ġoa bubu-firiāori.”

² Aneru ġiniguinena eiaāoto, ġena diāu tanobara iatanai ea bubu-kauato. Benamo manuāa ġitaāitari rakava kwaikwairi ma midiguri maki asikeikeiri vevaāga-rakava dagarana ġena vetoāa o maka ġeāabiato ema ġia iouiouna dagarana ġetoma-rakariāo viniato tarimari na ġeāoitaāorito.

³ Aneru vaāa-ruaruana ġena diāu tu davarai ebubu-riāoato. Benamo mo davara tu mase tarimana rarana kavana eveito, ma nuāana maāuri ġetanuni dagarari mabarari ġemaseto.

⁴ Aneru vaāa-toitoina ġena diāu tu ġarukai ema nanu eāaruani gaburi ai ebubuato, benamo rarai ġeiaāoto.

⁵ Benamo nanu eāita-āuani aneruna garona aseāāgiato, ekirato, “Veāa Baraumu,

āoi tu tototovonai otanuto-āoi,
ema initoma maki otanuni.

Goi ġemu kota-vini āauveina tanobara tarimari āeri ai maīāesina oveiani tu maoro korikori moāo.

⁶ Korana āia na āoi ġemu tarimarima vevaāri ema peroveta tarimari rarari āevaāa-riāorito. Mogesina naima āeri veāa lorinai, be rara boviniri beāe niu.”

⁷ Benamo Barau ġena fata vevaāana na garo ta eiaāomato aseāāgiato, ekirato,

“Vereāauka o, āoi tu moāoni veāata Iaru-korokoro Barauna,
āemu kota-vini āauveiri tu dabara moāoninai ema maoronai oveiani.”

⁸ Aneru vaāa-vasivasina ġena diāu tu āaro iatanai ebubu-kauato. Benamo āaro seāuka eviniato, tarimarima karava na bene āarari āana.

⁹ Benamo mo āaro seāukana gugurana baregona na tarimarima eāararito. Ma monana tarimarima tu asi āevetuāmaāi-kureto, benamo Barau asi āevaāa-raāeato, ne āia na tu Barau arana āevaāa-rakavaiaato. Barau tu ma ġena maoro baregona maīāeri midigumidigu dagarari rakavari bevaāa-āorarinī e asi bevaāa-āorarinī.

¹⁰ Aneru vaāa-imaimana ġena diāu tu vevaāa-rakava dagarana ġena terona iatanai ebubu-kauato, benamo āena veāitaāau gabuna tu emukuna-furufuruto. Benamo tarimarima midigumidigu baregona na eāābirito, ma meari āekafu-taririto.

¹¹ Mo midigumidigu ema manuāa dairi ai, āia na gubai etanuni Barauna āevaāa-rakavaiaato. A āia tu asi āeurato āeri veāa rakavari āerina beāene vetuāmaāi-kure.

¹² Aneru vaāa-imaima sebonana (6) ġena diāu tu Eufrate āarukana baregona nuāana ebubu-āuraiato. Benamo mo āaruka baregona eroroto, āaro eāerini rekana na kini (ma āeri vetari doāorori āesi) beāe iaāomani, moāeri āeri dabara evaāa-fakaiaato.

¹³ Moāa murinai iauka rakavari toitoi farakeāo noāa moāo āitāarito. Ta tu dagara ta āuāia kavana, (mai tu Satani), bokana na ema raka-rosito, ta tu vevaāa-rakava dagarana, (mai tu Keriso āofaāofana), bokana na ema raka-rosito, ma ta tu peroveta āofaāofa tarimana bokana na ema raka-rosito.

¹⁴ Mo iauka moāeri tu demoni iaūkari, āia na vetoāa irauirauri āevairito-āoi, ema āeiaāoto tanobara mabarana kiniri āeri ai, beāenea vaāa-veāaāori, be Iaru-korokoro Barauna āena garo baregonai tu Barau beāene vaāa-vevaāia āana.

¹⁵ “Noseāāāi! Au tu lema tarimari kavana baiāāomani! Bevaāa-noga-tāāoni ema āena dabuāa kēfinai bevei-tāāorini tarimana tu bene iaku. Korana āia tu kēfina kori asi beiaāoni, benamo āutuma-bara nuāana asi bemaiaakaiani.”

¹⁶ Benamo demoni iaūkari toitoi na kini mabarari āeāori-veāogorito gabu tai, Heberu āarori ai mo gabu arana tu Amagedon.

¹⁷ Aneru vaāa-imaima ruaruana (7) ġena diāu tu guba fakanai ebubuato, benamo Rubu Veāa nuāana na garo baregona ta terona na eiaāomato, ekirato, “Varau bekorī!”

¹⁸ Benamo kiriku eragato, e garo āururi tari āeraāeto, e guba eāuruato, ema tano-iaga baregona eragato. Tarimarima tanobarai āetanu-āineto, monana beiaāoma mo initoma moāesi tano-iaga ta tu asi eāorato. Moāa tu tano-iaga barego lelevaāina veāata.

¹⁹ Benamo vanuāa baregona evetavito, tavi toitoi āevetoreto, ema tanobara mabarari vanuāari maki āeāwa-kafu kafurito. Barau na vanuāa baregona Babulona ma etuāmaāi-āenoāoiato, benamo Barau āena baru ema nuāa-āirimaāirima wainina na evaāa-vonu fokafokaiato kapusina eviniato, bene niua āana.

²⁰ Benamo motumotu mabarari āeraga-rekwarekwato ema āoro maki āerekwarekwato, be āiāina.

²¹ Ma guba na aisi, fore noĝa asikeikeiri, ĝeri meto tu pauna sinau sebona (100) kavana, tata tarimarima iatari ai ĝeketokauto. Benamo mo tarimarima na Barau guruĝa rakavari ĝeviniato-ĝoi, korana mo aisi, fore noĝa asikeikeiri, iatari ai ĝeketokauto-ĝoi dainai. Korana mo vevaĝa-midigumidigu dagarana rakavana moĝa tu rakava kwaikwaina.

17

Babulona - veĝura-vanaĝi vavinena baregona

¹ Benamo mo diĝu imaima ruarua (7) ĝeĝabi-taĝorito-ĝoi aneruri fakari ai ta tu au rekegu ĝana eiaĝomato, benamo au ema vaĝa-guruĝaguto, ekirato, “Noiaĝoma, be veĝura-vanaĝi vavinena baregona ĝena veĝura-vanaĝi voina metona beĝabiani metona navaĝa-ĝitamu. Ĝia tu nanu vovoka iatari ai etanuni.

² Tanobarai ĝetanuni vereri baregori o kiniri mabarari tu ĝia ĝesi ĝeveĝura-vanaĝito. Ema tanobarai ĝetanuni tarimari maki ĝia ĝena veĝura-vanaĝi wainina na ĝeniu-babobaboto.”

³ Benamo Iauka Veaĝa na eborogiguto, aneru ta na eĝwa-rakaguto, tano fakana ĝana eĝwa-iaĝoguto. Monai vavine ta aĝitaiato, vevaĝa-rakava dagarana kakakakana ta iatanai etanu-taĝoto-ĝoi. Mo vevaĝa-rakava dagarana tauganina tu Barau vava-rakavana arari ĝevaĝa-vonuato. Ĝia debana mabarana imaima ruarua (7), ema guduna tu gabanana (10).

⁴ Mo vavine tu dabuĝa kakakakari ema koturi kakakakari o pepolori namo vedaureari erigoto, ema golo e fore nauĝanaugari ema aĝeva ma marevari na everato. Gimana tu golo kapusina ta eĝabiato. Mo golo kapusina tu veĝa rakava kwaikwairi ema ĝena veĝura-vanaĝi mirori na evonu-fokafokato.

⁵ Ĝia bakunai tu ara ta ĝeberaiato, anina maki vekuretoĝa, maiĝesi ĝetoreato, “Babulona barana, veĝura-vanaĝi sinari ema tanobarai veĝa rakava kwaikwairi mabarari sinari.”

⁶ Benamo au na mo vavine aĝitaiato, Barau ĝena tarimarima veaĝari, ĝevaĝi-maserito tarimari, rarari eniurito, be eniu-babobaboto. Mo tu Iesu ĝevaĝa-moĝoniato-ĝoi nai, ĝevaĝi-maserito tarimari rarari. Au na ĝia aĝitaiato nai, aĝaba-rakavato.

⁷ Benamo mo aneru na ekiraguto, ekirato, “Ĝoi tu kara dainai oĝaba-rakavani? Mani vavine maniĝa varina vekuretoĝana ema mani vevaĝa-rakava dagarana iatanai berage maniĝea, mani debana 7 ma ĝena gudu 10, varina vekuretoĝari tu nakiravara-ginikaumu.

⁸ Mo vevaĝa-rakava dagarana boĝitaia, moĝa tu guinenai etanuto-ĝoi, ma ĝia toma tu asi tauna. Ĝia tu tano gabigabina guri variĝo kwareĝana na bema raka-rosini, benamo beiaĝoni gabuna rakava kwaikwaina, midigumidigu baregona bea ĝabiani. Tanobarai ĝetanuni tarimari, Barau na tanobara eveiato monana veĝata arari maĝuri bukanai asi etorerito tarimari, na mo vevaĝa-rakava dagarana ĝeĝitaiato nai tu, nuĝari ĝefarevagi-rakavato. Korana ĝia tovtovonai tu etanuto-ĝoi, ma toma tu asi tauna, senaĝi ĝia tu ma beiaĝomani.

⁹ Iaunega tarimana na maiĝa bene tuĝamaĝi-fakaia. Mo deba 7 tu mo vavine etanukauni ĝorori 7.

¹⁰ Ma ĝia aniri ta maki vere baregori o kini 7. Vere barari imaima tu ĝeketoto, sebona tu roĝo eruĝa-taĝoni, ma ta tu roĝosi bene iaĝoma. A ĝia beiaĝomani tu, mai tanobarai asi betanu-maukani.

¹¹ Mo vevaĝa-rakava dagarana guinenai etanuto-ĝoi, ma initoma ĝia tu asi tauna, maniĝa tu kini vaĝa-imaima toitoina (8). Ĝia tu mani vere baregori o kini 7 karori ta, ma ĝia tu beiaĝoni gabu rakava kwaikwaina midigumidigu barego bea ĝaniani.

¹² Mo gudu 10 oĝitarito, moĝeri mo tu kini 10. Ĝia tauri 10 tu kini dagina ema beĝe ĝita-ĝaurini tano-barari roĝosi beĝene ĝabiri. Senaĝina ĝia tu aoa sebona mo vevaĝa-rakava dagarana ĝesi kini kavana veĝitaĝau maorona baregona beĝe ĝabiani.

¹³ Ĝia ĝeri tuĝamaĝi tu sebona moĝo, ema ĝeri seĝuka e maoro baregona tu mai vevaĝa-rakava dagarana beĝe viniani.

¹⁴ Ĝia na Mamoe Natuna beĝe vetari-viniani, senaĝi Mamoe Natuna na bevaĝa-ketorini, korana ĝia tu vere mabarari ĝeri Vere, ema kini mabarari ĝeri Kini. Ema ekearito e eĝabivirigirito ema ma vetuĝa-maĝikauri ĝesi ĝia murinai ĝerakani tarimari maki ĝia ĝesi beĝe kokoreni.”

¹⁵ Benamo mo aneru na ekiraguto, ekirato, “Mo veĝura-vanaĝi vavinena etanu-taĝoni nanuri boĝitari, moĝeri tu tanobara beseri, tarima ĝutuma gorogoro, tanobara irauirau tarimari, ema garo irauirau tarimari boĝitari.

¹⁶ Mo vevaĝa-rakava dagarana ema mo gudu 10 boĝitari dagarari, mani veĝura-vanaĝi vavinena tu beĝe iau-rakavaiani. Ĝia na asi ĝena farefare ai beĝe vaĝa-iaĝoani, e

dabuġana ġenana beġe fuki-vaġirini, tauġanina kori beġe vaġa-rakaiani; viriġona beġe ġaniani ema karavai beġe gabu-raġeani.

¹⁷ Korana Barau na maniġeri kini nuġari ai evaġa-urato, ġia ġena ura beġene veia etato. Moġesina naima ġia maki ġeurato nai, ġeri seġuka mo vevaġa-rakava dagarana beġene vinia, be bene veġorikau, bene iaġo mo, Barau ġena guruġa mabarari beġenea ġuġuru.

¹⁸ Ema mo boġitaia vavinena tu vanuġa baregona. ġia na tanobara vereri o kiniri mabarari eġori-kaurini.”

18

Babulona beketoni

¹ Maiġa murinai aneru ta ma ġena seġuka baregona ġesi guba na emariġoto aġitaiao. ġia marevana mamana na tanobara emama-vaġa-ġauato.

² Benamo tuġana maki asi ekogoto, ekirato,

“Beketo! Vanuġa baregona Babulona tu beketo!

ġia tu demoni ġeri tanu gabunai beiaġo, e iauka rakavari ema iauka mirori, e manu rakava kwaikwairi ġeri tanutaġo gabunai beiaġo.

³ Korana tu bese mabarari na ġena wain ġeniuato nai ġevei-babobaboto; mo wain tu ġena veġura-vanaġi ġauveiri.

Tanobarai ġetanuni kiniri mabarari tu ġia ġesi ġeveġura-vanaġito, ema tanobarai dagara ġeġwa-voivoirini tarimari maki ġia ġena farefare namori ġerina farefare vovoka tarimari ai ġeiaġoto.”

⁴ Moġa murinai tu guba na garo ta eiaġomato ma aseġaġiato, ekirato,

“Gegu tarima mabarami,

mai vanuġa baregona ġenana ġoma raka-rosi.

Be ġia ġena vei-rakava veiġari asi boġono veiri,

ġia na vevaġa-midigumidigu dagarari rakavari beġabirini dagarari ġomi na asi boġono ġabiri.

⁵ Korana ġia ġena vei-rakava tu iatai-iatai bevesenu-senukau, bevaraġe mo, guba vanuġana maki bea doġaria.

Senagi Barau na ġena veiġa, asi maorori dagarari, etuġamaġi-taġorini, asi etuġa-rekwarini.

⁶ ġia na ġomi evinimito ilailana ma boġono vini-vaġa-voia.

ġena veiġa voina ilailana moġa boġono vaġa-ruaia, benamo boġono vinia.

Niuniu wainina kapusi sebona ġomi evinimito nai tu, ġena kapusi korikori ai niuniu wainina moġa nuġanai ta maia boġono bubu-ġuraia, boġono vaġa-ruaia, benamo voina boġono vinia.

⁷ Tauġena eveġabi-varaġeto ema eġani-namoto-ġoi ema etanu-namoto-ġoi ilailanai, midigumidigu boġono vinia ema boġono vaġa-taġitaġia.

ġia nuġanai tu eveiavini, ekirani,

‘Au tu kwin o vere vavinena kavana atanuni.

Au tu dia vabu ema asigina ġinavaġi bataġi-vanoro vanoroni.’

⁸ Moġesina naima ġia tu ġaro sebona nuġanai moġo midigumidigu iraurau na beġe vaġa-ketoani, mo tu mase, taġi-vanorovanoro, ema doġe ġenai beġe raġasini.

Ma ġia tu karava na beġaraiani.

Korana ġia ġeri rakava voina beviniani Barauna tu Barau Vereġauka,

ma ġia tu ma seġukana.”

⁹ Tanobara kiniri, ġia ġesi veġura-vanaġi veiġari ġeveito ema ġia ġesi ġeġani-namoto-ġoi e ġetanu-namoto-ġoi kiniri, na ġia beġaraiani goġuna beġe ġitaiani nai tu, taġina beġe veini, ema beġe taġi-vanoroani.

¹⁰ ġia ġena midigumidigu beġe ġitaiani, moġa garina na manaġai beġe ruġani, benamo beġe taġi-guruġani, beġe kirani,

“Vetuġamu! Siti baregona vetuġamu kekei!

Babulona o, seġuka rakava sitina!

Goi tu aoa sebona nuġanai moġo ġemu rakava voina metona boġabia!”

¹¹ Tanobarai dagara ġevoivoi-iaġirini tarimari beġe taġini ema beġe taġi-vanoroani, korana ġeri voivoi-iaġi farefareri tu asi voivoiri tarimana ta.

¹² Mo tu ġeri golo, e silva, e fore namo vedaureari voiri barego foreri, ema aġeva marevari asi-gadara dagarari; dabuġa namori gwaġigiri, e dabuġa kota kakakakari o pepolori, e dabuġa silikari, ema dabuġa kakakakari; ma bonari ġauri, e elefani doġari na ġeveirini dagarari iraurauri, e ġau voiri barego ġauri na ġeveirito dagarari, e auri boraborari e auri namori ema mabolo na ġeveirito dagarari;

¹³ ġaniġani mamiri vaġa-namori muramurana arana sinamon, e ma bonari muramurari, e goġu ma bonana eveiani muramurana, e bonana namona muramurana arana muro, e taugani ai ġedauani muramurana arana frenkinsens; vine nanuna, e olive diġana, farao ema widi, boromakau ema mamoe, hosi ema kariota, ema tarimarima maki.

¹⁴ Beġe kirani, “Gau ġwaġwana bono ġabia otato-ġoi uradikana oveito-ġoi dagarana tu ġemuna beveġita. Ġemu farefare vovoka ema ġemu mareva mabarari beġe rekwa-rekwa, asi bodoġari-ġenoġoirini maia!”

¹⁵ Dagara ġeġwa-voivoini tarimari na maġeri dagara ġeivoivoi-iaġirito ema ġia ġenana farefare vovoka ġeġoitaġoto, moġeri tu manaġai beġea ruġani, mo midigumidigu ġia na beġabiani moġa garina. Ġia tu beġe taġi-rakava rakavani ema beġe taġi-vanoroni,

¹⁶ ema beġe taġi-guruġa guruġani, beġe kirani,

“Vetuġamu! Vanuġa baregona, vetuġamu kekei!

Dabuġa namori gwaġiġiri, e dabuġa kota kakakakari o pepolori, ema kakakakari na ovedabuġato;

golo kimorekimoreri, e fore namo vedaureari, ema gudugudu marevari asi-gadarana oveiato-ġoi.

¹⁷ Aoa sebona nuġanai moġo ġemu farefare vovoka tabutabu mabarari benamo beġema kori-ketovaġi!”

Bouti baregori ġeġwa-ragarini tarimari mabarari, e bouti ai davara na ġeragani tarimari mabarari, e bouti ai ġeġauveini tarimari, ema davara maġaniri ma dagara tari ġerina ġeri-ġari ġeġoitaġoni tarimari mabarari manaġai ġea ruġato.

¹⁸ Benamo eġaraiato goġuna ġeġitaġato nai tu, maġesina ġekirato, ‘Mai vanuġa baregona tu irau veġata, siti ta maġesina kavana tu asi etanuto-ġoi.’

¹⁹ Benamo tano-kauri debari ai ġebubukauto, ġetaġito e ġetaġi-vanoro vanoroto, ġekirato,

“Vetuġamu kekei! Vanuġa baregona vetuġamu kekei!

Ma ġeri bouti davarai tarimari tu ġia ġena taġa ġenana farefare vovoka ġeġoitaġoto, ene? Aoa sebona nuġanai ġia tu asi ġena farefare tai moġo beiaġo.

²⁰ Guba vanuġana o, ġia ġena keto iakuna ġovei.

Barau ġena tarima veaġami,

e apostolo tarimami,

ema peroveta tarimami,

ġoiaku ġoverere;

korana ġomi veġa rakavari evei-vinimito dainai, Barau na ġena rakava voina bevinia.”

²¹ Benamo aneru kokore rakavana ta na fore ta widi ġeġiro-iaġirini diġuna baregona ta kavana eġabiato. Mo fore-diġuna moġa eġabi-vaisiato, benamo davarai efiu-reiato, benamo ekirato,

“Vanuġa baregona Babulona tu maġesi ma baruri ġesi beġe fiu-tariani,

benamo berekwarekwa-moġovaġini,

asi ġitaġitanai ma beiaġoni.

²² Hap ġelauni ma mari ġeġabini gururi, e ivirikou ġefururuni ema dudu ġefururuni gururi ġoi ġemu maninai asi ma beġe seġaġi-ġenoġoirini.

Ġauvei namori ma ribari tarimari ġoi nuġamu ai asi ma beġe tanu-ġenoġoini.

Widi ġeġiro-iaġirini foreri gururi maki maninai asi ma beġe seġaġi-ġenoġoirini.

²³ Maninai lamefa mamari asi ma beġe ġara-ġenoġoini.

Veġaraġo variġu tauna e vavinena garona ta maki maninai asi ma beġe seġaġi-ġenoġoiani.

Goġna dagara voivoi-iaġiri tarimari mai tanobara nuġanai ġia tu tarima baregori.

Ġoi ġemu meġameġa tovoġari na tanobara irauirau mabarari oġori-darererito.

²⁴ Peroveta tarimari e Barau ġena tarimarima veaġari ġevaġirito rarari, ema tanobara iatanai tarimarima ġevaġirito rarari mabarari maki Babulona vanuġa baregona nuġanai ġea ġoitaġorito.”

19

Kokore marina gubai

¹ Moġa murinai tu noġa moġo tarimarima asisebo-asisebo garori gururi gubai ġekoġoto-ġoi aseġaġirito, ġekirato,

“Haleluia!

Vevaġa-maġuri, e mareva baregona,

ema seġuka tu ġita ġera Barau ġena.

² Korana ġia tu dabara roroġotonai evevaġa-kotani ema rakava voiri evinini.

Ġia na veġura-vanaġi vavinena baregona vei-rakava voina meto lelevaġina bevinia.

Mai veğura-vanaği vavinena na mai tanobara mabarana ġena veğura-vanaği veiğana na bevağa-rakava kwaikwaia.

Barau na ġena vetuğunaği tarimari rarari evağa-riğorito ġaramanai, rakava voina meto lelevağina bevinia.”

³ Ma ġekoğo-ğenogoito, ġekirato, “Haleluia!

Vanuğa baregona ġenana erağeni goğuna tu asi bedokoni, mo goğu tu bevağe-vanaği vanağini.”

⁴ Benamo mo veğitağau tarimari gabanana ruarua ma vasivasi (24) ema mo mağuri dagarari vasivasi ġevetui-tarito, benamo Barau ġena teronai tanutağo ġetoma-rakarigo viniato-ğoi, maiğesi ġekirato, “Amen, Haleluia!”

Mamoe Natuna ġena veğarağo verekona

⁵ Mamoe mo terona na garo ta eiąomato, ekirato, “Barau ġena vetuğunaği

tarimami mabarami,

e Barau garina ġogarini tarimami,

misina na beiağo mo baregona,

ğera Barau ġovağa-rağea!”

⁶ Benamo au na guru ta noğa moğo ġutuma-bara gururi kavana aseğağiato, noğa ġaruka ġutuma ġeğaru-gwadani gururi kavana, ema noğa guba eguruani guruna baregona kavana, ġekoğoto-ğoi, ġekirato,

“Haleluia!

Ğita ġera Iaru-korokoro Barauna tu roğo Vere baregona etanuni.

⁷ Mabarara si-iaku, siverere, ema sivaga-rağea,

korana tu Mamoe Natuna ġena

veğarağo ġarona varau bema rağasi,

ema ġarağona maki beğe ġabi-torea.

⁸ Dabuğa kurokurori gwağiğiri namori, namoka-namokana, miro misina ta maki asiğina ġinavaği na ġevağa-dabuğaiato.”

Mo dabuğa kurokurori gwağiğiri namori tu Barau ġena veağa tarimari ġeri vei-iobukaiobuka ekirağirini.

⁹ Benamo mo aneru na au ekiraguto, ekirato, “Maiğesi notorea: ‘Mamoe Natuna ġena veğarağo ġani-vegogona uranai ġekea-kaurito tarimari tu beğene iaku!’ ” Ma ekiraguto, ekirato, “Mai tu Barau ġena guruğa moğoniri!”

¹⁰ Benamo au mo aneru kwakuna koranai avetui-tarito, natoma-rakarigo vinia ġana. Senaği ġia na ekira-ğoiğuto, ekirato, “Maniğesi tu asi novei! Au maki vetuğunaği tarimagu ġoi kavana, ema ġoi tarikakamu Iesu varina guruğari ġevağa-moğonirini tarimari kavana. Barau moğo notoma-rakarigo! Korana Iesu ġena vevarifu guruğari na tu tarimarima elaunağirini, peroveta guruğari beğene kiraği-foforiri.”

Hosi kurokuronai erağeto tarimana

¹¹ Ma au aboğeto, guba evekeoto, benamo ġoiragu ai hosi kurokurona ta ağitaiato. Mo hosi iatanai erağeto tarimana arana tu “Vetuğamağikau” ema “Moğoni” ġetato. ġia tu veiğa iobukaiobukanai eveağa-maaroni ema evetarini.

¹² ġia matana tu karava moreri kavana, ema debanai korona tu asisebo. ġia ġenai ara ta evetoreto, mo ara tu ta asi ribana, ġia ġereğana moğo ribana.

¹³ ġia tu rara na evonuto dabuğana na evedabuğato, ema arana tu “Barau ġena Guruğa”.

¹⁴ Guba vanuğana ġena vetari doğorona tu ġia murina na ġeraka-naği-rakanağito-ğoi. ġia mabarari tu dabuğa gwağiğiri namori, kurokurori ema namoka-namokari na ġevedabuğato, ma hosi kurokurori ai ġerağeto.

¹⁵ ġia bokana na tu vetari bağana raga-rakavarakava ema raka-rosito. Tanobara iraurau beseri tu mai vetari bağana ma ragana mainana bebasirini. ġia na auri togoina na beğori-kaurini ma seğukana baregona ġesi. Ma vine ġwağwari ġefanarini kavana bea fana-taririni. Moğa mo tu Iaru-korokoro Barauna ġena baru baregona bevağa-rakarosiani gabuna.

¹⁶ Dabuğa maukana eriğoato ġenai ema manininai tu mai ara maiga etoreato, “Kini mabarari ġeri Kini ema vere mabarari ġeri Vere.”

¹⁷ Benamo au na aneru ta ġaro nuğanai eruğa-tağoto-ğoi ağitaiato. Mo aneru na guba fakana ġerovoni manuri ekea-farava vinirito, ekirato, “Goiağoma, Barau ġena ġanivegogo baregonai ġoma rovo-vegogo.

¹⁸ Be tanobara vereri barari virigōri, e vetari dogōrori ġeri veġorikau tauri baregori virigōri, e kokore lelevaġi tarimari virigōri, ema hosi virigōri e hosi ai ġeraġeni tarimari virigōri, ema tarimarima mabarari, tuġu-rakaorakao tarimari e fakai ġetanuni tarimari, tarima keiri e baregori, mabarari virigōri boġonoma ġaniri!”

¹⁹ Benamo au na vevaġa-rakava dagarana ema tanobara vereri baregori ma ġeri vetari dogōrori ġesi vegogotaġo aġitarito. Ġia tu hosi kurokuronai eraġeto tarimana ma ġena vetari dogōrori ġesi beġene vetari-viniri ġana ġevegogoto.

²⁰ Senaġi mo vevaġa-rakava dagarana ġeġabi-tariato, ema peroveta tarimana ġofaġofana maki, mai tu nuġa-farevaġi vetoġari boruri vevaġa-rakava dagarana aranai eveirito-ġoi tarimana. Mai vetoġa boruri maiġeri na vevaġa-rakava dagarana ġena maka ġeġabiato tarimari ema ġia vetoġana o laulauna dagarana ġetoma-rakariġoani tarimari eġofa-darererini. Ġia tauri ruarua tu kou karavana morena asikeikeinai e salfa nuġanai ġefiu-ġurarito.

²¹ Ma kotari tu hosi ai eraġeto tarimana bokana na vetari baġana eraka-rosito monana evaġi-masemaserito, ma manu mabarari ġeiaġoto, ġia virigōri ġeġani-ġosiġosirito.

20

Laġani 1,000 nuġanai kara beġorani

¹ Benamo au na aneru ta guba na emariġoto aġitaiato. Ġimanai tu guri variġo kwareġana, (iauka rakavari ġeri dibura), kina, ema tavi ta ġimanai tu seini asikeikeina ta.

² Ġia na mo ġuġaia kavana dagarana baregona eġabi-tariato, mo tu sene bava motana, arana tu Diabolo o Satani. Mo aneru na seini na ebarubaruato, benamo ġia tu laġani 1,000 moġesi barutarinai betanuni.

³ Ma aneru na eġabiato, guri variġo kwareġanai efiu-ġuraiato, benamo guri eloka-ġuato, ema ekadakada-ġuato. Aneru na Satani moġesina eveiato anina tu, tanobara irairau beseri asi bene ġofari, bene iaġo mo, laġani 1,000 benea kori. Moġa murinai bekeo-vaġiani, benamo murikai ġaro viravira ta moġo ma betanuni.

⁴ Ma terona kotari ma aġitarito. Mo terona iatari ai tu Barau na Kota beġene seġaġi maorona evinirito tarimari ġetanuto. Ma aboġeto tu, Iesu varina guruġari ġevaġa-moġonirito e ġekiragi-foforirito ema Barau ġena guruġa ġaramanai debari ġebasi-ġuturito tarimari iaukari maġuri aġitarito. Ġia tu mo vevaġa-rakava dagarana ema ġia vetoġana o laulauna ġeveiato dagarana asi ġetoma-rakariġo viniato, ema ġena maka bakuri ai o ġimari ai asi ġevaġa-kafarito. Ġia tu ġemaġuri-ġenoġoito, benamo Keriso ġesi laġani 1,000 ġevereto.

⁵ Mase na variġisi-ġenoġoi giniguinena tu moġa. Mase tarimari kotari tu asi roġo ġemaġuri-ġenoġoito mo, laġani 1,000 ea korito.

⁶ Mai mase na variġisi-ġenoġoi giniguinena beġe variġisini tarimari tu beġe iakuni ema vevaġa-namo barego beġe dogariani. Ġia tu mase vaġa-ruaruana seġukana na asi beġobirini. Ġia tu Barau ema Keriso ġeri Rubu Veaġa vereri ai beġe iaġoni, ema Keriso ġesi mo laġani 1,000 nuġanai beġe vereni.

Satani ġena keto

⁷ Mo laġani 1,000 bekorini murinai, Satani tu ġena dibura gabuna na beġe keo-vaġiani,

⁸ benamo beiaġoni, tanobara irairau beseri tanobara daġuni vasivasi nuġanai ġetanuni, mai tu Gog ema Magog, bea ġofa-taġuitaġuirini. Ġia mabarari bea ġori-vegogorini, vetari beġene veia ġana. Ġia mabarabarari beġe vegogoni tu, noġa kone mirina kavana asisebo-asisebo.

⁹ Tanobarana na beġe raka-iaġoni, benamo Barau ġena tarimarima ġetotoġato gabuna beġea gana-ġeġeraġiani. Mo totoġa gabuna tu Barau na eura-viniani sitina. Senaġi guba na karava emariġoto, benamo Satani ġena vetari dogōrori ema ġararito.

¹⁰ Benamo Diabolo, eġofarito tauna, tu karava moreri e salfa kouna nuġanai beġe fiu-ġurairani. Vevaġa-rakava dagarana ema peroveta tarimana ġofaġofana tu monai varau ġefiu-ġurarito. Tauri toitoi tu monai mo karava moreri na vanaġivanagi asi dokona asi magna beġara-tanurini.

Kota Baregona

¹¹ Moġa murinai au na terona kurokuronu baregona ema terona iatanai etanuto tarimana aġitaiato. Tanobara ema guba ġia ġoirana na ġeraka-veġitato, benamo asi ma ġeġita-ġenoġoirito.

¹² Benamo mase tarimari baregori ema keiri aġitarito mo terona kurokuronu baregona ġoiranai. Benamo buka tari ekeorito. Mo buka ekeorito murinai tu, buka ta ma ekeoato,

mağuri bukana tu moğa. Benamo mase tarimari mo buka tari moğeri ai ġeri veigā etorevanağirito ilailari ai Barau na ekota-vinirito.

¹³ Davarai ġemaseto tarimari davara na ġevariğisito, e Mase ema mase tarimari iaukari ġetanuni Gabuna (o Hades) na ġevariğisito. Benamo mabarabarari tata karakara ġevairito ilailari ai ekota-vinirito.

¹⁴ Benamo Mase ema mase tarimari iaukari ġetanuni Gabuna (o Hades) na ġevariğisito tarimari tu, karava kouna nuğanai ġefufiu-ğurarito. Mo karava kouna moğa, mo tu mase vağa-ruaruana.

¹⁵ Bema tarima ta arana mağuri bukanai asi ġeğoitagoato tarimana tu, mo karava kounai ġefiu-ğuraiato.

21

Guba ema tanobara variğuri

¹ Benamo guba variğuna ema tanobara variğuna ağitarito, korana tu guba guinena ema tanobara guinena tu ġerekwa-rekwato. Davara maki asiği.

² Ma vanuğa baregona veağana ağitaiato, mo tu Ierusalemna variğuna guba vanuğana na Barau ġenana emariğoto-ğoi. Ġia tu veğarağo variğu vavinena ġarağona ġena ġevağadabuğaiani ema ġevağa-vera ginikauani kavana.

³ Benamo ġaro baregona ta aseğagiato terona na eiağomato, maiğesi ekirato, “Toma Barau ġena tanu gabuna tu tarimarima ġesi, ġia toma tu tarimarima vefakari ai betanuni. Ġia tu Barau ġena tarimarimai beğe iağoni, ema Barau tauğena ġia seviseviru ai betanuni, [ema ġia ġeri Barau ai beiağoni].”

⁴ Ġia na matari gorari mabarari bedaurini. Mase e taği-vanorovanoro e tağitaği ġuruna ta ema midigumidigu tu beğe kori-ketovağini, korana tu dagara guineri mabarari ġekorito.”

⁵ Mo teronai etanuto Tarimana maiğesi ekirato, “Ġogitaia, au tu dagara mabarabarari avaga-variğu ġenoğoirini.” Ma ekirato, “Maiğeri guruğa tu notorevanağiri, korana mai tu guruğa moğoniri ema ġeri ai boğo vetuğamaği-dadamagini maki.”

⁶ Ma ekiraguto, ekirato, “Mabarari beğe kori. Au tu Alefa ema Omega, (giniguinena ema ginigabina), matamana ema dokona. Bokana bekokeni tarimana tu au na mağuri nanuna, eğaruğaruani dagarana, asi voina, baviniyani beniuani.

⁷ Rakava e meto bevaga-darererini tarimana, ġena kokore voina tu maiğeri mabarari beğaunarini, ema au tu ġia ġena Barau ai baiağoni, ema ġia maki au natugu ai beiağoni.

⁸ Senaği ġari ai asi ġeruğa-gwağigini e asi ġeveğabi-dadamani tarimari, vei-rakava na ġevevaga-miroto tarimari, vevaği-deba tarimari, ġekima-rakaorakaoni tarimari, ġemeğameğani e kwaivakuku ġetoma-rakarigo viniani tarimari, ema ġeğofağofani tarimari, mabarabarari ġeri gabu tu karava moreri e salfa ġeğarani kouna. Mai tu mase vağa-ruaruana.”

Ierusalemna variğuna

⁹ Ma aneru ta au ġegu ai eiağomato. Ġia tu mo aneru 7 guinenai ġimari tu diğu 7, mo diğu nuğari ai tu tarimarima vağa-midigu-midiguri dagarari oreri na ġevonuto aneruri ta. Ġia eiağomato, benamo au ema kiraguto, ekirato, “Noiağoma, be veğarağo variğu vavinena nama vağa-ğitamu, ġia tu Mamoe Natuna ġarağona!”

¹⁰ Benamo Barau Iaukana na eborogiguto, ma aneru na ġoro baregona e mauka kenenena ġana eğwa-iağoguto. Benamo monana vau siti veağana, Ierusalemna, Barau ġenana guba vanuğana na emariğoto-ğoi evağa-ğitaguto.

¹¹ Ġia ġenai tu Barau marevana mamana emamato-ğoi, ema siti marevana vetoğana tu fore namoka-namokari voiri asi keikeiri kavana, ema iaspa forena, fore veğiaveğiana kavana emamato-ğoi.

¹² Ġia mağuna tu asikeikeina ema maukana, ma ġatama bokana tu gabanana ruarua (12). Mo ġatama-boka 12 tu aneru 12 na ġeğita-ğaurito-ğoi. Mo ġatama-boka tata iatari ai tu Isaraela doğorori tata arari ġetorerito, mo tu Isaraela doğorori 12 moğeri.

¹³ Ġatama-boka tu toitoi ġaro erağeni rekenai (o east), ma toitoi ġaro evariğoni rekenai (o west), ma debana rekenai (o north) toitoi, ema gabina rekenai (o south) toitoi ġevairito.

¹⁴ Vanuğa baregona mağuna tu korana o duğu foreri 12 iatari ai ġevağa-ruğa-vaisiati. Moğeri fore iatari ai tu Mamoe Natuna ġena apostolo 12 arari tata ġetorerito, fore ta ara ta, ma fore ta ara ta.

¹⁵ Au ġesi ġaguruğa-guruğato-ğoi mo aneru moğa ġimanai tu makamaka rulana o vevağa-vetovo dagarana, golo na ġeveiati dagarana. Mo rula monana vanuğa baregona e ġatama bokana ema mağuna bemakarini.

¹⁶ Siti *ġevaġa-ruġaiato* daigunina tu vasivasi (4), e *ġena baġaka* ema mauka tu ilaila. Mo aneru na siti *vevaġa-vetovo* dagarana na etovoato, makana eġabiato tu stadia 12,000 o 2,400 kilomita. Ġia *ġena mauka* e *baġaka* ema varaġe maukana tu ilaila moġo.

¹⁷ Maġuna *ġena* barego maki etovoato, makana tu kiubit 144 o 70 mita. Tarimarima ġeri *vevaġa-vetovo* dagarana mo aneru na eġauvei-iaġiatio tu moġesina.

¹⁸ Vanuġa baregona maġuna tu iaspa, fore marevari asi ġadara dagarari, na *ġeragaiato*, ema siti tauġena tu golo namo vedaureari, ekimore-kimorerini galasi maki *ġevanaġirito* golori na *ġeragaiato*.

¹⁹ Vanuġa baregona maġuna *ġevaġa-ruġaiato* korana o duġu foreri tu fore namokanamokari irauirauri na *ġevaġa-veraiato*: Duġu forena ġiniguinena tu iaspa forena, *vaġa-ruaruana* tu safaia, *vaġa-toitoina* tu kalakedo, *vaġa-vasivasina* tu emeral,

²⁰ *vaġa-imaimana* tu sadoniki, *vaġa-6-na* tu konilian, *vaġa-7-na* tu krisolait, *vaġa-8-na* tu beril, *vaġa-9-na* tu topas, *vaġa-10-na* tu krisopres, *vaġa-11-na* tu haiasin, *vaġa-12-na* tu ametis.

²¹ Mo *ġatama-boka* gabanana ruarua (12) moġeri tu tata galasi foreri o pel voiri barego lelevaġiri e marevari irau veġata na *ġeverito*. *Ġatama-boka* ta pel ta, *ġatama-boka* ta pel ta. Siti dabarana baregona tu golo namo vedaureana na, noġa galasi kavana na *ġeveiatio*.

²² Vanuġa baregona nuġanai Rubu Veaġa ta asi aġitaiato, korana Vereġauka, Iarukorokoro Barauna, ema Mamoe Natuna, ġia tu mo vanuġa barana *ġena* Rubu Veaġa.

²³ Mo vanuġa baregonai *ġaro* mamana ema *ġue* mamana tu asi bemamani, korana Barau marevana mamana monai bemamani, ema Mamoe Natuna tu mo siti *ġena* lamefa.

²⁴ Tanobara mabarana besena tu *ġia* mamanai beġe rakani, ema tanobara vereri o kiniri mabarari na dagara e fafare marevari namori monai beġe *ġwa-toġarini*.

²⁵ *Ġaro* sebona ta maki vanuġa barana *ġatama* bokana asi beġe biririni, korana mo siti tu boġi na asi beġabi-*ġauani*.

²⁶ Tanobara irauirau mabarari ġeri fafare marevari ema ġeri taġa mabarana *ġia* *ġena* beġe *ġwa-toġarini*.

²⁷ Dagara ma mirona ta tu asi beraka-toġani, e maiaka ema *ġofaġofa* veġari beveini tarimana ta maki asiġina *ġinavaġi* beraka-toġani. Deidei Mamoe Natuna *ġena* maġuri bukanai arari etore-vanaġirito tarimari *ġereġari* moġo beġe raka-toġani.

22

Maġuri nanuna ġarukana

¹ Moġa murinai aneru na maġuri nanuna *ġarukana* evaġa-*ġitaguto*. Mo nanu tu negavaġura-vaġurana galasi kavana. Ma mo nanu tu Barau ema Mamoe Natuna ġeri terona na eġaru-rosito.

² Siti dabarana baregona nuġana *ġena* *ġeġaru-iaġoto-ġoi*. Mo *ġaruka* rikina reketa-reketai tu maġuri *ġauri* *ġetubuto*. Mo *ġau* tu *ġue* tata nuġari ai *ġwawari* *ġeġorato-ġoi*, mai tu laġani sebona nuġanai nega *vaġa-12* *ġeġwato-ġoi*; ema *ġau* lauri na tanobara mabarari beseri evaġa-namorito-*ġoi* e evaġa-maġuririto-*ġoi*.

³ Monana bevesinani beiaġoni, tarima ta iatanai o tanobara iatanai tovoġa ta tu asi ma betanuni. Barau ema Mamoe Natuna ġeri terona tu vanuġa baregona nuġanai, ma *ġena* vetuġunaġi tarimari na vetuġunaġina beġe *iaġo-vinini*.

⁴ Ġia *ġoirana* beġe *ġitaiani*, ema *ġia* arana maki *ġia* bakuri ai betanuni.

⁵ Monai boġi tu asiġina. Lamefa ema *ġaro* mamari ta asi beġe *ġitaiani* e asi beġe urani, korana Barau, Vereġauka na mama bevinirini. Ema *ġia* tu vere beġe tanu-vanaġi vanagini.

Iesu Vereġauka ma beġenogoi-iaġomani

⁶ Benamo mo aneru na au evaġa-guruġaguto, ekirato, “Mai guruġa tu moġoniri ema ġeri ai maki bovetuġamaġi-dadamagini. Vereġauka, *ġia* laukana tu peroveta tarimari mururi na eguruġani Barauna, *ġena* aneru etuġuato, *ġia* *ġena* vetuġunaġi tarimari kara dori *ġeġorani* dagarari bene *vaġa-ġitari* *ġana*.

⁷ *Ġoseġaġi*, au tu dori aiagosini. Mai buka nuġanai peroveta guruġari bekorana-iaġirini tarimana tu bene iaku.”

⁸ Maiġeri dagara aseġaġirito ema aġitarito tarimana tu au, Ioane maiġegu. Maiġeri dagara aseġaġirito ema aġitarito nai tu, ekira-varaguto ema evaġa-*ġitaguto* aneruna kwakuna koranai avetui-tarito, natoma-rakarigo vinia atato.

⁹ Senaġi *ġia* na ekiraguto, ekirato, “Maniġesi asi novei. Au tu *ġoi*, e *ġoi* tarikakamu peroveta tarimari, ema mai buka guruġana *ġekorana-iaġirini* tarimari *ġesi* ilaila, Barau vetuġunaġina aiagō-vinini. Barau notoma-rakarigo vinia!”

¹⁰ Moġa murinai ekiraguto, ekirato, “Mai bukai peroveta guruġari asi bono kada-*ġauri*, asi bono kure-toġari, korana nega tu varau bekvinaġi.

¹¹ Vei-rakava tarimana bene vei-rakava-iaġo roġo, veiġa mirori eveini tarimana veiġa mirori bene vei-iaġo roġo, veiġa iobukaiobukari eveini tarimana veiġa iobukaiobukari bene vei-iaġo roġo, ema veaġai etanuni tarimana veaġai bene tanu-iaġo.”

¹² Iesu maiġesi ekirato, “Goseġaġi! Au tu dori aiaġosini! Tarimarima ġeri ġauvei voiri tu au ġegu ai, be aġwa-iaġosirini. Tarimarima mabarari ġeri veiġa e ġauvei ilailari ai voiri bavinirini.

¹³ Au tu Alefa ema Omega, (giniguinena ema dokona), au tu tovotovona veġata ema magona.”

¹⁴ Ġeri dabuġa ġeġurigiirini tarimari tu beġe iakuni. Ġia tu Barau na maoro bevinirini, maġuri ġauna ġwana beġe ġaniani, ema vanuġa baregona ġatama bokana na beġe raka-toġani.

¹⁵ A kwaiva (o vei-rakava tarimari), ġemeġameġani tarimari, ġekimani e ġeveġura-vanaġini tarimari, vevaġi-deba tarimari, kwaivakuku ġetoma-rakarigo viniani tarimari, ema ġofaġofa ġeuradikani tarimari, mabarabarari tu siti murikanai beġe tanuni.

¹⁶ “Au, Iesu, na ġegu aneru batuġu-iaġosia, ekalesia doġorori ġeri mai vari moġonina ġomi neasi vaġa-ribami ġana. Au tu Davida garakana ema ġia ġenana aiaġomato Tarimagu. Au tu laġani visiguna, ma mamana baregona.”

¹⁷ Iauka Veaġa ema veġaraġo varigu vavinena ġekirani, “Noiaġoma!” Ema beseġaġini tarimana maki nekira, “Noiaġoma!” Bokana bekokeni tarimana bene iaġoma; ema beurani tarimana, mai maġuri nanuna, asi voina nanuna, bene niua.

Guruġa dokona

¹⁸ Mai bukai peroveta guruġari beġe seġaġirini tarimari mabarari akira-toreġaurini: Bema deikara na mai guruġa iatari ai guruġa tari betore-kaurini tarimana tu, mai bukai tarima vaġa-midiguri dagarari, ekiraġirini dagarari, Barau na ġia iatanai betore-kaurini.

¹⁹ Ma bema tarima ta na mai peroveta bukana na guruġa tari bekoki-vaġirini nai, ġia tu Barau na voina maġuri ġauna ġenai ema siti veaġana nuġanai monai tanu-vanaġivanaġi moġa, mai bukai ekiraġirini maiġeri, ġia ġenana beġabi-vaġirini.

²⁰ Maiġeri dagara bekiraġi-foforirini tarimana ekirani, “Oi, au tu dori aiaġosini!”

Amen. Iesu Vereġauka o, noiaġoma!

²¹ Iesu Vereġauka ġena namo ema vavvare-bara ġomi mabarami iatami ai bene tanu. Amen.